


Buka Tumute



The New Testament in the Mountain Koiali Language of Papua
New Guinea

Buka Tumute
The New Testament in the Mountain Koiali Language of Papua
New Guinea
Nupela Testamen long tokples Maunten Koiali long Niugini

copyright © 1981 Wycliffe Bible Translators, Inc.

Language: Mountain Koiali (Koiali, Mountain)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

PDF generated using Haiola and XeLaTeX on 11 Nov 2022 from source files dated 9 Oct 2020
db58c592-1903-54ff-a424-991321fd5949

Contents

FRT	1
Matiu	2
Maka	42
Luka	65
Dioni	105
Abostolo	133
Loma	166
1 Koliniti	183
2 Koliniti	199
Galesia	209
Evesasi	216
Bilibai	222
Kolosia	226
1 Tesalonia	230
2 Tesalonia	234
1 Timoti	236
2 Timoti	241
Taitasi	244
Bilimoni	246
Hibulu	247
Diemisi	260
1 Bita	265
2 Bita	270
1 Dioni	273
2 Dioni	277
3 Dioni	278
Diudi	279
Abokalubo	281
Read the New Testament	299
Hoto degomolebiae ihu	311

Iesu Keliso Hotoe Tumu
The New Testament in the Mountain Koiali language of
Papua New Guinea
Nupela Testamen long tokples Maunten Koiali long Niugini

Iesu Keliso Hotoe Tumu

The New Testament in the Mountain Koiali language of Papua New Guinea
 [kpx]

Translation by Wycliffe Bible Translators, Inc.

© 1981, Bible League International

Print publication, 1981 by Bible League International

Web version
 2014, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

Bukae Ivi

Matiu

Iesu valadae deiada

(Luka 3.23-38)

- ¹ Kou Iesu Keliso buluve deiadaike ko. Iesuu Ebalahamuta Deividita valadamo lohonu.
- ² Subuta mole Ebalahamuu Aisiki mamonu.
Ige Aisikiu Diekobo mamonu.
Ige Diekobou Diuda isi hohuvuiabe houevenu.
- ³ Ige Diudau Tamati Belesita Silata houevelu.
Ige Belesiu Heseloni mamonu.
Ige Heseloniu Alamu mamonu.
- ⁴ Ige Alamu Aminadabu mamonu.
Ige Aminadabuu Nasoni mamonu.
Ige Nasoniu Samoni mamonu.
- ⁵ Ige Samoniu Leiabuti Boasi mavolu.
Ige Boasiu Lutati Obedi mavolu.
Ige Obediu Diesi mamonu.
- ⁶ Ige Diesiu kosive Deividi mamonu.
Ige Deividu Ulaia mahina melamei Solomoni mamonu.
- ⁷ Ige Solomoni Liabomu mamonu.
Ige Liabomuu Abaisa mamonu.
Ige Abaisau Esa mamonu.
- ⁸ Ige Esau Diosabati mamonu.
Ige Diosabati Diolamu mamonu.
Ige Diolamuu Usaia mamonu.
- ⁹ Ige Usaiau Diotamu mamonu.
Ige Diotamuu Ahasi mamonu.
Ige Ahasiu Hesekaia mamonu.
- ¹⁰ Ige Hesekaiau Manasa mamonu.
Ige Manasau Amoni mamonu.
Ige Amoniu Diosaiia mamonu.
- ¹¹ Ige Diosaiia keu Diekoniaia mamoi hohuvuiabeta houevenu. Vani kela Babulonia ataeau lohoale Iselala ata moaga umudievei malevei abu vatae tilu.
- ¹² Kebia malevei tisege iaeabe Diekoniaia keu Siatieli mamonu.
Ige Siatieliu Selubabeli mamonu.
- ¹³ Ige Selubabeliu Abudi mamonu.
Ige Abudiu Eliakimi mamonu.
Ige Eliakimiu Eso mamonu.
- ¹⁴ Ige Esou Sadoki mamonu.
Ige Sadokiu Akimi mamonu.
Ige Akimiu Eludi mamonu.
- ¹⁵ Ige Eludiu Eliesa mamonu.
Ige Eliesau Matani mamonu.
Ige Mataniu Diekobo mamonu.
- ¹⁶ Ige Diekobou Dioseba mamonu.
Ige Diosebau Meli melamenu.
Ige Meliu Iesu mamonu.
- Ige Iesu ke abu ivihai avoe, "Keliso." Ivi ke ihu koseanu. Keu ata tedeavemale kosive.
- ¹⁷ Ebalahamu isi Deividi kebia vigomo valada bahata votiniu (14) ua. Ige Deividi vanimo lamisi lohoale Iselala ataeau Babuloniae timale ke vigomo valada votini (14) moleta ua. Ige Iselala ataeau Babuloniae timale isi Kelisou uale ke vigotamo valada mole votini (14) keta ua.

Iesuu uale deiada

(Luka 2.1-7)

- ¹⁸ Iesu Kelisou uale keu koseanu. Diosebau Meli kokovaito avuti ladeveholisega Munanae Tumuu Meli vuvunetige au ese manu. ¹⁹ Ige koliave Dioseba keu inutolotolote ata. Katealemo isiviholinu atae nimo Meli mai matitiliho. Kateaime isiviale tobekai au keate ke halei. ²⁰ Isi kateai huhuisege Kosive anelu moleu tababumo avue lohoale namihai avoe, "Dioseba, au Deividi valadamo lohonu. Ainaho Meli melameveve ke

vabuhavolive. Keu Munana Tumue vuvunemoike au ese ke manu. Iale momoleai melamenela. ²¹ Ige au mo mamoge ke ivihai kosea, 'Iesu.' Ivi ke ihuu koseanu. Auna au ata tetaevei vaveveabe toelamo malevei."

²² Kateai louale keu beloveta hoto mole mai selevetinu. Dilavau subuta beloveta ke namihage keu hoto koseale hisalianu. ²³ Avoe, "Ma molena au koliati lahaholisito ese mai. Ige ese keu uge abuna ivihai kosea, 'Imanuelo.'" Ihuve keu koseanu. Dilavau nahehi ua.

²⁴ Ige Diosebau hovelahai Dilava aneluu namihale ke nahate vai Meli melamenu. ²⁵ Isito avuti lahaholisige eseveu uge au ke ivihai avoe, "Iesu."

2

Luleleteau vaniu velemamaleve loholu.

¹ Iesu keu Diudia vatae o mole ivi Beteliamu keve ua. Ke vanimo kosive mole Elodi keu vatae kina baluga. Isege lulele ata degomole didimo deiada kaovamale keau vaniu velemamale keveatae lohoaleau Dielusalemale velehovolu. ² Keve velehovoi lohoale ata belagevei avoe, "Lana kove ese moleu gabie Diue kosive holiveve uale ke hilokalu. Vaniu velemamale keveatae no elehasege ese ke didiu velemanu. Ige no didi ke elehai ehovai lohoale isiviale ese ke hoesehavoi." ³ Kateige kosive Elodiu isi Dielusalemale ata bahata keau hoto ke evisi vikolahalu. ⁴ Ige Elodiu dubu nalimale kosive kebia isi Diue menaka loui haivemale kebia bahata hohavege abu lohoge au namigevei avoe, "Bukae Hotou louale Keliso kena o oleve ui." ⁵ Ige abu namihai avoe, "Diudia vatae o mole ivi Beteliamu keve auna ui. Hoto kateale beloveta moleu subuta hisalianu. ⁶ Avoe, 'Beteliamu, au Diudia vata kemo o esehame.

Isito o kemo umale la iviaua eseve holioholisito Diudia ata bahata kebiamo laeau baluga. Kosealemo la o kemo kosi molena lohoniege di ata Iselala kebia nalievei.'"

⁷ Kateige Elodiu hoto ke evisi lulele ata nehe hohavege abu loholu. Ige au kebia holoevei tiale lilikateve neniai didi keu velemale vaniho belagevege abu namihalu. ⁸ Ige Elodiu hanavei abuhu loui avoe, "Talive Beteliamue ese ke neniai kaovalive la elehaliege daho hoto hanavege data talive ese ke hoesehavoi." ⁹ Kateai louge abu halevai tilu. Halevai tisege didi nehe abu elehale keu abuhu uli holisi tiale ese keu uale hovadavemo atagai ua. ¹⁰ Ige abu ke elehai vahaeholahai ehovai tialeau o kemo velehovolu. ¹¹ O kemo velehovoi oe uvue tialeau ese keta neinaveta elehalu. Isime abu kome bokoai vata bisi ese ke hoesehavoi abu busi vavegevei kunai malei omilu. Kunai ibinate koseale golo, idi mole vabele ke nahate hagote, isi idi mole kemo senisi hagote vaevemale ke malei omilu.

¹² Iniale vavi kemo Dilavau tababumo kebia haivei avoe, "Lainaho hoidevei talive Elodi namihalive." Kateige keau humaha molela hoidevei abu vatae tilu.

Diosebau Iesuta neinaveta malei Egubitoe tinu.

¹³ Abu hoidevei tisege iaeabe Kosive anelu moleu tababumo Dioseba namihai avoe, "Hovelahai ese keta neinaveta holoevei detitisi Egubitoe tenela. Talive keve usege di aho louge bae lohonela. Kosealemo Elodiu ese ke hamaliho kaovama." ¹⁴ Kateai louge Diosebau hovelahai ese keta neinaveta holoevei vavimo detuluvisi Egubitoe tilu. ¹⁵ Abu tiale keve isiviai usege Elodiu hatisege abu bae hoidevei. Abu hoideveveve keu belovetau Dilava hoto louale ke mai selevetinu. Hoto keu koseanu. Avoe, "Di di mo hohavoge au Egubito halei lohonu."

¹⁶ Lulelete ata keau Elodi lobohavoge au itumu baluganu. Isi kateai au esemu hanavei avoe, "Talive Beteliamu moe eseau uale vagana abuita isi valaeabemo ui tiale kebia bahata havehatuve. Isi o ke vavae umale kebia moe eseta haveve." Elodiu didi kemoike ese kebia vagana hilokai kateale lounu. Au subuta lulele ataemo didi keu velemale vani ke kaovage abu namihalu. Iale kemoike au au esemu hanavege abu tiale ese kebia bahata havehatulu.

¹⁷ Abu ese kebia haveale keu beloveta Dielimaiau hoto louale ke mai selevetinu. ¹⁸ Avoe, "Lama vatae abu ese havehatuge keate mole ivi Leisolo keu kekoai nina balugama. Ige ataeau sovavihavoi tatolevage au hotoeabe evioholinu. Kosealemo eseve bahataeau haluvilu."

Abu Egubito halevai Nasaetae loholu.

¹⁹ Elodiu hatige Dilava aneluu tiale tababumo Egubitoe Dioseba namihanu. ²⁰ Avoe, "Hovelahai ese keta neinaveta holoevei tota hoilalahai Iselala vatae tenela. Kosealemo ese ke hamaho vamale keau haluvilu." ²¹ Kateige Diosebau hovelahai ese keta neinaveta holoevei abuhi Iselala vatae tilu.

²² Keve tiale evige Elodi mo Akaleasi keu lovove mai Diudia vata ke kosive holinu. Ige Diosebau keve uliho vabuige Dilavau tababumo namihage abu halevai Galili vatae

tilu. ²³ Keve tiale o mole ivi Nasaleta keve ua. Keve uale keu belovetaeau louale ke mai selevetinu. Belovetaeau loui avoe, “Abuna avuho loui kosea, ‘Nasaleta ata.’”

3

Ata babatisogevemale Dioni ke deiada
(Maka 1.1-8; Luka 3.1-18; Dioni 1.19-28)

¹ Vani kateimalela ata babatisogevemale Dioni keu Diudia botoe tiale Dilava hoto loui ata haivema. ² Abuho loui avoe, “La vaveve toela kebia halevei lohove. Kosealemo ataeau Dilava adae vuvunemo uveve vaniu aike vuguvuguanu.” ³ Iale Dioni vaveve keike beloveta Aisaiau subuta loui hisaliai avoe, “Ata molena bae botoe hoai kosea, ‘Kosive humaha ke inuta loive. La uvu hoesegevei vaveve toela halevai vaveve dua vave.’”

⁴ Dioni keu ata nimole. Ogove keu ovo mole ivi kamela ke vomo. Isege beletave keta ovo ke igae vate. Isege lovive abuike kainaku isi vidiae e. ⁵ Kateisege ata moagamoagaeau hotove eviliohi lohohu. Degomoleau Dielusalema o baluga kemo lohohu. Ige degomoleau Diudia vatamo lohohu. Ige degomoleau Diodani e vavamomo umale kebiata lohohu. ⁶ Loholiale abu vaveve toela louge Dioniu Diodani emo babatisogevenu.

⁷ Au kebia babatisogevemale Balisia ata isi Sadukea ata moaga keau avue lohoale isivilahale au babatisogevemale. Ige Dioniu elegevei abuho itumuai loui avoe, “La keau ute nahatea. Laeau isiviholilu Dilava itumuu lae lohohu. Isito laeau hoidevei Dilava ehovaholilu. Katealemoike Dilava itumuu laemo lohoma. ⁸ Iale vasohuta la vaveve toela halevai vaveve dua vave. Isi kemo bae babatisolahave. ⁹ Isito lainaha huhulahai kosea, ‘Noeau Ebalahamu valada noeabuliko. Dilava itumu keu bae noemo lohohivebene.’ Di la namigevege evive. Dilavana isivianiege mune kobia malevei abuemo Ebalahamu valada degomole vaevege abuna la lovomo ui. ¹⁰ Soeu idie umukamo heiliohi hemei ua. Iale idi oletena neniai baioholige auna idi ke heisi mai venemo mihatuge auna lahai. ¹¹ Ataeau abu vaveve toelamo hoideveike vage di emo babatisogevenu. Isito di iae lohoveve Iesu kena Munana Tumuteta veneta la babatisogevemale. Di iae lohoale keu ivite. Keu kosive baluga. Isito dau eseve. Iale di baluga holioholialemo tamakave iamoveve keu daemo anakianu. ¹² Iale ata kena lohoniege au keilota laisue i bisi kitoai hatuge momoluve abuna moleve keiolahasege ive abuna moleve keiolahai. Ige auna laisue i malei au valahumo otoveito momoluve ke malei venumo hodovavesite kemo mahoevei.” Dioniu hoto kateale loui namigevenu.

Iesuu babatisoale deiada
(Maka 1.9-11; Luka 3.21-22)

¹³ Vani kateimalela Iesuu au vata Galili halei Diodanie tinu. Keve tiale isivialeike Dioniu babatisohavoi. ¹⁴ Isito Dioniu vaveve katealeho isiviholinu. Isi namihai avoe, “A kove lohoale isiviale di a babatisohavoi. Isito au di babatisohavoge duave.” ¹⁵ Kateai louge Iesuu avuho loui avoe, “Halege aike kateale vanela. Ige kemo naitiabuna Dilava isivi ke vasa.” Kateale louge Dioniu hotove evisi babatisohavonu.

¹⁶ Ige Iesuu emo hovelahai elehage otogou dikolahage Dilava Munanae Tumuu ugu mole imutava ke nahate holisi dobai lohoale avuemo ua. ¹⁷ Ige otogomo hoto moleu loui avoe, “Keu di uvue mo seleve. Iale di vahaehove va baluganu.”

4

Seteneu isiviai Iesu lobohavoi.
(Maka 1.12-13; Luka 4.1-13)

¹ Vani kela Munanae Tumuu Iesu melamei ataeau uvesiteve tinu. Keve tiale Seteneu isiviale lobohavoge au kemo dobai. ² Ige Iesuu vanie ni voti (40) isi vavi voti (40) ke uvumo lovi ioholialelua vae balugatahoanu. ³ Ige Seteneu ke elehai avue lohoale namihai avoe, “A Dilava mo holiniege mune kobia namigevege abu beledi holige inela.” ⁴ Ige Iesuu namihai avoe, “Bukae Hotou loui avoe, ‘Atabeu bae lovi unaha isi kemo negoalivebene. Isito Dilava hoto bahata louale ketamo ataeabuna negolahai ugei.’”

⁵ Kateai louge Seteneu melamei oe tumu Dielusalema keve tiale Diue dubu baluga ke kobola laminu. ⁶ Isi namihai avoe, “A Dilava mo holiniege komo lamisi heila biloanela. Kosealemo Bukae Hotou loui avoe, ‘Dilavana au anelu hanavege abuna a evudege a bae munemo dobai a velo bokoalivebene.’” ⁷ Ige Iesuu namihai avoe, “Hoto keu seleve. Isito Bukae Hotou tota loui avoe, ‘Ainaha heiatu a kosive Dilava ke nego kaovalive.’”

⁸ Kateige Seteneu tota Iesu melamei tana baluga koboe tinu. Tiale keve lamisi vata bahata o bahata isi onobenobeabe ke malei haivunu. ⁹ Isi avuho loui avoe, “Ana a kome bokoai di hoesehavoge dana uokebia bahata malei aoi.” ¹⁰ Ige Iesuu avuho loui avoe, “Setene, di halei tenela. Bukae Hotou loui avoe, ‘Kosive Dilava ke igae hoesehavoi isivive unaha vanela.’” ¹¹ Kateige Seteneu halei tisege aneluiuu lohoale Iesu nalisi tedaholu.

Iesu vasohuta au lovi vale

(Maka 1.14-15; Luka 4.14-15)

¹² Vani mole abu Dioni mai dibulae mavoge Iesuu ke evisi halei Galilie tinu. ¹³ Keve tiale au o seleve Nasaleta kemo uoholisito tiale tabu baluga Galili ke vavamo o mole ivi Kabenumu kemo ua. Vata ke ivi abui. Mole ivilike Sebulani. Isege mole ivilike Natali. ¹⁴ Iesuu keve tai o keve uale keu beloveta mole Aisaiuu louale ke mai selevetinu. Iale hoto keu koseanu. ¹⁵ Avoe,

“Sebulani vata isi Natali vata keau tabu baluga ke vavae ua.

Isege vaki mole Diodani e keu ua.

Vata kebia ivi balugalike Galili.

Iale Diue ata holioholiale moagaeau keve ua.

¹⁶ Ata keau vavie vaveve vamale abuna bae ataga baluga elehai.

Ige ataga kena subuta vavimo ui uveve doge maholiale kebiamu atagai.”

¹⁷ Vani kemo Iesuu vasohuta au lovi vai ata haivei avoe, “La vaveve toelamo hoidevei lohove. Kosealemo ataeau Dilava adae vuvunemo uveve vaniu aike vuguvuguanu.”

Iesuu au esemu hohavenu.

(Maka 1.16-20; Luka 5.1-11)

¹⁸ Iesuu halei Galili tabue vavala ohanoi tinu. Tialeu abui hohote elegevesege abu abu ugabi hatui avuemo huena malema. Nanave ivilike Saimoni. Ige ivive moleike Biti. Isege hohove Andulu. ¹⁹ Iale abu huena malesege Iesuu namigeveve avoe, “Lohoi di ehovage di la haivege lana huena malemale ke nahate ata maleveve.” ²⁰ Kateai louge abu solekavesite abu ugabi halevai ehovai tilu.

²¹ Ehovai tige Iesuu tialeu Sebedi mo abui Diemisi isi Dioni kebia elegevesege keau abu boutimo ui abu mamaluvuta uguiavoi abu ugabi adahima. ²² Ugabi adahisege Iesuu hohavege abu boutita abu mamata halevei Iesuluvuta tilu.

Iesuu vavahanitebia hoesegevenu.

(Luka 6.17-19)

²³ Iesuu tiale Galili vata bahata keve Diue dubue ataeau Dilava adae vuvunemo uveve hotoe dua ke loui ata haivema. Isi vavahanite kebia hoesegevege abu momolelahama.

²⁴ Kateisege vaveveve hoto keu Silia vata ke bahata sonumai gabianu. Ige ataeau ke evisi abu vavahanitebia ata maleveve avue lohohu. Vavahani baluga koseimalebia. Munana toela malemale, tilogoamale isi velo golote kebia maleveve lohoge Iesuu kebia bahata hoesegevege abu momolelahahu. ²⁵ Ige ata moagatahvae ehovai. Degomoleau Galili vatamo lohohu. Isege degomoleau Dekaboli vatamo lohohu. Isege degomoleau Dielusalema o baluga kemo lohohu. Isege degomoleau Diodani e vaki mole keve lohohu. Ata keau bahata Iesu vaveve ke elehai ehovai.

5

Iesuu tanae visomo au esemu haivenu.

(Luka 6.20-23)

¹ Iesuu ata moaga kebia elegeveve halevei tanae tinu. Tiale keve ugulamosege esemiabeau lohohu vavavemo uguiavolu. ² Ige Iesuu kebia haivenu.

³ Avoe, “Oleuoleu hilokage uvuiabeu toelale keabuna vahaeholahi. Kosealemo Dilavana ata katealebia malevege abuna otogoe Dilava adae vuvunemo ugei.

⁴ “Ige oleuoleu uvulahale keabuna vahaeholahi. Kosealemo Dilavana kebia uvu hoesegevege abuna ue dua vai.

⁵ “Ige uvevete keabuna vahaeholahi. Kosealemo keabuna Dilava vatae doge keve ui.

⁶ “Ige oleuoleu Dilava vaveve dua keho isivi balugalahamale keabuna vahaeholahi. Kosealemo Dilavana isiviabe ke ovei hoesegevege abuna ue dua vai.

⁷ “Ige oleuoleu atahu uvulahai tadeavemale keabuna vahaeholahi. Kosealemo Dilavana kebiaho uvuai tadeavei.

⁸ “Ige oleuoleu uvuiabeau dua vale keabuna vahaeholahi. Kosealemo abuna Dilava elehai.

⁹ “Ige oleuoleu ata tadeavege abu uveve dua vale keabuna vahaeholahi. Kosealemo Dilavana kebiaho loui kosea, ‘Di esea.’”

¹⁰ “Ige oleuoleu Dilava vaveve keho isivilahai vatehani maleale keabuna vahaeholahi. Kosealemo Dilavana ata katealebia malevege abuna otogoe Dilava adae vuvunemo ugei.

¹¹ “Ige lata di esemu holiale kemo ataeabuna bae la vavamo lobolahi hotoe toela loui la aiogevei vatehani laovei. Ige lainaho ke huhulahalive. ¹² Isito vahaeholahave. Kosealemo lana bae otogoe ibina baluga maleve. Isi hoto ko huhulahave. Ataeau subuta katelahai beloveta aiogevege abu abuta vatehani malelu.”

Madea isi atagae deiada.

(Maka 9.50; Luka 14.34-35)

¹³ “La keau vatae ata bahatamo madea nahate. Isito madea kena toelage hevena uoholige auna oleve kateai bae tota heai. Keu anekianu. Ige abuna madea ke mai mihatuge ataeabuna avuela dai tai lohogei.

¹⁴ “Isi la keau vatae ata bahata kebia ataga. Iale o mole abu tanamo houge onobeu bamuholiale ke nahate vave. ¹⁵ Atabeu bae lameba hanei mai maua uvue mamolivebene. Isito auna ke mai ehanumage auna oe uvu bahatamo atagage ataeabuna atagavemo ui. ¹⁶ Iale ke nahate di isiviale la ataga kena ataemo atagai. Ige abuna la vaveve dua vale ke elehai la Mamau otogoe umale ke ivi ebagevai hoesehavoi.”

Iesuu Mosese menaka mai selevetievenu.

¹⁷ “Lainaho huhulahai loui kosea, ‘Kou lohoalemo Mosese menaka isime beloveta hoto keabuna uoholisi.’ Di katealeho lohoholinu. Isito dana hoto kebia malevei selevetievei. ¹⁸ Seleveta di la namigevege evive. Vatana otogoti uoholisege Dilava hoto bahataeabuna ui. Iniege au hoto ke bahata malei selevetiege hisalibehame keau bae uohollivebene. ¹⁹ Iale olena menakae hoto esehame egumai ata mole haivuge auna avuta ke nahate vage kena otogoe matama dogae tige ivivena esevhame holisi. Isito olena menakae hoto ehomai ata haivege abu ke nahate vage kena otogoe matama dogae tige ivivena balugai. ²⁰ Diue menaka loui haivemale isi Balisia ata keau nenilahi menaka ehovaholima. Iale lana ata kebia evigevei vaveve dua vaholliege la bae otogoe matama dogae talivebene.”

Itumuvevemo hotou lounu.

²¹ “La evige subuta menakau loui avoe, ‘Lainaho mole havegelive. Oleu menaka ke egumai ata hamage ke mai kotalahave.’ ²² Isito aikele di loui la namigevei. Olena au haokati itumuige ke mai kotalahave. Ige oleu au haokaho loui kosea, ‘A kina keu heholinu.’ Au kateige ke mai kanisoloe tige abu avuemo ke kaovai. Ige oleu au nanaho o au hohoho loui kosea, ‘A keu tilogoanu.’ Ata kateimale keabuna veneu hodovavesite keve tai. ²³⁻²⁴ Kataelemo lana isiviai ono mole mai tai dubue uvue Dilava hoesehavoho valiege mesoho la haokati la moleho loui itumuale ke huhulahaliege vasohuta talive la haoka hoesehavove. Ige itumu keu gabiage bae loholive Dilava hoesehavove.

²⁵ “Ige mesoho ata moleu laheho itumuai isiviai la malevei kotaho tiho vage solekai ke kaovai avuluvuta haokave. Lana solekai ke vaholige auna la malevei kotai. Ige kotae kovise kena la malevei bukate ovege abuna la malevei dibulai. ²⁶ Iale di la namigevege evive. Lana dibulaae uliege ke ibina bahata vahatugeto abuna bae la iovei.”

Mole keatehi ladeveholiveve hoto.

²⁷ “La evige subuta menakau loui avoe, ‘Lainaho mole keatehi hotohotoai ladevegelive.’ ²⁸ Isito di aikele loui la namigevei. La oleu keate mole elehai au uvumo huhuai kosea, ‘Di keate uketi hotohotoai lahage duave.’ Iale uvue huhuihuhui kemo au vaveve toela vanu. ²⁹ Mesoho la nie baiu vaveve toela elehage la ke vage tohoai mai mihatuve. Ige elike la vava bahata duaveai. Onoilage la ni keau la vava bahata malei venemo hatuma. ³⁰ Ige mesoho la ada inute keu vaveve toela vage ke heisi etulei mai mihatuve. Lana kateholige la ada keabuna la vava bahata aiogevei malevei venemo hatuevei.”

Mahina haleholiveve hoto.

(Matiu 19.9; Maka 10.11-12; Luka 16.18)

³¹ “Subuta menakau loui avoe, ‘Oleu isiviai au mahina haleho vaniege vasohuta haleveve beiba mai omisi.’ ³² Isito aikele di loui la namigevei. Keate oleu au kolia vavae vaveve toela vaholisege koliauve halege au tota kolia moleige malaha keu vaveve toelaike au ke au mahinaemo vanu. Ige mesoho malaha moleu keate ke melameale keta vaveve toela vanu.”

Lainaho vadeu valiho Dilava ivi lougelive.

³³ “La evige subuta menakau loui avoe, ‘La onole Dilava ivimo valiho louliege lainaho ke halevalive. Isito la louale ke vave.’ ³⁴ Subuta menakau kateanu. Isito di la namigevege evive. Lainaho onole valiho Dilava ivi lougelive. Isi lainaho loui kosea, ‘Otogoe biageu hilokanu.’ Kosealemo otogoe keu Dilavau umale matamae tumu. ³⁵ Isi lainaho

vatatamo katelalahalive. Kosealemo vata keu Dilavau velo mamomale matama. Isi lainaho Dielusalema ketamo katelalahalive. Kosealemo Dielusalema keu oe tumu. Kosive baluga umale matama. ³⁶ Isi lainaho loui kosea, 'Di kinamo di huhuige dana ke vai.' Kosealemo hoto katealeu bae onoige la kinau bukai mesoho sisoalivebene. ³⁷ Lainaho katelalahalive. Isito hoto seleve loui kosea, 'Ito.' O mesoho, 'Ba.' La hoto kateale louholisito hotoe toela kateimalouge keu Setenemo lohonu."

Lainaho toelae ibina vagelive.
(Luka 6.29-30)

³⁸ "Laeau evige subuta menakau loui avoe, 'Mesoho ata moleu la nimo hamage keduige lata talive nivemo hamage niveu keduai. O mesoho au la aie luhu hamai bokoige talive aive luhu hamai bokoave.' ³⁹ Isito aikele di loui la namigevei. Ata moleu vaveve toela vai la aiogevege lainaho ibinave valive. Mesoho au la mono vaki molemo hamage louge au tota vaki moleveatae hamai. ⁴⁰ Ige mesoho ata moleu la malevei kotai isiviai la sieti maho vage la dabae ogo keta mai omive. ⁴¹ Ige mesoho gamaniu a hanavoi isiviale a kunaiabe kakavei o moleve otovei. Ige ainaho kemo otovei hoilahagei. Isito tota mai talive o molemo otovenela. ⁴² Ige ata oleu onoleho isiviai la namigevege isivive ke mai omive. Isi mesoho isiviai aemo ono mole malive tota mai bae aoge ke mai ominela."

La aiogevemale kebia hoesegeveve.
(Luka 6.27-28, 32-36)

⁴³ "La evige subuta menakau loui avoe, 'La haokuvu kebiaho isiviai tedaevei hoesegeveve. Isito la aiogevemale kebia aiogeveve.' ⁴⁴ Isito aikele di loui la namigevei. La aiogevemale kebiaho isiviai tedaevei hoesegeveve. Isi la aiogevei vatehani laovemale kebiaho guligulilahageve. ⁴⁵ Kosealemo Dilavau ata bahata tedaevema. Au louge vaniu atae dua isi atae toela kebiamo haluma. Isi louge veniu vaveve dua vamale isi vaveve toela vamale kebiaho lohoma. Iale lana la Mamau otogoe umale ke nahate valiege eseve holive. ⁴⁶ Isito oleuoleu laheho isivilahai la hoesegeveale kebia unahaho lana isivilahaliege oleve kateai la ibina malei. Takesi malemale atae toela keau katelahai mole hoesegevema. ⁴⁷ Isi mesoho lainaho evievhilomale kebia nahate vai la haokuvu unaha hoesegevelive. Isito ata bahata kebia hoesegeveve. ⁴⁸ La Mamau otogoe vaveve dua unaha vamale ke nahate lata vaveve dua unaha vageve."

6

Kunaiholimale tedaeveve hoto.

¹ Iesuu tota au esemu namigevei avoe, "La vaveve hoesegeveve. Lana atae nimo vaveve dua vai isiviale abu la vaveve ke elehai la tabagevei loui kosea, 'Keau atae duae.' La kateige la Mamau bae otogoe ibinabe laovelivebene.

² "Katealemo la isiviai kunaiholimale kebia tedaeveho valiege lainaho kibi uvuge ataeau evisi lohoi la elegevelive. Loboee ata unahae abuna dubue mesoho oe vaveve kateale vagei. Kosealemo keau isiviale katelahage ataeau kebia elegeveime hoesegevei. Iale di louge evive. Ata keau ataemo abu ibina malelu. Isito abu bae Dilavamo ibina malelivebene. ³ Katealemo la kunaivesite kebia tedaeveho valiege lainaho ata namigevege abu hilokalive. Isito tobekai tedaeveve. ⁴ Ige atabeu bae la vale ke hilokalivebene. Ige la Mamau la kebia tedaeveale kemo auna la elegevei ibina laovei."

Guliguliveve deiada.
(Luka 11.2-4)

⁵ "Di tota hoto mole louge evive. La guligulihaliege lainaho loboe ata kebia nahate valive. Keau isiviale dubue mesoho ologoe lavisi guligulilahage ata bahataeau elegevei. Isito ko huhulahave. Keau vata kove abu ibina bahata malelu. ⁶ Iale la guligulihaliege talive oe uvue lilikate udaha bamui la Mama imihave. Ige la Mamana la lilikate guliguliale ke elehai ibina laovei.

⁷ "La guligulihaliege lainaho la noinoi ke loui dekubegelive. Evievhilomale keau katelahama. Abu huhulahai avoe, 'No guliguli katelahage Dilavana no hoto evisi.' ⁸ Iale lainaho vaveveabe ke nahate vagelive. La onole loui la Mama namihaveve ke au subuta hilokanu. ⁹ Iale la guligulihio valiege noinoi koseale vave.

"No Mama, otogoe umale no isiviale ataeau a ivie tumu hoesehavogei.

¹⁰ No isiviale a matamae dogau lohoale kela abu otogoe a isivi vale ke nahate ata bahata vata komo a isivi vai.

¹¹ Isi nova no isivie lovi ke noevenela.

¹² Isi ata degomoleau noemo vaveve toela vage no ke huhuoholisito momahavoale ke nahate no vaveve toela abuemo vale ke ulihanela.

¹³ Ainaho no halevesege no Setene lobomo dobuluvilive.

Isito vaveve toela vamale kemo no malevei halio.

Kosealemo ataeabuna a adae vuvunemo vani bahata a atagamo ui tigei.”

¹⁴ Noinoi kateale vave. Isi lana ata degomoleau vaveve toela laemo vale ke huhuoholisito momagevege la Mamau otogoe umale kena la vaveve toela ulihai me momahavoi. ¹⁵ Isito mesoho ata degomoleau vaveve toela vai la aiogevege la ke huhulahai momageveholige la Mamau otogoe umale keu bae la vaveve toela vale ke ulihai momahavolivebene.”

Dilava hoesehavoho lovi ioholiveve

¹⁶ “La Dilava hoesehavoho lovi ioholilieve lainaho vae ni valive. Lobo ata keabuna katelahai vae vaveve vage niabeu toelage ataeabuna kebia elegeveve abuho uvulalahai. Isito di la namigeveve. Keau vata kove ibina malealemo abu bae otogoe ibina malelivebene.

¹⁷ Isito lainaho katelahalive. La Dilava hoesehavoho lovi ioholilieve la ni totolalahai la kina bive. ¹⁸ Katealemo ataeau bae la vaelahale ke hilokalivebene. Isito la Mama igaena la liikate vale ke elehai ibina laovei.”

Otogoe kunai keau seleve.

(Luka 12.33-34)

¹⁹ “Lainaho vata komo kunai moaga bevuai otovegelive. Lana katelahasege segele abuna bohisi. O mesoho abuna vogolahai toelai. O mesoho vavolo ataeabuna la o vusahai kunai malei. ²⁰ Lainaho katelahalive. Isito la uvu malei otogoe vavevemo mavoge segeleau bae bohilivebene. Isi vogolahai toelalivebene. Ige ataeau vavoloalivebene. ²¹ Vaveve keu koseanu. Vani bahata la kunai umale keve la uvuna ugei.”

La ni keau la vavae ataga.

(Luka 11.34-36)

²² “La ni keau la vavamo lameba nahate. La ni abuna duavage la uvutana atagai. ²³ Isito la ni abuna toelage la uvuna loai. Iale ke nahate Dilava atagau la uvumo uale kena atagage la vaveve keabuna dua vai. Isito kena atagaholige la vaveve bahatae abuna toelai.”

Lainaho vatae kunai huhu moagelive.

(Luka 16.13; 12.22-31)

²⁴ “Esemubeu bae kosi abuiho lovalivebene. Auna kateaniege mole isivi omisi mole kabebihavoi. Isi mesoho moleho neniai loviaito moleho neniai lovalivebene. Iale ke nahate la bae Dilavata monita igaetoai ehovallivebene.

²⁵ “Katealemo di la namigevege evive. Lainaho la uvevemo lovita eta huhu moagelive. Isi lainaho la ogo vaveve keta huhu moagelive. Kosealemo nahie vava isi nahie uveve keau baluga. Isito lovi, ogo keau baluga holioholilu. ²⁶ Ugu kebia elegeveve. Keau lovilalahai lovi malei valahu bioholisito la Mamau otogoe umale keu kebia nibieveve lovi ovema. Iale laeau kebia evigeveale kemo Dilavana la tedeave dua vai. ²⁷ La oleu au uveve ke huhu moaganiege auna oleve kateai au uveve vagana ke mai egetisi. Katealiveu anekianu.

²⁸ “Iale osiohoike la ogo huhu moagama. Botoe valavalau ulimale vaveveabe kebia elegeveve. Keau lovilalahai ogo vaveveholima. ²⁹ Isito di la namigevege evive. Solomoni keu kunai moagate. Iale keu ogoe dua vama. Isito ogoe dua kebiau valavalae dua kebia evigeveholilu. ³⁰ Valavala keabuna nova uito nivu tutukai gililahage ataeabuna bevieveve mahoevege keabuna uoholisi. Isito Dilavau kebia gadegeveve nalieveale ke nahate auna la nalieve ogo laovei. Seleveta auna laheho kateale vai. Isito la evievi keu esevehameanu. ³¹ Iale lainaho huhulalahai kosea, ‘Dana oleve kateai lovita ogota malei.’ ³² Evieveholimale kebulike vatae onobenobe huhu moagama. Isito la Mamau otogoe umale keu laemo onoleu uholiale ke hilokanu. Iale auna ke laovei. ³³ Isito vasohuta Dilava matamae doge ke humaha kaovai vaveveve dua keta kaovai isivive vage auna onobenobe kebia bahata laovei. ³⁴ Iale lainaho nivu lohoveve vaveve ke huhulalahalive. Kosealemo nivue vani ke toelate la hilokaholilu. Isito vani igaegaela vaveve toelau ui lohoma.”

7

Lainaho mole vaveve toela kaovagelive.

(Luka 6.37-38, 41-42)

¹ Iesuu kateai louito tota au esemu namigeveve avoe, “Lainaho mole vaveve toela kaovai abuemo loui kosea, ‘Keau vaveve toelate.’ Lana mole vaveve kaovaholige Dilavau bae avuta la vaveve toela kaovalivebene. ² Isito la kateale vage Dilavana la vale ke nahate vai la aiogeveve. Isi la onole ataho louale ke nahate Dilavana laheho loui. ³ Di louale keu koseanu. La isiviale la haokae nimo louka mai. Isito la kateisege la nimo louka balugau

ua. ⁴Louka balugau la nimo uale kemo lana oleve kateai la haokaho loui kosea, ‘Lohoge di a nimo loukae esehameu uale ke mai.’ ⁵Loboe ataea, lainaho katelahalive. Isito vasohuta louka balugau la nimo uale ke maito bae la haokae nimo loukae esehameu uale ke mave.

⁶“Isi lainaho ono mole tumute malei to ovelive. Isi lainaho la kunaie dua malei oove vudimo hatulive. Lana kateige abuna kemo daliege hoidevei la uagevei. Iale ke nahate ata degomole abuna Dilava hoto evisi aiohavoge halevei teve.”

Dilava imihaveve hoto
(Luka 11.9-13)

⁷“Lana Dilava imihage auna la isivi ke laovei. Isi lana ono mole kaovaliege bae mave. Isi lana udaha hamage auna bae laheho alavoi. ⁸Kosealemo oleuoleu onoleho Dilava imihage auna isiviabe ke ovei. Isi oleuoleu ono mole kaovale ke abuna mai. Isi oleuoleu udaha hamage auna abuhu alavoi. ⁹La olena eseveu beleidiho imihage auna vali mune mai omisi. ¹⁰O mesoho au huenaho isiviage auna vali ute mai omisi. Ba, keu anekianu. ¹¹La hilokage laeau vaveve toela vamale ataea. Isito laeau la ese kebia hoesegevei isiviabe ke oveveve ke hilokalu. Iale ke nahate lana la Mamau otogoe uale ke imihage auna la vaveve ke evihai onobenobe dua laovei.

¹²“Isito la isiviage ataeau la hoesegeveho vage lata ata kebia hoesegeveve. Mosese menaka isi belovetaeau louale kebia ihuiabeike ke.”

Otogoe tiveve humahadae ese.
(Luka 13.24)

¹³“Udaha esehame kela velehovoi teve. Isito lana udaha baluga kela velehovoi humaha vototela tiliege veneu hodovavesite keve teve. Ata moaga keau humaha votote kela tima. ¹⁴Isito udaha esehamela velehovoi ukolikoli maleveve keu toloanu. Iale ata moagavesiteau humaha kela tima.”

Loboe belovetae hoto
(Luka 6.43-44)

¹⁵“Loboe beloveta kebiamo nenilahave. Keabuna la lobogevege vaveveabe elehilehi keabuna duaveai mamoe nahate vai. Isito uvuiabe toela keu botoe tobalu ke nahate. ¹⁶Iale ata kebiau onole vamale kemo lana kebia hilokaeeveve. La bae laokamo vultu ehalivebene. Isi la bae sesenamo madilini ehalivebene. ¹⁷Idie dua kena hahuhumie dua vai. Isege idie toela kena hahuhumie toela vai. ¹⁸Idie dua keu bae hahuhumie toela valivebene. Ige idie toela keu bae hahuhumie dua valivebene. ¹⁹Iale idi molena neniai hahuhumie dua vaholige abuna ke heisi mai mahoi. ²⁰Iale ke nahate loboe beloveta keabuna onole vage lana kemo vaveveabe hilokave.”

Dilava esemu selevela.
(Luka 13.25-27)

²¹“Ata moagaebuna daho loui kosea, ‘No Kosive.’ Isito kebiamo degomoleau bae otogoe matama dogae talivebene. Isito oleuoleu di Mamau otogoe umale ke isivi vamale kebia unahaeabuna ehue tai. ²²Ige vani keu lohoge ata moagaebuna di namihai kosea, ‘Kosive, no a ivimo Dilava hoto loui munanae toela nunuvei vikoe vaveve moaga valu.’ ²³Kateai louge dana abuhu loui kosea, ‘Di la hilokaevoholinu. Laeau vaveve toela vamalea. Iale tai evihave.’”

O houmale ata abui
(Luka 6.47-49)

²⁴“Ata oleuoleu di hoto ko evisi vale keau lulelete ata nahate. Luleleteau mune golomo abu o houevelu. ²⁵Ige veni balugau lohoge eu lalamoge heluka balugau utuai isiviai o ke egumai. Isito o keu bokolahaholinu. Kosealemo abu mune golomo houlu. ²⁶Isito ata oleuoleu di hoto ko evisito vaholiale keau luleleholiale kebia nahate. Luleleholiale keau esagamo o houlu. ²⁷Ige veni balugau lohoge eu lalamoge heluka balugau lohoi o ke ehobehage eu mai tinu.”

²⁸Iesuu hoto kateale louge uoholige ata keau au hoto louale ke evisi vikolalahu. ²⁹Kosealemo Iesu keu Diue menaka loui haivemale kebia nahate vaholinu. Isito keu vuvunemo ata haivenu.

8

Iesuu lebolasite hoesehavonu.
(Maka 1.40-45; Luka 5.12-16)

¹Iesuu tanae goloe ui ata haiveniale uoholige au tana halei hevalohoge ata moagataho avuluvuta lohohu. ²Avuluvuta lohosege lebolasite ata moleu Iesue lohoale au kome

bokoai vudivemo vata bisi namihai avoe, “Kosive, a isivianiege di hoesehavonela.”³ Kateai louge Iesuu avuela holisi namihai avoe, “Ito, dana a hoesehavoi.” Hoto ke lousege solekavesite malaha kemo lebolasiu uoholinu.⁴ Ige Iesuu avuho loui avoe, “Evinela. Ainaho di a hoesehavoale ko atabehe loulive. Isito inuta talive a ebika mai dubu nalimale ke haivuge au a vava elehai a namihage Moseseu louale ke nahate ono mole mai mahoi Dilava hoesehavoge ataeabuna ke elehai hilokage a vavau dua vanu.”

Iesuu Loma gamanie esemu hoesehavonu.

(Luka 7.1-10)

⁵ Iesuu kateaito lohoaleu Kabenumu oe velemanu. Keve velemasege Loma tuvalie kosive moleu avue lohoale isiviale Iesuu esemuve tedahoi.⁶ Isi namihai avoe, “Kosive, di esemu moleu vavahani toela vage tumuu hamage kibikibiholisito oe uvue laha unahama.”⁷ Ige Iesuu loui avoe, “Dana tiniage hoesehavoge auna momoleai.”⁸ Ige tuvalie kosive keu namihai avoe, “Kosive, dau bae atae duabene a bae di oe uvue lohoi. Isito ana hoto unaha louge di esemu kena momoleai.”⁹ Di hilokage tuvalie kosive baluga keau vuvune mai daovale kemo dana di tuvalie esemu namigevege abuna di isivi ke vai. Dana mole namihai kosea, ‘Tenela.’ Ige auna tai. O mesoho moleho loui kosea, ‘Loho.’ Ige auna lohoi. O mesoho dana di omo loviamale esemu namihai kosea, ‘Ke vanela.’ Ige auna vai. Iale ana hoto unaha louge di esemu kena momoleai.”¹⁰ Kateai louge Iesuu ke evisi vikoanu. Isi avuluvuta lohoale kebiaho loui avoe, “Di la namigevege evive. Di Iselala ataemo evievi koseale negote elehaholinu.¹¹ Seleveta di la namigevei. Iselala ata holioholiale moagaeabuna vaniu velemai dobamale keve lohologie Dilava matamae doge keve Ebalahamume, Aisikime, Diekobome kebiahi uguivaoi igaetolahi lovi isi.”¹² Isito Iselala ata moagaeau bae otogoe talivebene. Dilavau isiviale keau otogoe tai. Isito keau isiviholige auna malevei heie matamae loe hatuge abuna keve ui uvulahi ninalahaima bae monomo hediavegei.”¹³ Kateai ata namigeveito tuvalie kosive ke namihai avoe, “A oe tenela. A evievi kemo a onoleho isiviale kena velemai.” Kateale lousege tuvalie kosive ke esemu keu momoleanu.

Iesuu ata degomole hoesegevenu.

(Maka 1.29-34; Luka 4.38-41)

¹⁴ Iesuu halei Bitu oe tinu. Keve tiale Bitu mea elehage keu hobeai avae golomo lahai ua.¹⁵ Ige au adavela holige hobeveu uoholinu. Ige keate keu hovelahai avuho lovi vanu.

¹⁶ Iniale gutuige munanae toelaeau ataemo biloluvimale kebia ataeau malevei Iesuu lohohu. Ige Iesuu munanae toela kebiaho louge keau halevei tilu. Isi vavahanite kebiata hoesegevege abu momolelalahu.¹⁷ Au kateale vale keu beloveta mole Aisaia ke hoto mai selevetinu. Keu subuta hisaliale keu koseanu. Avoe, “Avu igaena nahie vavahani isi nahie vatehani kebia malei hatui.”

Iesu ehovaveve deiada

(Luka 9.57-62)

¹⁸ Ata moaga keau Iesu evilikahavoge Iesuu au esemu namigevei avoe, “Nahi tabu ko houhi vaki moleve tai.”¹⁹ Kateai namigevesege Diue menaka loui haivemale ata moleu avue lohoale namihai avoe, “No haivemale ata, ana oleve keve tige dana aiti tai.”²⁰ Ige Iesuu namihai avoe, “Seleveta ana isiviale daiti tai. Ovoveabuna abu aeamamo ladevegei. Ige uguivabuna abu hanidamo ladevegei. Isito Atae Eseu lahaveve ou uoholinu.”²¹ Kateige Iesu esemu moleu Iesuho loui avoe, “Kosive, usege di vasohuta talive di mamau hatiale mai guliaito bae lohoi a ehomai.”²² Ige Iesuu avuho loui avoe, “Halege haluviveve keau bae mole malevei gulivei. Isito au di ehomanela.”

Hanunuu eti Iesu hoto evilu.

(Maka 4.35-41; Luka 8.22-25)

²³ Iesuu kateai louito halei au esemu holovei abuhi boutimo biloluvilu.²⁴ Biloluvisi tisege solekavesite hanunu balugau lohoi boutimo lohoge eu balugai vuloai bouti uvue hahosihovosege Iesuu lahanu.²⁵ Ige esemuabeau avue tiale etuvai loui avoe, “Kosive, no aike emo tima. Iale no tediaevenela.”²⁶ Ige Iesuu abuhu loui avoe, “La osiohoike vabulahama. Le evievi keu esevehame.” Kateai louito hovelahai hanunuta eta hotogevege hanunuu uoholige eu tolemanu.²⁷ Kateige keau ke elehai vikolalahu. Isi loui avoe, “Malaha oletealeike ko. Kou hanunuta eta hotogevege abu hotove evisi isivive valu.”

Iesuu munanae toelate malaha hoesegevenu.

(Maka 5.1-20; Luka 8.26-39)

²⁸ Kateaito boutimo tiale tabu ke vaki mole vata mole ivi Gelasene keve velehovolu. Keve velehovoi dobuluvisige alue vutae umale malaha abuaiu lohoale Iesuemo loholu. Munanae toelaeau kebiamo holoeavoge keau ovo aihanite ke nahate. Katealemo atabeu bae humaha kela talivebene. ²⁹ Iale ata keau lohoale kekolahai Iesu namihai avoe, “Dilava mo, a isiviale noemo osioi. No aiogeveve vaniu sohu lohoholinu. Iale osiohoike a isiviale nova no aiogevei.” ³⁰ Kateai lousege vavaeabemo ovo degomoleau lovi isi olahama. ³¹ Ige munanae toela keau negolahai Iesu namihai avoe, “Ana no nunuvei no hanavege no ovo kebia uvue deluhovoi.” ³² Ige Iesuu abuhou loui avoe, “Teve.” Kateige abu ata abui kebia halevei ovoe uvue deluhovolu. Ige ovo bahata keau detuluvisi tialeau seika vuvegevei tabu balugamo biloluvisi e isi haluvilu.

³³ Ige ovo kebia nalievemale keau detuluvisi tialeau oe velehovoi munanae toelaeau ata kebia haleveale deiada ke bahata loui ata namigevelu. ³⁴ Ige o kemo umale keau bahata isiviale Iesu elehai. Isi tilialeau elehai baita namihai avoe, “No isiviale no vata ko halei tenela.”

9

Iesuu kibioholiale malaha hoesehavonu.

(Maka 2.1-12; Luka 5.17-26)

¹ Abu kateai louge Iesuu boutimo biloi hoilahi au o seleve keve tinu. ² Keve tige ata degomoleau ata mole vavahanite ebavoi loholu. Vavahanite keu kibikibiholisito avae golomo lahai u unahama. Ige Iesuu kebia evievi hilokai vavahanite ke namihai avoe, “Di mo, vahaehoanela. Di a toela bahata ulihage uoholinu.” ³ Kateige Diue menaka loui haivemale degomoleau ke evisi huhulahi avoe, “Ata kou hoto kemo Dilava ivi aiohavonu. Kosealemo Dilava igaena atae vaveve toela ulihagei.” ⁴ Ige Iesuu huhuihuhuiabe ke hilokai abuhou loui avoe, “La osiohoike huhuihuhui toela kateale huhulahama. ⁵ Dana hoto onoleale loui. Dana valive malaha ke namihai kosea, ‘Di a toela ulihage uoholinu.’ Emena dana loui kosea, ‘Hovelahai tenela.’ La huhuige hoto oleteu toloholinu. ⁶ Isito halege dana vavahanite ke hoesehavoge lana kemo hilokage vaveve toela ulihaveve vuvune keta daemo ua.” Kateai louito vavahanite ke namihai avoe, “Hovelahai a ava egumai mai a oe tenela.” ⁷ Ige malaha keu hovelahai au oe tinu. ⁸ Oe tisege ataeau ke elehai vabulahi Dilava hoesehavolu. Kosealemo au vuvune kateale mai Iesu ominu.

Iesuu Matiu hohavonu.

(Maka 2.13-17; Luka 5.27-32)

⁹ Iesuu o ke halei tiale malaha mole takesi malemale elehanu. Iviveike Matiu. Iale keu takesilahamale oe uvue ugulamosege Iesuu avuhou loui avoe, “Di ehoma.” Ige au hovelahai Iesu ehomanu.

¹⁰ Iniale gabie Iesuu avuti ovemo lovi isege haokuvuiabe takesi malemale isi atae toela degomole keau lohoale Iesuluvuta igaetoai esemuiabe kebiahi igaetoai lovi ima. ¹¹ Lovi isege Balisia ata degomoleau ke elehai Iesu esemuhou lovi avoe, “Osiohoike la haivemale keu takesi malemale isi atae toela kebiahi lovi ima.” ¹² Katelahai louge Iesuu ke evisi abuhou loui avoe, “Medikolou bae negote kebiaho loholivebene. Isito auna vavahanite kebia unaha hoesegevelihou lohoi. ¹³ Ke nahate dau lohoale kou atae dua kebia hohaveho lohoholisito vaveve toela vemale kebiahoike di lohonu. Iale talive Dilavau subuta Bukae Hotomo louale ke ihu kaovave. Au loui avoe, ‘Di isiviholiale la ovo hamai mahoi di hoesehavoliho. Isito di isiviale la la haokuvuhu uvulahai tedaevi.’”

Lovi ioholisi Dilava hoesehavoveve deiada

(Maka 2.18-22; Luka 5.33-39)

¹⁴ Vani mole Dioniu ata babatisogevemale ke esemuiou lohoale Iesu belahi avoe, “Osialemoike no Balisia atahi vani degomole Dilava hoesehavoho lovi ioholima. Isito a esemuiou no vale ke nahate abu vaholilu.” ¹⁵ Ige Iesuu namigevei avoe, “La huhuige mo molena au mahina melamege haokuvuiabe abuna uvulahai. Emena vahaeholahi. Ba, abuna vahaeholahi. Isito vani mole atae toelae abuna loholiege mo ke hamage haokuvuiabe abuna bae uvulahai lovi i halevai.

¹⁶ “Isito di hoto louge evive. Atabeu bae ogoe doge etulei mai ogo mole mamiu dikolahalemo badivulivebene. Kosealemo auna kateige ogoe mami kena bae dikolahai vahai. ¹⁷ Ke nahate atabeu bae uainie doge mai ovoe vate badivuale mamivemo ehosivalivebene. Auna kateige kena savai dikolahai. Ige uainie e kena hosilahai lotihatui. Isito atabena uainie doge mai ovoe vate dogamo ehosivage keu bae dikolahalivebene. Iale ke nahate di vavevu bae vatae vavevehi igaetoalivebene.”

Iesuu ma moleu hatiale etuvanu.

(Maka 5.21-43; Luka 8.40-56)

¹⁸ Iesuu abuhō kateale lousege Diue kosive moleu avue lohoale vudivemo kome bokoai vata bisī imihai avōe, “Di mau aike hatinu. Iale lohōlive a ada mai golovemo mamōge au hōvelahai.” ¹⁹ Ige Iesuu ke evisi hōvelahai avuti tige esemuveau ehovai avuluvuta tilu.

²⁰ Avuluvuta tisege keate moleu vavahanie toela male keu lohoale Iesu ogola holinu. Vavahanie keu koseanu. Vagana tuelo (12) ke uvumo tahoe toelau uvuvemo lohoma. ²¹ Iale au huhuai avōe, “Dana Iesu ogola hōliniege momoleai.” Kemoike au Iesu ogola holinu. ²² Ige Iesuu hōilahai elehai avuhō loui avōe, “Di ma, vahaehoanela. A uvu bahata mai daemo mamōike vage vavahani keu aemo uoholinu.” Kateai lousege vavahanive keu uohōlige au momoleanu.

²³ Iesuu kateaito halei tiale kosive nehe ke oe velemanu. Keve velemāi elehage ataeau ninalahai kekolahage ninanau kutikutiai ua. ²⁴ Ige Iesuu namigeveī avōe, “La bahata halevai teve. Ma keu hatiholinu. Isito lahaike au ke vanu.” Kateai louge abu bituhavoi hehavolu. ²⁵ Isito ata bahata heie tihatusege Iesuu oe uvue tiale ma ke adala hōlisi ebagemage ma keu hōvelahanu. ²⁶ Ige vaveveve hoto keu vata ke bahata sonumai tai gabianu.

Iesuu ni kedute abui hoesegevenu.

²⁷ Iesuu o ke halei tisege malaha abuita ni kedute keau Iesu ehovai baita hōhavoi avuhō loui avōe, “Deividi mo, noheho uvuai no tēdaevenela.” ²⁸ Kateige au tiale o mole uvue tisege abu avuemo tilu. Ige Ieus belageveī avōe, “Lana huhuige dana vali la hoesegeveī.” Ige abu loui avōe, “Ito, Kosive.” ²⁹ Kateige Iesuu niabela hōlisi loui avōe, “La evievimo la ni koebuna dua vai.” ³⁰ Kateai lousege niabeu dua vanu. Ige abu nilahai elehalu. Ige Iesuu neniai abuhō loui avōe, “Lainaho ko loui atabe namihālive.” ³¹ Isito abu halevai tiale Iesuu vale hoto ke louge hoto keu vata ke bahata sonumai gabianu.

Uvute malaha moleu hotoanu.

³² Keau halevai tisege ata degomoleau ata mole uvute mai Iesue lohōlu. Munanae toelau avuemo bilōige keu uvute hōliale. ³³ Ige Iesuu munanae toela ke nunuvage solekavesite malaha keu hotoai hoto lounu. Ige ataeau ke elehai vikōlahai loui avōe, “Iselala vata komo nahi subuta vaveve kosealehe elehahōlilu.” ³⁴ Ige Balisia ataeau loui avōe, “Ba, munana toelae kosiveike vuvune mai omige vuvune kemoike au munanae toela nunuvema.”

Iesu lovi vaveve moagaeau uohōlige au uvuanu.

³⁵ Iesuu halei tiale o baluga isi o ese ke bahatala oanu. Isi keve dubuiabela ataeau Dilava adae vuvunemo uveve hōtoe dua ke loui haivema. Isi vavahanitebia moaga hoesegevema. ³⁶ Isi ata moaga elegeveī abuhō uvu tumutumuanu. Kosealemo ata kebiau mamōe nahate. Ige nalievemale atau uohōlige abu tebulahale ke nahate vai u kavama. ³⁷ Isi au esemuhō loui avōe, “Lovi moagaeau baelahalu. Isito lovi ke malei omo otoveveve ataeau moagahōlilu. ³⁸ Iale bulu ke biageho gulguliage au lovi ke malei otoveveve ata hanavege abu lovive bahata malei omo otovei.”

10

Iesu abostolo tuelo (12)

(Maka 3.13-19; Luka 6.12-16)

¹ Iesuu au esemu tuelo (12) hōhavege abu igaetoasege au munanae toela nunuveveve vuvune ovei vavahanitebia hoesegeveve vuvune keta ovenu. ² Abostolo kebia iviābuike kōea. Mole ivilike Saimoni Bitā. Ige hōhove Andulu. Ige Sebedi mo abui Diemisi isi hōhove Dioni. ³ Ige Bilibi. Ige Batolomi. Ige Tomasi. Ige takesi malemale ata Matiu. Ige Aloveasi mo Diemisi. Ige Tadeasi. ⁴ Ige Keīnānie ata mole Saimoni. Ige Iesuho haiaveve malaha mole Diudasi Kaliota.

Iesuu au abostolo tuelo (12) hanavenu.

(Maka 6.7-13; Luka 9.1-6)

⁵ Iale Iesuu esemu tuelo (12) kebia hanavei abuhō loui avōe, “Lainaho Diue ata hōliohōliale kebiae talive. Isi lainaho Samalia o kebiatae talive. ⁶ Isito Iselala ata kebiae teve. Keau mamōeau halae iae tai tebulahale ke nahate. ⁷ Iale kebiae talive haivei kose, ‘Ataeau Dilava adae vuvunemo uveve vaniu vuguvuguanu.’ ⁸ Isi vavahanite hoesegeveī haluvimalebia tatuveve. Isi lebolasiamale kebia hoesegevege vavaeabeau duavai. Isi ataemo munanae toela nunuveve. Isito lainaho abuemo ibina malelive. Kosealemo la vuvune ke ibina valebene bae abuemo ibina malei. ⁹ Iale la tiliege lainaho la busimo golo, siliva isi benibehame kina malei āgilive. ¹⁰ Isi lainaho suveika malelive. Isi ogo

hatuveve, tamaka, bedoea kebiata lainaho malelive. Lana ata kebiaho lovilahage abuna bae la tedaevei kunai laovei.

¹¹ “La o molemo velehovoliege talive elehage mesoho ata moleu laheho isiviai la malevei o hatuevege avuluvuta ulive bae halevai teve. ¹² La o ke uvue deluhovoi uliege ata kebia hoesegeveve. ¹³ Ige mesoho o ke biaeau la hoesegeveve la tedaevege la hoesegeveale vaveve kena bae abuemo vuvune selevai. Isito mesoho keau la hoesegeveve la tedaevoholige la hoesegeveale keu bae abuemo vuvunealivebene. ¹⁴ Isito o molemo abu la hoto evioholisi la malevei o hatueveholige o ke halevai anakaabemo la veloe gogea sesilahave. ¹⁵ Seleveta di la namigevege evive. Dilava kotae vaniu lohoge keabuna vatehani baluga malei. Isito Sodomata Gomolata keabuna vatehani eseve malei.”

Vaveve tolaeau laemo lohoveve
(Maka 13.9-13; Luka 12.12-17)

¹⁶ “Di louge evive. Laeau mamoe nahate. Di tobalue vigomoike la hanavema. Iale ute lulele ke nahate vai ugu mole imutava ke vaveve nahate via ata aioegeve halevave. ¹⁷ Isito nenilahave. Diue ataeabuna loholiege la malevei kotaho tai. Isi la malevei abu dubue tiliege visuta la visugeve. ¹⁸ Isege Diue ata holioholiale keabuna la malevei vatae kosive kebia vudimo otovei laemo kotalahai. Ige lana keve uliege hotoe dua loui namigeveve. ¹⁹ Abu la malevei kotalahage lainaho gasigasiai la onole louveve ke huhulahagelive. Kosealemo vani kena lohoge Dilavana la onole louveve ke laovei. ²⁰ Ige la vani kemo bae la hoto loulivebene. Isito la Mamae Munanae Tumuu la uvumo uale ke hoto unaha lana louve.

²¹ “Vani kela ese igae abuna moleho hailahage ataeabuna kebia havei. Ige mamuvuiabe keabuna abu eseho hailahage eseaeb kebiata abu mamuvuta neinuvutaho katelahage ataeabuna havei. ²² Ige la di esemu holialemo ataeabuna laheho itumulahi huhuihuuie tola vai. Isito oleuoleu abu evievimo negolahamale keabuna vanie gabila ukolikoli malei. ²³ Isi o molemo abu la aioegeve vatehani laovege o ke halevai tota o moleve teve. Di la namigevege evive. Iselala o bahata kebiamo lana la lovi ko vai gabioholisege Atae Esena lohoi.

²⁴ “Vatehani malemale keu koseanu. Esemue hoto keu bae haivemale ata ke hoto ke evihalivebene. Ige esemubeu bae au kosive evihalivebene. ²⁵ Iale esebulu keabuna haivemale ata ke nahate vage duave. Ige esemuiau abu kosive vaveve ke nahate vage keta duave. Dau kosive. Ige ataeau daho loui avoe, ‘Setene.’ Ige laeau di esemuia. Iale abuna laheho hotoe tola baluga kateale lougei.”

Lainaho la aioegeveve kebia vabugevelive.
(Luka 12.2-9)

²⁶ “Lainaho ata vabugevelive. Kosealemo vaveve tola abu vai mahogovamale keabuna bae umidamo ui. Ige hotoe tola abu loui mahogovamale kebiatae abuna bae umidamo ui. ²⁷ Ige di vavimo onole loui la haiveale ke vanimo louve. Isi di onole loui mulumulage la eviale ke ologomo baita loui ata namigeveve. ²⁸ Lainaho ataeau lahaveveve ke vabuhavolive. Keau bae la munana havelivebene. Isito la vava unaha. Isito Dilava igae vabuhavove. Kosealemo auna isivianiege la munana isi la vava malei veneu lahai hodovavesite keve hatuge abuna uoholisi. ²⁹ Lana maketie tiliege ugue ese abui voiegeve ibinaeabena benie kina igae. Ugu keu baluga holioholinu. Isito molena dobai hatige la Mamana ke hilokai. ³⁰ Ige laeau baluga. Dilavau la kinae vomo ke bahata dodavei hilokaevei gabianu. ³¹ Iale lainaho vabulahagelive. Kosealemo ugueau Dilava nimo eseve. Isito laeau nivemo baluga.

³² “Oleuoleu atae vudimo loui kosea, ‘Dau Iesu ata dailike ko.’ Ige dana data ehue di Mamae vudimo loui kosea, ‘Di ataike.’ ³³ Isito oleuoleu atae vudimo loui kosea, ‘Dau Iesu ke hilokaholinu.’ Ige dana data ehue di Mamae vudimo loui kosea, ‘Di ata ke hilokaholinu.’”

Iesuu lohoale vaveve keu ata tasaligevenu.
(Luka 12.51-53; 14.26-27)

³⁴ “Lainaho huhulahai kosea, ‘Di vata kove lohoaleu vatae ata bahataeau uveve duae valihoike di lohonu.’ Ba, di lohoale keu tuvalie vaveve nahate valihoike di lohonu. ³⁵ Di lohoale kemo ataeabuna mole tasaligeveve uvu igaealivebene. Movena au mama aiohavosege mavena au neina aiohavoi. Isege maivu abuna abu mea aiohavoi. ³⁶ Katealemo ese igaeau o igaemo umale keabuna molehi ugologoloi.

³⁷ “Olena au uvu mai daoholisito au uvu bahata mai au mama au neina kebiamo otoveniege auna oleve kateai di ata holisi. Isi olena au uvu mai daoholisito au uvu bahata mai au esemo otoveniege auna oleve kateai di ata holisi. ³⁸ Isi olena di ehomai

vatehani maleho isiviholiniege auna oleve kateai di ata holisi. ³⁹ Iale olena au ebika unaha huhuaniege au bae ukolikoli malivebene. Isito olena au ebika huhuoholisito di ivimo vatehani malei hatiniege auna ukolikoli mai.”

*Ibina maleveve hoto
(Maka 9.41)*

⁴⁰ “Olena la tedaavei la hoesegeveniege dailike au ke tedahoi hoesehavonu. Isi olena di tedahoi di hoesehavoniege di hanavoale keike au ke hoesehavonu. ⁴¹ Isi olena beloveta tedahoi huhuai kosea, ‘Kou Dilavae ata. Iale dana ko tedahoi.’ Auna kateaniege avuta beloveta ibina ke nahate auna mai. Isi olena atae dua tedahoi huhuai kosea, ‘Kou Dilava atae dua. Iale dana ko tedahoi.’ Auna kateaniege avuta atae duae ibina ke nahate auna mai. ⁴² Iale ko huhulahave. La di esemu holiale kemo oleuoleu la tedaavei e seli hai laoveale kena bae au ibina mai.”

11

*Dioniu Iesu vaveve kaovaho au esemu hanavenu.
(Luka 7.18-35)*

¹ Iesuu hoto kateale loui au esemu tuelo (12) namigeveniale gabiage au o ke halei tiale o ke vavae o degomole biaemo hotoe dua loui haivenu.

² Vani kemo au kateisege ata babatisogevemale Dioni keu dibulae uniale Iesuu vamale hoto ke evinu. Isi au esemu degomole hanavege abu avue loholu. ³ Lohoale Iesu belahai avoe, “Dioniu subuta loui avoe, ‘No tedaavei ata kena bae lohoi.’ Iale ata ke anike ko. Emena noeabuna mole hemei ui.” ⁴ Ige Iesuu namigevei avoe, “Hoidevei talive la onole elehai eviale ke loui Dioni namihave. ⁵ Namihai kosea, ‘Ni keduteau nilahama. Ige velo goloteau olahama. Ige lebolasite kebia vavahaniu uoholima. Ige golemateau hoto evima. Ige haluvialeau hovedevema. Isime di hotoe dua loui kunaiholimale kebiata haivema.’ ⁶ Oleuoleu dolodoloholisito au evievi daemo mamoaale kena vahaeho balugai.”

⁷ Kateai louge abu hoidevei tisege au Dioni deiada loui ata moaga kebia namigevei avoe, “La botoe tiale Dioni elehage keu ata oleteale. La huhuige auna au uvu mai Dilavaemo mamoi negobedai laminu. Emena helukau kulumo mamoge kuluu kibikibiale ke nahate vanu. ⁸ La keve tiale ata oleteale elehalu. Lana elehage kena ogoe dua vamale atanike. Ba, ogoe dua vamale keau bae botoe ulivebene. Isito abuna oe duamo ugei. ⁹ Di tota la namigevei. La keve tiale onole elehalu. Lana beloveta elehalu. Seleveta belovetai ke ke elehalu. Isito keu beloveta kebia vaveve evigeve baluganu. ¹⁰ Dioni vaveve keike Bukae Hotou loui avoe, ‘Dana di esemu mole hanavoge auna aho uli holisi tiniege ata namigevei kosea, Kosiveu lohoma.’” ¹¹ Kateaito tota loui avoe, “Seleveta di la namigevema. Ata babatisogevemale Dioni keu ata bahata vata komo uale kebia evigevenu. Isito ivi vesiteu di ata holisi Dilava adae vuvunemo uale keu Dioni evihanu. ¹² Vasohuta Dioniu ata haivei lohoale vani kela isi novae vani komo ataeau isiviholilu Dilava adae vuvunemo uliho. Isito abu isiviai abu negotemo ui. Kateike abu vai Dilava hoto ke bamui esemuiabe aiogevema. ¹³ Moseseu menaka hisaliage belovetata hisaliale hoto ke ataeau subuta evisi ehovalu. Isito Dioniu lohoale ataeau Dilava adae vuvunemo uveve hoto ke loui ata haivenu. ¹⁴ Subuta beloveta moleu hisaliai avoe, ‘Ata mole ilaidia ke nahatena lohoi.’ Iale lana di hoto ko evisi mage ata keike Dioni. ¹⁵ Iale la olemeau hoto evimaleau hoto ko evive.”

¹⁶ “Dana onole tovetove novae atate kobiaho loui. Keau esebuluaui ologomo uguivaoi gilulahamale ke nahate. ¹⁷ Esebulu abuna moleho loui kosea, ‘Noeau laheho sale hamageto laeau havulahaholilu. Isi noeau ninalahageto laeau nohehi ninalahaholilu.’ Iale novae vani komo la vaveve keau esebulu kebia vaveve nahate. ¹⁸ Kosealemo Dioniu subuta lohoale lovi ioholisi uaini halege ataeau ke elehai avoe, ‘Keu tilogoe ataike.’ ¹⁹ Iniale Atae Eseau lohoniale lovita uainita ige ataeau ke elehai loui avoe, ‘Ata ke elehave. Keu lovi ivolovolimale ataike. Keu uaini isi momaime takesi malemale atae toela kebiahi haokuvuanu.’ La hoto keu esebulue hoto nahate. La louale kemo ataeau hilokage la lulelehililu.”

*O degomoleau Iesu hoto evioholiale deiada
(Luka 10.13-15)*

²⁰ Iesuu kateai louito hoto mole negote lounu. Au subuta o degomole keve tiniale vikoe vaveve moaga vage keau kemo abu vaveve toela halevaholilu. ²¹ Iale kemo Iesuu kebiaho loui avoe, “Kolasini ata, la nohovu. Isi Betesaida ata, la nohovu. Vatehani balugana bae laemo lohoi. Kosealemo di laemo vikoe balugana bae laemo lohoi. Kosealemo di laemo vikoe vaveve moaga vavevege la ke elehaito la vaveve toelamo hoideveholilu. Subuta mole Taea isi Saidoni keve di vaveve kateale vatebene abu ogo bukate hatui uti hohumai

uvulahi abu vaveve tola halevalu. Isito laeau kateholilu. ²² Iale di la namigevege evive. Gabie Dilava kotae vaniu lohoge auna vatehani eseve Taeata Saidonita ovei. Isito la kebia auna vatehani baluga laovei. ²³ Isi Kabenumu ataea, di laheho louge evive. La isiviale la ebika tabagevei malei otogoe otovei. Isito di la namigeve. La keabuna veneu lahai hodovavesite keve tihatuve. Laeau vikoe vaveve moaga elegeveito la vaveve tola haleveholilu. Isito subuta Sodoma ataeau vaveve kateale elehavatebe o keu aike ua. ²⁴ Iale di la namigevege evive. Gabie Dilava kotae vaniu lohoge auna vatehani eseve Sodoma ata kebia ovei. Isito auna vatehani baluga la kebia ovei.”

Lohoge Iesuu vokovoko laovei.
(Luka 10.21-22)

²⁵⁻²⁶ Iesuu hoto kateale loumale kela Dilava imihai avoe, “Di Mama, au otogota vatata Kosive. Au a lulele malei luleleholiale kebia ovenu. Isito vatae ataeau abu ebika tabagevei kemo luleleage a a lulele malei kebia oveholinu. Di Mama, a kateale vale keu a isivilike. Katealemo di a hoesehavoma.”

²⁷ Iesuu guliguli kateale vage uoholige au ata namigevege avoe, “Di Mamau onobenobe bahata daonu. Ige ataeau moveta Mamaveta hilokaholilu. Isito Mamave igaeike au mo hiloka selevelanu. Ige move igaeike au Mama hiloka selevelai au isivie ata tabagevei lulele ovege abu Mamave hilokalu.

²⁸ “La oleuoleu onoleu uvuvemo isuige dae lohoge dana ke mai evihage vokovokoai. ²⁹ Kosealemo dau uvevete. Iale lana di esemu holiliege daemo lulele maleime lu maleve. ³⁰ Iale di kovu mai laoveve keu isuholinu. Isi lovita mai laoveve keu toloholinu.”

12

Atae Ese keu bulae Kosive.
(Maka 2.23-28; Luka 6.1-5)

¹ Vani mole bulamo Iesuu au esemuhi konee bulue ohanoi tisege esemuiabeau vaelahai kone dakoai ilu. ² Ige Balisia ataeau ke elehai Iesu namihai avoe, “Elehanela. A esemuiabu bulamo kateale vai menaka eguvalu.” ³ Ige Iesuu abuhu loui avoe, “Lana Bukae Hotomo Deividu au esemuhi vaelahaima vale ke dodaveholilu. ⁴ Deividu Dilava dubue uvue tiale beleidi tumute ke mai inu. Dubu nalimale unahae abuna beleidi ke igei. Isito vani kela Deividu menaka ke egumai beleidi ke isi au esemu ovege kebiata ilu. ⁵ Isime lana Mosese menaka dodavelu. Mosese buka kemo bula bahata dubu nalimale keau dubue lovi vamale kemo keau menaka eguvalu. Isito keu tola holioholinu. ⁶ Isito di la namigevege evive. Ata mole aike komo uale keu dubu ke evihanu. ⁷ Subuta Bukae Hotomo Dilavau loui avoe, ‘Di isiviholinu la ovo havei mahoi di hoesehavoliho. Isito di isiviale la moleho uvulahi mole tetaevei.’ Iale la ke ihu hilokavatebe la ataeau menaka eguvaholiale kebia aiogevholilu. ⁸ Atae Ese keu bulae Kosive. Iale auna onole louge abuna ke vai.”

Ada golote hoesehavoale deiada
(Maka 3.1-6; Luka 6.6-11)

⁹ Iesuu kateaito bulu ke halei dubuiabe moleve tinu. ¹⁰ Keve ata mole ada goloteu ua. Ige ata degomoleau keve uale isiviale Iesuu vaveve mole vage abuna vaveveve kemo kotalahai. Iale abu belahai avoe, “A huhuige ata molena bulamo vavahanite hoesehavoge keu momoleige vaveve kena nahie menaka egumai.” ¹¹ Ige Iesuu namigevege avoe, “Mesoho la moleu mamoe oveniege mamoe moleu abatamo dobage auna ke laluvai. Emena auna osioi. Auna ke laluvai. ¹² Isito ovo keau baluga holioholisito ataeau Dilava nimo baluga. Iale kemoike nahie menakau nahiho humaha alavoale kemo nahiabuna bulamo ata tetaevege duave.” ¹³ Kateai louito ada golote ke namihai avoe, “A ada hatunela.” Ige malaha keu au ada hatuge adaveu adave mole ke nahate vai inutolotoanu. ¹⁴ Ige Balisia ataeau ke elehai halevai Iesu hamaliho humaha kaovalu.

Iesu keu Dilava esemu seleve.

¹⁵ Iesuu ke evisi o ke halei tige ata moagaeau ehovai tilu. Ige au vavahanitebia hoesegevege abu bahata momolelalahalu. ¹⁶ Ige au kebia namigevege avoe, “Lainaho di vale ko loui ata namigevege.” ¹⁷ Au kateai louale keu Dilavau beloveta Aisaia namihale hoto ke mai selevelinu. ¹⁸ Au loui avoe, “Di esemuike ko.

Di ke ebagemai di isivi avuemo mamoi vahaehove vanu.

Iale dana di Munanae Tumu omige auna di kotae vaniu lohoveve ke loui vatae ata bahata namigevege.

¹⁹ Isito keu bae itumuai baita loulivebene.

Isi au bae ologomo baita hoto loui aivolovoloalivebene.

²⁰ Ata degomole evieviabeu negoholimale kebia auna bae hoesegevei.

Isi olemeau vaveve toelamo dobuluvimale kebia auna bae tabagevei.

Auna ata kebia negotievenata gabie vaveve toela aiogevesege vaveve dua unahana ui tigei.

²¹ Ige vani kemo vatae ataeabuna abu uvu mai avuemo mavoi.”

Aisaiau Dilava hoto kateale loui hisalianu.

*Iesu vuvune mena Setene vuvune
(Maka 3.20-30; Luka 11.14-23)*

²² Ata degomoleau malaha mole ni kedute isi uvute ke melavei Iesue loholu. Kosealemo munanae toelau avuemo biloige keu kateanu. Iale Iesuu ata ke hoesehavoge keu niai hotoanu. ²³ Ige ataeau ke elehai tetelahalau. Isi mole belagevei avoe, “La huhuige Deividi mo nehenike Dilavau nahi tedeaveho hanavoale. Emena.” ²⁴ Ige Balisia ataeau ke evisi loui avoe, “Munanae toelae kosive Biesabolo keike au vuvune omige au vuvunevemo munanae toela kebia nunuvema.” ²⁵ Isito Iesuu huhuihuhuiabe ke hilokai isiviai deiada mole loui haivege abuna kemo hilokage keu Setene vuvunemo munanae toela nunuveholinu. Au abuhu loui avoe, “Vata mole ataeau mole tasalievei mole haveliege ata keau bae ui egealivebene. Ige o igaemo valada igaeanu mole tasalievei abu moletehi mole haveliege abuna solekai uoholisi. ²⁶ Iale ke nahate Setene ataeabuna mole tasalievei abu moletehi mole havege Setene vuvune kena solekai uoholisi. ²⁷ La loui kosea, ‘Munanae toelae kosive Biesabolo keu vuvune daoge di munanae toela nunuvema.’ Isito di ke vuvunemo kebia nunuveholima. Dana kateai Setene vuvunemo kebia nunuvege la esemu abuna ole vuvunemo munanae toela kebia nunuvei. Iale lana la esemu belagevege abuna loui kosea, ‘Dilava vuvunemoike no kebia nunuvema.’ Ige di data kateale vama. ²⁸ Iale di Dilava Munana Tumue vuvunemo munanae toela nunuvege la hilokage Dilava matamae doge ke vuvuneu laemo lohonu.

²⁹ “Atabeu bae malaha negote ke oe uvue tai kunaive vavoloalivebene. Isito auna vasohuta malaha ke umuvaito bae ove kemo kunaive malei.

³⁰ “Ata oleuoleu di tedahoholimale keau di aiahavomale ataeabulike. Isi ata oleuoleu di ata maleveveve kemo di tedahoholimale keau ata kebia nunuvema. ³¹ Katealemo di laheho louge evive. Ata olena vaveve toela vai hotoe toela onole louge Dilavana ke ulihai. Isito ata olena Munanae Tumuhu hotoe toela loui aiahavoge Dilavau bae ke ulihalivebene. ³² Iale ata oleuoleu hotoe toela loui di aiahavoge Dilavana toelave ke ulihai. Isito oleuoleu hotoe toela loui Munana Tumute ke aiahavoge Dilavau bae vata kove toelave ke ulihalivebene. Isi gabie otogo ketave au bae ulihalivebene.”

*Idie dua isi idie toela
(Luka 6.43-45)*

³³ “Nahi idi bahata hahumamale ke hilokalu. Nahi hilokage idie dua kena hahuhumie dua vai. Isege idie toela kena hahuhumie toela vai. ³⁴ Ige laeau ute nahate toelalu. Iale la bae oleve kateai hotoe dua loui. Kosealemo ataeau abu aimo loulale keu abu uvumo huhulahamaleike abu ke louma. ³⁵ Atae dua keu huhuihuhuiabe dua vamale kemo auna hotoe dua lougei. Isege atae toela keu huhuihuhuiabe toela vamale kemo auna hotoe toela lougei.

³⁶ “Iale di la namigevege evive. Dilava kotae vaniu lohoge ataeau hoto ihuve uoholisi abu heiatu loulale ke ibina abuna bahata malei. ³⁷ Vani kemo Dilavana la hoto loulale ke kaovai. Ige oleu hotoe dua loulale keho auna loui kosea, ‘A vavevevemo inutolotoanu.’ Isito oleu hotoe toela loulale keho auna loui kosea, ‘A vavevevemo toelale kemo ibinae toela manela.’”

*Diona vavevemo hilokave.
(Maka 8.11-12; Luka 11.29-32)*

³⁸ Iesuu kateai louge Diue menaka loui haivemale degomole isi Balisia ata degomole keau loui avoe, “Kosive, no isiviale au vikoe vaveve mole vage no elehai.” ³⁹ Ige Iesuu loui avoe, “Novae ata la koeau atae toelaea. La Dilava halevai vaveve toela baluga vama. Katealemoike la di belahai isiviale di vikoe vaveve vage la elehai. Isito di bae la louale ke valivebene. Isito beloveta mole Dionau vale ke nahate dana data vai. ⁴⁰ Subuta Dionau vanie ni abuita igaeta uvumo vatae uvue ui. Iale ke nahate Atae Esena vanie ni abuita igaeta uvumo vatae uvue ui. ⁴¹ Gabie Dilava kotae vaniu lohoge Niniva ata keabuna hoveveve la vaveve toela ke laemo loui. Kosealemo subuta Dionau hotoe dua loui haivege abu ke evisi abu vaveve toela halevalu. Isito di la namigevege evive. Ata moleu Diona ke evihale keike kou la vigo mo ua. Isito laeau hotove evioholilu. ⁴² Ige

Dilava kotae vani kela vata mole kuini Siba kena hovelahai la vaveve toela ke laemo loui. Kosealemo keate keu haeavamoleve Solomoni luleleai ata haivemale ke evisi elehaho lohonu. Isito di la namigevege evive. Ata moleu Solomoni ke evihale keike ko la vigomo ua. Isito laeau hotove evioholilu.”

Munanae toela bahata eiti (8)

(Luka 11.24-26)

⁴³ “Di hoto mole louge evive. Munanae toelana ata mole halei tiniege eu uvesiteve uveve matama kaovai. ⁴⁴ Isito uveve matamabeve uoholige auna huhuai kosea, ‘Dana hoilalahi talive di subuta uale kemo ui.’ Kateaime hoilalahi lohoniege elehage oe neheu au uvu hoesehavoge onobenobe toelau avuemo uoholinu. ⁴⁵ Ige munanae toela kena halei tiniege munanae toela seveniau (7) vuvune balugale kebia holoevei abuhi loholiege ata nehe kemo deluhovoi. Ige ata kena toela selevelai. Kosealemo subuta munanae toela igaeu avuemo ua. Isito gabie munanae toela eiti (8) keau avuemo ua. Iale novae vani kome vaveve katealena atae toelamo lohoi.”

Olemeabulike Iesu neinuvi isi hohuvuiabe.

(Maka 3.31-35; Luka 8.19-21)

⁴⁶ Iesuu hoto kateale loui ata namigevesege neinaeveu hohuvuiabe holoevei lohoaleu velehovoi heie uime isiviale avuluvuta hotohotoai. ⁴⁷ Ige ata moleu Iesu namihai avoe, “Eleha. A neinau a hohuvu ehai abuhi heie ua. Iale abu isiviale aluvuta hotohotoai.” ⁴⁸ Ige Iesuu loui avoe, “Di neinaike ole. Ige di hohuvuiabuikie olemea.” ⁴⁹ Kateai louito au esemumo ada bisi loui avoe, “Elehave. Koeau di neinuvi isi di hohuvuiabuikie koea. ⁵⁰ Iale oleuleu di Mamau otogoe uale ke isivi vamale keau di hohuvuia, di amakinuvia, di neinuviua.”

13

I degomole sesiale deiada

(Maka 4.1-9; Luka 8.4-8)

¹ Vani kemo Iesuu kateai louito o ke halei tiale esagae ugulamoi keve ata haivema. ² Isege ata moagamoagaeau igaetoai lohoale evilikahavoge au hovelahai vanagi adamo ugulamomu. Isege ataeau esagae lavisi usege Iesuu haivema. ³ Dovudovue hotomo haivei isiviale abu kemo lulelelahai. Isi loui avoe, “Malaha moleu i degomole malei au bulue sesiaho tinu. ⁴ Tiale sesiasenge degomoleau humahamo keiolahage uguiau lohoale ke ihatulu. ⁵ Isege degomoleau munemunemo vatau uoholiale kemo keiolalahi neniai uliholige alumuiabeau heie dobai tiholilu. ⁶ Alumuiabeau vatamo tiholiale vaniu velemai tumuai kebia havege tutukalu. ⁷ Isege degomoleau adu bekate ke uvumo keiolahalu. Ige adu keau botolahai kebia bamuevege keau nenilahai uliholilu. ⁸ Isege degomoleau vatae duamo keiolalahi bailahalu. Ige degomoleau bailahale moagataho. Isege degomoleau bailahale moaga. Isege degomoleau bailahale moaga vesitehame. ⁹ Iale la olemeau hoto evimaleau hoto ke evive.

Vadeuhoike Iesuu dovudovumo deiada louma.

(Maka 4.10-12; Luka 8.9-10)

¹⁰ Iesuu hoto kateai louge esemuveau loholiale belahai avoe, “Osialemoike a vani bahata ataho dovudovue hoto louma.” ¹¹ Ige Iesuu au esemu namigeveve avoe, “Di isiviale Dilavau au matamae dogae vamale ke hilokave. Isito di dovudovue hotomo ata haivege abu kemo luleleholilu. ¹² Katealemo ata olena di hoto ke huhuai luleleage Dilavana lulele baluga omisi. Isito ata olena au lulele unahamo hoto ke evisito keho isiviholige Dilavana avuemo luleleve ke mai evihai. ¹³ Di dovudovue hotomo abuhou louale keu koseanu. Keau elehaito neniai elehalolilu. Isi hoto evisito kemo luleleholilu. ¹⁴ Katealemoike ata kebia vaveveu beloveta Aisiau Dilava hoto hisialiale ke mai seleveltinu. Avoe, ‘Lana evisito bae lulelelahalivebene. Isi lana nilahaito bae neniai elehalivebene.

¹⁵ Kosealemo la uvuiau tololahalu.

Isi la golemate holilu.

Ige la ni keau kedulahalu.

Onoilage la nilahai hoto evisi lulelelahai tota dae hoideveve lohoge di la vaveve toela ulihai hoesehavoma.’”

¹⁶ Iesuu beloveta hoto kateale louito au esemumo loui avoe, “Ata keau katelahalu. Isito laeau ni mole. Laeau di vaveve ke elehai di hoto evisi kemo lulelelahalu. ¹⁷ Iale ko huhulahave. Subuta beloveta moaga isi Dilava ata moaga keau isivilahale la elehale

vaveve ko nahate elehai. Isito abu ke elehaholilu. Isi isivilahale la eviale ko nahate abuta evisi. Isito abu ke evioholilu.”

Dovudovue hoto ke ihu

(Maka 4.13-20; Luka 8.11-15)

¹⁸ “Di i sesiale ke hoto louale ke ihu ke ko. Iale di louge evive. ¹⁹ Oleuleu Dilava adae vuvunemo uveve hoto ke evisito luleleholiale keau i degomoleau humahadamo keiolahale ke nahate. Ige Setenena lohoniege uvuiabemo hotoe dua ke aiahavogei. ²⁰ Isege i degomoleau munemunemo keiolahale keau ata degomoleau hoto evisi vahaeholalahai solekai male ke nahate. ²¹ Abu hoto ke evisi maito hoto keu uvuiabemo holomaholige abu negoholilu. Iniege gabie abu hotoe dua eviale kemo ataeabuna abuemo vaveve toela vai aiogevege abuna vatehani malei solekavesite hoidevei. ²² Isege i degomoleau adu bekate uvumo keiolahale keau ata degomoleau nahate. Ata keau hoto ke evisito vani mole abu vatae vaveve huhulalahai kunaita huhu balugage vaveve katealeu hotoe dua ke bamuge evieviabeu negoholinu. ²³ Isege i degomoleau vatae duamo keiolahale keau ata degomoleau hotoe dua evisi ehovai vamale ke nahate. Degomoleau hoto kemo evieviabeu balugataho. Isege degomoleau baluga. Isege degomoleau balugavesitehame.”

Latie toelamo dovudovue hoto

²⁴ Iesuu ke louito tota dovudovue hoto mole loui namigeveve avoe, “Ataeau Dilava adae vuvunemo uveve kemo di deiada mole louge evive. Malaha moleu bulue tiale konee i hatuito halei lohonu. ²⁵ Iniale vavi molemo ataeau ladevesege malaha ke bahoeu tiale latie toela malei bulu kemo sesiaito halei lohonu. ²⁶ Ige kone keau bailahaito nigiholisege latie toela keau lalavolu. ²⁷ Ige lovi ke biage esemuiaru ke elehai lohoale abu baluga namihai avoe, ‘Kosive, a tiale bulue konee i hatunu. Isito lati keau oleve kateai lalavolu.’ ²⁸ Ige au namigeveve avoe, ‘Nahie bahoeike ke sesianu.’ Ige abu loui avoe, ‘A isiviage no talive lati ke lavai.’ ²⁹ Ige au loui avoe, ‘Ba, lainaho lati ke lavalive. Kosealemo lana lati ke lavaliege kone keta toholahave. ³⁰ Halege kone keu latiti igaetoai ulive koneu baeage dana bae kone ke hamaveve ata namigeveve kosea, Talive lati ke lavai umudisi maholiho otoveve. Isito kone hamai malei lohohi di valahumo otoveve.’ ”

Masitae ie deiada

(Maka 4.30-32; Luka 13.18-19)

³¹ Iesuu kateai louito tota dovudovue deiada loui namigeveve avoe, “Ataeau Dilava adae vuvunemo uveve keu masitae i nahate. Lana masita ke i malei bulue sesiage kena ulisi balugai. ³² Ke iu esevehame seleve. Isito auna uliniege idi baluga holisi. Ige uguiabuna lohologie kebia adamo hasolahai. Iale ataeau Dilava adae vuvunemo ui moagatahoai ue dua vaveve keu kateanu.”

Beikini baudae deiada

(Luka 13.20-21)

³³ Iesuu ke loui gabiaito tota dovudovue hoto mole loui namigeveve avoe, “Ataeau Dilava adae vuvunemo uveve keu beikini bauda ke nahate. Keate abuna ke mai valavamo keohai ebuehage kena valava ke bahata mai balugatisi. Iale ataeau Dilava adae uvumo ui moagaveve keu ke nahate.”

³⁴ Iesuu dovudovue hoto kateale loui namigevenu. Keu inuta ihuve loui ata haiveholima. Isito dovudovue hoto ke unaha loui ata haivema. ³⁵ Au kateale vale keu beloveta mole hoto mai selevetinu. Hoto keu koseanu. Avoe, “Dana abuhu louniege dovudovue hotomo loui. Subuta Dilavau vata vai ono mole mahogovale ke dana ekovehai abuhu loui.”

Latie toelae deiada ke ihu

³⁶ Iesuu kateaito ata moaga kebia haleveve oe uvue tinu. Ige esemuveau avue lohoale namihai avoe, “Latie toela ke ihu ke onole.” ³⁷ Ige au namigeveve avoe, “Malaha nehe konee i hatuale keike Atae Ese. ³⁸ Ige bulu keu vata bahata. Ige konee i keau Dilava atae duaea. Ige latie toela keau Setene atae toelaea. ³⁹ Ige ata neheu latie toela sesiale keike Setene. Ige kone hamamale vani keike vatae gabi. Ige kone ke hamale ataeabulike anelua. ⁴⁰ Ige abu lati lavai umudisi venemo mahole ke nahate Dilavana vatae gabi kela vata ko kateai. ⁴¹ Ige vani kela Atae Esena au anelu hanavege abuna vatae lohologie evievi ata lobogevemale kebia isi vaveve toela vamale kebia bahata maleve. ⁴² Maleve lohologie venue hodovavesite kemo hatueve. Ige abuna keve ui vatehani malei ninalahai kekolahai monogilahage. ⁴³ Ige Dilava ataeabuna abu Mamae matama keve tiliege vani nahate atagai. Iale la olemeau hoto evimaleu hoto ke evive.”

Dovudovue deiada degomole

⁴⁴ “Ataeau Dilava adae uvumo uale keu moni balugataho ke nahate. Ata molena tiniege abu moni baluga malei bulue abavuale ke elehaniege vahaehoai avuta ke vavahaito halei lohoniege oe velemai au kunai bahata malei ataemo voiai. Isi moni ke malei bulu ke voiai uvuvemo moni baluga ke malei.

⁴⁵ “Isime tota ataeau Dilava adae uvumo uale keu ko nahate. Ata molena tiniege mune dua ibina balugate kaovai. ⁴⁶ Ke kaovaniege mune dua seleve elehai hoilalahai tiniege au kunai bahata malei ataemo voiai. Isi moni ke malei tiniege mune dua ke ibina vai. Iale ke nahate ataebuna Dilava adae uvumo uliho humaha kaovalata bae elehai.”

⁴⁷ Iesuu tota loui avoe, “Ataeau Dilava adae vuvunemo uveve keu abu ugabi mihatuale ke nahate. Ugabi kemo abuna huena nimolete moagamoaga malei. ⁴⁸ Ige ugabi keu tobalohoge abuna ke butuhai mai loholiege esagae mavoi. Isi keve uguaivoi bae huena kebia sesievei duave malei abu sinimo emeito toelave malei hatui. ⁴⁹ Iale vatau gabiveve kena kateai. Anelu abuna loholiege atae duamo atae toela kebia malevei. ⁵⁰ Abuna kebia malevei veneu hodovavesitemo hatui. Ige abuna keve ui vatehani malei ninalahai kekolahai monogigilahagei.”

Hotoe doga isi hotoe mami

⁵¹ Iesuu kateai louito belagevei avoe, “Lana di louale ke evisi lulelelalahu.” Ige abu namihai avoe, “Ito.” ⁵² Ige Iesuu tota namigevei avoe, “Diue menaka loui haivemale degomole keau di esemu holige Dilavau kebia malevege abu adave vuvunemo ua. Keau subuta hotote isi di hotoe doga ketamo lulelelalahu. Iale ata keau oe biageu au valahumo au kunai mamita kunai dogata malei igaetoai otoveale ke nahate.”

Iesu ata selevelau kabebihavolu.

(Maka 6.1-6; Luka 4.16-30)

⁵³ Iesuu dovudovue hoto ke loui gabiaito halei tinu. ⁵⁴ Halei tiale au o seleve velemanu. Keve velemai Diue dubue tiale ata haivenu. Ige abu hotove evisi vikolahai mole belagevei avoe, “Oleveike au lulele kateale manu.” Isi, “Oleve kateai vikoe vaveve vaevenu. ⁵⁵ Nahi hilokage keu o hoomale ke moike. Isege neinaveike Meli. Ige Diemisi, Diöseba, Saimoni, Diudasi keau hohuvuiabea. Keau bahata kove ua. ⁵⁶ Ige amakinivuiabe kebiata kove ua. Iale keu oleveike vuvune kateale manu.” ⁵⁷ Kateale louime hotove evioholilu. Ige au namigevei avoe, “Beloveta ata kena vata moleve tige ataeabuna hotove evisi hoesehavo. Isito au au o seleve keve tige atave keau bae hotove evisi hoesehavolivebene.” ⁵⁸ Iesuu kateale loui namigevenu. Isi keau hotove evioholiale kemo au vikoe vaveve moaga vaveholinu.

14

Abu Dioni hamage hatiale deiada

(Maka 6.14-29; Luka 9.7-9)

¹ Vani kela Galili kosive baluga Elodi keu Iesu vaveve hoto ke evinu. ² Isi au esemu namigevei avoe, “Ata babatisogevemale Dioni keu hatialeu tota hovelahaike vai vaveve nimolete kateale vama.”

³ Elodiu hoto kateale louale keu koseanu. Keu subuta louge abu Dioni umuvai mai dibulae mavolu. Kosealemoike Elodiu au hoho Bilibi ke keate Elodiasi etulei melamenu. ⁴ Ige Dioniu vani baita Elodi namihai avoe, “A keate ke koliave vavamo etulei melameale keu tolanu.” ⁵ Kateai loulage Elodiu isiviale ke hamai. Isito Diue ataeau huhulalahai avoe, “Dioni keu beloveta ata.” Katealemo Elodiu vabugeve Dioni hamaholinu.

⁶ Iniale vani mole Elodiu uale vani keu lohoge Elodiasi mau tiale kosivebia bahata vudimo havuage Elodiu ke elehai ma ke vahaeho vanu. ⁷ Isime namihai avoe, “Seleveta ana onoleho isiviage dana a isivi ke mai aoi.” ⁸ Ige ma keu tiale au neina belahage neinaveu namihai avoe, “Talive namihai kosea, ‘Di isiviale ata babatisogevemale Dioni ke kina heisi etulei kinave mai melegimo mamoi mai daonela.’” ⁹ Ige kosive Elodiu ke evisi uvuai isiviholinu hamaliho. Isito au lovi iho lohoale kebia nimo au ono vade ma keho valiho Dilava ivimo menakale kemo ke haleveve keu avuemo anekianu. ¹⁰ Isi louge abu dibulae tiale Dioni eno heisi etulelu. ¹¹ Isi kinave mai melegimo mavoi lohoale ma ke omilu. Ige ma keu ke mai tiale au neina ominu. ¹² Ige Dioni esemuiau ke evisi lohoaleau Dioni vava mai abavulu. Isi tiale deiadave ke loui Iesu namihalu.

Iesuu ata vai taoseni (5,000) lovi ovenu.

(Maka 6.30-44; Luka 9.10-17; Dioni 6.1-14)

¹³ Iesuu hoto ke evisi bouti mai ahuvela ataeau ivesiteve tinu. Ige ataeau ke evisi abu o halevei ehovai vatala tilu. ¹⁴ Tiliale keve velehovoi usege Iesuu boutimo tiale keve

dobai ata moagataho kebia elegevenu. Isime abuhu uvu balugatahoai vavahanitebia hoesegevenu.

¹⁵ Iniale gutuige esemuiabeau avue lohoale namihai avoe, “Matama kou boto. Iale vau dobalelua kebia hanavege abu hoidevei abu oe talive lovi malei isi.” ¹⁶ Ige Iesuu namigevei avoe, “Lainaho kebia iovege abu talive. Isito la biaeau lovi ovege abu isi.” ¹⁷ Ige abu Iesu namihai avoe, “Valava ada mole isi huena abuita unahahameike ko.” ¹⁸ Ige Iesuu abuhu loui avoe, “Ke malei lohove.” ¹⁹ Kateige abu ke malei omige au ata bahata namigevei avoe, “Kulue golomo ugulelevave.” Isito valava ada mole isi huena abuita ke malei ehue niai lovi ke hoesehavonu. Isi ke vakoanata malei au esemu ovege esemuiabeau ke malei igaegaiai ata kebia ovei lotilu. ²⁰ Kebia ovege ata bahata keau lovi ke ige uniabeau hanilahalu. Ige esemuiabeau lovi ke sigu bahata iuhai basiketi tuelomo (12) otovege keau tobaloholu. ²¹ Lovi ke iale malaha bahata vai taoseni (5,000). Isito keate isi eseese kebia abu dodaveholilu.

Iesuu e golola lamisi lohonu.

(Maka 6.45-52; Dioni 6.15-21)

²² Keu uoholige Iesuu au esemu namigevei avoe, “Boutimo biloluvisi e houi vaki mole keve tisege di ata kobia iovege abu tisegeto di bae lohoi.” ²³ Kateai kebia bahata ioveito ahuvela guligulihio tanae tinu. Tiniale vavimo ahuvela ua. ²⁴ Ahuvela usege vavi kemo esemuiabeau bouti mai tisege helukau lohoge eu toelai boutiabe mai e nie tinu. ²⁵ Iniale vae alamo Iesuu e golola lamisi abue lohonu. ²⁶ E golola lamisi abue lohoge abu ke elehai vabulahaui loui avoe, “Aluike uoke lohonu.” Isi katelahaui vabulahaui kekolahalu. ²⁷ Ige Iesuu solekavesite namigevei avoe, “vabu halevave. Iesu dalike. Lainaho vabulalahive.” ²⁸ Ige Bitau hohavoi namihai avoe, “A seleveta di kosive holiniege daho louge di e nila lamisi ae tai.” ²⁹ Ige Iesuu avuhou loui avoe, “Loho.” Ige Bitau bouti halei dobai e nila lamisi tinu. ³⁰ Ige heluka balugau utuige Bitau ke elehai vabuaime solekavesite e uvumo dobai tinu. Isi kekoai loui avoe, “Kosive, di tedahoi di ebagema.” ³¹ Ige Iesuu solekavesite ada hatui adavela holisi ebagemai avuhou loui avoe, “A evievi keu esehameale kemoike a dolodoloi emo dobanu. A kateai dolodolole keu tolanu.” ³² Kateai louito avuti boutimo biloluvisege hebuluu tolemanu. ³³ Ige esemuiabeau bouti uvumo hovevevei Iesu hoesehavoi loui avoe, “Seleveta au Dilava mo.”

Iesuu Genesaletie vavahanitebia hoesegevenu.

(Maka 6.53-56)

³⁴ Katelahaui lohoaleau e ke vaki mole Genesaleti keve dobuluvilu. ³⁵ Keve dobuluvisege ataeau Iesu elehai hilokage keu Iesu. Isime o bahatae hoto hanavege abu vavahanitebia malevei avue loholu. ³⁶ Ige vavahanite keau Iesu namihai isiviale ogove ivi unahala holisi momoleai. Kateige olemeau ogove ivila holiale keau bahata momolelahalu.

15

Balisiaeau abu buluve vavevemo Iesu belahalu.

(Maka 7.1-13)

¹ Balisia ata degomole isi Diue menaka loui haivemale keau Dielusalema halevai Iesue loholiale belahalu. ² Belahai avoe, “Nahie buluveau menaka mole mai nahiovelu. Menaka keu koseanu. Vasohuta ada totolahaito bae gabie lovi isi. Isito osialemoike a esemuiaru menaka ke etulei ada totohohisito lovi ima.” ³ Ige Iesuu namigevei avoe, “Isito osialemoike laeau Dilava menaka halevai la buluve menaka vai ehovama. ⁴ Dilava menakau loui avoe, ‘La mamuvu la neinuuvu hoto evisi hoesegeveve.’ Isi tota loui avoe, ‘Oleuoleu abu mamuvu neinuuvu kebia aigevevi hotoe toela abuhu louale kebia abuna havege haluvisi.’ ⁵ Isito laeau loboe vaveve koseale loui ata haivei loui kosea, ‘La mamuvu la neinuuvu kebia la onobenobe oveho isivihohiliege kebiaho loui kosea, Di ke mai Dilava omialemo di bae ke mai laovelivebene.’ ⁶ Iale kemo au bae au mama au neina tedeavelivebene. Vaveve katealemoike la Dilava menaka halevai la menakate unaha vai ehovama. ⁷ Iale la keau loboe ataea. Beloveta mole Aisaia keu la vaveve louale keu seleve. ⁸ Au loui avoe, ‘Dilava hotou koseanu.

Avoe, Ata kobiau abu ai unahamo di hoesehavoma.

Isito uvuiabe keu vatae vaveve unaha huhuevema.

⁹ Keau di hoesehavomale ke ihuu uoholinu.

Kosealemo abu atae menaka loui ata haivei loui kosea, Menaka kou Dilava menakaikae.

Isito abu haiveale keu Dilava menaka holioholinu.’ ”

Vaveve oleteike atae uvu aiohavoma.

(Maka 7.14-23)

¹⁰ Iesuu kateai louito hoage ataeau avue lohoge au namigevevi avoe, “Di hoto ko louge evisi lulelelahave. ¹¹ Ataeau lovi onole imale keu abuemole toela holioholinu. Isito abu vaveve toela onole huhulalahai vama keu abuemole toelanu.”

¹² Ke loui gabiage esemuiabeau avue lohoale namihai avoe, “Balisia ataeau a aike louale ke evige keu abuemole isuanu. Iale ana ke hilokanu.” ¹³ Ige Iesuu namigevevi avoe, “Halege lainaho kebia huhuevelive. Di Mamau otogoe uale keu lovie dua hanu. Isito lovie toela uliale ke auna tohoai hatui. ¹⁴ Iale ata keau ni kedute ke nahate. Ni kedutena ni kedute mole adala holisi uli holisi tiniege abuna avuti abata ke igae vuvegevevi.” ¹⁵ Ige Bitau ke evisi namihai avoe, “Hoto ke ihu louge no evisi.” ¹⁶ Ige Iesuu namigevevi avoe, “Lana lata hoto ke ihu hilokaholilu. ¹⁷ La hilokage ataeau lovi ige lovi kena gogoeabe taito uoholisi. ¹⁸ Isito vaveve toela onole kebia uvumole uale ke abuna huhulalahai vama keike Dilava nimo toelanu. ¹⁹ Vaveve toela kosealeike atae uvumole lohoge abu vama. Abuna vaveve toela huhulalahaliege ata havei, mole keatehi ladevevi, teibalalahai, vavoloai, lololahai, isi hotoe toela loui mole aiovegevegi. ²⁰ Vaveve keabuikae ata aiovegevegi abu Dilava nimo toelalu. Isito ada totoholisitolevi lovi imale keu Dilava nimo toela holioholinu.”

Keinani keate ke evievi.

(Maka 7.24-30)

²¹ Iesuu kateai louito matama ke halei tiale vata moleve velemanu. Vata kemo o baluga abuita Taea isi Saidoni keau ua. Iale Iesuu tiale o kebia vavae ua. ²² Ige Keinani keate mole vata kemo uale keu Iesue lohonu. Diue ata holioholiale keate keu lohoale Iesu namihai avoe, “Iei, di Kosive. Di hilokage au Deividi mo. Iale daho uvuai di tedahonela. Kosealemo munanae toelau di maemo biloige keu kemo vatehani toela malenu.” ²³ Kateai louge Iesuu avuho hotobe louholinu. Ige esemuveau lohoale baita namihai avoe, “Keate keu nahi ehovei ninai kekoige keu toelanu. Iomage au tai.” ²⁴ Ige Iesuu namigevevi avoe, “Dilavau di hanavoge di Diue ataike tedeaveliho lohonu. Di ata keau mamoeau humaha halevai botoe tebulahale ke nahate.” ²⁵ Ige keate keu hoto ke evisi lohoale Iesu veloe heimo dobai loui avoe, “Kosive, di tedahonela.” ²⁶ Ige Iesuu namihai avoe, “A Diue ata holialebene di bae a tedahoi. Isito di a tedahoge di Diue ata tedeaveho lohoale kebiabuna osiol.” ²⁷ Ige keate keu loui avoe, “Kosive, a hoto keu seleve. Isito ana vali di isivihame igae komo di tedahoito bae a ata seleve kebia vana baita tedeavegegi.” ²⁸ Ige Iesuu namihai avoe, “A evievi keu balugataho. Iale a onoleho isiviale dana aho ke vai.” Kateai lousege maveve uokeve momoleanu.

Iesuu ata moagataho hoesegevenu.

²⁹ Iesuu matama ke halei Galili tabu baluga ke vavae ohanoi tinu. Keve tiale tanae ugulamonu. ³⁰ Ugulamoi usege ata moagaeau avue lohoime ata degomole velo toelate, ni kedute, velo golote, uvute isi vavahanite ata degomole kebia bahata holiovevi lohoale Iesu hoesegeveliho vudivemo otovelu. Ige au kebia bahata hoesegevenu. ³¹ Ige ataeau elehage uvuteau hotolalahu. Ige velo golote kebia veloeau inutolotoloalu. Ige velo toelate keau olahalu. Ige ni kedute keau nilalahu. Kateige ataeau kebia elegevevi tetelalahai Iselalae Dilava hoesehavolu.

Iesuu ata voa taoseni (4,000) lovi ovenu.

(Maka 8.1-10)

³² Ige Iesuu au esemu hohavege abu avue lohoge au abuhu loui avoe, “Ata kobiau daluvuta vanie ni abuita iagetamo ui lovibe ioholige di abuhu uvuanu. Iale dana lovi oveholisitolevi hanavege abuna tiliege humaha tavae vaeho nibedai.” ³³ Ige esemuveau belalahai avoe, “Noeabuna boto kove oleve kateai lovi malei ata kobia moaga ovei.” ³⁴ Kateale louge Iesuu belavegevi avoe, “La valava vaesute malei loholu.” Ige abu namihai avoe, “Valava seveni (7) isi huena ada molehame.” ³⁵ Kateale louge Iesuu ata moaga kebia namigevege abu vatamo ugulevalu. ³⁶ Vatamo ugulevevasege Iesuu valava seveni (7) isi huena ke malei hoesehavoi vakoai au esemu ovege abu malei ata kebia ovei lotilu. ³⁷ Ata kebia ovege keau ke ige uniaabeau hanilalahu. Ige esemuiabeau lovi ke sigu bahata iuhai basiketi sevenimo (7) otovege tobaloholu. ³⁸ Lovi ke iale malaha bahata voa taoseni (4,000). Isito abu keate isi esese kebia dodaveholilu. ³⁹ Ige Iesuu ata kebia iovege abu tisege au halei vanagi mai vata mole ivi Magada keve tinu.

16

Ataeau vikoe vaveve balugaho Iesu belalahu.

(Maka 8.11-13; Luka 12.54-56)

¹ Balisia ata isi Sadukea ata degomoleau Iesue lohoale isiviai lobohavoge au kemo dobai. Isi kateai namihai isiviale au vikoe vaveve baluga otogomo vage abu elehai. ² Isito Iesuu namigeveve avoe, “Vaniu dobai vovoige lana ke elehai loui kosea, ‘Auna vaeahai.’ ³ Ige vavita lana otogo elehage au bukage lana loui kosea, ‘Nova venina lohoi.’ La katelahai otogo elehai kemo lulelelahalu. Isito aike laemo lohoveve vaveve kemo la luleleholilu. ⁴ Novae ata la koeau atae toelaea. La Dilava halevai vaveve toela baluga vama. Katealemoike la di belahai isiviale di vikoe vaveve vai. Isito di bae la louale ke valivebene. Isito beloveta mole Dionau vale ke nahate dana data vai.”

Balisia isi Sadukea vavevemo la ebia nenigeveve.
(Maka 8.14-21)

⁵ Iesuu kateai louito halevei au esemuhi bouti mai tilu. Isito esemuiabe keau valava maleholilu. Isi tiale e ke vaki mole velehoivoito ke huhulalahai mole namigevelu. ⁶ Ige Iesuu ke evisi namigeveve avoe, “La ebia nenigeveve. Lainaho Balisia ata isi Sadukea ata kebia valava ilive.” ⁷ Kateige esemuiabeau mole namigeveve avoe, “Mesoho nahi valava malei lohoholilike vage au nahiho hoto kateale lounu.” ⁸ Ige Iesuu abu loumale ke hilokai belageveve avoe, “La evievii eseveale kemoike la moleho valava hoto ke louma. Iale la hoto ke halevave. ⁹ Lana sohu luleleholilu. Lana di valava vakoai ata moaga ovege abu iale ke lana huhulalahalu. Vani kemo di valava vai (5) vakoai malaha bahata vai taoseni (5,000) ovege abu ilu. Ige uniabeu hanilahage la lovie sigu malei basiketi vaesutemo otovege tobaloholu. ¹⁰ Isi vani mole di valava seveni (7) vakoai malaha bahata voa taoseni (4,000) ovege abu ige uniabeu hanilahage la basiketi vaesutemo lovie sigu malei otovege tabaloholu. Lana ke huhulalahalu. ¹¹ Iale osialemoike la di hoto louale kemo luleleholilu. Di valava ke hoto louholinu. Valava keu daemo baluga holioholinu. Isito di loui kosea, ‘Balisia isi Sadukea ata kebia vavevemo la ebia nenigeveve.’” ¹² Kateai louge esemuiabeau lulelelahai hilokage Iesuu valava seleve ke hoto louholinu. Isito Balisia isi Sadukea ata keau ata haivemale kemoike au hoto kateale lounu.

Bitau Iesu ebagemale deiada
(Maka 8.27-30; Luka 9.18-21)

¹³ Iesuu halei o mole Sesalia Bilibai keve tinu. Keve tiale au esemu belageveve avoe, “Ataeau huhuige dau ole.” ¹⁴ Ige abu namihai avoe, “Ata degomoleau a mai loui avoe, ‘Ata babatisogevevemale Dioni keike ke.’ Isege degomoleau a mai loui avoe, ‘Ialidialike ke.’ Isege degomoleau a mai loui avoe, ‘Dielimaia o mesoho beloveta moleike ke.’” ¹⁵ Ige Iesuu belageveve avoe, “Isege laeau huhuige dau ole.” ¹⁶ Ige Saimoni Bitau namihai avoe, “Au ukolikolie Dilava ke mo. Dilavau a hanavoale Keliso ailike ke.” ¹⁷ Ige Iesuu namihai avoe, “Diona mo Saimoni, atae lulelema a ke louholinu. Isito di Mamau ehue umale keu lulele mai aoike vage a ke lounu. Iale auna a hoesehavo. ¹⁸ Iale di hoto mole loui a namihage evi. A ivilike Bita. A keu mune nahate. Iale dana mune ke golomo di dubu houge Seteneu bae au vuvunemo koalivebene. ¹⁹ Di ataeau Dilava adae uvumo uale ke vuvune dana aoi. Ige ana vuvune keta vata kove onole bamuge Dilavana avuta ehue ke bamui. Isi mesoho ana vata kove ono mole alavoge Dilavana avuta ehue ke alavoi.” ²⁰ Kateai louito isuta au esemu namigeveve avoe, “Lainaho ata namigeveve loui kosea, ‘Iesu keu ata tedaevemale kosive Keliso.’”

Iesuu au hativememo hoto lounu.
(Maka 8.31-9.1; Luka 9.22-27)

²¹ Vani kemo Iesuu lamisi au hativeve ke hoto loui neniai au esemu haive dua vanu. Abuho loui avoe, “Dana Dielusalemale tiniege oe kosivea, dubu nalimale kosivea isi Diue menaka loui haivemale kebiama vatehani baluga malei. Abuna dahavoge dana hatiniege vanie ni abuita igaetaeau uoholisege dana tota hovelahai.” ²² Kateai louge Bitau melamei tiale lilikateve isuta avuho loui avoe, “Kosive, hoto kateale louhale. Di isiviholinu vaveve katealeu aemo lohoholi.” ²³ Ige Iesuu Bita namihai avoe, “Setene, di haliohatunela. A keu di hativeve humaha bamuge toelanu. A huhuihuhui keu atae huhuihuhui. Keu Dilava huhuihuhui holioholinu.”

²⁴ Kateai Bitaho louito tota au esemu namigeveve avoe, “Oleu daiti tiho vaniege au lako au isivi va halei au vatehani maleveve ke huhu haleito di ehomai. ²⁵ Iale olenu au ebika unaha huhuaniege au bae ukolikoli malivebene. Isito olenu au ebika huhuoholisito di ivimo vatehani malei hatiniege auna ukolikoli mai. ²⁶ Isi olenu vatae onobenobemo kunaite holisito Dilavamo au uvu mamoholisito hatiniege auna oleve kateai ukolikoli mai. Au bae kunai keta au otogoe tiveve ke ibina valivebene. ²⁷ Iale Atae Esena au anelu holoveve au Mamae atagamo dobai lohoniege vatae ata igaegae vaveveabe ibina ovei. ²⁸ Iale seleveta di la namigevege evive. La degomoleau kove uale keau bae haluvilivebene.

Isito abuna uliege Atae Eseu ata malevege abu adave vuvunemo uveve ke elehaito bae haluvisi.”

17

Iesu vavae elehilehi keu nimoleanu.

(Maka 9.2-13; Luka 9.28-36)

¹ Vanie ni sigisiu (6) uoholisege Iesuu ata halevei Bita, Diemisi isi hohove Dioni kebia holoavei abuhi tana mole baluga tilu. ² Tiale keve velehovosege Iesu vavae elehilehi keu nimoleanu. Ige niveu vaniu haluale ke nahate. Ige ogoveu taeani levolevoanu. ³ Isi kateisege esemu abuita igaeta keau elehasege Moseseu Ilaidiati avuluvuta hotohotoima. ⁴ Ige Bitau hovelahai Iesuho loui avoe “Kosive, hoeseike no vai kove lohohu. A isiviage dana oe ese abuita igaeta hovevei. Moleu aho. Moleu Moseseho. Isege moleu Ilaidiaho.” ⁵ Kateai lousege goe taeteu abuemo dobai lohoale bamuevege goe kemo hoto moleu lohoale loui avoe, “Di uvue moike ke. Di vahaehove vanu. Iale au onole louge hotove evive.” ⁶ Ige Iesu esemuihu hoto ke evisi vabulaha vatamo dobuluvisi abu ni malei abavulu. ⁷ Kateige Iesuu lohoale levevei namigeveve avoe, “Vabulaha halevaito hoveveve.” ⁸ Ige abu hovevevei nilahaito atabe elehaholilu. Isito Iesu igae elehalu. ⁹ Isime hevaluvisi lohosege Iesuu namigeveve loui avoe, “Lainaho la onole elehale ke loui atabe namihalive. Ilage Atae Eseu hatisi tota hovelahageto bae ke loui ata namigeveve.” ¹⁰ Ige abu Iesu namihai avoe, “Osialemoike Diue menaka loui haivemaleu loui avoe, ‘Ilaidiana vasohuta lohosegeto Atae Esena bae gabie lohohi.’” ¹¹ Ige Iesuu namigeveve avoe, “Hoto keu seleve. Ilaidiana vasohuta lohohi humahave loisi ata bahata namigeveve abu vaveve bahata hoesegeveve. ¹² Isito di la namigeveve evive. Ilaidia keu lohohu. Isito ataeau ke hilokaholisito abu isivi avuemo vai aiohavolu. Iale ke nahate abuna vai Atae Ese aiohavoge auna vatehani malei.” ¹³ Kateai louge esemuiabeau hoto ke ihu hilokai mole namigeveve avoe, “Ata babatisogevemale Dioni ke vaveveike au nahiho lounu.”

Iesuu tilogote mo mole hoesehavonu.

(Maka 9.14-29; Luka 9.37-43)

¹⁴ Kateaito lohoaleau ata moaga kebiamu lohohu. Ige ata moleu lohoale Iesu vudimo kome bokoai vata binu. ¹⁵ Isi loui avoe, “Kosive, di moho uvuai tedahonela. Munanae toelau avuemo biloige tilogoanu. Iale kena tilogoniege auna venemo biloai mesoho emo biloigei. ¹⁶ Ige di mai a esemuihu hoesehavohililu abue tige abu hoesehavohililu.” ¹⁷ Kateai louge Iesuu abuhohi loui avoe, “La uvu keu tolobe nimolealemoike la evievihohilu. La huhuige dana vali vani moaga lahehi ui laheho loviai. La katealemo mo ke mai dae lohove.” ¹⁸ Ige abu mo ke mai lohoge Iesuu munanae toela nunuvage au mo ke halei tinu. Isege mo keu emo moimoleanu.

¹⁹ Kateige Iesu esemuihu lilikate lohoale namihai avoe, “Osialemoike no mo kemo munanae toela ke nunuvaveve keu noemo anekianu.” ²⁰ Ige Iesuu namigeveve avoe, “La evievi keu baluga holioholiale kemoike keu laemo anekianu. Di seleveta la namigeveve evive. Masitae i keu evesehame. Isito mesoho la evievi keu masitae i ke nahate vage lana tana kohohi kosea, ‘Toholahai tai uokeve lami.’ Ige auna toholahai tiniage keve lamisi. Lana evievi kateale mage onobeu bae laemo anekialivebene. ²¹ Isito munanae toela kateale nunuvaveve keu toloanu. Iale lana vasohuta lovi i halevai guligulihaliege kemo lana munanae toela kateale nunuveveve hilokave.”

Iesuu tota au hativeve deiada lounu.

(Maka 9.30-32; Luka 9.43-45)

²² Vani mole Iesu esemuihu bahata Galili vatae mole bevieveve igaetolahalu. Isege Iesuu namigeveve avoe, “Ata molena Atae Eseho haii mai atae toela ovei. ²³ Ige abuna mai hamage auna hatiniege tota vanie ni abuita igaeta uoholige auna hovelahai.” Kateai louge esemuiabeau ke evisi uvulahalu.

Dubue takesi

²⁴ Iesuu au esemu holoavei lohoale Kabenumu oe velehovolu. Ige dubue takesi malemale ata degomoleau Bitae lohoale belahai avoe, “A kosive kena vali dubue takesi vai. Emena auna osioi.” ²⁵ Ige Bitau loui avoe, “Ito, auna vai.” Kateaito halei oe uvue tinu. Ige Iesuu hovelahai avuhohi loui avoe, “Saimoni, a huhuige vatae kosive keabuna olememo takesi moni malei. Abuna abu ata selevemo malei. Emena ata degomolemo.” ²⁶ Ige Bitau namihai avoe, “Keau ata degomolemo takesi malema.” Ige Iesuu namihai avoe, “Seleveike. Ataeabe seleve keau bae takesilahalivebene. Katealemo di bae oleve kateai takesiai. Dau dubu ke kosive. Ige au di esemu. Iale oleve kateai nahiabuna takesilahai. ²⁷ Isito duave. Nahiabuna ke vai. Kosealemo nahiabuna ke vaholige dubue

takesi malemale abuna nahiho itumulahai. Iale e bavae talive kimeianela. A vasohuta huena olete laluvaniege aive alavoi aivemo mune bai mai ke igaela a ibinata di ibinata vanela.”

18

Olena matamae dogae ivi balugate holisi.

(Maka 9.33-37; Luka 9.46-48)

¹ Iesuu kateai Bitati hotohotoisege esemuiabeau lohoale belahai avoe, “Dilava adae uvumo uale kebiamo olemeabuna a matamae dogae keve ivi balugate holisi.” ² Kateige Iesuu ese mole hohavoge au lohoale vudiabemo laminu. ³ Ige au namigevevi avoe, “Seleveta di la namigevege evive. Lana ese ko uvu nahate vaholiliege la bae Dilava matamae dogae keve talivebene. ⁴ Isito ata olena eseese ko nahate vai au ebika ebagemaholisito au ebika etolemaniege kena Dilava matamae dogae keve tai ata baluga holisi. ⁵ Isi olena di ivimo eseese koseale mai o hatui hoesehavoniege daike au ke hoesehavonu.”

Evievi ata aiogeveholiveve hoto

(Maka 9.42-48; Luka 17.1-2)

⁶ “Ata olena isiviai evievi ese molehame aihavoge au vaveve toela vage abege ataeau mune baluga mai enoveta etunavui mai davalamo mihatuge duave. ⁷ Vatae ata nohovu. Vaveve toela moagau vata komo ua. Katealemo ataeabuna mole aiogevegei. Isito olena ata aiogevege abu vaveve toela vage ata ke nohoma.

⁸ “Mesoho la adau o la velou la malevevi vaveve toela vage ke heisi bohisi malei hatuve. La velo igaeta mesoho ada igaeta ehue tige keu duave. Isito ada abui isi velo abui ke toelana la malevevi veneu hodovavesite keve hatuale keu toelanu. ⁹ Isi mesoho la niu la malevevi vaveve toela kemo tige ke ekosihai mihatuve. Lana ni igaeta ehue tiale keta duave. Isito ni abuita ke toelau la malevevi veneu hodovavesite keve hatuale keu toelanu.”

Mamoe eseu tebuale deiada

(Luka 15.3-7)

¹⁰ “Iale la ebika nenigeveve. Lainaho eseese koseale aiogevelive. Kosealemo eseese kebia aneluiiau vani bahata otogoe di Mamae vudimo ui kebia elegevema. ¹¹ Di la namigevege evive. Atae Eseu vaveve toelamo tebulahamale kebia malevelihoi ke au lohonu.

¹² “Iale la huhuale ata molena mamoe bahata uani handele (100) nalieveniege igaue detitisi tebuige auna osioi. Auna degomole kebia halevevi botoe tiniyege mamoe igae ke kaovai. ¹³ Ke kaovanata elehaniege vahaeho balugai. Kosealemo mamoe degomole keau ua. Isito igaehame tebuale keike au elehaimo kemo vahaeho baluganu. ¹⁴ Ke nahateike la Mamau otogoe uale keu isiviholialeike esevebehameu toelamo tebuliho.”

A haokae toelamo avuti haokaveve deiada

¹⁵ “Mesoho a haoka moleu vaveve toela vai a aihavoge avue talive lilikate vaveveve toela ke haivunela. Ige mesoho au a hoto evige tota avuti haokanela. ¹⁶ Isito au a hoto evioholige talive ata igae mesoho abui kebia holoevege abu aluvuta talive ata ke namihai. Kosealemo a haokuvu keabuna a hoto ke ebagevai loui kosea, ‘Hotove keu hoto seleve.’ ¹⁷ Ige mesoho au negoai a haokuvu kebia hotota evioholige talive hoto ke loui ekalesia bahata haive. Ige mesoho au negobedai ekalesia kebia hoto evioholige ke iovai huhulalahai kosea, ‘Keu evievi ata holioholinu. Isito takesi malemale atae toela kebia nahate.’ ”

Lana vatae onole bamuge Dilavana otogoe bamui.

¹⁸ “Seleveta di la namigevevi. Lana vata kove onole bamuge Dilavana avuta ehue ke bamui. Isi mesoho lana vata kove ono mole alavoge Dilavana avuta ehue ke alavoi. ¹⁹ Iale di tota hoto mole louge evive. La ole abuitau ono mole huhuai uvu igaeta la Mamau otogoe uale ke imihage auna laheho la isivi ke vai. ²⁰ Kosealemo di ata abui mesoho abuita igaeta keabuna di ivimo igaetolahai lohohi di hoesehavoge dana abuhi ui.”

A haokae toela momahavoveve deiada

²¹ Kateige Bitau Iesue lohoale belahai avoe, “Kosive, di haokana vaveve toela vaesute daemo vage dana avue ti vaesuteai toelave ke hoesehavoi momahavoi. Dana vali ti seveniai (7).” ²² Ige Iesuu namihai avoe, “Di a namihage evinela. Ainaho ti sevenialive (7). Isito elehalive au aemo vaveve toela vage avue tigenela. ²³ Kosealemo ataeau Dilava adae vuvunemo uveve vaveve keu kateanu. Iale di deiada mole louge evi. Vatae kosive moleu vani mole isiviale esemuiabeau avuemo bukale ke abuemo kaovai hilokai. ²⁴ Kateisege abu esemue mole melavei lohohi. Esemu keu kosi kemo moni balugataho koseale subuta

¹⁶ Vani mole malaha moleu lohoale Iesu belahai avoe, “No haivemale ata, dana no vade igae dua vai bae ukolikoli mai.” ¹⁷ Ige Iesuu namihai avoe, “Osialemoike a vaveve duaho di belahama. Dilava igae keu vaveve dua vamale ata. Iale a isiviai ukolikoli maliho vaniege menakave ehomanela.” ¹⁸ Ige au belahai avoe, “Menaka olete dana ehomai.” Ige Iesuu namihai avoe, “Ainaho ata havegelive. Ainaho mole keatehi ladevegelive. Ainaho mole vavogevlive. Ainaho mole lobogevlive. ¹⁹ A mamata a neinata hoto evisi hoesegevenela. Isi a ebika isivi omisi hoesehavoale ke nahate a vavamo umale kebiata isivi ovei hoesegevenela.” ²⁰ Ige ata keu namihai avoe, “Di subuta menaka ke bahata ehomanu. Iale dana no vade igaeta vai ukolikoli mai.” ²¹ Ige Iesuu avuho loui avoe, “A isiviai duave seleve valiho vaniege talive a kunai ke bahata malei voiai moni ke malei kunaiholimale kebia oveito lohohi di ehomanela. Ilive elike otogoe ibinae dua manela.” ²² Ige ata keu ke evisime uvuai tinu. Kosealemo keu kunai balugate.

²³ Ige Iesuu au esemu namigevei avoe, “Di la namigevege evive. Kunaite keau otogoe tiveve keu tolo seleveanu. ²⁴ Iale di tota hoto mole louge evive. Ovo mole ivi kamela keu nilae vahamo tiveve keu anekianu. Iale ke nahate kunaiteau otogoe tiveve keta anekianu.” ²⁵ Ige esemuibeau hoto ke evisi vikolahai belahai avoe, “Kunaite keau otogoe tihoholge oleme igae abuna otogoe tai.” ²⁶ Ige Iesuu kebia nibievei tumutumuai abuhu loui avoe, “Kunaite keau otogoe tiveve keu ataemo anekianu. Isito Dilavaemo vaveve ke bahataeao anekiholilu.”

²⁷ Kateige Bitau namihai avoe, “Di louge evi. Noeau no onobenobe bahata halevai a ehovau. Iale noeabuna onole malei.” ²⁸ Ige Iesuu abuhu loui avoe, “Di la namigevei. Dilavau onobenobe bahata hoesegevege dogamale vani kela Atae Esena au telona atagatemo ugulamoge di ehovamale la kebiata lana telona tuelomo (12) uguiavoi bae Iselala valada tuelo (12) kebia nibievei vaveveabe kaoveve. ²⁹ Ige olemeau di ivimo abu o abu vata, abu mohoho, abu mahoho kebia halevei abu mamuvu, abu neinuvu, abu ese kebiata halevei di lovi vage Dilavana vani kela abu haleveale ke ibinaho onobenobe baluga ovei ukolikolita ovei. ³⁰ Isito ata moagaeau aike uli holiale keabuna bae gabi holisi. Isege ata moagaeau aike gabi holiale keabuna bae uli holisi.”

20

Bulumo lovilahamalebia deiada

¹ Iesuu au louale kemo dovudovue hoto lounu. Avoe, “Dilavau ata malevege abu adave vuvunemo ui lovive vale keu ko nahate. Vavita vavita vaniu haluholisege bulue biage moleu taunie tiale ata degomole namigevei isiviale abu buluvemo lovilahai. ² Isi namigevei avoe, ‘Lana novae vani ko igaemo lovilahage dana vai kina (K5) laovei.’ Kateai namigevege degomoleau isivilahage au kebia iovege abu bulue tilu. ³ Iniale vaniu halusege au tota hoilahai tiale ata degomole elegevesege abu lavisi uma. ⁴ Ige au namigevei avoe, ‘Lana isiviai tai di bulumo lovilahage dana ibinae dua laovei.’ ⁵ Kateai namigevege abu tilu. Iniale vanie lilimo au tiale ke nahate vanu. Isi uniale vaniu vovolo vasege au tiale ke nahate tota vanu. ⁶ Isi uniale gutumo vaniu dobaho vasege au tiale tota ata degomoleau lavisi usege au namigevei avoe, ‘Osiohoike la vani bisi lavisi u unahama.’ ⁷ Ige abu namihai avoe, ‘Kosealemoike noeau atabeu no maleveholinu.’ Ige au abuhu loui avoe, ‘Lata talive di bulumo lovilahave.’

⁸ Iniale vau gutu seleveige bulue biageu au esemu mole ibina ovmale ke namihai avoe, ‘Lovilahamale kebia hohavei ibinaeabe ovenela. Isito vasohuta vaniu dobaho vasege lovilahale kebiama lamisi ibinaeabe ovei veatinela. Ilive gabila bae vavita lovilahale kebia ibina ovenela.’ ⁹ Ige esemuve keu vaniu dobaho vasege lovilahale kebia igaegae vai kina (K5) ovenu. ¹⁰ Ige vavita lovilahale keau ke elehai huhulahai avoe, ‘Noeabuna moni baluga malei.’ Isito au kebiata igaegae vai kina (K5) ovenu. ¹¹ Ige abu ke malei bulue biageho itumulahalu. ¹² Isi namihai avoe, ‘Gutumo lovilahale keau lovi baluga vaholisito vai kina (K5) malelu. Isito noeau vani ko bahata vanie tumumo lovilahaito keau maleale ke nahate nota malelu. Kateale keu toelanu.’ ¹³ Ige bulue biage keu namigevei avoe, ‘Evive. Di la lobogevge holioholinu. Isito di la namigevei kosea, Novae vani ko igaemo lana lovilahage dana vai kina (K5) igaegae laovei. Ige la ke evisi loui kosea, Ito. ¹⁴ Iale la ibina ke malei teve. Di isiviale gutumo lovilahale kebiata la maleale ke nahate kebia ovei. ¹⁵ Iale la huhuige di kateale vage kena toelanu. Ba, moni keu di monilike. Iale di kebia tedaevei moni kateale ovege keu di isivi unaha. Iale la osiohoike itumulahalu.’” ¹⁶ Iesuu deiada kateale loui ihuve loui namigevei avoe, “Oleuoleu gabi holiale keabuna bae uli holisi. Isege oleuoleu uli holiale keabuna bae gabi holisi.”

Iesuu tota au hativeve hoto lounu.

(Maka 10.32-34; Luka 18.31-34)

¹⁷ Vani mole Iesuu a esemu tuelo (12) holoevei abuhi Dielusalemae vealuvisi tilu. ¹⁸⁻¹⁹ Abu unaha tisege Iesuu namigevei avoe, “Nahi Dielusalemae timale kove ata molena bae Atae Eseho haii mai dubu nalimale kosive isi Diue menaka loui haivemale kebia ovege abuna hamaveve hoto loui mai Diue ata holioholiale kebia ovege abuna visuhavoi hehavoi mai idie domo hamage auna hatai. Iniege vanie ni abuita igaetaeau uoholisege auna tota hovelahai.”

Sebedi mahinai au isivihio Iesu belahanu.

(Maka 10.35-45)

²⁰ Sebedi mahinai au mo abui holoevei Iesue lohoniale vudivemo kome bokoai vata bisi belahai avoe, “Dana vali di isivi hoto aho loui.” ²¹ Ige Iesuu namihai avoe, “Hoto oletealeike a louliho.” Ige au namihai avoe, “Di mo abui koeau a esemu. Iale a kosive baluga holige ataeau a adae vuvunemo umale kela a isiviage di mo moleu a ada inuteve ugulamosege moleu a ada agiteve ugulamoi vuvune mai.” ²² Ige Iesuu namigevei avoe, “La di belahale ke la hilokaholilu. La huhuige lana valive di vatehani maleveve ke lata malei.” Ige abu avuho loui avoe, “Ito, noeabuna nota ke malei.” ²³ Ige Iesuu namigevei avoe, “Seleveta lana bae di vatehani maleveve ke maleve. Isito di la tabagevege la di ada inuteve isi agiteve uguiavoveve ke vuvune daemo uoholinu. Isito di Mamau oleme tabageveale keabuna bae keve uguiavoi.”

²⁴ Kateige esemuiabe teni (10) keau ke evisi abui hohote kebiaho itumulahalu. ²⁵ Kebiaho itumulahasege Iesuu kebia bahata hohavege abu avue lohoge au namigevei avoe, “La hilokage gamanie kosiveau abu ebika tabagevei isiviale ataeau valaeabemo ui isiviabe vagei. ²⁶ Isito di isiviholinu la vaveve kateale valiho. La oleu isiviai kosive baluga holiho vaniege au ebika etolemai la mole esemu holisi isivive vai. ²⁷ Isi la oleu isiviai ivite holiho vaniege la valamo ui la isivi vai. ²⁸ Kosealemo Atae Esee vatae lohoaleu isiviholinu vatae kosive holige ataeau ivive ebagevaliho. Isito lohoale keu isiviale ata bahatae toelae ibinahohatai malevege abu ukolikoli malei.”

Iesuu ni kedute abuita hoesegevenu.

(Maka 10.46-52; Luka 18.35-43)

²⁹ Iesuu au esemuhi o mole Dieliko ke halevasege ata moagatahoeau Iesu ehovalu. ³⁰ Isege malaha mole abuita ni kedute keau humaha vavamo uguiavoi uliale evige Iesuu tai vavaeabela tinu. Ige abu baita hohavoi namihai avoe, “Kosive, au Deividi mo. Iale noheho uvuai no tedaevenela.” ³¹ Katelahai louge ataeau abuhohou loui avoe, “Lainaho katelahalave. Isito tobekai uve.” Isito abu negolahai hohavoi avoe, “Deividi mo, noheho uvuai no tedaevenela.” ³² Kateai louge Iesuu lamisi ata abui kebia hohavei belagevei avoe, “La isiviale di laheho ono vade vai.” ³³ Ige abu namihai avoe, “Kosive, no isiviale a no tedaevege no nilahai.” Ige Iesuu abuhohou uvuai niabela levege solekavesite niabeu keduale keau dua vage abu nilahai Iesu ehovalu. ³⁴ (-)

21

Iesuu tota o baluga Dielusalemae hoilahanu.

(Maka 11.1-11; Luka 19.28-40; Dioni 12.12-19)

¹ Iesuu au esemuhi lohohiale tana mole Oliveta keve velehovosege Dielusalemau vuguvuguanu. Isi tiale o mole ese Betabedi ke vavae tisege Iesuu au esemu abui hanavenu. ² Isi namigevei avoe, “Talive o keve velehovoi ovo mole doniki ke abu umuvage eseveu vavavemo uale ke elehaliege vavehai holoevei lohove. ³⁻⁷ La ke vavehasege mesoho ata moleu la elegevei laheho louge namihai kosea, ‘Kosiveu isiviale no kobia holoevei avue tai.’ Lana kateai louge auna solekai loui kosea, ‘Duave. Malevei teve.’” Iesuu kateai au esemu namigevege abu tiale au louale ke valu. Isi doniki keta eseveta holoevei lohoale abu dabae ogo toholahai malei donikie ese golomo otovege Iesuu biloi ke golomo ugulamomu.

Iale vaveve keu belovetau subuta louale hoto ke mai selevetinu. Hoto keu loui avoe, “Dielusalemae ata namigevei kosea,

‘La kosiveu aike lae lohoma.

Keu ata uvevete.

Iale keu donikie esemo biloi ugulamoi lohoma.’”

⁸ Kateai donikimo ugulamoi lohosege ata moagatahoeau abu dabae ogo malei humahala tedisi tilu. Isege degomoleau idie vana hamai malei humahala tedisi tilu. ⁹ Ige Iesuu tisege ata degomoleau avuho uli holisi tilu. Isege degomoleau avuho gabi holisi tilu. Isime baita holahai loui avoe, “Seloo, Deividi mo ko hoesehavove. Kou Dilava ivimo lohoge Dilavana hoesehavoi. Iale nahi bahata ke hoesehavoi Dilava ivi ebagevai.”

¹⁰ Kateai loui lohoge Iesuu Dielusalemāe velemanu. Ige ata bahataeau ke evisi moleho loui avoe, “Hoto vadeuīke ko. Ata oleīke lohonu.” ¹¹ Ige Iesuluvuta lohoale keau namigeveī avoe, “Iesulike ko. Kou Galili vata keve o mole ivi Nasaleta ke beloveta.”

Iesuu dubumo ata nunuvenu.

(Maka 11.15-19; Luka 19.45-48; Dioni 2.13-22)

¹² Iesuu Diue dubu baluga ke uvue tiale dubumo maketilahi voivoilahamalebia nunuvenu. Isi moni senisilhamale kebia teibolo ekovehage moniabeu keiolahanu. Isi ugu voilahamale kebia batabata ekovehai kebia bahata nunuvenu. ¹³ Isi abuhō loui avoe, “Bukae Hotomo Dilavau loui avoe, ‘Di isiviale ataeau di o komo guligulīai di hoesehavogei.’ Isito laeau kateholisito vavoloe vaveve avuemo vama.”

¹⁴ Iesuu kateai abuhō loui gabiasēge nī kedute isi velo golote keau dubu ke uvue avue lohoge au kebia hoesegevenu. ¹⁵ Kateai dubue vaveve dua vage esebulūai ke elehai vahaeholahi tovulahi loui avoe, “Lohoge nahi Deividi mo ko hoesehavoi.” Katelahi loulage dubu nalimale kosivea isi Diue menaka loui haivemale keau ke elehai Iesuho itumulahu. ¹⁶ Isi avuhō loui avoe, “Ana abu louale ke evīnu.” Ige Iesuu namigeveī avoe, “Ito, di ke evīnu. Isito laea, lana Bukae Hoto mole dodaveholīlu. Hoto keu loui avoe, ‘Amu imale isi esebulu keabuna ke hoesehavō dua vai.’” ¹⁷ Iesuu kateai louito kebia haleveī Dielusalemā halei tiale o mole Beteni keve lahanu.

Iesuu idi mole vigiho louge gilīanu.

(Maka 11.12-14, 20-24)

¹⁸ Vavita vavita Iesuu hovelahi vaeta tota Dielusalemāe hoilahi lohonu. ¹⁹ Lohoale humaha tavae idi mole ivi vigi ke elehanu. Isi tiale isivīai ke bai ehai isi. Isito keu baiholisito numu inahanu. Ige au ke elehai avuhō loui avoe, “A keu bae tota hahumalīvebene.” Kateai lousege idi keu solekavesite gilīanu. ²⁰ Ige esemūabeau ke elehai vikolahu. Isi Iesu belahi avoe, “Idi kou oleve kateai solekavesite gilīanu.” ²¹ Ige Iesuu namigeveī avoe, “Di hoto ko louge evisi huhulahuve. Lana dolodoloholisito la evievimo negolahalīge di idi komo vale ke nahate lana vave. Ke unaha holiōholīnu. Isito lana tana koho loui kosea, ‘Toholahi davalamo tenela.’ Ige auna vai. ²² Iale lana evievimo negolahalīge onoleho guligulīlahi Dilava imihalīge la isivi ke maleve.”

Abu Iesu vuvunemo belahalu.

(Maka 11.27-33; Luka 20.1-8)

²³ Au kateai namigeveito tota Diue dubu balugae lohonu. Keve lohoale ata haivesege dubu nalimale kosivea isi oe kosive keau avue lohoale lobohavoi belahi avoe, “Oleīke vuvune aoge a vaveve kateale vama.” ²⁴ Ige Iesuu namigeveī avoe, “Usege di isiviale hoto mole loui la belagevege ke ihu loui di namihageto di bae oleu vuvune daoge di avuemo vaveve kateimale vamale ke loui la namigeveī. ²⁵ La huhuige oleīke vuvune Dioni omige au ata babatisogevunu. Dilava emena ataeabulike vuvune omīlu.” Kateai louge abu mole belageveī loui avoe, “Nahiabuna onole loui. Nahiabuna namihai kosea, ‘Dilavaīke vuvune ominu.’ Ige auna loui kosea, ‘Isito osialemoīke laeau hotove eviōholīlu.’” ²⁶ Isi nahiabuna loui kosea, ‘Ataeabulike vuvune omīlu.’ Ige keta anekianu. Kosealemo ataeau huhuige Dilavaīke vuvune omige au beloveta holīnu.” ²⁷ Hotoeabe keu uoholige abu Iesu namihai avoe, “Dioniu olemo vuvune male ke no hilokaholīlu.” Ige Iesuu abuhō loui avoe, “La katealemo di bae data di ole vuvunemo vaveve kateale vale loui la namigevelīvebene.”

Mo abūiau abu Mamae isivi vaveve

²⁸ Iesuu kateai namigeveito hoto mole deiada abuhō loui avoe, “Di hoto ko louge ko ihu huhulahaīto di namihave. Malaha mole igaeu mo abui houevenu. Iale keu vani mole tialeu au mo ovokina namihai avoe, ‘Ana bulue lovianela.’” ²⁹ Ige moveu namihai avoe, ‘Di ke valiho isivīholīnu.’ Isito gabie huhuinata tialeu bulue lovianu. ³⁰ Ige mamaveu halei tiale au mo ovokina namihale hoto ke igae loui hohove namihanu. Ige mo keu loui avoe, ‘Ito, dana ke vai.’ Isito keu ke vaholīnu. ³¹ Iale la huhuige ese abui kemo oleteu au mamae isivi vanu.” Ige abu loui avoe, “Ovokinave.” Ige au namigeveī avoe, “Di hoto seleve louge evive. Takesi malemale isi teibalhamale keabuna la haleveī Dilava matamae dogā keve tai. Isito laeau Dilava hoto evisi vaholīalemo bae keve talīvebene. ³² Kosealemo ata emogevemale Dioni keu lae lohoale uveve duae hoto loui la haivege la hotove maholīlu. Isito takesi malemale isi teibalhamale keau hotove malu. Ige la elehāto la vaveve toela halevaholīsi la uvu avuemo mavoholīlu.”

Bulu nalimaleau abu biage aīohavolu.

(Maka 12.1-12; Luka 20.9-19)

³³ Iesuu hoto ke loui gabiaito tota dovudovue hoto mole loui ata kebia namigevei avoe, “Di deiada mole louge evive. Vatae biage moleu bulue doge vai avuemo hote mole uaini haevei vavavemo hala houu bulu ke naliveve o mole egetana houu. Isi uaini ke bai vunahaveveho abata mole lovonu. Kateaito haeavamoleve taliho au bulu ke mai ata degomole ovei isiviale abu buluve ke nalisi. Isito halei haeavamoleve deiati tinu. ³⁴ Iniale hote ke bai ehaveve vaniu lohoge bulu ke biageu au esemu hanavei isiviale abu talive ata nehe kebiamo uaini ke bai degomole malei lohoi. ³⁵ Ige bulu ke nalimale keau esemu kebia vudievei esemu mole aiahavo visuhavolu. Isi mole hamage hatinu. Isi mole munetilu. ³⁶ Katelahai esemu kebia havege bulue biageu esemu moaga hanavenu. Ige bulu nalimale keau abu degomole haveale ke nahate kebiata havelu. ³⁷ Kebiata havege au gabivela au mo hanavonu. Isi huhuai avoe, ‘Abu bae di mo hamalivebene. Isito abuna hoesehavo.’ ³⁸ Isito bulu nalimale keau move elehai mole namigevei avoe, ‘Mo keu bulu ko biage moike. Lohoge nahi hamage au hatige elike bulu kou nahiele holisi. ³⁹ Isime tialeanu mo ke evudei mai bulu ke iae hamage au hatinu.”

⁴⁰ Iesuu deiada ke louge uoholige au namigevei avoe, “La huhuige bulue biagena lohoniage bulu nalimale kebiamo ono vade vai.” ⁴¹ Ige abu namihai avoe, “Auna lohoniage atae toela kebia havei. Isi tota bulu ke mai ata degomole ovege abuna naliliage hote keu hahumai baege abuna ke bai ehai tasaliai vaki mole malei biage omisi.” ⁴² Ige Iesuu kebia namigevei avoe, “Keu seleve. Isito lana Bukae Hoto mole dodaveholilu. Hoto keu loui avoe,

‘O houmaleau mune moleta o houveve ke kabebihavoale keike nova Dilava o hadebiveve mune holinu.

Dilavaike ke ebagemage nahi ke elehage keu nahie nimo duave selevelanu.’

⁴³ Bukae Hoto keu di vaveve lounu. Iale di tota hoto mole louge evive. Dilavau isiviale la malevege la adave uvumo ui. Isito laeau daho isiviholiale kemo auna la halevei ata degomoleau hotove evisi vamale kebia malevege abuna adave uvumo ui. ⁴⁴ Ige oleuleu mune ke vuvehaliage abuna abu ebika havei haluvisi uoholisi. Ige mune kena dobai ata mole hamage lave unahana ui.” ⁴⁵ Iesuu dovudovue hoto ke loui dubu nalimale kosive isi Balisia ata kebia namigevege abu hilokage vaveveabeike au abuhu lounu. Kosealemo mune keu Iesulike. Iale kebiau hotoveho isiviholisi kabebihavoalemo auna au dobai lohomale ke vanila kebia aiogevei. ⁴⁶ Katealemo abu isiviale Iesu mai hamai. Isito keau ata vabugevelu. Kosealemo ataeau hilokage Iesu keu beloveta ata.

22

*Otogoe tivevemo Iesuu dovudovue hoto mole lounu.
(Luka 14.15-24)*

¹ Iesuu tota dovudovue hoto mole loui kebia bahata haivenu. ² Avoe, “Dilavau ata malevege abu adave vuvunemo uveve keu vatae kosive mole mou au mahina melameho ata hohaveale ke nahate. ³ Kosive keu au esemu iovei loui avoe, ‘Talive ata igaegae namigevege abu di lovi vale komo lohoi.’ Ige esemuiabeau ata kebia namigevege keau lohohi isiviholilu. ⁴ Ige au tota esemu degomole hanavei loui avoe, ‘Talive ata kebia namigevege kosea, Di ovo havei ovoe ese patate kebiata havei bohisi auvale keu aike lahanu. Iale lohoge nahi amu ke alavoi isege di mou au mahina melamei.’ ⁵ Kateai au esemu namigevege abu tiaale ata kebia namigevelu. Ige ata keau kebia hoto evioholisi abu isivi unaha vai tilu. Moleu au bulue loviho tinu. Isege moleu au valahu niavaho tinu. ⁶ Tisege degomoleau esemu kebia vudievei havege abu haluvilu. ⁷ Ige vatae kosive keu itumu balugai au tualie ata iovege abu tiaale atae toela kebia havehatui oebeta mahoevelu. ⁸ Ige au tota au esemu degomole hohavei avoe, ‘Di mou au mahina melameveve loviu lahanu. Isito di ata namigeveale keau vaveve toela vale abu bae loholivebene. ⁹ Iale talive ata moageaeu humaha balugamo tai lohomale kebia elegevei namigevege abu di iveve komo lohoi lovi isi.’ ¹⁰ Ige esemuiabeau humaha baluga kela tiaale atae dua atae toela moaga elegevei kebia holoovei lohoge kosive ke ou gigianu.

¹¹ “Ige kosive keu lohoale isiviai ata kebia elegevei. Kebia elegevege malaha mole igaevu vigoabemo mahina melameveve ogo vaholinu. ¹² Ige au namihai avoe, ‘Di haoka, a keu mahina melameveve ogo vaholinu. Iale a osiohoike kove lohonu.’ Kateai namihage malaha keu hotoholinu. ¹³ Ige kosive keu au esemu namigevei avoe, ‘Malaha ke mai veloveta adaveta umuvai mai heie matamae lo keve mihatuve. Ige au keve ui uvuai ninaima bae monomo hedimagei.’” ¹⁴ Iesuu deiada ke loui gabiaito abuhu loui avoe, “Di louale keu koseanu. Dilavau ata moaga hohavei isiviale abu ove uvue tai. Isito au tabageveale ke unahaeabuna ove uvue tai.”

Balisia ataeau takesiavevemo Iesu belahalu.

(Maka 12.13-17; Luka 20.20-26)

¹⁵ Iesuu hoto kateale loulage Balisia ataeau ke evisi tialeau hotohotolahai isiviale hoto degomole loui Iesu belahai elike hotove kemo mai dibulae mavoi. ¹⁶ Katelahaito abu esemu degomole isi Elodi esemu degomoleta iovege abu Iesue tilu. Iiale namihai avoe, “No haivemale ata, no hilokage a keu hoto seleve unaha loumale ata. A ata ivite kebia vabugeveholisito ata bahatae vaveve loui kebiaho Dilava vaveve louma. ¹⁷ Iale no namigevenela. A huhuige no Loma gamanie kosive Sisa kemo takesiamale kena duave. Emena toelanu.” ¹⁸ Kateai namihage Iesuu uvuiabe toela ke hilokai abuhu loui avoe, “La keau lobe ataea. La di hoto hilokaito tota di vavae tobekai lohomale hoto loui isiviale di lobohavoge di dobai. ¹⁹ La moni oleteale mai takesiamale ke mage di elehai.” Ige abu monie luhu mai omilu. ²⁰ Ige Iesuu belagevei avoe, “Ole munanata ivivetaike moni ko luhumo ua.” ²¹ Ige abu namihai avoe, “Loma gamani kosive baluga, Sisa.” Ige Iesuu namigevei avoe, “Ito. Iale gamaniele gamani omive. Isi Dilavaele Dilava omive.” ²² Kateai louge abu ke evisi vikolahalu. Isi halevai tilu.

Sadukeau hovevevevemo Iesu belahalu.

(Maka 12.18-27; Luka 20.27-40)

²³ Vani ke igaemo Sadukea ataeau Iesue lohohu. Ata ke abulike huhulahai avoe, “Haluviale keau bae tota hovevevebene.” ²⁴ Iale abu Iesuu namihai avoe, “No haivemale ata, Moseseu subuta ata haivei loui avoe, ‘Malaha moleu mahinaito eseholisi hatige hohovena hovelahai gobuve melamei au nanaho ese hou.’ ²⁵ Iale no deiada mole louge evinela. Malaha mole igaenu nohehi komo uale keu mohoho bahata seveni (7) houevenu. Iniale vani mole ovokinaveu mahinai ese houholisito hatinu. Ige valavemo keu hovelahai au nanae gobu melamenu. ²⁶ Ige vaveve ke nahateu avuemo velemanu. Ige ke valamo moleu hovelahai gobu ke melameito hatinu. Ige ke valamo keau bahata igaegaeei gobu ke melaveito bahata haluvilu. ²⁷ Ige gabila keate keta hatinu. ²⁸ No deiada ke loualema a huhuige ata seveni (7) keabuna hovevevege keate kena ole mahina holisi.”

²⁹ Ige Iesuu namigevei avoe, “Di hilokage la Bukae Hotota Dilava vuvuneta hilokaholialemoike hoto ke loui Dilava humaha hosidilu. ³⁰ Iale di la namigevege evive. Haluviale keabuna hovevevege abu bae mole holovevebene. Isito abuna otogoe anelu nahate vai. ³¹ Dilavau Bukae Hotomo haluvialeu hoveveveve hoto louale ke lana dodaveholilu. ³² Au kemo loui avoe, ‘Dau Ebalahamu Dilava, Aisiki Dilava, isi Diekobo Dilava.’ Iale kemoike nahi hilokage keu nova nita uale kebia Dilava isi subuta haluviale munanaeabeu uale kebiata Dilava.” ³³ Iesuu hoto kateale louge ataeau ke evisi vikobe nimole valu.

Menaka olete igaenu balugataho.

(Maka 12.28-34; Luka 10.25-28)

³⁴ Ige Balisia ataeau evige Iesuu Sadukea atae hoto hamage hotoeabeu dobanu. Ige Balisia ataeau ke evisi mole bevuevei igaetoai Iesue lohohu. ³⁵ Kebia vigomo moleu menaka haivemale ata. Iale keu hovelahai isiviale hoto mole loui Iesu belahage au hotove kemo dobai. ³⁶ Au belahai avoe, “Au no haivemale ata. Iale a huhuige Mosese menaka kebiamo hoto olete igaenu balugataho.” ³⁷ Ige Iesuu namihai avoe, “‘A uvu bahata a isivi bahata a lulele bahata malei a Kosive baluga Dilava ke omisi hoesehavonela.’ ³⁸ Hoto ke igaenike menaka bahata evigevei baluganu. ³⁹ Ige ke valamo mole balugaenike ko. ‘A ebika hoesehavomale ke nahate a vavamo umale kebia isivi ovei hoesegevenela.’ ⁴⁰ Moseseu menaka hisalievale isi belovetaeau hisalievale hoto kebia bahatamo hoto abui keau balugataho seleve.”

Keliso kena ole valadamo lohoi.

(Maka 12.35-37; Luka 20.41-44)

⁴¹ Balisia ataeau keau lohoale igaetoasege Iesuu belagevenu. ⁴² Isi loui avoe, “La huhuige Bukae Hotou louale Diue ata tadeaveve Keliso kena ole valadamo lohoi.” Ige abu namihai avoe, “Bukae Hotou louale auna Deividi valadamo lohoi.” ⁴³ Ige Iesuu belagevei avoe, “Keu seleveike. Isito osialemoike Munanae Tumuu Deividi haivuge au subuta Keliso ho loui avoe, ‘Kosive.’ ⁴⁴ Deividu subuta louale keu koseanu. Avoe,

‘Dilavau di Kosive keho loui avoe,
Di ada inute kove ugulamonele.

Isege di aiahavomale kebia malevei a veloe heimo otovege ana kosiveabe holinela.’

⁴⁵ Lana evilu. Deividu hoto kemo Keliso ho loui avoe, ‘Di Kosive.’ Iale kemo Kelisona oleveve kateai tota Deividi valada holisi.” ⁴⁶ Kateai belagevege keau hotove ke ibina louveve keu anekianu. Vani kemo abu tota Iesu belahalihio vabulahalu.

23

Iesuu au esemu giginagevenu.

(Maka 12.38-39; Luka 11.43, 46; 20.45-46)

¹ Iesuu tota ata moaga isi au esemu kebiaho lounu. ² Isi avoe, “Diue menaka loui haivemale isi Balisia ata keau Mosese menaka ke loui la haivema. ³ Iale kemo hotoeabe evive. Isito lainaho ehovei vaveveabe vagelive. Kosealemo keau hoto ke loui ata haiveito ke ehovaholilu. ⁴ Katealemoike vaveveabe keu ataemo isuanu. Abu hoto baluga mai ataemo mavoge keu abuemo isuanu. Isito keau kebia tedaeve behame vaholilu. ⁵ Keau vaveve koseale vai isiviale ataeau kebia ehovei kebia tabagevei. Keabuna idie ese lovoi avuemo Bukae Hoto hisalilahai ogoe misi malei abu adamo umudigevei. Isi ke nahate valiho mole vai malei abu valimo umudigevei. Isi ogoe dua ataeau hatuvesite ke kaeahavoi ke malei hatugei. ⁶ Isi keabuna lovi vamale vani kemo tiliege matamae duae uguiaivoi isiviale ivite kebiahi igaetoagei. Isi abuna dubue tiliege vomue duamo uguiaivoi. ⁷ Isi isiviale maketie tige ataeabuna kebia ehovei hoesegevei abuhu loui kosea, ‘No kosivea.’ Isi isiviale ataeau abuhu loui kosea, ‘No haivemale ataea.’ ⁸ Ata keau vaveve kateale vama. Isito lainaho la ebika tabagevei isiviale ataeau laheho loui kosea, ‘No haivemale ataea.’ Kosealemo laeau ese igaea. Ige la haivemale Kosive keu igae. ⁹ Isi lainaho vatae ataho loui kosea, ‘No mama.’ Kosealemo la Mama baluga igaeu otogoe ua. ¹⁰ Isi lainaho la ebika tabagevege ataeau laheho loui kosea, ‘No kosivea.’ Kosealemo ata tedaeveve Keliso ke igaeu la Kosive. ¹¹ Iale la oleu la vigomo isiviale kosive holiho vaniege au la esemu holisi. ¹² Iale oleu au ebika ebagemale ke Dilavana etolemai. Isito oleu au ebika etolemale ke Dilavana ebagemai.”

Iesuu Balisiae vaveve toela lounu.

(Maka 12.40; Luka 11.39-42, 44, 47-52; 20.47)

¹³ Iesuu kateai au esemu haiveito Balisia ata isi Diue menaka loui haivemale kebiaho loui avoe, “La nohovu. La isiviholilu Dilava adae uvumo uliho. Kateike la vai la loboe vaveve kemo ataeau di hoto eviho isiviale kebia humaha bamui la humahata bamuma.

¹⁴ “Iei! Diue menaka loui haivemale isi Balisia ata la nohovu. Laeau loboe ataea. La keau gobuvu lobogevei oebamo kunaiabe malema. La katelahaito lobolahai atae nimo noinoi egete vama. Katealemo Dilavana vatehani baluga laovei.

¹⁵ “Iale menaka haivemale isi Balisia ata, la katelahamale la nohovu. Laeau loboe ataea. Lana e hoeveve haeavamole tiliege ata holoevege abuna la ehovei la vaveve ke nahate vage lana kebia aiogeveve. La kateale vamalemo kebiahi humahae toelala tima. Isito keabuna la vaveve toela ke evihai vaveve toela baluga vai.

¹⁶ “Iale la nohovu. Laeau ata nalievemale ataea. Isito laeau ni kedute kebia nahate holisi ata haive toela vama. La ata haivei loui kosea, ‘Mesoho lana la hoto vuvunete louliege dubue ivi unaha louge keu bae vuvunealivebene. Isito lana dubue uvumo golo ke ivi louliege la hoto kena vuvuneage lana ke vave.’ ¹⁷ La hoto ke loulalemo la luleleholisito ni kedute nahate vama. La huhuige oleteu baluga. Golo emena dubu. Dubu keu baluga. Kosealemo dubu keu uoholige golo keu bae balugalivebene. Isito dubu ualemoike golo keu baluga. ¹⁸ Isi la tota ata haivei loui kosea, ‘La oleu dubue vavamo mune vitale abu avuemo Dilava hoesehavomale ke ivi loui hoto tumute louale keu bae vuvunealivebene. Isito la oleu mune vitale kemo abu mesia mahosege au hoto tumute loui ivive louale ke hotona vuvuneai.’ ¹⁹ La hoto ke louto laeau ni kedute nahate vama. La huhuige oleteu baluga. Ono mole mai mahoi Dilava hoesehavomale ke emena mune vitale. Mune vitale keu baluga. Kosealemo kena abu ono mole mai ke golomo mahoaale ke mai tumutisi.

²⁰ Iale ata molena mune vitale kemo hotoe tumu louniege golovome mahoaale ketamoike au hotoe tumu lounu. ²¹ Ige ata olena dubumo hotoe tumu louniege Dilavau dubu ke uvumo umale ketahoike au hotoe tumu ke lounu. ²² Ige ata olena otogomo hotoe tumu louniege Dilava telona isi avuemo ugulamoale ketahoike au hotoe tumu lounu.

²³ “Menaka haivemale isi Balisia ata la nohovu. Laeau loboe ataea. Laeau la bulue lovi ke bahatamo taidi malei Dilava omima. La katelahaito Dilava menaka baluga ehovaholilu. Dilavau isivialeike laeau mole vaveve toela ibina va halevaito moleho uvulahai mole tedaevei kemo inutolotololahai. La vaveve baluga kebia vaveveito bae vaveve esehame kebiata vavevege duave. Isito laeau katelahaholilu. ²⁴ Laeau ata nalievemale ataea. Isito laeau ni kedute kebia nahate. La Dilava menaka baluga ke elehai ehovaholisito menaka esehame unaha elehai ehovama.

²⁵ “Menaka haivemale isi Balisia ata la nohovu. Laeau loboe ataea. La vaveve keau abu melegita kabutae vava totoaito uvuve totohiale ke nahate. Ataeau la vaveve elehage keu duave. Isito la uvu kemo huhuihuuie toela moageau uge la mole kunaiho isivilahama.

²⁶ Balisia ataea, la keau ni kedute nahate. Vasohuta la uvu ke hoesehavoge la vaveve keabuna bae duaveai.

²⁷ “Menaka haivemale isi Balisia ata la nohovu. Laeau loboe ataea. La keau abu alue vutamo mune otovei benievege taeale ke nahate. Abu katelahage ehue hovadave keu duave. Isito heie uvuve keve vavaeabe keau hisilalahu. Ige keve itava unahaeau ua. ²⁸ Iale laeau ke nahate. Ataeau la vava elehage duave seleve. Isito la uvu kemo loboe vaveve toela moagaeau ua.

²⁹ “Menaka haivemale isi Balisia ata la nohovu. Laeau loboe ataea. Laeau belovetaeau haluviale kebia vuta kaeagevei atae duaeau haluviale kebia vutata kaeagevema. ³⁰ La vaveve kateale vai loui kosea, ‘Noeau subuta no buluve vani kemo uvatege no buluveau beloveta haveale ke nahate vaholilu.’ ³¹ La loui kosea, ‘No buluveau beloveta kebia havelu. Iale hoto kemoike di hilokage lana kebia vaveve ke nahate vave. ³² Iale talive momolelahi la buluve vaveve ke nahate vavege. ³³ La keau utee esea. La vaveve keau uteu goligoliale ke nahate. Iale lana oleve kateai bae veneu hodovavesiteve tiveve ke aehai. Keu anekianu. ³⁴ Iale di la namigevege evive. Dana bae beloveta ata, lulelete ata, isi menaka loui haivemale ata kebia laheho hanavei. Ige lana kebia degomole havei degomole malei idimo haveve. Isi dubue uvue degomole visugevei kebia nunuvege abuna detuluvisi o igaegae tai. ³⁵ Lana kateale vage Dilavana ibinave vai vatehani baluga laovei. Subuta mole abu atae dua haveve keau haluvilu. Vasohuta la buluveau Eibolo hamage au hatinu. Ige abu kemo lavisi atae dua havei loholata gabivela abu Balakia mo Sekalaia mai dubuta mune vitaleta vigomo hamage au hatinu. ³⁶ Iale seleveta di la namigevei. Vaveveabe ke ibinana novae ata la kebiamo lohoi.”

Iesuu o baluga Dielusalemaho uvuanu.

(Luka 13.34-35)

³⁷ “Tei! Dielusalemaha ataea, la nohovu. Dilavau au hoto louveve beloveta laheho hanavege la muneta kebia havege abu haluvilu. Vani moagamoaga di isiviale la malevei di adae uvumo otovei. Kokoluguu au ese bevuevei goloeabemo amuleale ke nahate. Isito laeau daho isiviholilu. ³⁸ La katealemo gabie la o kena samiai uoholisi. ³⁹ Iale di la namigevege evive. La bae tota di vaveve dua elehalivebene. Isito lana la vaveve toelamo hoidevei loui kosea, ‘No Kosiveu Dilava ivimo lohoi no hoesegevenu.’ Lana kateai louliege bae tota di vaveve dua ke elehave.”

24

Diue dubu baluga koiaveve deiada

(Maka 13.1-2; Luka 21.5-6)

¹ Iesuu kateai loui kebia namigeveito dubu baluga ke halei tisege esemuiabeau avue lohoale namihai avoe, “Dubu baluga ke eleha. Dubu uokeu dubue dua baa.” ² Ige Iesuu namigevei avoe, “Seleveta di la namigevege evive. La dubu ke elehale ke ataeabuna gabie loholiege dubu ke koilahage mune moleu bae mune mole golomo ulivebene.”

Onovadeu gabie lohoveve

(Maka 13.3-13; Luka 21.7-19)

³ Iesuu kateale louito lohoale tana mole Oliveta ke kobola ugulamoi ahuvela ua. Isege esemuiabeau avue lohoale namihai avoe, “No namigevenela. Osiomalela vaveve katealena lohoi. Isi noeabuna oleve kateai a lohoveve vani ke hilokage a kemo lohoge vatana gabiai.”

⁴ Ige Iesuu namigevei avoe, “La ebia nenigeveve. Onoilage loboe ataeau la lobogevege dobuluvima. ⁵ Kosealemo ata moagaeabuna loholiege di ivimo la lobogevei loui kosea, ‘Dau Keliso.’ Isi kemo ata moaga lobogevei malevei. ⁶ Ataeau haeavamoleve mesoho vuguta tuvalilahage lainaho ke evisi vabulahagelive. Kosealemo vaveve katealena vasohuta lohosege ke iae vanie gabina bae lohoi. ⁷ Vani keu lohoho vasege vata mole ata keabuna hovevevei vata mole atahi tuvalilahai. Isege vata bahatamo vae balugaeabuna lohoi. Ige vata bahatae hamu balugana hatui tai. ⁸ Vaveve katealena vasohuta lohoheto bae gabie vaveve toela degomole abuna bae lohoi.

⁹ “Isito vani kena lohoholisege ataeabuna la malevei lahavege lana vatehani malei haluvive. La di ata holialemo atae abuna laheho itumulahi huhuihuuie toela vai. ¹⁰ Isi vani kemo abuna katelahasege ata moagaeabuna abu evievimo dobuluvisi. Abuna moleho hailahai molehi ugolokolohai. ¹¹ Isege loboe beloveta moagaeabuna lohoi ata moaga lobogevei. ¹² Ige kemo vaveve toela balugana matama bahata sonumai tige ataeau moleho isivilahai mole tedaevemale ke abu bae valivebene. ¹³ Isito oleuoleu abu evievimo negolahamale keabuna vanie gabila ukolikoli malei. ¹⁴ Iale di esemuiabuna tiliege ataeau

Dilava adae vuvunemo uveve hotoe dua ko loui ata bahata namigevege abu bahata hotove ke evige vatana bae gabiai.”

Vaveve mole toelau lohoveve

(Maka 13.14-23; Luka 21.20-24)

¹⁵ “Vanie gabila lana bae vaveve nimoletu Diue dubu baluga ke uvumo lamige bae elehave. Subuta beloveta Danielau vaveve keike au loui hisalianu. (Iale oleuoleu hoto ko dodaveliege ihuve kaovai.) ¹⁶ Vaveve katealeu lohoge Diudia vata komo umale la keau detuluvisi tanae teve. ¹⁷ Ige la oleu au oe dokoe uniege aulako oe uvue tai au hau malelive. ¹⁸ Isi la oleu au bulue uniege aulako au oe hoilalahi au dabae ogo malive. ¹⁹ Vani kela keate ese tobute kebia nohovu. Isege keate degomole ese gite maleale kebiata nohovu. Abuna vani kela vaveve toela malei. ²⁰ Iale guliguliage elike vaveve katealeu vanie toelamo mesoho bulamo loho haleito vanie duamo lohoi. Ige elike vanie duamo detuluvive. ²¹ Vani kemo vaveve toela kena balugataho selevelai. Subuta toela baluga katealebeu vatae lohoholinu. Isi katealeu bae tota gabie loholivebene. ²² Vani keu lohoge Dilavana au ata tabageveale kebia huhuevei vani ke mai vuguvugutisi. Isito auna vani ke mai vuguvugutiholige ata bahatae abuna haluvise.

²³ “Tale vani kemo mesoho loboe ataeau laheho loui kosea, ‘Kelisoike ko lohonu.’ O mesoho loui kosea, ‘Avuike uoke lohonu.’ Ige lainaho hotoeabe evilive. ²⁴ Kosealemo loboe keliso isi loboe beloveta keabuna bae lohoholige vaveve degomoleta vikoe vaveve kebiata vaevei isiviale Dilava ata lobogevei malevei. ²⁵ Isito vani keu lohoholisege di vasohuta vani ke vaveve loui la namigevege evive.

²⁶ “Mesoho ataeabuna la namigeveve kosea, ‘Elehave. Kosive keu tomagie ua.’ Ige lainaho keve talive. O mesoho abu loui kosea, ‘Elehave. Kosive keu kove hogolalahi ua.’ Ige lainaho hotoeabe evilive. ²⁷ Kosealemo vani velemamage hatau nivolekai lohoi vani dobamaleve kibalai tige ataeau elehale ke nahate Atae Esena otogomo dobai lohoge ataeabuna bahata elehai. ²⁸ Mesia moleu hatisi hisiage uguiau ke iliho mole bevueveale ke nahate vaveve nimoletu keabuna velehovoge lana ke elehai huhuige di lohoveve vani vuguvuguanu.”

Atae Eseu lohoveve

(Maka 13.24-27; Luka 21.25-28)

²⁹ Iesuu kateai louito tota loui avoe, “Vani kemo vaveve toela katealeu lohoholige gabiasege iave keve vanina loa. Ige batau bae halulivebene. Ige didi abuna otogomo keiolalahi. Isege onobenobe bahata otogomo umale keabuna kibikibiai solalahi. ³⁰ Kateimale vanimo Atae Eseu lohoveve vaveve kena otogomo velemage vatae ata bahata keabuna ke elehai ninalalahi. Isi elehasege Atae Esena au vuvuneta au atagata goe golomo dobai lohoi. ³¹ Ige kibiu hotoige auna au anelu iovege abuna vata bahatae tiliege vatae dei abuita abuita keve au ata tabageveale kebia bahata malevei igaetoai bevuevei.”

Idi mole vigi ke vavevemo lulelelahave.

(Maka 13.28-31; Luka 21.29-33)

³² “Idi mole ivi vigi kemo di hoto mole louge lulelelahave. Idi kena humuai velahage lana ke elehai hilokage vaganau vuguvuguanu. ³³ Iale ke nahate di loui la namigeveale vaveve keau lohoge kebia elegevei loui kosea, ‘Atae Eseu lohoveve vuguvuguai udahae vavamo ua.’ ³⁴ Selevela di la namigevevema. Novae ata koeabuna haluviholisege di louale vaveve kebia bahatae abuna lohoi. ³⁵ Ige otogona vatati uoholisi. Isito di hotou bae uoholilivebene.”

Atabeu Iesuu lohoveve vani ke hilokaholinu.

(Maka 13.32-37; Luka 17.26-30, 34-36)

³⁶ “Atabeu di lohoveve vani ke hilokaholinu. Ige otogoe umale anelu kebiata hilokaholinu. Ige data ke hilokaholinu. Isito di Mama igaeu ke hilokanu. ³⁷ Ataeau subuta Noa vanimo vamae ke nahate ataeabuna Atae Eseu lohoveve vani ketamo katelalahi. ³⁸ Noa vani kemo e balugau lohoholisege ataeau lovi isi e isi mole holoevema. Abu katelalahage Noau bouti baluga uvue tinu. ³⁹ Abu katelalahi hilokaholisege solekavesite e balugau lavui kebia bahata havehatunu. Iale Atae Eseu lohoveve vani kemo abuna katelahasege auna lohoi. ⁴⁰ Vani kemo malaha abui abuna igaetoai bulue lovilahasege Dilavana mole maito mole halei. ⁴¹ Ige keate abui abuna igaetoai lovi vasege Dilavana mole maito mole halei. ⁴² Iale Atae Eseu lohoveve vani ke la hilokaholiale kemo la ebia nenigeveve. ⁴³ Isi ko huhulahave. Oe biagena vavoloe atau lohoveve vani ke hilokai nita uniege vavoloe ata keu bae lohoi ovemo vavoloalivebene. ⁴⁴ Iale ke nahate lata nita uve. Kosealemo Atae Eseu lohoveve vani ke la hilokaholisege auna bae lohoi.”

*Esemue dua isi esemue toela
(Luka 12.41-48)*

⁴⁵ “Iale esemu olenā au evievimo negoai luleleige Kosivevena ke ebagemage auna esemuiaibe degomole kebia nalievei vavita gututa lovi ovegei. ⁴⁶ Isege Kosivevena tiniēge tota hoilāhai lohoniēge esemuveu lovie dua vale ke elehai vahaehove vai. ⁴⁷ Iale seleveta di la namigevege evive. Kosivevena au esemu ke ebagemage auna kunaive bahata nalievei. ⁴⁸ Isito kena esemu toela holiniēge auna huhuai kosea, ‘Di Kosive keu tiale au bae solekai loholivebene.’ ⁴⁹ Isi kemo auna Kosive ke esemu aiogevei havei tiniēge lovi baluga isi atae toelahi e toela igēi. ⁵⁰⁻⁵¹ Iniege vani mole Kosiveveu lohoveve vani ke hilokaholisege auna lohoniēge esemu ke elehai hamai lovi kemo iomage auna tiniēge loboē ataeau umale matamaē toela keve ui. Matama keve ataeabuna uvulāhai ninalahaime monomo hediavoēi.”

25

Mahoho ada mole isi ada mole kebiae deiada

¹ Iesuu tota loui avoē, “Vani kela ataeau Dilava adae vuvunemo uveve mesoho uoholiveve keu mahoho ada mole isi ada mole kebia vaveve nahate. Keau abu lameba hanevei mo moleu au mahina melameho vage abu elehaho tilu. ² Mahoho ada mole keau luleleholiolihilu. Isege ada mole keau luleletea. ³ Luleleholiale keau lameba maleito kelesinibe malei tihohililu. ⁴ Isege lulelete keau botolomo kelesini binihei malei tilu. ⁵ Keau bahata tiale mahina melameveve mo ke hemei ulage keu solekai lohoholinu. Ige mahoho kebia niu haniage abu ladevelu.

⁶ “Ladevesege vavie minamo ata moleu hoai avoē, ‘Mahina melameveve ata keu lohoma. Iale lohoge nahi talive hoesehavoi.’ ⁷ Kateai louge mahoho nehe keau hovevevei abu lameba hoesegevelu. ⁸ Ige luleleholiale keau lulelete kebia namigevei avoē, ‘No kelesiniu uoholima. Iale kelesinibehame noeveve.’ ⁹ Ige lulelete keau namigevei avoē, ‘Ba, no bae laovelivebene. Kosealemo kelesini kou nahie neniholiholinu. Iale talive valahue voilahave.’ ¹⁰ Katelāhai louge luleleholiale keau hovevevei kelesini voivevohu. Keve tisege mahina melameveve keu velemanu. Ige lulelete neheau hemei uale keau avuluvuta oe uvue lovie ilihilo tilu. Oe uvue tisege oe biageu udaha bamunu.

¹¹ “Isege gabie mahoho nehe luleleholiale keau velehovoi udaha hamai loui avoē, ‘Kosive, noheho udaha alavonela.’ ¹² Ige au abuhu loui avoē, ‘Seleveta di la hilokaevoholinu. Oleme laea.’” ¹³ Iesuu deiada ke louito tota namigevei avoē, “Nibie tumu vave. Kosealemo laeau di lohoveve vani ke hilokaholilu.”

*Kosive moleu au esemu moni ovenu.
(Luka 19.11-27)*

¹⁴ “Di lohoveve keu koseanu. Kosive moleu o haevamoleve taliho au esemu abuita igaeta hohavege abu avue lohohu. Ige au kebia namigevei isiviale keau kunaive nalievei. ¹⁵ Isime kateai luleleabe kemo moni ovenu. Au vasohuta vai taoseni kina (K5,000) mai mole ominu. Isi tu taoseni kina (K2,000) mai mole ominu. Isi uani taoseni kina (K1,000) mai mole ominu. Kateai kebia oveito halevei haevamoleve tinu. ¹⁶ Isege vai taoseni kina (K5,000) maleale keu solekai ke mai tiale monite ata mole ominu. Iniale tota kemo vai taoseni (K5,000) mole manu. ¹⁷ Ige emo iavemo tu taoseni kina (K2,000) maleale keu avuta ke nahate vai tu taoseni (K2,000) mole manu. ¹⁸ Isito uani taoseni kina (K1,000) male keu kateholisito tiale vata lovi au kosive moni ke mai abavunu.

¹⁹ “Iniale vani moagau uoholige esemu kebia kosiveu tota hoilāhai lohoale esemu kebia hohavei isiviale abu moni maleale ke vaveve abue mo kaovai hilokai. ²⁰ Ige oe nehe vai taoseni kina (K5,000) maleale keu lohoale ke mai omisi tota vai taoseni kina (K5,000) mole keta malei ominu. Isi namihai avoē, ‘Kosive, a vai taoseni kina (K5,000) mai daoale keike di mai tiale ata mole omisi tota kemo vai taoseni kina (K5,000) mole ko manu.’ ²¹ Ige kosive keu au esemu ke namihai avoē, ‘A keu esemue dua. A keu di moni ke nalieve dua vanu. A monie ese kemo lovie dua vale kemo dana a ebagemai lovi baluga mai aoge ana ke nalinela. Iale lohoge nahi vahaeholāhai.’ ²² Ige tu taoseni kina (K2,000) maleale keu lohoale au kosive namihai avoē, ‘A tu taoseni kina (K2,000) mai daoale ke di mai tiale ata mole omisi tota kemo tu taoseni kina (K2,000) ko manu. Iale ko bahata malenela.’ ²³ Ige kosive keu namihai avoē, ‘A keu esemue dua. A keu di moni ke nalieve dua vanu. A monie ese kemo lovie dua vale kemo dana a ebagemai lovi baluga mai aoge ana ke nalinela. Iale lohoge nahi vahaeholāhai.’ ²⁴ Ige uani taoseni kina (K1,000) male keu lohoale namihai avoē, ‘Kosive di hilokage au ata negote. A bulu holioholiale kemo ana lovi malenela. Isi a vata haholiale kemo ana tiniēge lovi lovonela. ²⁵ Iale kemoike di a vabuhavoi tiale vata lovi a moni mai daoale ke malei abavunu. Iale a moni keike di mai lohoale ko elehanela.’

²⁶ Ige kosiveu avuho loui avoe, ‘A keu esemue toela. A keu neniai di lovi vaholinu. A hilokage dau di bulu holihoialiale kemo dana lovi malegei. Isi di vata haholiale kemo dana lovi lovogei. ²⁷ Iale abege di moni mai aoale ke a mai banikamo mamoge duave. Ilive elike moni ke goloe moleta mage duave. Isito a kateholinu.’ ²⁸ Kateai namihaito au esemu mole namihai avoe, ‘Avuemo moni ke mai uokeve teni taoseni kina (K10,000) maleale ke ominela. ²⁹ Kosealemo oleu moaga maleale kena moaga malei. Isito oleu maleholiale keu bae onobe malelivebene. ³⁰ Iale esemue toela ke mai heie matamae loe ataeau uvulahai ninalahaime monomo hediavomale keve mihatunela.’ ”

Mamoe isi nanigosie deiada

³¹ Iesuu deiada ke loui namigeveito tota hoto mole loui namigeveii avoe, “Gabie Atae Esena au atagamo dobai lohoge anelu bahata keabuna avuluvuta lohoi. Ige auna au telona atagatemo ugulani atae vaveve kaovai. ³²⁻³³ Isege vatae ata bahatae abuna igaetoai vudivemo ui. Ige auna kebia tasaligeveii degomole malei vaki mole otovei degomole malei vaki mole otovei. Ovo nalimaleu mamoaeta nanigosita tasalieveale ke nahate auna mamoe malei au ada inuteve otovei. Isi nanigosi malei au ada agiteve otovei. ³⁴ Auna kateaito au ada inuteve uale kebiaho loui kosea, ‘Di Mamau la vahaeho vai la hoesegevenu. Iale loholive di Mamau subuta vasohuta vata vaholisito la adave vuvunemo uveve matamae doga vale keve uve. ³⁵ Kosealemo di vaeisege la lovi mai daovalu. Isi di enuisege la e hai daovage di inu. Isi di la oe ohanoi tisege la di mai o hatulu. ³⁶ Isi di ogoholisege la ogo mai daovalu. Isi di vavahaniasege la di elehai di tedaholu. Isi di dibulae usege la tiale di elehalu.’ ³⁷ Auna kateai louge atae duaeau adave inuteve uale keabuna hotove ibina vai avuho loui kosea, ‘Kosive, osiomalela a vaeisege no lovi mai aovalu. Isi a enuisege no e hai avoage a inu. ³⁸ Isi oleveike a noe lohosege no a mai o hatulu. Isi a ogoholisege no ogo mai aovalu. ³⁹ Isi osiomalelaike a vavahaniasege no a elehai a tedaholu. Isi a dibulae usege no tiale a elehalu. Osiomalelaike no vaveve kateale aemo valu.’ ⁴⁰ Ige auna namigeveii loui kosea, ‘Seleveta di la namigeveii. Mesoho la oleu di ata molehame ivi holihoialehame ke hoesehavoi vaveve kateale avuemo vale keu daemoike au ke vanu.’

⁴¹ “Auna kateai kebiaho louito au ada agiteve uale kebiaho loui kosea, ‘Lotai evihave. La keau Dilava nimo toela balugalu. Talive Dilavau Seteneta esemuiaetahoe vene hodovavesite vai mamoaale keve uve. ⁴² Kosealemo di vaeisege la lovi daovaholilu. Isi di enuisege la e hai daovaholilu. ⁴³ Isi di la oe ohanoi tigeto la di mai o hatuholilu. Isi di ogoholisege la ogo daovaholilu. Isi di vavahaniasege la di tedahoholilu. Isi di dibulae uge la dae tai di elehaholilu.’ ⁴⁴ Auna kateai louge abuna hotove ibina loui namihai kosea, ‘Kosive, osiomalelaike a no oe ohanoi lohoge no a mai o hatuholilu. Isi a vaeai enuai ogoholisi vavahaniiai dibulae usege no a elehai a tedahoholilu.’ ⁴⁵ Ige auna namigeveii loui kosea, ‘Seleveta di la namigevege evive. Laeau di ata molehame keho isiviholisi tedahoholiale keu daike la ke tedahoholilu.’ ⁴⁶ Ige Dilavana vaveve kateale vamale ata kebia hanavege abuna veneu hodovavesite keve ibinae toela malei. Isito vaveve dua vamale atae dua keabuna ehue tiliege ukolikoli malei.”

26

Abu Iesu maveve humahada kaovama.

(Maka 14.1-2; Luka 22.1-2; Dioni 11.45-53)

¹ Iesuu hoto ke bahata loui au esemu haivei gabiaito tota abuhou loui avoe, ² “La hilokage vani abuita uoholisege Diue vahaeho vani Basova kena lohoi. Ige vani kemo ata molena Atae Esehohaii mai atae toela ovege abuna mai idie domo hamai.”

³ Iesuu kateai lousege dubu nalimale kosiveau, Diue menaka loui haivemaleau isi oe kosive keau igaetoai dubue kosive baluga Kaiabasi oe lohohu. ⁴ Keve lohoale Iesu maveve humaha kaovai isiviale lobohavoi mai hamage au hatai. ⁵ Isi mole namigeveii avoe, “Nahi vahaeho vani kemo va halevai. Kosealemo nahiaabuna kemo mage ataeabuna ke elehai itumulahai nahie havei.”

Keate moleu Iesu hativevemo hoesehavonu.

(Maka 14.3-9; Dioni 12.1-8)

⁶ Kateisege Iesuu Betenine subuta lebolasi male Saimoni ke oe lovi ima. ⁷ Avuti lovi isege keate moleu deholo mole hagote mai lohoale kinavemo ehosivanu. Deholo ke ibinau balugataho. ⁸ Kateige Iesu esemuiau ke elehai itumulahai mole namigeveii avoe, “Senisi ke ibinau balugataho. Iale osiohoike keate keu ke bahata ehosivahatunu. ⁹ Abege au ke mai voiai kemo moni baluga malei kunaiholimale kebia ovege duave.” ¹⁰ Kateai louge Iesuu ke evisi abuhou loui avoe, “La osiohoike hoto kateale loui keate ke aiohavoma. Keu

daemo vaveve duaike au ke vanu. ¹¹ Vani bahata kunaiholimale keabuna lahehi usege lana bae kebia tedeavegeve. Isito dau bae lahehi vani bahata ui egealibene. ¹² Keate kou senisi mai daemo ehosivale keu koseanu. Di hativeveu aike vuguvuguike vage au ke vai di vava hoesehavonu. ¹³ Seleveta di la namigevege evive. Di esemuabuna oleve keve tiliege hotoe dua loui ata haivei keate kou vale keta loui ata namigevege abuna au onole vale ke huhulahagei.”

Diudasiu Iesuho haiale

(Maka 14.10-11; Luka 22.3-6)

¹⁴ Iesu esemu tuelo (12) kebiamo ata mole ivi Diudasi Kaliota keu dubu nalimale kosive kebiae tinu. ¹⁵ Isi namigeveve avoe, “Dana Iesu mai laovege lana moni vaesute malei daovave.” Ige abu moni dodavelata vahate bahata teti (30) malei omilu. ¹⁶ Ige kemo Diudasiu lamisi Iesu maveve humaha ke kaovama.

Iesuu au esemuhi Basova lovi ilu.

(Maka 14.12-21; Luka 22.7-14, 21-23; Dioni 13.21-30)

¹⁷ Diue vahaeho vani Basova keu lohonu. Vani kemo abu bae beikini baudata valava mahoale ke ilivebene. Iale vani kemo esemuiou namihai avoe, “A isiviale noeabuna oleve keve Basova lovi vage nahi isi.” ¹⁸ Ige Iesuu namigeveve avoe, “Talive Dielusalemae ata mole namihai kosea, ‘Nahie haivemale kosive ke vaniu vuguvuguanu. Iale keu isiviale au esemuhi a omo Basova lovi isi.’” ¹⁹ Kateai namigevege esemuiabeau tiliale au louale ke nahate o kemo Basova lovi valu.

²⁰ Iniale gutumo Iesuu au esemu tuelo (12) kebiahi ugulamoi lovi ilu. ²¹ Lovi isege Iesuu lovi avoe, “Seleveta di la namigevege evive. La mole igaena di mai atae toela ovei.” ²² Ige abu ke evisi uvulahi igaegaeai Iesu belahai avoe, “Kosive, danike a ke huhuai hoto ke lounu.” ²³ Ige Iesuu namigeveve avoe, “La moleu daiti melegi igaemo igaetoai lovi iale kena bae di mai ata ovei. ²⁴ Ige Bukae Hotou louale ke nahate dana hatai. Isito oleu daho haiale ata ke nohoma. Abege neinaveu mamoholige duave. Isito neinaveu mamoge au di mai ata oveale kemo auna vatehani baluga malei.” ²⁵ Kateai louge haiale ata Diudasi keu hovelahai namihai avoe, “No haivemale ata ana danike huhuai ke lounu.” Ige Iesuu namihai avoe “Avuike a ke lounu.”

Aleto

(Maka 14.22-26; Luka 22.15-20; 1 Koliniti 11.23-25)

²⁶ Iesuu kateai louito ke iae abu lovi isege valava mai hoesehavoi ke vakoai au esemu ovenu. Isi namigeveve avoe, “Kou di misilike ko. Iale ko malei ive.” ²⁷⁻²⁸ Isi tota kabu mai hoesehavoi mai ovei namigeveve avoe, “Di tahoike ko. Di tahou lotige Dilavana ke elehai menakae doge mamoi ata bahatae toela ulihai. Iale la bahata ko mai ive. ²⁹ Isito di la namigevege evive. Di bae vata kove tota lahehi e ko i molealibene. Isito gabie di Mamae matamae doge keve nahi bae igaetolahi uainie doge isi.” ³⁰ Kateale louge uoholige abu nogoli louito halevai Oliveta tanae tilu.

Iesuu Bitau lobohavoveve hoto lounu.

(Maka 14.27-31; Luka 22.31-34; Dioni 13.36-38)

³¹ Abu tisege Iesuu namigeveve avoe, “Novae vavi komo la bahatae abuna di halevai detuluvisi tihatuve. Kosealemo Bukae Hotou lovi avoe, ‘Dilavana mamoe nalimale ata ke hamage mamoeve abuna detuluvisi igaegaeai.’” ³² Isito auna tota di etuvage dana hovelahai Galili vatae tisege lana bae keve tiliege di elehave.” ³³ Kateai louge Bitau hovelahai namihai avoe, “Mesoho a esemu degomole koeabuna a halevai. Isito dau bae a halelivebene.” ³⁴ Ige Iesuu Bita namihai avoe, “Seleveta di a namihage evi. Novae vavimo kokoluguna hotoholisege ana bae di vovoho abuita igaetanela.” ³⁵ Ige Bitau negoai avuho lovi avoe, “Di bae a vovohoveve hoto ke loulivebene. Halege a hatige dana data hatai.” Kateai louge esemu keau bahata hoto ke igae loulu.

Iesuu Gesemanie guligulianu.

(Maka 14.32-42; Luka 22.39-46)

³⁶ Abu katelahai louge Iesuu kebia holoeveve abuhi tiale matama mole ivi Gesemanie keve velehovolu. Ige au keve abuhou lovi avoe, “Kove usege di talive uokeve guliguliai.” ³⁷ Kateai au esemu kebia haleveito Bita isi Sebedi mo abuita kebia unaha holoeveve abuhi tilu. Tisege uvuve keu ono vadeu avuemo lohoveve ke huhuige avuemo isuanu. ³⁸ Ige au esemu kebia namigeveve avoe, “Di uvu balugage di uvuu di mai hatihatie humahamo tima. Iale komo ulive lainaho ladevelive. Isito daluvuta nita uve.” ³⁹ Isi kateai louito tiale iekela kome bokoai vata bisi holumai Dilava imihai lovi avoe, “Mamai, a isivianiege vatetumu

ko daemo mai evihanela. Isito a isivi unaha. A isiviage dana vatetumu ke malei. Isito a isiviholige di bae ke malivebene.”

⁴⁰ Au kateaito hoilalahai au esemu abuita igaeta kebiae lohoge keau ladevema. Ige au Bita namihai avoe, “Osialemoike la vanie ni igae komo daluvuta nita uoholima. ⁴¹ Negobedai nita ui di Mama imihave. Ilive elike vaveve mole toelau laemo lohoge la bae kemo dobuluvillebene. La uvu keu isiviai nita ui. Isito la vava keu negoholinu.”

⁴² Kateaito tota halevei tiale iekela au Mama imihanu. Isi loui avoe, “Mamai, di isiviale vatehani ko aehai. Isito a hilokage di kateige keu anekianu. Iale dana a isivi unaha vai.”

⁴³ Kateai louito hoilalahai lohoale au esemu elegevege niabeu hani selevelalelua ladevelu. ⁴⁴ Ige Iesuu halevei tiale tota au Mama imihai au subuta louale ke nahate lounu. ⁴⁵ Isi tota halei hoilalahai au esemue lohoniale abuhu loui avoe, “Lana sohu ladevei uma. Isito abu di mai atae toela oveveve vaniu lohonu. ⁴⁶ Iale hovevege nahi tai. Elehave. Daho haiale malaha keike uoke lohonu.”

Abu Iesu malu.

(Maka 14.43-50; Luka 22.47-53; Dioni 18.3-12)

⁴⁷ Iesuu kateai lousege esemuve mole Diudasi keu lohonu. Ige ata moagaeau avuluvuta lohoale keau siga matagevevi visuta matagevevi lohohu. Diue dubu nalimale kosive isi oe kosive keau louike vage abu Iesu maliho lohohu. ⁴⁸ Ige Iesuho haiale malaha keu subutaikke ata moaga kebia namigevevi avoe, “Elehalive di talive malaha ke evudei ulikukuhavoge ke mave.” ⁴⁹ Iniale Diudasi lohoale velemai inuta tiale Iesu namihai avoe, “Di Kosive, ana duave.” Isi kateai evudei ulikukuhavonu. ⁵⁰ Ige Iesuu namihai avoe, “Di haoka, momoleai a osioho kove lohoale ke vanela.” Ige ata nehe keau hoveveve Iesu evudei malu. ⁵¹ Ige Iesu esemu moleu au siga mai dubu nalimale kosive ke esemu mole golema heisi etulenu. ⁵² Ige Iesuu au esemu ke namihai avoe, “Kate haleito a siga mai mamonela. Kosealemo oleuoleu sigata ata havege abuna abuta ibinaveho sigata kebia havei. ⁵³ Ana hilokaholinu. Dana isivianiege di Mama imihage auna solekavesite anelu moagamoaga hanavege abuna di tedahoi. ⁵⁴ Isito dana kateige Bukae Hotou louale keu bae selevelivebene. Di isiviale abu di mage elike Bukae Hotu mai selevelitisi.”

⁵⁵ Au kateai au esemu namihaito ata moaga kebia namigevevi avoe, “La huhuige dau vavoloe ata selevel. Ilike vage la di maliho sigata visuta malei lohohu. Di vani bahata la dubu baluga keve timale ata haivema. Isito osialemoike la keve di maholilu. ⁵⁶ Isito vaveve bahata koeau beloveta ataeau subuta Bukae Hotomo hisialiale ke mai selevelitilu.” Kateai lousege esemuiabeau bahata halevai detuluvitisi tilu.

Iesuu Diue kanisolo baluga kebia vudimo laminu.

(Maka 14.53-65; Luka 22.54-55, 63-71; Dioni 18.13-24)

⁵⁷ Ata keau Iesu evudei mai dubu nalimale kosive Kaiabasi keve tilu. Keve Diue menaka loui haivemale isi oe kosive keau mole bevuevevi igaetoai ua. ⁵⁸ Abu Iesu mai tisege Bitau kebia ialialigevevi tiale keu dubu nalimale kosive ke oe ulidae tinu. Tiale keu bukateau uguivomale keve abuhi ugulamoi isivialeike abu Iesuemo vaveve oleteale vale ke bahata elehai. ⁵⁹ Isege dubue kosive isi oe kanisolo keau isiviale Iesu vavamo loboe hoto loui hamage au hatai. ⁶⁰ Ige ata moagaeau lohoale vavavemo lobolahage kosive keau ke kaovaito hamaveve humaha elehaholilu. Ilage gabila malaha abuitaeau hoveveve hoto mole loulu. ⁶¹ Abu loui avoe, “Malaha keu loui avoe, ‘Dana Dilava dubu baluga ke koiai. Iniege vanie ni abuita igaetana uoholige dana tota ke houhi gabiai.’”

⁶² Ige dubu nalimale kosive balugau hovelalahai Iesuho loui avoe, “Ana valve hotoeabe abu loulame ke ibina loui namigevevi.” ⁶³ Ige Iesuu hoto ke ibina louholinu. Ige dubu nalimale kosive baluga keu tota belaha moleai avoe, “Di ukolikoli Dilava ke ivimo di a mai a vaveve kaovama. Iale ke ivimo hoto selevel loui no namigevenela. Au ana selevela Dilava mo Keliso.” ⁶⁴ Ige Iesuu namihai avoe, “Avuike a ke lounu. Iale di la bahata namigeveve eive. Lana ui tilege gabie Atae Esena ehue vuvunete Kosive ke ada inuteve ugulamoi togo halei goemo dobai lohoge lana elehave.” ⁶⁵ Kateai louge dubu nalimale kosive baluga keu itumuai au ogo edikohai ata namigevevi avoe, “Hoto kemoike keu Dilava ivi aiahovonu. Iale kemo nahi bae ata degomolemo vaveveve kaovalivebene. La aike hotoe toelaike ke evilu. ⁶⁶ Iale la isiviage nahi avuemo osioi.” Ige abu namihai avoe, “Keu vaveve toela vanu. Iale hamage au hatai.”

⁶⁷⁻⁶⁸ Isime nivemo violalahai visuhavoma. Isege degomolemo adata nivemo hamai avuhu loui avoe, “Selevela Dilavau a hanavoge a Keliso holialemo no namigevenela. Oleike aike ahamonu.”

Bitau Iesu vovohonu.

(Maka 14.66-72; Luka 22.56-62; Dioni 18.15-18, 25-27)

⁶⁹ Abu katehasege Bitau heie ologoe ua. Ige dubue kosive baluga ke omo loviemale ma moleu lohoale Bitau elehai avuho loui avoe, “A keu Galili ata Iesuti loviemale ata.”
⁷⁰ Ige Bitau ata kebia bahata vudimo Iesu vovohonu. Isi ma ke namihai avoe, “A onole louale ke di hilokaholinu.”
⁷¹ Isito tiale udahamo lamisi usege o kemo lovimale ma moleu lohoale Bitau elehanu. Isi ata namigevei avoe, “Iesu keu Nasaleta ata. Iale ke esemu moleike ko.”
⁷² Ige Bitau hotove hamai namihai avoe, “Seleveta di a namihai. Di malaha ke hilokaholinu.”
⁷³ Kateai louito usege lavisi umale keau Bitau lohoale namihai avoe, “Seleveta a keu esemuve mole. No a hoto kemo valitige a keu Galili ata.”
⁷⁴ Ige Bitau ke evisi Dilava ivi loui mai aiohavoi abuhu loui avoe, “Di malaha ke hilokaholinu.”
 Kateai lousege kokologuu hotoanu. ⁷⁵ Ige Bitau ke evisi Iesu hoto huhuanu. Iesuu subuta namihai avoe, “Kokologuu hotoholisege ana bae di vovoho abuita igaetanela.”
 Kateai ke huhuai halei tiale iekela nina tumutumuanu.

27

Abu Iesu mai Bailotie tilu.

(Maka 15.1; Luka 23.1-2; Dioni 18.28-32)

¹ Vavita vavita dubu nalimale kosive bahata isi Diue kosive keau igaetoai Iesu hamaveve humaha kemo abu isivie hoto loulu. ² Hoto louge uoholige abu Iesu umuvai mai tialeau Loma kosive Bailoti omilu.

Diudasiu hatiale deiada

(Abostolo 1.18-19)

³ Ige Iesuho haiale Diudasi keu ke elehai hilokage Iesuna hatai. Isi au vaveve toela ke huhuai halei monie luhu teti (30) ke malei tiale dubu nalimale kosive isi oe kosive kebia ovenu. ⁴ Isi namigevei avoe, “Di atae dua keho haiale kemo auna hatai. Iale keu vaveve toelaike di ke vanu.”
 Ige abu namihai avoe, “Halege keu a isivilike. Iale no bae a hoto ke evilivebene.”
⁵ Kateige Diudasiu moni ke malei dubue uvue hatui halei tiale au ebia mavitinu.

⁶ Ige dubu nalimale kosive keau moni ke iuhai loui avoe, “Moni kou tahoe moni. Iale moni koseale malei dubue uvue otovege kena nahie menaka egumai.”
⁷ Isi moni ke hotohoto vaito moni ke malei vata mole ibina valu. Subuta ataeau vata kemo deba malei avuemo sosibani vaevema. Iale vata keike abu ibinave vai isiviale avuemo vata ke ata holioholiale keau haluvige abu malevei avuemo abavuevege. ⁸ Abu vaveve kateale vale kemoike novae ataeau vata ke ivihai avoe, “Tahoe Matama.”

⁹⁻¹⁰ Vaveve kateale keu beloveta mole Dielimaiau louale hoto ke mai selevetinu. Dielimaiau subuta loui avoe, “Iselala ataeau ata ke ibina louale monie luhu teti (30) ke malei vata mole abu kemo deba malei sosibani vaevemale ke ibina valu. Kosiveu kateale loui di namihanu.”

Bailotiu Iesu belahanu.

(Maka 15.2-5; Luka 23.3-5; Dioni 18.33-38)

¹¹ Iesuu Loma kosive ke vudimo laminu. Ige au belahai avoe, “Diue kosive anike ko.”
 Ige Iesuu namihai avoe, “Avuike a ke lounu.”
¹² Kateai lougeto dubu nalimale kosive isi oe kosive keau kosive ke vudimo kotalahai Iesu vaveve ke louge au hotoeabe ibina louholinu.
¹³ Ige Bailotiu namihai avoe, “Ana abu a aiohavoi aho hoto loumale ke evinu.”
¹⁴ Isito Iesuu isiviholinu hotoeabe ibina louliho. Kateige Loma gamani kosiveu ke elehai vikoanu.

Abu Iesu mai hamaho tilu.

(Maka 15.6-15; Luka 23.13-25; Dioni 18.39-19.16)

¹⁵ Vagana bahata Basova vani kemo ataeabuna Loma gamani kosive namihage kena dibulae ata mole iomage au tigei. ¹⁶ Iale vani kemo malaha mole ivite keu dibulae ua. Iviveike Balabasi. ¹⁷ Iale ata moagaeau igaetoai lohoge gamani kosiveu au subuta vale ke nahate vai kebia namigevei avoe, “La isiviale di ata olete iomage au tai. Dana Balabasi iomai. Emena dana la tedaevemale ata Iesu Keliso ke iomai.”
¹⁸ Kateai louale keu koseanu. Au hilokage keau mainave mai ilike vaime mai omilu.

¹⁹ Bailotiu kotamale keve ugulamoi usege mahinaveu avuho hoto mole hanavoi avoe, “Di nivu vavimo tababu mole vai Iesu elehai vabuanu. Di hilokage keu vavevebe toela vaholinu. Iale ainaho inutolotolote ata kemo vavevebe toela valive.”

²⁰ Kateisege dubu nalimale kosive isi oe kosive keau negolahai ata moaga kebia hanavei avoe, “Bailoti namihage au Iesu hamaito Balabasi halei.”
²¹ Kateige Bailotiu tota belagevei avoe, “La isiviale di ata abui kobiamo olete iomage au tai.”
 Ige abu namihai avoe, “Balabasi iomanela.”
²² Ige Bailotiu namigevei avoe, “Isito dana la tedaevemale ata Iesu Keliso kemo onole vai.”
 Ige abu bahata Bailoti namihai avoe, “Mai idie domo hamanela.”

²³ Kateai louge Bailotiu belagevei avoe, “Osialemo. Au onole toela vanu.” Ige abu baita tota loui avoe, “Mai idie domo hamanela.” ²⁴ Isi katelahasege Bailotiu ke elehai hilokage kotalive keu anekianu. Ige au huhuai avoe, “Koeabuna koselahalata mole havei.” Kateaime e hai atae vudimo au ada totoanu. Isiviale keau hilokage Iesuho huhuihuhuiibe toelau avuemo uoholinu. Kateaito namigevei avoe, “Inutolotolote ata kou hatige tahoveu bae daemo ulivebene. Isito auna laemo ui.” ²⁵ Ige ata bahata keau hotove ibina vai avoe, “Halege au hatige tahove kena noemo ui no esetamo ui.” ²⁶ Katelahai louge Bailotiu hotoeabe evisi Balabasi iomage au tinu. Isito Iesu mai tuvalie ata ovege abu visuhavoi mai hamaho tilu.

Tuvalie ataeau Iesu hehavalu.

(Maka 15.16-20; Dioni 19.2-3)

²⁷ Kateai melavei gamanie o baluga ke uvue tiale tuvalie ata degomole hohavege abu loholu. ²⁸ Lohoale keau ogove bahata tohoai ogo tahote vatae kosiveau hatumale ke mai avuemo hatulu. ²⁹ Isi kinaveho hote mole bekabekate mai viliai kinave hanubelu. Isi kosive bedoia ke nahate mai adave inuteve mavolu. Isi lobohavoi abu kosiveho vamale ke nahate vai vudivemo kome bokoai vata bisi loui avoe, “Diue kosive baluga, ana duave.” ³⁰ Katelahaito avuemo violahai bedoia ke mai kinavemo hamalu. ³¹ Katelahai hehavalata tota avuemo ogo tahote ke elokohai ogove seleve mai avuemo holovalu. Isi melavei idie domo hamaliho tilu.

Abu Iesu mai idie domo hamalu.

(Maka 15.21-32; Luka 23.26-43; Dioni 19.17-27)

³² Tialeau humaha tavae Sailini malaha mole ivi Saimoni keluvuta belehovoi namihai avoe, “Ata ko tedahoi avuemo idive ehamonela.” ³³ Katelahaito tilialeau matama mole ivi Gologota keve velehovolu. Matama ke ihuu koseanu. Lolokue matama. ³⁴ Iale abu keve velehovoi e mole toela mai uainita ebuehale ke mai omisi isiviale au ke ige vateve tumuu uoholisi. Isito Iesuu ke ige keu tumuige au ke ovonu.

³⁵ Ke ovoge abu mai idie domo hamai ogove malei kasilahai ogove igaegae malelu. ³⁶ Kasilahage uoholige abu uguivaoi ui Iesu nibima. ³⁷ Kemo ulata sebele mole vaki mai avuemo abu ono vademoike hamale ke hisaliai avoe, “Malaha kou Diue atae kosive baluga, Iesu.” Kateaito mai kinave tatamo hamalu. ³⁸ Isi kateai vavoolo ata abui malevei idie domo havelu. Moleu Iesu ada inuteatave. Isege moleu adave agiteatave.

³⁹ Isege ataeau matama kela tai lohoi ke elehai hehavo tuvikiivilahama. ⁴⁰ Isi Iesuho loui avoe, “A konike loui kosea, ‘Dana dubu baluga koiai tota vani abuita igaeta kemo hou gabiai.’ Iale a Dilava mo holiniege idie do kemo dobai loho.” ⁴¹ Ige dubu nalimale kosive, Diue menaka loui haivemale isi oe kosive keau bahata hoto kateale loui hehavo. ⁴² Isi moleho loui avoe, “Keu ata degomole tedeavei hoesegeveito au ebika tedahoholinu. Keu loui avoe, ‘Dau Diue atae kosive baluga.’ Iale auna dobai lohoge no bae no uvu mai avuemo mavoi. ⁴³ Keu au uvu mai Dilavamo mamoi loui avoe, ‘Dau Dilava mo.’ Keta duave. Iale nahi elehage Dilavau isiviai tedahoge auna dobai lohoi.” ⁴⁴ Ige abu atae toela abuita malei Iesuluvuta hamale kebiai hotoe toela kateale loui namihalu.

Iesuu hatiale deiada

(Maka 15.33-41; Luka 23.44-49; Dioni 19.28-30)

⁴⁵ Vanie lilimo vata bahatamo vau loa gidualeu tili okoloki masege vaniu tota halunu. ⁴⁶ Vanie ni ke masege Iesuu au hotomo baita kekoai loui avoe, “Ilai, Ilai lama sabakatani.” Ke ihuu koseanu. “Di Dilava, di Dilava osialemoike a di tedahoholisi di halenu.” ⁴⁷ Ige ata degomoleau lavisi uale keau hoto ke evisi loui avoe, “Keu mesoho beloveta mole llaidia keike au hohavonu.” ⁴⁸ Katelahasege solekavesite ata moleu bibuai tiale e mole toela mai ono mole ogomu ke nahatemo ehosivai idi mai ke bisi isiviale ebagemage Iesuu e ke isi. ⁴⁹ Ige ata degomoleau avuhu loui avoe, “Usege nahi elehai. Mesoho llaidiana dobai lohoniege ke tedahoi.” ⁵⁰ Katelahasege Iesuu tota baita kekoaito hatinu.

⁵¹ Hatige Diue dubu balugamo abu ogo mole mai oe uvu tumute ke bamuale keu ehula dikolahai tiale heila velemai abuita holinu. Ige vatau kibikibiage muneau vigota vilahai vakolahalu. ⁵² Ige alue vuta keau daihovoge Dilava ata moaga subuta haluviale keau hovelevelu. ⁵³ Hovedevei abu vuta ke halevelu. Iniale Iesuu hovelahage keau bae Dielusalemae tilu. Ige ata moagaeau kebia elegevelu.

⁵⁴ Isito tuvali kosive isi tuvali esemu keau Iesu nibisi ulage hamuhatuge vaveve degomole keau velehovoge abu ke elegevei tetelahai vabulalahalu. Isi loui avoe, “Seleveta keu Dilava mo.” ⁵⁵ Isege keate moaga subuta Galili halevai Iesuluvuta olahai tedahomale keau haeavala lavisi vaveve ke bahata elehama. ⁵⁶ Keate kebia vigomo Meli Magidaleni

isi Diemisime Diosebame neina Meli isime Sebedi mo abui kebia neina keau keve lavisi ui vaveve ke elehama.

Abu Iesu mai guliale

(Maka 15.42-47; Luka 23.50-56; Dioni 19.38-42)

⁵⁷ Alimatia malaha mole kunaite keu vaveve ke elehalage gutuanu. Malaha ke ivilike Dioseba. Keu Iesu esemu mole. ⁵⁸ Iale keu tiale Iesu ava mai abavulihio Bailoti belahanu. Ige keu au esemu namigevege abu idie domo Iesu ava iavoi mai Dioseba omilu. ⁵⁹ Ige Diosebau avave ke mai tiale ogoe dogo mai vilianu. ⁶⁰ Isi mai tiale au ebikaho munemo guli lovoale kemo mamonu. Isi mune baluga evovoai mai lohohi ilive bamuito halei tinu. ⁶¹ Isege Meli Magidalenisi Meli mole keau vutave ke ulidamo uguiaivoi ui ke elehama.

Tuvalie ataeau Iesu vuta nibima.

⁶² Abu kateisege Basova lovi vale vaniu uoholinu. Iniale bulae vavita dubu nalimale kosivea isi Balisia ata keau igaetoai Bailoti oe lohohu. ⁶³ Keve lohoale namihai avoe, “Kosive, no hilokage loboe ata keu subuta hatioholisito nita ui loui avoe, ‘Dana hatiniege vanie ni abuita igaeta uoholige dana tota hovelahai.’” ⁶⁴ Iale a esemu namigevege abu talive novata isi nivuta vutave ke nibie dua vai. Katealemo Iesu esemu keau bae talive avave ke vavololahalivebene. Mesoho keabuna vavololahaliege abuna ata lobogevei loui kosea, ‘Iesuu hovelahanu.’ Abuna katelahai lobolahage loboeabe kena subuta Iesuu loboale ke evihai.” ⁶⁵ Katelahai namihage Bailotiu au tuvalie ata degomole malei ovei namigevei avoe, “Kobia malevei talive abuhi nenilahai Iesu vuta ke nibie dua vave.” ⁶⁶ Ige abu tialeau Iesu vuta ke bamui gamanie silu mai mavoi louge tuvalie ata keau kemo nilahai uma.

28

Iesuu Sande vavita hovelahanu.

(Maka 16.1-10; Luka 24.1-12; Dioni 20.1-10)

¹ Bulau uoholige Sande vavita vae hodohodota Meli Magidalenisi Meli mole keau Iesu vuta elehaho tilu. ² Isi tialeau keve vелеhovosege solekavesite hamu balugatahou hatunu. Ige Kosive anelu moleu otogomo dohai lohoale mune ke evovoai mai mamoi ke golomo ugulamoi ua. ³ Ige vavave keu vau nivolekale ke nahate vai levolevoai ua. Ige ogoe keu tae seleveai ua. ⁴ Ige keve nilahai umale tuvalie ata keau ke elehai tetelahai haluviale ke nahate vatamo dobuluvilu.

⁵ Vatamo dobuluvice anelu keu keate nehe abui kebia namigevei avoe, “Lainaho vabulahalive. Di hilokage abu Iesu mai idie domo hamale keike la kaovama. ⁶ Iale keu komo uoholinu. Au subuta louale ke nahate hovelahanu. Loholive au lahale lovo elehave.” ⁷ Ige abu tiale lovoe elehage au namigevei avoe, “Solekai talive di laheho louale ko loui esemuve kebia namigevei kosea, ‘Iesuu hovelahai Galili vata tinu. Iale talive bae keve elehave.’” ⁸ Kateige abu vabulahaito vahaehota solekai vutave ke halevai esemuiabe namigeveho tilu.

⁹ Namigeveho tisege Iesuu solekavesite abuemolemanu. Isi abuhu loui avoe, “Lana duave.” Ige abu vudivemo kome bokoai vata bisi velovela holisi hoesehavolu. ¹⁰ Ige Iesuu namigevei avoe, “Vabu halevaito talive di haokuvu namigevege abu Galilie talive keve bae di elehai.”

Iesuu hovelahage abu lobo loulu.

¹¹ Iesuu kateai louge keate keau tisege tuvalie ataeau Iesu vuta nibiale ke degomoleau Dielusalemae hoidevei tiale vaveve bahata abu elehale ke loui dubu nalimale kosive namigevelu. ¹² Ige dubue kosive keau oe kosive kebia bevuevei abu onole vaveve ke hotohoto valu. Isi katelahai moni baluga malei tuvalie ata kebia ovelu. ¹³ Isi namigevei avoe, “Lainaho vaveve ke loulive. Isito lobolahai loui kosea, ‘No vavimo ladevesege Iesu esemuihu lohoale Iesu vava mai tilu.’” ¹⁴ Isi mesoho Loma gamani kosive ke evisi kemo hoto louge noeabuna la vale ke vovohoi. Iale lainaho onobe huhulahalive.” ¹⁵ Katelahai namigevege tuvali esemu nehe keau moni ke malei abu abuhu onole louale ke valu. Kateige hoto keu Diue vata bahata sonumai tinu. Iale novae vani komo Diue ataeau hoto ke louma.

Iesuu au esemuemo velemanu.

(Maka 16.14-18; Luka 24.36-49; Dioni 20.19-23)

¹⁶ Iesu esemu ada abui isi igae (11) keau Dielusalema halevai Iesuu Galili tana mole louale keve tilu. ¹⁷ Keve tiliale elehai hoesehavoi gulgulihavolu. Katelahaito degomoleau dolodolohalalu. ¹⁸ Dolodolohahage Iesuu abue lohohi namigevei avoe, “Dilavau otogota vatata vuvune ke bahata daonu. ¹⁹ Iale vata bahatae talive ata bahata haivege abu di

ehovage di Mamae ivi, di ivi, isi Munanae Tumue ivi ketamo babatisogeveve. ²⁰ Isi di la namigeveale ke bahata loui kebia haivege abu evisi vai. Isi ko huhulahave. Dana vani bahata lahehi ulage vatana gabiai.”

Maka

Ata babatisegevemale ata Dioni

(Matiu 3.1-12; Luka 3.1-18; Dioni 1.19-28)

¹ Kou deiada duaike ko. Dilava mo Iesu Keliso ke deiada. Deiada ke umukau koseanu.

² Subuta beloveta mole Aisaia keu deiadae umuka ke hisaia avoe,

“Dilavau au mo namihai loui avoe,

‘Dana di esemu mole hanavoge auna aho uli holisi tiniege ata namigevei kosea, Kosiveu lohoma.’

³ Malaha kena botoe lamisi ata hohavei loui kosea,

‘Kosive humaha ke inuta loive.

La uvu hoesegevei vaveve toela halevai vaveve dua vave.’ ”

⁴ Iniale gabie Dioni keu botoe tiale deiada ke loui ata haivei loui avoe, “La vaveve toela ke halevai hoidevei babatisehahave. Ige Dilavana bae la vaveve toela ke ulihage auna uoholisi.” ⁵ Kateai louge ata bahata Diudia vatae isi Dielusalema o keve umale keau Dioni hotoe deiada eviliho tilu. Kebiau hoto ke evisi abu vaveve toela louge Dioniu Diodani emo babatisegevenu.

⁶ Dioni keu ata nimole. Ogove keu ovo mole kamela ke vomo. Isege beletave keta ovo ke igae vate. Isege loviveike kainaku isi vidiae e. ⁷ Iale keu loui avoe, “Malaha molena di iae lohoniege di evihai ivi balugate holisi. Iale di baluga holioholialemo tamakave iamoveve keu daemo anekianu. ⁸ Di e unahamo la babatisegevema. Isito auna au Munanae Tumu hanavoi ke vuvunemo la hoesegevei.”

Dioniu Iesu babatisehavoale

(Matiu 3.13-4.11; Luka 3.21-22; 4.1-13)

⁹ Vani mole Iesuu Galili vatamo au o Nasaleta ke halei lohohoi Dioniu uale keve tinu. Ige Dioniu Diodani emo Iesu babatisehavonu. ¹⁰ Ige Iesuu emo hovelahai elehage otogou dikolahage Dilava Munana Tumuteu ugu imutava ke nahate holisi dobai lohoale avuemo ua. ¹¹ Isege hoto moleu otogomo loui avoe, “Au di uvue mo seleve. Di a vahaeho va baluganu.”

¹² Hoto keu gabiasese Dilava Munanae Tumuu Iesu iomage au ataeau uvesiteve tinu.

¹³ Tiale vanie ni voti ke uvumo keve usege Vatae Kosiveu lohoale lobohavonu. Keve botoe ovo aihanite keau ua. Isito Dilava aneluuiauhoholiale tedaholu.

Iesuu huena malemale ata voa (4) hohavenu.

(Matiu 4.12-22; Luka 4.14-15; 5.1-11)

¹⁴ Vani mole abu Dioni mai dibulaa mavosege Iesuu Galili vatae tiale Dilava deiadae dua loui ata haivema. ¹⁵ Isi loui avoe, “Ataeau Dilava adaa vuvunemo uveve vaniu vuguvuguanu. Ialelua la vaveve toela ke halevai hoidevei lohohoi deiadae dua ko evive.”

¹⁶ Kateai louito Galili esagala oai tinu. Tiale keu abui hohote Saimoni isi Andulu elegevesege keau huenaho ugabi hatuma. ¹⁷ Ige Iesuu namigevei loui avoe, “Daluvuta lohoge di la haivege la huena maleale ke nahate ata moaga dahomaleveve.” ¹⁸ Kateige abu solekavesite abu ugabi ke halevai avuluvuta tilu.

¹⁹ Tiale tota abui hohotebia Diemisita Dionita elegevesege abu bouti uvumo abu ugabi adahima. Ata abuita keau Sebedi esea. ²⁰ Ige au solekavesite kebia hohavege abu abu mamata esemuiabeta halevei Iesu ehovalu.

Malaha mole munana toelate

(Luka 4.31-37)

²¹ Keau bahata lohoale o mole Kabenumu keve velehovolu. Iniale bulamo Iesuu lohohoi Diue dubue tiale ata haivenu. ²² Ige abu hotove ke evisime vikolahalu. Kosealemo Diue menaka loui haivemale kebia hotou vuvuneholinu. Isito Iesuu hoto ke louale keu vuvune baluganu.

²³⁻²⁴ Iale Iesuu hoto ke loui ata haivesege dubu kemo tilogoe malaha moleu uale keu kekoai loui avoe, “Iesu, Nasaleta malaha, no halevei tenela. Ana no aiogevehonike kove lohonu. Di hilokage au Dilava Mo. A keu ata tumute.” ²⁵ Kateige Iesuu namihai avoe, “Hoto halei malaha ke halei tenela.” ²⁶ Kateai louge munanae toelau malaha ke aiohavoge keu teteteteai keko baluganu. Kateigeto munanae toelau ke halei tinu. ²⁷ Ige ata bahataeau ke elehai viko balugai mole namigevei loui avoe, “Vadeulike ke. Moka vaveve dogaike. Malaha kou au vuvunemo munanae toela kebiaho louge keau hotove evisi vama.” ²⁸ Kateige Iesu deiada keu solekavesite Galili vata bahata sonumanu.

Iesuu ata moaga hoesegevenu.

(*Matiu 8.14-17; Luka 4.38-41*)

²⁹ Iesuu kateaito dubu halei Diemisita Dionita holoevei abuhi tilu. Tialeau Saimonime Andulume oe velehovolu. ³⁰ Velehovosege abu Iesu namihai avoe, “Saimoni meau hobeage vavaveu vuvune balugage au avae golomo lahai uma.” ³¹ Ige Iesuu lohoale keate ke adala holisi ebagemage keate ke hobeu uoholige au hovelahai loviabe vanu.

³² Iniale gutumo vau dobai tisege abu vavahanitebia isi munanae toelaeau abuemo biloluvimale kebia bahata holoevei Iesue loholu. ³³ O ke ata bahataeau lohoale keau Iesu uale o ke udahamo mole bevuevei ua. ³⁴ Ige Iesuu ata moagaeau vavahani nimolete vamale kebia hoesegeveni munanae toelaeau ataemo biloluvimale kebia hoesegeveni munanae toela keau halevai tilu. Munanae toela keau hilokage Iesu keu Dilava mo. Katealemo Iesu abuhu loui isiviholialeike abu hotobe louliho.

Iesuu Galili vatae loviale deiada

(*Luka 4.42-44*)

³⁵ Vae alamo kokoluguu hotoisege Iesuu hovelahai o halei ataeau uvesite keve au Mama imihaho tinu. ³⁶ Iniale vau alamosege Saimoni Iesu esemu degomolehi Iesu kaovaliho tilu. ³⁷ Tiliiale Iesu elehai namihai avoe, “Ata bahataeau a kaovama.” ³⁸ Ige Iesuu namigevei avoe, “Nahi o ko halevai o degomoleve tai. Ige di tota keve ata degomole haivei. Kosealemo vaveve katealehoike di lohonu.” ³⁹ Kateai louito halei Galili vatamo o igaegaela tiale Diue dubula ata haivei munanae toela nunuvema.

Iesuu lebolasite hoesehavonu.

(*Matiu 8.1-4; Luka 5.12-16*)

⁴⁰ Kateimalela lebolasite malaha moleu avue lohoale kome bokoai vata bisi namihai avoe, “A isivianiege di hoesehavonela.” ⁴¹ Ige Iesuu avuhu uvu balugai avuela holisi namihai avoe, “Ito, dana a hoesehavoi.” ⁴² Kateai louge solekavesite malaha kemo lebolasiu uoholige vavaveu duaveanu. ⁴³⁻⁴⁴ Ige solekavesite Iesuu malaha ke iomai namihai avoe, “Evinela. Ainaho di a hoesehavoale ko atabeho loulive. Isito inuta talive a ebika mai dubu nalimale ke haivunela. Ige au a vava elehai a namihage Moseseu louale ke nahate ono mole mai mahoi Dilava hoesehavoage ataeabuna elehai hilokage a vavau duaveanu.” ⁴⁵ Isito malaha keu kateholisito tiale Iesu vaveve ke loui ata bahata namigevenu. Katealemoike Iesuu hoilalahai oe lohoveve keu avuemo anekiage boto unahae uma. Isito ataeau o bahatamo umale keau sohu avue lohoma.

2

Malaha mole kibikibiholiale

(*Matiu 9.1-8; Luka 5.17-26*)

¹ Vani moagaeau uoholisege Iesuu tota Kabenumu oe lohonu. Ige au oe lohoale ke hoto ata bahataeau evisi avue loholu. ² Avue lohoge oveu gigiage ata benahateau heie lavisi ua. Ige Iesuu hotoe dua loui ata kebia bahata haivema. ³ Kebia haivesege ata abuita abuita keau malaha mole vavaveu kibiholiale ke mai isiviale Iesue lohoi. ⁴ Lohoale keau isiviale oe uvue tai. Isito ataeau moagage ke mai tiveve keu anekianu. Ige abu mai oe lagadae tiale Iesuu lamiale ke nenita o kobuhai vahavemo oe nehe au avae golomo uale ke mai manevege dobai lohoale Iesu veloe heimo ua. ⁵ Katelahage Iesuu evieviabe ke elehai malaha nehe ke namihai avoe, “Di mo, di a toela bahata ulihage uoholinu.” ⁶⁻⁷ Kateai louge Diue menaka loui haivemale kebiata hoto ke evisi huhulahai avoe, “Osiohoike kou Dilava ivi mai aiovotima. Atabeu bae toelabe ulihalivebene. Isito Dilava igaena vaveve toela ulihagei.” ⁸ Huhuihuhui kateale huhulahasege Iesuu solekavesite huhuihuhuiabe ke hilokai namigevei avoe, “Osiohoike la huhuihuhui toela kateale huhulahama. ⁹ Dana vavahanite namihai loui kosea, ‘Di a vaveve toela ulihanu.’ Emena dana namihai loui kosea, ‘Hovelahai a ava mai lamisi tenela.’ Dana hoto olete loui. La huhuige hoto olete louvevu toloanu. ¹⁰ Isito halege dana vavahanite ke hoesehavoage lana ke elehai hilokage vaveve toela ulihaveve vuvune keta daemo ua.” ¹¹ Kateai louito vavahanite ke namihai avoe, “Hovelahai a ava egumai mai a oe tenela.” ¹² Ige ata keau elehasege malaha keu solekavesite hovelahai au ava egumai mai au oe tinu. Ige ata keau ke elehai viko balugai Dilava hoesehavoi loui avoe, “No subuta vaveve koseale elehaholilu.”

Iesuu Livai hohavonu.

(*Matiu 9.9-13; Luka 5.27-32*)

¹³ Iesuu kateaito tota hoilalahai Galili esagae tinu. Ige ata bahataeau laluvai avue tige au kebia haivenu. ¹⁴ Kebia haivege uoholige au lohoniale Aloveasi mo Livai elehanu.

Malaha keu ataemo takesi malemale ata. Iale takesilahamale oe uvue ugulamoi usege Iesuu namihai loui avoe, “Di ehomai loho.” Ige au hovelahai ehomanu.

¹⁵ Iniale vani mole Iesuu Livai oe lovi iliho tinu. Ige takesi moni malemale ata kebiau atae toela degomolehi abu vaveve halevai Iesu ehovale keau tiliale Iesuta esemuiabeluvutahi igaetolahai lovi ima. ¹⁶ Isege Diue menaka loui haivemala keau Iesu elehai tiale esemuiabe namigevei loui avoe, “Osiohoike keu atae toela kebiahi igaetoai lovi ima.” ¹⁷ Kateai louge Iesuu ke evisi abuhou loui avoe, “Medikolou bae negote kebiaho loholivebene. Isito auna vavahanite kebia unaha hoesegevelihou lohoi. Ke nahate dau lohoale kou atae duaho di lohoholinu. Isito dau lohoale kou vaveve toela vamale kebia hohavehoike di lohonu.”

Dilava hoesehavohou lovi ioholiveve.
(*Matiu 9.14-17; Luka 5.33-39*)

¹⁸ Vani mole ata babatisogevevemale Dioni ke esemuiou Balisia esemuhi Dilava hoesehavohou lovi ioholihou. Isege ata degomoleau ke elehai lohohou Iesu namihai avoe, “Osialemoike keau lovi ioholihou uma. Isito a esemuiou kateholihou lovi ima.” ¹⁹ Ige Iesuu namigevei avoe, “Mo molena au keate melamege haokuvuiabe abuna lovi isi emena abuna halevai. Ba, abuna lovi isi vahaeholahai. ²⁰ Isito vani mole atae toelae abuna lohohou mo ke hamage haokuvuiabe abuna bae vani kela uvulahai lovi i halevai.

²¹ Atabeu bae ogoe dogahou bohisi mai ogoe mami mai mamoi badivulivebene. Auna kateige ogoe dogahou kena ogoe mami ke butuhage auna dikolahai vahai. ²² Ige ke nahate atabeu bae uainie dogahou mai ogoe vate badivuale mamivome ehosivalivebene. Auna kateige kena savai dikolahai. Ige uainie dogahou kena hosilahai lotihatui. Isito atabena uainie dogahou mai ogoe vatee dogamou ehosivage keu bae dikolahalivebene. Iale ke nahate di vavevau bae vatae vaveve kebiahi igaetoalivebene.”

Iesu esemuiou bulamou kone dakohou ilu.
(*Matiu 12.1-8; Luka 6.1-5*)

²³ Vani mole bulamou Iesuu au esemuhi konee bululou olahai tisege esemuiabeau kone dakohou ilu. ²⁴ Dakohou ige Balisia malahaeau Iesu namihai avoe, “Eleha. Osiohoike keau menaka eguvai bulamou katelahai.” ²⁵ Ige Iesuu namigevei avoe, “Lana Bukae Hotomou Deividihou au esemuhi vaelahame vale ke dodaveholihou. ²⁶ Subuta Abaiatou dubu nalimale kosive baluga holimale ke vanila Deividihou dubue uvue tiale beleidi tumute ke mai inu. Dubu nalimale unahaeabuna beleidi ke igei. Isito vani kela Deividihou menaka ke egumai beleidi ke isi au esemou ovege kebiata ilu.” ²⁷ Iesuu kateai louitou tota namigevei avoe, “Dilavau bula vai isivialeike ataeau kemou lu malei ui. Dilavau bulahou ata vaholinu. Isito keu bula atahou vanu. ²⁸ Atae Ese keu bulae Kosive. Iale auna onole louge abuna ke vai.”

3

Malaha mole ada golote
(*Matiu 12.9-14; Luka 6.6-11*)

¹ Iesuu kateai louniale vani mole tota Diue dubue tiale malaha mole ada golote elehanu. ² Ige Diue kosiveau Iesu nibitumutumuama. Ilive mesohou elehage au bulamou malaha ke hoesehavoge abu mai vaveveve kemou kotalahai. ³ Ige Iesuu malaha nehe ada toelate ke namihai avoe, “Hovelahai lohohou.” ⁴ Kateaitou ata namigevei avoe, “Nahie menaka keu nahie haivege nahiabuna bulamou osioi. Nahiabuna bulamou vaveve dua vai. Emena vaveve toela vai. Nahiabuna vali ata hoesegevei. Emena aiogevei. Kateai louge abu hotove ibina lohohou.” ⁵ Kateige Iesuu kebia elegevei abuhou itumuanu. Kosealemou keau menaka unaha ehovaitou ata hoesegeveve ke huhuoholihou. Isime malaha ke namihai avoe, “A ada hatunela.” Ige au hotove evisi au ada hatuge duaveanu. ⁶ Ige Balisia malahaeau ke elehame dubu halevai solekai tiliale gamani kosive Elodihou ke ata benahate namigevei isiviale abuhou Iesu hamaveve humaha kaovai.

Galili milimou ata moaga

⁷ Iesuu au esemou benahatehi halevai Galili esagae tiliale keve velehovosege Galili ata moagaeau ehovai lohohou. ⁸ Isege ata degomoleau Iesu vaveve bahata evisi lohohou. Keau Diuidia vata isi Idumea vata halevai lohohou. Isege degomoleau Diodani e vaki mole keve lohohou. Isege degomoleau Dielusalema, Taea, isi Saidoni o baluga kebiaho lohohou. ⁹⁻¹⁰ Ata moagamoaga keu keve lohoge Iesuu vavahanite moaga hoesegevenu. Katealemou ke vavahanite bahatae au Iesu levelihou mole kabitigevema. Kateige Iesuu au esemou namigevei avoe, “Ataeau gigialelua dahou vanagi mai emou mavoge di ke golomou lamisi ata haivei.” ¹¹ Ata haivesege munanae toelaeau atae uvumou holoeavomale keau

Iesu elehai dobuluvisi kekolahai loui avoe, “Au Dilava mo aike ke.” ¹² Ige Iesuu namigevei avoe, “Hoto ke halevave. Di isiviholinu ataeau hoto ke eviliho.”

Iesu esemu tuelo (12)

(Matiu 10.1-4; Luka 6.12-16)

¹³ Iesu kateaniale uoholige lohohi tana molela veatiasi tiale keu lamisi au ata hohavege abu avue lohohi. ¹⁴ Lohoge au bae ata kebiama au isivie esemu tuelo (12) tabagevege abu abostolove lolilu. Ige au namigevei avoe, “Di la tabagevei isiviale daluvuta uge dana la hanavege di hoto loui ata haiveve. ¹⁵ Ige dana di vuvune malei laovege kemo munanae toela nunuvegeve.” ¹⁶⁻¹⁹ Ata nehebia au malevege esemuve holiialeike kobia: Saimoni, ivive moleike Bita. Ige Sebedi mo abui Diemisi isi Dioni. Iesuu iviabe doge otovealeike ko, Boanele. Hoto ke ihulike hata. Kosealemo hotoeabe keu hata vutoale ke nahate. Ige Andulu. Ige Bilibi. Ige Batolomi. Ige Matiu. Ige Tomasi. Ige Diemisi mole, Aloveasi mo. Ige Tadeasi. Ige Keinanie ata mole Saimoni. Ige Iesuho haiaveve malaha mole Diudasi Kaliota. Ata katealebia Iesuu tabagevenu.

Dilava vuvune emena Setene vuvune

(Matiu 12.22-32; Luka 11.14-23; 12.10)

²⁰ Iale keau halevai lovi ilihohi oe tilu. Isito ata moagaeau lohoge abu lovi iveve keu anekianu. ²¹ Kateige ataeau loui avoe, “Iesu keu tilogoanu.” Ige deholuvuiabeau ke evisi loui avoe, “Mesoho seleve.” Isi kateaime isivilahale biaeau Iesu mai nalisi.

²² Kateisege Diue menaka loui haivemale degomoleau Dielusalemamo lohoale keau loui avoe, “Setene vuvunue avuemo ua. Munanae toelae kovise Biesabolo keike au vuvune omige au vuvunevemu munanae toela kebia nunuvema.” ²³ Kateai louge Iesuu hohavege abu avue lohoge au dovudovue hotomo namigevei avoe, “La loui kosea, ‘Keu Setene vuvunemoike au vaveve kateale vama.’ La louale keu seleve holige Setenena oleve kateai au ata nunuvei. Keu anekianu. ²⁴ Mesoho vata molemo ataeau mole tasalievei molehi mole haveliege abu bae ui egealivebene. ²⁵ Ige mesoho valada igaeau mole tasalievei molehi mole haveliege keau bae ui egealivebene. ²⁶ Iale ke nahate Setene ataeabuna hovevevei mole havei tiliege abu bae ui egealivebene.

²⁷ “Atabeu bae ata mole negote ke oe uvue tai kunaive kebia vavoloalivebene. Isito auna vasohuta malaha ke umuvaito bae ove kemo kunaive malei.

²⁸ “Seleveta di la namigevege evive. Dilavau atae vaveve toela bahata ulihaveve hiloka. Isi ataeau ivive loui mai aiohavoge auna vaveveabe toela ke ulihai. ²⁹ Isito oleni loui kosea, ‘Setene vuvunemoike au loviama.’ Isi kateai Munanave Tumu ke ivi mai aiohavoge Dilavau bae vaveveve toela ke ulihalivebene.” ³⁰ Ata degomoleau loui avoe, “Iesu keu munanae toelae vuvunemoike au vaveve kateale vama.” Kateike vage Iesuu abuhohi hoto ke lounu.

Iesu neina isi hohuvuiabe

(Matiu 12.46-50; Luka 8.19-21)

³¹ Kateisege Iesu neinau hohuvuiabehi lohoale keau heie lavisi uito avuhohi hoto hanavoi isiviale elehai. ³² Ige ata moagaeau Iesu evilikahavoale keau namihai avoe, “A neinau a hohuvuihi lohoale heie ui a elehahohi hoto hanavolu.” ³³ Ige Iesuu namigevei avoe, “Di neinaike ole. Ige di hohuvuiabulike olemea.” ³⁴ Kateaito uguiaivoi lotiale kebia namigevei avoe, “Di neina isi di hohuvuiabulike la kebia. ³⁵ Iale oleuoleu Dilava isivi vamaale keau di hohuvuihi, di amakinuvuihi, di neinuvuihi.”

4

Obie imo dovudovue hotou lounu.

(Matiu 13.1-9; Luka 8.4-8)

¹ Vani mole Iesuu tota halei Galili esagae ata haiveho tinu. Keve tige ata moagaeau avuluvuta tiale mai evilikahavoage au vanagi mai e golomo meamoi avuemo ugulamosege ata keau milie usege au haivenu. ² Isi dovudovue hoto moagamo kebia haivei avoe, ³ “Evive. Malaha moleu obie i malei au bulue sesiaho tinu. ⁴ Tiale ke sesiasenge degomoleau humahamo keiolahage uguiaivoi lohoale ke isi gabilahalu. ⁵ Isege benahateau munemunemo vatau uoholiale kemo keiolahai neniai ulioholige alumuiabeau heie dohai tihohililu. ⁶ Alumuiabeau vatamo tihohialemo vaniu velemai tumuai kebia havege tutukalu. ⁷ Isege benahateau adu bekate ke uvue keiohovoge adu bekateau ulisi bamuevege hahuavoholilu. ⁸ Isege degomoleau vatae duamo keiohovole keau ulisi bailahalu. Ige benahateau bailahale moagataho. Isege benahateau bailahale moaga. Isege benahateau bailahale moaga vesitehame.” ⁹ Iesuu deiada kateale louito namigevei avoe, “Oleuoleu hoto evimaleau hoto ko evive.”

Osihoike Iesuu dovudovue hotomo louma.

(Matiu 13.10-17; Luka 8.9-10)

¹⁰ Iniale gabie Iesuu au ehuvela usege esemuve tuelo (12) keau esemuve degomolehi avue lohoale belahai avoe, “Osialemoike a vani bahata dovudovue hotomo no haivema.”
¹¹ Ige Iesuu namigevei avoe, “Di loumale kemo di isiviale Dilavau au matamae dogae vamale ke hilokave. Isito ata benahateau evieviholimale kebiaho di dovudovue hoto louge abu bae evisi lulelelahalibevene. ¹² Kosealemo keau di vaveve niavoito neniai kemo luleleholilu. Isi vani bahata di hoto evisito ke hilokaholilu. Isito mesoho keau neniai luleleai hilokavatege Dilavau vaveveabe toela ulihanu.”

Iesuu obie ie ihu lounu.

(Matiu 13.18-23; Luka 8.11-15)

¹³ Iesuu tota au esemu namigevei avoe, “Lana dovudovue hoto ke humaha hilokaholiliege bae oleve kateai dovudovue hoto degomole hilokai. ¹⁴ Iale di dovudovue hoto ke ekovehage evive. Sesiamale ata keu Dilava hotoike au ke loui ata haivema. ¹⁵ I benahateau humahamo keiolahale keau ata degomole nahate. Ata keabuna hotoe dua ke evisege Setenena lohoniege uvuiabemo hotoe dua ke aiohavogei. ¹⁶ Isege i benahateau munemunemo keiolahale keau ata degomoleau Dilava hoto evisi solekai vahaehomo male ke nahate. ¹⁷ Abu hoto ke evisi maito hoto keu uvuiabemo holomaholige abu negoholilu. Iniege gabie abu hotoe dua eviale kemo ataeabuna abuemo vaveve toela vai aiogevege abuna vatehani malei solekavesite hoidevei. ¹⁸⁻¹⁹ Isege i benahateau adu bekate uvue keiolahale keau ata degomole nahate. Ata keau hotoe dua ke evisito vani mole abu vatae vaveve huhulahai kunaita huhulahage vaveve katealeu hotoe dua bamuge evieviabeu negoholinu. ²⁰ Isege i benahateau vatae duamo keiohovoale keau ata degomoleau hotoe dua evisi ehovai vamale ke nahate. Ige hotoe dua kemo degomolebia evieviiu balugataho. Isege degomoleau baluga. Isege degomoleau baluga vesitehame.”

Lamebau atagaveve

(Luka 8.16-18)

²¹ Iesuu tota abuho loui avoe, “Nahiabuna vali lameba mahoi mai maua uvumo mavoi mesoho mai ladevemale betie valae mavoi. Ba, nahiabuna lameba hanei mai ehanumage ataeabuna atagavemo ui. ²² Di hoto louale ke ihuu koseanu. Ataeabuna abu vaveve vai mahogovage Dilavana bae vaveveabe ke mai umidamo mamoge ataeabuna ke elehai hilokai. Isi vani kela atae vaveve bahatana Dilava atagamo bae velehovoi umidamo ui. ²³ Iale la oleuoleu hoto evimaleu hoto ko evive.”

²⁴ Kateaito tota namigevei avoe, “Di laheho louale ke evisi vave. Lana ke evisi ehovaliege di hotomo lulele balugave. ²⁵ Olena di hotomo luleleage Dilavana lulele baluga omisi. Isito ata oleni au lulele unahamo hoto ke evisito keho isiviholige Dilavana avuemo luleleve ke mai evihai.”

Dilavau ata nibieveve deiada

²⁶ Iesuu tota loui avoe, “Ataeau Dilava adae vuvunemo uvue kena koseai. Ata moleu bulue tiale konee i hatuale ke nahate. ²⁷ Keu hatuito tisege vavimo kone keau vakiai ulilu. Malaha keu koneu oleve kateai vakiale ke vaveve hilokaholinu. ²⁸⁻²⁹ Isito vatae onobenobe duamoike kone keau vakiai ulilu. Keau ulisi humulahai bailahage nigiaibe keau gililahage malaha kena au siga mai tai kone kebia dakoevei.”

Masitae ie deiada

(Matiu 13.31-32, 34; Luka 13.18-19)

³⁰ Iesuu tota belagevei avoe, “Ataeau Dilava adae vuvunemo uvue kemo dana dovudovue hoto vade louge lana kemo lulelelahave. ³¹ Di louge evive. Ataeau Dilava adae vuvunemo uvue keu masitae i ke nahate. Masita keu ie esehame seleve. ³² Isito ataeabuna ke sesiage auna ulisi balugage uguaiabuna loholiege idi ke adamo hasolahai. Iale ataeau Dilava adae vuvunemo ui moagatahoai ue dua vaveve keu kateanu.”

³³ Iesu dovudovue hoto kateale loui haivege abu kemo lulelelahage au tota degomole loui haivenu. ³⁴ Auna dovudovue hoto unahamo ata kebia haivegei. Isito auna au esemuhi abuhuvela uniege dovudovue hotoe ihu bahata loui haivegei.

Hanunuu Iesu hoto evinu.

(Matiu 8.23-27; Luka 8.22-25)

³⁵ Kateimale gutumo Iesuu au esemuho loui avoe, “Lohoge nahi tabu ko houhi vaki moleve tai.” ³⁶ Kateige esemuabeau ata ioveito bouti nehe Iesuu avuemo lamisi ata haivemale ke mai bouti degomole halevei tilu. ³⁷ Tilialeau vaki mole velehovoholisege humaha tavae hanunu balugau utuige eu boutiabe uvumo lavuge boutiabeu uhutege

mutuanu. ³⁸ Kateige esemuiabeau ke elehai tiliale Iesuu subuta bilamo lahale ke etuvai loui avoe, “No haivemale ata, hovelahanela. Ana no e vahamo timale konike elehaholisime lahama.” ³⁹ Ige Iesuu hovelahai hanunuta eta hotogevei loui avoe, “Halevai tobekave.” Kateige keau hotove evige hanunu keu uoholige eu tota tolemanu. ⁴⁰ Ige Iesuu au esemu namigevei avoe, “Osiohoike la vabulahalau. Lana la uvu mai daemo mavoholilu.” ⁴¹ Isito esemuiabe keu vabulalahelua hotove ibina vaholisito moleho loui avoe, “Malaha oletealeike ko. Kou hanunuta eta hotogevege abu hotove evisi isivive valu.”

5

Malaha mole munana toelate

(Matiu 8.28-34; Luka 8.26-39)

¹ Kateaito lohohiale keau Gallii tabu hou i vaki mole Gelasene vata keve loholu. ² Ige Iesuu boutimo dobai tisege tilogoe malaha moleu alue vutae umale keu avue lohonu. ³⁻⁴ Munanae toelau avuemo uale kemo ataeau evudei seimita umuvai isiviale mai omo kouai. Isito kena vani moaga seimi ke bukiai hatui lohohi alue vutae tigei. Kateige ataeau evudei umuvaveve keu anekianu. ⁵ Vani bahata auna alue vutae tai tanae oai kekoigei. Isime mune malei au vate ke heisi tahotigei.

⁶ Iale keu haeavamole Iesu elehai bibuai lohoale keu vudivemo kome bokoai vata binu. ⁷⁻⁸ Vata bige Iesuu tilogote kemo munanae toela ke namihai avoe, “Malaha ke halei tenela.” Kateai louge tilogote malaha keu loui avoe, “Iesu, otogoe umale Kosive ke mo, osiohoike a dae lohonu. Dilava ivimo di a imihama. Ainaho di aiovaholive.” ⁹ Ige Iesuu belahai avoe, “A ivilike ole.” Ige au loui avoe, “Di ivilike Moaga. Kosealemo noeau moaga.” ¹⁰ Isi kateai negoai Iesu namihai avoe, “Ainaho no nunuvege no haeavamole talive.”

¹¹⁻¹² Kateaito elehasege ovo degomoleau tanae lovi isi olahama. Ige munanae toela keau malaha kemo ualeau Iesu namihai avoe, “No hanavege no tai ovo kebia uvue deluhovoi.” ¹³ Kateige Iesuu munanae toela kebia nunuvege kebiau tiale ovo kebiamo deluhovolu. Ige ovo bahata tu taoseni (2,000) keau detuluvisi tialeau seika vuvegevei tabu balugamo biloluvisi e isi haluvilu.

¹⁴ Ige ovo nibievemale keau detuluvisi tialeau humaha tavae ata namigevei tialeau oe ata bahata namigevelu. Ige ata bahata kebiau lohohi tiale isiviale vaveve ke elehai. ¹⁵ Keau lohoaleau munanae toelaeeau malaha nehemo holoeavoale ke elehage keu ogoe dua vai tilogoholisito momoleai tobekai ugulamoi ua. Ige ata kebiau malaha ke elehai vabulahalau. ¹⁶ Ige ovoe biaeau malaha nehe ke deiadata ovo kebia deiadata loui ata bahata namigevelu. ¹⁷ Ige ata keau Iesu namihai isiviale au vataeabe ke halei tai.

¹⁸ Kateige Iesuu halei boutimo biloho vasege malaha nehe keu Iesu namihai isiviale avuti tai. ¹⁹ Kateige Iesuu keluai avuho loui avoe, “Talive Dilavau aho uvuai a hoesehavoale ke loui a oe ata bahata namigevenela.” ²⁰ Ige malaha keu halei tiale Dekabolisi matama keve Iesuu avuemo vale ke loui ata bahata namigevenu. Ige keau ke evisi vikolahalu.

Dialosi ma isi Iesu ogola holiale keate mole

(Matiu 9.18-26; Luka 8.40-56)

²¹ Iesuu boutimo tiale keu tabu ke vaki mole dabasege ata moagaeau avue lohoale evilikahavolu. ²² Ige Diue dubu nalimale kosive mole Dialosi keu lohoale Iesu elehai vudivemo kome bokoai vata binu. ²³ Isi namihai avoe, “Di mau vavahaniale hatima. Iale loholive a ada mai golovemo mamoge au hovelahai mauiiai.” ²⁴ Ige Iesuu malaha nehe keti mave elehalihio tige ata moagaeau ehovei abuluvuta tilu.

²⁵ Tisege keate moleu vavahanie toela male keu lohoale Iesu ogola holinu. Vavahanive keu koseanu. Vagana tuelo (12) ke uvumo tahoe toelau uvuvumo lohoma. ²⁶ Medikolo moagaeau ke elehai mulamula omisito keu keate ke hoesehavoholilu. Keu kebiamo moni baluga hatugeto vavahanive keu sohu avuemo ui balugai tima. ²⁷ Iale keate keu Iesu vaveve ke evisi ata moaga kebia uvumo lohoale Iesu iae ogovela holinu. ²⁸ Ogovela holisi huhuai avoe, “Dana Iesu ogo unahala holiniege momoleai.” ²⁹ Kateai Iesu ogola holige solekavesite tahoe toelau avuemo uoholinu. Ige keate ke biageu au uvumo huhuige vavahanive uoholinu. ³⁰ Ige solekavesite Iesu biageu hilokage ata hoesegevemale vuvune keu ata molemo tinu. Ige au hoilalahi niai loui avoe, “Oleike di ogola holinu.” ³¹ Ige esemuiabeau namihai avoe, “Ana ata moagaeau aluvuta lohoale konike a elehaholisilo loui kosea, ‘Oleu di ogola holinu.’” ³² Isito Iesuu negoai elegevei lotinu. Isiviale hilokai oleike ogovela holinu. ³³ Ige keate keu avuemo ono vadeu vale ke huhuai vabuai teteai avue lohoale vudivemo au kome bokoai vata bisi au deiada bahata loui Iesu namihanu. ³⁴ Ige Iesuu avuho loui avoe, “Di ma, a a uvu bahata mai daemo mamoiike vage vavahani keu aemo uoholinu. Iale vahaehomo tenela.”

³⁵ Iesuu keate keti kateisege ata degomoleau Diailosu oe uale keau lohoale Diailosu namihai avoe, “A mau aike hatiale ainaho kosive keho louge au loholive.” ³⁶ Kateai louge Iesuu hotoeabe ke evisito Diailosu namihai avoe, “Ainaho vabualive. Isito a uvu mai daemo mamonela.” ³⁷ Kateaito ata namigeveve avoe, “La bahataeau usegeto Bita Diemisi isime hohove Dioni kebia unahaeau daluvuta lohohi.” ³⁸ Kateai kebia unahahi tiale keau malaha nehe ke oe velehovoi evisige ata moageau o kemo ninalahai kekolahama. ³⁹ Ige Iesuu o ke vahae deluai tai namigeveve avoe, “Osiohoike la ninalahai kekolahama. Ma keu hatioholinu. Isito lahaike au ke vanu.” ⁴⁰ Ige abu ke evisi bituhavoi hehavolu. Ige Iesuu kebia bahata nunuvege abu heie tisege ma ke mamata neinaveta holoovei au esemuta holoovei ma keu lahai umale keve tilu. ⁴¹ Keve tiale ma ke adala holisi hotovemo namihai loui avoe, “Talita kumi.” Ke ihuu koseanu. Mabilia, hovelahanela. ⁴² Ige ma keu solekavesite hovelahai lamisi oanu. Ige au hatisi hovelahale ke abu elehai vikobe nimole valu. Ma ke vaganau tuelo (12). ⁴³ Ige Iesuu isuta namigeveve avoe, “Lainaho deiada ko loui ata namigeveve.” Kateaito tota namigeveve avoe, “Lovi mai omige au isi.”

6

Nasaleta ataeau Iesu kabebihavolu.
(Matuu 13.53-58; Luka 4.16-30)

¹ Iesuu kateaito o ke halei au o seleve keve tinu. Ige esemuiabe keau avuluvuta tilu. ² Iniale bulamo au Diue dubumo ata moaga haivema. Ige ata keau hotove kemo viko balugai moleho loui avoe, “Oleveike ata kou hoto ko louale lulele ko mai vikoe vaveve vuvune keta manu.” ³ Kateai moleho loui avoe, “Ata keu Meli moike. Keu o houmale ata unaha. Diemisi, Diosasi, Diudasi isime Saimoni hohuvuiabe abulike kebia. Iale amakinuvuiabe degomole abulike nahie vigomo ua.” Kateai loui Iesu kabebihavolu. ⁴ Ige Iesuu namigeveve avoe, “Beloveta ata kena vata moleve tige ataeabuna hotove evisi hoesehavoi. Isito au au o seleve keve tige atave keau bae hotove evisi hoesehavolivebene.” ⁵ Kateai loui vikoe vaveve moaga o kemo vaholisito vavahanite degomole kebiama au ada malei tataeabemo otovege keau momolelahalu. ⁶ Isito oeabe ata keau abu uvu mai avuemo mavoholige au kebia elegeveve vaveveabe kemo vikoanu. Kateai au o ke halei tiale o degomole kebia haivenu.

Iesuu au esemu tuelo hanavenu.
(Matuu 10.5-15; Luka 9.1-6)

⁷ Vani mole au au esemu tuelo (12) hohavege abu avue lohoge au munanae toela nunuveveve vuvune ovei abuibuihai hanavenu. ⁸ Hanavei abuhu loui avoe, “Lainaho busebuse, lovi, moni kateale malelive. Isito la tiliege la tedaevemale bedoia ke unaha matageveve.” ⁹ Isi la veloe voto isi ogo hatuale ke unahata teve. Isito lainaho beta malei tigelive. ¹⁰ La tiliege o oletemo ata oleu la maleveve o hatuevege ke omo ulata o ke halevai teve. ¹¹ Isi la tiliege o molemo velehovoge ata keau la hoto evioholisi la maleveve o hatueveholige anakaeabemo la veloe gogea ke sesieveve. Ige abuna ke elehai hilokage Dilavana bae kebia aiogeveve. Dilavau subuta Sodomata Gomolata aiogeveale ke nahate Dilavana bae gabie vatehani baluga kebia ovei.” ¹² Kateai loui kebia hanavege abu ata haiveho tilu. Haiveho tiale ata haivei loui avoe, “La vaveve toela halevai hoideveve.” ¹³ Kateaito munanae toela moaga ataemo nunuveve olive oele malei vavahanite kebia kinamo ehosivage keau momolelahalu.

Ata babatisogevemale Dioni keu hatiale deiada
(Matuu 14.1-12; Luka 9.7-9)

¹⁴ Gamanie kosive baluga Elodiu Iesu vaveve ke evinu. Kosealemo ataeau Iesu vaveve loui ata haivege Elodi keta ke evinu. Ata degomoleau loui avoe, “Mesoho ata babatisogevemale Dioni keu hatialeu tota hovelahaike vaimo vaveve nimolette kateale vama.” ¹⁵ Ige degomoleau loui avoe, “Ilaidalike.” Ige degomoleau loui avoe, “Subuta umale beloveta moleike.”

¹⁶ Kateige Elodiu loui avoe, “Ba, mesoho di Dioni nehe eno heisi etulege hatisi hovelahaleike ke.” ¹⁷⁻¹⁸ Elodiu hoto kateale louale keu koseanu. Dioniu Elodi namihai loui avoe, “A a hoho Bilibi ke mahina Elodiasi vavolota melameale keu toelanu.” Isi kateai loulage vani mole Elodiu louge abu mai dibulaa mavolu. ¹⁹ Dioniu kateai louge Elodiasi keu avuhu itumuai isiviale hamage au hatisi. Isito Elodiu hamaliho isiviholiale kemo hamaveve humahau uoholinu. ²⁰ Elodiu Dioni vabuhavoi hilokage keu malahae dua. Isime vaveveve toela vaholinu. Keu Dioni hoto keho isivaiato keate ke haleveve hoto ke evisi isiviholinu.

²¹ Iale vani mole Elodi uale vani keu lohoge au louge gamani kosive degomole, tuvalie kosive degomole, isi Galili vatae umale kosive degomole keau bahata Elodi oe lovi iliholu. Kemoike keate nehe keu bae Dioni hamaveve humaha ke davalianu. ²² Iniale lovi imale keve Elodiasi mau havuai Elodita kosive nehe kebiata malevei vahaehotievege Elodiu ke elehai ma ke namihai avoe, “A isivi louge dana a isivi ke vai.” ²³ Kateai Dilava ivimo menakai loui avoe, “Di vata di kunai keau baluga. Iale a onoleho isiviai di namihage dana a isivi ke vai.” ²⁴ Kateige ma keu lohohi tiale au neina namihai avoe, “Amia, dana ono vade igaeho kosive ke imihage au daoi.” Ige neinaveu loui avoe, “Namihage au ata babatisogevemale Dioni ke kina heisi etulei mai aoi.” ²⁵ Kateige ma keu solekai tota lohohi kosive ke namihai avoe, “Di isiviale aike ata babatisogevemale Dioni ke eno heisi etulei kinave mai melegimo mamoi mai daonela.” ²⁶ Ige kosive keu uvu balugai isiviholinu katealiho. Isito au lovi iho lohohale kebia nimo au ono vade ma keho valiho Dilava ivimo menakale kemo ke haleveve keu avuemo anekianu. ²⁷⁻²⁸ Katealemo kosive keu au tuvalie malaha mole hanavoi loui avoe, “Talive ata babatisogevemale Dioni ke eno heisi etulei kinave mai lohohonele.” Kateige au halei dibulae tiale enove heisi etulei kinave mai melegimo mamoi mai lohohale ma ke omige au mai au neina ominu. ²⁹ Ige Dioni esemuiiau hoto ke evisi lohohaleau vavave mai tiale abavulu.

Valava ada mole isi huena abuita

(Matiu 14.13-21; Luka 9.10-17; Dioni 6.1-14)

³⁰ Vani mole Iesuu au abostolo nehe abuibui ai hanaveale keau tota hoidevevi lohohale Iesuluvuta beleavoi abu ono vade vamale ke loui Iesuu namihama. ³¹ Kateisege ata moagaeanu Iesuu tai lohoma. Kateige Iesuu au esemuhi lovi iveve keu anekianu. Ige au au esemu namigevevi avoe, “Lohoge nahi nahi unaha tai ataeau ivesiteve sibelesai.” ³² Isi kateai abu boutimo biloluvisi ataeau ivesite matama keve sibelesa ho tulu.

³³ Sibelesa ho tige ata moaga keau ke elehai matama ke halevai solekai bibuluvisi heila tialeau Iesuu au esemuhi tiale matama keve velehovolu. ³⁴ Ige Iesuu boutimo dobai ata kebia elegevevi abuhu uvu baluganu. Kosealemo ata kebiau mamoe nahate. Ige nalievemale atau uoholinu. Kateige au hoto nimolete moaga loui haivenu. ³⁵⁻³⁶ Haivelage vau gutuige esemuiabeau lohohale avuho loui avoe, “Loviu ivesiteike ko. Vau loalelua ata kobia hanavege abu abu oe tai abu iveve kaovai.” ³⁷ Ige Iesuu namigevevi avoe, “La biaeanu lovi ovege abu isi.” Ige abu namihai avoe, “Noeabuna oleve kateai moni baluga malei ata moaga kobiaho lovi voivevi.” ³⁸ Ige Iesuu belagevevi avoe, “Bato tai elehava. Lana lovibe malei lohoholilu.” Ige abu tiale lovi kaovai tota lohohale Iesuu namihai avoe, “Valava ada mole isi huena abuita unahahame.”

³⁹⁻⁴⁰ Kateige Iesuu namigevevi avoe, “Ata kebia namigevege abu mole tasalievevi igaegeaei boboe golomo ugulelevai.” Kateai louge abu tiale ata kebiaho louge abu igaegeaei ugulelevai lotilu. ⁴¹ Ige Iesuu valavata huenata malei otogoe niai au Mama imihaito valavata huenata vakoanata malei au esemu ovege abu igaegeaei ata kebia ovei lotilu. ⁴² Ige ata bahata keau lovi ke ige uniabeau hanilahalu. ⁴³ Ige esemuiabeau valavata huenata sigu malei basiketi tuelomo (12) udage ililoholu. ⁴⁴ Ata keau lovi ke iale keau bahata vai taoseni (5,000).

Iesuu e tatala lamisi tinu.

(Matiu 14.22-33; Dioni 6.15-21)

⁴⁵ Iesuu lovi ovege uoholige au esemu namigevevi avoe, “Boutimo biloluvisi e hou i vaki mole Betesaida keve tisege di ata kobia hanavege abu tisegeto di bae lohohi.” ⁴⁶ Kateai louto lohohi ata kebia hanavege abu tisege au tanae au Mama imihaito tinu. ⁴⁷ Iniale vavimo Iesuu esemuiiau boutimo tiale keau e vigola tisege Iesuu eu kove tanae ua. ⁴⁸ Tana keve lamisi au esemu elegevesege hebulu balugau utuige keau solekai tihohililu. Iniale vae alamo Iesuu lohohi e golola lamisi abue tiale isiviai boutiabe ke evihai tai. ⁴⁹ Ige esemuiabeau Iesuu e golola lamisi lohohale ke elehai kekolahai loui avoe, “Aluu lohohu.” ⁵⁰ Isi kateai vabulahage Iesuu namigevevi avoe, “Vabu halevave. Iesuu dailike. Lainaho vabulahagelive.” ⁵¹⁻⁵² Kateai louto boutimo biloisege hebulu keu tolemanu. Ige esemuiabe keau ke elehai vikalalahalu. Kosealemo Iesuu valava ada mole kemo vuvune vaveve vale ke elehaito kemo luleleholilu.

Iesuu Genesaleti vatae lovianu.

(Matiu 14.34-36)

⁵³ Katelahaito e ke hou i vaki moleve lohohale Genesaleti velehovoi abu bouti mai esagae mavolu. ⁵⁴ Isi boutimo dobuluvisege solekavesite ata keau Iesuu elehai valitilu. ⁵⁵ Isi kateai bibuluvisi tiale o bahatae velehovoi Iesuu lohohale ke deiada loui ata bahata namigevege abu vavahanite malei avue lohohu. ⁵⁶ Ige Iesuu oleve keve tige abu vavahanitebia malevei

avue lohoi isiviale abu ogove ivi unahala holisi momoleai. Kateige olemeau ogove ivila holiiale keau momolelahalu.

7

Subuta buluve deiada (Matiu 15.1-9)

¹ Vani mole Balisia ata isi Diue menaka loui haivemale keau Dielusalemamo lohoale Iesu mai evilikahavolu. ² Isi Iesu esemu elegevege keau Diue menaka ehovaholisi abu ada totoholisito lovi ilu.

³⁻⁴ Diue vaveve keu koseanu. Abuna vasohuta abu buluve vaveve ke vai abu ada totoaito bae gabie lovi igei. Isi abuna maketie tiliage lovi volahai loholiege abu ada totoaito bae lovi ke igei. Isi abu buluve vaveve degomole koseale vagei. Abuna melegi, kabusi, sosibani kebia vavivuiabeau subuta totoimale ke nahate totolahaito bae abuemo lovi igei. Vaveve katealeu Balisia ataemo negoai tima.

⁵ Katealemo Balisia ata isi Diue menaka loui haivemale keau Iesu belahai avoe, "Osiale-moike a esemu kebiau nahie buluve kebia menaka ehovaholisi abu ada totoholisito lovi ilu." ⁶ Ige Iesuu namigeveve avoe, "Beloveta mole Aisaiau subuta Dilavau la loboe vaveve louale koike au namihage hisalianu. Au loui avoe, 'Ata kobiau abu ai unahamo di hoesehavoma.

Isito uvuiabe keu vatae vaveve unaha huhuevema.

⁷ Keau di hoesehavomale ke ihuu uoholinu.

Kosealemo keau atae menaka loui ata haivei loui kosea,

Menaka kou Dilava menakaieke.

Isito abu haivemale keu Dilava menaka holioholinu.' "

⁸ Isi Iesuu tota namigeveve avoe, "La katealemo Dilava menaka ke halevaito atae menaka ehovema.

⁹ "Selevetanike la Dilava menakaie tumu kabebihavoi la buluve menaka kebiamo negolahama. ¹⁰ Moseseu Dilava menaka loui ata haivei avoe, 'La mamuvu la neinuvu kebia hoto evisi hoesegeveve.' Isi tota haivei avoe, 'Oleuoleu abu mamuvu neinuvu kebia aiogeveve hotoe toela abuhu louale kebia abuna havege haluvisi.' ¹¹⁻¹² Isito la loboe vaveve koseale loui ata haivei kosea, 'La mamuvu la neinuvu kebia la onobenobe oveho isiviholiliege kebiaho loui kosea, Di ke mai Dilava omialemo di bae ke mai laovelivebene.'

¹³ La vaveve kateale vamaemo Dilava menaka kabebihavoi la menakate ehovei ata haivema. Isi vaveve degomole kateale vama."

Onoleike ata mai aiovavoma. (Matiu 15.10-20)

¹⁴ Iesuu kateaito ata bahata hohavei abuhu loui avoe, "La bahata di hoto ko evisi avuemo lulelelahave. ¹⁵ Aataeu lovi onole imale keu abuemo toela holioholinu. Isito abu vaveve toela onole huhulalahai vamale keu abuemo toelanu. ¹⁶ Katealemo la oleuoleu hoto evimaleau hoto ke evive." ¹⁷ Iesu kateaito ata kebia halevei oe tige esemuiabeau belahai avoe, "A louale ke ihuuke ono vade." ¹⁸ Ige au namigeveve avoe, "Lana lata di louale kemo luleleholilu. Nahi onole imale keu Dilava nimo toela holioholinu. ¹⁹ Kosealemo nahi lovi imale keu bae nahie uvue talivebene. Isito auna nahie gogoe taito uoholisi." Hoto kateale loualemo nahi hilokage lovi bahata keau duave. ²⁰ Iesuu tota loui avoe, "Atae uvumo abu vaveve toela onole huhulalahai vamale keike Dilava nimo toelanu. ²¹⁻²² Vaveve toela kosealeike atae uvumo lohoge abu vama. Abuna vaveve toela huhulalahaliege teibae vaveve vai mole vavogeveve mole havei mole keatehi ladevei mole kunaiho isivi balugai mole lohogeveve mole maina mai isi kokoluguai Dilava ivi aiovavoi vaveve toela degomole vagei. ²³ Vaveve toela katealebiaike atae uvumo lohoge abu vage Dilava nimo toelanu."

Keate mole evievi (Matiu 15.21-28)

²⁴ Iesuu kateai louito vata ke halei o mole baluga Taeae tinu. Tiale o molemo deluai isiviholiale ataeau au lohoale ke hilokalihu. Isito ataeau au lohoale ke hilokai avue loholu. ²⁵ Isi kateisege ma molemo munanae toelau holomale ke neinau Iesuu lohoale ke hoto evisi lohoaleu vudivemo kome bokoai vata binu. ²⁶ Keate keu Diue ata holioholinu. Keu Sulovenisia vatamo lohonu. Iale keu lohoaleu Iesu namihai avoe, "Ana valive di maemo munanae toela nunuvai." ²⁷ Ige Iesuu namihai avoe, "A Diue ata holialebene di bae a tedahoi. Isito di a tedahoge di Diue ata tedaevoho lohoale kebiabuna osioi. Iale dana vasohuta kebia tedaevai." ²⁸ Ige keate keu namihai avoe, "Kosive, a hoto keu seleve. Isito ana vali di isivihame igae komo di tedahoito bae a ata seleve kebia vani bahata tedaevagei." ²⁹ Ige Iesuu keate ke namihai avoe, "A hoto kateale loualemo oe talive a

ma elehanela. Munanae toelau a ma halenu.”³⁰ Kateige keate keu tiale au ma elehage munanae toelau halege momoleai tobekai lahai ua.

Malaha mole uvute isi golemate

³¹ Iesuu kateaito o ke halei o mole Saidoni kela velemai tialeu Galili vata kela velemai tialeu Dekabolisise velemanu. ³² Keve velemasege o ke biaeau malaha moleu uvute holisi golemate holiiale ke melavei lohoale Iesue velehovoi isiviale Iesuu au ada mai avuemo mamoge au momoleai. ³³ Ige Iesuu malaha ke melamei ata kebia halevei tiale abu lilikateve au adae viso malei malaha ke golemamo otoveito au adamo vioai vio ke mai malaha ke neme levenu. ³⁴ Kateaito otogoe niai au uvumo anuai loui avoe, “Alavonela.” ³⁵ Ige solekavesite malaha ke golemau dua vage nemeveta isuoholige au hotoai hoto evinu. ³⁶ Ige Iesuu tota malaha keti hoidevei lohoale ata kebia bahata namigevevei loui avoe, “Lainaho vaveve ko loui ata namigevegei.” Isito ataeau hotove ke evioholisi ata namigevege abu evilu. ³⁷ Kateige Iesu deiada ke evialeau vaveveve kemo vikolahai loui avoe, “Malaha keu vaveve bahata vamale keu duave unaha. Keu golemate isi uvute kebia hoesegevege abu hoto evisi hotolahama.”

8

Valava seveni isi huena ada molehame

(Matiu 15.32-39)

¹⁻² Vani mole Iesuu ata moaga haivelage abu lovi iveve keu uoholinu. Ige Iesuu au esemu namigeveve avoe, “Ata kobiau daluvuta vanie ni abuita igaetamo ui lovibe ioholige di abuhu uvuanu. ³ Dana lovi oveholisito hanavege abu tiliege degomole abuna vaehe humaha tavae nibedai. Kosealemo degomoleau o haeavamolemo lohohu.” ⁴ Kateige esemuiabeau namihai avoe, “Loviu uvesiteveike nahi uale ko. Iale noeabuna oleve lovi malei ata moaga kobia ovei.” ⁵ Ige Iesuu namigeveve avoe, “Lana lovibe malei lohoholilu.” Ige abu namihai avoe, “Ba, no valava seveni (7) malei lohohu.”

⁶ Kateige au ata kebia namigevege abu vatamo ugulelevai lotilu. Isito valava seveni (7) malei hoesehavoito vakoai au esemu ovege abu malei ata kebia ovei lotilu. ⁷ Isi huena degomolehame kebiata malei hoesehavoi vakoai au esemu ovege abu tota malei ata kebia ovei lotilu. ⁸ Ige ata bahata voa taoseni (4,000) keau lovi ke ige uniabeu hanianu. ⁹⁻¹⁰ Ige esemuiabeau lovie sigu ke malei basiketi sevenimo (7) udage tobaloholu. Kateigeto Iesuu ata kebia hanaveito au esemuhi bouti mai Dalamana vatae tilu.

Balisiaeau vikoe vaveveho belahalu.

(Matiu 16.1-12)

¹¹ Abu tiale keve velehovoge Balisia ataeau Iesue lohoale lobohavoi avoe, “Ana valive vikoe vaveve vage no ke elehai hilokage a keu Dilavaemo lohonu.” ¹² Ige Iesuu kabebiabe vai abuhu loui avoe, “Novae ata la koeau osiohoike vikoe vaveveho di belahama. Seleveta di la namigevege evive. Di bae vikoe vavevebe laheho valivebene.” ¹³ Kateai louito halevei bouti mai e ke vaki moleve tinu.

¹⁴⁻¹⁶ Tiale au esemuho loui avoe, “Lainaho Balisia isi Elodi ata kebia valava ilive. Isito kebiamo la ebika nenigeveve.” Kateige esemuiabeau moleho loui avoe, “Mesoho nahi valava malei lohoholilike vage au nahiho hoto ke lounu.” Kosealemoike abu hoto ke loulou. Abu abu iveve valava moaga malei lohoholisito valava igaeame mai lohohu. ¹⁷ Iale abu abu moleteho loulale ke Iesuu hilokai abuhu loui avoe, “La osiohoike valava malei lohoholiale kemo hoto loulama. La uvuu lololahalemo lana di louale kemo luleleholilu. ¹⁸ Lana di valava ada mole vakoai ata vai taoseni (5,000) ovege uniabeu haniale ke huhuoholilu. ¹⁹ La huhuige di ke valemole lovie sigu vaesuteau basiketimo ililoholu.” Ige abu avuhu loui avoe, “Basiketi bahata tuelo (12).” ²⁰ Ige au tota emo loui avoe, “Di valava seveni (7) vakoai ata voa taoseni (4,000) ovege uniabeu haniale ke la huhuige lovie sigu vaesuteau basiketimo ililoholu.” Ige abu avuhu loui avoe, “Basiketi bahata seveni (7).” ²¹ Ige au namigeveve avoe, “Lana lovi iveve kenike huhuai moleho loulama. Dau lovi ke huhuai louholinu.”

Iesuu malaha mole ni kedute hoesehavonu.

²² Abu lohoale Betesaidae velehovoge ata degomoleau malaha mole ni kedute melavei Iesue lohohu. Lohoaleau Iesu belahai isiviale au malaha ke ni levege au duaveai. ²³ Kateige Iesuu malaha ke adala holisi melamei o iae tiale au adamo vioaito malaha ke ni levei belahai avoe, “Ana elehanu.” ²⁴ Ige malaha keu niai loui avoe, “Ito, di niai ata elegevenu. Isito ata keau oai tioholige di kebia elegeveve huhuai kosea, Mesoho idiabulike.” ²⁵ Malaha keu neniai niopholige Iesuu tota nive levege niveu duave selevelage au neniai ata

elegevei lotinu. ²⁶ Iesuu kateaito hanavoi loui avoe, “Ainaho oe tiniege vaveve ko loui ata namigevelive.”

Iesu keu ata tedaeveveho lohoale

(Matiu 16.13-20; Luka 9.18-21)

²⁷ Iesuu kateaito au esemuhi halevai Sesalia Bilibai o ke vavae o degomoleve tilu. Tialeu humaha tavae Iesuu au esemu belagevei avoe, “Ataeau huhuige dau ole.” ²⁸ Ige abu namihai avoe, “Ata degomoleau a mai loui avoe, ‘Ata babatisogevemale Dioni keike ke.’ Isege degomoleau a mai loui avoe, ‘Ilaidiai ke.’ Isege degomoleau a mai loui avoe, ‘Beloveta moleike ke.’” ²⁹ Ige Iesuu tota au esemu belagevei avoe, “Isege laeau huhuige dau ole.” Ige Bitau loui avoe, “A keu Keliso. Dilavau a hanavoale ke alike.” ³⁰ Ige Iesuu namigevei avoe, “Lainaho ke loui ata namigevelive.”

Iesuu au hativeve lounu.

(Matiu 16.21-28; Luka 9.22-27)

³¹ Isi humaha tava ke igaave au esemu haivei loui avoe, “Atae Esena bae vatetumu baluga malei. Oe kosivea, dubu nalimale kosivea, isime Diue menaka loui haivemale keabuna bae kabebihavoi hamage auna hatisiso vanie ni abuita igaetaeau uoholisege auna tota hovelahai.” ³² Au abuhu au hativeve deiada ke loui daiage Bitau melamei abu lilikateve tai avuhu loui avoe, “Hoto kateale lou hale.” ³³ Ige Iesuu au esemu degomole niavei Bitaho loui avoe, “Setene, di haliohatunela. A huhuale keu Dilavaemo lohoholisito atamo lohonu.”

³⁴ Kateai louto au esemuta ata moaga kebiata hohavege abu abue lohoge au namigevei avoe, “Oleu daiti tiho vaniege au lako au isivi va halei au vatehani maleveve ke huhu haleito di ehomai. ³⁵ Iale olena au ebika unaha huhuaniege au bae ukolikoli malivebene. Isito olena au ebika huhuoholisito di ivita di hototamo vatehani malei hatiniege auna ukolikoli mai. ³⁶ Olena vatae onobobemo kunaite holisiso Dilavamo au uvu mamoholisito hatiniege auna oleve kateai ukolikoli mai. ³⁷ Au bae kunai keta au ukolikoli maleveve ke ibina valivebene. ³⁸ Ataeau novae vani komo Dilava halevai vatae isivi vamale kemo oleuoleu di mati vai di hoto loulahi isiviholige dana bae di lohomale kela di Mamae ataga anelu tumute atagamo lohoniege data kebia matigevei.”

9

Iesu vavae elehilehi keu nimoleanu.

(Matiu 17.1-13; Luka 9.28-36)

¹ Iesuu tota namigevei avoe, “Seleveta, di la namigevema. La degomoleau kove uale keau bae haluvilivebene. Isito ataeau Dilava adae vuvunemo uveve ke vuvune elehaito bae haluvisi.” ² Kateai louniale vanie ni sigisiu (6) uoholisege au Bitu, Diemisi, isi Dioni holoevei abuhi tana mole balugae tilu. Tiale keve velehovoi elehasege Iesu vavae elehilehiu nimoleanu. ³ Nimoleage ogove keau taebe ni mole vai ua. Atabeu ogo totoige taeve keu ke nahate va holioholinu. ⁴ Isi kateisege esemuiabe keau elehasege Ilaidiau Moseseti Iesuluvuta hotohotoima. ⁵ Ige Bitau Iesuho loui avoe, “Kosive, hoeseike no vai kove loholu. Iale noabuna la nenita oe ese abuita igaeta houevi. Ilive elike moleu aho. Moleu Moseseho. Isege moleu Ilaidiaho.” ⁶ Keau vabulahalemoike Bitau toto ke huhuoholisito lounu. ⁷ Kateisege goeu lohoi kebia bamuevesege hoto moleu goe ke uvumo loui avoe, “Di uvue moike ke. Iale hotove evive.” ⁸ Hoto keu uoholisege abu nilahai elehage ata abuita keau uoholisege Iesu igaeu lamisi ua.

⁹ Kateaito hevaluvisi lohosege Iesuu au esemu namigevei avoe, “Lainaho la ono vade elehale ke loui ata haivegelive. Ilage Atae Eseu hatisi tota hovelahageto bae loui ata haiveve.” ¹⁰ Kateige esemuiabeu hotove evisito abu moletehi Iesuu hatisi hovelahaveve ke ihu hilokaholisi molemo kaovama. ¹¹ Isi tota Iesu belahai avoe, “Osiohoike Diue menaka loui haivemale keau loui avoe, ‘Ilaidiana vasohuta lohosegeto Atae Esena bae gabie lohoi.’” ¹²⁻¹³ Ige Iesuu abuhu loui avoe, “Seleveta Ilaidiana vasohuta lohoi humahave loisi ata bahata namigevege abuna abu vaveve bahata hoesegevei. Isito di la namigevege evive. Ilaidiau subuta lohoge ataeau Bukae Hotou louale ke nahate vai abu isivi avuemo vai aiohavolu.”

Iesuu mo mole munana toelate hoesehavonu.

(Matiu 17.14-21; Luka 9.37-43)

¹⁴ Kateai hevaluvisi lohoaleau abu esemu degomolebiamu velehovoi elehasege ata moagaeanu igaetolahaime uma. Ata keau umale keve Diue menaka loui haivemale keau Iesu esemu degomolehi moleho lounu. ¹⁵ Isege ata degomoleau keve ualeau Iesuu lohoale ke elehai vahaehove vai avue bibuluvisi tilu. ¹⁶ Ige Iesuu lohoale au esemu belagevei

avoce, "La hoto onoleike abuhi molemo louna." ¹⁷ Kateisege malaha moleu ata kebiahi uale keu Iesu namihai avoce, "No haivemale ata, munanae toelau di moemo holomage uvute holialeike di mai ae lohonu. ¹⁸ Munanae toela kena vani degomole aiohavoge auna vatamo dobage aivemo sabana lohoge auna au aie luhumo hedimai kibioholisi ugei. Di vasohuta mai a esemu lohonu. Isito keau munanae toela ke nunuvaholilu." ¹⁹ Kateige Iesuu au esemu namigevei avoce, "Evieviholimale ataea, la huhuige dana vali vani moaga lahehi ui laheho loviai. La katealemo mo ke mai dae lohove." ²⁰ Kateige keau mo ke mai lohoge munanae toelau Iesu elehai mo ke aiohavo selevelai mai vatamo mamoge tobilakage aivemo sabau lohonu. ²¹ Ige Iesuu mamave belahai avoce, "A mo kou vaesuvelaike au vaveve koseale vanu." Ige mamaveu loui avoce, "Eseesemoike au ke vai lohonu. ²² Vani moaga munanae toela keu isiviale au hatisi. Kateaime mai venemo mihatui emo mihatuma. Ialelua a huhuige ana vali noheho uvuai no tedeavei." ²³ Kateige Iesuu avuhou loui avoce, "Osiohoike a daho loui kosea, 'A huhuige ana vali no tedeavei.' Ana a uvu mai daemo mamoi onoleho di imihage dana ke vai." ²⁴ Kateige mamaveu loui avoce, "Evievi daemo uale keu baluga holioholinu. Iale di evievi ke mai balugatinela."

²⁵ Kateisege ata moaga keau Iesu mai evilikahavoi isiviale elehai. Ige Iesuu munanae toela keho loui avoce, "A mo ke mai aiohavoge au hotoholisi evioholimalemo di a namihalelua mo kemo soai ti selevelanela." ²⁶ Kateai louge munanae toela keu mo ke haleho kekoai mai vatamo mamoge ataeau elehai loui avoce, "Mo keu hatinu." Kateaito halei soai tinu. ²⁷ Ige Iesuu mo ke adala holisi ebagemage hovelahanu.

²⁸ Iniale Iesu igave oe uvue usege esemuabeau belahai avoce, "Osiohoike no mo kemo munanae toela ke nunuvaveve keu noemo anakianu." ²⁹ Ige Iesuu namigevei avoce, "Onobeu bae munanae toela kateale nunuvelivebene. Isito lovi ioholisito guliguli unahamo lana munanae toela kateale nunuvei."

Iesuu tota au hativeve lounu.

(Matiu 17.22-23; Luka 9.43-45)

³⁰ Abu tota matama ke halevai Galili vatae lohoge Iesuu isiviholiale ataeau au lohoale ke hilokaho. ³¹ Kosealemo au isiviale au hativeve ke deiada loui au esemu haivei. Kateai namigevei avoce, "Ataeabuna Atae Ese mai ata degomole ovege abuna hamage auna hatiniege vanie ni abuita igaetaeau uoholisege auna tota hovelahai." ³² Kateige abu Iesu hoto ke evisi avuemo luleleholisi isiviale belahai. Isito vabulahalemo belahaholilu.

Olena kosive baluga holisi

(Matiu 18.1-5; Luka 9.46-50)

³³ Katelahai lohohiale Kabenumue velehovolu. Keve velehovoi oe uvue tige Iesuu au esemu belagevei avoce, "Hoto vadeike la nova humaha tavae loui lohoma." ³⁴ Kateige keau humaha tavae oleu abuemo kosive baluga holiveve ke loui lohoalemo vabuhavoi hotove ibina louholilu. ³⁵ Ige Iesuu ugulamo au esemu bahata namigevei avoce, "Oleu isiviai kosive baluga holioho vaniege au ebika etolemai au haokuvu huhueveito bae gabie au ebika huhuai." ³⁶⁻³⁷ Kateai louito eseese mole mai vudiabemo mamoi mo mai evudei abuhu loui avoce, "Olena di ivimo eseese ko nahate mai o hatui hoesehavoniege daike au ke hoesehavonu. Isi olena di mai o hatui hoesehavoniege di hanavoale ketaike au ke mai hoesehavonu."

³⁸ Ige esemuve mole Dioniu namihai avoce, "No haivemale ata, no malaha mole elehasege keu a ivimo ataemo munanae toela munuvema. Nunuvege no isiviale keluige au halei. Kosealemo keu nohehi a ehomaholinu." ³⁹ Ige Iesuu au esemu bahata namigevei avoce, "Ata oleu di ivimo vikoe vaveve vage lainaho keluige. Kosealemo ata keu di ivimoike au ke valemo au bae di ivi aiohavolivebene. ⁴⁰ Ata oleu kateale vale keu nahie aiogeveholisito nahie tedeaveike au ke vama. ⁴¹ Seleveta di la namigevema. La di esemu holiale kemo oleuleu la tedeavei e hai laoveale kena bae au ibina mai."

Vaveve toela vaholiveve deisada

(Matiu 18.6-9; Luka 17.1-2)

⁴² "Ata olena isiviai evievi ese molehame aiohavoge au vaveve toela vage abege ataeau mune baluga mai enoveta etunavui mai davalamo mihatuge duave. ⁴³⁻⁴⁴ Iale ke nahate la adau vaveve toela vage ke heisi etuleve. La ada igave keta otogoe tiale keta duave. Isito la ada keu vaveve toela vai la malevei venue hodovavesite keve otoveale keu tolanu. Venue hodovavesite keu hatihatie matama. ⁴⁵⁻⁴⁶ Isi la velou vaveve toela vage ke heisi etuleve. La velo igave keta otogoe tiale keta duave. Isito la velo keu vaveve toela vai la malevei venue hodovavesite keve otoveale keu tolanu. Venue hodovavesite keu hatihatie matama. ⁴⁷⁻⁴⁸ Isi la niu vaveve toela elehai vage ke ekosihai mihatuve. La ni igave keta Dilava matamae dogae tiale keta duave. Isito la ni keu vaveve toela vai

la malevei veneu hodovavesite keve otoveale keu toelanu. Veneu hodovavesite keu hatihatie matama.

⁴⁹⁻⁵⁰ “Madea keu duave. Isito auna toelai heholiniege auna oleve kateai bae tota heai. Iale madea keu vene nahate. Dilavana bae veneta atae vaveve kaovai hilokage oleme vaveveau duaveasege oleme vaveveau toelalu. Katealemo madea vaveve ke nahate vai mole hoesegeveve.”

10

Keate haleveve deiada

(Matiu 19.1-12; Luka 16.18)

¹ Iesuu kateaito ata kebia halevei Diudia vatae velemai Diodani e ke houi vaki moleve tinu. Keve tige tota ata moagaeau avue lohoge au au vamale ke nahate vai haivenu. ² Ige Balisia ataeau lohoale Iesu lobohavoho belahai avoe, “A huhuige malaha moleu au mahina halege kena menaka egumanu. Emena.” ³ Ige Iesuu belageveve avoe, “Moses menakau vaveve katealemo ono vade lounu.” ⁴ Ige abu namihai avoe, “Moses menakau loui avoe, ‘Malaha oleu au mahina haleho vaniege vasohuta au mahina haleveve beiba hisaliaito bae keate ke halei.’” ⁵ Ige Iesuu tota namigeveve avoe, “Dilava menaka ehovaveve kemo la uvuu toloike vage Mosesu mahina haleveve humaha ke alavonu. ⁶⁻⁷ Isito vasohuta Dilavau vata vai otogo vale vani kela Dilavau malaha vai keateta vanu. Katealemo mo molena mahinaniege au mamata au neinata halevei au mahinata igaetoai ui. ⁸ Katealemo abu bae avui molemo igaegaalivebene. Isito abuna molehi igaetolahi. ⁹ Dilavaike mahinuvuale kebia malevei igaetoige abu mole holoveve igaetoalu. Katealemo atabe lako kebia tasalivelive.” ¹⁰ Kateai louniale halei oe uvue tige esemuiabeau avue tiale au hoto louale kemo lulehoholi belahalu. ¹¹ Ige Iesuu namigeveve avoe, “Malaha oleu au mahina halei keate mole melameniege au keate ke vavamo vavoloike au ke vanu. ¹² Ige ke nahate mesoho keate moleu au kolia halei malaha mole melameniege au kolia ke vavamo vavoloike au ke vanu.”

Iesuu eseese hoesegevenu.

(Matiu 19.13-15; Luka 18.15-17)

¹³ Vani mole ata degomoleau abu ese malei Iesue lohohi isiviale au leveve hoesegeve. Isito Iesu esemuiabu kebia iovei avoe, “Halevai teve.” ¹⁴ Ige Iesuu ke elehai itumuai au esemuho loui avoe, “Lainaho eseese keluevelive. Isege abu dae lohohi. Kosealemo eseese kebia uvunahate vamale keabuna Dilava adae vuvunemo ui. ¹⁵ Seleveta di la namigevema. Oleuoleu eseese kobia uvunahate vaholilige abu bae Dilava adae vuvunemo ulivebene.” ¹⁶ Kateai louito eseese kebia malevei au vudimo otovei au ada malei tataabemo otovei hoesegevenu.

Kunai moagate

(Matiu 19.16-30; Luka 18.18-30)

¹⁷ Iesuu kateaito halevei tiho vasege malaha moleu bibuai lohoaleu vudivemo kome bokoai vata bisi belahai avoe, “No haivemale atae dua, dana ono vade igae vai ukolikoli mai.” ¹⁸ Ige Iesuu namihai avoe, “Osiohoike a dahoe loui kosea, ‘Atae dua.’ Atabeu duave holioloholinu. Isito Dilava igaeu duave. ¹⁹ A menaka koseale hilokaevenu. ‘Ainaho ata havegelive. Ainaho mole keatehi ladevegelive. Ainaho mole vavogelive. Ainaho mole lobogelive. Ainaho molemo loboe vaveve vagelive. Isi a mamata a neinatae hoto evisi hoesegevenela.’” ²⁰ Ige malaha keu loui avoe, “No haivemale ata, di esebuluta menaka kebia bahata ehovei lohoma.” ²¹ Kateai louge Iesuu avuho isiviai niavai loui avoe, “A a louale ke bahata vanu. Isito a vaveve ko igae vaholiale talive vai a kunai ke bahata malei voiai ibinave malei kunaiholimale kebia oveito lohohi di ehomanela. Ilive elike otogoe ibinae dua manela.” ²² Ige malaha keu au kunai moaga ke malei ata oveveve ke evisi uvu baluganu. ²³ Kateige Iesuu au esemu niavei lotai abuhu loui avoe, “Kunaite keau otogoe tiveve keu tolo selevenu.” ²⁴ Ige esemuiabeau vikolahage au tota namigeveve avoe, “Di esemuiabeau, olemeau kunai huhu balugamale keau otogoe tiveve keu tolo selevenu. ²⁵ Ovo kamela keu nilae vahamo tiveve keu anekianu. Iale ke nahate kunaite keu otogoe tiveve keu anekianu.” ²⁶ Ige esemuiabeau hotove ke evisi viko balugai moleho loui avoe, “Kunaite keabuna otogoe tiholige oleme igae abuna otogoe tai.” ²⁷ Kateai louge Iesuu niavei abuhu loui avoe, “Kunaite keau otogoe tiveve keu ataemo anekianu. Isito keu Dilavaemo anekiholinu. Nahi hilokage vaveve bahata keau Dilavaemo tolohohilu.” ²⁸ Kateige Bitau avuho loui avoe, “Di louge evi. Noeau no onobenobe bahata halevai a ehovalu.” ²⁹⁻³⁰ Ige Iesuu abuhu loui avoe, “Seleveta di la namigevema. Oleuoleu di ivimo di hoto louliho abu o, abu mohoho mahoho, abu mamuvu neinuvu, abu ese, abu

vata halevaliege abuna novae vani komo abu di ivimo halevale kebia bahata malevei tota tatavemo degomoleta malevei. Isi vatehani keta malei. Iiege vanie gabila abuna ukolikoli malei. ³¹ Isito di louge evive. Novae vani komo ata olemeau atae nimo ivite holiale keabuna bae vanie gabila Dilava nimo ivioholisi. Isege novae vani komo ata olemeau atae nimo ivite holioholiale keabuna bae vanie gabila Dilava nimo ivite holisi.”

Iesuu tota au hativeve lounu.

(Matiu 20.17-19; Luka 18.31-34)

³² Iesuu kateai louito au esemuho uli holisi Dielusalema humahala tisege esemuiabeau ke elehage uvuiabeu kibikibianu. Ige ata degomoleau kebia ehovei lohoale kebiata vabulahalau. Ige Iesuu ke hilokai au esemu tuelo (12) holoevei lilikateve tialeu ono vadeu gabie avuemo lohoveve ke loui haivema. ³³⁻³⁴ Isi kateai haivei avoe, “Nahi Dielusalemae timale kove ataeabuna bae Atae Ese mai dubu nalimale kosivea isi Diue menaka loui haivemale kebia ovege abuna hamaveve hoto loui mai Diue ata holioholiale kebia ovege abuna hehavo avuemo violahai visuhavo hamage auna hatisi. Iniege vanie ni abuita igataeau uoholisege auna hovelahai.”

Abui hohoteau abu isivi louu.

(Matiu 20.20-28)

³⁵ Iesuu ke louge uoholige Sebedi mo abuita Diemisi isi Dioni keau Iesu namihai avoe, “No haivemale ata, no isiviale no isivie hoto loui a namihai.” ³⁶ Ige Iesuu namigeveve avoe, “Dana laheho la isivi vade vai.” ³⁷ Ige abu namihai avoe, “No isiviale atage matama keve no moleu a ada inuteve ugulomosege moleu a ada agiteve ugulamoi.” ³⁸ Ige Iesu abuhu loui avoe, “La belahala ke la hilokaholilu. Lana valive di vatehani maleveve ke lata malei. Isi di hativeve ke nahate lata vai.” ³⁹ Ige abu namihai avoe, “Ito, noeabuna nota ke malei.” Ige au namigeveve avoe, “Seleveta lana bae di vatehani malei hatiale ke nahate lata maleve. ⁴⁰ Isito di la tabagevege la di ada inuteve isi agiteve uguivoveve ke vuvuneu daemo uoholinu. Isito Dilavau oleme tabageveale keabuna bae keve uguivoi.” ⁴¹ Kateai louge esemuiabe teni (10) keau abui hohoteau louale ke evisi abuhu itumulahalau. ⁴² Abuhu itumulahage Iesuu au esemu bahata hohavei abuhu loui avoe, “La hilokage gamanie kosiveau abu ebika tabageveve isiviale ataeau valaeabemo ui isiviabe vagei. ⁴³ Isito di isiviholinu la vaveve kateale valiho. La moleu isiviai kosive baluga holiho vaniege au ebika etolemai la mole esemu holisi isivive vai. ⁴⁴ Isi la moleu isiviai ivite holiho vaniege la bahatae valamo ui la isivi vai. ⁴⁵ Kosealemo Atae Esee vatae lohoaleu isiviholinu vatae kosive holige ataeau ivive ebagevaliho. Isito lohoale keu isiviale ata bahatae toelae ibinahohatai malevege abu ukolikoli malei.”

Iesuu ni kedute Batimeasi hoesehavonu.

(Matiu 20.29-34; Luka 18.35-43)

⁴⁶ Katelahai lohoale keau Dielikoe velehovosege ata moageau elegeveve abuhi tilu. Tisege Timeasi mo Batimeasi niveu keduale keu humaha vavae ugulamoi moniho ata imigeveva. ⁴⁷ Keve ugulamoaleu evige Iesuu humaha kela lohoma. Ige au hoai loui avoe, “Deividi mo Iesu, dahoe uvuai di tedahonela.” ⁴⁸ Ige ataeau aihavo avuhu loui avoe, “Tobekai unela.” Ige au tota baita hoai loui avoe, “Deividi mo, dahoe uvuai di tedahonela.” ⁴⁹ Ige Iesuu ata namigeveve avoe, “Hohavoge au dae lohoi.” Ige abu ni kedute ke hohavo avuhu loui avoe, “Auna nova a hoesehavovevelua momoleai lohonela.” ⁵⁰ Kateai louge malaha keu au dabae ogo iamoi mamoi solekavesite Iesue lohonu. ⁵¹ Ige Iesuu namihai avoe, “A isiviale di ono vade ahoe vai.” Ige au loui avoe, “Kosive, di isiviale di ni hoesehavoge di tota niai.” ⁵² Ige Iesuu namihai avoe, “A uvu mai daemo mamoaalemo a nina duaveage niai tenela.” Kateige solekavesite malaha ke niu duaveage au niai Iesu ehomai tinu.

11

Iesuu o baluga Dielusalemae tinu.

(Matiu 21.1-11; Luka 19.28-40; Dioni 12.12-19)

¹⁻² Iesuu au esemuhi lohoale tana mole Oliveta keve velehovosege Dielusalemau vuguvuguanu. Tana ke vavae o abuita Betabedi isi Beteni keau ua. Iale o keve Iesuu au esemu abuita hanavei loui avoe, “La tiliege o keve velehovoliege o ke ivie doniki mole doga ataeau avuemo uguivoholiale ke lulehai mai lohove. ³ Ige mesoho ata moleu la belageveve kosea, ‘La osiohoike ke lulehama.’ Ige namihai kosea, ‘Kosiveu avuhu isivianu. Iale auna tota hanavoge auna bae lohoi.’” ⁴⁻⁵ Kateai louge abu tiale o ke ologomo abu avuemo hote beisi mai hadea tavata umuvale ke elehalu. Elehai ke vavehasege oe ata degomoleau lavisi uale keau ke elehai belageveve avoe, “La osiohoike doniki ke

vavehama.”⁶ Kateige abu Iesuu louale hoto ke loui namigevelu. Ige oe ata keau hotobe loui kelueveholilu.⁷ Ige keau doniki ke mai lohoaleau Iesue velehovoi abu dabae ogo malei doniki ke golomo tedige Iesuu biloai golovemo ugulamou. ⁸ Ige ata degomoleau abu dabae ogo malei humahala tedisege degomoleau idie ada numute bokoai malei humahala tedisi tilu. ⁹ Kateisege ata degomoleau Iesuho uli holisi gabi holiale keau baita holahai loui avoe, “Seloo, kou Dilava ivimo lohoale ko nahi hoesehavoi. ¹⁰ Subuta nahie mama baluga Deividu kosive holisi nahie ata nibieveale ke nahate ata kona kosive holisi nahie nibivei. Iale nahi ivive ebagevai Dilava hoesehavoi.”

¹¹ Katelahai lousege Iesuu Dielusalema oe velemaito tiale ke Diue dubu baluga ke uvue onobenobe niaveito gutualelua au esemuhi Betenie tilu.

Iesuu idi mole vigiho louge baioholinu.
(Matiu 21.18-19)

¹² Ladeveliale vavita Iesuu au esemuhi o ke halevai tota Dielusalemae lohoge Iesuu vaeau. ¹³ Vaeai haeavamolela idi mole vigiu humuale ke elehai tiale isiviai elehage au baiage au ke bai bukiai isi. Ke huhuai lohoale elehage keu baioholisito numu unahanu. Kosealemo ke baie vaniu lohoholinu. ¹⁴ Ige Iesuu idi keho loui avoe, “Atabeu bae tota a bai ilivebene.” Kateige esemuibeau hotove ke evilu.

Iesuu dubumo maketilhamalebia nunuvenu.
(Matiu 21.12-17; Luka 19.45-48; Dioni 2.13-22)

¹⁵⁻¹⁶ Katelahaito Dielusalemae velehovosege Iesuu halei dubu balugae tiale dubumo maketilhai voivoilahamalebia nunuvenu. Isi moni senisilahamale kebia teibolo ekovehage moniabeu keiolahanu. Isi ugu voiamale kebia batabata ekovehai kebia bahata nunuvenu. Isi ataeau onobenobe malei dubue tai lohomale ke bamunu. ¹⁷ Isi ata haivei avoe, “Dilavau Bukae Hotomo loui avoe, ‘Di isiviale ata bahataeau di o komo guluguliai di hoesehavoge.’ Isito laeau kateholisito vavoloe vaveve avuemo vama.” ¹⁸ Ige dubu nalimale kosivea isi Diue menaka loui haivemale keau ke evisi Iesu hamaveve humaha kaovama. Kosealemo ataeau vuvuneve hoto ke evisi vikolahale kemoike abu vabulahi isiviai hamai. ¹⁹ Kateaniala gutuige Iesuu au esemuhi o baluga ke halevai tilu.

Idi nehe vigi ke deiada
(Matiu 21.20-22)

²⁰ Ladeveliale vavita hoveveve Dielusalemae lohohiale humaha tavae idi nehe vigi ke elehage keu bahata giliai gabianu. ²¹ Ige Bitau Iesuu louale ke huhuai namihai avoe, “Kosive, eleha. A idi neheho louale keu giliai gabianu.” ²²⁻²³ Ige Iesuu abuhou loui avoe, “Di louale ko evive. La evievina Dilavaemo uge lana tana moleho loui kosea, ‘Toholahai davalamo tenela.’ Isi la louale kemo dolodoloholisito la uvu bahata mai avuemo mavoge la louale kena seleve holisi. ²⁴ Katealemo di la namigevema. La ono vade loui Dilava imihaliege la uvu bahata mai avuemo mavoge auna la louale ke laovei. ²⁵ La imihaho valiege vasohuta ata moleu laemo vaveve toela vale ke momahavoito Dilava imihaliege otogoe umale la Mama kena la vaveve toela ke ulihai. ²⁶ Isito mesoho ata moleu laemo vaveve toela vale ke la momahavoholige Dilavau bae a toela ke ulihalivebene.”

Kosiveau Iesu vuvunemo belahalu.
(Matiu 23.21-27; Luka 20.1-8)

²⁷⁻²⁸ Kateaito lohohialeau Dielusalemae velehovoge Iesuu halei Diue dubu baluga keve oai tinu. Oai tisege dubu nalimale kosivea, Diue menaka loui haivemale isi oe kosive keau lohoale Iesu belahai avoe, “Oleike vuvune kateale aoge a vaveve kateale vama.” ²⁹ Ige Iesuu namigeveve avoe, “Di isiviale hoto mole loui la belagevege la ke ihu loui di namihageto di bae oleu vuvune daoge di avuemo vaveve kateimale vamale ke loui la haivei. ³⁰ Di isiviale di namihave. Oleike vuvune Dioni omige au ata babatisogevenu. Dilava emena ataeabulike vuvune omilu.” ³¹ Kateai louge abu ke evisi moleho loui avoe “Nahiabuna onole loui namihai. Nahiabuna loui kosea, ‘Dilavaike vuvune ominu.’ Ige auna loui kosea, ‘Isito osiohoike la hotove evioholilu.’ ³² Isi mesoho nahiabuna loui kosea, ‘Ataeabulike vuvune omilu.’ Ige keta anakianu. Kosealemo ata bahataeau huhuige Dilavaike vuvune Dioni omige au beloveta holinu.” ³³ Hotoeabe keu uoholige abu Iesu namihai avoe, “No Dioniu olemo vuvune male ke no hilokaholilu.” Ige Iesuu namigeveve avoe, “La katealemo di bae data di ole vuvunemo vaveve kateale vale loui la namigevelivebene.”

12

Abu bulue biage mo hamalu.
(*Matiu 21.33-46; Luka 20.9-19*)

¹ Iesuu tota dovodovue hoto loui namigevei avoe, “Malaha moleu au bulumo hote mole uaini haevei vavavemo hala houi bulu ke naliveve o mole egetana hounu. Isi uaini ke bai vunahaveveho abata lovonu. Kateaito haeavamoleve taliho au bulu ke mai ata degomole ovei isiviale abu buluve ke nalisi. Kateaito halei tinu. ² Iniale idi ke bai ehavave vaniu lohoge malaha keu au esemu mole hanavoi isiviale au talive ata nehe kebiau uaini ke bai degomole malei lohoi. ³ Ige esemuve keu tige abu mai hamai iovage au ada unahala hoilalahi tinu. ⁴ Ige au tota au esemu mole hanavoge abu kinavemo hamai aiovavoge vavave bahata keu toelanu. ⁵ Ige au tota au esemu mole hanavoge abu ke hamage hatinu. Ige au tota degomole hanavege abu degomole havei aiogeveito degomole havege haluvilu. ⁶ Abu esemu kebia havehatulage malaha ke uvue mo igaeu ua. Ige malaha keu au mo hanavoi huhuai avoe, ‘Abu bae di mo hamalivebene. Isito abuna hoesehavoi.’ ⁷ Kateige bulu nalimale kebiau mo ke elehai moleho loui avoe, ‘Bulu ko biage moike ko. Iale nahi ke hamage au hatige elike bulu kou nahiele holisi.’ ⁸ Kateai louito mo ke hamai mai bulue iae mihatulu.”

⁹ Iesuu kateai louito au esemu belagevei avoe, “La huhuige bulue biagena ata kebiau osioi. Auna lohoniage ata kebia havei bulu ke mai ata degomole ovege abuna nalisi. ¹⁰ Di louale kemo lana Bukae Hoto mole dodaveholilu. Hoto keu loui avoe,

‘O houmale keu mune moleta o houveve ke kabebihavoale keike nova Dilava o hadebiveve mune holinu.

¹¹ Dilavaike mune ke ebagemage nahi ke elehage keu nahie nimo duave selevelanu.’”

¹² Kateai loui Diue kosive kebia namigevege abu hilokage vaveveabe kemoike au dovodovue hoto ke lounu. Kateai isiviale Iesuu mai dibulae mavoi. Isito ata moaga kebia vabugevealelua Iesuu halevai tilu.

Balisiaeau dubue takesimo Iesu belahalu.
(*Matiu 22.15-22; Luka 20.20-26*)

¹³ Iniale vani mole Diue kosive keau Balisia ata degomole isi Elodi ata degomole hanavei isiviale abu hoto degomole loui Iesuu belahai elike hotove kemo mai dibulae mavoi. ¹⁴ Ige ata keau lohoale Iesue velehovoi namihai avoe, “No haivemale ata, no hilokage a hoto loumale keu seleve unaha. A ata ivite kebia vabugeveholisito ata bahata vaveve loui kebiaho Dilava vaveve louma. Katealemo no namigevenela. No Loma gamanie kosive baluga Sisaemo takesiamale kena duave. Emena toelanu.” ¹⁵ Ige Iesuu loboe hoto ke hilokai namigevei avoe, “Osiohoike la loboe hoto loui isiviale di mai dibulai. Mune bai mole mai lohoge di elehai.” ¹⁶ Ige abu mai lohoge au belagevei avoe, “Ole munanata ivivetaike moni ko luhumo ua.” Ige abu namihai avoe, “Loma gamani kosive baluga Sisa.” ¹⁷ Ige au namigevei avoe, “Iale gamaniele gamani omive. Isi Dilavaele Dilava omive.” Kateai louge abu ke evisi vikolahalu.

Sadukeau hovevevemo Iesu belahalu.
(*Matiu 22.23-33; Luka 20.27-40*)

¹⁸ Sadukea ata degomoleau Iesue loholu. Ata keabulike loui avoe, “Haluviale keau bae hovevelevelibene.” ¹⁹ Iale abu loui avoe, “No haivemale ata, Moseseu menaka koseale noheho hisialiai avoe, ‘Malaha moleu mahinaito eseholisi hatige hohovena au nanae keate ke melamei au nanaho ese houveve.’ ²⁰ Iale no deiada mole louge evinela. Vani mole malaha moleu mohoho seveni (7) houevenu. Ige malaha ke moe ovokinuu mahinai esebe mamoholisito hatinu. ²¹ Ige ke valamo mo moleu au nanae gobu melamei esebe mamoholisito hatinu. Ige ke valamo mo moleu kateaito hatinu. ²² Ige ke valamo mohoho degomoleau uale keau keate ke igae melaveito esebe mavoholisi bahata haluvilu. Ige gabila keate keta hatinu. ²³ No deiada ke loualemo a huhuige ata seveni (7) keabuna hovevevege keate kena ole mahina holisi.”

²⁴ Ige Iesuu namigevei avoe, “Di hilokage la Bukae Hotota Dilava vuvuneta hilokaholialemoike hoto ke loui Dilava humaha hosidilu. ²⁵ Kosealemo haluviale keau hoveveveliege abu bae mole holovelevelibene. Isito abuna otogoe anelu kebia nahate vai. ²⁶ La loui kosea, ‘Haluvimale kebiau bae hovevelevelibene.’ Isito lana Bukae Hotomo Mosese deiada mole dodaveholilu. Deiada kemo Moseseu veneu idimo lahale ke vavamo lamige Dilavau avuho loui avoe, ‘Dau Ebalahamume, Aisikime, Diekobome Dilava.’ ²⁷ Katealemo nahi hilokage keu nova nita uale kebia Dilava isi subuta haluviale munanaeabeu uale kebiata Dilava. Iale kemo la hoto louale keu seleve holioholinu.”

*Menaka baluga igae**(Matiu 22.34-40; Luka 10.25-28)*

²⁸ Iesuu Sadukea ata kebiahi hotohotoasege Diue menaka loui haivemale ata moleu keve ualeu hoto ke evisi hilokage Iesuu hotoeabe ibina louale keu seleve. Ige au avuta Iesu belahai avoe, “Menaka bahata kebiamo menaka oleteu balugataho.” ²⁹ Ige Iesuu avuho loui avoe, “Menaka ko igaeu baluga. ‘Iselala ataea, evive. Nahie Kosive Dilava keu igae. Isi avu igaeike baluga. ³⁰ Ialemo a uvu bahata a isivi bahata a lulele bahata isi a nego bahata malei a Kosive baluga Dilava omisi hoesehavonela.’ ³¹ Ige menaka ke valamo mole balugaike ko. ‘A a ebika hoesehavomale ke nahate a haokuvu kebiata isivi ovei hoesegevenela.’” ³² Ige Diue menaka loui haivemale keu Iesuho loui avoe, “No haivemale ata, a louale keu seleve. Nahie Kosive Dilava keu igae. Isi avu nahatebeu uoholinu. ³³ Ige oleni au uvu bahata au isivi bahata au nego bahata Dilava omisi au ebia hoesehavomale ke nahate au haokuvu kebia isivi ovei hoesegevege keu baluga. Iale menaka abuita ehovemale keu baluga. Isito ovo havei mahomale keu baluga holioholinu.” ³⁴ Ige Iesuu hotove ke evige keu au louale kemo luleleanu. Isi kateai avuho loui avoe, “A Dilava adae vuvunemo uveve keu haeava holioholinu.” Kateai louge ataeau tota Iesu belalahihu vabulahaluh.

*Iesuna oleve kateai Deividi valada holisi**(Matiu 22.41-46; Luka 20.41-44)*

³⁵ Iesuu Diue dubu balugamo ata kebia haiveniale tota belagevei avoe, “Diue menaka loui haivemale keau loui avoe, ‘Kelisona Deividi valadamo lohoi.’ Isito auna oleve kateai Deividi valada holisi. ³⁶ Kosealemo Munanae Tumuu Deividi mai luleletige au loui avoe, ‘Dilava di Kosiveho loui avoe, Di ada inuteve ugulamosege di a aiohavomale kebia malevei a veloe heimo otovege ana kosiveabe holinela.’”

³⁷ Deividi biageu hoto kemo Kelisohe loui avoe, ‘Di Kosive.’ Katealemo oleve kateai Kelisona Deividi valada holisi.” Kateai louge ataeau ke evisi vahaeholahaluh.

*Iesuu menaka haivemaleho hoto lounu.**(Matiu 23.1-36; Luka 20.45-47)*

³⁸ Iesuu tota haivei avoe, “Diue menaka loui haivemale kebiamo la ebika nenigeveve. Keau isivilahale ogoe dua hatui ata moagaeau umale keve olahai tige abu elegevei hoesegeveve. ³⁹ Isi isivilahale dubue uvue vomue dua unahamo uguiavogeve. Isi isivilahale iveve baluga vamale kemo ivite kebiahi igaetoageve. ⁴⁰ Keabuna loboe vaveve vai gobuvu lobogeveve oebemo kunaiabe malegeve. Abuna katelahaito tiliege atae vudila guliguli egeve vageve. Abu kateale vamalemo Dilavana vatehani baluga ovei.”

*Gobu mole obeleni**(Luka 21.1-4)*

⁴¹ Iesuu kateaito lotiale obeleni otovemale maua ke vavae ugulamoi ataeau obeleni otovemale kebia nibievema. Nibievesege kunaite ata keau moni baluga otovema. ⁴² Isi elehasege gobu molehameu lohoale benie kina abui malei manemenu. ⁴³ Ige Iesuu ke elehai au esemu hohavei abuho loui avoe, “Seleveta di la namigevevema. Gobu keu benie kina abuita unaha otoveale keu ata bahataeau otoveale ke evihanu. ⁴⁴ Kosealemo ata degomole keau moni moagau abuemo ualemoike abu degomole otovelu. Isito gobu keu moniu avuemo ualehameike au ke malei otovege avuemo monibehameu tota uoholinu.”

13*Vaveve toelaeau vatae gabimo lohoveve**(Matiu 24.1-14; Luka 21.5-19)*

¹ Iesuu kateaito Diue dubu baluga halei tisege esemuve moleu namihai avoe, “No haivemale ata, dubu ke elehanela. Abu muneta houale keu duave baa.” ² Ige Iesuu namihai avoe, “A dubu ke elehale ke ataeabuna loholiege koilahage mune moleu bae mole golomo ulivebene.”

³ Kateai louito lohoi tiale Oliveta tanae golomo ugulamoi dubu ke ninele vama. Isege Biti, Diemisi, Dioni isime Andulu keau abu ehuveta Iesue lohohu. ⁴ Lohoaleau belahai avoe, “No namigevenela. A louale kena bae vaesuvela velemai. Isi no haivenela. Ono vadena velemae noeabuna ke elehai hilokage vani keu lohohu.” ⁵ Ige Iesuu namigeveve avoe, “La ebika nenigeveve. Onoilage ataeau la lobogevege dobuluvima. ⁶ Kosealemo ata degomole abuna loholiege di ivimo la lobogeveve loui kosea, ‘Dau Keliso.’ Isi kemo ata moaga lobogeveve malevei. ⁷ Ataeau haeavamole mesoho vuguta tuvalilahage lainaho ke evisi vabulalahelive. Kosealemo vaveve katealena vasohuta lohosege ke iae vanie

gabina bae lohoi. ⁸Vata mole atae abuna hoveveve vata mole atahi tuvalilahi. Isege ata benahate abuna hoveveve ata benahatehi tuvalilahi. Ige vata degomolemo hamuna hatuge vae balugana lohoi. Vasohuta vaveve katealena lohogeto bae gabie vaveve toela degomole abuna bae lohoi.

⁹“Katealemo la ebia nenigeveve. Ataeabuna la malevei kanisolo kebia nimo otovei kotai. Isi dubue uvue lana di hoto loui ata haivege abuna lahavei. Abuna la holoavei kosive baluga kebia nimo otovege nehane di hoto seleve loui kebia haiveve. ¹⁰Isito vaveve katealeu lohoholisege lana di hoto ko loui ata bahata haivegeto vaveve toela katealena bae lohoi. ¹¹Isi abu la malevei kotalahage lainaho gasigasiai ono vade louveve ke huhulahagelive. Isito vani kela Munana Tumuna bae la hoto ono vade louveve ke mai laovege lana bae ke louve. La hoto louveve keu la hoto holioholinu. Isito Munana Tumue hotoike. ¹²Vani kela ese igae keabuna bae moleho hailahage ataeabuna kebia havei. Ige mamuvuiabe keabuna abu eseho hailahage eseabe kebiata abu mamuvuta neinvutaho katelahage ataeabuna havei. ¹³La di ata holiolemo ataeabuna laheho itumulahi huhuihuhue toela vai. Isito oleuoleu abu evievimo negolahamale keabuna vanie gabila ukolikoli malei.”

Vanie toela seleve

(Matiu 24.15-28; Luka 21.20-24)

¹⁴“Vanie gabila lana bae vaveve nimoletu au lamioholiale kemo lamige bae elehave. Vaveve keu dubumo uoholohialeu dubu kemo uge Diudiaie umale keabuna vaveve ke elehai detuluvisi tanae visoe tai.” (Iale olemeau hoto ko dodaveliege ihuve kaovai.) ¹⁵Vani kela ata oleu au oe dokoe uniege au lako oe vahae au hau maliho talive. ¹⁶Isi ata oleu bulue niege au lako au oe hoilahi au dabae ogo malive. ¹⁷Vani kateimalela keate ese tobute kebia nohovu. Isege keate degomole ese gite maleale kebiata nohovu. Abuna vani kela vaveve toela malei.

¹⁸Guligulilahage elike vaveve katealeu vanie toelamo loho haleito vanie duamo lohoi. Ige elike vanie duamo detuluveve. ¹⁹Vaveve toelau lohoveve kena bae balugataho seleveai. Subuta Dilavau vata vamale kela isi nova vaveve katealebeu velemaholinu. Toela ke igaena lohosege iave keve toela katealebeu bae loholivebene. ²⁰Vani keu lohoge Dilavana au ata tabageveale kebia huhueveve vani ke mai vuguvugutisi. Auna vani ke mai vuguvugutioholige ata bahataeabuna haluvisi.

²¹“Vani kela mesoho lobe ataeau laheho loui kosea, ‘Kelisoike kove lohonu.’ O mesoho loui kosea, ‘Avuike uoke lohonu.’ Kateai louge lainaho hotoeabe evilive. ²²Kosealemo lobe Keliso isi lobe beloveta keabuna bae loholiege vaveve degomoleta vikoe vaveve kebiata vaveve isivai Dilava ata lobogeveve malevei. ²³Vaveve toela keau lohoveve kemoike di la namigeveve isiviale la la ebia nenigeveve.”

Atae Eseu lohoveve vani

(Matiu 24.29-31; Luka 21.25-28)

²⁴“Vaveve toela keau lohoi uoholisege vanie nina bae loasege batana bae vavimo halulivebene. ²⁵Isege otogomo umale onobenobe keabuna kibikibiage didi abuna otogomo keiolahi. ²⁶Keu uoholisege Atae Esena au vuvune balugamo isi au atagamo goe golomo dobai lohoge ata bahatae abuna elehai. ²⁷Ige auna au anelu hanavege abuna tiliege vatae dei abuita abuita keve Dilava ataeau umale kebia malevei.”

Atabe Iesu lohoveve vani hilokaholinu.

(Matiu 24.32-44; Luka 21.29-33)

²⁸Iesu kateai louito tota au esemu namigeveve avoe, “Idi mole vigi ke elehai avuemo lulelelahave. Idi ke numuna keiolahi tota humuige lana ke elehai hilokage vaganau vuguvuguanu. ²⁹Iale ke nahate lana vaveve toela kateale elehaliege hilokage di lohoveve vani vuguvuguai udahae vavamo ua. ³⁰Seleveta di la namigeveve. Nova vata komo uale koeabuna haluviholisege di louale vaveve kebiabuna bahata velehovoi. ³¹Vani kela otogona vatati vesuai. Isito di hotou bae vesualivebene.

³²“Di lohoveve vani ke atabe hilokaholige anelu kebiata hilokaholige data hilokaholinu. Isito di Mama igaeu hilokanu. ³³La di lohoveve ke hilokaholialemo ladeve halevaito hoveveve di lohoveve ke hemei uve. ³⁴Di lohoveve keu koseanu. Ata moleu haeavamoleve taliho igaegaeai au esemu lovi ovege abu o nalisi udaha nalilu. Oe biage keu kateaito au lohoveve vani ke au esemu louholinu. ³⁵Ke nahate laeau di lohoveve vani ke hilokaholilu. Mesoho dana vavimo o vae minamo o kokologuu hotoisege mesoho vae alamo lohoi. Katealemo ladeve halevai nita uve. ³⁶Onoilage la ladevesege di lohoma. ³⁷Di isiviale hoto ke igae loui lata ata bahata kebiata namigeveve. Ladeve halevaito nita uve.”

14

Meliu Betenie Iesu hoesehavonu.

(Matiu 26.1-13; Luka 22.1-2; Dioni 12.1-8)

¹ Vanie ni abuitana uoholisese Diue vahaeho vani mole Basova kena lohoi. Vani kemo abu bae beikini baudau valavamo uale ke ilivebene. Vani keu lohoholisese dubu nalimale kosivea isi Diue menaka loui haivemala keau loboe vavevemo Iesu hamaveve ke humaha kaovama. ² Abu loui avoe, “Nahi vahaehoe vani kemo ma halevai. Onoilage atae abuna ke elehai itumulahai nahie havei.”

³ Kateisege Iesuu Betenie subuta lebolasi male Saimoni ke oe lovi ima. Lovi isege keate moleu kibilamo deholo hagote ibina balugate ke mai lohoale alavoi mai Iesu kinamo ehosivanu. ⁴ Ige ata degomoleau keve uale keau ke elehai itumulahai mole namigevei avoe, “Osiohoike keate keu ibina balugate ke aiohavoi ehosiva kavanu. ⁵ Abege keate keu ke mai voiai kemo moni baluga malei kunaiholimale kebia ovei.” Isi kateai itumue hoto keate keho loulu. ⁶ Ige Iesuu abuhu loui avoe, “Halevave. Lainaho vaveve ke bamulive. Keu daemo vaveve duaiki au ke vanu. ⁷ Kunaiholimale keabuna vani bahata lahehi uge lana bae kebia tedeavegei. Isito dau bae vani bahata lahehi ulivebene. ⁸ Keate keu di hatige abu di mai abavuveve ke hilokaike vaime au huhuale ke vai deholota di vava hoesehavonu. ⁹ Seleveta di la namigevege evive. Oleve keve abuna di hoto loui ata namigevege abuna keate keu vale keta loui ata namigevege abuna keate keu vale keta huhulahagei.”

Iesuu au esemuhi Basova lovi ilu.

(Matiu 26.14-25; Luka 22.3-14; Dioni 13.21-30)

¹⁰ Kateige Iesu esemu mole Diudasi Kaliota keu Iesuho haihao dubu nalimale kosive kebia namigeveho tinu. ¹¹ Ige dubu kosive keau Diudasiu louale ke evisi vahaeholahai ibinaveho moni omiveve loui namihalu. Ige Diudasiu Iesu maveve ke humaha kaovama.

¹² Diue vahaeho vani Basova keu lohonu. Vani kemo abu bae beikini baudata valava mahoale ke ilivebene. Isito abuna vani kela mamoe havei kemo Dilava hoesehavogei. Iale vani kemo Iesu esemuihu belahai avoe, “A isiviage noeabuna oleve keve Basova lovi vage nahi isi.” ¹³ Kateige Iesuu au esemu abuita hanavei namigeve dua vai loui avoe, “Talive Dielusalema keve malaha mole elehage au e bagu ebamoi tige ke ehovai teve. ¹⁴ Talive au o oletemo biloige o ke biage belahai kosea, ‘No haivemale atae loui avoe, Dana di esemuhi a dahoe oe uvu olete loualemo Basova lovi isi.’ ¹⁵ Kateige auna bae o ke ehue uvu mole bevuale ke mai la haivege lana keve nahi Basova lovi iveve ke gadehavove.” ¹⁶ Kateige esemu abuita keau halevai tialeu Dielusalemae Iesuu louale ke nahate elehalu. Isi keve Basova lovi iveve ke gadehavolu.

¹⁷ Iniale gutumo Iesuu au esemu degomolehi loholu. ¹⁸ Lohoaleau lovi isege Iesuu abuhu loui avoe, “Di la namigevema. La moleu daiti lovi imale kena bae di mai atae toela ovege abuna dahavoi.” ¹⁹ Kateai louge esemuiabeau ke evisi uvulahai igaegaeai Iesu belahai avoe, “Danike a ke huhuame hoto ke lounu.” ²⁰ Ige Iesuu namigevei avoe, “La moleu daiti melegi igaemo lovi iale kena bae di mai ata ovei. ²¹ Ige Bukae Hotou louale ke nahate dana hatai. Isito oleu dahoe haiale ata ke nohoma. Abege neinaveu mamoholge duave. Isito neinaveu mamoge au di mai ata oveale kemo auna vatehani baluga malei.”

Iesuu au esemuhi aleto ilu.

(Matiu 26.26-30; Luka 22.15-20; 1 Kolinitu 11.23-25)

²² Iniale abu lovi isege Iesuu valava maime hoesehavoito vakoai au esemu ovei namigevei avoe, “Di misilike ko. Iale ko malei ive.” ²³ Isi tota kabu maime hoesehavoito mai ovege abu uaini ke ilu. ²⁴ Ige Iesuu namigevei avoe, “Di taholike ko. Di tahuu lotige Dilavana ke elehai menakae doge mamoge ataeabuna kemo avuluvuta igaetolahai. ²⁵ Seleveta di la namigevema. Di bae tota vata kove e ko i molealivebene. Isito gabie di Mamae matamae doge keve bae igaetolahai tota uainie doge isi.” ²⁶ Kateai louge abu nogoli louito halevai Oliveta tanae tilu.

Bitau Iesu vovohoveve

(Matiu 26.31-35; Luka 22.31-34; Dioni 13.36-38)

²⁷ Tana keve Iesuu namigevei avoe, “La bahatae abuna di halevai detuluvisi tihatuve. Kosealemo Bukae Hotou loui avoe, ‘Dilavana mamoe nalievemala ke hamage mamoeve abuna detuluvisi igaegaeai.’ ²⁸ Isito auna tota di etuvage dana hovelahai vasohuta Galilie tisege lana bae tiliege keve di elehave.” ²⁹ Ige Bitau namihai avoe, “A esemu degomole ko abuna a halevai. Isito di bae a halelivebene.” ³⁰ Ige Iesuu avuhu loui avoe, “Di louale ko huhuanela. Kokoluguu hoto abuitaholisese ana bae di vovoho abuita igaetai loui kosea, ‘Di ata ke hilokaholinu.’” ³¹ Ige Bitau negoai loui avoe, “Di bae a vovohoveve hoto

ke loulivebene. Halege a hatige dana data hatai.” Kateai louge esemu kebia bahataeau hoto ke igae loulu.

Bulu mole Gesemani

(*Matiu 26.36-46; Luka 22.39-46*)

³² Katelahaito halevai lohoale bulu mole Gesemani keve velehovosege Iesuu au esemu namigevei avoe, “Kove usege di talive guliguliai.” ³³ Kateai louito Bita Diemisi isi Dioni kebia malevei abuhi tilu. Tisege uvuve keu ono vadeu avuemo lohoveve ke huhu balugage avuemo isuanu. ³⁴ Ige au abuhu loui avoe, “Di uvu balugage di uvuu di mai hatihatie humahamo tima. Iale komo ulive lainaho ladevelive. Isito daluvuta nita uve.” ³⁵ Kateai louito tiale iekela au kome bokoai vata bisi holumai Dilava imihai isiviale au vatetumuu avuemo lohoveve ke mai haliohatui. ³⁶ Isi loui avoe, “Mamai, vaveve bahata keau aemo tolohohilu. Iale vatetumuu daemo lohoveve ke mai evihanela. Isito a isivi unaha. A isiviage dana vatetumu ke malei. Isito a isiviholige di bae ke malelivebene.”

³⁷ Kateaito hoilalahi lohoale au esemu abuita igaeta kebia elegevege ladevema. Ige au Bitaho loui avoe, “Saimoni, lana ladevema. Osialemoike la vanie ni igae komo daluvuta nita uoholima. ³⁸ Negobedai nita ui di Mama imihave. Ilive elike vaveve mole toelau laemo lohoge la bae kemo dobuluvilivebene. La uvu keu isiviai nita ui. Isito la vava keu negoholinu.”

³⁹ Kateaito tota halevei tiale iekela guliguliai au subuta loui au Mama imihale ke igae lounu. ⁴⁰ Ke louito hoilalahi lohoale tota au esemu elegevege niabeu hani selevealelua ladevelu. Iniale Iesuu lohoale etuvege abu matilalahi hoto louhohilu.

⁴¹ Ige au tota tiale guliguliai hoilalahi lohoale au esemu elegevege ladevelu. Ige au namigevei avoe, “Lana sohu ladevei uma. Elemua. Malaha neheu di mai atae toela oveveve vaniu lohonu. ⁴² Iale hovevege nahi tai. Elehave. Daho haiale malaha keike uoke lohonu.”

Ataeau Iesu malu.

(*Matiu 26.47-56; Luka 22.47-53; Dioni 18.3-12*)

⁴³ Kateai lousege esemuve mole Diudasi keu lohonu. Ige ata moagaeau avuluvuta lohoale keau benisi matagevei visuta matagevei lohohu. Dubu nalimale kosivea, Diue menaka loui haivemalea isi oe kosive keau louike vage abu Iesu maliho lohohu. ⁴⁴ Ige Iesuho haiale malaha keu subutaike ata moaga kebia namigevei avoe, “Elehalive di talive malaha ke evudei ulikukuhavoge ke mai nalisi lohove.”

⁴⁵ Iniale Diudasiu lohoale velemai inuta tiale Iesu namihai avoe, “Di Kosive.” Isi kateai evudei ulikukuhavonu. ⁴⁶ Ige abu ke elehai Iesu evudei malu. ⁴⁷ Ige Iesu esemu moleu vavavemo lamiale keu au siga mai dubu nalimale kosive baluga ke esemu mole golema heisi etulenu. ⁴⁸ Ige Iesu namigevei avoe, “La huhuige dau vavoloe ata seleve. Ilike vage la di maliho benisita visuta malei lohohu. ⁴⁹ Di vani bahata la dubu baluga keve timale la haivema. Isito osialemoike la keve di mahohilu. Keta duave. Kateige elike Bukae Hotou la vaveve louale ke mai selevetisi.” ⁵⁰ Kateai lousege esemuve bahata keau halevai detuluvisi tilu. ⁵¹ Isege malaha moleu ogo unaha holovale keu abu Iesu mai tisege iavela ehomai tige abu ke elehai isiviale evudei mai. ⁵² Katelahai evudege ogoveu lokolahage au kebia ada koivevi vava unahata detitinu.

Iesuu Kanisolo kebia vudimo laminu.

(*Matiu 26.57-68; Luka 22.54-71; Dioni 18.13-24*)

⁵³ Abu Iesu melavei dubu nalimale kosive baluga ke oe tilu. O keve dubu nalimale kosivea, oe kosivea isi Diue menaka loui haivemalea keau bahata keve igaetolahi ua. ⁵⁴ Iale abu Iesu mai tisege Bitau kebia ialialigevei tiale keu dubu nalimale kosive baluga ke oe ulidae kosive ke esemuhui venehema ugumai uma. ⁵⁵ Kateisege dubue kosivea isi oe kanisolo kebiau bahata isivilahale Iesu vavamo loboe hoto loui hamage au hatai. Isito hamaveve kemo hotobeu uoholinu. ⁵⁶ Kosealemo ata degomoleau hoveveve Iesu vavamo loboe hoto louito deiadaeabe keau molehi igaetohohilu. ⁵⁷⁻⁵⁸ Kateilage ata degomoleau hoveveve Iesu vavamo loboe hoto loui loui avoe, “No evige malaha keu loui avoe, ‘Dana ataeau abu adala dubu houale ko koianiege vanie ni abuita igaetaeau uoholisege tota dubu mole ataeau abu adala hovesite hou i gabiai.’” ⁵⁹ Isi katelahai igaegaeai hoto ke louge hotoeabe keu molehi igaetohohilu.

⁶⁰ Ige dubu nalimale kosive balugau vigoabemo hovelalahi Iesu belalahi avoe, “Ana valive hotoeabe abu loumale ke ibina loui namigevel.” ⁶¹ Kateige Iesuu hotoeabe ibina ke louholisito tobekai uge kosive keu tota belalahi avoe, “Au ana seleveta Dilava mo Keliso.” ⁶² Ige Iesuu namihai avoe, “Ito, ata ke dalike. Iale lana ui tiliege gabie Atae Eseu ehue vuvunete Kosive ke ada inuteve ugulamoito otogo halei goemo dobai lohoge lana

elehave.”⁶³ Ige dubue kosive baluga keu itumuai au ogo edikohai ata namigevei avoe, “Hotove kemo nahi bae ata degomolemo vaveveve kaovalivebene.”⁶⁴ La hotove kemo au Dilava ivi aiohavoaleike la ke evilu. Iale la isiviage nahi avuemo osioi.” Ige abu hamaveve hoto loui namihai avoe, “Keu vaveve toela valemō hamage au hatai.”

⁶⁵ Kateai louge degomoleau avuemo violahai ogo mai nive bamui hamaito namihai avoe, “A huhuige oleike ahamonu.” Ige kosive kebia esemuiau abuta abu adata visuhavolu.

Bitau Iesu vovohonu.

(Matiu 26.69-75; Luka 22.56-62; Dioni 18.15-27)

⁶⁶ Abu kateisege Bitau oe ulidae usege dubue kosive baluga ke esemuve ma moleu heie lohonu. ⁶⁷ Heie lohoale Bitā elehasege venehemo uma. Ige au niavai valitisi avuho loui avoe, “A keu Nasaleta ata Iesuti loviāmale ata.” ⁶⁸ Ige Bitau vovohoi loui avoe, “Ono vadeike a ke louma. Di a hoto louale ke hilokaholinu.” Kateai louito ologove ivie tisege kokologuu hotoanu. ⁶⁹ Ige ma keu tota hoilāhai lohoale Bitā elehai lavisi umale kebia namigevei avoe, “Atave moleike uoke.” ⁷⁰ Kateige Bitau tota Iesu vovohonu. Iniale lavisi umale keau abuta tota Bitā namihai avoe, “A kou Galili ata nahate. Iale no kemo hilokage a keu Iesu esemu mole.” ⁷¹ Ige Bitau Dilava ivi iviloi mai aiohavoi abuhō loui avoe, “La malaha ke loumale ke di hilokaholinu.” ⁷² Kateai lousege kokologuu tota hoto moleanu. Ige Bitau Iesuu avuho louale hoto koseale huhuanu. Avoe, “Kokologuu tota hoto abuitaholisege ana bae di vovoho abuita igaetai loui kosea, ‘Di ata ke hilokaholinu.’” Kateai ke huhuai nina baluganu.

15

Iesuu Bailoti vudimo laminu.

(Matiu 27.1-14; Luka 23.1-5; Dioni 18.28-38)

¹ Vau alamoge vavita dubu nalimale kosivea, oe kosivea, Diue menaka loui haivemālea isi kanisolo ata degomole keau hamaveve hoto loui unuvai mai Bailotie tilu. ² Ige Bailotiu belahai avoe, “Diue kosive anike ko.” Ige Iesuu namihai avoe, “Avuīke a ke lounu.” ³ Kateige dubu nalimale kosive keau Iesu vavevemo loboe hoto loui Bailoti namihalu. ⁴ Ige Bailotiu tota Iesu belahai avoe, “Abu a vavamo hoto moaga loumale ke ana valive hotoeabe ibina ke loui.” ⁵ Kateai Iesuu hotobe louholiale kemo vikoanu.

Abu Iesu hamaliho loulu.

(Matiu 27.15-26; Luka 23.13-25; Dioni 18.39-19.16)

⁶ Vagana bahatamo abu Basova lovi vamale ke vanila Bailotina atae isivi vai dibulamo ata mole iomage au dibula halei tigei. ⁷ Iale vani kemo malaha mole Balabasi keu dibulae ua. Keu ata degomolehi gamanie kosive kebiahi mole havei esemuiabe mole hamage hatiale kemo dibulae ua. ⁸ Bailotiu dibulamo ata iovemale kemo Diue ataeau lohoale Bailoti namihai isiviale au au vamale ke nahate vai. ⁹ Isi kateige Bailotiu belagevei avoe, “La isiviage dana laheho Diue kosive baluga Iesu hanavoi.” ¹⁰ Bailotiu hoto ke loui hilokage dubu nalimale kosive keau Iesu maina mai ilike vaimē mai omilu. ¹¹ Kateige kosive kebiau ata namigevei avoe, “Louge au laheho Balabasi iomage au tai.” ¹² Ige ataeau kateai louge Bailotiu belagevei avoe, “Lana kateige dana la oe nehe ivihai loui kosea, ‘Diue kosive baluga Iesu’ ke osiohavoi.” ¹³ Ige abu baita loui avoe, “Mai idie domo hamage au hatai.” ¹⁴ Ige Bailotiu belagevei avoe, “Osiohoike. Au ono vade toela vanu.” Ige abu baita tota loui avoe, “Mai idie domo hamage au hatai.” ¹⁵ Ige Bailotiu isiviabe vai mai vahaehotievei Balabasi hanavoge tinu. Kateaito Iesu mai tualie ata ovege abu visuhavoi mai hamaho tilu.

Tualie ataeau Iesu hehavolu.

(Matiu 27.27-31; Dioni 19.2-3)

¹⁶ Kateai melavei gamanie o baluga ke uvue tiale tualie ata degomole hohavege abu loholu. ¹⁷ Lohoale keau kosiveau ogo mole tahote hatumale ke mai avuemo holovalu. Isi hote bekabekate mai viliai kinave hanubelu. ¹⁸ Isi kateai abu kosiveho loumale ke nahate vai avuho loui avoe, “Diue kosive baluga, ana duave.” ¹⁹ Isi bedita kinavemo hamai avuemo violahai abu kome bokoai holuavoi hoesehavoma. ²⁰ Isi hehavoale keu uoholige abu ogo tahote ke avuemo elokohai ogove seleve mai avuemo holovalu. Kateai melavei mai hamaho tilu.

Abu Iesu mai idie domo hamalu.

(Matiu 27.32-44; Luka 23.26-43; Dioni 19.17-27)

²¹ Tiale keau humaha tavae Sailini malaha mole Saimoni keluvuta belehovolu. Keu Alekisdame Luvasime mama. Iale keu botoe tiale oe lohosege abu avuho loui iovage au Iesu idie do ebamonu. ²² Katelahai Iesu melavei lohoale vata mole ivi Gologota keve velehovolu. Matama ke ihuu koseanu. Lolokue matama. ²³ Keve velehovoi e mole toela uainita ebuiehale ke mai omisi isiviale au ke ige vateve tumuu uoholisi. Isito Iesuu ke ioholinu. ²⁴ Ige abu mai idie domo hamai ogove malei kasilahai isiviale olemeau kasi kemo negolahale abuna igaegaeai ogove malei. ²⁵ Vavita vanie niu lohoaleu naini (9) okoloki masege abu mai idie domo hamalu. ²⁶ Mai hamaito abu ono vademoike hamale ke hisaliai avoe, “Kou Diue atae kosive baluga.” ²⁷ Isi kateai vavoloe ata abui malevei idie domo havelu. Moleu Iesu ada inuteatave. Isege moleu adave agiteatave. ²⁸ Vaveve keu Bukae Hoto mole mai selevetinu. Hoto keu loui avoe, “Auna vaveve toelate kebia vigomo hatai.”

²⁹ Isege ata benahateau evigevei timale keau tuvikivikilahai bituhavoi avuho loui avoe, “A konike loui kosea, ‘Dana dubu baluga koianiege vanie ni abuita igaetaeau uoholisege tota hou gabiai.’” ³⁰ A ke loualemo bato idie do kemo dobai loho.” ³¹ Ige dubu nalimale kosivea isi Diue menaka loui haivemale keau hehavoi moleho hoto ke nahate loui loui avoe, “Malaha keu ata degomole tedaevege abu dua vai hovedevelu. Isito osiohoike au au ebika hoesehavoi idie do kemo dobai lohoholinu.” ³² Isi moleho loui avoe, “Keu au ebika mai loui avoe, ‘Dau Diue atae kosive baluga Keliso.’ Iale dobai lohoge no bae no uvu mai aemo mavoi.” Ige abu atae toela abuita malei avuluvuta hamale kebiata hotoe toela kateale loui namihalu.

Iesuu hatiale

(Matiu 27.45-56; Luka 23.44-49; Dioni 19.28-30)

³³ Iniale vanie lilimo vata bahatamo vau loa gidualeu tili (3) okoloki masege vaniu tota halunu. ³⁴ Vanie ni ke masege Iesuu au hotomo baita hoai loui avoe, “Eli, Eli, lama sabakatani.” Ke ihuu koseanu. “Di Dilava, di Dilava, osiohoike a di halenu.” ³⁵ Ige ata degomoleau lavisi uale keau ke evisi loui avoe, “Evide. Mesoho au beloveta mole Ilaidiaike au ke hohavonu.” ³⁶ Ige malaha moleu ke evisi solekai tiale ono mole ogomu ke nahate mai uainimo manemei bedita kavitisii isiviale mai Iesu omige au isi. Isi loui avoe, “Bato usege nahi elehage Ilaidiau lohohoi idie domo tedahoge au dobai lohohoi.” ³⁷ Kateisege Iesuu baita kekoaito hatinu.

³⁸ Hatige Diue dubu balugamo abu ogo mole mai oe uvu tumute ke bamuale keu ehula dikolahai tiale heila velemai abuita holinu. ³⁹ Iesuu kateai kekoai hatige tualie kosive moleu Iesu valamo lamiale keu ke elehai loui avoe, “Seleveta ata kou Dilava moike.” ⁴⁰⁻⁴¹ Kateisege keate benahateau Iesuluvuta Dielusalemae lohoale keu iekela lavisi ke elehama. Kebia vigomo Meli Magidaleni, Diemisi mole isi hohove Diosasi kebia neina Meli, isi Salome keau lavisi uma. Keate keau subuta Iesuu Gallie loviage tedahoi avuluvuta lovilahama.

Abu Iesu mai gulialu.

(Matiu 27.57-61; Luka 23.50-56; Dioni 19.38-42)

⁴²⁻⁴³ Iniale bulae ese ke igae gutumo Alimatia malaha mole Diosebba keu vabuoholisito tiale Bailoti namihai isiviale Iesu vava mai guliai. Malaha keu Diue kanisolo ata ivite. Keu Dilavau Iesu hanavoale ke evisi huhuai avoe, “Kona no kosive baluga holiye noeabuna vuvunevemo ui.” ⁴⁴ Isi kateai tiale Bailoti namihage au Iesu hatiale ke evisi vikoanu. Isi au tualie kosive mole hohavoi belahai isiviale evige Iesuu subuta hatige. ⁴⁵ Ige tualie kosive keu Iesuu hatiale deiada ke loui namihage Bailotiu louge Diosebba Iesu vava maliho tinu. ⁴⁶ Tiale ogo voliai Iesu vava mai viliai mai abu munemo guli lovoale kemo abavunu. Isi mune baluga evovoai mai guli ke ili bamunu. ⁴⁷ Kateisege Meli Magidaleni isi Diosasi neina Meli keau au Iesu vava mai abavuale ke elehama.

16

Iesuu gulimo hovelahanu.

(Matiu 28.1-8; Luka 24.1-12; Dioni 20.1-10)

¹ Bulau uoholisege Meli Magidaleni, Diosasi neina Meli, isi Salome keau senisi hagote voilahai isivilahale Sande vavita talive Iesu vava omisi. ² Isi katelahaliae vavita vavita vae hodohodota malei Iesu vutae tili. ³ Tiliale humaha tavae mole namigevei avoe, “Olena nahihho mune baluga ke evovoai.” ⁴ Isi katelahai niiai elehage mune keu vovolovai badive ua. ⁵ Ige abu ke elehai guli ke uvue tiale elehage anelu moleu ogo taete valeu Iesu lovomo ugulamoi ua. Ige abu ke elehai vabu balugalu. ⁶ Ige anelu keu namigevei avoe, “Vabu halevave. Di hilokage abu Nasaleta malaha ke hamale keike la kaovama. Isito Dilavau ke etuvage keu hovelahanu. Iale lohohoi lovove elehave.” ⁷ Kateaito tota

namigevei avoe, “Talive esemuiabeta Bitata namigevei kosea, ‘Iesuu hovelahale auna vasohuta Galilie tisege lana bae tiliege keve elehave.’”⁸ Ige keate keau vabu balugalelua guli kemo bibuluvisi halevai tilu. Keau vabulahalelua atabeho hoto ke louholilu.

Iesuu Melita au esemutaemo velemale

(Matiu 28.9-20; Luka 24.13-53; Dioni 20.11-23)

⁹ Sande vavita ke igaemo hovelahaniale Meli Magidaleni au avuemo munanae toela seveni (7) nunuveale kemo velemanu. ¹⁰ Ige au tiale au Iesu elehale ke loui esemuiabeau avuho ninalahamale kebia namigevenu. ¹¹ Isi Iesuu hovelahage au elehale ke loui namigevege abu hotove ke maholilu.

¹² Iniale vani ke igaemo Iesu esemu abuitaeau humahala tisege Iesuu au elehilehi ke nahate vaholisito toana molemo au esemu abuita kebiamole velemanu. ¹³ Ige abu hoidevei Dielusalemae velehovoi Iesu esemu degomole namigevege abu hotoeabe ke maholilu.

¹⁴ Iniale gabila Iesu esemu leveni (11) kebiau lovi isege au abue mo velemanu. Isi olemeau Iesu elehai abuhu louge abu abu uvu mai avuemo mavoholiale kemo abuhu hoto isute lounu. ¹⁵ Kateaito abuhu loui avoe, “Talive vata bahatae di hotoe dua ko loui ata bahata haiveve. ¹⁶ Ige olemeau di hoto ke evisi abu uvu mai daemo mavoi babatisolahale kebiabuna ukolikoli malei. Isito olemeau abu uvu mai daemo mavoholiale kebia dana vaveveabe toela ke ibina ovei. ¹⁷ Olemeau abu uvu mai daemo mavoale kebia dana di vuvune ovege abuna di ivimo munanae toela nunuvei hoto nimoletemo hoto loui. ¹⁸ Ige ute aihaniteau uagevege abu bae haluvilivebene. Isi mesoho haluvimale e toela hilokaholisito iliege abu bae haluvilivebene. Isi vavahanite kebia tatamo abu ada otovege abuna momolelahai.” ¹⁹ Kateai abuhu louniale uoholige otogoe veatiasi tialeu Dilava ada inuteve ugulamonu. ²⁰ Ige esemuiabe keau vata bahatae tiale ata bahata haivege Iesuu abuhi ui kebia vuvunetiegege abu vikoe vaveve vavege ataeau ke elehai hilokage abu Iesu hoto loumale keu seleve.

Luka

Lukau au haoka Teovilasiho hisialiale

¹ Teovilasi, di haoka, ata moagaeau hoveveve Iesu no vigomo vaveve dua vale ke hisialialu. ² Subuta Iesu esemuiiau ata degomolehi Iesu vaveve elehai ata kebia namigevege abu ke hisialialu. ³ Ige data isiviale deiada ko hisialiai aho hanavoi. Au ivi balugate. Katealemo di Iesu deiadae umuka ke bahata neniai kaovai hisialiai aho hanavoma. ⁴ Iale au ko dodavei bae ihuve bahata ata degomoleau a haivuale ke bahata hilokanela.

Ata babatisogevemale Dioni keu uveve deiada

⁵ Vani mole subuta Elodi keu Diudia vata kemo kosive baluga holisege Diue dubu nalimale ata mole Sekalaia keu ua. Abaisa keu subuta Diue dubu nalimale ata baluga. Ige Sekalaia keu lovive ivi vanu. Mahinave ivilike Elisabeti. Keate ke valadae ivilike Eloni. ⁶ Malaha keu abu mahinati Dilava nimo inutolotoloi uime Kosive menaka ke bahata evisi valu. ⁷ Isito keateve keu esesia. Ilage abu abu ebia holilu.

⁸ Vani mole Sekalaiaiu dubue loviveve vaniu lohoge au tiale dubue Dilava hoesehavoma. ⁹ Diue dubu nalimale atae vaveve keu koseanu. Vani igaegae abuna ata igae ebagevage kena deholo hagote mai tiniage dubue uvue batabata golomo ehosivai mahoge. Abu vani kela Sekalaia ebagevage au Kosive dubue uvue tinu. ¹⁰ Tialeu dubue uvue deholo hagote mahosege ata moagaeau heie guligulilahama. ¹¹ Guligulilahasege anelu moleu Sekalaiaie lohoale deholo mahomale batabatae ada inuteveatae laminu. ¹² Ige Sekalaiaiu ke elehai vabuge uvuue kibikibiai ua. ¹³ Ige anelu keu namihai loui avoe, "Sekalaia, vabu halenela. Dilavau a imiliale ke eviale a mahinana bae ese mai. Ese keu uge ivihai loui kosea, 'Dioni.'" ¹⁴ Vani kela lana bae vahaehoave. Ese keu uge ata moagaeabuna bae vahaeholahi. ¹⁵ Kosealemo kena bae Dilava nimo kosive baluga holisi. Au bae e toela bahata ke ilivebene. Au uale vani kela Munana Tumutena bae uvuvemo holomage auna negoai. ¹⁶ Kena bae Iselala ata moaga malevege abuna tota abu Kosive Dilava ehovai tai. ¹⁷ Kena beloveta Ilaidia vaveve ke nahate vai negoai vuvuneai. Ige hotove kemo eseabuna abu mamuvuhi tota bevuai igaetoai. Kena bae hoto eviholimale ata kebia haivege abuna bae lulele ata holisi vaveve inutolotolote vai. Auna vasohuta tai ata haivege abuna abu vaveve hoesegevege Kosivena lohoi."

¹⁸ Ige Sekalaiaiu anelu ke namihai loui avoe, "Kateige dana oleve kateai. Dau koli holige di mahinata mabata holinu." ¹⁹ Ige anelu keu loui avoe, "Dau di ivilike Geibiliolo. Dau Dilava vudimo umale Dilavau di namihaike vage di hotoe dua ko loui a namihama. ²⁰ Vani mole di hoto louale kena bae velemai. Isito a di hoto eviholinu. Katealemo a bae hotoalivebene. Ana bae uvute nahate valive di louale vani keu lohoge bae hotoanela."

²¹ Sekalaiaiu dubue uvue usege ataeau heie hemei uma. Isi loui avoe, "E, Sekalaia keu tiale dubue uvue osoiome solekai lohoholinu." ²² Kateai lousege Sekalaiaiu heie lohoniale abuhi hotoholige abu huhuige keu dubue uvue tiale vaveve nimolete elehanu. Katealemoike au uvute holisime ada unahata deiada loui haivema.

²³ Iniale Sekalaiaiu dubue loviu uoholige au halei oe tinu. ²⁴ Vani degomoleau uoholisege mahinaveu tobuaima oai tiholisito bata ada mole ke uvumo o unahamo ua. ²⁵ Isi loui avoe, "Vagana moaga di eseholiale kemo Dilavau di tedahonu. Iale ataeau di elehage di eseholiale mati kena uholisi."

Iesu uveve deiada

²⁶ Ke iae bata igae uoholisege Dilavau anelu nehe Geibiliolo hanavoge keu Galili vatae tialeu o mole Nasaletae velemanu. ²⁷ O keve veleimage ma mole Meli keu ua. Ma ke abu Diosebaho kokovalu. Dioseba keu Deividi valadamo lohonu. ²⁸ Ige anelu keu lohoale avuhu loui avoe, "Ana duave. Kosiveu aiti ui a hoesehavoge au nivemo duave." ²⁹ Kateige Meliu hoto ke evisi vikobaluganu. Isi huhuai avoe, "Hoto oleiteike ko." ³⁰ Ige anelu keu avuhu loui avoe, "Vabu hale. Dilavau a eahalenu." ³¹ Ialemo ana bae eseane. Ese keu uge ivihai loui kosea, 'Iesu.' ³² Kena uniege kosi baluga holige Dilava ehue umale kena bae loui kosea, 'Keu di moike.' Dilavana ebagemage auna vatae kosive holisi au haoka Deividu ugulomomale telonamo ugulamoi. ³³ Iale auna bae vani baita Diekoba valada kebia nalievegei. Isi kateige vuvuneve bae ata kebiamo uoholilivebene."

³⁴ Aneluu hoto kateale louge Meliu namihai loui avoe, "Dau koliaholinu. Iale dana oleve kateai eseai." ³⁵ Ige aneluu avuhu loui avoe, "Munana Tumutena aemo dobai lohoge Dilava vuvune kena a bamuge ana ese ke manela. Katealemo Dilavana au mo ke ivihai

kosea, 'Di mo tumuteike.' ³⁶ Ana a neina mole Elisabeti ke hilokanu. Ataeau loui avoe, 'Keu eseholisito mabata holisi ua.' Hoto kateale louito keu tobuta uale aike bata ada mole isi igae uoholinu. ³⁷ Dolodolo halenela. Dilava kemo onobeu bae anekialivebene."

³⁸ Kateige Meliu loui avoe, "Dau Kosive esemu daliko. A hoto bahata louale kena daemo lohoge keu duave." Kateai louge aneluu halei tinu.

Meliu Elisabetie dei ai tinu.

³⁹ Vani kemo Meliu solekai au kunai bevuai malei tanae o moleve Diudia vatae tinu. ⁴⁰ Isime Sekalaia oe tiale mahinave Elisabeti namihai loui avoe, "Ana duave." ⁴¹ Ige Elisabetiu hoto ke evige unive uvue eseveu kibianu. Ige Dilava Munanae Tumuu avuemo lohoaleu mai vuvunetinu. ⁴² Ige Elisabetiu tovuai avuho loui avoe, "Dilavau a ebagemage a keate bahatae vigomo keate baluga. Iale ese kena uge Dilavana ebagemai hoesehavoi. ⁴³ A keu di Kosive neina. Iale a dae dei ai lohoale kou duave baa. ⁴⁴ Di a hoto louale ke evisege di ese unita uale keu kibiai vahaehoanu. ⁴⁵ Iale vahaeho baluga. A hilokage Dilavau aho hoto louale kena seleve holisi."

Meliu vahaehoale dei ada

⁴⁶ Kateige Meliu avoe,

"Di di uvumo vahaehoai di Kosive hoesehavoma.

⁴⁷ Dilavau di tedahomale kemo di vahaeho baluganu.

⁴⁸ Dau Dilava nimo iviholinu.

Isito keu di huhuanu.

Nova komo ata bahataebuna loui kosea,

'Dilavau keate ke hoesehavonu.'

⁴⁹ Kosealemo Kosive ivi balugate keu dahoe vaveve baluga vanu.

Ivive keu tumute.

⁵⁰ Katealemo oleuoleu Dilava vabuhavoge uvuvena abuemo ui.

Ige auna vani bahata kebiata eseabeta tetaevegei.

⁵¹ Ige adave keu vaveve negote vanu.

Isime auna oleuoleu abu ebika tabagevaho huhuimale kebia huhuihuhui bahata malei evihai.

⁵² Keu vatae kosive baluga kebia tatolemagevenu.

Isito au ata uvevete kebia tabagevenu.

⁵³ Keu lovie dua ata vaete kebia ovege uniabeu hanilahalu.

Isito ata kunaite kebia iovege abu ada unahala tilu.

⁵⁴ Dilavau au ata Iselala tetaevenu.

Au kebia haleveholisito kebiaho uvuale kemo au tetaevenu.

⁵⁵ Kosealemo Dilavau subuta nahie buluveho lounu.

Isi Ebalahamuho loui avoe,

'A valada isi a ese kebia dana vani bahata huhuevei hoesegevegei.'

⁵⁶ Meliu hoto kateale louime Elisabeti oe uale bata abuita igaetaeau uoholisege au halei au oe tinu.

Dioni uale dei ada

⁵⁷ Vani mole Elisabeti eseu uveve vaniu lohoge moveu ua. ⁵⁸ Moveu uge valadaeabeau isi haokuvuiabeau ke evisi vahaeho balugalu. Abu hilokage Dilavaike keate ke huhuaimae ese ke mai ominu.

⁵⁹ Bula igaau uoholige haokuvuiabeau lohoale mo ke hoesehavoi vudive vate etulei isiviale ataeau kemo hilokage keu Ebalahamu valadae ese. Kebia vaveveu kateanu. Vateve etulege uoholige abu isiviai mamave Sekalaia ivita ivihai. ⁶⁰ Isito neinaveu loui avoe, "Kate halevave. Iviveike Dioni." ⁶¹ Kateai louge abu keate keho loui avoe, "Au a valada kemo ivi katealebeu uoholinu." ⁶² Isi kateaime abu ada unahata deiada mamave haivuma. Isiviale mamave ivi oleteale mo ke ivihai. ⁶³ Kateige au adamo beba mai omiveve tovetove vanu. Ige abu beba mai omige au hisaliai avoe, "Iviveike Dioni." Kateige abu ke elehai viko balugalu. ⁶⁴ Kateisege solekavesite Dilavau Sekalaia ai alavoge au hotoai Dilava hoesehavonu. ⁶⁵ Ige haokuvuiabeau ke elehai vabu balugalu. Ige ataeau Diudia tanae uale keu bahata hoto ke evilu. ⁶⁶ Ige ata bahataeau ke evisi huhulahai avoe, "Ese kena bae vadeai." Isime abu hilokage Kosive adae vuvuneu ese kemo ua.

Sekalaia au mo Dioni vaveve lounu.

⁶⁷ Dioni mama Sekalaia keu Dilava hoesehavosege Munana Tumuteu uvuvemo holo-mage au gabie velemaeve hoto lounu. ⁶⁸ Isi loui avoe,

"Nahi nahie Kosive hoesehavoi.

Keu Iselala ata nahie lohoale isiviai nahie vatetumumo nahie tetaevei malevei.

69 Kosealemo keu nova au esemu Deividi valadamo nahie toelamo nahie maleveveve ata negote ebagemanu.
 70 Subuta mole Dilavau hoto kateale loui au beloveta tumute kebia namigevenu.
 71 Au louale auna nahie aiogevemale ata kebia isi nahiho itumulahamale ata kebia adamo nahie tedaavei.
 72 Au subuta nahie buluveho loui mamoaale ke auna huhuai nahiho uvuai nahie tedaavei.
 73 Ke nahate au subuta nahie buluve Ebalahamu keho hoto tumute lounu.
 74 Au hoto tumute louale kemo auna nahie aiogevemale kebia adamo nahie tedaavei. Auna nahie tedaavege nahiabuna vabuholisito lovive vai.
 75 Isime ata tumute holisi vani bahata Kosive nimo vaveve inutolotolote vagei. Dilavau hoto loualeu kemo kateai ua.
 76 Iale di mo, ataebuna ahoe loui kosea, 'Dilavau ehue umale ke beloveta alike.'
 Iale ana vasohuta tai Kosive humaha elulumasege auna bae lohoi.
 77 Ana bae Kosiveu toelamo au ata maleveve hoto louge abuna bae abu vaveve toela halevege Dilavana kebia toela ulihai.
 78 Kosealemo nahie Dilava keu uvue Dilava. Keu nahiho uvuai nahie tedaevema.
 Iale vau alamoale ke nahate Kosive atagana nahiemu halui.
 79 Nahiemu haluge oleuoleu vavie vaveve vamale kemo haluviho vasege Kosivena kebia holoevege abuna uveve duae humahala tai."
 Sekalaia hotou kemo kateai ua. ⁸⁰ Igeto moveu balugai kosi holisege uvuveu negoige au o halei botoe tialeu ataeau uvesite keve ua. Keve uniale vani moleu lohoge au lohoaleu Iselala ata haivenu.

2

Iesu uale deiada (Matiu 1.18-25)

¹ Dioni uale vani keve Loma kosive baluga Ogasita keu menaka mole mamoi isiviale ata bahataeau gamanie buka baluga kemo abu ivi otovei. ² Ogasita keu menaka ke mamosege Kuliniasi keu Silia vata ke kosive. ³ Menaka keu loui avoe, "Ata bahataebuna abu vavivue oe hoidevei talive abu ivi otovei." ⁴ Menaka keu kateige Nasaleta malaha mole ivi Dioseba keu Galili vata halei lohoale Diudia vatae velemanu. Vata keve valadave Deividi ke ou ua. O ke ivilike Betelihamu. ⁵ Iale Diosebau abu keate kokovale keti tiale o keve velehovolu. Tiale keau au ivita Meli ivita buka balugamo otovelu. ⁶ Keate keu tobuta tiale Betelihamue usege eseveve vaniu lohonu. ⁷ Ige ladeveve ou uoholige abu tiale ovoe oe usege move ovokinaveu ua. Ige au ogo mai viliai mai ovoeau lovi imale batabata ke golomo lahoenu.

Anelu isi mamoe nalimale ata

⁸ Vavi kemo ata degomoleau ovo nalimale keau o ke vavae abu mamoe nibievema. ⁹ Isege Dilava anelu moleu abue lohoge Kosive atagau abuemo halunu. Ige abu vabu balugatahoalu. ¹⁰ Isito anelu keu namigeveve loui avoe, "Vabu halevave. Di hotoe duaika mai laheho lohonu. Iale ata bahataebuna hoto ke evisi vahaeho balugai. ¹¹ Hotoe dua keu koseanu. La toelamo la tedaaveve ata, keu nova Betelihamue ua. Keu la Kosive baluga Keliso. ¹² Iale lana oleve kateai di louale ke hilokai. Talive abu ogota ese ke viliai mai batabatae golomo lahoale ke elehave."

¹³ Hoto keu uoholisege solekavesite anelu moagaeau otogo halevai lohohiale anelu keti nogoli loui Dilava hoesehavoma. ¹⁴ Abu loui avoe, "Nahi otogoe Dilava ivi balugate ke hoesehavoi ivive ebagevai. Kosealemo auna vata komo uveve dua au isivie ata kebia ovei."

¹⁵ Aneluaui kateai louito halevai ehue tilu. Isege mamoe nalimale keau moleho loui avoe, "Bato lohoge nahi Betelihamue talive Kosive esemuu louale vaveve ke elehai."
¹⁶ Kateai louito halevai bibuluvisi tilialeau Meliu Diosebati uale ke kaovalu. Isi tialeau elehasege ese neheu iene batabata golomo lahai ua. ¹⁷ Ige mamoe nalimale ata keau lohoale ese ke elehai anelue hoto ke loui ata namigeveve. ¹⁸ Ige ata bahata keau mamoe nalimale hotoe deiada ke evisi vikolahalu. ¹⁹ Isito Meliu tobekai ui hoto ke gaeahavoi ke huhuima. ²⁰ Ige mamoe nalimale keau hoideveve abu oe tiale keau nogoli loui Dilava hoesehavoma. Kosealemo abu anelu louale ke evisi ke bahata elehalu.

Abu Iesu ivihalu.

²¹ Bula igae uoholige abu vuvie vate etuleveve vaniu lohoge abu ivihai loui avoe, "Iesu." Kosealemo neinaveu tobuholisege aneluu ivive kateale mamonu.

Abu Iesu mai dubue tilu.

²² Vani moleu lohoge Diosebau abu keateti Dielusalemae tilu. Abu isiviale Mosese menakau louale ke vai abu ebika hoesegeveime ese mai Kosive nimo mavoi isiviale au Kosive ata tumute holisi. ²³ Kosive menakamo keu loui avoe, “Oleme ese ovokinau uge abu mai Kosive omige au Kosive ata tumute holisi.” ²⁴ Vaveve kateale valiho valiege vasohuta abuna mesoho imutava abuita mesoho kelea abuita malei dubue mahoi abu ebika hoesegevege valive Kosiveu hoesegevei eseabeta hoesehavoi. Kosive menaka keu kateai lounu. ²⁵ Vani kela malaha mole Dielusalemae uale iviveike Simioni. Malaha keu malahae dua. Dilava vabuhavomale malaha. Keu vani baita Iselala tedaeveve ata ke hemei uma. Ige Munana Tumuteu avuemo ua. ²⁶ Isime namihai loui avoe, “Ana uniege Dilavau Iselala ata tedaeveve Keliso ke hanavoge elehaito bae hatinela.” ²⁷ Katealemo Munana Tumuteu Simioni melamege au Diue dubu balugae tinu. Isege Diosebau Meliti abuta Iesu mai dubue menaka neheu louale ke nahate valiho lohohu. ²⁸ Ige Simioniu Iesu mai evudei Dilava hoesehavonu. ²⁹ Au imihai loui avoe, “Di Kosive, dau a esemu.

A di namihale ke nahate di a ese ko elehanu.

Iale dana nova bae uvue duamo hatai.

³⁰ Di di nitela Iselala tedaeveve ata ko elehanu.

³¹ A ata ko hanavoge lohoale ata bahatae abuna elehai.

³² A hanavoge lohoale kou atagae ata.

Iale atagavena vatae ataemo atagage abuna humahave elehai.

Isi Iselala ata kebiatamo atagage abuna vuvune baluga malei.”

³³ Simioniu hoto kateale louge ese ke mamau neinaveti ke evisi viko balugalu. ³⁴ Ige Simioniu hoesegevei neinaveho loui avoe, “Dilavau ese ko ebagemage Iselala ata degomole abuna hotove evige auna hoesegevei. Isito Iselala ata degomole abuna hotove eviholige auna aioevei. Keu Dilava vaveveike. Iale ataeabuna itumuai bae avuho lougei. ³⁵ Ige Dilavana bae uvuiabeta huhuihuhuiabe keta hilokai. Iale Meli nohoma. Vaveve toela katealeu lohohi a uvu ke bige kibikibiage ana bae ke huhuai uvuige.”

³⁶ Simioniu hoto kateale loualeu gabiho vasege belovetae keate mole Ana keu lohonu. Ige Mamave ivilike Banuelo. Keu Asa valadamo lohonu. Keate keu koliale abu koliati uale vagana ada mole isi abuitaeau uoholisege koliaveu hatinu. ³⁷ Isege au gobu holisi ualeu vagana eiti voa (84) uoholinu. Keu mabata seleve. Iale keu vani baita dubu haleholima. Isito vanimo vavimo auna dubue uvue ui Dilava hoesehavogei. Iniege vani mole gulgulihohu vaniege au bae lovi ilivebene. Isito auna gulgulihohu huhuai loui avoe, “Au keate nehe keu ese ke elehame Dilava hoesehavonu. Isime Dielusalemae ata namigevei avoe, “Nahie tedaevei nahie maleveve ataike ko.” ³⁹ Kateai louge Dilava menakau louale ke nahate abu bahata vage uoholige Diosebau abu mahinati halevai hoidevei Galili vatae tiale abu o seleve Nasaletae ua. ⁴⁰ Keve velehovoi usege Iesuu ihunivesite lamisi au ebia holisi negoanu. Ige luleleveu avuemo balugage Dilavau hoesehavoi avuti ua.

Iesuu mohohota dubue tinu.

⁴¹ Vagana bahata Iesu mamana neinaveti Dielusalemae Basovae lovi iliho tigei. ⁴² Kateimalela Iesu vaganau tueloisege (12) abu halevai lovi ke iliho Dielusalemae tilu. ⁴³ Ke ige uoholige mamaveu neinaveti hoidevei oe tisege Iesuu Dielusalemae ua. Isito mamaveu neinaveti ke hilokaholilu. ⁴⁴ Ige abu elehaholisime huhuai loui avoe, “Au elemo mesoho ata ko moaga uvue lohoma.” Isi kateai vani kemo halevai tilu. Tiale keau gutumoike abu bae humaha tavae haokuvuiabe belagevelu. ⁴⁵ Belagevege Iesu uoholige abu hoidevei Dielusalemae tota kaovaho tilu. ⁴⁶ Kaovalage vani abuita igaeta uoholige abu Diue dubu baluga uvue tiale elehage au Iselala ata haivemale baluga kebua vigomo ugulamoi ui hotoeabe evisi belagevema. ⁴⁷ Ige keau namihage au hotoeabe haliko kemo baita luleleage ataeau ke evisi vikolahalu. ⁴⁸ Kateisege mamaveu neinaveti ke elehai tetelalahu. Ige neinaveu namihai avoe, “Di mo, a vadeulike ko noemo vama. Ige no a mamati a huhuai aho uvulahai a kaovama.” ⁴⁹ Ige Iesuu namigevei loui avoe, “La vadeuhoike di kaovama. Lana hilokaholilu. Dau di Mamae oe uvue ui lovive vale keu duave.” ⁵⁰ Isito au abuhu louale ke keau ke hilokaholilu.

⁵¹ Ige Iesu abuhi hoilalahi tota Nasaletae tinu. Tialeu hotoeabe evisi abu louale ke vama. Ige neinaveu vaveveve kateimale au uvumo huhuima. ⁵² Ilage Dilavau elehage ataeau abuta elehage Iesuu kosi holige vaveveveve negoige luleleu avuemo baluganu.

3

*Ata babatisogevemale Dioniu loviemale deiada
(Matiu 3.1-12; Maka 1.1-8; Dioni 1.19-28)*

¹ Vani moleu lohoge Loma kosive baluga Taibeliosi keu vagana vivtini (15) ke uvumo vatae kosive baluga holinu. Isege Botiasi Bailoti keu Diudia vatae kosive holinu. Isege Elodi keu Galili vatae kosive. Isege hohove Bilibi keu Itulia isi Talekonaita vata kebia nibievema. Isege Lisianisi keu Abilini vata ke kosive. ² Isege vani kemo dubu nalimale kosive abuitaeau ua. Iviabeike Anasi isi Kaiabasi. Kosive katealeau usege vani kemo Dilavau Sekalaia mo Dioni botoe umale ke namihanu. ³ Ke namihage au tialeu e mole Diodani ke vavae matama igaegaela ata haivei loui avoe, “La vaveve toela ke halevai hoidevei babatisolahave. Ige Dilavana la vaveve toela ke ulihage auna uoholisi.” ⁴ Iale Dioni vaveve keike beloveta mole Aisaiau subuta loui hisaliai avoe,

“Ata molena bae ataeau uvesiteve hoai kosea,

‘Kosiveho humaha ke inuta loive.

Isi au tiveve humaha ke inuta vave.

⁵ Loho ke omisi vealuvive.

Isi hevaha ke lovoi omisi hevaluvive.

Isi ke hoesehavoage au inutolotoloi.

Humahau keukakeukage ke inutolotolohavove.

Isi humahae toela keta hoesehavove.

⁶ Katealemo ata bahataebuna Dilavau toelamo ata maleveveve ke elehai.’ ”

⁷ Ata moagaeau Dionie lohohoi isiviale au babatisogevei. Isito Dioniu namigevei avoe, “La keau ute nahatea. Laeau isiviholilu Dilava itumuu lae lohohilo. Isito la hoidevei Dilava ehovaholilu. Katealemoike Dilava itumuu laemo lohoma. ⁸ Iale vasohuta la vaveve toela halevai vaveve dua vave. Isi kemo bae babatisolahave. Isi lainaho huhulahai kosea, ‘Noeau Ebalahamu valada noeabuliko. Iale Dilava itumu keu bae noemo lohoholivebene.’ Di la namigevege evive. Dilavana isivianiege mune kobiamo Ebalahamu valada degomole vaveve abuna la lovomo ui. ⁹ Soeu idie umukamo heiloho hemei ua. Iale idi oletena baioholige auna idi ke heisi mai venemo mihatuge auna lahai.”

¹⁰ Kateai louge ataeau loui avoe, “Iale noeabuna vadeai.” ¹¹ Ige Dioniu namigevei avoe, “La oleuleu ogo abuiabualiege mole mai ogoholiale ke omive. Isime la oleu lovi balugau avuemo uge degomole malei lovioholiale kebia oveve.” ¹² Kateige takesi moni malemale ataeau Dioniu babatisogeveho avue lohohu. Isi namihai avoe, “No haivemale ata, noeabuna vadeai.” ¹³ Ige au loui avoe, “Lainaho vavolo nahate valive. Gamaniu takesi loumale moni ke unaha maleve.” ¹⁴ Kateige tualie ataeau Dioni namihai loui avoe, “Isege noeabuna vadeai.” Ige keu loui avoe, “Lainaho bae ata havei moniabe malelive. Isi lainaho ata molemo loboe hoto loui moniabe malelive. Lainaho la ibina ke elehai kabebilahalive.”

¹⁵ Kateige vani kemo ata bahataeau Dioni hoto maime loui avoe, “Mesoho ata kou nahie ata tedeaveve Kelisoike ko.” Kateai louime ke kaovai molehi hotohotolahama. ¹⁶ Ige Dioniu kebia bahata namigevei loui avoe, “Dana emo la babatisogevei. Isito ata mole baluga di evihale keu aike lohoma. Di baluga hohioholialemo tamakave iamoveve keu daemo anekianu. Eu kosive. Isege dau valave. Iale auna Munana Tumuteta veneta la babatisogevei. ¹⁷ Iale ata kena lohoniege au keilota laisue i bisi kitoai hatuge momoluve abuna moleve keiolahasege ive abuna moleve keiolahai. Ige auna laisue i malei au valahumo otoveito momoluve ke malei veneu hodovavesite kemo mahoevei.”

¹⁸ Dioniu hotoe dua moaga kateale loui ata haivenu. ¹⁹ Isi gamanie kosive Elodiho hoto tolotolounu. Kosealemoike Elodiu au hohoe mahina Elodiasi ke etulei melamenu. Isi vaveve toela degomoleta vaevenu. ²⁰ Vaveve toela moaga vaveveito ke golomo Dioni mai dibulae hanavonu.

Iesuu babatisoale deiada

(Matu 3.13-17; Maka 1.9-11)

²¹ Au mai dibulae hanavoholisege Dioniu ata degomole babatisogevevnu. Isi Iesuta babatishavonu. Ige Iesu hovelahai lamisi guliguliasege otogou dikolahanu. ²² Ige Munana Tumuteu imutava ke nahate holisi dobai lohoaleu avuemo ua. Isege hoto moleu otogomo dobai lohoaleu loui avoe, “Au di uvue mo seleve. Iale di a vahaeho va baluganu.”

Iesu valadae deiada

(Matu 1.1-17)

²³ Iesu babatisomale vani kela vaganaveu teti (30). Ige ataeau huhulahai avoe, “Iesu keu Dioseba mo.” Isito ke mama seleveike Dilava.

Ige Dioseba mamaike Heli.

²⁴ Ige Heli mamaike Matati.

Ige Matati mamaike Livai.

Ige Livai mamaike Meliki.

Ige Meliki mamaike Dianai.
Ige Dianai mamaike Dioseba.
²⁵ Ige Dioseba mamaike Matataiasi.
Ige Matataiasi mamaike Emosi.
Ige Emosi mamaike Nahumi.
Ige Nahumi mamaike Esili.
Ige Esili mamaike Nagai.
²⁶ Ige Nagai mamaike Meati.
Ige Meati mamaike Matataiasi.
Ige Matataiasi mamaike Semeni.
Ige Semeni mamaike Dioseki.
Ige Dioseki mamaike Dioda.
²⁷ Ige Dioda mamaike Dioanani.
Ige Dioanani mamaike Leisa.
Ige Leisa mamaike Selubabeli.
Ige Selubabeli mamaike Siatieli.
Ige Siatieli mamaike Neli.
²⁸ Ige Neli mamaike Meliki.
Ige Meliki mamaike Adi.
Ige Adi mamaike Kosami.
Ige Kosami mamaike Emadami.
Ige Emadami mamaike Eli.
²⁹ Ige Eli mamaike Diosua.
Ige Diosua mamaike Eliesa.
Ige Eliesa mamaike Diolimi.
Ige Diolimi mamaike Matati.
Ige Matati mamaike Livai.
³⁰ Ige Livai mamaike Simioni.
Ige Simioni mamaike Diuda.
Ige Diuda mamaike Dioseba.
Ige Dioseba mamaike Dionami.
Ige Dionami mamaike Eliakimi.
³¹ Ige Eliakimi mamaike Melea.
Ige Melea mamaike Mena.
Ige Mena mamaike Matata.
Ige Matata mamaike Natani.
Ige Natani mamaike Deividi.
³² Ige Deividi mamaike Diesi.
Ige Diesi mamaike Obedi.
Ige Obedi mamaike Boasi.
Ige Boasi mamaike Salemoni.
Ige Salemoni mamaike Nasoni.
³³ Ige Nasoni mamaike Aminadabu.
Ige Aminadabu mamaike Alamu.
Ige Alamu mamaike Heseloni.
Ige Heseloni mamaike Belesi.
Ige Belesi mamaike Diuda.
³⁴ Ige Diuda mamaike Diekobo.
Ige Diekobo mamaike Aisiki.
Ige Aisiki mamaike Ebalahamu.
Ige Ebalahamu mamaike Tela.
Ige Tela mamaike Nahoa.
³⁵ Ige Nahoa mamaike Seluki.
Ige Seluki mamaike Leu.
Ige Leu mamaike Beleki.
Ige Beleki mamaike Ebeli.
Ige Ebeli mamaike Sala.
³⁶ Ige Sala mamaike Keinani.
Ige Keinani mamaike Avasadi.
Ige Avasadi mamaike Semu.
Ige Semu mamaike Noa.
Ige Noa mamaike Lameki.

³⁷ Ige Lameki mamaike Metusala.
 Ige Metusala mamaike Inoka.
 Ige Inoka mamaike Dieleti.
 Ige Dieleti mamaike Mahalaleli.
 Ige Mahalaleli mamaike Keinani.
³⁸ Ige Keinani mamaike Enosi.
 Ige Enosi mamaike Seti.
 Ige Seti mamaike Adamu.
 Ige Adamu mamaike Dilava.

4

Seteneu Iesu lobo-havoale deiada
(Matiu 4.1-11; Maka 1.12, 13)

¹ Iesuu Diodani e halei tige Munana Tumuteu avuemo baluganu. Avuemo balugai melamei ataeau uvesite keve tinu. ² Tiale keu keve usege Seteneu lohoale vani voti (40) ke uvumo lobo-havoi isiviale elehage Iesuna kemo dobai o negoai. Keu vani ke ni bahatamo lovi iholialemo vae baluganu.

³ Ige Seteneu avuho loui avoe, "A Dilava mo holinege mune ko namihage au beleidi hohige inela." ⁴ Ige Iesuu namihai loui avoe, "Bukae Hotou loui avoe, 'Atabeu bae lovi unaha ke isi kemo negoalibene.'"

⁵ Katege Seteneu tota melamei tanae tiale solekavesite vata bahata mai haivunu. ⁶ Isi loui avoe, "Dana vata ko bahata mai aoge ana kemo vuvune baluga mai bae kunai moaga malenela. Dilavau louge vata ko bahata di vata. Kunai keta di kunai. Iale dana mai di isivie ata omige auna malei. ⁷ Iale ana a kome bokoai vata bisi di hoesehavoage dana ke bahata malei aomai." ⁸ Ige Iesu namihai avoe, "Bukae Hotou loui avoe, 'A Kosive Dilava ke igae hoesehavoi isivive unaha vanela.'"

⁹ Katege Seteneu tota Iesu melamei Dielusalemoe tinu. Tialeu Diue dubu baluga ke kobola lavihovosege Seteneu loui avoe, "A Dilava mo holinege komo lamisi biloa. ¹⁰ Kosealemo Bukae Hotou loui avoe, 'Dilavana au anelu hanavege abuna a nibisi a hoesehavoi.' ¹¹ Hoto keu tota loui avoe, 'Anelu abuna a evudei. Ige a bae dobai munemo a ebika hamalibene.'" ¹² Ige Iesu hotove ibina avuho loui avoe, "Hoto seleveike. Isito Bukae Hotou tota loui avoe, 'Lainaho heiata la Kosive nego ke kaovalive.'" ¹³ Ige Seteneu hoto kateale loui Iesu lobo-havoage uohohige au halei tinu. Isiviai talive ukaukaito tota avue lohoi.

Iesuu vasohuta au lovie uli vale
(Matiu 4.12-17; Maka 1.14-15)

¹⁴ Iale loboave vaveve keu uohohige Iesuu halei Galili vatae tinu. Keve tiale Munana Tumute vuvunemo ua. Ige au vamale ke hotou vata ke bahatae tinu. ¹⁵ Ige au tiale dubuiabemo ata haivege abu bahata hoesehavolu.

Iesu ataeau Iesu kabebihavolu.
(Matiu 13.53-58; Maka 6.1-6)

¹⁶ Vani mole Iesu hollahai tiale Nasaletae au esebuluta uale keve velemanu. Vani bahata balau lohoge auna tiniage gulguliagei. Iale bula kemo au tiale dubue lamisi isiviai Bukae Hoto dodavei. ¹⁷ Katege abu beloveta Aisaia buka mole mai omilu. Ige au buka ke mai vavehai iviganiai dodavei tinu. ¹⁸ Dodavei avoe, "Dilava Munanau daemo ua.

Au di ebagemage dana hotove dua loui kunaiholimale kebia haivei.

Au di hanavoage dana tiniage vaveveabe toela kemo iovege abuna ke halevai.

Au di hanavoage ni kedute keabuna bae nilahai elehai.

Au di hanavoage dana olemeau uvu unahamo umale kebiata hoesegevei.

¹⁹ Au di hanavoage dana ataho loui kosea, 'Kosivena bae aike la hoesegevei la tedaavei.'"

²⁰ Hoto ke dodavege uohohige au buka mai dubue ata mole omisito ugumanu. Ige ata bahatae au tobekai nibisi ua. ²¹ Ige Iesu namigevei abuhu loui avoe, "Di hoto dodavege la eviale keu nova velemanu." ²² Hoto kateale louge abu hotoe dua ke evige uvuiabeu teteau. Isi vikolahai loui avoe, "Dioseba monike. Au oleve kateai hoto ke manu." ²³ Ige Iesu abuhu loui avoe, "Di hilokage la hoto kosealeike dahoe louliho. 'Au vavahanite hoesegeve male ata. Iale a ebika hoesehavonela.' Mesoho lana tota daho loui kosea, 'A Kabenumu oe vaveve ni molete vale ke nahate a vata seleve kove kateale vanela.' La la uvumo hoto kateale huhulahama. ²⁴ Isito di la namigevege evive. Beloveta ata kena

au vata kemo hoto louge atave seleve keau bae hotove evilivebene. ²⁵ Dana kemo hoto mole loui. Subuta mole llaidiau usege veniu lohohiale vagana abuuta igaeta isi bata ada mole isi igaau uoholinu. Katealemoike vata ko bahatamo loviu uoholige vae balugau lohonu. Kateimale vanila Iselala gobuvu moagaeau vata kove ua. ²⁶ Isito kebiaho Dilavau llaidia hanavoholinu. Ke hanavoge vata mole Saidoni keve tiale Salebeta oe gobu mole tedahonu. ²⁷ Subuta vani kela Iselala ata moagaeau vavahani mole lebolasi ke malu. Isito beloveta llaisau kebia tedaeveholinu. Isito Silia kosive mole Neimeni ke igae tedahoge au momoleanu.” ²⁸ Iesu hoto isute kateale louge ata bahataeau dubue uvue ke evisi avuho itumu balugalu. ²⁹ Isi kemo hovedevei Iesu kabitisi isiviale mai oe iae seikamo mihatui. ³⁰ Isito Iesuu ata bahatae edekaeabemo vелеmai tinu.

*Malaha mole munana toelate
(Maka 1.21-28)*

³¹ Iesuu matama ke halei Galili vatae o mole Kabenumue tiale keve bulamo ata haivenu. ³² Ige abu Iesuu louale ke evisi vikolahalu. Kosealemo hoto keu vuvuneanu. ³³ Ige dubu ke uvue tilogoe malaha moleu baita hoai kekoanu. ³⁴ Kekoai loui avoe, “Iesu Nasaleta ata, no halevei tenela. Ana no aiogevelihonike kove lohonu. Di hilokage au Dilava mo tumute.” ³⁵ Ige Iesuu munanae toela ke namihai loui avoe, “Hoto halei malaha ke halei tenela.” Kateige munanae toela keu malaha ke laluvai mai vudiabemo vata hamanu. Isi ata ke halei tige au dua vanu. ³⁶ Ige ata bahataeau vikolahai moleho loui avoe, “E, hoto onoleiko. Malaha kou au vuvunemo munanae toela kebiaho baita louge abu halevai tima.” ³⁷ Iale Iesuu vamale hoto keu vata ke bahata sonumai tinu.

*Iesuu ata moaga hoesegevenu.
(Matiu 8.14-17; Maka 1.29-39)*

³⁸ Iesu hovelahai dubu halei Saimoni oe tinu. Tiale keu Saimoni meu hobe balugale ke abu loui Iesu namihalu. ³⁹ Ige Iesuu tiale vavavemo lamisi vavahanive ke hotohavoge uoholinu. Ige keate keu solekavesite hovelahai lovi vai ovenu.

⁴⁰ Gutumo vaniu dobasege ataeau haokuvuiabeau vavahaniamale kebia malevei Iesue lohohu. Ige Iesu au ada mai igaegae kebia golomo mamoge abu bahata momolelahalu. ⁴¹ Isime munanae toela moaga kebia nunuvege abu kekolahai loui avoe, “Au Dilava mo alike ke.” Kateai lousege Iesu hotoeabe bamunu. Kosealemo abu hilokage Dilavau ke hanavoge keu ata tedaeveve Keliso holinu.

⁴² Vani mole vau alamosege Iesuu o halei ataeau uvesiteve tinu. Ige ataeau kaovalata bae elehalu. Ke elehai namihai loui avoe, “Ti haleito no o komo unela.” ⁴³ Isito Iesu namigevei loui avoe, “Dilavau di hanavoalemo dana o benahateve tinioge ataeau Dilava adae vuvunemo uveve hoto ke loui ata haivei.” ⁴⁴ Kateai louime halei tiale Diudia vata ke bahatae dubuiabemo ata haivenu.

5

*Iesuu au esemu degomole hohavenu.
(Matiu 4.18-22; Maka 1.16-20)*

¹ Vani mole Iesuu tiale tabu mole Genesaleti esagate laminu. Keve lamisege ata moagaeau Dilava hoto eviliho lohoale molemo neniholilu. Isi Iesu kabitige au lamiveve humahau uoholinu. ² Kateisege huena malemale keau bouti abuuta malei esagamo otovei abu ugabi malei totoisege Iesuu kebia elegevenu. ³ Ige Iesuu ata mole Saimoni ke boutimo biloai Saimoni namihai loui avoe, “Aike esagamo ko hanavoge au e goloe tikatikai.” Kateaito golovemo ugulamoi ata moaga kebia haivenu.

⁴ Ata moaga kebia haivege uoholige au Saimoni namihai loui avoe, “Bouti ko hanavoge au tota e ni seleve tai. Isime la ugabi malei hatui huena moaga maleve.” ⁵ Ige Saimoni loui avoe, “No baluga, no nova vavi ko bahatamo e maholata huenabe maleholilu. Isito a loualemo noeabuna ugabi tota emo hatui.” ⁶ Kateai louito abu ugabi malei hatulu. Ige huena moagatahoeau ugabiabemo tobalohoge ugabiu dikolahaho vekeanu. ⁷ Kateige keau bouti mole keve abu haokuvu hohavei loui avoe, “Lohoi no tedaeveve.” Kateige abu lohoale huena malei bouti abui ke bilage keau ililohoho vekeanu. ⁸ Ige Saimoni Bitau huena moaga elegevei Iesu vudimo au kome bokoai vata bisi namihai avoe, “Kosive, di halei tenela. Kosealemo dau atae toela.” ⁹ Kateai louale keu koseanu. Keu au esemuhi huena moaga kebia elegevei vikolahalu. ¹⁰ Ige haokuvuiabe Sebedi mo abui Diemisiu Dioniti abuta viko balugalu. Ige Iesuu Saimoni namihai loui avoe, “Vabu halenela. A subuta huena malema. Isito ana aike daho ata malevenela.” ¹¹ Kateige abu bouti malei lohoale esagamo otovei halevai Iesu ehovai tilu.

Iesuu lebolasite hoesehavonu.

(Matiu 8.1-4; Maka 1.40-45)

¹² Vani mole Iesuu o moleve tige lebolasite ata moleu lohoaleu Iesu elehai vudivemo kome bokoai vata bisime holumai baita avuho loui avoe, “Di Kosive, a isivianiege di hoesehavonela.” ¹³ Ige Iesu au ada hatui malaha kela holisi namihai avoe, “Ito, dana a hoesehavoi.” Ke lousege solekavesite malaha kemo lebolasiu uoholinu. ¹⁴ Ige Iesu isuta avuho loui avoe, “Inuta talive a ebika mai dubu nalimale kosive ke haivuge au a vava elehai a namihage Moseseu louale ke nahate vai ono mole mai mahoi Dilava hoesehavoge ataeabuna elehai hilokage a vavau duaveanu. Isito ainaho bae atabeho di a hoesehavoaale ko loulive.” ¹⁵ Iesuu kateai louito vaveveve keu o bahatae tai gabianu. Ige ata moagaeau isiviai loholive hotove evisime au vavahaniabe kebia hoesegevei. ¹⁶ Isito Iesuna vani degomole halevei tiniege ataeau uvesite keve guliguliagei.

Iesuu ata mole hoesehavonu.

(Matiu 9.1-8; Maka 2.1-12)

¹⁷ Vani mole Iesu ata haivesege Balisia ata isi menaka haivemale ata keau Galili vatae, Diudia vatae isi Dielusalema o baluga keve loholu. Lohoale keve uguivai hoto ke evisenge Dilava vuvuneu Iesuemo uge au vavahaniamale kebia hoesegevema. ¹⁸ Isege ata degomoleau malaha mole ada toelate isi velo toelate ke kaulamo mavoi ebavoi loholu. Isiviale malaha ke mai lohoi oe uvue Iesu vudimo mavoi. ¹⁹ Isito ata moagaeau molemo nenihohiale kemo abu mai oe vahae lohoveve keu anekiage abu ebavoi mai tiale oe goloe mavoi o ke kobuhai kaula ke umuvai mai vahamo manevege malaha keu kaula kemo dobai tiale ata kebia vigomo Iesu vudimo dobai ua. ²⁰ Ige Iesuu vaveveabe ke bahata hilokage abu abu evievi Iesuemo mavolu. Iesu malaha keho loui avoe, “Di haoka, di a toela ke bahata ulihage uoholinu.” ²¹ Kateai lousege Diue menaka loui haivemale ata isi Balisia ata keau huhulahai avoe, “Oleike ko hoto koseale loui Dilava ivi aiahovoma. Atabeu bae vaveve toela ulihalivebene. Isito Dilava igaena kateale vai.” ²² Kateai lousege Iesuu huhuihuhuiabe ke hilokai namigevei loui avoe, “Vadeuhoike la huhuihuhuiabe toela kateale huhulahama. ²³ Dana hoto vadeu loui. Dana malaha ke namihai kosea, ‘Di a vaveve toela ke bahata ulihanu.’ Emena dana loui kosea, ‘Hovelahai tenela.’ La huhuige hoto oleteu tohololinu. ²⁴ Isito halege dana vavahanite ke hoesehavoge lana kemo hilokage vaveve toela ulihaveve vuvune ketau daemo ua.” Kateai louito vavahanite ke namihai loui avoe, “Hovelahai a ava egumai mai a oe tenela.” ²⁵ Kateai lousege malaha keu solekavesite vudiabemo hovelahai au avamo lahamale ke egumai mai au oe tiale keu Dilava hoesehavonu. ²⁶ Ige ata bahataeau ke elehai tetelapai vabulapai Dilava hoesehavoi avoe, “Vaveve oletealeike nahi nova elehale ko.”

Iesuu Livai hohavonu.

(Matiu 9.9-13; Maka 2.13-17)

²⁷ Iesuu kateaito halei tialeu takesi malemale ata mole elehanu. Iviveike Livai. Malaha keu takesilhamale oe uvue ugulamoi usege Iesuu namihai loui avoe, “Di ehomanela.”

²⁸ Ige Livaii hovelahai au kunai bahata halevei Iesu ehomanu.

²⁹ Vani mole Livaiu au omo lovi balugataho Iesuho vai hoage takesi malemale ata isi haokuvuiabe degomole keu lohoale abuhi lovi ima. ³⁰ Ige Balisia ata isi Diue menaka loui haivemale keau Iesu esemu namigevei loui avoe, “Osiohoike la takesi malemale atae toela kebiahi igaetoai lovi ima. Isime atae toela degomole kebiahi igaetoai lovi ima.”

³¹ Kateai louge Iesu namigevei avoe, “Medikolou bae negote kebiaho loholivebene. Isito auna vavahanite kebia naha hoesegevelihohoi. ³² Iale dau lohoale keu atae dua kebia hohavelihohoi loholoholito vaveve toela vamale kebiahoike di lohonu.

Lovi ioholisito guliguli unahaveve belala

(Matiu 9.14-17; Maka 2.18-22)

³³ Iesuu kateige menaka haivemale ata keau tota Iesu namihai avoe, “Dioni esemu keau vani igaegae lovi ioholisito guliguli unahama. Ige Balisia esemu kebiata kateale vama. Isito a esemu keau kateale vaholima.” ³⁴ Ige Iesuu namigevei avoe, “La huhuige mo molena ma mole melamege haokuvuiabe abuna lovi isi. Emena abuna halevai. Ba, abuna lovi isi vahaeholahai. ³⁵ Isito vani mole atae toelaebuna loholiege mo ke hamage haokuvuiabe abuna bae vani kela uvulahai lovi i halevai.”

³⁶ Kateaito tota dovudovue hoto mole lovi namigevei loui avoe, “Atabeu bae ogoe dogae ivi etulei mai ogoe mamie vaha badivulivebene. Auna kateige ogoe doge kena toelai. Ige mamive ke elehage elehilehivena toelai. ³⁷ Ke nahate atabeu bae uainie doge mai ovove vate badivuale mamivemo ehosivalivebene. Auna kateige kena savai dikolahai. Ige uainie e kena hosilahai lotihatui. ³⁸ Isito atabena uainie doge mai ovove vatee dogamo

ehosivage keu bae dikolahalivebene. Iale di vaveveu bae vatae vavevehi igaetoalivebene. ³⁹ Isito atabena vani bahata uainie mami ke iniege auna uainie dogo keho isiviholisi. Isito auna huhuige uainie mami keu avuemo heanu.”

6

Bula hoesehavoveve belala

(Matiu 12.1-8; Maka 2.23-28)

¹ Vani mole bulamo Iesu au esemuhi oai tiale konee bulu molemo tisege esemuiabeau kone dakoai ke boboai ilu. ² Ige Balisia ataeau ke elehai namigeve'i loui avoe, “La vadeuhoike menaka eguvai bulamo katelalahu.” ³ Ige Iesu namigeve'i avoe, “Lana Bukae Hotomo Deividiu au esemuhi vaelahai me vale ke dodaveholilu. ⁴ Isi Dilava dubue uvue tiale beleidi tumute ke mai iale keta lana dodaveholilu. Dubu nalimale unahaeabuna beleidi ke igei. Isito vani kela Deividiu menaka ke egumai beleidi ke isi au esemu ovege kebiata ilu.” ⁵ Hoto kateale louito hotoeabe kemo loui avoe, “Atae Ese keu bulae Kosive. Iale auna onole louge abuna ke vai.”

Malaha mole ada golote

(Matiu 12.9-14; Maka 3.1-6)

⁶ Bula mole vanimo Iesuu tota dubue tiale ata haivesege malaha mole adave inuteu goloale keu keve ua. ⁷ Isege Diue menaka loui haivemale ata isi Balisia ata keau Iesu nibisi isiviai elehage Iesuna bulamo malaha ke hoesehavoge abuna vaveveve kemo kotalahai. ⁸ Ige Iesu huhuihuhuiabe ke hilokai ada toelate keho loui avoe, “Hovelahai kove loho.” Ige malaha keu hovelahai laminu. ⁹ Ige Iesuu dubue kosive kebiaho loui avoe, “Dana la namigeve'i. Nahie menaka keu nahie haivege nahiabuna bulamo osioi. Nahiabuna bulamo vaveve dua vai. Emena vaveve toela vai. Nahiabuna bulamo ata hoesegeve'i. Emena ata aiogeve'i.” ¹⁰ Ige abu hotohotoholige Iesuu elegeve'i lotinu. Isime malaha nehe ada toelate ke nanihai avoe, “A ada hatunela.” Ige malaha keu au ada hatuge adaveu inuanu. ¹¹ Ige dubue kosiveau ke elehai avuhu itumu selevelalahu. Isime hotohotoai Iesu hamaliho humaha kaovama.

Iesuu esemu tuelo (12) tabagevenu.

(Matiu 10.1-4; Maka 3.13-19)

¹² Vani mole Iesuu tanae guligulihio tialeu vavi ke bahatamo guliguliai Dilava imihanu. ¹³ Ilage vau alamoge au esemu bahata hohavege abu lohoge au kebia bahatamo esemu tuelo (12) tabageve'i loui avoe, “Laeau di abostoloea.” ¹⁴ Kebia iviabe abuikoe koea. Moleike Saimoni. Isito Iesu ivihaleike Biti. Ige hohove Andulu. Ige Diemisi. Ige Dioni. Ige Bilibi. Ige Batolomi. ¹⁵ Ige Mati. Ige Tomasi. Ige Alovesi mo Diemisi mole. Ige Saimoni mole keu Selotie ata. ¹⁶ Ige Diemisi mo Diudasi. Ige Iesuho haiaveve malaha mole Diudasi Kaliota. Iesuu esemu kateale tabagevege abu avuluvuta ua.

Iesuu ata haivei hoesegeveale deiada

(Matiu 4.23-25)

¹⁷ Iesuu abuhi tana ke halevai heie lohoale loho moleve velehovoge esemuve moagaeau loholu. Ige ata moagamoagaeau Iesu hoto eviliho abu o halevai loholu. Kebia degomoleau Diudia vatamo loholu. Isege degomoleau o baluga Dielusalema halevai loholu. Ige tota degomoleau davala vavae o abuata Taea isi Saidoni kebiama loholu. ¹⁸ Lohoale isiviale Iesu hoto evige au vavahaniabe kemo hoesegeve'i. Ige degomoleau munanae toelau abuemo umale kebiatae au lohoge au kebia hoesegevenu. ¹⁹ Ige ata bahatae au Iesu vuvuneu ata hoesegeveale ke elehai isiviale levei.

Vahaeho isi uvu lahaveve deiada

(Matiu 5.1-12)

²⁰ Iesuu au esemu niavei abuhou loui avoe, “Kunai holimalea, vahaeholahave. Dilavana ata la nahate malevege lana adave vuvunemo uve.

²¹ “Vaelahamalea, vahaeholahave. Gabie la uniabuna bae hanilahai. “Ninalahamalea, vahaeholahave. Gabie lana bae helahave.

²² “Di esemuia, ataeabuna bae laheho isiviholisi la hoto hamai la aiogeve'i laheho loui kosea, ‘La keau atae toelaea.’ Kosealemo laeau di esemuia. Abu kateige vahaeholahave. ²³ Vani kateimalela hoveveve vahaeholahave. Kosealemo lana bae otogoe ibina baluga maleve. Subuta buluveabeau kateale vai beloveta aiogevelu. Ialemo ataeau la aiogevege vahaeholahave.

²⁴ “Isito kunai moagatebia la nohovu. La vatae vahaeho unaha vaito otogoe kunai maleholilu.

²⁵ “Isi uniabeu aike hanilahamale la nohovu. Lana bae gabie vaelahave.

“Aike helahamale la nohovu. Lana bae gabie ninalahave.

²⁶ “Ataeau hotoe dua loui la hoesegeveale la nohovu. Kosealemo subuta buluveabeau loboe hoto kateale loui loboe beloveta hoesegevelu.”

La aiogevemale kebia isivi oveve.

(Matiu 5.38-48; 7.12)

²⁷ “Isito di hoto evimalea, di la namigevege evive. La aiogevemale kebia isivi ovei hoesegeveve. Isi laheho itumuamale kebiata hoesegeveve. ²⁸ Isime laheho hotoe toela loui la aiogevemale kebia hoesegeveve. Isi laheho vaveve toela vamale kebiataho Dilava imihave. ²⁹ Ata oleu la mono vaki molemo hamage louge au tota vaki moleveatae hamai. Ige ata oleu la dabae ogo mage louge au la sieti keta mai. ³⁰ Ata oleu onoleho isiviai la namigevege isivive ke mai omive. Isi ata oleu la kunai malege lainaho bae au mai hoilahaveve keho namihalive. ³¹ La isiviage ataeau la hoesegeveho vage lata ata kebia hoesegeveve.

³² “Isito ata oleuoleu laheho isivilahai la hoesegeveale kebia unahaho lana isivilahage Dilavana oleve kateai la hoesegevei. La hilokage atae toela keau vaveve kateale vai abu haokuvu unahaho isivilahama. ³³ Isito lana oleuoleu laemo vaveve dua vamale kebia unahaemo vaveve dua vage Dilavana oleve kateai la hoesegevei. La hilokage atae toela keau vaveve ke nahate vai abu haokuvu unahamo vaveve dua vama. ³⁴ Mesoho ata molena lae lohohi laemo moni malege lainaho au gabie ibinave laoveve ke huhulahalive. Kosealemo atae toela unahaeabuna vaveve kateale vagei. Lana kateai huhulahage Dilavau bae la hoesegevelivebene. ³⁵ Lainaho vaveve kateale valive. Isito la aiogevemale kebia isivi oveime vaveve dua abuhu vai hoesegeveve. Laemo moni malemale ke lainaho huhulahalive kosea, ‘No moni kena hoilahai noe lohohi.’ Lana vaveve kateale valiege ibina baluga malei bae ehue umale Kosive baluga ese holieveve. Kosive vaveve keu koseanu. Keu atae toela kebia hoesegevei huhuihuhuie toela huhuimale kebiata hoesegevema. ³⁶ La Mamau otogoe vamale ke nahate lata ata huhuevei kebia tedaeveve.”

Mole vaveve kaovamale hoto

(Matiu 7.1-5)

³⁷ “Lainaho mole vaveve toela kaovai abuemo loui kosea, ‘Keau vaveve toelate.’ Lana mole vaveve kaovahilige Dilavana avuta bae la vaveve toela kaovalivebene. Isi lainaho mole toelamo hoto loui ibinaeabe ovegelive. Isi lainaho molemo vaveve toela vale ke huhulahalive. Lana katelahage Dilavana avuta la toela ke huhuoholisito ulihai. ³⁸ Lana kunaimo isi otogoe hotomo ata tedaevege Dilavana bae kunai laovei la tedaivei. Lana kateale vage kunaina bae laemo balugai. La vaveve oletealemo ata tedaevege Dilavana avuta la tedaivei.”

³⁹ Iesuu hoto kateale louge uoholigetovudovove hotomo namigeveve avoe, “Malaha mole ni kedute keu bae malaha mole ni kedute ke melamei avui talivebene. Abuna avui katelahaliege abuna abata ke igae vuvegevei. ⁴⁰ Esemue hoto keu bae haivemale atae hoto evihalivebene. Isito esemuiabe keabuna hotove ke kaovai negolahaliege abu kosive nahate holisi.

⁴¹ “La isiviale la haokae nimo louka mai. Isito la kateisege la nimo louka balugau ua. ⁴² Louka balugau la nimo uale kemo lana oleve kateai la haokaho loui kosea, ‘Lohoge di a nimo loukae eshameu uale ke mai.’ Lainaho katelahai la haoka lobohavolive. Isito vasohuta louka balugau la nimo uale ke maito bae la haokae nimo loukae eshameu uale ke mave.”

Idi bahata hahuhumite ke la hilokalu.

(Matiu 7.16-20; 12.33-35)

⁴³ “Idie dua keu bae hahuhumie toela valivebene. Ige ke nahate idie toela keu bae hahuhumie dua valivebene. ⁴⁴ Idi bahata hahuhumite ke la hilokalu. Iale la bae laokamo madilini ehalivebene. Isi la bae sesenamovulutu ehalivebene. ⁴⁵ Atae dua ke uvumo huhuihuhuie duau uale kemo auna hotoe dua lougei. Isito atae toela ke uvumo huhuihuhuie toelau uale kena kemo hotoe toela lougei. Kosealemo ataeau abu aimo loulmale keu abu uvumo huhulahamaleike abu ke louma.”

O houlmale ata abui

(Matiu 7.24-27)

⁴⁶ “La osiohoike di namihai kosea, ‘No kosive. Isito la di louale ke eviholilu. La kateige toelanu. ⁴⁷ Isito oleuoleu dae lohohi di hoto evisi vamale ata kebia vaveve koseanu. ⁴⁸ Ata moleu oe dua houlmale ke nahate. Auna abata lovoi hade malei emee dua vai munege golomo au o houge hanunuu lohoge o keu bae hobelahalivebene. Kosealemo

keu au o houe dua vanu. ⁴⁹ Isito ata moleu di hoto evisito vaholimale keu oe toela esagamo hounmale ke nahate. Keu neniai abata lovoi hade maheli neniai emeholinu. Ialemo hanununa lohoge o kena solekai hobelaha bahata toelai.”

7

Kosive esemuu momoleanu.

(Matiu 8.5-13)

¹ Iesuu hoto kateale loui ata namigevege uoholigeto au halei Kabenumue tinu. ² O kemo Loma tuvalie kosive moleu ua. Uvuvue esemu keu vavahaniale hatiho vekeanu. ³ Ige tuvalie kosiveu Iesu vamale hoto ke evisime Diue kosive hanavei isiviale abu Iesu namihage au loholive esemue hoesehavoi. ⁴ Kateige abu lohoale Iesu namihai avoe, “Tuvalie kosive moleu isiviale lohoi talive esemue hoesehavonela. No isiviale ke tedaho. ⁵ Kosealemo malaha keu atae dua. Keu no ata bahata hoesegeveve noheho dubu mole hounu.” ⁶ Abu hoto kateale loui Iesu namihage au halei abuhi tinu. Tialeau oe vavae tisege tuvalie kosiveu au haokuvu hanavege abu lohoale Iesu namihai avoe, “No kosiveu loui avoe, ‘Di kosive, halege ainaho di oe loholive. Dau bae atae duabene a bae di oe uvue lohoi. ⁷ Katealemoike di data isiviholinu ae loholiho. Isito ana hoto unaha louge di esemu kena momoleai. ⁸ Di hilokage tuvalie kosive baluga keau vuvune mai daovale kemo dana di tuvalie esemu namigevege abuna di isivi ke vai. Dana mole namihai kosea, ‘Tenela.’ Ige auna tai. O mesoho moleho loui kosea, ‘Loho.’ Ige auna lohoi. O mesoho dana di omo loviamale esemu namihai kosea, ‘Ke vanela.’ Ige auna vai. Iale ana hoto unaha louge di esemu kena momoleai.” ⁹ Ige Iesuu hoto ke evisi vikoai hoilahaia ata moagaeanu ehovai tiale kebiaho loui avoe, “Di la namigeveve. Iselala ataemo di evievi kosealebe negote elehalolinu.” ¹⁰ Kateai louge tuvalie kosive haokuviabe keau tota hoideveve ove tilu. Tiale ove velehovosege esemueveve momoleanu.

Gobue mou hovelahanu.

¹¹ Vani mole Iesuu halei o mole Neini tinu. Keve tige esemuiabe isi ata moaga keau avuluvuta tilu. ¹² Tiale keau ologoe velehovoho vasege o ke biaeau ata moleu hatiale ke kesita ebavoi mai abuela loholu. Hatiale keu gobu mole mo igahameike ke hatinu. Ige oe ata moagaeanu gobu keluvuta loholu. ¹³ Ige Iesuu gobu ke elehai avuhu uvu balugai namihai loui avoe, “Nina hale.” ¹⁴ Kateai louito tiale au ada mai kesi kemo mamoge ebavoi lohoale keau lavilu. Ige Iesuu loui avoe, “Moia, di a namihama. Hovelaha.” ¹⁵ Kateige hatiale atau hovelahaia hotoanu. Ige Iesuu mai neinave ominu. ¹⁶ Ige ata bahataeanu ke elehai vabulahaia Dilava hoesehavoi loui avoe, “Beloveta balugau nova noe lohonu. Dilavau au ata tadeaveliho lohonu.” ¹⁷ Ige Iesuu vamale hoto keu Diudia matama keve tinu. Isime Diudia ke iae o degomole ketave tinu.

Dioni esemuiuu Iesue loholu.

(Matiu 11.2-19)

¹⁸ Kateige Dioni esemuiuu ke evisi lohoale namihalu. Ige Dioniu au esemu abuita hohavege abu avue loholu. ¹⁹ Ige au kebia hanavei loui avoe, “Talive Iesu namihai loui kosea, ‘Dioniu subuta loui avoe, No tadeaveve ata kena bae lohoi. Iale ata ke anike ko. Emena noeabuna mole hemei ui.’” ²⁰ Ige abu Iesue lohoale avuhu loui avoe, “Dioni ata babatisogevemale keu no hanaveike vage no a belahaho loholu. Dioniu isiviai hilokai. No tadeaveve ata ke anike ko. Emena noeabuna mole hemei ui.” ²¹ Kateai belahasege Iesu niabemo ata moaga vavahaniamale kebia hoesegevema. Ata degomoleau munanae toelau abuemo umale. Isege degomoleau ni kedutea. Iale Iesu kebia hoesegevema. ²² Isi kemo Dioni esemu namigeveve loui avoe, “Hoideveve talive la vadeu elehai eviale ko loui Dioni namihai kosea, ‘Ni kedute keau nilahama. Ige velo golote keau lavisi olahama. Ige lebolasite kebia vavahanu uoholima. Ige golemate keau hoto evima. Ige haluviale kebiata hovedevema. Isime di hotoe dua loui kunaiholimale kebiata haivema. ²³ Ige oleuoleu dolodoloholisito au evievi daemo mamoaale kena vahaeho balugai.’”

²⁴ Iesuu kateai lougeto Dioni esemuiuu halevai hoideveve tisege au bae Dioni deiada loui ata moaga kebia namigeveve avoe, “La komo botoe tiale Dioni elehage keu ata oleteale. La huhuige auna au uvu mai Dilavaemo mamoi negobedai laminu. Emena helukau kulumo mamoge kulu kibikibiale ke nahate auna vanu. ²⁵ La keve tiale ata oleteale elehalu. Lana elehage kena ogoe dua vamale atanike ke. Ba, ogoe dua vamale keau bae botoe ulivebene. Isito abuna oe duamo ugei. ²⁶ Di tota la namigeveve. La keve tiale vadeu elehalu. Lana beloveta elehalu. Seleveta belovetaike la ke elehalu. Isito keu beloveta kebia evigeveve baluganu. ²⁷ Dioni vaveve keike Bukae Hotou loui avoe, ‘Dana di esemu mole hanavege auna aho uli holisi tiniege ata namigeveve kosea, Kosiveu lohoma.’” ²⁸ Di hoto mole louge

evive. Dioniu ata bahata vata komo uale kebia evigevenu. Isito ivivesiteu di ata holisi Dilava adae vuvunemo uale keu Dioni evihanu.”

²⁹ Oe ata moaga isi takesi malemale ata kebiau Iesuu louale hoto ke evilsu. Ata kebiau subuta Dioniu haiveale hoto ke huhuai avoe, “Dilava menaka keu noemo duave selevel.” Kebiaike Dioniu babatisogevenu. ³⁰ Isito Balisia ata isi menaka haivemale ata keau Dioniu louale hoto evisito isiviholilu Dilava humahala taliho. Katelahage Dioniu kebia babatisogevoholinu.

³¹ Ige Iesuu kebia namigeveve avoe, “Dana vadeu tovetove novae atate kobiaho loui. ³² Keau esebuluaia ologomo molehi gilulahamale ke nahate. Esebulu abuna moleho loui kosea, ‘Noeau laheho sale hamageto laeau havulahaholilu. Ige noeau ninalahageto laeau nohehi ninalahaholilu.’ Iale novae vani komo uale la vaveve keau esebulue vaveve ke nahate. ³³ Isi ke nahate ata babatisogevemale Dioni keu lohoale vani degomole lovi ioholisi uaini halege la loui kosea, ‘Keu tilogoe ataike.’ ³⁴ Iniale Atae Eseau lohoniale uainita lovita ige la loui kosea, ‘Ata ke elehave. Keu lovi ivolovolaimale ataike. Keu uaini isi momaime takesi malemale atae toela kebiahi haokuvuanu.’ ³⁵ La louale kemo ataeau hilokage la lulelehililu. La hoto keu esebulue hoto nahate.”

Iesuu Saimoni oe tinu.

³⁶ Vani mole Balisia malaha moleu isiviale Iesuu talive ove avuti lovi isi. Ige Iesuu tiale ove avuti ugumai lovi ima. ³⁷ Isege o keve keate mole toela selevelu ua. Keu Iesuu o keve uale ke evisi deholo mole hagote mai lohonu. ³⁸ Ke mai lohoale Iesu vavamo lamisi ninasege nimetavaveu Iesu velomo dodama. Ige au kome bokoai vata bisi au kinata Iesu velo ulihage uoholige au velove ke ulikukuhavoi deholo hagote ke mai velove ominu. ³⁹ Ige Balisia malaha nehe Iesuho lovi vale keu ke elehai au uvumo huhuai avoe, “Iesu kou beloveta holivatebe keate keu levege au vaveveve toela hilokanu.” ⁴⁰ Balisia malaha keu huhuihuhui kateale vage Iesuu ke hilokai avuho loui avoe, “Saimoni, dana hoto mole aho loui.” Ige Saimoniu lovi avoe, “Di kosive, louge di evisi.” ⁴¹ Kateige Iesuu deiada mole loui namihai avoe, “Vani mole malaha mole abuiavu kosive mole monimo bukalo. Moleu vai handele (500) kinamo bukanu. Isege moleu vivti (50) kinamo bukanu. ⁴² Moni ke abu malei biage omiveve vaniu lohonu. Isito moniu abuemou uoholinu. Ige monie biageu namigeveve avoe, ‘Lainaho moni daovaveve ke huhulahagelive.’ Iale deiada kemo a huhuige malaha oleteu kosive ke vahaehove va baluganu.” ⁴³ Ige Saimoniu namihai loui avoe, “Di huhuige moni baluga maleale malaha keu.” Ige Iesuu loui avoe, “Avulike.” ⁴⁴ Isi kateai au ebia ekovehai keate ke niavoime Saimoni namihai loui avoe, “Keate ko eleha. Di a o kove lohoge a e hai di velo totoholinu. Isito keate kou ninage nive eu di velomo dodage au kinata di velo ulihanu. ⁴⁵ Di vasohuta a oe lohoge au di vahaeho vai di ulikukuhavoholinu. Isito di lohoge keate kou di velo bubuhavonu. ⁴⁶ A deholobeta di kina omiholinu. Isito keate kou au deholo hagoteta di velo ominu. ⁴⁷ Di a namihage evi. Di keate ko vaveve toela moaga ulihage uoholinu. Kosealemo keu au isivi bahata mai daemo mamoi di hoesehavo selevelu. Isito ata oleni di huhu eseveage dana vaveveve toela eseve ulihai.” ⁴⁸ Kateai louito keate ke namihai loui avoe, “Di a vaveve toela bahata ulihage uoholinu.” ⁴⁹ Kateige lovi imale ata degomoleau moleho loui avoe, “Hoto oleteale ko. Vaveve toela ulihemale atanike ko.” ⁵⁰ Ige Iesuu keate ke namihai avoe, “A a evievi daemo mamoaale kemo Dilavau a toelamo a tedahonu. Iale vahaehomo tenela.”

8

Keate degomoleau Iesuluvuta tiale

¹ Vani degomoleau uoholige Iesuu au esemu tuelo (12) ehai abuhi tialeau o moagamoaga keve ataeau Dilava adae vuvunemo uveve hotoe dua ke loui haivelu. ² Ige keate degomoleau abuhi tiale kebia degomoleau vavahanitea. Isege kebia degomolemo munana toelau ua. Iale Iesuu kebia hoesegevege keau abuhi tilu. Keate mole Meli Magidaleni Iesuu avuemo munanae toela seveni (7) nunuvunu. ³ Ige kebiamou koeau abuhi tilu. Kosive mole Elodi ke esemu Tusa. Iale mahinave. Dioana. Ige Susana. Ige emo keate degomole kebiata igaetoai abu monita Iesu isi esemuiabe kebia tediaevigelihou abuhi tilu.

I degomole sesiale deiada (Matiu 13.1-9; Maka 4.1-9)

⁴ Ata moagaeanu o igaegaemo Iesue lohoale mole bevaveveve igaemo usege Iesuu dovudovue hoto mole loui haivenu. ⁵ Haiveve avoe, “Ata moleu au govavae i malei au bulue sesiaho tinu. Au sesievesege degomoleau humahamo keiohovolu. Ige ataeau kemo dasege ugueau degomole ige uoholinu. ⁶ Isege degomoleau munemunemo keiohovoi vakilahai ulisito alumuiabeau dobai tiholige abu gililahalu. ⁷ Isege degomoleau adu bekatke ke

uvumo keiohovoage adu beikate keau ulisi kebia vavagevelu. ⁸ Isege degomoleau vatae duamo keiohovoale keau ulie dua vai hahuhovoale keu moagataho.” Kateale louge uoholige au namigevei avoe, “La oleteau hoto evimaleau hoto ko evive.”

Dovudovue deiada

(Matiu 13.10-17; Maka 4.10-12)

⁹ Ige esemuiabeau belahai avoe, “Dovudovue hoto ke ihuике onole.” ¹⁰ Ige Iesu namigevei avoe, “Di isiviale Dilavau au matamae dogae vamale ke hilokave. Isito ata degomoleau evieviholimale kebiaho di dovudovue hoto louge abu bae ke evisi avuemo lulelelahalivebene. Abuna niavoito bae elehalivebene. Isi evisito bae lulelelahalivebene.”

Dovudovue ihu

(Matiu 13.18-23; Maka 4.13-20)

¹¹ “Di dovudovue hoto louale ke ihuu koseanu. Dilava hoto keu govaae i ke nahate. ¹² I degomoleau humahamo keiohovoale keau ata degomole nahate. Ata keabuna hotoe dua ke evisege Setenena lohoniege uvuiabemo hotoe dua ke aiohavoge. Ige elike abu hoto ke evi halevalive ukolikoli ma halevai. ¹³ I degomoleau munemunemo keiohovoale keau ata degomole nahate. Keau hoto ke evisi maleime vahaeholahaito hoto ke ma seleve holioholilu. Iniege vani mole vaveve toelana abuemo lohoge abuna solekavesite hotoe dua ke evioholisi halevai. ¹⁴ I degomoleau adu bekate uvumo keiolahale keau ata degomole nahate. Ata keau hotoe dua ke evisito vani mole abu vatae vaveve huhulalahi kunaita huhulahage vaveve katealeu hotoe dua bamuge evieviabeu negoholinu. ¹⁵ Isege i degomoleau vatae duamo keiohovoale keau ata degomole nahate. Ata keau hotoe dua evisi abu uvumo ke huhue dua vai negolahama. Ige evieviabeu balugatahoage abu vaveve dua vama.”

Lameba haneveve

(Maka 4.21-25)

¹⁶ “Atabeu bae lameba hanei mai mau uvumo mamolivebene. Isime mai ladevemale betie valae mamolivebene. Isito auna mai ehanumage ata olemeabuna o keve loholiege abuna atagavemo ui. ¹⁷ Di hoto louale ke ihuu koseanu. Ataeabuna abu vaveve mahogovage Dilavana bae vaveveabe ke mai umidamo mamoge ataeabuna ke elehai hilokai. Isi vani kela atae vaveve bahatana Dilava atagamo bae velehovoi umidamo ui.

¹⁸ “Iale nenilahai la hoto eviale ke huhulahave. Kosealemo oleni di hotomo luleleige Dilavana lulele baluga omisi. Isito ata oleni au lulele unahamo hoto ke evisito keho isiviholige Dilavana avuemo luleleve ke mai evihai.”

Iesu neinuvu isi hohuvuiabe

(Matiu 12.46-50; Maka 3.31-35)

¹⁹ Iesu neina isi hohuvuiabe keau isiviai avue lohohi. Isito ataeau moagai nenioholige abu avue lohoveve keu anekianu. ²⁰ Ige ata moleu Iesu namihai avoe, “A neinau a hohuvuhi heie ua. Abu isiviai a elehai.” ²¹ Ige Iesuu ata bahata kebia namigevei loui avoe, “Olemeau Dilava hoto evisi vamale keau di neinuvu isi di hohuvu abulike.”

Iesuu eta hanunuta hotogevenu.

(Matiu 8.23-27; Maka 4.35-41)

²² Vani mole Iesuu au esemu ehai boutimo biloluvisege au namigevei avoe, “Lohoge nahi tabu ko houhi vaki moleve tai.” ²³ Kateaito halevai tisege Iesuu lahanu. Lahasege heluka balugau lohoge eu boutie uvumo mahosihovoage toelage esemuiabeau loui avoe, “Nahiabuna nova haluvisi.” ²⁴ Kateai louito lohoale Iesu etuvai loui avoe, “Ei, no Kosive, no aike emo tima.” Ige Iesuu hovelalahai eta hanunuta hotogevenu hanunuu uoholige eu tolemanu. ²⁵ Ige Iesuu au esemu namigevei avoe, “Lana la uvu mai daemo mavoholilu.” Kateai abuhohi louge abu namihaholisito vabulahai tetelahalu. Isi abu moletheo loui avoe, “Malaha oletealeike ko. Kou hanunuta eta hotogevenu abu hotove evisi isivive valu.”

Iesuu tilogoe malaha hoesehavonu.

(Matiu 8.28-34; Maka 5.1-20)

²⁶ Hoto keu uoholige abu boutimo Galili halevai tabu ke vaki mole Gelasene vatae velehovolu. ²⁷ Velehovoge Iesuu dobai esagae lamisege tilogoe malaha moleu avue lohohi. Malaha keu vani moaga ogo hatuholisito vava unahata umale malaha. Ata keu oe uoholisito kena vani bahata alue vutae ugei. ²⁸ Iale malaha keu Iesu elehai baita kekoai lohoale Iesu vudimo holumaime baita namihai avoe, “Iesu, otogoe umale Kosive ke mo, osiohoike a dae lohohi. Di a imihage ainaho bae di aiohavolive.” ²⁹ Au louale keu koseanu. Au vasohuta lohoge Iesuu munanae toela keho loui isiviale nunuvage au malaha ke halemai tai. Kosealemo vani moaga munanae toela keu avuemo ui aiohavoma.

Auna kateisege ataeabuna adave velove ke seimita umudievei mai omo bamuge auna ke bohisi detitisi botoe tigei. Munanae toelau avuemo uale kemoike au kateale vama. ³⁰ Ige Iesuu namihai avoe, “A ivilike ole.” Kateige au loui avoe, “Di ivilike Moaga.” Malaha keu louale keu koseanu. Munanae toela moagaeau uvuvemo holoeavolu. ³¹ Ilike vage abu Iesu imihai loui avoe, “Ainaho kumoe no hanavegelive.”

³² Kateaito elehasege ovo degomoleau tanae lovi isi olahama. Ige munanae toela keau Iesu namihai avoe, “No hanavege noeabuna ovoe uvue tai.” Ige Iesuu loui avoe, “Teve.” ³³ Kateai louge munanae toelaeanu malaha ke halevai ovoe uvue deluhovolou. Ige ovoeanu detuluvisi tialeau seika vuvegevei tabu balugamo biloluvisi e isi haluvilu. ³⁴ Ige ovo nibievemale keau vaveve ke elehai detuluvisi tialeau humaha tavae ata namigevei tialeau oe ata bahata namigevelu. ³⁵ Ige ata bahataeanu vaveve ke elehaho Iesue loholu. Lohoge malaha nehe au munanae toela avuemo nunuveale keu ogoe dua vai tilogoholisito momoleai Iesu veloe heimo ugulamoi ua. Ige abu ke elehai tetelahu. ³⁶ Ige vaveve ke elehale keau tilogoe atau momoleale ke deiada loui oe ata haivelu. ³⁷⁻³⁸ Ige Gelasene ata bahataeanu Iesu namihai avoe, “Halei tenela.” Kosealemo keau vabu balugalu. Ige Iesuu boutimo biloi tiho vasege malaha nehe munanae toelau avuemo uoholiale keu Iesu namihai avoe, “Dana aiti tai.” Ige Iesuu keluai loui avoe, “Unela. ³⁹ Isi hoilahi talive Dilava aemo vaveve dua vale ke loui a oe ata bahata haivenela.” Kateige au halei tiale Iesuu vaveve dua avuemo vale ke loui au oe ata haivenu.

Dialosi mau hovelahanu.

(Matiu 9.18-26; Maka 5.21-43)

⁴⁰ Ige Iesuu bouti mai e vaki moleve tige ata moagaeau hoesehavoho hemei uma. ⁴¹ Ige Diue dubu nalimale kosive mole Dialosi keu lohoale Iesu veloe heimo kome bokoai vata bisi imihai avoe, “Lohoge nahi di oe tai.” ⁴² Au louale keu koseanu. Mave igaeameu vagana tuelo (12) kemo vavahaniale hatiho vama. Ige Iesuu malaha keti tisege ata moagaeau lohoale evilikahavolu.

⁴³ Kateisege keate mole vavahanie toela male keu lohoale Iesu ogola holinu. Vavahanive keu koseanu. Vagana tuelo (12) kemo tahoe toelau uvuvemo lohoma. Iale keu dua valiho au moni bahata ata hoesegevemale kebiamo hatuito vavahanive keu sohu avuemo ua. ⁴⁴ Iale keate keu ata moaga uvumo lohoaleu Iesu iae ogoe ivila holinu. Ige solekavesite tahoe toelau avuemo lohomale keu uoholinu. ⁴⁵ Ige Iesuu loui avoe, “Oleike daela holinu.” Ige ata bahataeanu loui avoe, “No hilokaholilu.” Ige esemuve mole Bitau loui avoe, “Kosive, ata moagatahoeau a evilikahavoale kemo nahi oleve kateai bae hilokai.” ⁴⁶ Ige Iesuu loui avoe, “Di ata hoesegevemale vuvuneu daemo uoholige di hilokage ata moleu daela holinu.” ⁴⁷ Ige keate keu huhuige Iesuu vaveve ke hilokanu. Isi teteai lohoale Iesu veloe heimo dobai holumai ata bahatae nimo au deiada loui Iesu namihai avoe, “Di lohoale a ogola holige di vavahani keu uoholi selevelanu.” ⁴⁸ Kateai louge Iesuu avuho loui avoe, “Di ma, a uvu bahata mai daemo mamoiike vage vavahani keu aemo uoholinu. Iale vahaehomo tenela.”

⁴⁹ Kateai lousege Dialosi esemu moleu lohoale Dialosi namihai avoe, “A mau aike hatiale ainaho kosive keho louge au loholive.” ⁵⁰ Isito Iesuu hoto ke evisi Dialosi namihai avoe, “Vabu hale. Ana a uvu mai daemo mamoge a mana bae hovelahai.” ⁵¹ Ige abu tialeu oe velehovoge Iesuu louge ataeau oe uvue tihohililu. Isito Iesu, Bitu, Dioni, Diemisi isi ma ke neinave isi mamave kebia unahaeau o ke uvue tilu. ⁵² O ke uvue tisege ata bahataeanu o kemo uale keau ma keho ninalahama. Ige Iesuu loui avoe, “Ninalaha halevave. Ma keu hatihoholisito lahaike au ke vanu.” ⁵³ Kateai louge abu bituhavoi hehavolu. Kosealemo abu hilokage ma keu hati selevelanu. ⁵⁴ Isito Iesuu ma ke adala holisi loui avoe, “Maia, hovelahanela.” ⁵⁵ Kateai louge ma ke munanau hoilahi lohoge au solekavesite hovelahanu. Ige Iesuu kebia namigevei avoe, “Lovi mai omige au isi.” ⁵⁶ Kateige mamave isi neinave keau ke elehai tetelahu. Ige Iesu abuhu loui avoe, “Lainaho di vale ko loui ata namigevelive.”

9

Iesuu au esemu tuelo (12) hanavenu.

(Matiu 10.5-15; Maka 6.7-13)

¹ Vani mole Iesuu au esemu tuelo (12) hohavege abu lohoale igaetoasege au munanae toela nunuveveve vuvune ovei vavahanitebia hoesegeveveve vuvune keta ovenu. ² Isime hanavei loui avoe, “Talive ataeau Dilava adae vuvunemo uveve hoto ke loui ata haivei vavahaniamale kebia hoesegeveve.” ³ Isi tota loui avoe, “La tiliege lainaho onobehame malelive. Mesoho bedoea, mogamoga, lovi, moni, dabae ogo lainaho bae kateale malelive. ⁴ La o moleve tiliege ata moleu la malevei o hatuevege avuluvuta ovemo uve. Ilive la

tiho valiege bae o ke halevai teve. ⁵ Isito ata degomoleau laheho isiviholisi la malevei o hatueveholige o ke halevai anakaebemo la veloe goege sesilahave. Ige abuna la vaveve ke elehai kemo huhuai kosea, 'Dilavana no aiogevei.' ⁶ Kateai hoto ke lougeto esemuiabeau halevai tialeau o igaegaela ata haivei tilu. Tiale hotoe dua loui ata haivei vavahanite kebia hoesegevema.

Elodiu Iesu vavevemo daudauanu.
(Matiu 14.1-12; Maka 6.14-29)

⁷ Kateimalela Galilie kosive baluga Elodiu Iesu vaveve ke bahata evisi dolodoloanu. Kosealemo ata degomoleau loui avoe, "Mesoho ata babatisogevemale Dioniu hatiale keike tota hovelahanu." ⁸ Isege degomoleau loui avoe, "Mesoho ilaidiau hovelahanu." Isege degomoleau loui avoe, "Mesoho subuta beloveta moleu hovelahanu." ⁹ Isito Elodiu loui avoe, "Di louge abu Dioni eno etulelu. Isito ata ole igaieke vaveve ko vama." ⁹ Isi katealemo vani baita isiviai ata ke elehai.

Valava ada mole isi huena abuita
(Matiu 14.13-21; Maka 6.30-44; Dioni 6.1-14)

¹⁰ Iesu abostoloeau hoidevei lohoale abu vamale ke bahata loui Iesu namihalu. Ige Iesuu kebia holoevege abu unahaeau o mole Betesaidae tilu. ¹¹ Keve tisege ata moagau ke evisi ehovei tilu. Ehovege Iesuu itumuholisito kebia hoesegevei ataeau Dilava adae vuvunemo uveve hoto ke loui haivei vavahanitebia hoesegevenu.

¹² Iniale vau dobasege Iesu esemu tuelo (12) keau lohoale Iesu namihai avoe, "Ata kobia iovege abu tai. Loviu uvesite matamaike ko. Iale abu talive bulue lovi malei abu oe ladevei." ¹³ Kateai louge Iesuu namigevei loui avoe, "La biaeau lovi ovege abu isi." Ige abu namihai avoe, "Noeau valava ada mole isi huena abuita unahahameike ko. Iale a huhuige noeabuna oleve kateai lovi moaga ata kobiaho malei." ¹⁴ Kosealemoike abu hoto ke loulu. Malaha bahata keve uale keau moagataho vai taoseni (5,000). Ige Iesuu au esemu namigevei avoe, "Bahata namigevege abu vivti (50) vivtia uguaivoi tai." ¹⁵ Ige esemuiabeau ke nahate loui ata namigevege ataeau ugulelevai lotilu. ¹⁶ Ige Iesuu valava ada mole isi huena abuita nehe ke malei otogoe niai ke hoesehavoi vakoinata malei au esemu ovege abu malei ata kebia igaegaeei ovei lotilu. ¹⁷ Ige ata ke bahataeau lovi ige uniabeau hanilahalu. Ige Iesu esemuiuu lovie sigu ke iuhai malei basiketi tuelomo (12) udage ililoholu.

Iesuu avoe, "Dau ole."
(Matiu 16.13-19; Maka 8.27-29)

¹⁸ Vani mole Iesu ahuveta Dilava imihasege esemuiabeau avue lohoge au abuhou loui avoe, "Ataeau huhuige dau ole." ¹⁹ Ige abu loui avoe, "Ata degomoleau a mai loui avoe, 'Ata babatisogevemale Dioniu keike ke.' Isege degomoleau a mai loui avoe, 'Ilaidiaike ke.' Isege degomoleau a mai loui avoe, 'Subuta beloveta moleu hatiale munanave keike ke.'" ²⁰ Ige Iesuu loui avoe, "Isege laeau huhuige dau ole." Ige Bitau avuhu loui avoe, "A keu Keliso. Dilavau a hanavoale ke aillike."

Iesuu au hativeve deiada lounu.
(Matiu 16.20-28; Maka 8.30-9.1)

²¹ Kateai louge Iesuu isuta namigevei avoe, "Lainaho bae ke loui ata namigevelive. ²² Atee Esena bae vatetumu baluga malei. Oe kosive, dubu nalimale kosive baluga isi Diue menaka loui haivemale ata keabuna bae kabebihavoi hamage auna hatisisito vanie ni abuita igaetaeau uoholisege auna tota hovelahai."

²³ Iesuu namigevei avoe, "La oleu daiti tiho vaniege au lako au isivi va halei au vatehani maleveve ke huhu haleito vani bahata di ehomagei. ²⁴ Iale olena au ebika unaha huhuaniege au bae ukolikoli malivebene. Isito olena au ebika huhuholisito di ivimo vatehani malei hatiniege auna ukolikoli mai. ²⁵ Isi olena vatae onobenobemo kunaite holisito Dilavaemo au uvu mamoholisito hatiniege auna oleve kateai ukolikoli mai. ²⁶ Isime oleuoleu di mati vai di hoto ke louluiho isiviholige dana bae di lohomale kela di atagamo, di Mamae atagamo, anelu tumute atagamo lohoniege data ata kebia matigevei. ²⁷ Iale seleveta di la namigevege evive. La degomoleau kove uale keau bae haluvilivebene. Isito ataeau Dilava adae vuvunemo uveve ke elehaito bae haluvisi.

Mosese isi Ilaidia
(Matiu 17.1-8; Maka 9.2-8)

²⁸ Iesuu kateale louito bula igaueu uoholige au Bitu, Dioniu, isi Diemisi kebia holoeevi abuhi tana mole balugae guligulihio tilu. ²⁹ Keve tiale guliguliasage Iesu ni keu nimoleanu. Ige ogoveu tae selevelanu. ³⁰ Ige ihunivesite Moseseu Ilaidia avuluvuta hotohotoima.

³¹ Keau lohoale vavaeabe keu levolevoai ua. Keau Iesuluvuta au Dielusalemāe hativeve hoto ke louma. Isi avoe, “A hativeve keu Dilava isivilike.” ³² Kateisege Bitā isi haokuvuiabe keau ladeveale hovevevei Iesu ataga elehage malaha mole abuitaeau avuluvuta lavisi ua. ³³ Iniale malaha abuita keau Iesu halevai tisege Bitau Iesu namihai avoe, “Kosive, hoeseike no vai kove loholu. Iale noeabuna la nenita oe ese abuita igaeta houevei. Ilive elike moleu aho. Moleu Moseseho. Isege moleu Ilaidiaho.” Keu hoto ke louito luleleholinu. ³⁴ Kateai lousege goeu dobai lohoale bamuevege Iesu esemuiaū vabulalahu. ³⁵ Ige goe kemo hoto moleu lohoale loui avoe, “Di moike ke. Dailike ke ebagemanu. Iale hotove evive.” ³⁶ Hoto keu kateai uoholige Iesu igaēu lamisi ua. Ige Iesu esemuiaū vani moaga abu elehale ke loui ata namigeveholilu.

Iesuu munanae toela nunuvanu.
(*Matiu 17.14-18; Maka 9.14-27*)

³⁷ Vavita abu tana ke halevai lohosege ata moagatahoeau Iesuluvuta belehovolu. ³⁸ Ige ata moagataho kebia vigomo malaha mole igaēu hovelahai baita Iesu hohavoi avoe, “No haivemāle ata, di di mo igaē mai lohoge elehanela. ³⁹ Vani igaēgae munanae toelana avuemo lohosege auna dobai kekoai teteisege aivemo sabavena hahosihovogei. Vani moaga munanae toela kena kateai di mo ko aiohavogei. ⁴⁰ Ige di a esemu kebia namigevege abu di mo hoesehavoveve keu abuemo anekianu.” ⁴¹ Kateai louge Iesuu abuhu loui avoe, “La uvu keau tolōbe nimolealemoike la evieviholilu. Iale la huhuige dana vali vani moaga lahehi ui laheho loviai.” Kateai abuhu louito malaha ke namihai avoe, “A mo mai kove loho.” ⁴² Ige au mo mai lohosege munanae toelau move aiohavoge moveu dobai vatamo tobilakanu. Ige niveu vealuvilu. Kateisege Iesuu munanae toela iomai mo ke hoesehavoge au dua vanu. Ige Iesuu mai mamave ominu. ⁴³ Ige ata bahataēau Dilava vuvune ke elehai vikolalahu. Isime Iesuu onolenole vama ke huhulahai Iesu hoesehavoma.

Iesuu tota au hativeve lounu.
(*Matiu 17.22-23; Maka 9.30-32*)

⁴⁴ Iesuu tota au esemūho loui avoe, “Di aike hoto ko louge evive. Ataēabuna Ataē Ese mai ata degomole ovege abuna hamage hatai.” ⁴⁵ Kateigetō Iesu esemuiaū hoto ke evisito Dilavaū huhuhuhuiabe bamualemō ke ihu hilokaholilu. Abu isiviai Iesu belahai. Isito vabulalahemo belahaholilu.

Olena kosive holisi.
(*Matiu 18.1-5; Maka 9.33-40*)

⁴⁶ Iniale abu mole belagevei avoe, “Iesuna nahiemo ole ebagemage auna kosive baluga holisi.” ⁴⁷ Kateisege Iesuu huhuhuhuiabe hilokaimē ese mole ese mai lohoale au vavamo mamōnu. ⁴⁸ Isi abuhu loui avoe, “Olena di ivimo ese ko nahate mai o hatui hoesehavonige daike au ke hoesehavonu. Isi Dilavaū di hanavoale keta hoesehavonu. Iale la oleu au ebika etolemāi eeseē vaveve nahate vale kena bae kosive baluga holisi.” ⁴⁹ Ige Dioniu loui avoe, “No kosive, no malaha mole elehasege keu a ivimo munanae toela nunuvema. Ige no namihai kosea, ‘Halenela.’ Kosealemō keu a esemu holioholinu.” ⁵⁰ Ige Iesuu abuhu loui avoe, “Lainaho kelualive. Ata oleu kateale vale keu nahie aiogeveholisito nahie tēdaēveike au ke vama.”

Samalia ataeau Iesūho isiviholilu.

⁵¹ Iesuu ehue tiveve vani keu vuguvuguanu. Ige au tiveve ke huhuaito halei Dielusalemāe tīnu. ⁵² Isi au esemu degomole hanavege abu ulila tiale Samalia ata namigevege abu Iesu hoesehavoho bevuaī hemei uliho. ⁵³ Isito o ke biaēau isiviholilu Iesuu loholive abuhi uliho. Kosealemō abu hilokage Iesu keu Dielusalemāe tīma. ⁵⁴ Kateige Diemisi isi Dionī keu ke evisi Iesu namihai avoe, “Kosive, ana isiviage no Dilava imihage au vene hanavoge otogomo dobai lohōi ata kebia aiogevei.” ⁵⁵ Kateai louge Iesuu hoilahi keluevei namigevevei avoe, “Lainaho kateale valive.” ⁵⁶ Kateai louito abuhi halevai o moleve tilu.

Iesu ehovaveve deiada
(*Matiu 8.19-22*)

⁵⁷ Abu tiale humaha tavae tisege malaha moleu lohoale Iesu namihai avoe, “Ana oleve keve tige dana aiti tai.” ⁵⁸ Ige Iesuu avūho loui avoe, “Seleveta ana isiviale daiti tai. Ovoēabuna abu aeamamo ladevegei. Ige uguaiabuna abu hanidamo ladevegei. Isito Ataē Eseu lahaveve o keu uoholīnu.” ⁵⁹ Kateai louito malaha mole namihai avoe, “Di ehōmanela.” Isito malaha keu loui avoe, “Kosive, usege di vasohuta talive di mamau hatiale ke mai gulaiito bae lohōi a ehōmai.” ⁶⁰ Ige Iesu loui avoe, “Halege nahi tisege haluviveve keau bae mole malevei gulievei. Isito lohoge nahi talive ataeau Dilava adae

vuvunemo uveve hoto ke loui haivei.” ⁶¹ Isege ata moleu Iesu namihai avoe, “Kosive, dana aiti tai. Iale di isiviai vasohuta talive di ese elegeveito bae lohohi.” ⁶² Ige Iesuu avuho loui avoe, “Oleuoleu di lovi kemo inuta tihoholisito hoilahai au iae niale keu bae ataeau Dilava adae vuvunemo uveve hoto ke loui ata haivevevemo negoalivebene.”

10

Iesuu au esemu seveniti (70) hanavenu.

¹ Iesuu vaveve kateale vage uoholige ke iae au esemu seveniti (70) malevei isiviale abuibuiari hanavege keau vasohuta talive o bahata keve ata haivesege Iesuu bae gabie ehovei tai. ² Isi namigeveve avoe, “Lovi moagaeau baelalahu. Isito lovi ke malei valahumo otoveveve ataeau moagaholilu. Iale bulu ke biageho guliguliage au lovi ke malei otoveveve ata hanavege au lovive bahata malei otovei.” ³ Isi tota loui avoe, “La keau mamoe ese nahate. Tobalu kebia vigomo di la hanavema. ⁴ La tiho valiege lainaho moni, mogamoga isi tamakata matagevelive. Isi humahala tiliege atahi belehovoi abuhi nona halevave. ⁵ Talive la o oletemo biloluviliege o kebia ata hoesegeveve. ⁶ Ige abu la hoto evige la kebia hoesegeveale hoto abuhu louale kena abuemu vuvuneai. Isito mesoho abu la hoto evioholige la kebia hoesegeveale keu bae abuemu vuvunealivebene. ⁷ Abu la hoto mage lainaho bae o degomolebiatala vealuvilive. Isito o ke igae uvumo uve. Isime abu lovi onole laovege ke ive. Kosealemo la di lovi vale ke ibinahoi ke lovi laovelu. ⁸ La o oleva keve tige ataeau la hoesegeveve lovi laovege ke ive. ⁹ Isi o kemo ata vavahaniteau uge kebia hoesegeveve. Isi namigeveve kosea, ‘Ataeau Dilava adae vuvunemo uveve vaniu aike lohoma.’ ¹⁰ Isito la o oleva keve tige abu la hoesegeveholige halevai talive o ke ivila lavisi bae abuhu louve. ¹¹ Namigeveve lovi kosea, ‘La oe vatau no veloe votomo uale ko noeabuna tota la omo sesilahi. Iale ko elehai huhulahave. Ataeau Dilava adae vuvunemo uveve hoto no mai lohoge la avuhu isiviholilu.’ ¹² Iale kemo di la namigeveve. Dilava kotae vaniu lohoge au vata ko aiahavomale vanila keabuna bae vatehani malei. Subuta Sodoma ataeau maleale keu eseve. Isito keabuna bae vatehani baluga seleve malei.”

O degomoleau Iesu hoto evioholialeale (Matiu 11.20-24)

¹³ “Kolasini ata la nohovu. Isi Betesaida ata la nohovu. Vatehani balugana bae laemo lohohi. Kosealemo di laemo vikoe vaveve moaga vavevege la ke elehaito la vaveve toelamo hoideveholilu. Subuta Taea isi Saidoni keve di vaveve kateale vatebene abu ogo bukate hatui uti hohuvai uvulahai abu vaveve toela halevalu. Isito laeau kateholilu. ¹⁴ Iale Dilavana au kotae vanila vatehani baluga laoveito Taea isi Saidoni ata kebia vatehani eseve ovei. ¹⁵ Isi Kabenumu ataea, di laheho louge evive. La keau isiviale la ebia tabageveve malei otogoe otovei. Isito di la namigeveve. La keabuna venumu lahai hodovavesite keve tihatuve.”

¹⁶ Kateai louito au esemu namigeveve avoe, “Olete abuna la hoto eviliege abuna di hotota evisi. Isito olete abuna la hoto hamaliege abuna di hotota hamai. Isito olete abuna di hoto hamaliege keabuna di hanavoale ke hotota hamai.”

Esemu sevenitiau (70) hoidevelu.

¹⁷ Iniale vani mole ata bahata seveniti (70) keau vahaeho balugata hoideveve lohoale Iesuu loui avoe, “No Kosive, no a ivimo munanae toela kebia namigeveve abu no hoto evilu.” ¹⁸ Hoto kateale louge Iesuu namigeveve avoe, “La vaveve kateale vage di elehage hatau nivolekale ke nahate Setene vuvuneu solekavesite uoholinu. ¹⁹ Di hoto evive. Di nego mai laovenu. Iale la bahoe Setene ke vuvuneu bae laemo negoalivebene. Iale la utee toela isi haeho kebiamo dage abu bae la uagevelivebene. Ige vaveve toelabeu bae la aiogevivebene. ²⁰ Lainaho munanae toelaeau la hoto eviale kemo vahaehoalive. Isito otogoe la iviu uale kemo bae vahaeholahave.”

Iesuu vahaehoanu.

(Matiu 11.25-27; 13.16-17)

²¹ Kateimale vanila Munana Tumuteu Iesu mai vahaehotige au vahaeho baluganu. Isi loui avoe, “Di Mama, au otogota vatata Kosive. A a lulele malei luleleholiale kebia ovenu. Isito vatae ataeau abu ebika tabageveve kemo luleleage a lulele malei kebia oveholinu. Di Mama, a kateale vale keu a isivilike. Katealemo di a hoesehavoma.”

²² Kateai louito ata namigeveve avoe, “Di Mamau onobenobe bahata daonu. Ige ataeau Moveta Mamaveta hilokaholilu. Isito Mamave igaeike au Mo hiloka selevelanu. Ige Move igaeike au Mama hiloka selevelai isivive ata tabageveve lulele ovege abu Mamave hilokalu.”

²³ Hoto kateale louge uoholige au esemu unahaho loui avoe, “Laeau hoesehalahu. Kosealemo onobenobe bahata di vamale ke la elehalu. ²⁴ Isito di la namigeveve evive.

Subuta beloveta isi vatae kosive keau isiviale la elehale ke nahate elehai. Isito abu elehaholilu. Isi abu isiviale la eviale ke nahate abuta evisi. Isito abu ke eviholilu.”

Samalia malaha duae deiada

²⁵ Kateige menaka haivemale malaha moleu hovelahai isiviale Iesu lobohavoi. Isi namihai avoe, “No haivemale ata, dana onole vai bae ukolikoli mai.” ²⁶ Ige Iesuu namihai avoe, “Bukae Hotou hisaiale kemo a hoto oleteale dodavenu.” ²⁷ Ige malaha keu namihai avoe, “A uvu bahata, a isivi bahata, a nego bahata, isi a lulele bahata malei a Kosive baluga Dilava omisi hoesehavonela. Isi a a ebika hoesehavoale ke nahate a haokuvu kebiata isivi ovei hoesegevenela.” ²⁸ Ige Iesuu avuho loui avoe, “A hoto keu inutolotoloale ke nahate vaimae bae ukolikoli manela.”

²⁹ Ige malaha keu ata tedaevelihio isiviholialelua Iesu hoto ke evisi loui avoe, “Di haokaike ole.” ³⁰ Ige Iesuu malaha ke namihai loui avoe, “Malaha moleu Dielusalemale halei Dielikoe tisege laskoloe ataeau humaha tavae evudei ogove dikohai hamai ehalo-vage au nibedai lahai ua. ³¹ Lahai usege Diue dubu nalimale ata moleu humaha nehe kela tiniale malaha nehe abu hamai mai humaha vavae ehaloale ke elehai aehai halei tinu. ³² Ige Livai malaha moleu humaha nehe ke igaeta tinu. Keve tiniale malaha nehe ke elehaito aehai tinu. ³³ Ige Samalia ata moleu humaha kela tinu. Malaha keu Diue ata holioholinu. Isito keu tiale malaha nehe ke elehai avuho uvuanu. ³⁴ Isime tiale abu hamale ke ohe hoesegevei mulamulai vilianu. Isi malaha ke ebagemai mai au ovoo golomo mamoi avuti tiliale ladevemale o moleve tilu. Isi vavi kemo hoesehavoi avuti ua. ³⁵ Iniale vavita hovelahai mune bai baluga malei o ke nalimale malaha omisi namihai avoe, “Ko mai malaha ke nalisi hoesehavonela. Ilive vani mole di tota hoilalahi loholive a avuemo vaesute hatuale ke dana bae tota aoi.” ³⁶ Deiada kateale louge uoholige au malaha ke namihai avoe, “A huhuige malaha abuita igaeta kebia vigomo oleteu abu malaha nehe hamale keti haokanu.” ³⁷ Ige malaha keu Iesu namihai avoe, “Avuho uvuai hoesehavoale ata ke.” Ige Iesuu avuho loui avoe, “Seleveike. Iale ata talive ke nahate vana.”

Iesuu abui tatatie deiati tinu.

³⁸ Iesuu hoto kateale louge uoholige au esemu holoevei tialeau keate mole ivi Mata ke oe tige au malevei o hatuevenu. ³⁹ Isege hohove Meli keu o kemo ua. Iale Iesuu hoto lousege hohoveu velove heimo ugulamoi ui hotove ke gaeahavoma. ⁴⁰ Isege Matau ahuvale lovi vanata Meliho itumuai lohoaleu Iesu namihai avoe, “Kosive, a huhuige di hohou di tedahoholisito keve ugulamoi uge kena duave. Ana vali iomage au loholive di tedahoi.” ⁴¹ Kateai louge Iesuu namihai avoe, “Mata, a keu unie hani huhu baluganu. Isi a kemo huhuihuhui ni mole vanu. ⁴² Isito di hotoe dua eviveve keu baluga. Iale Meliu vaveve keho isiviai vanu. Iale atabeu bae vaveve ke avuemo malivebene.”

11

Iesuu guliguli au esemu haivenu.

(Matiu 6.9-13; 7.7-11)

¹ Vani mole Iesuu matama moleve tiniale au Mama imihaniale uoholisege esemuve moleu avuho loui avoe, “Kosive, guliguliaveve humaha no haive. Dioniu au esemu haiveale ke nahate ata no haivenela.” ² Ige Iesuu abuhou loui avoe, “Noinoi ko nahate louve. No Mama, no isiviale ata bahataeau a ivie tumu hoesehavogei. Ilive a matamae dogau lohoge duave. ³ Isi vani igaegaela no isivie lovi ke noevegenela. ⁴ Ige ata oleteau noemo vaveve toela vage no vaveveabe toela ke huhuoholige ata no vaveve toela ulihai huhuoholi. Isi ainaho no halevesege no Setene lobomo dobuluvilive.”

⁵ Guligulie hoto ke loui haiveito kemo hoto mole abuhou lounu. Isi loui avoe, “Mesoho la moleu vavie minamo au haoka oe tiniege namihai kosea, ‘Aemo lovibe abuita igaetaeau uge daonela. ⁶ Di haoka moleu oai lohoale di oe velemanu. Ige daemo lovibehameu uoholinu.’ ⁷ Ige mesoho auna aho loui kosea, ‘Ainaho di nita huegelive. Di udaha bamui di ese holoevei abuhi aike ladevema. Iale di bae hovelahai lovibe aolivebene.’ ⁸ A haokana hoto kateale louge ana osioi. Isito di laheho louge evive. A haokave holialema au bae hovelahai lovi aolivebene. Isito ana matiholisito negobedai udahavemo hamai imihalage auna bae lovi aoi. ⁹ Iale di laheho louge evive. Lana Dilava imihage auna la isivi ke laovei. Isi lana ono mole kaovaliege bae mave. Isi lana udaha hamage auna bae laheho alavoi. ¹⁰ Kosealemo oleuoleu onoleho Dilava imihage auna isivie ke ovei. Isi oleuoleu ono mole kaovale ke abuna mai. Isi oleuoleu udaha hamage auna abuhou alavoi. ¹¹ La olena eseveu huenaho imihage auna vali ute mai omisi. ¹² Isi mesoho auna ugue unio isiviege auna vali haeho mai omisi. Ba, keu anekianu. Lana isiviabe mai oveve. ¹³ Laeau vaveve toela vamale ataea. Isito laeau la ese kebia hoesegevei isiviabe ke oveveve ke hilokalu.

Iale ke nahate lana la Mamau otogoe umale ke imihage auna la vaveve evihai Munana Tumute laovei.”

Iesu isi Setene

(Matiu 12.22-30; Maka 3.20-27)

¹⁴ Iesuu malaha mole uvute kemo munanae toela nunuvanu. Munanae toela keu avuemo uge keu hotoholinu. Isito munanae toelau uoholige malaha keu bae hotoai hoto louge ataeau ke elehai vikolahalu. ¹⁵ Isito ata degomoleau ke elehai loui avoe, “Munanae toelae kosive Biesabolo ke vuvunemoike Iesuu munanae toela kebia nunuvema.” ¹⁶ Ige ata degomoleau lobohavoi namihai avoe, “Bato, vavevebe negote otogomo vanela. Ige no bae ke elehai hilokai kosea, ‘Dilavaike a hanavonu.’” ¹⁷ Kateai lousege Iesuu huhuihuhuiabe hilokaiabu hotoai loui avoe, “Vata igaemo ataeau mole tasalievei molehi mole haveliege abu bae ui egealivebene. Isi valada igaemo mole tasalievei molehi mole haveliege abu bae ui egealivebene. Abuna katelahaliege solekai uoholisi. ¹⁸ Iale ke nahate Setene ataeabuna mole tasalievei molehi mole haveliege abuna oleve kateai. Keu anekianu. La loui kosea, ‘Seteneike au vuvune daoge di munanae toela kebia nunuvema.’ Isito di ke vuvunemo kebia nunuveholima. ¹⁹ Dana kateai Setene vuvunemo munanae toela nunuvege la esemu abuna ole vuvunemo munanae toela kebia nunuvei. Iale lana la esemu belagevege abuna loui kosea, ‘Dilava vuvunemoike no kebia nunuvema.’ ²⁰ Ige data Dilava vuvunemoike munanae toela kebia nunuvema. Kateige lana ke elehai hilokage Dilava matamae doga ke vuvunue laemo lohonu.

²¹ “Ata negotena au soe mai bi mai au o nibige ove kunai keabuna ue dua vai. ²² Isito ata negote selevana lohoniege ovemo vелеmai hamai soeveta biveta malei ove kunai malei tai. Dovudovue hoto kemo la hilokage di negoai Setene aiahavoi atave nunuvema.

²³ “Iale ata oleuoleu di tedahoholimale keau di aiahavomale ataeabulike. Isi oleuoleu ata maleveve kemo di tedahoholiale keau ata kebia nunuvema.”

Munanae toelaeau hoidevelu.

(Matiu 12.43-45)

²⁴ “Di hoto mole louge evive. Munanae toelana ata mole halei tiniege eu uvesiteve uveve matama kaovai. Isito uveve matamabeu uoholige auna huhuai kosea, ‘Dana hoilalahi di subuta uale kemo ui.’ ²⁵ Kateaime hoilalahi lohoniege ata nehe ke elehage au au uvu hoesehavoge onobenobe toelau avuemo uoholinu. ²⁶ Ige auna tota hoilalahi tiniege munanae toela seveniau (7) vuvune balugale kebia holoevei abuhi lohoniege ata nehe kemo deluhovoi. Ige ata kena toela selevelai. Kosealemo subuta munanae toela igaemo avuemo ua. Isito gabie munanae toela eiti (8) keau avuemo ua.”

²⁷ Iesuu kateai louge keate moleu ata moaga kebia vigomo hovelalahi Iesuho loui avoe, “A mamoi a amumale keate ke vahaehou baluga.” ²⁸ Ige Iesuu avuho loui avoe, “Ito. Isito ataeau Dilava hoto evilike vaimo vahaeho balugatahoalu.”

Ataeau isiviai vikoe vaveve elehai.

(Matiu 12.38-42)

²⁹ Ige ataeau bahata mole bevievevei igaetoai Iesu evilikahavosege Iesuu namigevevei avoe, “Novae ata la koeau atae toelaea. La di belahai isiviale di vikoe vaveve vai. Isito di bae la louale ke valivebene. Isito dana beloveta mole Dionau vale ke nahate dana data vai. ³⁰ Subuta beloveta Dionau vani abuita igaeta huena baluga uvue uge Niniva ataeau ke elehai hilokage Dilavau Diona hanavonu. Ige novae vani komo Atae Esena ataeamo vaveve ke nahate vai. ³¹ Iale Dilava kotae vani kela vata vata mole kuini Siba kena hovelalahi la vaveve toela ke laemo loui. Keate keu haeavamoleve Solomoni luleleai ata haivemale ke elehahou lohonu. Isito di louge evive. Ata moleu Solomoni ke evihale keike ko la vigomo ua. Isito laeau hotove evioholilu. ³² Iale vani kela Niniva ata kebiataebuna bae hovevevei la vaveve toela ke laemo loui. Kosealemo Dionau kebia haivege abu evisi abu vaveve toela halevalu. Isito di hoto ko louge evive. Ata moleu Diona ke evihale keike ko la vigomo ua. Isito laeau hotove evioholilu.”

Vavae ataga

(Matiu 5.15; 6.22-23)

³³ “Atabeu bae lameba hanei mai batabatae valae mahogovalivebene. Isito auna hanei mai batabata golomo mamoge elike ataeau oe uvue loholive atagavemo ui. ³⁴ La ni keau la vavamo lameba nahate. La nina dua vage la uvuna atagai. Isito la niabuna toelage la uvuna loai. ³⁵ Iale huhutumave. Onoilage atagau la uvumo uale keu loama. ³⁶ Isito la uvu bahatamo atagau uge behameu bae loalivebene. Isito lamebau atagale ke nahate auna ataga selevelai ui.”

Iesuu ada totoholinu.

(Matiu 23.1-36; Maka 12.38-40)

³⁷ Iesuu hoto kateale louge uoholige Balisia ata moleu namihai isiviale au avuti lovi isi. Ige Iesuu ove uvue tiniale avuti ugulamoi lovi inu. ³⁸ Keu ada totoholisito avuti lovi ige Balisia ata keu ke elehai vikoanu. ³⁹ Ige Iesuu avuho loui avoe, “Balisia ata la vaveve keau abu melegita kabutae vava totoaito uvuve totoholiale ke nahate. Ateaau la vava elehage keu duave. Isito la uvu kemo huhuihuhue toela moagaeau uge la mole kunaiho isivilahama. ⁴⁰ La keau Dilava vaveve kemo luleleholilu. Dilavau isiviale la la uvuta la vavata hoesegevei. ⁴¹ Iale la uvuu duavealemo lana kunaiholimale kebia tedaevege la vavevena duaveai.

⁴² “Isito lana kateholige Balisia ata, la nohovu. Laeau la bulue lovi ke bahatamo taidi vaito ata hoesegeveholisi Dilava huhuoholilu. La taidi vale keu duave. Isito ata hoesegeveholisi Dilavata huhuoholiale keu toelanu.

⁴³ “Iale Balisia ata la nohovu. La keu isivialeike dubue uvue talive vomue duamo uguivogei. Isi isivialeike talive ata moagaeau umale keve olahai tige abu la elegevei la hoesegevei. ⁴⁴ Iale la nohovu. La keau alue vuta nahate. Ateaau golovela tai lohoito hilokaholilu. Abu huhuai kosea, ‘Mesoho matama duaike ko.’ Isito vata ke uvue ataeau sakavaleike ua.”

⁴⁵ Kateai louge Diue menaka loui haivemale ata moleu lamisi avuho loui avoe, “Kosive, a hoto kateale louale keu notaikae a ke aiogevenu.” ⁴⁶ Ige Iesuu loui avoe, “Menaka haivemale lata la nohovu. Laeau la menaka moaga loui ata haivema. La kebia haiveito tedaevholige abu unaha ke vage keu abuemo isuanu. ⁴⁷ Iale la nohovu. Subuta la buluveau Dilava beloveta haveale kebia vuta laeau nova kaeagevei huhuai kosea, ‘No beloveta kebia hoesegevema.’ ⁴⁸ La vaveve kateimalemoike la buluvehi mole nahate. Kosealemo la buluveau beloveta kebia havege haluvilu. Ige la kebia vuta kaeagevei hoesegeveale kemo la la buluvehi huhuihuhui igaualu. ⁴⁹ Katealemo Dilavau subuta au lulelemo hoto mole lounu. Isi avoe, ‘Dana beloveta isi di hoto loumale ata degomole hanavege abuna ata kebia haiveho tige ataeabuna degomole havei degomole aiogevege abuna vatetumu malei.’ ⁵⁰ Dilavau hoto kateale loualelua novae atate abuna vatehani malei. Kosealemo Dilavau vata vasege ke iae la buluveau beloveta moagamoaga havelu. Ige laeau la buluvehi vaveve igaualu. ⁵¹ Abu vasohuta Eibolo hamalu. Isi kemo lavisi beloveta havei loholata gabivela Sekalaia hamalu. Ke abu dubuta mune vitaleta vigo hamage au hatinu. Iale di la namigevei. Katealemo Dilavana vatetumu baluga novae atate la kebia ovei.

⁵² “Iale menaka haivemale ata la nohovu. La lulele umuka mahogovai ataemo hoto seleve vovoholu. Katealemoike la isiviholilu Dilava hoto eviliho. Isime ata bamuevei isiviholilu abu Dilava hoto eviliho.”

⁵³⁻⁵⁴ Kateai louito hotei tisege Diue menaka loui haivemale isi Balisia ata keau itumulahai Iesu lobohavoi isiviale au hotoeabe kemo dobage abu mai hamai.

12

Balisia ata nibieve tumuave.

(Matiu 10.26-27)

¹ Abu katelahasege ata moagataho seleve keau lohoale molemo neniholisi molemo dai lohohu. Ige Iesuu vasohuta au esemu namigevei avoe, “Balisia ata kebia nibieve dua vave. Kebia vavau duave. Isito uvuiabe keau toelalu. Katealemo kebia nibieve tumuave. ² Abu vaveve toela vai mahogovamale keabuna bae umidamo ui. Ige abu hotoe toela loui mahogovamale kebiataeabuna bae umidamo ui. ³ Iale la onole vavimo mahogovai loumale ke ataeabuna bae vanimo evisi. Isi oe uvue mulumuluamale keta abuna bae ologomo holahai baita louge ata bahataeabuna evisi.”

Nahi ole vabuhavoi.

(Matiu 10.28-31)

⁴ “Di haokuvuia, di laheho louge evive. Lainaho ata havemale kebia vabugevelive. Keabuna vava unaha haveito abu bae munana havelivebene. ⁵ Isito di la haivei. Dilava igaev vabuhavove. Auna au vuvunemo ata havei malevei veneu lahai hodovavesite keve hatuevei.

⁶⁻⁷ “Isito au bae laemo kateale valivebene. Laeau Dilava nimo baluga. Abu ugue ese ada mole malevei voievege ibinaeabena benie kina abuita. Keu ibina baluga holioholinu. Isito Dilavau kebia igaegae nibievema. Isi keu la igaegae kinaenumu ke bahata dodavei hilokaevunu. Iale lainaho vabulahagelive. Ugueau Dilava nimo eseve. Isito laeau nivemo baluga.”

*Iesu ivi loui ata haiveveve**(Matiu 10.32-33; 12.32; 10.19-20)*

⁸ “Di la namigevege evive. Oleuoleu atae vigomo loui kosea, ‘Dau Iesu ata dailike ko.’ Ige dana data Dilava anelu kebia vudimo loui kosea, ‘Keu di atalike.’ ⁹ Isito oleuoleu atae vigomo loui kosea, ‘Dau Iesu ke hilokaholinu.’ Ige dana data Dilava anelu kebia vudimo loui kosea, ‘Di ata ke hilokaholinu.’

¹⁰ “Iale oleuoleu hotoe toela loui di aiohavoge Dilavana toelave ke ulihai. Isito oleuoleu hotoe toela loui Munana Tumute ke aiohavoge Dilavau bae toelave ke ulihalivebene.

¹¹ “Ige abu la malevei dubue kosive biae kotaho tige lainaho gasigasiai vabulahalive. Isi mesoho abu la malevei gamanie kosivemo kotaho tige lainaho la hoto louveve ke huhulahalive. ¹² Kosealemo vani kela Munana Tumutena bae la hoto louveve ke la haivege bae louve.”

Kunaite ata luleleholiale

¹³ Au kateai loui au esemu namigevesege ata moaga kebia vigomo ata moleu hoai loui avoe, “Kosive, no mamau hatialelua di nana namihage au di maae kunai tasaliai degomole daoi.” ¹⁴ Ige Iesu namihai loui avoe, “Ba, di bae la avutie vaveve ke kaovai kunai ke tasialivebene.” ¹⁵ Kateai louito namigevei avoe, “Loboe vaveve vamale kebiamo la ebika nenigeveve. Lainaho kunai kebia huhueve moagalive. Kosealemo lana la kunai moaga huhueveliege bae uveve dua seleve valivebene.” ¹⁶ Iesuu hoto ke loui kemo dovodove hoto mole loui haivei avoe, “Malaha mole kunai moagete vata vata duave. Iale keu kemo lovi haiveve lovive bahata keau holoeavo dua valu. ¹⁷ Iale malaha ke valahuu tobalohoge keu huhuai avoe, ‘Dana onole vai. Dana oleve kateai di lovi otovei.’ ¹⁸ Isi huhuai avoe, ‘Di koseige duave. Di di valahu kobia koievei balugataho unaha hovevei. Ilive elike kebiamo di lovi di kunai otovege abu dua vai. ¹⁹ Dana kateale vaniege di ebika hoesehavoi ue dua vai. Ilive vagana moaga kemo teigeve unaha isi vahaehoai ugei.’ ²⁰ Malaha keu vaveve kateale huhuisege Dilavau avuho loui avoe, ‘A keu luleleholinu. Iale ana novae vavi komo hatinela. Isege ataeabuna bae a lovi nehe bevuevei otovemale ke bahata malei.’” ²¹ Iesuu hoto kateale louito ke ihu loui ata namigevei avoe, “Oleuoleu Dilava kunai huhuholisito vatae kunai huhulahai abu omo otovemale keau malaha nehe ke nahate.”

*Dilava igae huhulahave.**(Matiu 6.19-34)*

²² Iesuu kateai louito au esemu namigevei avoe, “Katealemoike di laheho loui kosea, ‘Lainaho la iveve isi ogo vaveve kebia huhu balugagelive.’ ²³ Kosealemo nahie uveve keu lovi iveve ke evihanu. Isi la uveve keu ogo hatueveve keta evihanu. ²⁴ Ugu kebia elegeveve. Keau bululahai valahu hou avuemo lovi lovi otoveholima. Isito Dilavau kebia nibievei lovi ovema. Iale laeau kebia evigeveale kemo Dilavana la tedeave dua vai. ²⁵ La oleu au uveve ke huhu moaganiege auna oleve kateai au uveve vagana ke mai egetisi. Katealiveu anekianu. ²⁶ Vaveve esehame keu laemo anekiasenge la osiohoike onobenobe kebia huhueve moagama. ²⁷ Isi botoe valavalaeanu ulimale vaveveabe kebia elegeveve. Keau lovilahai ogo vaeveholima. Isito di la namigevege evive. Solomoni keu kunai moagete. Isi keu ogo dua vama. Isito ogove dua keau valavalaee dua kebia evigeveholilu. Iale Dilavau kaeagevei nibieve dua vamale kemo la hilokage auna lata nibieve dua vai. ²⁸ Valavala keabuna nova uito nivu tutukai gililahage ataeabuna bevuevei mahoevege keabuna uoholisi. Isito Dilavau gadegevei nalieveale ke nahate auna la nalievei ogo laovei. Seleveta auna laheho kateale vai. Isito la evievi keu esevhameanu. ²⁹ Iale lainaho lovita eta iveve kemo huhu moagagelive. ³⁰ Evieviholimale ata kebulike vatae onobenobe huhu moagama. Isito la Mamau otogoe umale keu laemo onoleu uoholiale ke hilokanu. Iale auna ke laovei. ³¹ Iale lana vasohuta Dilava matamae doge ke humaha kaovai isivive vage auna onobenobe kebia bahata laovei.

³² “Iale di esea, lainaho vabulahalive. Laeau moaga holioholilu. Isito Dilavau au isivimo la hoesegeveale laeabuna bae adave vuvunemo uve. ³³ Iale la kunai ke malei voivei moni ke malei kunaiholimale kebia oveve. Lana kateale vage otogoe la mogamogana tobalohoi ui. Ige kei la kunaina balugage ataeau bae vavoloalivebene. Isege segeleu bae bohilivebene. ³⁴ Iale vani bahata la kunai umale keve la uvuna ugei.”

Esemue dua isi esemue toela

³⁵⁻³⁶ “Di hoto mole louge evive. Esemuiabu ogo vai abu lameba hanei abu kosive hemei umale ke nahate la vaveve hoesegeve la kosive hemei uve. Kosealemo kosiveabeu abu mole holoeveale keve tiale hoilalahai lohoma. Iale auna lohoniege udaha hamage abuna solekavesite avuho udaha alavoi. ³⁷ Esemuiabe keau abu vaveve gadehavoi

nita hemei ualemo kosiabe kena lohoniege vелеmai elegevege abuna vahaeholahi. Ige kosiveabena namigevege abuna uguivosege auna au ogo vukai tiniege abuhu vasiai ovege abuna isi. ³⁸ Mesoho auna vavie vigomo o vae alalamita lohoge esemuiaabe keabuna nita uliege elehai vahaeholahi. ³⁹ Katealemo ko huhulahave. Mesoho oe biageu vavoloe atа lohoveve vani ke auna hilokai nita uniege vavoloe atа keu bae ovemo vavololivebene. ⁴⁰ Iale lata nita uve. Kosealemo Atae Eseu lohoveve vani ke lana hilokaholisege auna bae lohoi.”

*Evievite isi evieviholiale esemu
(Matiu 24.45-51)*

⁴¹ Au kateai louge Bitau namihai loui avoe, “Kosive, ana no unahahoike ke louma. Emena atа kobiatahoike a ke louma.” ⁴² Ige Iesuu avuhu loui avoe, “Oleuoleu evievi atа holisi kemo lulelelahale kebiahoike di ke lounu. Iale balugavena abuhu louge abuna ove ke nalisi bae esemu degomoleta nalievei lovi ovegei. ⁴³ Isege kosivevena tiniege totа hoilahi lohoniege esemuveu lovie dua vale ke elehai vahaehove vai. ⁴⁴ Iale seleveta di la namigevema. Kosivevena atа esemu ke ebagemage kena kunaive bahata nalievei. ⁴⁵ Isito kosivevena haeavamole tige esemuvena huhuai kosea, ‘Keu bae solekai loholivebene.’ Isi kateai au kosive esemu degomole havei lovi baluga isi e toela ige kinavena luleleholisi. ⁴⁶ Iniege vani mole kosiveveu lohoveve ke hilokaholisege auna lohoniege esemu ke elehai hamai lovive kemo iomage auna tiniege evievi atа holioholiale kebiahi ui.

⁴⁷ “Keu kosive ke isivi hilokanu. Isito isiviholinu ke valiho. Katealemo auna bae vatehani baluga malei. ⁴⁸ Isito esemu olena au kosive isivi hilokaholisito vaveve toela vaniege auna vatehani esehame malei. Kosealemo Dilavau lulele isi vuvune baluga atа olete bia oveime isiviale keau abuta kemo lovi baluga vai. Isito lulele isi vuvune eseve atа olete bia oveime isiviale keau kemo lovi eseve vai.”

*Abu Iesu vavevemo mole tasalievulu.
(Matiu 10.34-36)*

⁴⁹ Iesuu totа loui avoe, “Dana lohoniege vata ko mahoi aiohavoi. Isito di isiviale aike vene ke beige au lahai. ⁵⁰ Gabie dana babatiso ni molete vai. Iale di isiviale vatehani ke solekai mage atа uholohisi. ⁵¹ Iale la huhuige ataeau molehi ue dua valihonike di vatae lohonu. Ba, di kateho lohoholinu. Isito ataeau mole tasalievehoike di kove lohonu. ⁵² Iale novae vani komo ese bahata ada mole keabuna mole tasalievei. Abuitа igaeta keabuna ivi mole. Isege abuitа keabuna ivi mole. Moleabuna di atа holisege moleabuna di aiohavoi. ⁵³ Iale mamuvu abuna abu ese aiogevesege eseabe abuna abuta abu mamuvu aiogevesege neinuvu abuna abu ese aiogevesege eseabe abuna abuta abu neinuvu aiogevei. Isege maivu abuna abu maivu aiogevesege maivuabe abuna abuta abu maivu aiogevei.”

*Vanie vaveve elehai lulelelahai.
(Matiu 16.2-3)*

⁵⁴ Iesuu kateai atа esemuho louto atа bahata namigevevei avoe, “La vaveve keu koseanu. Lana vaniu dobamale keve elehage goeu lohoge lana loui kosea, ‘Venina lohoi.’ Ige auna lohoi. ⁵⁵ Isi lana elehage helukana seloeatae lohoge lana loui kosea, ‘Vanina vuvuneai.’ Ige auna vuvuneai. ⁵⁶ Isito laeau loboe ataea. La vata elehai otogo elehai lulelelahalu. Isito laeau aike laemo lohoveve ke hilokaholilu.”

*La bahoe hoesehavoveve deiada
(Matiu 5.25-26)*

⁵⁷ “Osiohoike laeau la ebika hoesegevei vaveve dua kaovaholilu. ⁵⁸ Iale mesoho malaha moleu isiviale la malevei kotaho tige vasohuta avuti igaetoai la vaveve ke kaovai hoesehavove. Iale lana kateale vaholige la bahoena la malevei kotamale atae tai. Ige kotae atа kena la malevei bukate ovege abuna la malevei dibulae hanavei. ⁵⁹ Iale di la namigevei. Laeabuna dibulae uliege ke ibina vahatugeto abuna bae la iovei.”

13

Vaveve toela halevaveve

¹ Kateimale vanila atа degomoleau deiada mole loui Iesu namihalu. Deiada keu koseanu. Vani mole Galili atа degomoleau ovo havei mahoi Dilava hoesehavosege gamanie kosive Bailoti esemuiau atа kebia havege abu haluvilu. ² Ige Iesuu deiada ke evisi namigevevei avoe, “La huhuige kosive keu kebia haveale vaveveabe toela kena Galili atа degomole kebia toela evigevenu. ³ Ba, di la namigevei. La huhuige keau vaveve toela vamale ataea. Isito laeau mole nahate. Lana la vaveve toela halevaholiliege lana lata haluvive. ⁴ Ige subuta Dielusalemāe o mole egetana ivi Salomu keu bokolahai dobai

ata eitini (18) havege abu haluvilu. Iale la huhuige haluviale keau Dielusalema ata degomolebia vaveve toela evigevelu. ⁵ Ba, di la namigevei. Mesoho lana la vaveve toela halevaholiliege lana lata haluvive.”

Idimo dovudovue hoto mole

⁶ Iesuu kateai louito kemo dovudovue hoto mole loui haivei avoe, “Malaha mole bulue uvumo idi mole ivi vigi keu kemo laminu. Iale malaha keu tiale idi ke adamo niage baiholinu. ⁷ Ige au bulumo loviemale ke namihai loui avoe, ‘Vagana abuita igaeta di idi ko adamo niage keu baiholinu. Iale heinela. Keu vata komo lamisito hahumaholige keu toelanu. Idi keu uoholige mole duana kove ulisi.’ ⁸ Ige esemuve keu namihai avoe, ‘Kosive, halege au vagana ko igaemo ui. Isege di bae vata bisi momoluta bisi malei umukave omisi. ⁹ Ige au gabie vaganamoma baiage keu duave. Isito au baioholige nahi bae heisi.’”

Iesuu bulamo keate mole hoesehavonu.

¹⁰ Iesuu hoto kateale tovetove lounu. Iniale bula molemo tiniale Diue dubue ata haivema. ¹¹ Isege dubu ke uvue keate mole munanae toelau avuemo biloale keu keve ua. Vagana eitini (18) ke uvumo munanae toela keu keate keti uale vavahaniage inuveu keukanu. Ige au inuta lamiholisito holumai oima. ¹² Ige Iesuu keate ke elehai hohavoi avoe, “Ei, nova a vavahani keu aemo uoholinu.” ¹³ Isi au ada mai tatavemo mamoge solekavesite inuve nehe keu inutolotoige au inuta lamisi Dilava hoesehavonu. ¹⁴ Keate keu kateige dubue kosive keu itumuanu. Kosealemo Iesuu bulamo keate ke hoesehavonu. Ige kosive keu ata namigevei loui avoe, “Vanie ni bahata ada mole isi igaie ke uvumo nahi lovilahai dubue loholive vavahanite kebia hoesegevegei. Isito bulamo vavahanite kebia hoesegeve halevave.” ¹⁵ Kateai louge Iesuu avuho loui avoe, “Loboe ataeu. Ataeau la vaveve elehage duave. Isito la uvu keu toelanu. Iale di louge evive. La keau bulala la ovo vavegevei malei ebavae e oveho timale kemo la ovo kebia hoesegevema. ¹⁶ Isito la isiviholialeike di bulamo Ebalahamu valada ko hoesehavoliho. Setene keu vagana eitini (18) ke uvumo keate ko aiohavoge keu toelai ua. Iale la huhuige dana bulamo hoesehavoge kena duave.” ¹⁷ Kateai louge aiohavomale ataeau matilahalu. Isege ata bahatae au Iesuu vaveve dua vamale ke elehai vahaeholahalu.

Masitae ie deiada

(Matiu 13.31-32; Maka 4.30-32)

¹⁸ Ige Iesuu kebia namigevei avoe, “Ataeau Dilava adae vuvunemo uveve kemo dana dovudovue hoto oleteale louge lana bae kemo lulelelahave. ¹⁹ Ataeau Dilava adae uvumo uveve keu masitae i nahate. Masita ke iu esevehame. Isito lana ke sesilahage kena ulisi balugage uguaiabuna loholiege adavemo hasolahai. Iale ataeau Dilava adae vuvunemo ui moagatahoai ue dua vaveve keu kateanu.”

Beikini baudae deiada

(Matiu 13.33)

²⁰ Iesuu tota hoto mole abuhu lounu. Avoe, “Dana oleve kateai ataeau Dilava adae vuvunemo uveve ke laheho loui. Keu beikini bauda ke nahate. ²¹ Keateabuna beikini bauda ke mai valavamo keiohai ebuehage kena valava ke mai balugatisi. Iale ataeau Dilava adae uvumo ui moagaveve keu ke nahate.”

Udahae ese

(Matiu 7.13-14, 21-23)

²² Iesuu kateai louito halevei Dielusalemae tinu. Isi keve timale humaha tavae o igaegaela ata haivei tima. ²³ Ata haivei tisege ata mole igaie avuho loui avoe, “Kosive, ata moagavesite unahaeabuna otogoe tai.” ²⁴ Ige Iesuu ata bahata namigevei avoe, “Otogoe udaha keu esevehame. Ialelua negolahalive udaha kela velehovoi teve. Ata moagaabuna isivilahai o ke uvue tai. Isito kena abuemo anekiai.

²⁵ “Kosealemo o ke biagena hovelahai udaha ke bamui. Ige lana tiliege iave lavisi udaha hamihamiai loui kosea, ‘Kosive, noheho udaha alavo.’ Ige o ke biagena laheho loui kosea, ‘Di la hilokaevoholinu. La oleve keveike lohohu.’ ²⁶ Ige lana hotove ibina vai loui kosea, ‘Ba, noeau subuta aluvuta lovi isi e imale ata noeabulike ko. Isi no oe a no haivemale ata noeabulike ko.’ ²⁷ Ige oe biagena tota loui kosea, ‘Di la namigevei. Di la hilokaevoholinu. La oleveike lohohu. Laeau atae toela unaha. Iale tai di haliove.’ ²⁸ Kena kateai laheho louge lana udahae iae ui uvulahai ninalahaime bae monomo hediavoge. Kosealemo Ebalahamu, Diekobo, Aisiki isi beloveta bahata keau Dilava matamae doge keve usegeto laeabuna heie uve. ²⁹ Isege vaniu velemai dobamale keve isi vaki mole isi vaki mole keve ataeabuna loholiege Dilava matamae doge keve igaetoai uguaiavoi lovi isi. ³⁰ Ige kateimale vanila uli holiale keabuna gabi holisi. Isege gabi holiale keabuna uli holisi.”

Iesuu Dielusalema obiaho huhuanu.
(*Matu 23.37-39*)

³¹ Iesuu kateale louniale uoholisege Balisia ata degomoleau lohoale avuho loui avoe, “O ko halei matama moleve tenela. Kosealemo gamani kosive Elodiu isiviale ahamoi.” ³² Ige Iesuu namigevei avoe, “Malaha keu ata lobogevemale mi mole veleki ke nahate. Iale talive ke namihai loui kosea, ‘Dau nova nivu vavahanite kebia hoesegevei degomolemo munanae toelau umale kebia nunuvema. Iale alamege dana Dielusalemae velemasege di lovi kona uoholisi.’” ³³ Iale dana nova tai nivu tai alamege velemai. Kosealemo abu subuta Dielusalemae Dilava ata moaga havemale kemo Dilavau isiviale di talive Dielusalemae abu dahavoge di hatai.

³⁴ “Iei, Dielusalema ata la nohovu. Dilavau au hoto louveve beloveta laheho hanavege la muneta kebia havege abu haluvilu. Vani moaga di isiviale la malevei di adae uvumo otovei. Kokoluguu au ese bevueve goloeabemo amuleale ke nahate. Isito laeau daho isiviholilu. ³⁵ La katealemo gabie la o kena samiai uoholisi. Iale di la namigevege evive. La bae tota di elehalivebene. Isito lana la vaveve toelamo hoidevei loui kosea, ‘No Kosiveu Dilava ivimo lohohi no hoesegevenu.’ Lana kateai louliege bae tota di elehave.”

14

Iesuu vavahanite malaha hoesehavonu.

¹⁻² Bula molemo Iesuu tiniale Balisia kosive mole oe avuti lovi isege malaha mole adaveu veloveti uvu balugaleu Iesue lohosege ataeau nibi tumutumuama. ³ Ige Iesuu menakae kosive isi Balisiae ata kebia belagevei avoe, “La huhuige nahie menaka kemo nahiabuna valive bulam vavahanite kebia hoesegevei. Emena osioi.” ⁴ Kateai louge abu hotobe louholilu. Ige Iesuu malaha ke mai hoesehavoge vavahaniveu uoholige iomage tinu. ⁵ Isege au bae namigevei avoe, “La esebeu o la ovobeu bulamo abata vuvehage lana vali osioi. Lana solekai ke laluvave.” ⁶ Kateai louge kosive keau hotove ibina louveve humahau uoholinu.

Iveve hoto

⁷ Iesuu kateaito elehasege lovi iliho lohoale keau isiviale ata ivite kebia nahate vai vomue duamo uguiavoi. Ige Iesuu ke elehai hoto koseale abuhu lounu. ⁸ Avoe, “Mesoho malaha moleu au mae ibina vaveve kemo la namigevege lainaho talive vomue duamo uguiavolive. ⁹ Isito mesoho la kemo uguiavosege oe biagena kosive mole baluga melamei lohoniage laheho loui kosea, ‘Evihasege kosive kou a lovomo ugumai.’ Kateige lana matilalahi bae heie matamae toelamo uguiavove. ¹⁰ Lainaho katealive. Isito oe biageu laheho ionage talive heie matamae toelamo uguiavove. Isege oe biageu bae laheho loui kosea, ‘Di haoka, hovelalahi ehue matamae dua kove uguma.’ Lana vaveve kateale vage ataeabuna la elegevege lana ata baluga holive. ¹¹ Iale oleu au ebika ebagemale ke Dilavana etolemai. Isito oleu au ebika etolemale ke Dilavana ebagemai.”

¹² Iesuu hoto kateale loui ata namigevege uoholige au avuti lovi iale ke namihai loui avoe, “A iveve baluga vaniege ainaho bae a haokuvu, a deholuvu isi kunai moagate kebia hohavelive. Kosealemo ana kateale vage keabuna gabie abuta kateale valiege a hohavoi. ¹³ Isito a iveve baluga vaniege kunaiholimale, velo toelate isi ni kedute kebia hohavenela. ¹⁴ Ana kateai lovi kebia ovege keau bae a lovi ke ibina vai aovalivebene. Ige kemo ana vahaehoanela. Kosealemo gabie Dilava nimo vaveve dua vamale keau hovedevemale vanila Dilavana bae ibinae dua aoi.”

Kosive moleu alia baluga vai ionale deiada
(*Matu 22.1-10*)

¹⁵ Iesuu kateai louge malaha moleu keve ugulamoi lovi iniale hoto ke evisi avuho loui avoe, “Ata olena Dilava matamae dogae tiniege avuti lovi iniege auna vahaehoai.” ¹⁶ Ige Iesuu deiada mole loui namihai avoe, “Malaha moleu lovi baluga vai au haokuvuho ionanu. ¹⁷ Iniale lovi vamale vani kela au esemu namihai avoe, ‘Talive di haokuvu namigevei kosea, Di lovi vage uoholialelua lohove.’” ¹⁸ Ige esemue keu tiale haokuvuiba bahata namigevenu. Ige keau bahata isiviholilu lohohi. Moleu namihai avoe, ‘Iei, di vata mole voiale dana tiniege elehai. Iale talive a kosive namihai kosea, Keu katealemoike lohoholinu.’ ¹⁹ Ige moleu esemue ke namihai loui avoe, ‘Di ovo bahata ada mole isi ada mole voievenu. Iale dana aike tiniege kebia elegeve. Iale talive a kosive namihai kosea, Keu katealemoike lohoholinu.’” ²⁰ Ige moleu esemue namihai avoe, ‘Di aike di mahina melamenu. Katealemo di bae talivebene.’” ²¹ Ige esemueu hoilalahi tiale hoto ke bahata loui au kosive namihage kosive keu ke evisi itumuai au esemu hanavoi avuho loui avoe, ‘Solekai talive humahae do, humahae ese kebiala velo golote, ni kedute, isi kunaiholimale

kebia holoevei lohonela.’ ²² Ige esemuve keu tiale ata kebia holoevei lohoale kosive ke namihai avoe, ‘Di a louale ke vage uoholinu. Isito a o kou gigioholinu.’ ²³ Ige au tota namihai avoe, ‘Talive botoe ata namigevevi holoevei lohonela. Ige di o kou elike tobalohoi. ²⁴ Seleveta di a namihai. A vasohuta namigeveale keau bae di lovi ko ilivebene.’”

Iesu ehovaveve deiada

(*Matiu 10.37-38*)

²⁵ Vani mole Iesu tige ata moagatahoeau ehovai avuluvuta tilu. Ige au hoilalahi abuhou lounu. ²⁶ Isi avoe, “Oleuoleu vasohuta di ehovaho valiege abu lako abu ebia huhuevelive. Isi abu mamuvu, abu neinuvu, abu mahinuvu, abu ese, abu hohuvu, abu mahoho, abu mohoho huhuevelive. ²⁷ Oleuoleu di ehovai vatehani maleale keau di esemu selevela. Isito oleuoleu di ehovai vatehani maleho isiviholiale keabuna oleve kateai di ata holisi. ²⁸ Mesoho malaha moleu isiviai o houliho vaniege auna vasohuta ugumai onobenobe voieveve ke ibina huhuai hisalievei. Isiviai hilokage monive kena vali onobenobe bahata malege au gabiai. ²⁹ Isito auna onobenobe ke ibina hilokaholisito vasohuta o houniege auna hade unaha uluvei golovemo ilada unaha detisito o houholige ataeabuna ke elehai hehavo. ³⁰ Abuna loui kosea, ‘Malaha keu au o houito hou gabioholinu.’ ³¹ Ke nahate mesoho vatae kosive moleu au esemu teni taoseni (10,000) holoevei vatae kosive mole isi esemuiabe tueniti taoseni (20,000) kebiahi mole haveho vaniege vasohuta auna huhuai kosea, ‘Dana vali negoalve kosive ke isi esemuiabe kebia havei nunuvei.’ ³² Isito auna huhuige avuemo anekiage auna au esemu hanavege abu vasohuta tiliege kosive nehe keu haeavamole lohosege abuna namihai kosea, ‘No kosive isiviale nahi mole have halevaito igaetoai molehi ue dua vai.’” ³³ Iesu deiada kateale louito abuhou loui avoe, “Ke nahate la di ehovaho valiege vasohuta la onobenobe vaveve ke huhu halevaito bae di ehovave.”

Madea hoto

(*Matiu 5.13; Maka 9.50*)

³⁴ “Madea keu duave. Isito auna toelage hevena uoholige auna oleve kateai bae tota heai. Keu anekianu. ³⁵ Madea keu toelage lana ke mai mihatuve. Iale ata laeau madea ke nahate. La Dilava hotoe dua evisito la vaveve kena ataemo toelage lana oleve kateai bae tota duave holisi. Iale oleuoleu hoto evimaleau hoto ko evive.”

15

Mamoeu tebuale hoto

(*Matiu 18.12-14*)

¹ Vani mole takesi malemale ata moaga isi atae toela degomole keau Iesu hoto eviliho lohohu. ² Ige Balisia ata isi Diue menaka loui haivemale kosive keau ke elehai loui avoe, “Ata keu vaveve toelalike au vaima atae toela kebiahi igaetoai lovi inu.” ³ Kateai louge Iesu abuhou hoto koseale lounu. ⁴ Avoe, “Mesoho la moleu mamoe bahata uani handele (100) maleniege igaue detitisi tebuige auna osioi. Auna mamoe moaga kebia halevei igae ke kaovanata ke elehai. ⁵ Auna ke elehai vahaehoai. Isime ke ebagamai mai au begomo mamoi ebamoi tai. ⁶ Isi auna ke ebamoi hoilalahi au oe tiniege au haokuvu namigevevi kosea, ‘Di ovo nehe detitiale ke di kaovanata elehai mai lohohu. Iale lohoge nahi igaetoai vahaeholalahi.’” ⁷ Iesu deiada kateale louito namigevevi avoe, “Iale ke nahate atae dua nainti naini (99) keau detuluviholisito vaveve dua unaha vage otogoe aneluhaga vahaeholalahi. Isito ata igaena vaveve toela vaniege kemo hoilalahi Dilava ehomage otogoe aneluhaga vahaeho balugalalahi.

⁸ “Isi mesoho keate moleu kina vahate teni (10) maleale kemo igae ehalomaniege auna ke osiohavo. Auna lameba hanei atagavemo o hamai vahate ke kaovai. Auna oe uvu bahata kemo kaovae dua vaniege elehai mai. ⁹ Ke maniege au haokuvu hohavege abu igaetoai usege auna namigevevi kosea, ‘Di vahate ehalomale ke kaovanata elehai vahaehoanu. Iale nahi bahata vahaeholalahi.’” ¹⁰ Di louale ke nahate atavena au vaveve toela halei Dilava ehomage Dilava aneluhaga ke elehai vahaeho balugai.”

Abui nanatie deiada

¹¹ Iesu hoto kateale louge uoholige tota au deiada mole loui Balisia ata kebia haivenu. ¹² Isi loui avoe, “Malaha mole move abuitaeau uale debukaveu au mama namihai avoe, ‘A kunai tasalievei daho molete daonela.’ Kateai au mama namihage mamaveu kunai ke tasaliai nanaveho mole omisi avuho mole ominu. ¹³ Ige hohoveu uniale vani mole au kunai nehe ke ataemo voievevi moni malei au mamae o halei haeavamoleve tiale keve vaveve toela moaga vai kemo au moni hatuhatu. ¹⁴ Isime keve au moni hatui gabianu. Iniale vata keve vae balugau lohoge mo keu kunai holioholi selevelanu. ¹⁵ Isi tiale malaha moleu ovo ovemale ke namihage au louge au bae avuemo loviai ovove kebia

lovi ovema. ¹⁶ Ataeau lovi omioholige mo keu kemo vaeta loviai isiviale ovoe lovie vate ke isi. ¹⁷ Kateinata bae au uvumo huhuai avoe, 'Di mamae esemu bahata keabuna abu isiviamale ke ige uniabe abuna hanilahagei. Isito dau kove ui vaeai vaeo hatima. ¹⁸ Iale di hovelalai talive di mama namihai loui kosea, Mamai, dau Dilava nimo vaveve toela vai a ivi keta aiahavonu. ¹⁹ Iale ainaho dahoe loui kosea, Di mo. Isito dahou loui kosea, Di esemu.' ²⁰ Kateai huhuai bae hoilalahai haeavamole au mamae o tinu. Isege mamaveu moveu tiale humaha kemo niai uniale moveu humaha kela haeavamolela lohosege ke elehage ninanau uvuve hamage au ke elehai bibuai tiale au mo evudei ulikukuhavonu. ²¹ Ige moveu loui avoe, 'Mamai, dau Dilava nimo vaveve toela vai a ivi keta aiahavonu. Iale ainaho bae dahoe vaholinu, Di mo.' ²² Kateai louge mamaveu au esemu namigevei avoe, 'Solekai ogoe dua mai avuemo holovave. Isi lini mai adavemo hatui tamakata mai velovemo hatuve. ²³ Isi talive ovo mole batate hamai mai lohove. Ige nahi lovive vai vahaeholahai. ²⁴ Kosealemo di mo kou hatiale nahate vanata nova ua. Kou subuta nahehi uoholinu. Isito aike nahi tota elehalu.' Hoto kateale louge uoholige abu lovive valu.

²⁵ "Abu ke vasege mo ke nanau bulue uniale hoilalahai oe vavae lohoi evisege abu sale hamai havulahama. ²⁶ Ige au au esemu mole belahai avoe, 'Abu osioma.' ²⁷ Ige esemuve keu namihai avoe, 'A hohou ue dua vanata nova hoilalahai lohoike vage a mamau ke elehaikae vaime ovo mole batate hamai lovive vama.' ²⁸ Ige au hoto ke evisi itumu balugai oe taliho isiviholinu. Ige mamaveu bae lohoale sovavihai namihai avoe, 'Lohonela.' ²⁹ Ige au au mama namihai avoe, 'Di hoto louge evinela. Vagana ko moagamo di a tedahoi lovi baluga vanu. Isi di vani bahata a hoto evie dua vama. Isito au vagana ke bahata uvumo vavevebe dua dahoe vaholinu. Isi ovobe ese mai daoge di haokuvuhi lovibe vai ioholinu. ³⁰ Isito a mo keu tiale teibae keatehi oai abuemo a moni hatueveniale hoilalahai lohoge au ovo batate hamai lovive vanu.' ³¹ Ige mamaveu avuhu loui avoe, 'Di mo, au vani baita daiti ua. Ige di kunai bahata keau a onoeabulikea. ³² Isito nahi vahaeholahage keu duave. Kosealemo a hoho keu tiale hatiale nahate vanata nova nita ua. Keu subuta nahie halevei tinu. Isito aike hoilalahai lohoge nahi elehalu.' "

16

Kunaite mole esemuu lulele balugate

¹ Iesuu tota au esemu namigevei avoe, "Malaha mole kunai moagate keu esemu mole mage au avuemo loviai monive ke vavoloima. Ilage ata moleu lohoale kosive ke namihanu. ² Ige kosiveveu hohavoge au lohoge au namihai avoe, 'A osioma. Di evige a di vavohama. Iale a di vavohale ke bahata hisalaih daonela. Kosealemo a bae tota daemo lovalivebene.' ³ Ige esemu keu huhuai avoe, 'Di kosivena di halege dana osioi. Di heie lovi kemo negoholinu. Isi di moniho ata imigeveleho matianu.' ⁴ Isi kemo huhuai avoe, 'Di kosivena di halege dana vaveve onole vai atahi haokuvuage abu elike di mai o hatui.' ⁵ Isi kateai ata degomole hohavege abu lohohu. Ata keau subuta kosive kemo kunai baluga malei bukinialu. Iale esemu keu ata igaegae namigevei avoe, 'A kunai vaesute di kosivemo malenu.' ⁶ Ige moleu loui avoe, 'Dau olive oele botolo uani handele (100) bukiniai malenu.' Kateai louge esemu keu namihai avoe, 'Halege nahi lobohavoi handele (100) haleito viviti (50) loui.' ⁷ Isi halei malaha mole namihai avoe, 'Isege a. A vaesute di kosivemo bukiniai malenu.' Ige au loui avoe, 'Di laisu baeki uani handele (100) maleito ibinave vaholinu.' Ige esemu keu loui avoe, 'Halege nahi lobohavoi handele (100) haleito eiti (80) loui.' ⁸ Kateige kosive keu ke evisi loui avoe, 'Di esemu keu lulelete ata.' " Iesuu deida kateale louito ihuve keta lounu. Isi avoe, "Vatae ata keau abu haokuvuhi igaetoai vaveve kemo lulele balugalau. Isito atagae ata keau kemo luleleholilu."

⁹ Tota namigevei loui avoe, "Evide. La moni la kunai kemo atahi haokuvulalahai oveve. Kateige la moniu uoholige kosivena ehue la malevei o hatuevei. ¹⁰ Olena vaveve ese kemo inutolotoanige auna vaveve baluga ketamo inutolotoloi. Isito olena vaveve ese kemo loboanige auna vaveve baluga ketamo loboai. ¹¹ Iale lana vatae kunai kemo lobolahalige oleve kateai bae otogoe kunai seleve malei. ¹² Isi lana la haokuvu kunai ke neniai hoeshavoholilige oleve kateai bae la ebiaho kunai malei.

¹³ "Esemubeu bae kosive abuiho lovalivebene. Auna kateanige mole isivi omisi mole kabebihavoi. Isi mesoho moleho neniai loviaito moleho neniai lovalivebene. Iale ke nahate la bae Dilavata monita igaetoai ehovallivebene."

Balisia ataeau Iesu hehavolu.

(Matiu 11.12-13; 5.31-32; Maka 10.11-12)

¹⁴ Iesuu kateai louge Balisia ataeau abu uvu mai monimo mavoale keau ke evisi kabebihavoi Iesu hehavolu. ¹⁵ Ige Iesuu abuhu loui avoe, "Laeau la ebika tabagevege ataeau la elegevei loui avoe, 'Keau ata duaea.' Isito Dilavau la uvu hilokanu. La vaveve

kateale vage ataeabuna la hoesegevei. Isito Dilava nimo vaveve katealeu mesiae hisi ke nahate.

¹⁶ “Moseseu menaka hisaliage belovetata hisaliale hoto ke ataeau subuta ehovalu. Isito Dioniu lohoaleu ataeau Dilava adae vuvunemo uveve hotoe dua ke loui ata haivege ataeau aike molehi tavalala isiviale solekai Kosive adae vuvunemo uliho tai. ¹⁷ Dilavau menaka ke bahata loui mamoge keu ua. Iale vatana otogoti uholisege menaka ke behameu bae uholilivebene.

¹⁸ “Malaha molena au mahina halei keate mole melameniege au keate ke vavamoike au ke vavoloanu. Isege malaha molena malaha ke keate melameniege malahave ke vavamoike au ke vavoloanu.”

Kunaite malaha isi Lasolo

¹⁹ Iesuu hoto kateale louito deiada moleta lounu. Isi avoe, “Vani mole malaha mole kunai moagate keu ogoe dua ibina balugate hatui lovi baluga isi ua. ²⁰ Isege malaha mole kunai vesite ivive Lasolo keu ata kubite. Iale abuna ke melavei lohologie kunai moagate ke udahamo mavoge. ²¹ Ige kena kemo ugei. Isivialeike kunai moagate ke lovie sigu igei. Kateai kemo usege toeabuna lohologie kubive ke tevegei. ²² Iniale malaha keu hatige aneluiuu lohoale munanave mai Ebalahamu uale otogo keve tilu. Isege kunai moagate malaha keta hatige ataeau mai abavulu. ²³ Ige malaha ke munanau veneu hodovavesiteve vatehani baluga malenu. Isi hovelahai niai elehage haevamolela Lasolou Ebalahamu vavamo ua. ²⁴ Ige au Ebalahamu hohavoi avoe, ‘Di mama, ana valive daho uvuai di tedahoi. Di vene komo uale vatehani baluga malenu. Iale Lasolo hanavoge au loholive au adae viso mai emo manemei mai di nememo mamoge auna seliai.’ ²⁵ Kateai louge Ebalahamuu namihai avoe, ‘Di mo, ana huhuanu. Au vatave umale vani kemo au kunaie dua unaha malenu. Isege Lasolo eu kunaie dua maleholinu. Isito Lasolou aike vahaehomo usege au vatetumu malema. ²⁶ Di hoto mole louge evinela. Seika baluga nahie vigomo uale no bae oleve kateai ae tai. Isege ata oleve kateai bae noe lohoi. Kateavevu anekianu.’ ²⁷ Ige kunai moagate keu loui avoe, ‘Di mama, kateaito di isiviai a imihai. Lasolo hanavoge au di mamae oe tai. ²⁸ Keve talive di hohuvu ada mole haivege abu vatehani malemale matama kove loho halevai.’ ²⁹ Ige Ebalahamuu loui avoe, ‘Mosese hoto isi belovetae hoto keau ua. Iale a hohuvu abuna hotoeabe ke eviliege humahae duala tai.’ ³⁰ Ige malaha keu Ebalahamu namihai avoe, ‘Di mama, abu bae hoto ke evilivebene. Isito ata mole hatiale kena abue tige abuna hotove evisi abu vaveve toelamo hoidevei.’ ³¹ Ige Ebalahamuu loui avoe, ‘Abu Mosese hoto isi belovetae hoto eviholiliege abu bae atau hatai hovelahale ke hoto evilivebene.’”

17

Iesuu deiada degomole louevenu.

(*Matuu 18.6-7, 21-22; Maka 9.42*)

¹ Iesuu deiada ke louge uohologie au esemu namigevei loui avoe, “Vani bahata vaveve toelau ataemo velemama. Isito olenu louge ataeau vaveve toela vage ata ke nohoma. ² Ata olenu isiviai di evievi ese molehame aihavoge au vaveve toela vage abege ataeau mune baluga mai enoveta etunuvai mai davalamo mihatuge keu duave.

³ “Iale la ebia nibievelive la haoka moleu vaveve toela vage talive namihai vaveve ke bamuve. Ige au kemo hoilahage lainaho toelave ke huhuigelive. ⁴ Mesoho vani igae kemo au vaveve toela vai la aiogeve seveniatio (7) tota loholive la namigevei au vaveve toela ke louge lainaho bae toelave ke huhualive.”

⁵ Ige esemuiabeau namihai avoe, “No evievi negotige auna balugai.” ⁶ Ige au namigevei avoe, “Masitae i keu esevehame. Isito mesoho la evievi keu masitae i ke nahate vage lana idi ko namihai kosea, ‘Galata toholahai tota e nimo laminela. Ige auna la hoto evisi vai.

⁷ “Di hoto mole louge evive. La esemu moleu bulumo loviai mesoho ovo nibievenata hoilahi lohoge lana valive avuhu loui kosea, ‘Solekai talive lovi inela.’ ⁸ Ba, la bae katealivebene. Isito lana louge auna la lovi vai hamai laoveito la halimo usege lana lovi ive. Keu uohologie esemu kena bae lovi isi. ⁹ La esemu keu vani bahata lovi ke vama. Iale la bae ke hoesehavelivebene. Keu loviveike. ¹⁰ Ke nahate laeau di esemu. Iale lana di laheho louale ke vai gabialiege loui kosea, ‘Noeau esemu unaha. Keu no lovilike.’”

Lebolasite teniau (10) momolelahalu.

¹¹ Iesuu kateai louito halei Dielusalema humahala tinu. Isi tiale Galilita Samalitata vatave tamagamo tinu. ¹²⁻¹³ Keve tiale o molemo velemasege lebolasite ada mole isi ada mole keau haevamole lavisi Iesu elehai hohavoi avoe, “No Kosive Iesu, noheho uvuai no tedaevenela.” ¹⁴ Kateai louge Iesuu elegevei abuhou loui avoe, “Tige dubu nalimaleau bae la vava elehai hilokage la vavahani keu uoholinu.” Kateige abu tisege humaha

tavae vavaeabeu dua vanu. ¹⁵ Ige igaeu au vava elehai hoilalahi lohoale baita Dilava imihai hoesehavonu. ¹⁶ Isi lohoale Iesu vudimo kome bokoai vata bisi holumai Iesu hoesehavonu. Vaveve kateale vale ata keu Samalia ata. ¹⁷ Ige Iesuu au esemu namigevei avoe, “Dana ata ada mole isi ada molenike hoesegevenu. Iale degomoleau oleve. Isege igae kou hoilalahi lohonu. ¹⁸ Osiohoike vata mole ata ko igaeu hoilalahi lohoale Dilava hoesehavonu. Isege Diue ata naini (9) keau hoidevei lohoholilu.” ¹⁹ Kateai louito malaha ke namihai avoe, “Di a evievimo a hoesehavoale hovelalahi tenela.”

Iesuu lohoveve vaveve
(*Matu 24.23-28, 37-41*)

²⁰ Vani mole Balisia ata degomoleau Iesu namihai avoe, “Osiomalela Dilava matamae doge kena bae lohohi.” Ige Iesuu loui avoe, “Vani keu lohoveve ataeau bae elehalivebene. ²¹ Ataeau bae koseale loulivebene. ‘Avuike uoke lohonu.’ O mesoho, ‘Avuiko lohonu.’ Kosealemo la Dilava matama dogae uveve ke hoto evige la uvumo ua.”

²² Kateai louito au esemu namigevei avoe, “Vanie toela molena bae lohoge lana isiviale Atae Ese elehai. Isito la bae elehalivebene. ²³ Vani kela ataeabuna laheho loui kosea, ‘Elehave. Avuike uoke.’ O mesoho, ‘Avuike ko.’ Kateai louge lainaho hoteabe evisi kaovaho talive. ²⁴ Atae Eseu lohoveve keu koseanu. Vau nivolekai solekai otogomo atagai kibalai vaki mole velemai vaki mole velemale ke nahate Atae Ese vanina bae lohohi. ²⁵ Isito vasohuta ataeau vatamo umale koeabuna kabebihavoi aihavoge auna vatehani baluga malei. ²⁶ Ataeau subuta Noa vanimo vamale ke nahate Atae Eseu lohoveve vani ketamo abuna katelalahi. ²⁷ Noa vani kemo ataeau lovi isi e isi mahinuvulahama. Abu kateilage Noau bouti uvue tisege e balugau lohoale ata bahata havehatunu. ²⁸ Lotu vanimo abu vamale keta kateanu. Vani kemo abu lovi isi e isi molela kunai volilahi bululahi o hovevema. ²⁹ Isege vani mole Lotau Sodoma o ke halei tisege veneu otogomo dobai lohoale o ke bahata mahovevei gabianu. ³⁰ Iale Atae Esena tota hoilalahi lohoho vasege ataeabuna katelalahi.

³¹ “Vani keu lohoge ata moleu oe dokoe uale keu bae oe uvue deluai au kunai maleliho talivebene. Isege ata moleu bulue uale keu bae oe hoilalahi talivebene. ³² Iale Lotu mahinae vaveve ke huhulaha. ³³ Olena au ebika unaha huhuaniege auna uveve dua hosidisi. Isito oleu au ebika huhuholiniege auna uveve dua malei. ³⁴ Iale di la namigevege evive. Vani kemo ata abui abuna ava igaemo ladevesege Dilavana mole haleito mole mai tai. ³⁵ Isege keate abui abuna igaetoai lovi vasege Dilavana mole haleito mole mai tai. ³⁶ Isege malaha abui abuna bulue lovilahasege Dilavana mole haleito mole mai tai.” ³⁷ Iesuu kateai louge esemuiabeau namihai avoe, “Kosive, auna oleve keve mai tai.” Ige Iesuu namigevei avoe, “Mesia moleu hatisi hisiage uguiau ke iliho mole bevieveale ke nahate vaveve nimolete keabuna velehovoge lana ke elehai huhuige di lohoveve vaniu vuguvuguanu.”

18

Gobu mole isi atae vaveve kaovamale malaha

¹ Vani mole Iesuu dovudovue hoto mole loui au esemu haivei isiviale abu guliguliali kemo kabebi halevai. ² Hoto keu koseanu. “O molemo kotae hoto evimale kosive moleu ua. Kosive keu Dilava vabuhavoholisi ata hoesegeveholima. ³ Iale o kemo gobu moleu ua. Gobu kena vani bahata kosive ke oe lohoniege au deiada loui namihai isivialeike ata moleu aihavomale kemo au tedahoi. ⁴ Isito vani moaga kotae kosive keu keate ke tedaholinu. Ige keate keu negobedai namihalage kosive keu bae huhuai avoe, ‘Di Dilava vabuhavoholisi ata hoesegeveholimale kemo di bae keate ke tedaholivebene. ⁵ Isito keate keu lohohi di namihalage di homasiale kemo dana tedahoi. Mesoho dana keate ke tedahoholige keate kena vani baita dae lohohi di namihagei.’” ⁶ Iesuu kateai louito tota namigevei avoe, “Lana kosive toelau louale ke evilu. Keu kosive toela. Isito keu keate ke hoto evisi tedahonu. ⁷ Iale la huhuige Dilava ata seleve keabuna vanimo vavimo ninalalahi namihage Dilavana valive au ata kebia tetaevei. Mena auna vali vesokanata bae tetaevei. ⁸ Ba, di la namigevei. Auna solekai kebia tetaevege abuna ue dua vai. Isito Atae Esena valive vatae lohoniege evievi ata moaga elegevei. Emena.”

Balisia isi takesi malemale ata

⁹ Iesuu tota dovudovue hoto mole loui isiviale ataeau abu ebia malei hatui ata degomoleho isiviholimale kebia haivei. ¹⁰ Isi loui avoe, “Ata abuiaru dubue guligulihohi tilu. Moleu Balisia ata. Isege moleu takesi malemale ata. ¹¹ Ige Balisia ata keu tiale lamisi guliguliali avoe, ‘Dilava, di vahaehoanu. Ata degomoleau vavoloai moni malei keatehi ladevema. Isito dau vaveve toela kateale vaholima. Dau takesi malemale kebia nahate vai

moni vavoloholima. ¹² Bula igae uvumo di a hoesehavoliho vani abui lovi ioholisi di taidi aoma. ¹³ Isito takesi malemale keu atae iae lamisi ehue nihoholisito holumai au ebiamo au ada bisi loui avoe, ‘Dilava, dau atae toela. Iale daho uvuai di tedaho.’ ¹⁴ Iesuu deiada ke louto tota namigeveve avoe, ‘Di la namigeveve evive. Dilavau takesi malemale ke toelamo hoesehavoge uvue duamo oe tinu. Isito Balisia ata ke vaveve toelau ua. Kosealemo oleu au ebika ebagemale ke Dilavana etolemai. Isito oleu au ebika etolemale ke Dilavana ebagemai.’

Iesuu eseese hoesegevenu.

(Matiu 19.13-15; Maka 10.13-16)

¹⁵ Vani kela keate degomoleau abu ese malei lohoi isivialeike Iesuu leveve hoesegeveve. Isito Iesu esemuiatu kebia elegeveve iovei avoe, ‘Halevai teve.’ ¹⁶ Katelahage Iesuu hohavei avoe, ‘Lainaho eseese kebia keluevelive. Isege abu dae lohohoi. Abu dae lohohoi keu duave. Kosealemo eseese kobia uvunahate vamale keabuna Dilava adae vuvunemo ui. ¹⁷ Seleveta di la namigeveve evive. Oleuleu eseese kobia uvunahate vaholilige abu bae Dilava adae vuvunemo ulivebene.’

Kunai moagateu Iesue lohonu.

(Matiu 19.16-30; Maka 10.17-31)

¹⁸ Ige Diue kosive moleu Iesu namihai avoe, ‘No haivemale atae dua, dana onole vai ukolikoli mai.’ ¹⁹ Ige Iesuu namihai avoe, ‘A osiohoike daho loui kosea, ‘Atae dua.’ Atabeu duave holioholinu. Isito Dilava igaeu duave. ²⁰ Au Dilava menaka hilokanu. Menaka keau loui avoe, ‘Ainaho mole keatehi ladevegelive. Ainaho ata havegelive. Ainaho vavoloagelive. Ainaho mole lobogelive. Isi a mamata a neinatae hoto evisi hoesegevenela.’ ²¹ Ige malaha keu Iesu namihai avoe, ‘Di esebuluta menaka kebia bahata ehovei lohoma.’ ²² Ige Iesuu hoto ke evisi avuho loui avoe, ‘A louale ke bahata a vanu. Isito a vaveve ko igae vaholiale talive a kunai ke bahata malei voiai monive malei kunai holimale kebia oveito lohohoi di ehomanela. Ilive elike otogoe ibinae dua manela.’ ²³ Hoto kateale louge malaha keu ke evisi uvu balugai halei tinu. Kosealemo keu kunai balugate ata.

²⁴ Kateige Iesuu ke elehai loui avoe, ‘Kunaita keau otogoe tiveve keu tolo selevanu. ²⁵ Ovo mole ivi kamela keu nilae vahamo velemaveve keu anekianu. Iale ke nahate kunaita keau otogoe tiveve keu anekianu.’ ²⁶ Ige ataeau ke evisi namihai avoe, ‘Kunaita keau otogoe tiologige oleme igaeabuna otogoe tai.’ ²⁷ Ige Iesuu namigeveve avoe, ‘Vaveve katealeu ataemo anekianu. Isito Dilavau ke vaveve hiloka.’

²⁸ Ige Bitau avuho loui avoe, ‘Di louge evi. Noeau no onobenobe bahata halevai a ehovalu.’ ²⁹⁻³⁰ Kateai louge Iesuu au esemu bahata namigeveve avoe, ‘Seleveike. Iale la olenala Dilava adae vuvunemo uveve hoto louliho au o halei au mahina halei au hohuvu halevai au mamata au neinata halevai au ese halevenigege auna vata kove onobenobe moaga malei. Ige gabie Dilavana bae ukolikoli mai omisi.’

Iesuu au hativeve hoto lounu.

(Matiu 20.17-19; Maka 10.32-34)

³¹ Iesuu kateaito au esemu tuelo (12) unaha kebia holoeveve lilikateve tiale kebia namigeveve avoe, ‘Evide. Nahi Dielusalemae timale kove belovetaeau subuta hisaiale hoto ke bahataebuna Atae Esemu lohohoi. ³² Ataeabuna ke mai Diue ata holioholiale kebia ovege abuna hehavo avuemo violahai visuhavo. ³³ Keu uoholige abuna mai hamage auna hatai. Isito vani abuita igaeataebuna uoholige auna tota hovelahai.’ ³⁴ Kateai louge esemuiabe keau hoto ke evisi dolodolohalulu. Abu evisito ihuve ke hilokaholilu.

Iesuu ni kedute hoesehavonu.

(Matiu 20.29-34; Maka 10.46-52)

³⁵ Abu tiliale Dieliko oe vavae tisege malaha mole ni kedute keu humahamo ugulamoi moniho ata imigeveve. ³⁶ Iale keu usege ata moagaeau lohohoi evihai tima. Ige au ke evisi belageveve avoe, ‘La osioma.’ ³⁷ Ige abu namihai avoe, ‘Nasaleta ata mole Iesu keike ko nahiela lohoma.’ ³⁸ Ige ni kedute keu baita hoai loui avoe, ‘Deividi mo Iesu, dahoe uvuai di tedahonela.’ ³⁹ Kateai louge ataeau vavavemo uale keu keluai namihai avoe, ‘Tobekai unela.’ Kateai louge malaha keu hotoeabe ke evioholisito negobedai hoai avoe, ‘Deividi mo, dahoe uvuai di tedahonela.’ ⁴⁰⁻⁴¹ Kateisege Iesuu lohohoi velemai ata namigeveve avoe, ‘Ni kedute ke melavei dae lohove.’ Ige abu ke mai avue lohoge au namihai avoe, ‘A isiviale di ono vade ahoe vai.’ Ige keu loui avoe, ‘Kosive, di isiviale niai.’ ⁴² Ige Iesu avuho loui avoe, ‘Duave au a uvu mai daemo mamolemo a nina duaveai. Iale nianela.’ ⁴³ Kateai lousege keu nianu. Isi Iesu ehomai tiale Dilava hoesehavonu. Ige ataeau ke elehai abuta Dilava hoesehavolu.

19

Iesuu Sakiasi oe tinu.

¹⁻² Iesuu tiale o baluga Dielikoe velemai tisege keve takesi malemale kosive mole ivi Sakiasi keu keve ua. Malaha keu kunai moagate. ³ Iale keu isiviai Iesu elehai. Isito ata moagaeau bamuge keu elehaveveu anekianu. Kosealemo keu atae vugehame. ⁴ Iale keu uli holisi tiale idi luaula viatisi isiviai Iesu elehai. Keu hilokage Iesuna humaha kela tai. ⁵ Iale Iesuu kela tiale ehue niai Sakiasi elehai namihai avoe, “Sakiasi, solekai lalamoi loho. Di isiviai nova a oe talive aiti lovi isi.” ⁶ Kateai louge Sakiasiu vahaehota solekai lalamoi lohoale Iesu melamei avuti au oe tinu. ⁷ Ige ataeau vaveve ke elehai isiviholisi loui avoe, “Keu atae toela ke oe tiale avuti lovi ige keu toelanu.” ⁸ Ige abu lovi isege Sakiasiu hovelahai lamisi Iesu namihai avoe, “Kosive, evinela. Dana di kunai tasaliai vaki mole malei kunai holimale kebia ovei. Isi ata degomole lobogevei abuemoo onoeabe malemale ata kebia dana kunai ove abuiabui.” ⁹ Ige Iesuu avuho loui avoe, “A louale kemo Dilavau a toelamo a maveve vaniu nova aemo lohonu. Iale kemo a nova Ebalahamu valada seleve holinu.” ¹⁰ Iale Atae Eseu vaveve toelamo tebulahamale kebia kaovei malevelihoi ke au lohonu.”

*Monie deiada**(Matu 25.14-30)*

¹¹ Ataeau Iesu hoto evisage au tota dovudovue hoto mole loui haivenu. Kosealemo ataeau huhulalahi avoe, “Iesuu aike Dielusalemae velemage nahiabuna Dilava adae vuvunemo ui.” ¹² Kateisege Iesuu deiada mole loui isiviale abu Dilava adae vuvunemo uveve kemo lulelelahai. Isi loui avoe, “Kosive moleu isiviai tai vata moleve vata ke kosive balugamo vuvune malei tota hoilalahi loholive au vata nalisi. ¹³ Iale keu au esemu teni (10) hohavege abu lohoge au uani taoseni kina (K1,000) malei igaegaeai ovei namigeveve avoe, ‘Di tisege moni ko malei kemo lovilalahi elike moni degomole maleve.’ Kateai louito halevei tinu. ¹⁴ Isi tisege vatave ataeau avuho isiviholisi iave abu esemu hanavege abu tialeau kosiveabeu timale vata ke kosive baluga namihalu. Namihai avoe, ‘No isiviholilu malaha keu balugai no nalievelihoi.’

¹⁵ Kateaito malaha keu vuvune malei tota hoilalahi lohoale vata ke nalinu. Isi vasohuta au esemu teni (10) kebia hohavege abu lohoge au belageveve isiviale hilokage au moni oveale kemo abu moni vaesute malelu. ¹⁶ Ige vasohuta omiale keu lohohoi loui avoe, ‘Di kosive, a moni daoale kemo di teni taoseni kina (K10,000) malenu.’ ¹⁷ Ige kosivevevau avuho loui avoe, ‘Duave baa, au esemue dua. Vaveve ese kemo a lovie dua vale dana vuvune malei aoge ana o baluga ada mole isi ada mole nalievenela.’ ¹⁸ Kateige iavemo moleu lohohoi namihai avoe, ‘Di kosive, a moni daoale kemo di vai taoseni kina (K5,000) malenu.’ ¹⁹ Ige kosivevevau avuho loui avoe, ‘A katealelua o baluga ada mole nalievenela.’ ²⁰ Kateige iavemo esemue moleu lohohoi namihai avoe, ‘A moni mai daoale keike ko. Di ogota viliai mai mahogovanu. ²¹ Kosealemo au malaha tolote. Au a ono holioholiale ke ana malegei. Isi a lovi haholimale ke ana heiata malegei. Ialemoike di a vabuhavoi moni ke mai mahogovanu.’ ²² Ige kosivevevau avuho loui avoe, ‘A keu esemue toela. A hoto louale kena a aihavoi. A loui kosea, Keu ata tolote. Keu au ono holioholiale ke auna malegei. Isi keu loviholisito auna heiata lovi malegei. ²³ A kateai huhuale kemo a osiohoike di moni ke mai banikamo mamoholinu. Abege a ke malei banikamo otovege keu balugai. Ilive elike moni ke goloe moleta malege duave. Isito a ke vaholinu.’ ²⁴ Au kateai louito au vavamo laviale kebia namigeveve avoe, ‘Avuemo moni ke malei teni taoseni kina (K10,000) maleale ke omive.’ ²⁵ Ige abu ke evisi avuho loui avoe, ‘Ba, kosive, keu moni baluga malege elemua.’ ²⁶ Ige au loui avoe, ‘Di la namigeveve evive. Oleu moaga maleale kena moaga malei. Isito oleu maleholiale keu bae onobe malivebene.’ ²⁷ Kateai louito tota loui avoe, ‘Ata neheau di aihavomaleau daho itumulalahi di balugaliho isiviholiale kebia maleveve loholive di vudimo havege abu haluvisi.’”

*Iesuu Dielusalemae tinu.**(Matu 21.1-11; Maka 11.1-11; Dionu 12.12-19)*

²⁸ Iesuu deiada kateale louito halei uli holisi Dielusalemae tinu. ²⁹ Tialeu tana mole Oliveta kemo tige o abuitaeau ua. Moleu Betabedi. Ige moleu Beteni. Iale au o ke vavae taito isiviai au esemu abuita hanavege abu uli holisi tai. ³⁰ Kateai namigeveve avoe, “Talive o kela velehovoi o ke ivie elehage doniki mole doga abu avuemo uguiahovolisito umuvai mavoale ke vavehai mai lohove. ³¹ La ke vavehasege mesoho ata moleu la belageveve loui kosea, ‘La osiohoike ke lulehama.’ Ige namihai kosea, ‘Kosivevau avuho isiviaike vage.’” ³² Iesuu kateai louge abu halevai tiale au louale ke nahate elehalu. ³³ Isi doniki ke vavehasege biaeau abuhohoi loui avoe, “La osiohoike ke lulehama.” ³⁴ Ige abu namigeveve

avoe, “Kosiveu avuho isiviai ke vage.” ³⁵ Kateai louito mai Iesue tilu. Tialeau abu ogo malei doniki ke inumo bokoai otovege Iesuu biloai golovemo ugulamou. ³⁶ Au kemo biloai tisege abu abu ogo malei humahala detisi tilu. ³⁷ Tiale Oliveta tanamo lagaluvisito hevaluvimale kemo lavisi Dielusalema elehage esemuiabe bahata keau vahaeholahi Dilava hoesehavolu. Isime baita loui avoe, “Ata kou au vuvunemo vikoe vaveve moaga vage no elehalu.” ³⁸ Avoe, “Kosive kou Dilava ivimo lohoale ko nahi hoesehavoi. Otogo keu uveve duae matama. Iale nahi Dilava hoesehavoi ivive ebagevai.”

³⁹ Kateai lousege Balisia ata degomoleau Iesu namihai avoe, “Kosive, a esemu namigevege abu hoto kateale lou halevai.” ⁴⁰ Ige au namigevege avoe, “Ata keabuna di hoesehavoholige dana mune kobia namigevege abuna hotolahi di hoesehavoi.”

Iesuu Dielusalemaho uvuai ninanu.

⁴¹ Au kateaito lohohi niai Dielusalema elehaimo ninanu. ⁴² Ninai avoe, “Dielusalema ataea, la uveve duae hoto matahage duave. Isito la ehalovalu. Ialemo la tota ke mavevena anekiai. ⁴³ Iale vani molena lohoge la aioveve ataeabuna bae lohoholige o ko evilikahavoi mai molehi dai o ko koi. ⁴⁴ Isime o ko bahata aiohavoi la bahata havehatui. Ige munebehameu bae mole golomo ulivebene. Kosealemo Dilavau isiviai la maleve. Isito laeau ke huhulahi luleleholilu.”

Iesuu dubumo ata nunuvenu.

(Matiu 21.12-17; Maka 11.15-19; Dioni 2.13-22)

⁴⁵ Kateaito lohohi tiale Diue dubu balugae tige ataeau ui onobenobe voilahama. Ige Iesuu tiale kebia koievi nunuvenu. ⁴⁶ Isi abuhou loui avoe, “Dilavau Bukae Hotomo loui avoe, ‘Di isiviale ataeau di o komo guliguliai di hoesehavoge.’ Isito laeau kateholisito vavoloe vaveve avuemo vama.”

⁴⁷ Isi vani bahata timale dubue ata haivema. Kebia haivesege dubu nalievemale kosive, Diue menaka loui haivemale isi oe kosive keau isiviale hamage au hatai. ⁴⁸ Isito abu hamavege ke kaovalage humahau uoholinu. Kosealemo ataeau hotove evisi isiviholilu hotovebehame hosidililo.

20

Abu Iesu vuvune kaovalu.

(Matiu 21.23-27; Maka 11.27-33)

¹ Vani mole Iesuu Diue dubu balugae tiale hotove dua loui ata haivesege Diue menaka loui haivemale, Dubu nalimale kosive balugaea isi oe kosive keau loholu. ² Lohoale Iesu namihai avoe, “No namigevenale. Oleike vuvune aoi a namihage au vaveve kateale vama.” ³ Ige Iesuu abuhou loui avoe, “Usege di hoto mole loui la belageve. ⁴ Ole vuvunemoike Dioniu ata babatisogevenu. Dilava vuvunemo emena atae vuvunemo.” ⁵ Kateai belagevege abu hotohotoai moleho loui avoe, “Nahiabuna hoto onole loui. Mesoho nahiabuna loui kosea, ‘Dilava vuvunemo.’ Ige auna loui kosea, ‘Isito osiohoike la Dioniu hoto evioholilu.’ ⁶ Isi mesoho nahiabuna loui kosea, ‘Atae vuvunemoike.’ Ige ata bahata koeabuna mune malei nahie havei. Kosealemo keau huhuige Dilavau au vuvune omige Dioniu beloveta holinu.” ⁷ Hotoveabeu uoholige abu Iesu namihai loui avoe, “No Dioniu olemo vuvune male ke no hilokaholilu.” ⁸ Ige Iesuu namigevege avoe, “La katealemo di bae data ole vuvunemo vaveve kateale vale loui la namigevelivebene.”

Bulu naliale deiada

(Matiu 21.33-46; Maka 12.1-12)

⁹ Iesuu kateai loui hilokage keau hotove homasihavolu. Iale keu dovudovue hoto mole loui ata haivei avoe, “Malaha moleu au bulu hai ata degomole namigevege abu bulu ke nalilu. Isito halei tiale vagana moaga matama moleve ua. ¹⁰ Keve usege loviu baeveve vaniu lohoge au au esemu mole hanavoi isiviale au talive ata nehe kebiama lovi degomole malei lohohi. Isito ata keau esemu ke hamai iovage ada unahala hoilahi tinu. ¹¹ Ige au tota esemu mole hanavoge au lohonu. Ige bulu nalimale keau keta hamai aiohavoi iovage ada unahala hoilahi tinu. ¹² Ige au tota esemu mole hanavo moleage au lohonu. Ige abu keta hamai nunuvage au vatehani mai tinu. ¹³ Ige bulu ke biageu huhuai avoe, ‘Dana onole vai. Mesoho dana di uvue mo hanavoge abu bae ke aiohavolivebene.’ Kateai loui au mo hanavoge au lohonu. ¹⁴ Ige bulu nalimale keau ke elehai mole namigevege avoe, ‘Bulue biage moike ko. Iale nahi hamage au hatige elike bulu kou nahiele holisi.’ ¹⁵ Kateai louito mo ke evudei mai tiale bulue iae hamalu.” Iesuu deiada ke louge uoholige au namigevege avoe, “La huhuige bulue biagena kebiaho osioi. ¹⁶ Di la namigevege. Auna lohoniage ata kebia havei bulu ke mai ata degomole ovege abuna nalisi.” Ige Diue ataeau ke evisi loui avoe, “Dilavau bae kateale noemo valivebene.” ¹⁷ Ige Iesuu niavei namigevege

21

Gobu mole obelini
(Maka 12.41-44)

¹ Iesuu kateai louito niavevevela kunai moagate kebia elegevesege abu moni malei lohohi dubue uvue obelini otovemalemo manevema. ² Ige au elehasege gobu mole kunaivesite keu lohohale benie kina abui mai manemenu. ³ Ige au ke elehai loui avoe, “Di la namigevei. Gobu keu mai manemeale keu kunai moagate kebia moni evigevenu. ⁴ Kosealemo kunai moagate keau abu moni baluga kemo monie esehame malei lohohi manevelu. Isito gobu keu moniu avuemo ualehameike au ke malei otovege avuemo moni behameu tota uoholinu.”

Vatau gabiaveve vaveve

(Matiu 24.1-21; Maka 13.1-19)

⁵ Kateigeto Iesuu esemu degomoleau Diue dubu baluga ke elehai namihai avoe, “Munee duata abu o ko houale ko eleha. Isi kunai duata malei kaeahavoale kebiata elegeve.” ⁶ Ige Iesuu namigevei avoe, “Vani molena lohoge la dubu ko elehale ke ataeabuna lohohiege koilahage mune moleu bae mune mole golomo ulivebene.”

⁷ Iesuu kateai louge abu namihai avoe, “No haivemale ata, vaveve kena osiomalela velemai. Isi vaveve oletena lohoge noeabuna ke elehai hilokage vaniu vuguvuguanu.”

⁸ Ige Iesuu namigevei avoe, “La ebika nenigeveve. Onoilage ataeau la lobogevege dobuluvima. Kosealemo ata moagaabuna lohohiege di ivimo lolohalahi loui kosea, ‘Dau Keliso.’ O mesoho loui kosea, ‘Vaniveu lohohu.’ Abu kateai louge lainaho bae kebia ehovelive. ⁹ Ataeau mole havei tuvialige lainaho hoto ke evisi vabulahalive. Kosealemo vaveve toela katealeabuna vasohuta lohohi. Igeto gabie vanie gabina bae lohohi. ¹⁰ Di hoto mole louge evive. Vani keu lohoho vasege vata mole ataeabuna hovevevei vata mole atahi mole havei. ¹¹ Isege vata bahatamo hamu balugana hatui. Ige vae balugana lohohi. Ige vavahanie toelana lohoge ataeabuna kemo haluvisi. Vaveve kateale abuna vatamo lohosege otogomo vaveve nimolete abuna lohohi. Ige ataeabuna ke elehai vabulahai.

¹² “Isito vaveve katealeu lohoholisege ataeabuna la malevei la aiogevei lahavei. Isi abuna la malevei tiliege Diue dubue laemo kotai la malevei dibulae otovei. Isi la di ata hohialemo abuna la malevei gamanie kosive kebia vudimo otovege abuna la aiogevei. ¹³ Abu kateisege di hotoe dua loui kebia haiveve. ¹⁴ Isi lainaho kebia vudimo lavisi hoto louveve ke huhulahagelive. ¹⁵ Kosealemo dana hoto laovei lulele keta laovege la aiogevemale keau bae la hotobe hamalivebene. ¹⁶ Ige la haokuvu, la mamuvu, la neinuvu isi la abuhi ese igaeale keabuna laheho hailahage ataeabuna bae la malevei lahavei. ¹⁷ La di ehovamalemo ataeabuna laheho itumulahai huhuihuhuei toela vai. ¹⁸ Abuna laemo kateale vaito la bae uoholilivebene. Isito Dilavana bae la kinae vomo la vava bahata ke malege lana kemo ue dua vaveve. ¹⁹ Lana vaveve kemo negolahalievege ukolikoli maleve.”

²⁰ “Lana vani mole elehasege tuvialie ataeabuna Dielusalema o ko evilikahavoi. Ige lana kemo bae hilokai loui kosea, ‘O ko aiohavoveve vuguvuguanu. ²¹ Iale vani kemo Diudia vatamo umale lana detuluvisi tanae teve. Ige Dielusalemae umale keabuna o ko halevai tai. Ige oleuleu bulue umale keau bae hoidevei o kove lohohivebene. ²² Vani kela Dilavana o ko vaveve toelae ibina vai. Au kateaniege Bukae Hotou louale ke mai selevetisi. ²³ Iale vani kela keate ese tobute kebia nohovu. Isege keate degomole ese gite maleale kebiata nohovu. Kosealemo vata komo vatehani balugana lohoge Dilava itumu balugana ata kobiamo lohohi. Ige keate keabuna oleve kateai solekai detuluvisi. ²⁴ Vatehani baluga keu koseanu. Tuvalie ataeabuna lohohiege benisita ata degomole haveime degomole malevei hanavege abuna vata degomoleve tai ata kebiamo lovilahai. Isege Diue ata hohiohohiale keabuna lohohiege Dielusalema mai avuemo ui. Iliege vani mole kebia vani kena uoholige Diue ataeabuna tota hoidevei o ko mai.”

Iesu lohoveve vaveve

(Matiu 24.29-35; Maka 13.24-31)

²⁵ “Vani kela otogomo vaveve nimoletena lohohi. Vanimu, batamo isi didi kebiamo abuna katelahai. Isege heie vata kove davalana vuluai hahosihovoi vatae lohoge ataeabuna ke elehai vabulahai tetelahai. ²⁶ Vaveve katealena vatamo lohoge otogomo uale keabuna kibikibiai solahai. Ige ataeabuna ke elehai vabulahai lokihovoi. ²⁷ Vaveve kateimalela ataeabuna elehasege Atae Esena au vuvuneta au atagata goe golomo dobai lohohi. ²⁸ Vaveve katealeau vasohuta velehovosege hovevevei lavisi ehue nilahave. Kosealemo Dilavau la maleveve vani keu vuguvuguanu.” ²⁹ Iesuu hoto ke louge uoholige au hoto mole loui namigevei avoe, “Idie vaveve ke huhulahave. ³⁰ Elehalive idie numuiahu humulahage huhulahai kosea, ‘Vaganau vuguvuguanu.’ ³¹ Ke nahate elehage

otogomo isi vatamo vaveve katealeau velehovoge huhulalahi kosea, ‘Dilava matamae dogau lohovevu vuguvuguanu.’ ³² Iale di hoto selevu louge evive. Ataeau aike uale koeabuna haluviholisege vaveve katealeabuna velehovoi. ³³ Ige vatana otogoti uoholisi. Isito di hotou bae uoholilivebene.

³⁴ “Iale la ebia nenigeveve. Lainaho vani bahata iveve huhu moagai e toelata i moagagelive. Isi lainaho vatae vaveve ke huhu moagagelive. Lana katelahave vani ke vavevena laemo lohoge lana vikolahave. ³⁵ Vani kela vaveve kena kukoi nahate vai solekai tolemai vatae ata bahata bamuevei. ³⁶ Ialelua nilahai ui vani bahata guligulialive elike vaveve toela keu lohoge kemo negolahai Atae Esee vudimo lavie dua vave.”

³⁷⁻³⁸ Iesuna vani bahata vavita Diue dubue balugae lohoniege ata haivegei. Imale ataeabuna vavita vavita igaetoai tiliege hotove evigei. Iniege gutuige Iesuna tiniege tana mole Oliveta keve lahagei.

22

Diudasiu Iesuho haiale deiada

(*Matiu 26.1-16; Maka 14.1-11; Dioni 11.45-53*)

¹ Iesu kateilage Diue vahaeho vani mole Basova keu vuguvuguanu. Vani kemo abu bae beikini baudata valava mahoale ke ilivebene. Isito abuna vani kela mamoe havei isi Dilava hoesehavoge. ² Isege Diue dubu nalievemale kosive isi Diue menaka loui haivemale keau vabulalahi isiviholilu atae vudimo Iesu hamaliho. Isime maveve humaha mole kaovama.

³ Isege Seteneu Iesu esemu tuelo (12) ke mole Diudasi Kaliota uvumo deluanu. ⁴ Iale keu tiale Iesuho haiai dubu nalimale kosive isi dubue udaha nalimale bukate kebia namigevei avoe, “Dana oleve kateai Iesu mai laovei.” ⁵ Ige abu ke evisi vahaeholalahi isiviale moni mai omisi. ⁶ Kateige Diudasiu loui avoe, “Duave.” Isi tiale Iesu maveve humaha ke kaovama. Isito isiviholiale ataeau ke hilokalaho.

Iesuu au esemuhi Basova lovi ilu.

(*Matiu 26.17-25; Maka 14.12-21; Dioni 13.21-30*)

⁷ Iniale Diue vahaehoe vani keu lohoge abu isiviai mamoe havei Basovae lovi isi. ⁸ Iale vani kela Iesuu Bitata Dionita hanavei loui avoe, “Talive nahie Basova lovi ke gadehavove.” ⁹ Ige abu namihai avoe, “A isiviale nona oleve keve talive lovi ke bevuai.” ¹⁰ Ige au loui avoe, “Talive o kemo velehovoi elehage malaha moleu e bagumo e hai tige ke ehovai talive ovela velehovove. ¹¹ Isi o ke biage namihai kosea, ‘No haivemaleu aho loui avoe, O olete uvumo dana di esemuhi Basova lovi isi.’ ¹² Lana katelahai namihage auna la holoavei o ke ehue tiniege uvu mole baluga mai la haivei. Ige ke uvumo nahie lovi bevuai gadehavove.” ¹³ Kateai louge abu halevai tiale au louale ke nahate elehalu. Isime keve Basova lovi iveve ke gadehavolu.

Aleto

(*Matiu 26.26-30; Maka 14.22-26; 1 Koliniti 11.23-25*)

¹⁴ Lovi iveve vaniu gutuige Iesuu lohoale au abostolo tuelo (12) kebiahi lovi iliho ugulevalu. ¹⁵ Ige au abuhu loui avoe, “Dana bae vatehani malei. Iale di isivi balugale lahehi ugulamo Basova lovi ko isi. ¹⁶ Isito di la namigevei. Di bae tota lovi ko ilivebene. Isito Dilava matamae dogau lohoge vani kemo Basova lovi kona bae ihuve selevu holige dana bae isi.” ¹⁷ Hoto ke louito kabu mai hoesehavoi mai au esemu ovei loui avoe, “Ko igaegae mole ovei ive. ¹⁸ Di la namigevei. Di bae tota uaini koseale ilivebene. Ilage Dilava matamae dogae keve dana bae tota isi.” ¹⁹ Kateai louito valava mai hoesehavoi vakoai malei ovei loui avoe, “Di misilike ko di laovenu. Iale ko isi di huhulahave.” ²⁰ Ige abu lovi ige uoholige au kabu mai ovei loui avoe, “E kou di tahoike ko. Iale di tahona lotige Dilavana di taho kemo laheho menakae dogae vai.

²¹ “Isito di hoto mole louge evive. Nahi kove uguaiavi lovi ima. Isito la mole igaena bae di mai atae toela ovei. ²² Ige dana kemo hatai. Kateale keu Dilava isivilike. Isito malaha keu dahoe haiale ke nohoma.” ²³ Kateai louge abu hovevevei abu molete namigevei avoe, “Nahiemo ole igaena vaveve ke vai.”

Oleu baluga.

²⁴ Abu katelahaito baita moleho loulage moleu loui avoe, “Dau laemo baluga.” Ige moleu avoe, “Ba, dau baluga.” ²⁵ Katelahage Iesuu namigevei avoe, “Vatae kosiveau abu vuvunemo abu ata nibievei isivialeike esemuiabeau iviabe tabagevei loui kosea, ‘Laeau no kosive balugaea.’ ²⁶ Isito lainaho vaveve ke nahate vagelive. Di isiviale la vaveve koseale vage keu duave. Lana isiviai kosive holiho valiege vasohuta la ebia halevai mole tedeavei hoesegeveve. ²⁷ Vatae kosive abuna uguaiavo unahai louge esemuiabe abuna lovi

malei ovegei. Katealemo lana hilokage oleteu baluga. Oleteu eseve. Isito dau kateholinu. Dau la baluga. Isito di la hoesegevei la tedaevema.

²⁸ “Isito vani bahata vaveve toelau daemo lohosege laeau daluvuta ua. ²⁹ Iale di Mamau ataeau adave uvumo uveve vuvune mai daoale ke nahate dana vuvune mai laovei. ³⁰ Ige lata vani kemo daluvuta igaetoai lovi isi telonamo uguiavoi vuvune kemo Iselala valada tuelo (12) kebia nibievei vaveveabe kaoveve.”

Iesuu Bitau vovohoveve hoto lounu.

(Matiu 26.31-35; Maka 14.27-31; Dioni 13.36-38)

³¹ Iesuu hoto ke louge uoholige au Saimoni Bita namihai loui avoe, “Saimoni, di hoto mole louge evi. Seteneu Dilava namihai isiviale a vaveve bahata kaovai. Keate moleu laisu sesiale ke nahate auna a vaveve bahata kaovai. ³² Isito di aho guliguliai isivialeike a evievi keu bae doba selevelivebene. Iniege vani mole a vaveve toela kemo hoilahaniege talive a haokuvue evievi negotievenela.” ³³ Ige Bitau namihai avoe, “Kosive, abuna a mai dibulage dana aiti keve tai. Abu ahavoge dana aiti hatai.” ³⁴ Ige Iesuu namihai avoe, “Bitau, di louge evi. Novae vavimo kokologuu hotoholisege ana hoto koseale lou abuita igaetai kosea, ‘Di ke hilokaholinu.’”

³⁵ Iesuu tota au esemu bahataho loui avoe, “Di vani mole la hanaveale kemo laeau moni, mogamoga, tamaka maleholilu. Kemo la elemua. Emena la vugeholilu.” Ige abu loui avoe, “Elemua.” ³⁶ Ige Iesu tota loui avoe, “Isito aike la monita la mogamogata maleve. Isi mesoho la oleu siga maholialeu au dabae ogo mai voiai moni ke mai siga voiai. ³⁷ Iale di la namigevei. Bukae Hoto molena daemo lohohi. Hoto keu loui avoe, ‘Ataeau huhuige keu atae toela mole.’ Iale abu subuta hisaliale kena nova daemo lohohi.” ³⁸ Ige abu Iesuu namihai avoe, “Kosive, siga abuitaiko ko.” Ige au loui avoe, “Elemua.”

Iesuu guliguliasage abu ladevelu.

(Matiu 26.36-46; Maka 14.32-42)

³⁹ Iesuna vani bahata Oliveta tanae tiniege keve lahagei. Iale au ke louito Dielusalema halei Olivetae tinu. Ige esemuibeau ehovalu. ⁴⁰ Iale abu keve velehovoge Iesuu namigevei avoe, “Guligulihalive elike vaveve toelau laemo lohoge la bae kemo dobuluvivebene.” ⁴¹ Kateai namigeveito halevei ahuvela tiale iekela kome bokoai guligulianu. ⁴² Isi loui avoe, “Mamai, a isivianiege vatetumu daemo lohoveve ke mai evihanela. Isito a isivi unaha. Ana isiviage dana vatetumu ke malei. Isito a isiviholige di bae ke malelivebene.” ⁴³ Hoto kateale louge anelu moleu otogomo dobai lohohale mai negotinu. ⁴⁴ Ige au tota negobedai guliguliasage uvuve keu isu baluganu. Ige vahotoveu taho nahate bidoai vatamo lotinu.

⁴⁵ Au kateinata hovelahai hoilahai tiale au esemu elegevege abu uvulahalata ladevelu. ⁴⁶ Ige au namigevei avoe, “La osiohoike ladevema. Hovedevei guligulihalive elike vaveve toelau lohoge kemo dobuluvi halevave.”

Abu Iesu malu.

(Matiu 26.47-56; Maka 14.43-50; Dioni 18.3-11)

⁴⁷ Iesuu kateai namigevesege ata moagaeau loholu. Ige Iesu esemu mole Diudasi keu kebiaho uli holisi lohohale Iesu evudei ulikukuhavonu. ⁴⁸ Ulikukuhavoge Iesuu namihai avoe, “Diudasi, ana isiviai di ulikukuhavoale kemo di mai atae toela ovei.” ⁴⁹ Ige Iesu esemuiauvavavemo laviale keau belahai avoe, “Kosive, noeabuna vali siga malei kebia havei.” ⁵⁰ Isi kateisege moleu siga mai dubue kosive baluga ke esemue golema inute heisi etulenu. ⁵¹ Ige Iesuu loui avoe, “Halevave.” Isi esemu ke golema levege maholilinu.

⁵² Ige dubu nalimale kosivea, oe kosivea isi dubue udaha nalievemale bukateau Iesu maliho lohohale avuluvuta ua. Ige Iesuu namigevei avoe, “Lana huhuige dau vavoloamale ata. Ilike vage la benisita visuta malei dahavoho loholu. Emena la osioho. ⁵³ Dau vani bahata la dubu balugae timale uma. Isege la di lehaito di maholilu. Isito laeau vavive eesa. Nova kou la vanilike. Iale la vavi komo lohohale isiviai di male keta duave.”

Bitau Iesu vovohonu.

(Matiu 26.57-58, 69-75; Maka 14.53-54, 66-72; Dioni 18.12-18, 25-27)

⁵⁴ Iesuu hoto ke louge uoholige abu evudei melavei dubu nalimale kosive baluga ke oe loholu. Isege Bitau ialialihavoi ehomai lohoma. ⁵⁵ Ige abu ologomo vene beisi venehemo uguiavosege Bitau lohohale abuhi ugulamou. ⁵⁶ Isege veneu vedodoai nivemo atagage ma moleu nive elehai loui avoe, “Malaha kota avuti umaleike ko.” ⁵⁷ Kateai louge Bitau namihai avoe, “Ba, dau ke hilokaholinu.” ⁵⁸ Iniale malaha moleu Bitau elehai namihai avoe, “A keu Iesu esemu mole ailike.” Ige Bitau namihai avoe, “Ba, dau ke holioholinu.” ⁵⁹ Iiale abu ukaukaito tota malaha moleu negobedai loui avoe, “Seleveta kou Galilie ata nahate. Iale no kemo hilokage kou Iesuti ohanoimale ataike.” ⁶⁰ Ige Bitau namihai avoe,

“Halanela. Di a hoto louale ke hilokaholinu.” Kateai lousege solekavesite kokologuu hotoanu. ⁶¹ Ige Iesuu hoilahai Bitu niavoge Bitau Iesuu subuta louale ke huhuanu. Au loui avoe, “Bitu, di louge evi. Novae vavimo kokologuu hotoholisege ana hoto koseale lou abuita igaetaeai kosea, ‘Di ke hilokaholinu.’” ⁶² Ige Bitau ke huhuai uvu balugai halei tiale iekela nina baluganu.

Abu Iesu hehavo i visuhavolu.
(*Matu 26.67-68; Maka 14.65*)

⁶³⁻⁶⁴ Ige ata degomole Iesu nalimale keau Iesu hehavo ogo mai nive viliasege ata moleu hamai namihai avoe, “Au beloveta ata. Iale no namigevenela. Oleike ahamonu.” ⁶⁵ Kateaito hotoe toela moaga loui aiohavolu.

Iesuu Diue kosive vudimo laminu.
(*Matu 26.59-66; Maka 14.55-64; Dioni 18.19-24*)

⁶⁶ Vau alamoge Diue kosive moagaeau hotohotoho lohohu. Oe kosivea, dubu nalimale kosivea, Diue menaka loui haivemale keau mole bevuevei igaetoai Iesu melavei kotaho lohohu. ⁶⁷ Isi belahai avoe, “No namigevenela. Ana huhuige Dilavau a hanavoge a Keliso holinu.” Ige Iesu namigevei avoe, “Dana la namigevei loui kosea, ‘Ito. Ige la bae di hoto evilivebene. ⁶⁸ Iale mesoho dana hoto mole loui la namigevege la bae ibinave loulivebene. ⁶⁹ Isito di hoto mole louge evive. Atae Eseu Dilava vuvune mai adave inuteve ugulamo iuveve vaniu vuguvuguanu.” ⁷⁰ Kateai louge abu bahata namihai avoe, “Iale Dilava mo anike.” Ige au loui avoe, “La louale keu seleveike.” ⁷¹ Ige abu moleho loui avoe, “Nahi bae ata degomolemo ko vaveve kaovalivebene. Nahi hotove evige uoholinu.”

23

Iesuu Bailoti vudimo laminu.
(*Matu 27.1-2, 11-14; Maka 15.1-5; Dioni 18.28-38*)

¹ Abu bahata hoveveime Iesu mai Loma gamani kosive Bailotie tilu. ² Keve tiale kosive ke namihai avoe, “No malaha ko vaveve kaovalata elehaike vaima mai lohohu. Kou no ata aigevei abuhou loui avoe, ‘Lainaho takesi moni malei Loma gamani kosive Sisa omilive.’ Isi loui avoe, ‘Dau la kosive baluga Keliso.’” ³ Kateai louge Bailotiu Iesu namihai avoe, “Diue kosive anike ko.” Ige Iesuu loui avoe, “Ito, avuika a ke lounu.” ⁴ Kateai louge Bailotiu dubu nalievemale kosive isi ata kebia namigevei avoe, “Di komo vaveveve toela kaovage uoholinu. Iale dana oleve kateai hamai.” ⁵ Ige abu negobedai Bailoti namihai avoe, “Keu vasohuta Galili vatae tiale haive toela vai no ata aiogevunu. Iale aike Diudua vata komo ke nahate vama.”

Iesuu Elodi vudimo laminu.

⁶ Ige Bailotiu hotoeabe ke evisi namigevei avoe, “Galili ataniko.” ⁷ Ige abu loui avoe, “Ito.” Ige Bailotiu namigevei avoe, “Kosive mole Elodi keu Galili vatae kosive. Keu aike lohoale Dielusalemale ua. Iale ko mai avue teve.” ⁸ Ige abu mai Elodie tige au Iesu elehai vahaehoanu. Kosealemo ataeau Iesu vaveve vamale ke louge Elodiu vani moaga ke evisi isiviale Iesu elehai. Keu isiviale Iesuu vaveve nimotele vage au elehai. ⁹ Katealemo au Iesu belahai avuemo vaveveve kaovalage Iesuu hotobehame loui namihaholinu. ¹⁰ Ige dubu nalimale kosivea isi Diue menaka loui haivemale keau hovevevei Iesu vavamo lobolahai isuta Elodi namihai avoe, “Keu vaveve toela moaga vamale ataike.” ¹¹ Ige Elodiu au tualie esemuhi Iesu hehavo i aiohavolu. Isime lobolahai kosivea ogoe dua vamale ke nahate mai avuemo hatulu. Hatuge uoholige abu melavei tota hoidevei Bailotie tilu. ¹² Katealemoike Elodiu Bailotiti haokanu. Subuta abu moleho isiviholilu. Isito vani kemo abu avui molehi haokuvualu.

Abu Iesu hamaveve hoto loulu.
(*Matu 27.15-26; Maka 15.6-15; Dioni 18.39-19.16*)

¹³ Abu Iesu melavei Bailotie tige Bailotiu hoage dubu nalimale kosivea, oe kosivea isi oe ataeau lohohu. ¹⁴ Ige au namigevei avoe, “Laeau malaha ko mai dae lohoale di namihai kosea, ‘Malaha kou no ata aiogevema.’ Ige di la hoto ke avuemo kaovaito toelabe elehaholinu. ¹⁵ Ige Elodi keta toelavebe elehaholisi tota hanavoge lohohu. Iale malaha kou vavevebe toela vaholiale kemo di hamaveve humahau uoholinu. ¹⁶ Iale di esemu abuna visuhavoito iovage auna tai.” ¹⁷ Iomaveve hotou koseanu. Vagana bahata Basova vani kena lohoge ataeabuna louge Bailotina dibulae ata igae iomage auna tigei. ¹⁸ Bailotiu hoto ke louge ata bahata keau baita namihai avoe, “Hamage au hatai. Isito no isiviale Balabasi ke iomage au tai.” ¹⁹ Balabasi keu ata havemale ataike. Subuta o kemo keu atae toela holoevei isiviale gamani aiohavoi. Ige abu mai dibulae mavoge ua. ²⁰ Isito

Bailotiu isiviale Iesu iomage au tai. Iale tota hoai ata namigevei avoe, “Dana ko hanavoge auna tai.” ²¹ Kateai abuhu louge abuta avuhu loui avoe, “Mai idimo hama.” Isi tota loui avoe, “Mai idimo hama.” ²² Ige au tota namigevei loui avoe, “Osialemo. Vaveve toela onoleu avuemo ua. Di vaveveve kaovanata kemo toelabe elehalohinu. Katealemo dana oleve kateai hamai. Iale di esemu abuna visuhavoime iovage auna tai.” ²³ Kateai lousege abu negobedai baita namihai avoe, “Mai idimo hama.” Ige dubu nalimale keau abuta katelahai negobedai hotove hamalu. ²⁴ Ige au namigevei avoe, “Duave, dana la isivi unaha vai.” ²⁵ Kateai louito malaha nehe ata havei gamani aiahovomale ke iomanu. Isi abu abu isivi Iesuemo valiho mai ovenu.

Iesuu idi ebamonu.

(Matiu 27.32-44; Maka 15.21-32; Dioni 19.17-27)

²⁶ Ige abu mai tialeau Sailini malaha mole ivi Saimoni keluvuta belehovolu. Keu bulue tialeu hoilahai oe lohoma. Iale abu adave butuhai namihai avoe, “Idi ko ebamo.” Ige au idi ke ebamoi Iesu ehomai iavela tinu. ²⁷ Isege ata moagaeau ehovai timale kebia vigomo keate degomoleau avuhu uvulahai ninalahama. ²⁸ Kateisege Iesuu abue vudihei namigevei avoe, “Dielusalema keatea, lainaho daho ninalahalive. Isito la ebikaho uvulahai la esetaho uvulahai ninalahave. ²⁹ Kosealemo vanie toelau lohoma. Iale vani kemo ataeabuna bae loui kosea, ‘Keate oleuoleu ese tobute maleholiale keau duave. Isi ese gite houeveholiale keau duave.’ ³⁰ Vani kateimalela ataeabuna loui kosea, ‘Tana baluga isi eseve dobai no bamuevege no haluvisi.’ ³¹ Dau idi isahete ke nahate. Isege laeau idi gilite ke nahate. Iale abu vaveve toela koseale daemo valiege vaveve toela baluga seleve abuna laemo vai.”

³²⁻³³ Kateai louge tualie ataeau Iesu melavei dibulae ata abuita kebiata holoevei tiale ata havemale matamae velehovolu. Matama ke ivilike Lolokue matama. Matama keve abu Iesu mai idie domo hamai dibulae ata kebiata havelu. Moleu adave inuteveatae. Isege moleu agiteveatae. ³⁴ Ige Iesu noinoiai avoe, “Mamai, vaveveabe toela uliha. Abu vaveve ko vamale ko abu hilokaholilu.” Kateai lousege tualie ataeau Iesu ogo malihu kasilahai ogove igaegaeai malelu. ³⁵ Ige ataeau elehasege Diue kosive keau Iesu hehavoi moleho loui avoe, “Keu ata degomoleu tedeavenu. Isito Dilavau ke ebagemage keu Keliso holivitebene au ebika tedahoi dobai lohonu.” ³⁶ Kateai lousege tualie ata kebiata hehavoi tiale e toela mai omilu. ³⁷ Isi loui avoe, “A Diue atae kosive holiniege a ebika tedahoi dobai lohonela.” ³⁸ Kateai kinave tatamo hoto mole hisaliai avoe, “Kou Diue kosive balugaike ko.” ³⁹ Ige abu dibulae ata mai hamale ke moleu hotoe toela loui Iesu belahai avoe, “Seleveta Keliso aniko. A Keliso holiniege a ebika tedahoi nota tedeavenela.” ⁴⁰ Kateai louge moleu avuhu loui avoe, “Hoto kateale louhalenela. Ana Dilava vabuhavoholinu. Nahiaabuna avuluvuta haluvisi. ⁴¹ Nahiau vaveve toela vamale ataea. Iale ibinavehoike nahi vatehani ko malelu. Isito malaha keu vaveve toela vaholisito vatehani malenu.” ⁴² Kateai au haokaho louito Iesu namihai avoe, “Iesu, a Kosive baluga holisi a matamae dogo kemo lohoniege di huhuanela.” ⁴³ Ige Iesuu avuhu loui avoe, “Di ahoe louge evinela. Ana nova daiti ukolikolie matama keve unela.”

Iesuu hatinu.

(Matiu 27.45-56; Maka 15.33-41; Dioni 19.28-30)

⁴⁴ Iniale vanie lilimo vata bahatamo vau loai gidualeu tili (3) okoloki masege vaniu tota halunu. ⁴⁵ Isege dubu baluga uvue abu ogo mai uvu mole tumute ke bamuale keu ehula dikolahai heila velemai abuita holinu. ⁴⁶ Isege Iesuu baita loui avoe, “Mamai, di aike hatima. Di isiviale daemo di munana manela.” Kateai louito hatinu. ⁴⁷ Ige tualie kosive keu vaveve ke elehai Dilava hoesehavoi loui avoe, “Seleveta ata keu atae dua.” ⁴⁸ Isege ataeau keve igaetoai vaveve ke elehalage uoholige abu halevai uvu balugata hoidevei abu oe tilu. ⁴⁹ Oe tisege Iesu haokuvu isi Galili keate degomole keau Iesu ehovamaleau bahata haevamole lavisi vaveve ke elehalu.

Iesu mai abavulu.

(Matiu 27.57-61; Maka 15.42-47; Dioni 19.38-42)

⁵⁰⁻⁵¹ Alimatia malaha mole ivi Diöseba keu atae dua isi ata uvevete. Iale keu Dilavau Iesu hanavoale ke evisi huhuai avoe, “Kona no kosive baluga holige noeabuna vuvunevemo ui.” Isi kateai ke nihomai uma. Keu Diue kanisoloe kosive. Iale kanisolo keau Iesuemo vaveve kateale vage keu keho isiviholinu. ⁵² Iale keu Iesu vava mai abavuhu tiale gamani kosive Bailoti belahanu. Isi loui avoe, “Dana vali Iesu vava mai talive abavui.” ⁵³ Ige Bailotiu louge au tialeu Iesu vava mai ogoe duata viliai munev vahamo abu subuta kemo atabe mai gulioholiale kemo mai gulianu. ⁵⁴ Kateisege bulau lohohio vage vau loai lohoma.

⁵⁵ Isege Galili keate nehe keau Diosebaluvuta tiale au Iesu vava mamoi abavuale ke elehalu. ⁵⁶ Isime halevai oe tialeau mulamulae dua malei Iesu vava hoesehavoliho bevualu. Isege bulau lohoge abu halevai menaka ehovai bulamo ua.

24

Iesuu gulimo hovelahanu.

(Matu 28.1-10; Maka 16.1-8; Dioni 20.1-10)

¹ Iiale Sande vavita vae hodohodota keate keau mulamula nehe bevuale ke malei Iesu vutae tilu. ² Tiale keve velehovoge mune balugau Iesu vuta bamuale keu vovolovai badive ua. ³ Ige abu mune ke vahae tialeau isiviai Iesu vava elehai. Isito abu tiale elehaholilu. ⁴ Isi keve lavisi ke huhulalahi dolodolohahasege malaha mole abuita ogo levolevotote vale keau solekavesite abue lohohu. ⁵ Ige keate keau vabulalahi kome bokoai vata bisi holiuavolu. Ige malaha keau namigevei avoe, “Kou alue vutae matama. Iale la osiohoike kove atau nita uale ke kaovama. ⁶ Keu komo uoholinu. Dilavau etuvage keu hovelahanu. Au Galilie ui laheho louale ke lana huhulalahu. ⁷ Au loui avoe, ‘Ata molena Atae Eseho haiai mai atae toela ovege abuna mai idie domo hamai. Iniege vanie ni abuita igaetaebuna uoholige auna tota hovelalahi.’” ⁸ Kateai louge keate keau Iesu hoto ke huhulalahu. ⁹ Isi vutave halevai hoideveve tiale vaveve ke loui Iesu abostolo leveni (11) kebia haivei esemu bahata kebiata haivelu. ¹⁰ Keate kebia iviabeike koea. Meli Magidaleni, Dioana, Diemisi neina Meli isi keate degomole. ¹¹ Ige Iesu esemu keau hoto ke evisi loui avoe, “Lana tilogoike vaimo lobe hoto ke louma.” Isi kateai hotoeabe evioholilu. ¹² Isito Bitau ke evisi hovelalahi bibuai tiale vutavela velemanu. Isi holumai ke vahae niavi elehage abu viliale ogo ke unahau ua. Ige au hoilalahi au oe tiale vaveve ke huhuai avoe, “Vaveve kou oleve kateanu.”

Esemu abuiatu Emeasi tima.

(Maka 16.12-13)

¹³ Vani ke igaemo Iesu esemu abuita keau olahai o mole ivi Emeasi keve tilu. Dielusalemale halei o keho tiale egeveve haeava sisina ada mole isi abui. ¹⁴ Abu avui taimo humaha tavae abu Iesumo vaveve vamaile ke moleho loui tima. ¹⁵ Katelalahi ke lousege Iesuu iaeabe tialeu abuemo tinu. ¹⁶ Ige abu elehaito ke hilokaholilu. ¹⁷ Ige Iesuu namigevei avoe, “La avui ono vadeike moleho loui lohoma.” Kateai louge abu avui lavisi uvulalahu. ¹⁸ Ige malaha mole ivi Keliobasi keu namihai avoe, “Ata bahata Dielusalemale umale keau vaveve moleu aike Dielusalemale velemale ke hilokalu. Isito a igaenike ke hilokaholinu.” ¹⁹ Ige au belagevei avoe, “Vaveve onoleike.” Ige abu loui avoe, “Vaveve kosealeike abu valu. Nasaleta malaha mole Iesu keu belovetae ata. Iale Dilavau vuvune omige au vaveve nimolete vai hoto vuvunete louge ata bahataeau ke elehai vahaeholalahi hoesehavolu. ²⁰ Isito no dubu nalimale kosive isi oe kosive keau ke mai gamani ata ovege abu loui avoe, ‘Auna hatai.’ Isime mai idie domo hamalu. ²¹ No subuta huhulalahi kosea, ‘Kena bae kosive holihi Iselala ata tadeavei.’ Isito keu hatiale aike vanie ni abuita igaeta uoholinu. ²² Ige nova vavita no keate degomoleau hoto mole levege no ke evisi vikolalahu. Abu vae hodohodota tialeau vutave velehovolu. ²³ Keve velehovoi Iesu vava kaovage uoholinu. Isime hoideveve lohoale no namigevei avoe, ‘No anelu abuita elegevege keau no namigevei avoe, Keu hovelahanu.’ ²⁴ Isege no ata degomoleau vutave tiale elehage uoholige abu loui avoe, ‘Keate keau hoto seleveike abu loui.’”

²⁵ Abu deiada ke louge uoholige Iesuu namigevei avoe, “La keau vaveve kemo luleleholilu. Isi belovetaeau louale hoto ke la solekai evisi maholilu. ²⁶ Belovetau louale ke nahate Kelisona vatehani malei hatai hovelalahi tota au otogoe ataga nehe ke mai. Lana ke hilokalu.” ²⁷ Kateai louito subuta Moseu hotove hisialiale isi beloveta bahataeau hisialiale ke loui kebia haivenu.

²⁸ Au kateai haivelage abu tiale o nehe abu avue tiveve ke vavae lohohu. Isege Iesuu isiviale eve tai. ²⁹ Isito abu negobedai kelulahai namihai avoe, “Vau loalelua nohehi unela.” Ige au tiale abuhi ua. ³⁰ Iniale abuhi lovi iliho uguivovosege au valava mai hoesehavoi vakoai malei ovenu. ³¹ Kateai lovi ovesege niabeu alamo selevege abu bae lulelelahi Iesu hilokalu. Isege au solekavesite uoholinu. ³² Ige abu mole namigevei avoe, “Keu humaha tavae nahehi hotohotoai Bukae Hoto loui nahi haiveale hotove keu venee nahate vanu.”

³³⁻³⁴ Abu kateai louito solekai hoveveve Dielusalemale hoideveve. Keve velehovosege Iesu esemu leveni (11) isi esemuve degomole keau igaetao uliale kebia namigevei avoe, “Seleveta Iesuu hovelalahi Saimoni Bitae lohoge au elehanu.” ³⁵ Ige malaha abuita keau abuta namigevei avoe, “Nota humaha tavae katelalahu. Isito no Kosive ke hilokaholilu. Ige au valava vakoai noevesege no bae hilokalu.”

Iesuu au esemuemo velemanu.

(Matiu 28.16-20; Maka 16.14-18; Dioni 20.19-23; Abostolo 1.6-8)

³⁶ Ata abui keau kateai namigevesege Iesuu solekavesite vigoabemo lamisi ua. Isi namigevei avoe, “Lana ue dua vama.” ³⁷Ige abu ke elehai huhulahai avoe, “Mesoho aluike no ko elehalu.” Isime vabue toela valu. ³⁸Katelahage au namigevei avoe, “Osiohoike la uvuu kibikibianu. Oleve katealemoike la uvuu dolodoloanu. ³⁹Isito di adau di veloti samagulahale ko elegeveve. Dailike ko. Dau alu holioholinu. Alu keau misioholisi itavaholilu. Isito dau kateholinu. Iale daela holisi hilokave.” ⁴⁰Kateai namigeveito au ada isi au velo malei haivenu. ⁴¹Ige abu ke elehai vahaeholahaito ke huhulahai dolodololahalu. Isege au belagevei avoe, “La ivevebena ua.” ⁴²Kateai louge abu huena mole mahoale ivi mai omilu. ⁴³Ige au ke mai vudiabemo inu.

⁴⁴Isi namigevei avoe, “Di subuta lahehi ui hoto koseale loui la namigevenu. ‘Di vaveve bahata Moseseu subuta hisaliale, belovetaeau hisaliale isi Samusimo hisaliale keabuna bahata seleve holi.’” ⁴⁵Kateai louito uvuiabe alavoge abu bae Bukae Hoto kemo lulelelahalu. ⁴⁶Ige au haivei avoe, “Bukae Hotou louale Kelisona vatehani malei hatiniege vanie ni abuita igaetaeau uoholisege auna tota hovelahai. ⁴⁷Auna hovelahage ataveabuna ivivemo ata haivei namigevege abuna vaveve toela halevage Dilavana ulihai. Ige abuna vasohuta Dielusalema kove ata haiveito gabie bae vata bahatae tai ata haivei. ⁴⁸Bukae Hotou louale keu seleve holige la vaveve ke bahata elehai hilokalu. ⁴⁹Isito kove usege di Mamau louale ke di di Munana Tumute hanavoge au la malevei negotievei.”

Iesuu otogoe veatinu.

(Maka 16.19-20; Abostolo 1.9-11)

⁵⁰Iesuu hoto ke louge uoholige au au esemu holoevei Dielusalemae halei Beteni oe tinu. Keve tiale au ada ebagemai kebia hoesegevenu. ⁵¹Hoesegeveito halevei otogoe veatisi tinu. ⁵²Veatisi tisege abu hoesehavoito halevai vahaehota hoidevei Dielusalemae lohohu. ⁵³Iilale vani bahata Diue dubu baluga keve Dilava hoesehavoma.

Dioni

Ukolikolie hoto

¹ Vatau uoholisege Hotou ua. Hoto keu Dilavati subuta ua. Iale Hoto keike Dilava.
² Vatau uoholisege Hoto keu Dilavati ua. ³ Avuemoike Dilavau onobenobe bahata vaevenu. Keu uoholivatege onobenobe bahata keau uoholilu. ⁴ Kemoike ukolikoliu ua. Iale keu ataga mai vatae lohoalemo vatae ata bahataebuna atagave elehai. ⁵ Atagave keu vata kove haluge vavie vaveve keau atagave ke ehodovaholilu.

⁶ Hoto kemoike Dilavau au hoto louveve ata mole ivi Dioni hanavonu. ⁷ Ige keu lohoale atagae hoto loui ata haivenu. Ata haivei isivialeike abu hoto ke evisi ehovai. ⁸ Dioni keu ataga ke holioholinu. Isito keu lohoale atagae hoto loui ata haivenu. ⁹ Ataga keu ataga seleve. Iale ataga keu lohoale vatae ata bahatamo halunu.

¹⁰ Keu lohoale vatae ua. Keike vata vanu. Isito vatae ataeau valitisi hilokaholilu. ¹¹ Keu vatae lohoale au ata haivege keau hotove evioholilu. ¹² Isito degomoleau igaegae hotove evisi abu uvu mai avuemo mavolu. Ige au au vuvunemo abuhu loui avoe, "Laeau Dilava esea." ¹³ Ataeau ese houeveale kemo abu Dilava ese holioholilu. Isi vavae isivi mesoho atae isivi kemo keau Dilava ese holioholilu. Isito Dilava isivimoike abu eseve holilu.

¹⁴ Hoto nehe keu ata holisi nahahi ua. Ige nahi ke elehage vaveve keu seleve unaha. Ige keu au uvu mai nahiovei nahi tedeaveale keu duave unaha. Ige nahi atagave ke elehai hilokage Mamaveike au ataga ke mai au mo igae ominu. ¹⁵ Ige Dioniu hotove loui ata namigevevi avoe, "Di subuta ata ke deiadaike laheho lounu. Di loui kosea, 'Ata molena bae di ehomai lohai. Keu di evihale Kosive. Kosealemo di uoholisege keu subuta ua.' Iale ata keike." ¹⁶ Ata keu Kosive baluga. Iale keu au uvu bahata mai nahiovei nahie hoesegevevi vani bahata nahi tedeavema. ¹⁷ Dilavau au menaka mai Mosese omiale kemo ataeau vaveve toela vage ke ibina abuna hatihati malei. Isito Iesu Kelisou hatiale kemo Dilavau nahi huhuevevi nahie toela ulihai au hotoe dua mai nahiovenu. ¹⁸ Atabeu Dilava elehaholinu. Isito uvuve mo igae keu lohoale au Mamae hoto loui nahi haivege nahi Dilava vaveve hilokalu.

Ata babatisogevemale Dioni ke hoto

(Matiu 3.1-12; Maka 1.1-9; Luka 3.1-18)

¹⁹ Vani mole Diue kosive Dielusalemale umale keau dubu nalimale ata degomole hanavege abu Dioni belalahiho tilu. Abu tiale namihai avoe, "Ole a." ²⁰ Ige Dioniu lobo-geveholisito inuta namigevevi avoe, "Dau ata tedeavemale kosive Keliso ke holioholinu." ²¹ Ige abu namihai avoe, "Ana Ilaidianike." Ige Dioniu namigevevi avoe, "Dau beloveta ke holioholinu." Ige abu tota belahai avoe, "No beloveta mole hemei umale ke aniko." Ige au loui avoe, "Ba, dau ke holioholinu." ²² Kateige abu loui avoe, "A ivi a vaveve loui no namigevenela. Ige no hoidevevi talive no kosive kebia namigevevi." ²³ Ige Dioniu namigevevi avoe, "Subuta beloveta mole Aisaia keu ata mole vaveve lounu. Au loui avoe, 'Ata molena bae botoe hoai kosea, Kosive humaha ke inuta loive.' Beloveta keu louale ata ke daliko."

²⁴⁻²⁵ Dioniu kateai lousege Balisia ataeau abu ata hanaveale nehe keau tota Dioni belahai avoe, "A loui kosea, 'Dau ata tedeavemale Keliso ke holioholinu.' Isi a loui kosea, 'Dau Ilaidia holioholinu. Isi beloveta ke holioholinu.' Isito osialemoike a emo ata babatisogevema." ²⁶ Kateai louge Dioniu namigevevi avoe, "Di e unahamo ata babatisogevema. Isito kosive moleu la vigomo uale ke la hilokaholilu." ²⁷ Ata kena gabie lohoniege kosive baluga holisi di evihai. Iale di ivite holialebene bae tamakave tohoai. Isito dau ivite holioholinu." ²⁸ Dioniu Diodani e ke vaki mole ui hoto ke bahata lounu. O mole ivi Beteni keve ui e kemo ata babatisogevenu.

Dilava Mamoe ese

²⁹ Vani mole Dioniu elehasege Iesuu avue lohonu. Ige au ata namigevevi avoe, "Elehave. Dilava mamoe eseike uoke lohonu. Dilavau ke hanavoi isiviale au hatai vatae atae toela ulihai. ³⁰ Ke hotoike di subuta la namigevevi laheho loui kosea, 'Ata molena bae di ehomai lohoniege di evihai. Kosealemo di uoholisege keu subuta mole ua.' ³¹ Di subuta ata ke hilokaholinu. Isito di lohoale emo ata babatisogevemale kemo isiviale Iselala ata nahiau ata ke hilokai." ³² Hoto ke louito tota abuhu loui avoe, "Di vani kela Iesu emohavoito elehasege Munanae Tumuu ugu mole imutava ke nahate holisi otogomo dobai lohoale avuemo ua. ³³ Dilavau di namihaholivatege di ke hilokaholinu. Isito Dilavau di namihale kemoike di ke hilokanu. Au daho loui avoe, 'Ana elehasege Munanae Tumuna lohoniege ata molemo ui. Iale ata kena bae au Munanae Tumu hanavoi ke

vuvunemo ata hoesegevei.’ ³⁴ Dilavau daho louale kemo di ata uoke elehai hilokage keu Dilava mo. Iale di hoto loui la namigeveale ke evive.”

Iesu esemuiiau vasohuta ehovale

³⁵⁻³⁶ Vani mole Dioniu au esemu abuitati lavisi usege Iesuu ohanoi tisege Dioniu elehai au esemu namigeveve avoe, “E, Dilava mamoe eseu lotiale uoke elehave.” ³⁷ Ige esemuve abui keau hoto ke evisi Iesu ehovale. ³⁸ Ige Iesuu hoilalahai kebia elegeveve abuhō loui avoe, “La oleve tima.” Ige abu namihai avoe, “Kosive, a oleve uma.” ³⁹ Ige Iesuu abuhō loui avoe, “Loholive di umale ke elehave.” Ige abu avuluvuta tiliale au umale ke elehalu. Isege vau dobai gutuige abu avuluvuta ua.

⁴⁰ Ata abui keau Dioni hoto evisi Iesu ehovai lohoale ke mole ivilike Andulu. Keu Saimoni Bitā hoho. ⁴¹ Iale keu halei tiale au nana elehai namihai avoe, “Nahie ata tēdaevemale kosive Keliso ke no elehalu.” ⁴² Kateai louito au nana melamei Iesue lohonu. Ige Iesu elehai avuhō loui avoe, “A ivilike Saimoni. Au Dioni mo. Isito dana a ivie dogā ivihai aho loui kosea, ‘Sibasi.’” Iesuu kateai Saimoni Bitā ivihale ke ihuīke mune.

Iesuu Bilibita Natanielata hohavenu.

⁴³ Vavita Iesuu isiviale Galilīe tai. Isi tialeu Bilibi elehai avuhō loui avoe, “Lohoge naiti tai.” ⁴⁴ Bilibi keu Betesaida ata. Ige Andulu isi Bitā kebiata avuluvuta o igae. ⁴⁵ Ige Bilibiu tiale ata mole Nataniela namihai avoe, “Moseseu subuta Bukae Hotomo hoto mole hisalīai avoe, ‘Nahie tēdaevemale Kosive molena bae lohoi.’ Ige beloveta kebiata au lohoveve hoto ke igae loulu. Iale no ata ke elehalu. Keu Nasaleta ata mole Dioseba ke mo. Iviveike Iesu.” ⁴⁶ Ige Natanielau belahai avoe, “A huhuige Nasaleta o kemo vavevebe duana vali lohoi.” Ige Bilibiu namihai avoe, “Lohoge nahi talive elehai.”

⁴⁷ Kateige abu tige Iesuu Nataniela elehai vaveveve lounu. Isi loui avoe, “Ata kou Iselala ata seleve. Kou loboe ata holioholinu.” ⁴⁸ Ige Natanielau belahai avoe, “A oleve kateike vaimē di hilokanu.” Ige Iesuu avuhō loui avoe, “Bilibiu a hohavoholisege a idi mole ivi vige ke umukamo ugulamoi usege di a elehanu.” ⁴⁹ Ige Natanielau avuhō loui avoe, “Kosive, au Dilava mo. A keu Iselala ata no Kosive baluga.” ⁵⁰ Ige Iesuu avuhō loui avoe, “A idi ke umukamo ugulamoi uale ke di aho louike vage a uvu mai daemo mamonu. Isito di vaveve degomole abuna di aho louale ke evihage ana bae elegeveve vikoā.” ⁵¹ Kateai avuhō louito kebia bahataho loui avoe, “Di hoto seleve loui la namigeveve. Gabie otogou dailahasege Dilava anelu abuna Atae Ese vavamo dobuluvisi vealuvige lana elehai hilokage Dilava vuvunēu avuemo ua.

2

Keina ataeau mole holoeveve lovi valu.

¹ Vanie ni abuita uoholisege Galilī vata keve Keina ataeau mole holoeveve lovi valu. Ke vohale keve Iesu neinata ua. ² Ige abu Iesuta esemuiabetaho louge abu lovi ke ilihō loulu. ³ Loholiale abuhi lovi ilu. Isi uaini ige uoholige Iesu neinau Iesuhō loui avoe, “Uainibeu uoholinu.” ⁴ Ige Iesuu au neinaho loui avoe, “Ainaho di onole vaveve ke daho loulive. Kosealemo di ke vaveve vani lohololinu.” ⁵ Kateai louge neinau lovi vama kebia namigeveve avoe, “Au onole laheho louge ke vave.”

⁶ Kateisege Diue ataeau tauli debamo vale bahata sigisi(6) abu avuemo e hai ada totoimale keau keve ua. Tauli keau baluga. Isito oteve unaha. ⁷ Ige Iesuu lovi vama kebia namigeveve avoe, “E hai tauli kebia ovege abu tobalohoi.” Ige abu e hai tauli kebiamō keohage keau ililoholu. ⁸ Ige Iesuu namigeveve avoe, “Aike e ke hai mai talive mole holoeveve hoto louveve ata ke omive.” Kateai namigeveve abu e hai tiale omilu. ⁹ Ige malaha keu e ke ige heanu. Isito hilokaholinu abu oleveike uaini ke mai loholu. Isito e ke hale esemu keau hilokage Iesulike ke vanu. Ige malaha keu ma melameveve mo ke hohavoge au avue tinu. ¹⁰ Ige au namihai avoe, “Ataeau mole holoeveve vani kemo abuna vasohuta uainie dua hai ata ovei. Ige ataeabuna e ke ige unibeau hanilahage abuna deive ke malei ata ovei. Isito au kateholinu. No vasohuta iale keu aike ko he nahate va holioholinu. Isito a uainie dua ko hai noevege no ige keu noemo he selevēanu.”

¹¹ Iesuu vasohuta au vikoā vaveveike au ke vage Keina ataeau Galilī vatae uale keau vuvunēu vaveve ke elehalu. Ige esemuiabeta ke elehai kemo bae abu uvu mai avuemo mavolu. ¹² Ige ke iae Iesu, neinave, hohuvuiabe isi esemuiabe keau o ke halevai o mole Kabenumu keve ua.

Iesuu dubu baluga ke uvue tinu.

(Matiu 21.12-13; Maka 11.15-17; Luka 19.45-46)

¹³ Abu keve usege vani degomoleau uoholisege Diue atae vahaeho vani baluga Basova keu vuguvuguanu. Ige Iesuu Dielusalemāe tinu. ¹⁴ Tiale keve vellemai elehasege Diue

ataeau abu dubu baluga ke uvue bolomakau, mamoe, ugu kebia maketilamaha. Isege moni senisilahamale keau keve uguiaivoi moni senisilahama. ¹⁵ Ige Iesuu kebia elegevei hote kikia mai bolomakau mamoe kebia havei nunuvege abu bahata detuluvisi heie tilu. Isi moni senisiamale kebia teibolo ekovehage moniabe keau keiohovolu. ¹⁶ Isi ugu maketilamahale kebia namigevei avoe, “Ke malei heie teve. Lainaho di Mamae o komo maketi vaveve vagelive.” ¹⁷ Kateige Iesu esemuiaru ke elehai Bukae Hoto mole huhulahalu. Hoto keu loui avoe, “Kosive, abu a o aiohavoale ke di huhuage di uvuu tumuanu.”

¹⁸ Kateige Diue kosiveau belahai avoe, “Ana vikoe vaveve onole igae vage no ke elehai kemo hilokage vuvune kemoike a vaveve kateale vanu.” ¹⁹ Ige Iesuu namigevei avoe, “Dubu ko koiage vani abuita igaeta uoholige dana tota hou.” ²⁰ Ige abu ke evisi namihai avoe, “A huhuige vanie ni abuita igaeta ke uvumo ana o ko hou gabiai. Ana hilokaholinu. Abu vagana voti sigisi (46) uvumo dubu ko hou gabilahalu. A louale keu anekianu.”

²¹ Abu katelahai loulou. Isito Iesuu dubu ke louholisito au ebikahoike au ke lounu. ²² Kateai louniale gabie hatai hovelahage esemuiabeau Iesuu louale hoto ke huhulahai avoe, “Bukae Hotou louale isi Iesuu louale hoto keau hoto selevel.”

Iesuu ata bahata kebia hilokaevenu.

²³ Iesuu Basova vani kemo Dielusalemale usege ata moagaeau abu uvu mai avuemo mavolu. Kosealemo Iesuu vikoe vaveve vaveve abu elehalu. ²⁴ Isito Iesuu uvuiabe hilokale kemo au uvu mai abuemo mamoholinu. Kosealemo ata kebiau isiviale vikoe vaveve elehaito bae abu uvu mai Iesuemo mavoi. ²⁵ Atabeu vaveveabe ke loui namihaholinu. Isito biageu uvuiabe hilokai gabianu.

3

Nikodimasiu vavimo Iesue lohonu.

¹ Dielusalemale o kemo Diue kosive mole Nikodimasi keu ua. Keu Balisia atahi vaveveabe vamale. ² Iale keu vavi mole Iesue lohoale namihai avoe, “Kosive, no hilokage Dilavau a hanavoge a keu no haivemale kosive. Atabeu bae vikoe vaveve ke va kavalivebene. Isito Dilavau avuemo u hutevage bae kateale vai.” ³ Ige Iesuu namihai avoe, “Seleveta di a namihage evinela. Atabeu bae Dilava matamae doge keve talivebene. Isito auna vasohuta u moleaito bae keve tai.” ⁴ Ige Nikodimasiu belahai avoe, “Ataeau kosi holiale keabuna oleve kateai tota u moleai. Keau abu neinuvue unie uvue tai tota uveve keu anekianu.” ⁵ Ige Iesuu namihai avoe, “Seleveta di a namihai. Ata oleuoleu eta Munana Tumutamo uale kebia unahae abuna Dilava matamae doge keve tai. ⁶ Ata oleuoleu abu neinuvumo uale keau ataeale. Isito oleuoleu Munana Tumumo uale keau Munana Tumuelea. ⁷ Katealemoike di aho loui kosea, “Tota u moleanela.” Iale kemo ainaho vikoalive. ⁸ Helukau heiata utuai tai lohoge ana umuve ke evinela. Isito keu oleve tai lohoale ke a hilokaholinu. Iale oleuoleu Munana Tumumo uale keau ke nahate. Iale hoto kemo ainaho vikoalive.” ⁹ Kateai louge Nikodimasiu belahai avoe, “Vaveve kena oleve kateai.” ¹⁰ Ige Iesu namihai avoe, “A keu Iselala ata haivemale kosive mole baluga. Isito a di hoto kemo luleleholinu. ¹¹ Iale seleveta di hoto ko loui a namihage evinela. No onole elehai loui hilokale ke laheho louge la kemo la uvu mavoholilu. ¹² Di vatae hoto laheho louge la di hoto ke maholilu. Iale dana otogoe hoto laheho louge lana oleve kateai bae di hoto mai. ¹³ Atabeu otogoe ui avuemo dobai lohoholinu. Isito Atae Eseu avuemo ui dobai lohoale ke igaena tota veatai tai.

¹⁴ “Subuta Iselala ataeau tomagie tiale vaveve toela vage Moseseu kobamo ute vai mai idimo ehanumage ataeau ke elehai haluviholisito nita ua. Iale ke nahate ataeabuna Atae Ese mai idie domo hamai. ¹⁵ Ige oleuoleu abu uvu mai avuemo mavoale keabuna ukolikoli malei. ¹⁶ Dilavau vatae ataho isivi balugale kemoike au au mo igae mai vatae hanavonu. Ige elike ataeau abu uvu mai avuemo mavoliege abu bae haluvilivebene. Isito abuna ukolikoli malei. ¹⁷ Dilavau au mo hanavoale keu vatae ataemo kotaho lohoholinu. Isito vaveveabe toelamoike au maleveho lohonu.

¹⁸ “Iale oleuoleu abu uvu mai movemo mavoge au bae kebiama kotalivebene. Isito ataeau abu uvu mai Dilava mo igaemo mavoholiale kemo Dilavau subuta kotae hoto loui mamoaale kena kebia malevei. ¹⁹ Atagau subuta vatae lohoge ataeau ataga ke kabebihavoi vaviho isivilahale kemo Dilavana malevei hoto balugamo otovei. Kosealemo vaveveabe keu toelanu. ²⁰ Iale ata oleu vaveve toela vamale keu atagaho isiviholisi bae atagae loholivebene. Kosealemo keu isiviholialeike ataga keu vaveveve toela kemo atagaho. ²¹ Isito ata oleu vaveve dua vamale kena atagae lohoge atagana vaveveve kemo haluge ataeabuna hilokage vaveveve keu Dilavamo lohonu.”

Dioniu Iesu vaveve lounu.

²² Iesuu hoto ke louito au esemu holoevei Diudia vatae tinu. Iliale vani degomole keve abuhi ui ata babatisogevenu. ²³ Isege Dioniu Salimi o ke vavae o mole ivi Anoni keve ata babatisogevema. Kosealemo keve e balugau ua. Kemoike au keve usege ataeau tige au kebia babatisogevenu. ²⁴ Abu Dioni mai dibulaa mavoholilike vasege au lovi ke vanu.

²⁵ Isege Dioni esemu degomoleau babatisoamale vaveve ke loui Diue atahi moleho louma. ²⁶ Katelahaito halevai Dionie tilu. Tiliale namihai avoe, “No kosive, malaha moleu Diodani e vaki mole ae lohoale ke ana huhuanu. A ke vaveve noheho lounu. Iale keu aike ata babatisogevege ata bahataeau avue tima.” ²⁷ Ige Dioniu namigevevi avoe, “Isito Dilavau lovi igaegae nahioveale ke nahiabuna vai. ²⁸ Laeau di hoto louale ke evilu. Di la namigevevi kosea, ‘Dau ata tadeavemale kosive Keliso ke holioholinu. Isito Dilavau di hanavoge di keho uli holinu.’ ²⁹ Iale kemo di hoto mole louge evive. Ma melameveve mo kena ma melamei. Ige haokaveu vavavemo lamiale kena hotove evisi vahaehoai. Iale ke nahate di Iesuu lohoale hoto ke evisi vahaehoanu. ³⁰ Ataeau ke ivi ebagevage ke iviu di ivi evihale keu duave. Isege di iviu dobale keta duave.”

Otogomo lohoale ata keu baluga.

³¹⁻³² “Iale ata keu otogomo lohoale keu ata bahata evigevevi baluganu. Ata oleu vatae ata holiata kena vatae hoto lougei. Isege otogomo lohoale auna ata bahata evigevevi au ehue onole elehai eviale ke lougei. Isito ataeau bae hotove evilivebene. ³³ Iale ata olena hotove eviniege kemo hilokage Dilava keu seleve. ³⁴ Dilavau hanavoale ata kena Dilava hoto lougei. Kosealemo Dilavau au Munanae Tumu mai omige keu avuemo vuvuneanu. ³⁵ Dilavau isivi au mo omisi onobenobe bahata malei omige au au negomo ke bahata nibievema. ³⁶ Iale oleuoleu abu uvu mai avuemo mavoliege abuna ukolikoli malei. Isito oleuoleu abu uvu mai Dilava mo kemo mavoholiliege abu bae ukolikoli malelivebene. Ige Dilava itumuna vani bahata kebiamo ugei.”

4

Samalia keateu Iesuemō lohonu.

¹ Balisia ataeau evige Iesuu ata moaga malevevi babatisogeveale keu Dioni evihanu. ² Isito Iesuu atabe babatisogeveholinu. Esemuiabe unaha abuike ata babatisogevelu. ³⁻⁴ Ige Iesuu abu hoto louale ke evisi Diudia vata halei Galili vatae taliho Samalia vatae velemai tinu.

⁵ Tiale keu Samalia o mole ivi Saika keve velemanu. O ke vavamo Diekobou subuta au vata mole mai au mo Dioseba ominu. ⁶ Iale vata kemo Diekobo e abatau ua. Iale Iesuu oai lohoalelua enuai kabebiai e abata ke vavamo ugulamoi uma.

⁷⁻⁸ Keve ugulamoi usege esemuiabeau halevai taunie lovi voilahaho tilu. Isege vanie vigeo Samalia keate moleu e haliho lohonu. Ige Iesuu avuho loui avoe, “E hage di isi.” ⁹ Ige keate keu namihai avoe, “Au Diue ata. Isege dau Samalia keate. Iale osialemoiike a isiviale di e hai aoge a isi.” Keate keu hoto ke louale keu koseanu. Diue ataeau bae Samalia atahi kabu igaemo e igelivebene. ¹⁰ Ige Iesuu keate ke namihai avoe, “A Dilavau onobenobe ata ovemale ke hilokai aiti hotoimale keta hilokavatebe a di namihage di ukolikoli e mai aonu.” ¹¹ Ige keate keu avuho loui avoe, “Kosive, e kou heila ua. Iale a e bagu mai lohoholialemo ana oleve kateai ukolikoli e hai daoge di isi. ¹² No buluve Diekobo keu subuta abata ko lovoi kemo e isi e hai au eseta au ovota ovenu. Iale ose a ke evihanu.” ¹³ Ige Iesuu avuho loui avoe, “Ata oleu e ko iale kena tota enuai. ¹⁴ Isito di e mai ata oleme ovege abu iale keau bae tota enulahalivebene. Isito ukolikoli e kena uvuiabemo hanage abuna uveve doga malei.” ¹⁵ Ige keate keu avuho loui avoe, “Kosive, avage e ke hai daoge di isi. Ilive elike enuholisi e ko haliho tota loho halei.” ¹⁶ Kateige Iesuu namihai avoe, “Talive a kolia melamei tota kove lohonela.” ¹⁷ Ige keate keu namihai avoe, “Dau koliaholinu.” Ige Iesu namihai avoe, “Seleveike a ke lounu. A aike koliaholinu. ¹⁸ Isito a subuta malaha ada mole holoeveito kebia halevenu. Isi aike a moleti umale keu a kolia seleve holioholinu. Iale a daho louale keu seleve.” ¹⁹ Kateai avuho louge keate keu namihai avoe, “Kosive, di huhuige au beloveta ata. ²⁰ No buluveau subuta tana komo guligulilahalu. Isito Diue ata la loui kosea, ‘Ataeabuna Dielusalemae Dilava hoesehavoge.’” ²¹ Ige Iesuu avuho loui avoe, “E, di hoto louale ko evinela. Vani molena lohoge ataeau bae tana komo mesoho Dielusalema o kemo nahie Mama hoesehavolivebene. ²² Samalia ata laeau la guligulilahamale ke ihu hilokalalu. Kosealemo Diue ata noemo Dilavau toelamo ata maleveve kosive hanavonu. ²³ Iale vanive keu aike lohonu. Iale guliguli seleve vamale keabuna abu uvu bahatamo vaveve seleve unahamo nahie Mama hoesehavoi. Ata kateale biahoike Dilavau isiviale keau hoesehavoge. ²⁴ Dilava keu ata

holioholinu. Isito keu munanae tumu. Iale oleuoleu Dilava hoesehavoliho valiege abu uvu bahatamo vaveve seleve unahamo hoesehavoi.”

²⁵ Kateai louge keate neheu namihai avoe, “Di hilokage abu ata tedaevemale kosive ke ivihai avoe, ‘Keliso.’ Iale di evige kena lohoniege no onole vamale ke bahata noheho loui.”

²⁶ Ige Iesuu avuho loui avoe, “Ata ke dailiko aho louma.”

²⁷ Kateai lousege esemuiabeau hoidevei lohoge Iesuu keate keti hotohotoima. Ige abu ke elehai vikolahalu. Isi isiviale keate ke belahai avuho loui kosea, “A onole vama.” Isi isiviale Iesuho loui kosea, “A osiohoike keate keti hotohotoima.” Katelahai huhulahaito abuhu hotobe louhohilu.

²⁸ Abu lohoale velehovosege keate keu au e bagu halei oe tiale ataho hoto ke lounu. ²⁹ Isi namigevei avoe, “Lohoge nahi talive malaha mole elehai. Malaha keu di vaveve bahata vamale ke daho lounu. La huhuige nahie ata tedaeveve kosive Keliso kenike.” ³⁰ Kateai louge ataeau o halevai Iesue loholu.

³¹ Isito abu lohoholisege Iesue esemuiabu avuho loui avoe, “Kosive, lovi mai inela.”

³² Ige Iesuu abuhu loui avoe, “Di lovi iale ke la hilokaholilu.” ³³ Ige abu ke evisi abu moleteho loui avoe, “La huhuige ata moleu lovi mai ominu.” ³⁴ Kateale huhulahasege Iesuu namigevei avoe, “Di lovi keu koseanu. Dana di hanavoale ke isivi vai au lovi daoale ke vai gabiai.

³⁵ “Isito la loui kosea, ‘Bata abuita abuita uoholisege lovina bae baeai.’ Iale di la namigevege evive. Nenilahi bulu elegeve dua vave. Lovi keau baelahage maleveve vaniu lohonu. ³⁶ Ata molena lovi hai. Ige keu baege molena lovi ke lovoi. Iale ke nahate ata molena Dilava hoto loui ata haivei. Ige ata molena lohoniege tota kebia haivei malevege abuna ukolikoli malei. Ige ata abui keabuna abu lovi kemo ibinae dua malei vahaeholahai. ³⁷ Hoto keu seleve. Ata molena lovi hasege molena bae lovoi. ³⁸ Dana ata degomoleau lomilahale keve la hanavege lovi maleliho teve. Isito lana loviabe teige kemo tota lovi degomole maleve.” Iesuu kateai lovie hoto au esemuhu lounu.

³⁹⁻⁴⁰ Ige Samalia ataeau avue lohohiale namihai avoe, “Loholive nohehi unela.” Kosealemo keate keu abuhu loui avoe, “Keu di ono vade vamale ke bahata daho lounu.” Ige abu hotove evisi abu uvu mai Iesuemo mavolu. Kateige Iesuu tiale vanie ni abuita abuhi ua.

⁴¹ Abuhi ui haivege ata moagaeau hotove evisi bae abu uvu mai omilu. ⁴² Isi keau bae keate ke namihai avoe, “No a hoto louale ke unahamo no uvu mai avuemo mavoholilu. Isito no biaeau nova hotove evisi hilokage keu vatae ata maleveve kosive. Kemoike no uvu mai avuemo mavolu.”

Iesuu gamanie kosive mo hoesehavonu.

⁴³ Vanie ni abuita keau uoholige Iesuu halevei Galili vatae tinu. ⁴⁴ Keu subuta loui avoe, “Ata olen beloveta holige atave seleve keau bae hoesehavoi hotove malivebene.” ⁴⁵ Isito au Galilie tiale velemage ataeau elehaima vahaehove vai hoesehavolu. Kosealemo abu Dielusalemae tiliae Diue vahaeho vani Basova kemo Iesuu vikoe vaveve moaga vavege abu ke elehalu.

⁴⁶ Igeto Iesuu kemo halei tota Keina oe tinu. O keveike au subuta vikoe vaveve vage eu uaini holinu. Iale o kemo gamanie kosive moleu ua. Kosive ke mou o mole Kabenumu keve vavahanianu. ⁴⁷ Iale kosive keu Iesuu Diudia halei Galilie lohoale hoto ke evinu. Isi avue tiale namihai avoe, “Ana vali loholive di mo hoesehavoi. Au hativeveu vuguvuguike vage di lohonu.” ⁴⁸ Ige Iesuu avuho loui avoe, “La isiviale di vikoe vaveve moaga vage bae di hoto evisi mave.” ⁴⁹ Kateai lousege gamani kosive keu avuho loui avoe, “Kosive, lohoge naiti tai. Onoilage di mou hatima.” ⁵⁰ Kateai louge Iesuu namihai avoe, “Tenela. A mou momoleanu.” Ige malaha keu Iesu hoto ke evisi halei hoilahai tinu. ⁵¹ Tiale humaha tavae tisege esemuiabeau moveu momoleale hoto mai lohoale avuluvuta belehovolu. Isi namihai avoe, “A mou momoleanu.” ⁵² Ige malaha keu belagevei avoe, “Vanie ni vaesutemoike au momoleanu.” Ige abu namihai avoe, “Nivu vaniu uani (1) okolokiasage a moe hobeu uoholinu.” ⁵³ Ige mamaveu ke evisi hilokage vanie ni igaemoike Iesuu avuho loui avoe, “A mou momoleanu.” Ige kemo kosive keu au ese ehai abuhi abu uvu mai Iesuemo mavoi ehovalu.

⁵⁴ Iesuu Diudia halei lohoale Galili vata kemo vikoe vaveve mole vaito lohoale tota kosive ke mo hoesehavoge momoleanu.

5

Iesuu Betesida tabue vavamo ata mole hoesehavonu.

¹ Vani mole Diue vahaeho vani moleu lohoge Iesuu o ke halei Dielusalemae tinu.

² Dielusalema ke vavae hala balugatahou ua. Ige kemo geiti baluga abu ivihai avoe,

“Mamoe geiti.” Ige geiti ke vavamo tabu moleu uale Diue ataeau abu hotomo ivihai avoe, “Betesida.” Tabu ke vavamo abu vinaho oe ese ada mole houevelu. ³ Iale vavahaniteau kebia vinamo ladevei uma. Kebia degomoleau ni kedute. Ige degomoleau velo golote. Ige degomoleau oholisito u unahamalea. Iale keau isivialeike e keu kibiage vavahaniahe keu uoholisi. Iale keau keho tialeau ke hemei uma. ⁴ Keve usege vani igaegaela Dilava aneluna lohoi e kemo tige e keu kibiage oleu ulila emo biloale ke vavahanina uoholisi. ⁵ Iale ata kebia vigomo malaha mole igae keu vagana teti eiti (38) ke uvumo vavahaniai u unahanu. ⁶ Isege Iesuu lohoale malaha ke elehage keu keve lahai ua. Ige Iesuu hilokage malaha keu vagana baluga vavahani ke manu. Ige au avuho loui avoe, “Ana isiviai momoleai.” ⁷ Ige malaha keu namihai avoe, “Kosive, eu kibiage di mai emo mamoveve ke atau uoholinu. Katealemo di isiviale emo biloai. Isito ataeabuna di evihai solekai tai emo biloluvigei.” ⁸ Ige Iesuu avuho loui avoe, “Hovelahai a ava egumai mai lamisi tenela.” ⁹ Kateai louge malaha keu solekavesite momoleai hovelahai au ava egumai mai lamisi tinu. Bulamoike Iesuu vaveve ke vanu.

¹⁰ Ige Diue kosiveau malaha nehe momoleale keho loui avoe, “Novae vani kou bulae vani. Iale a bulamo ava ebamoi lohoale kemo a menaka egumanu.” ¹¹ Ige malaha keu namigevei avoe, “Di hoesehavoale ata keike daho loui avoe, ‘A ava egumai mai lamisi tenela.’” ¹² Ige abu belahai avoe, “Malaha oleike a namihage a ava egumai mai lohonu.” ¹³ Ige au namigevei avoe, “Di hoesehavoale ata ke di hilokaholinu.” Malaha keu Iesuu hilokaholiale keu koseanu. Iesuu ke hoesehavoito solekai atae uvue tinu.

¹⁴ Iniale ke iae Iesuu Diue dubue uvue tiale malaha ke elehai avuho loui avoe, “E, a nova momoleanu. Iale ainaho tota vaveve toela vagelive. Ana kateige vaveve toela balugana aemo lohoi.” ¹⁵ Kateai avuho louge au halei tiale Diue kosive namigevei avoe, “Iesu keike di hoesehavoage di momoleanu.” ¹⁶ Ige abu ke evisi Iesuluvuta ugologolohalahu. Kosealemo keu bulamo malaha ke hoesehavonu.

¹⁷ Ige Iesuu abuhou loui avoe, “Di Mama keu vani bahata vaveve dua vama. Iale ke nahate dana data vagei.” ¹⁸ Hoto kateale louge Diue kosiveau isivi balugaleike Iesu hamai. Au bula egumale ke unahamo abu kateholilu. Isito au loui avoe, “Di Mamaike Dilava.” Ige abu ke huhulahi avoe, “Kou isivialeike au ebika ebagemai Dilava nahate vai.” Kemoike abu isiviale hamai.

Atae Ese vuvune

¹⁹ Abu katelahage Iesuu abuhou loui avoe, “Seleveta di la namigevege evive. Dilava mou au isivimo onobe va kavaholima. Isito Mamaveu niveta vale ke unahahe au ke vama. ²⁰ Mamaveu au moho isivi balugai au vamale ke bahata au mo haivunu. Iale Mamavena isivianiege vaveve balugau vaveve ko evihale ke haivuge auna ke vage lana ke elehai tetelahave. ²¹ Mamaveu haluviale kebia tatuvei lu ovege abu hoveveveale ke nahate movena au isivimo ukolikoli oleme ovei. ²² Mamaveu bae atae vaveve abuemou kaovalivebene. Isito auna au vuvune bahata mai au mo omige movena atae vaveve abuemou kaovai. ²³ Katealemoike ataeabuna bahata Dilavata moveta ivi ebagevai hoesegevei. Dilavau au mo hanavoge lohonu. Iale oleuleu move hoesehavoholiale keau bae Mamave keta hoesehavolivebene.

²⁴ “Seleveta di la namigevege evive. Oleuleu di hoto evisi di hanavoale ke hotota eviliege abuna ukolikoli malei. Ige Dilavau bae vaveveabe abuemou kaovalivebene. Kosealemo au uveve doge oveale kemo abuna hovevevei ukolikoli malei. ²⁵ Seleveta di la namigevema. Vani moleu lohoma. Di tota louge evive. Vani keu aike lohonu. Iale laeau haluviale ke nahate vaike vage Dilavau di hanavoge di la hohaveho lohonu. Iale oleuleu di ho eviale keabuna uveve doge malei. ²⁶ Di Mama keu ukolikolie umuka. Ilike vage au au vuvune mai daoge dau data ukolikolie umuka holinu. ²⁷ Di Mamau au vuvune mai daoge di Atae Ese holinu. Iale kemo dana ataemo vaveveabe kaovai. ²⁸ Iale lainaho hoto kemo vikolahalive. Kosealemo vani moleu lohoge haluviale keabuna abata uvue di hoto evisi. ²⁹ Abuna di hoto evisi abatamo hovevevei. Ige oleuleu vaveve dua vamale keabuna hovevevei ukolikoli malei. Isege oleuleu vaveve toela vamale keabuna hovevevege toela ke ibina ovei.”

Iesuu au ebiamo hoto lounu.

³⁰ Iesuu hoto kateale louito tota hoto mole lounu. Avoe, “Di di isivimo onobe va kavalivebene. Isito Dilavau daho louale ke dana vai atae vaveve kaovage di vaveve kena inutolotoaloai. Kosealemo di bae di isivi unaha huhuai valivebene. Isito di hanavoale ke isivi unaha dana vagei.

³¹ “Dana di ebika ebagemai loui kosea, ‘Dau baluga.’ Ige la bae di hoto malivebene. ³² Isito ata moleu di ebagemai di vaveve louge di hilokage hotove keu seleve. ³³ Di vaveve louale ata keike Dioni. Ige la la esemu hanavege abu avue tige au abuhou di vaveve seleve

loui namigevenu. ³⁴ Isito ataeau di vaveve loui di ebagevai mesoho di ebagevaholige keta duave. Di Dioni vaveve ke loui isivialeike la ke evige Dilavana la malevei. ³⁵ Dioni keu lamebau lahai atagale ke nahate. Keu vasohuta lohoale la haivege la hotove evisi vahaehove vaito halevalu. ³⁶ Dioniu di vaveve louale keu baluga. Isito di Mamau lovi mai daoge di vamale keu balugataho. Iale lana di vaveve ke elehai hilokage di Mamau di hanavonu. ³⁷ Iale di hanavoale di Mama keu di vaveve loui di ebagemanu. Isito la ke hoto evisi nive elehaholilu. ³⁸ Isi la di hoto eviholiale kemoike di hanavoale ke hotota la eviholilu. Kosealemo hotove keu la uvumo uoholinu. ³⁹ La vani bahata Bukae Hoto kaovai huhulaha kosea, 'Noebuna komo ukolikoli malei.' Isito Bukae Hoto kemo di vaveve ua. ⁴⁰ Kateaito la isiviholialeike dae lohoi ukolikoli maleliho.

⁴¹ "Tale la di hoesehavoliho isiviholige keta duave. ⁴² Kosealemo di hilokage la la uvu mai Dilava omioholilu. ⁴³ Dau di Mamae vuvunemoike lohonu. Isito la di hoto mai ehovaholilu. Mesoho ata molena au vuvunemo lohoge lana ke hoto mai ehovave. ⁴⁴ La mole hoto evisi mole hoesegevema. Isito la isiviholialeike Dilava hoto evisi ke igae hoesehavoliho. Iale lana oleve kateai bae la uvu mai avuemo mavoi. ⁴⁵ Lainaho huhulaha kosea, 'Iesuna au Mamaho no vaveve loui.' Di bae kateale loulivebene. Isito Moseke ke igaena gabie la vaveve loui Dilava namihai. Kosealemo la huhulaha kosea, 'Moseke keu no kosive.' Isi la uvu mai avuemo mavolu. ⁴⁶ La katelahaito la uvu mai avuemo mavo selevelo holioholilu. La uvu mai avuemo mavovatege la hotove evisi di hotota evilu. Kosealemo di vaveveike au ke hisalianu. ⁴⁷ Isito la hotove eviholiale kemo lana oleve kateai di hoto evisi."

6

Iesuu ata vai taoseni (5,000) lovi ovenu.

(Matiu 14.13-21; Maka 6.30-44; Luka 9.10-17)

¹ Vani mole Iesuu tota hoilaha Galili tabu ke houi vaki mole lohonu. Tabu ke ivi moleike Taibiliasi. ² Iale Iesuu keve lohoge ata moagaeau ehovai avuluvuta loholu. Kosealemo au au vuvune vavevemo vavahanitebia hoesegeveale ke abu elehalu. ³ Ige Iesuu au esemu holoevei abuhi tiale tanae uguiaivoi ua. ⁴ Diue vahaeho vani mole Basova keu kateimalela vuguvuguanu. ⁵ Ige Iesuu niavei elehage ata moagamoagaeau avue lohoma. Ige au kebia elegevei au esemu mole Bilibi namihai avoe, "Nahiabuna oleve lovi voilahai ata kobia bahata ovei." ⁶ Kateai loui Bilibi evievi kaovanu. Au kateaito hilokage auna vikoe vaveve vai. ⁷ Ige Bilibi namihai avoe, "Nahiabuna moni baluga tu handele kina (K200) kateale malei lovi voilahage au bae neniabeta ulivebene." ⁸ Kateai louge Iesuu esemu mole Saimoni Bita hoho Andulu keu abuhu lounu. ⁹ Loui avoe, "Ata kebia vigomo no moleu valava ada mole isi huena abuita kebia malei lohonu. Isito lovi kehameu bae ata kobia bahata nenita ulivebene." ¹⁰ Ige Iesuu au esemuhu loui avoe, "Ata kebia namigevege abu uguiaivoi." Ige esemuiabeau ata kebia namigevege abu kulue golomo ugulevalu. Ata kebia uvumo malaha unaha abu dodaveale keau bahata vai taoseni (5,000) ata. ¹¹ Isege Iesuu valava malei Dilava hoesehavoito malei ataeau uguiaivoale kebia ovege abu ilu. Isi huena kebia malei emo ke nahate vanu. Kateige abu ke ige uniabeau hanilahalu. ¹² Kebia bahata uniabeu haniage Iesuu au esemu namigevege avoe, "Lainaho lovi kebe sigu halevalive. Isito ke bahata malei bevuae." ¹³ Ige abu lovi ke sigu malei basiketi tuelomo (12) emege tobaloholu. Ataeau valava ada mole iale ke siguiabuike basiketimo ua.

¹⁴ Ige keve uale ata keau Iesuu au vuvune vaveve vale ke elehai loui avoe, "Seleveta nahi beloveta nehe hemei umale keiko lohonu." ¹⁵ Kateai louge Iesuu hilokage keabuna lohoi evudei vavave tolomo namihage auna kosiveabe holisi. Au vavevege hilokale kemo halevei ahuveta botoe tinu.

Iesuu ela lamisi tinu.

(Matiu 14.22-33; Maka 6.45-52)

¹⁶ Gutumo esemuiabeau hevaluvisi tabue loholu. ¹⁷ Lohoaleau isivilahale bouti mai tabu ke houi Kabenumue tai. Isi kateai Iesuu inohomo ulage vau loage abu bouti mai tilu. ¹⁸ Tisege heluka balugau utuige eu toelanu. ¹⁹ Eu kateisege abu negolaha tiale e nie tisege Iesuu e adala lamisi abue lohonu. Ige abu ke elehai vabulahalu. ²⁰ Vabulahage Iesuu abuhu loui avoe, "Lainaho vabulahalive. Iesuu dalike lohoma." ²¹ Kateai louge abu isivialeike au boutimo biloai. Ige Iesuu boutimo biloige bouti keu solekai tiale abu timale o keve velemanu.

Ataeau Iesuu kaovama.

²² Vani mole vavita ata nehe keau tiale Iesuu kaovalu. Isi hilokage esemuiabe keau subuta bouti mole mai tige Iesuu kebiahi tioholinu. ²³ Abu Iesuu kaovasege Taibiliasi bouti degomoleau tialeau Iesuu lovi hoesehavoge ata neheau iale ke vavae lavilu. ²⁴ Ige ata keau

Iesu kaovalata Iesuta esemuia beta elegeveholisime bouti ke biamo biloluvisi Kabenumu Iesu kaovaliho tilu.

Iesu keu ukolikolie lovi.

²⁵ Tiliale vaki mole velehovoi Iesu elehalu. Isi belahai avoe, “No haivemale ata, a vaesuvela kove lohonu.” ²⁶ Ige Iesuu avuta namigeveve avoe, “Di seleveta la namigeveve evive. Di vuvune vaveve vage la elehale kemo la di kaovaholilu. Isito la lovi ige la uniu haniale kemoike la di kaovama. ²⁷ Lainaho loviu sakavaveve ke lovi vai tubunagelive. Isito vani bahata ukolikoli maleveve ke lovi vai negolahave. Atae Esena lovi ke laovei. Kosealemo Mamaveu lovive ebagemai hanavoge au lohonu.” ²⁸ Kateai louge abu belahai avoe, “Noeabuna oleve kateai Dilava lovi ke vai.” ²⁹ Ige Iesuu namigeveve avoe, “Dilavau isivialeike la lovi koseale vai. Au hanavoale ata ke hoto evisi la uvu mai avuemo mavove.” ³⁰ Ige abu tota belahai avoe, “Ana vuvune vaveve onole vage no ke elehai no uvu mai aemo mavoi. ³¹ No buluveau subuta botoe ui lovi mole mana ke ilu. Bukae Hotomo vaveve ke hotou ua. Au loui avoe, ‘Lovi keu otogomo lohoge Moseseu louge abu ilu.’” ³² Ige Iesuu abuhu loui avoe, “Seleveta di la namigeveve. Moseseu otogomo lovi ke malei oveholinu. Isito di Mamaike lovi ke malei la buluve ovenu. Iale auna otogoe lovi seleve mai laovei. ³³ Lovi keike moveu otogomo dobai lohoale uveve doga mai vatae ata ovenu.” ³⁴ Ige abu belahai avoe, “Kosive, vani bahata lovi ke noevegenela.” ³⁵ Ige Iesuu namigeveve avoe, “Dau ukolikolie lovi. Iale oleuoleu dae lohoale keau bae vaelahalivebene. Isi oleuoleu di hoto evisi di ehovale keau bae enulahalivebene.

³⁶ “Isito di subuta laheho louale keu nova velemanu. Laeau di vaveve elehaito di hoto evisi ehovaholilu. ³⁷ Iale di Mamau ata daoge dae lohoale kebia di bae nunuvelivebene. Isito abuna daluvuta ui. ³⁸ Kosealemo di otogo halei dobai lohoale kemo di bae di isivi valivebene. Isito di hanavoale ata ke isivi dana vai. ³⁹ Di hanavoale ke isivi keu koseanu. Keu isiviholialeike au daoale ata kebia haleveliho. Isito isivialeike vanie gabila di kebia bahata tatuvege abu hoveveve. ⁴⁰ Di Mamau isivialeike ata oleuoleu di elehai di hoto evisi abu uvu mai daemo mavoale kebia dana vanie gabila tatuvege abuna hoveveve ukolikoli malei.”

⁴¹ Kateai louge Diue ataeau hotove keho isiviholisi abu moleteho louma. Kosealemo Iesuu loui avoe, “Otogomo lohoale lovi ke daliko.” ⁴² Isi abu moleho loui avoe, “Dioseba mo Iesu kenike. Nahi ke mamata neinaveta hilokalu. Iale keu oleve kateike vaime loui avoe, ‘Dau otogomo dobai lohonu.’” ⁴³ Ige Iesuu namigeveve loui avoe, “La daho itumulahai moleho loumale ke halevave. ⁴⁴ Atabeu bae dae loho kavalivebene. Isito di hanavoale di Mamau au isivi mai uvuvemo mamoge auna dae lohoi. Ige vanie gabila dana ke etuvage auna hovelahai. ⁴⁵ Subuta beloveta moleu hisaliai loui avoe, ‘Dilavana ata bahata haivei.’ Iale oleuoleu di Mamae hoto evisi avuemo lulelelahale keabuna dae lohoi. ⁴⁶ Ataeau di Mama elehaholilu. Isito di Mamau hanavoale ata ke igaeu elehanu.

⁴⁷ “Iale di la namigeveve. Oleuoleu abu uvu mai ata kemo mavoale keabuna ukolikoli malei. ⁴⁸ Iale dau ukolikoli lovi daliko. ⁴⁹ La buluveau subuta tomagie ui lovi mole mana ke isito haluvilu. ⁵⁰ Isito oleuoleu otogomo dobai lohoale lovi ke iale keau bae haluvilivebene. ⁵¹ Ukolikoli loviu otogomo dobai lohoale ke daliko. Iale oleuoleu lovi ke iale keabuna vani bahata ugei. Di lovi mai ata oveale keu di misilike. Iale lovi kemo abuna ukolikoli malei.”

⁵² Iesuu kateai louge Diue ataeau moleho loui mole belageveve avoe, “Malaha kona oleve kateai au misi mai nahiovege nahi isi.” ⁵³ Katelahai moleho lousege Iesuu abuhu loui avoe, “Seleveta di la namigeveve evive. Mesoho la Atae Ese misi ioholisi tahoveta ioholilige la bae ukolikoli malelivebene. ⁵⁴ Isito oleuoleu di misi isi di tahota iale keau uveve doga maleu. Iliege vanie gabila dana tatuvege abuna hoveveve ukolikoli malei. ⁵⁵ Kosealemo di misi keu lovi seleve. Ige di taho keu e seleve. ⁵⁶ Iale oleuoleu di misi isi di tahota iale keau daluvuta uge dana abuhi ui. ⁵⁷ Di Mama keu ukolikoli kosive holialemo data avuemo ukolikoli kosive holinu. Ige keu di hanavoge oleuoleu di misi iale keabuna daemo ukolikoli malei. ⁵⁸ Lovi keike otogomo dobai lohonu. Isito la buluveau subuta lovi iale keu ke nahate holioholinu. Keau lovi ke isito haluvilu. Isito oleuoleu lovi ko iale keabuna vani bahata ui tigei.”

Ukolikolie hoto

⁵⁹ Iesuu Kabenumu dubue ata haivei hoto kateale abuhu lounu. ⁶⁰ Kateai louge esemuia be moagaeanu ke evisi moleho loui avoe, “Kou hoto ko louale kou toloanu. Iale olena hotove ko evisi mai.” ⁶¹ Katelahai lousege atabeu hotoeabe loui Iesu namihaholinu. Isito Iesu biageu hilokage keau hotove kemo vahaehoholilu. Iale kemo au namigeveve avoe, “Di hoto louale keu la maleveve vahaehotigeveholialemo lana valive di halevai. ⁶² Lana kateige Atae Esena tota ehue hoilalahai au lohoale keve tige lana ke elehai osioi. ⁶³ Iale di

louge evive. Aataeau bae atae vaveve kemo ukolikoli malelivebene. Isito Munana Tumu igaemo ataeabuna ukolikoli malei. Di laheho louale keu Munana Tumue hoto. Iale lana ke evilige ukolikoli maleve. ⁶⁴ Isito la degomoleau mesoho hoto ke maholilu." Iesu louale keu koseanu. Subuta keu hilokage ata degomoleau bae hotove malivebene. Isi hilokage kebiamo ata mole igaena avuho haiai. ⁶⁵ Ige au tota namigevei avoe, "Di subuta laheho loui kosea, 'Di Mamau ata tabageveholiale keau bae dae loholivebene.' Katealemoike di laheho ke lounu."

⁶⁶ Iesuu hoto kateale louale kemo ata degomoleau ehovale keau halevai hoidevelu. ⁶⁷ Ige Iesuu au esemu tuelo (12) kebua belagevei avoe, "Keau katelahalu. Iale lana lata isiviai di halevai tai." ⁶⁸ Ige Saimoni Bitau avuta namihai avoe, "Kosive, noeabuna ata olemo hoto seleve mai. A igaemo ukolikoli hotou ua. ⁶⁹ No a hoto evisi hilokage au Dilava atae tumu." ⁷⁰ Ige Iesuu kebua bahata namigevei avoe, "Di esemu tuelo (12) la tabagevenu. Isito la molemo munanae toelau ua." ⁷¹ Iesuu hoto ke louale ihuveu koseanu. Saimoni mole mo Diudasi Kalitya keu Iesu esemu tuelo (12) kebiamu keu esemuve mole. Iale keike Iesuo haianu.

7

Iesu hohuvuiuu avuho louale

¹ Vani mole Iesuu Galili vata keve oai taito isiviholialeike Diudia vatae taliho. Kosealemo keve Diue kosiveau isivialeike hamage au hatai. ² Au keve ohanoi tisege Diue vahaeho vani moleu vuguvuguanu. Vahaeho vani kemo Diue ataeabuna evavaga houevei kemo ugei. ³ Iale vani keu vuguvuguige Iesu hohuvuiuu avuho loui avoe, "Matama ko halei Diudia vatae tenela. Ige elike a esemuiuu keve umale keau a vaveve elehai. ⁴ Ata oleu isiviale ataeau ivive hilokage au bae au vaveve mahogovalivebene. Iale talive a vaveve a vamale ke atae nimo vage ata bahataeau valive a vaveve ke elehai a hilokai." ⁵ Hoto ke louale kebua hotove maholilu. ⁶ Ige Iesuu au hohuvuho loui avoe, "La isiviai onole vaho valiege momolelahai vave. Isito ataeau di hilokaveve ke vaniu lohoholinu. ⁷ Vatae ataeau bae la aigevei lahehi ugologololivebene. Isito abuna daluvuta ugologololahai. Kosealemo di negobedai vatae ata namigevei loui kosea, 'La vaveve keau toelau.'" ⁸ Iale nena momolelahai vahaeho vani keve teve. Di bae aike talivebene. Kosealemo di vaniu lohoholinu." ⁹ Avu kateai namigeveito halei Galilie ua.

Iesuu Diue vahaehoe vani keve tinu.

¹⁰ Keve usege hohuvuiabeau Dielusalemae tisege au bae gabie ehovei tinu. Tiale ke ataeau hilokaholilu. ¹¹ Isege Diue kosiveau vahaeho vani kemo kaovalata elehaholisi mole belagevei avoe, "Iesu oleve." ¹² Ige ata bahataeau saiaivoi moleho loui tai lohoma. Degomoleau loui avoe, "Keu atae dua." Isege degomoleau loui avoe, "Ba, keu ata lobogevemale ataike." ¹³ Abu katelahaito baita atae vudimo nenilahai Iesu vaveve lohoholilu. Kosealemo abu Diue kosive vabugevelu.

¹⁴ Abu katelahasege vahaeho vani keu uoholihilo vasege Iesuu tiale Diue dubu baluga keve ata haivenu. ¹⁵ Ige Diue kosiveau hotove evisi tetelahalu. Isi moleho loui avoe, "Nahi hilokage ata kou sikuluholinu. Iale au oleve kateai luleleike vaimo hoto koseale louma." ¹⁶ Ige Iesuu namigevei avoe, "Di la haiveale keu di hoto holioholinu. Isito di hanavoale Dilava ke hotoike di loui la haivema. ¹⁷ Iale oleuoleu isiviai Dilava isivi vale keabuna hilokage di louale keu Dilava hoto emena di hoto unaha. ¹⁸ Ata oleu au hoto unaha louale kena kemo au ebika ebagemai. Isito oleu isiviai au hanavoale kosive ke ivi ebagemai isivive vale ata keu loboe ata holioholinu. Isito keu ata seleve. ¹⁹ Seleveta Moseseu menaka laovenu. Isito labeau menaka ke bahata ehovaholilu. Iale osialemoike la isiviai dahavoi." ²⁰ Kateai louge ataeau namihai avoe, "Oleu isiviai ahamoi. Aataeu ahavoliho isiviholilu. Isito mesoho a kemo munanae toelau ua." ²¹ Ige Iesuu namigevei avoe, "Di bulamo vaveve mole baluga vale keike la elehai vikolahalu. ²² Isito laeau bulamo lovilahama. Kosealemo la Mosese menaka ke ehovai bulamo la moe ese kebua vudie vate bohievema. Isito Moseseu menaka ke mamoholisito la vavivuiabuike vasohuta vaveve ke valu. ²³ Iale la bulamo la ese vudie vate bohilive elike kemo Mosese menaka ehovave. Iale di bulamo malaha ke hoesehavoge keu hovelahale kemo la osiohoike daho itumulahalu. ²⁴ Lainaho atae vaveve unaha elehai kemo hoto lougelive. Isito nenilahai ihuve seleve elehaito bae kemo hoto lougeve."

Nahie tedaevemale kosivenike ko.

²⁵ Iesuu kateai lousege Dielusalema ata degomoleau ke evisi moleho loui avoe, "Malaha konike abu isivilahale hamage au hatai. ²⁶ Isito elehave. Au ata moaga kobiahoo louge nahie kosiveau avuho louholilu. Mesoho kosive keu hilokage keu nahie tedaevemale kosive Keliso. ²⁷ Nahi hilokage nahie tedaevemale kosive Keliso keu lohoge ataeau bae

au oleve lohoale ke hilokalivebene. Isito malaha kou lohoale ke nahi hilokalu. Iale keu oleve kateike vaima nahie tedaevemale kosive holiho.”

²⁸ Ataeau katelahai hoto ke lousege Iesuu dubu baluga keve baita hoto loui ata haivei avoe, “Seleveta la di hilokalu. Isi di oleve lohoale keta la hilokalu. Isito dau di vuvunemo lohoholisito di hanavoale ke vuvunemo lohonu. Iale di hanavoale ata seleve ke la hilokaholilu. ²⁹ Isito da igaue ke hilokanu. Kosealemo di keti ulage keu di hanavoage di lohonu.” ³⁰ Kateai louge Diue kosiveau ke evisi isiviale mai kotai. Isito vaniveu lohoholiale kemoike abu maholilu. ³¹ Ata moaga kebiamo ata degomoleau hotove evisi abu uvu mai avuemo mavoi loui avoe, “Ata tedaevemale kosive Keliso kena lohoniage au vuvune vaveve vage kena ata ko vaveve evihai. Ba, mesoho kosive keike ko.”

Dubue bukateau Iesu maliho tilu.

³² Ata keau kateai saivoi moleho lousege Balisia ataeau ke evilu. Isi dubu nalimale kosivehi mole bevievei hotohotoai dubue udaha nalimale bukate hanavege abu Iesu maliho tilu. ³³ Iesu maliho tisege Iesuu ataho loui avoe, “Di bae lahehi vani moaga ulivebene. Vani degomolena uoholisege dana tota hoilalahi di hanavoale ata keve tai. ³⁴ Ige vani kemo lana di kaovaito la bae di elehalivebene. Kosealemo la bae di tiveve keve talivebene.” ³⁵ Kateai louge Diue kosiveau mole belagevei avoe, “Kona oleve tige nahiabuna elehalolisi. Mesoho auna tiniege Diue ataeau Giliki vatae umale keve kebia haivei. ³⁶ Au loui avoe, ‘Lana di kaovaito la bae di elehalivebene.’ Isi au tota loui avoe, ‘La bae di tiveve keve talivebene.’ Iale keu ono vadeike au huhuai hoto ke lounu.”

Ukolikolie e

³⁷ Diue vahaeho vani baluga keu uoholimale vanila Iesuu hovelahai baita abuhu loui avoe, “Oleuoleu enulahaliege dae loholive e isi. ³⁸ Bukae Hotou ke nahate lounu. Avoe, ‘Oleuoleu abu uvu mai daemo mavoale kebia uvumo ukolikoli ena hanai laluvagei.’” ³⁹ Iesuu hoto ke louale keu e seleve holiholinu. Isito Munana Tumuike au ke lounu. Avoe, “Oleuoleu abu uvu mai daemo mavoale keabuna Munanae Tumu malei.” Isito vani kemo keau Munanae Tumu maleholilu. Kosealemo Iesuu hovelahai ehue tiholiale kemoike Kosiveu Munanae Tumu oveholinu.

Ataeau Iesu vavevemo mole tasalieveu.

⁴⁰ Iesuu hoto kateale lousege ata degomoleau hotove evisi loui avoe, “Seleveta nahi beloveta nehe hemei umale keike ko.” ⁴¹ Isege degomoleau loui avoe, “Nahie tedaevemale kosive Keliso keike ko.” Isito degomoleau loui avoe, “Ba, nahie tedaevemale kosive keu bae Galili vatamo loholivebene. ⁴² Bukae Hotou loui avoe, ‘Nahie tedaevemale kosive Keliso kena Deividi valadamo lohohoi. Isi Deividiu o mole Betelihamu umale keve auna ui.’” ⁴³ Katelahai moleho loui Iesu vaveve kemo mole tasalieveu. ⁴⁴ Ige degomoleau tiale isiviale Iesu mai kotai. Isito keau Iesu maveve keu abuemone anekianu.

Diue Kosiveau Iesuemo abu uvu mavoholilu.

⁴⁵ Ige dubue udaha nalimale bukate nehe keau tota hoidevei dubu nalimale kosive isi Balisia ata kebiae lohohu. Ige kosive keau belagevei avoe, “La osialemoike Iesu mai lohoholilu.” ⁴⁶ Ige bukate keau abuhu loui avoe, “Atabeu bae au hoto louale ke nahate loulivebene.” ⁴⁷ Ige Balisia ata keau belagevei avoe, “Auna lata lobogevenu. ⁴⁸ La huhuige Balisia ata noeabuna no uvu mai avuemo mavolu. Isi la huhuige kosivebiata abu uvu mai avuemo mavolu. Ba, kosiveau kateholilu. ⁴⁹ Isito kove umale ata koeabuike Mosese menaka kemo lulelevatege abu uvu mai avuemo mavoholilu. Iale keabuna Dilava itumue valamo ui.” ⁵⁰ Katelahai louge kebia vigomo kosive mole ivi Nikodimasi keta hovelahanu. Kosive keike vani mole Iesu elehaho tinu. Iale keu hovelahai abuhu hoto mole lounu. ⁵¹ Avoe, “Nahie menaka kemo nahiabuna vasohuta atae vaveve kaovai hotove evisi hilokaito bae avuhou loui au onole vale ke ibina omisi.” ⁵² Kateai louge abu avuhou loui avoe, “Ana ata Galili vatamo lohonu. Ana Bukae Hotou dodaveholinu. Ke dodavei hilokage belovetabeu bae Galili vatamo loholivebene.” ⁵³ Kateai louito halevai abu o igaegae tilu.

8

Keate moleu vavolota malaha moleti hotohotoale

¹ Iesuu avuta halei tana mole ivi Oliveta keve tinu. ² Iniale vavita vavita Iesuu hovelahai tota Diue dubu balugae tinu. Ige keve ata moagaeau lohoale eviilikahavoge Iesuu ugulamoi kebia haivenu. ³ Isege Diue menaka loui haivemaleau Balisia atahi keate mole mai lohohu. Keate keu malaha moleti lahai hotohotoisege abu elehai mai lohoale ata bahatae vudimo mavoge keu kemo laminu. ⁴ Ige kosive keau Iesu namihai avoe, “Kosive, keate kou malaha moleti vaveve toela vasege no elehai mai lohohu. ⁵ Nahie menakamo

Moseseu loui avoe, 'Keate oleteau abu kolivu vavae vaveve toela vale kebia muneta havege abu haluvisi.' Iale ana keate ko vaveve kemo hoto vade loui." ⁶ Abu hoto ke louale keu koseanu. Abu isiviale kateige Iesuu hotoeabe kemo dobage abu mai kotalahai. Isi kateai louge Iesuu hotobe louholisito debekebekeai vatamo au adata hisalianu. ⁷ Ige ata keau keve lavisi negobedai belahalage Iesuu hovelahai abuhu loui avoe, "La oleu vaveve toela vaholiiale keu vasohuta hovelahai muneta keate ko hamai." ⁸ Kateai louito tota debekebekeai vatamo hisali moleanu. ⁹ Ige malahae kosiveau Iesu hoto ke evisi halevai igaegeaei tima. Igaegaeai tilage gabila malahae doge keau tilu. Keau bahata tihatusenge Iesuu keate ke igaeti ua. ¹⁰ Ige Iesuu hovelahai keate ke belahai avoe, "A mai lohoale ata keau oleve. Atabena a vaveve toela ke aemo lounu." ¹¹ Ige au loui avoe, "Ba, kosive, beu daho louholinu." Ige Iesuu avuho loui avoe, "Ige data bae aemo a vavevebe toela loulivebene. Iale tenela. Isito ainaho tota gabie vaveve toela ke va molealive."

Iesuu keu vatae ataga

¹² Iesuu kateai keate keho louito tota ata namigeve moleanu. Avoe, "Dau vatae ataga. Iale oleuoleu di ehovale keau bae vavila talivebene. Isito abuna uveve doge mai atagala tai." ¹³ Ige Balisia ataeau avuho loui avoe, "A aike louale hoto keu a igae hotoike a ke louma. Iale a hoto keu seleve holiioholinu." ¹⁴ Ige Iesuu hotoeabe ibina vai abuhu loui avoe, "Di hoto loumale keu seleve unaha. Halege di debikamo hoto louge keta duave. Kosealemo di oleve lohoale di oleve tiveve ke di hilokanu. Isito laeau ke hilokaholilu. ¹⁵ Laeau vatae vaveve kemo di vaveve daemo kaovama. Isito dau laemo la vaveve kaovaholima. ¹⁶ Dana isiviai laemo la vaveve kaovage di hoto kena seleve holisi. Kosealemo da igaeu bae la vaveve kaovalivebene. Isito di hanavoale di Mama kena daiti uge noeabuna avuti la vaveve kaovai. ¹⁷ La menakamo abu hisaliai avoe, 'Ata abui abuna ata mole vaveve elehai kemo hoto louge hotoeabe kena seleve holisi.' ¹⁸ Iale di vaveve hilokale ata abui au ua. Ke mole dailike ko. Ige di hanavoale di Mama keta moleike ke." ¹⁹ Kateai louge abu belahai avoe, "A Mamau oleve ua." Ige Iesuu abuhu loui avoe, "La di Mama hilokaholisi data hilokaholilu. La di hilokavatebe di Mama keta hilokalu."

²⁰ Abu dubu baluga ke uvue obeleni moni mavomale keveike Iesuu lamisi hoto kateale loui ata haivenu. Ige atabeu mai kotaholinu. Kosealemo vaniveu sohu lohoholinu.

Iesuu tiveve keve atabeu bae talivebene.

²¹ Ige Iesuu tota kosive kebia namigevevi avoe, "Dana la halevei tisege lana bae di kaovave. Isito lana la vaveve toela vamale kemo haluvice. La bae di tiveve keve talivebene." ²² Ige Diue kosiveau ke evisi moleho loui avoe, "Malaha kou loui avoe, 'Di tiveve keve la bae talivebene.' Iale la huhuige kena au ebika hamai hatilhoike au kateai lounu." ²³ Ige Iesuu abuhu loui avoe, "Laeau heie umale ataea. Isege dau ehue umale ata. Iale laeau vata komo lohoholu. Isito dau vata komo lohoholinu. ²⁴ Katealemoike di laheho loui kosea, 'Lana la vaveve toela vamale kemo haluvice.' Isi di laheho loui kosea, 'Ata ke dailiko.' Ige la ke evisito la uvu mai daemo mavoholiiale kemo lana la vaveve toela kemo haluvice." ²⁵ Kateai louge abu belahai avoe, "Au ole a." Ige Iesuu namigevevi avoe, "Vani bahata di laheho loumale dau ata ke dailiko. ²⁶ Di la vaveve bahata hilokanu. Iale dana isivianiege la vaveve kemo laheho hoto moaga loui. Isito di bae ke bahata loulivebene. Dana di hanavoale ata ke hotove seleve unaha loui ata haivei."

²⁷ Iesuu kateai au Mamae vaveve kemo hoto louge abu ke evisito kemo luleleholilu. ²⁸ Iale au abuhu loui avoe, "Dau Atae Ese. Iale lana gabie ataho louge ataeabuna di mai idie domo hamage lana bae kemo hilokage di laheho louale ata ke dailiko. Ige kemo lana hilokage dau di isivi unaha va holiioholinu. Isito di Mamau daho louale ke unahaie di loui la haivenu. ²⁹ Di hanavoale keu di haleholisito vani bahata daiti uma. Kosealemo di vani bahata isivive vamale kemo au di vahaeho vama." ³⁰ Iesuu hoto kateale louge Diue ata moagaeau hotove ke evisi abu uvu mai avuemo mavoi ehovale.

Iesu ata selevea

³¹ Ige au abuhu loui avoe, "Lana di laheho louale ke ehovai ma seleveliege di esemu seleve holieveve. ³² Iiege kemo lana hoto seleve hilokai kemo lulelelahage vatae vaveve bae la malevelivebene." ³³ Ige abu hotove ibina vai avuho loui avoe, "No Ebalahamu valada holiiale mo vatae vaveve no maleveholinu. Isi noeau heiatu atabehou lovi kavaholilu. Iale osiale moike a loui kosea, 'Vatae vaveve bae la malevelivebene.' A hoto ke louale ihuveike onole." ³⁴ Kateai louge Iesuu namigevevi avoe, "Seleveta di laheho louge evive. Oleuoleu vaveve toela vamale ata keau lovi kavamale ke nahate vai vatae vaveve toelae isivi unaha vama. ³⁵ Lovi kavamale ata keu lovie biage ke ese holiioholinu. Kemoike au bae vani bahata o kemo ugelivebene. Isito o ke biage esena vani bahata o kemo ugei. ³⁶ Iale Atae Esena la malevege vatae vaveve keu bae la malevelivebene. Isito

lana negolahi ue dua unaha vageve. ³⁷ Di hilokage laeau Ebalahamu valada. Isito la di hoto evisi maholiale kemoike la isiviale dahavoi. ³⁸ Di Mamau di haivuale keike di loui la haiverna. Isito laeau la mamau laheho louale keike la vama.”

³⁹ Ige abu avuho loui avoe, “No mamaike Ebalahamu.” Ige Iesuu namigevei avoe, “Laeau Ebalahamu ese seleve holioholilu. La Ebalahamu ese holiivatebe au vamale ke nahate la valu. ⁴⁰ Isito laeau kateholilu. Dau Dilava hoto seleve eviale ke loui la haivelage la isivialeike dahavoi. Isito Ebalahamu keu la vaveve ke nahate vaholinu. ⁴¹ Iale laeau la mama moleu vamale ke nahate vama.” Ige abu avuho loui avoe, “Noeau Dilava seleve ke igaeike ehovai eseve holilu.” ⁴² Ige Iesuu namigevei avoe, “Dilava keu la Mama seleve holiivatebe la daho isivilahalu. Kosealemo Dilava kemoike dau lohoale aike kove ua. Dau di isivimo lohoholinu. Isito avuike di hanavoge di lohonu. ⁴³ Iale osialemoike la di hoto evisi luleleholilu. Kosealemo la di hoto evisiko isiviholialeike ke mai ehovaiho. ⁴⁴ Laeau Setene esea. Isege eu la mama. Iale kemoike la isiviale ehovai isivive vagei. Setene keu subuta mole ata haveveve vaveve ke vai lohoma. Isi lobeo hoto loui hoto seleve ke kabitinu. Kosealemo keu lobeo hoto loumale biage. Iale kemoike hoto seleve louveve keu avuemo anekianu. Iale kena vani bahata lobeo hoto unaha lougei. ⁴⁵ Kemoike di hoto seleve louge la la uvu mai daemo mavoholilu. ⁴⁶ Iale bae di namihave. Di vaveve toela onole vasege la di elehalu. Di vavevebe kateale vaholinu. Iale osialemoike di hoto seleve loui la haivege la di hoto maholilu. ⁴⁷ Ata oleu Dilava ese holiale kena Dilava hoto evisi mai. Isito laeau Dilava ese holioholiale kemoike la di hoto evisi maholilu.”

Iesu isi Ebalahamu

⁴⁸ Iesuu kateai louge Diue ata keau avuho loui avoe, “No subuta hoto louale keu seleve. No loui kosea, ‘A keu Samalia ata.’ Iale a kemo munanae toelau ua.” ⁴⁹ Ige Iesuu hotoeabe ibina vai abuhu loui avoe, “Daemo munanae toelau uoholoholinu. Dau di Mamae ivi ebagemai hoesehavonu. Isito laeau di ivi ebagevaholisito di aiohavolu. ⁵⁰ Di isiviholialeike di di ivi ebagemaliho. Isito di Mamau katealeho isivianu. Iale auna di aiohavomale ata kebia vaveve abuemo kaovai. ⁵¹ Seleveta di la namigevege evive. Oleuoleu di hoto evisiko ehovale keau bae haluvilivebene.” ⁵² Ige Diue ata keau avuho loui avoe, “A hoto kemo no hilokage munanae toelau aemo ua. Ebalahamu keu hatinu. Ige beloveta kebiata haluvilu. Isito au loui kosea, Oleuoleu di hoto evisiko ehovale keau bae haluvilivebene.” ⁵³ Nahie mama Ebalahamu keu hatinu. Iale a hoto louale kemo ose a isiviai Ebalahamu evihai. Ige beloveta kebiata haluvilu. Iale a huhuige ana kebiata evigevei hatiholisito vani bahata ugei.” ⁵⁴ Ige Iesuu abuhu loui avoe, “Dana di ivi ebagemai di ebika hoesehavoge keu bae duavealivebene. Isito di Mamana di ivi ebagemage kena duaveai. La di Mama keho loui kosea, ‘No Dilava.’ ⁵⁵ La kateai louito la ke hilokaholilu. Isito dau ke hilokanu. Dana loui kosea, ‘Di ke hilokaholinu.’ Iniege dana la nahate vai loboai. Isito seleveta di ke hilokai hotove evisiko ehomanu. ⁵⁶ Ige la mama Ebalahamu keu di vaniu lohoveve ko huhuai kemo vahaehoanu. Iale keu ke elehai vahaehoanu.” ⁵⁷ Ige Diue ata keau avuho loui avoe, “Ebalahamu keu subuta ata. Isege a ke vaganau baluga seleve holioholinu. Iale a oleve kateike vai Ebalahamu elehanu.” ⁵⁸ Ige Iesu namigevei avoe, “Seleveta di la namigevege evive. Subuta Ebalahamu sohu uoholisege dau ua.” ⁵⁹ Kateai louge abu evige hotove keu Dilavau valive vaveve nahate. Kateike abu vai itumulahi isiviale muneta hamai. Ige Iesuu hogolahi dubu baluga ke halei tinu.

9

Iesuu ni kedute hoesehavonu.

¹ Vani mole Iesuu ohanoi tiniale malaha mole elehanu. Malaha ke neinaveu mamoge niveu keduano. ² Ige Iesu esemuiaiu Iesu belahai avoe, “Kosive, osialemoike malaha kou uge niveu keduano. A huhuige malaha kou vaveve toela vale ibinaike au ko manu. Mena au mamata neinata toelae ibinaike au ko manu.” ³ Ige Iesuu namigevei avoe, “Malaha ko niu keduale keu kateholinu. Niveu keduale keu toelave isi mamaveta neinaveta toelae ibina holioholinu. Isito niveu keduale keu koseanu. Dilavau isiviale avuemo au vuvune vaveve vage ataeau vuvuneve elehai. ⁴ Vanu koseisege nahi di hanavoale ke lovi vai. Kosealemo vau giduige nahi bae kemo lovilahalivebene. ⁵ Isito dau sohu vata kove usege vatae ataeabuna di ataga elehai.” ⁶ Kateai louito ke iae vatamo vioaito ke emugai mai ni kedute ke nimo ulihanu. ⁷ Isi namihai avoe, “Talive Salomu emo a ni totoanela.” E ke ivie ihuu koseanu. Ioma. Iale Iesu malaha ke iomage keu tiale e kemo au ni totoige niveu dua vage au niail hoilahi lohonu.

⁸ Ige haokuvuiabe isi ata degomole keu ke elehalu. Abu hilokage niveu keduale kemo keu subuta moniho ata imigeveva. Iale abu ke elehai mole belagevei avoe, “Ana malaha

konike subuta ugulamoi ui moniho ata imigeverna.”⁹ Ige degomoleau loui avoe, “Avuike.” Isege degomoleau loui avoe, “Ba, keu avu holioholinu. Isito keu ke elehilehi nahate.” Kateai lousege malaha keu loui avoe, “Dau ata ke dalike ko.”¹⁰ Ige abu belahai avoe, “A ni keu oleve kateai dua vage a nianu.”¹¹ Ige au namigevei avoe, “Malaha mole ivi Iesu keu tivu mai di nimo ulihai di namihai avoe, ‘Talive Salomu emo a ni totoa.’ Ige solekavesite di tiale di ni toitoige di niu dua vage di nianu.”¹² Ige abu belahai avoe, “Malaha keu oleve” Ige au namigevei avoe, “Keu oleve tiale ke di hilokaholinu.”

Balisia ataeau Iesu vaveve ke kaovalu.

¹³ Niveu keduale keu hoto kateai louge abu ke melavei Balisia atae tilu. ¹⁴ Bulamoike Iesuu tivu mai malaha ke nimo ulihai hoesehavonu. ¹⁵ Iale kemoike Balisia ataeau malaha ke belahai avoe, “A oleve kateike vaimo nianu.” Ige malaha keu namigevei avoe, “Iesuu tivu mai di nimo ulihanu. Ige di tiale emo di ni totoale kemoike di niu dua vage di aike niai onobenobe elegevema.”¹⁶ Ige Balisia ata degomoleau loui avoe, “Vaveve ko vale ata keu Dilavamo lohoholinu. Kosealemo keu bula nalioholinu.” Isege Balisia ata degomoleau loui avoe, “Isito oleve kateike vaimo vaveve toela vamale ata keu vuvune vaveve ke vanu.” Abu hoto kateale moleho loui kemo mole tasaligevelu.

¹⁷ Kateaito tota malaha nehe ke belaha moleai avoe, “A loui kosea, ‘Iesuu di ni hoesehavonu.’ Iale a huhuige ata keu ata oleteale.” Ige malaha keu namigevei avoe, “Keu beloveta ata.”¹⁸ Ige Diue kosive keau hoto ke evisi malaha nehe niveu keduage Iesuu hoesehavoale hotove ke maholilu. Iale kemo abu malaha ke mamata neinaveta hohavege abu loholu. ¹⁹ Ige abu belagevei avoe, “La monike ko. La loui kosea, ‘Kou uge niveu keduanu.’ Iale au oleve kateike vai aike nianu.”²⁰ Ige mamaveu neinaveti namigevei avoe, “No hilokage keu no mo. Isi no hilokage keu uge niveu keduanu.”²¹ Isito oleve kateai niveu dua vale ke no hilokaholilu. Isi ata oleu nive hoesehavoale ata keta no hilokaholilu. Keu au ebia holisi kosi holinu. Iale belahage biagena au dekada loui la namigevei.”²² Hoto kateai louale keu koseanu. Keau Diue kosive kebia vabugevelu. Kosealemo kosive keau ata namigevei avoe, “Ata olena Iesu ivi ebagemai loui kosea, ‘Keu ata tedeavemale kosive Keliso.’ Ige noeabuna ata ke iovai humahave bamuge au bae tota Diue dubu kemo guligulialivebene.”²³ Katealemoike mamaveu neinaveti loui avoe, “Keu kosi holinu. Iale bato belahage biagena au dekada laheho loui.”

²⁴ Ige abu tota malaha nehe ni keduale ke hohavo molealu. Ige au lohoge abu avuho loui avoe, “Dilava nimo hoto seleve noheho lounela. No hilokage Iesu keu vaveve toela vamale ata.”²⁵ Ige malaha nehe keu hotoeabe ibina vai abuhou loui avoe, “Mesoho keu vaveve toela vamale ata mesoho vaveve toela vamale ata holioholinu. Di ke hilokaholisito vaveve koseale igae di hilokanu. Di niu subuta keduanu. Isito di niu nova dua vage di nianu.”²⁶ Ige abu belahai avoe, “Keu aemo vaveve onole vanu. Au oleve kateai a ni hoesehavonu.”²⁷ Ige au namigevei avoe, “Hotoike di subuta loui la namigevege la evisito maholilu. Iale osialemoike la isiviai tota hoto ke evi moleai. Ose la isivialeike Iesu esemu holisi.”²⁸ Kateai louge abu avuho itumulahai hotoe toela loulou. Isi namihai avoe, “Au ata ke esemu. Isege noeau Mosese esemuia.”²⁹ No hilokage Dilavau subuta Moseseho lounu. Isito ata ke no hilokaholilu. Keu oleve keve lohonu.”³⁰ Ige ni kedute keu tota namigevei avoe, “Di la hoto ke evisi vikoanu. Kosealemo la loui kosea, ‘Malaha keu oleve keve lohoale ke no hilokaholilu.’ La katelahai loulou. Isito malaha keu di ni hoesehavoage di nianu.”³¹ Nahi hilokage Dilavau bae vaveve toela vamale kebia hoto evilivebene. Isito oleuleu Dilava hoto evisi isivive vamale ata kebia hoto auna evisi. ³² Subuta mole ui lohoale kemo atabeu ni kedutebe ni hoesehavo holioholinu. ³³ Malaha keu Dilavamo lohoholivatege keu vuvune vavevebe vaholinu.”³⁴ Kateai louge abu hotove ibina vai avuho loui avoe, “A neinau a mamoge a keu vaveve toela unaha vamale ata. Iale kemoike ose a isiviai no haivei.” Abu katelahai loui iovage au dubu halei heie tinu.

Vaveve toelamo ni kedute holievelu.

³⁵ Abu malaha ke iovale hoto ke Iesuu evisi tiale malaha ke elehai avuho loui avoe, “Ana a uvu mai Atae Esemu mamonu.”³⁶ Kateai louge malaha keu namihai avoe, “Ata ke ivi daho lounela. Ige di bae kemo di uvu mai avuemo mamoi.”³⁷ Ige Iesuu avuho loui avoe, “A subuta ata ke elehanu. Iale keike aike aiti hotoima.”³⁸ Ige malaha keu loui avoe, “Kosive, di di uvu mai aemo mamonu.” Kateai louito Iesu vudimo au kome bokoai vata bisi hoesehavonu.

³⁹ Kateige Iesuu avuho loui avoe, “Atae vaveveike di kaovalihu vatae lohonu. Iale kemo ni kedute keabuna nilahai. Isege nilahai elehale kebia nina keduai.”⁴⁰ Ige Balisia ata degomoleau keve avuluvuta uale keau ke evisi Iesu belahai avoe, “A hoto louale kemo ose a huhuige noeau ni kedutea.”⁴¹ Ige Iesuu namigevei avoe, “La ni kedute holiale ke

hilokavatege toelau laemo uoholinu. Isito la loui kosea, 'Noeau nilahai lulelelahalu.' La kateale loualemo vaveve toelau sohu laemo ua."

10

Iesuu mamoe moemo dovudovue hoto lounu.

¹ Iesuu tota loui avoe, "Seleveta di hoto mole louge evive. Ata oleu ovoe iadi ke udahala velemai tioholisito iadi edolei uvuve tiale keu vavoloe ata. Keu isivialeike mamoe vavoloai. ² Isito ata oleu iadie udaha kela velemai tiale keu mamoe nalievemale ata. ³ Mamoe nalievemale ata kena tige udaha nalimale kena avuhu udaha alavoge auna ke uvue tiniege au mamoe kebia igaega iviabe ivilovei hohavege abuna hotove evisi lohoge auna holoovei tai. ⁴ Auna kebia holoovei iadi ke halei abuhu uli holisi tisege mamoe abuna ehovai tai. Kosealemo keau abu biage hoto ke evisi hilokalu. ⁵ Mamoe keau bae ata mole ehovalivebene. Isito abuna ke aehai detuluvisi. Kosealemo keau ke hoto hilokaholilu." ⁶ Iesuu dovudovue hoto ke loui namigevege abu ke evisito ihuve hilokaholilu.

Iesu keu mamoe nalievemale atae dua

⁷ Iesuu tota namigevei avoe, "Seleveta di la namigevege evive. Dau mamoe kebia iadie udaha. ⁸ Di lohoholisege ata degomoleau uli holisi lohoale keau vavoloe ataea. Keau isiviale mamoe malevei. Isito mamoe keau hotoeabe evioholilu. ⁹ Dau mamoe kebiau tiveve udaha. Iale oleuleu dae lohoale keabuna udaha kela velehovoge dana kebia malevege abuna ue dua vai. ¹⁰ Vavoloe atau lohoale isivialeike mamoe kebia malevei havei aiovegei. Isito dau lohoale isivialeike ukolikoli ovege abu kemo ue dua vai.

¹¹ "Dau mamoe nalievemale atae dua. Iale dana di mamoe kebiaho hatige vavoloe ata keu bae kebia malevelivebene. ¹² Isito mamoe nalievemale atae toela kena mamoe kebia nalieveniege ovo aihanitana mamoe kebia aiogevelihohoge auna kebia halevei detitisi tai. Kosealemo ata keu mamoe kebia nalievemale ata seleve holioholinu. Iale kemo ovo aihanite kena mamoe kebia uagevei aiovegege abuna igaegaevi detuluvisi tai. ¹³ Malaha keu detitiale keu koseanu. Keu mamoe nalievemale biage seleve holioholinu. Iale kemoike ovoe toelau lohoge au mamoe halevei detitinu. ¹⁴⁻¹⁵ Dau mamoe nalievemale atae dua. Ige di Mamau di vaveve hilokage data vaveveve hilokanu. Iale ke nahate di di mamoe kebia vaveve hilokaevunu. Ige abuta di vaveve hilokalu. Iale kemo dana di mamoe kebiaho hatai. ¹⁶ Isito di mamoe degomoleau ua. Keau ovoe iadi mole biaea. Iale dana kebiata malevege abuna di hoto evisi di ehovai. Ige di mamoe keabuna bahata igaetolahai hala igae ke uvumo uge dana kebia nalievei.

¹⁷ "Di di ataho hatilili negoale kemoike di Mamau daho isivi baluganu. Iale dana hatige di Mamana tota di etuvage dana hovelahai. ¹⁸ Atabeu bae di lu mage di bae hatilivebene. Isito di biagena di isivimo hatai. Di Mamau daho loui vuvune mai daoale kemo dana hatiniege tota vuvune kemo hovelahai."

¹⁹ Iesuu hoto kateale louge Diue kosiveau hoto kemo mole tasalievelevu. ²⁰ Ige degomoleau loui avoe, "Munanae toelau avuemo lohoge keu tilogoanu. Iale osialemoike la hotove evima." ²¹ Isege degomoleau loui avoe, "Munanae toelau ataemo biloge au bae hoto kateale loulivebene. Munanae toelau avuemo uale kemo au oleve kateike vai ni kedute ke hoesehavonu."

Iesu ata selevelau kabebihavolu.

²² Vani mole Diue vahaeho vani moleu lohonu. Subuta mole Diue ataeau vahaeholahai Dielusalemae dubu baluga hoesehavolu. Iale vagana bahata dabae vanila abuna vani ke huhulahai vahaeholahagei. ²³ Iale vani kemo Iesuu Diue dubu baluga ke hedaka mole ivi Solomoni keve lamisi oai tima. ²⁴ Ige Diue kosiveau lohoale evilikahavoi avuhu loui avoe, "No vani moaga a hoto kemo dolodololahalu. Iale ana vadeumalela hoto seleve loui no namigevei. Aike noheho lounela. Au ana no ata tedeavemale kosive Keliso mena." ²⁵ Kateai louge Iesuu namigevei avoe, "Avuike di subuta loui la namigevenunu. Isito laeau di hoto maholilu. Dau di Mamae vuvunemu vikoe vaveve vavege la elegevelu. ²⁶ Isito la la uvu mai daemo mavoholilu. Kosealemo laeau di mamoe holioholilu. ²⁷ Di mamoe abuna di hoto evisi di ehovage dana kebia hilokaevui. ²⁸ Isi ukolikoli ovege abu bae haluvilivebene. Ige atabeu bae di adamo kebia malevelivebene. ²⁹ Di Mamau ata kebia malevei daonu. Di Mama keu ata bahata evigevenunu. Iale atabeu bae adavemo kebia malevelivebene. ³⁰ Kosealemo di Mama isi da noeau avuti igae."

³¹ Kateai louge Diue ataeau hovevevei mune malei isiviai hamai. ³² Katelahage Iesuu abuhu loui avoe, "Di Mamau daho louge di laheho vaveve dua moaga vavevenunu. Iale vaveve oletemoike la mune malei isiviai dahavoi." ³³ Ige Diue ataeau avuhu loui avoe, "A vaveve dua vale kemo no isiviholialeike mune malei ahavoliho. Isito a Dilava ivi aiohavoale kemoike no isiviai ahavoi. Au ata unaha. Isito au a ebika ebagemai loui kosea,

‘Dau Dilava.’ Iale kemoike no isiviai ahavoi.” ³⁴ Ige Iesuu namigevei avoe, “La menaka kemo abu subuta hoto koseale hisalilahalu. Avoe, ‘Dilavau loui avoe, Laeau dilavaea.’ ³⁵ Iale nahi hilokage Bukae Hotomo abu hisaliale hoto keu seleve. Iale kena vani bahata ugei. Hoto kemo Dilavau au ata tabageveale kebia au abuhu loui avoe, ‘Laeau dilavaea.’ ³⁶ Iale di Mamau di ebagemai di hanavoge di vatae lohonu. Iniale laheho loui kosea, ‘Dau Dilava mo.’ Iale osialemoike la daho loui kosea, ‘A Dilava ivi aiohavonu.’ ³⁷ Mesoho di di Mamae vaveve vaholige kemo bae la uvu mai daemo mavoholive. ³⁸ Isito di di Mamae vaveve vage la kemo la uvu mai daemo mavoholilu. Iale di vikoe vaveve vale kemo bae la uvu mavove. Ilive elike kemo di Mamau daiti usege di avuemo uale ke hilokave.”

³⁹ Kateai louge abu isiviai mai kotai. Isito Iesuu adaeabe kabosevenu.

⁴⁰ Isi tiale Diodani e hou i vaki mole tiale Dioniu subuta ata babatisogeveale keve ua. ⁴¹ Ige ata moagatahoeau avue loholu. Avue lohohiale moleho loui avoe, “Dioniu vikoe vaveve vaveholinu. Isito Dioniu ata ko vaveve louale hotove bahata keu seleve unaha.” ⁴² Hoto kateale louge ata moagaeau hoto ke evisi abu uvu mai Iesuemo mavoi ehovahu.

11

Lasolou hatiale deiada

¹ Beteni malaha mole ivi Lasolo keu vavahanianu. Iale o kemoike amakinive abuitau ua. Moleike Mata. Ige hohove Meli. ² Meli keike dehoho hagote mai Iesu velomo ehosivai au kinata Iesu velo ulihanu. Iale ke amakini Lasolo keike vavahanianu. ³ Ige mahohoeabe keau Iesuho hoto hanavolu. Avoe, “Kosive, a uvue haokau vavahanianu.” ⁴ Ige Iesuu hoto ke evisi loui avoe, “Lasolou vavahaniale ke gabiu bae hatihati mai lohoholivebene. Isito gabive kena Dilava ivi mai duatisi. Ige kemo Dilava moe ivitana balugai.”

⁵ Iesuu Mata isi hohove isi amakinive Lasolo kebia isivi ovenu. ⁶ Isito keu Lasolo vavahanie hoto ke maito solekai tihoholinu. Au hoto ke evisito au uale keve vanie ni abuita ua. ⁷ Iniale vanie ni abuita keau uoholige au au esemu namigevei avoe, “Nahi hoidevei tota Diudiae tai.” ⁸ Ige esemuabeau avuhu loui avoe, “No kosive, nahi aike Diudia keve usege ata keau isivialeike muneta ahavoi. Iale osialemoike a isiviale nahi tota hoidevei keve tai.” ⁹ Ige Iesuu namigevei avoe, “Nahiabuna vanimo olahaliege nahi bae ono molemo vatou dobuluvilivebene. Kosealemo vanie agamoike nahi olahama. ¹⁰ Isito nahiabuna vavimo olahaliege ono molemo vatou dobuluvisi. Kosealemo nahi hati maleholilu. Iale ke nahate nahiabuna Dilava isivi valiege nahi bae atae vaveve toala ke vabuhavolivebene.” ¹¹ Kateai louito tota namigevei avoe, “Nahie haoka Lasolo keu lahanu. Isito dana tiniege etuvage auna hovelahai.” ¹² Ige esemuabeau namihai avoe, “Kosive, au lahale kemo auna momoleai.” ¹³ Abu katelahai huhulahai avoe, “Lasolou laha unahanu.” Isito Iesu eu hilokage keu hatinu. ¹⁴ Iale kemo Iesuu inuta namigevei avoe, “Lasolou hatinu. ¹⁵ Di keve uoholisege au hatiale keu duave. Kosealemo dana tiniege la totonamo vaveve mole vage lana ke elehai la uvu mai daemo mavove. Iale lohoge nahi avue tai.” ¹⁶ Ige malaha mole ivi Tomasi (ivive mole Didimasi) keu Iesu esemu degomole namigevei avoe, “Lohoge nahi avuluvuta talive elike abu hamage nahi avuluvuta haluvisi.”

Iesu keu hatihati isi mauli ke biage

¹⁷ Abu tiliale velehovoi evige abu Lasolo mai abavuave vanie ni abuita abuita uoholinu. ¹⁸ Lasolo o Beteni keu Dielusalema o baluga kemo haeavave tu (2) maelo. ¹⁹ Iale Matau Meliti abu amakinio uvulahale kemo Diue ata moagaeau o baluga ke halevai lohohiale abuhi uvulahalu.

²⁰ Ige Matau Iesuu lohoale hoto ke evisi o halei tiale Iesuemo tinu. Isito Meliu oe ua. ²¹ Isi tiale Iesu namihai avoe, “Kosive, a kove ubeto di amakinu hatihoholinu. ²² Isito di hilokage ana nova onole loui Dilava imihage auna a isivi ke vai.” ²³ Ige Iesuu avuhu loui avoe, “A ahonona tota hovelahai.” ²⁴ Ige keate keu namihai avoe, “Di hilokage auna vanie gabila bae hovelahai.” ²⁵ Ige Iesuu namihai avoe, “Dau hovelahaveve biage. Isi dau lu maleveve ke biage. Iale oleuoleu abu uvu mai daemo mavoito haluviale keabuna bae ukolikoli malei. ²⁶ Isi oleuoleu nita ui abu uvu mai daemo mavoale kebiata abuna ukolikoli malei. Iale ana di hoto ke manu.” ²⁷ Ige keate keu namihai avoe, “Ito, Kosive, di hilokage au Dilava mo. Dilavau a hanavoge a vatae lohoale no tedaevemale kosive holinu.”

Iesuu uvuai ninanu.

²⁸ Matau hoto ke louito hoilahai tiale tobekai au hoho Meli namihai avoe, “Kosiveu aike lohonu. Keu di namihai isivialeike a elehai.” ²⁹ Ige Meliu hoto ke evisi solekai hovelahai tiale Iesue tinu. ³⁰ Iesuu sohu oe lohoholisito Matau avuemo tiale keve usege Meliu avuemo tinu. ³¹ Ige Diue ataeau Meliluvuta uvulahale keau elehage Meliu

solekai hovelahai tige abu ehovai tilu. Kosealemo keau huhuige Meliu au amakini vutae ninalihoike au tinu.

³² Isi tiale keu Iesu uale kela velemai vudivemo kome bokoai vata bisi avuho loui avoe, “Kosive, a kove ubeto di amakiniu hatioholinu.” ³³ Kateai avuho loui ninage Diue ataeau avuluvuta lohoale kebiata ninalahalu. Ige Iesuu kebia elegevege uvuu hamanu. ³⁴ Ige Iesuu belagevei avoe, “La oleve abavulu.” Ige abu namihai avoe, “Kosive, loholive elehanela.” ³⁵ Kateai louge Iesuu ninanu. ³⁶ Ige Diue ataeau ke elehai moleho loui avoe, “Elehave. Keu avuho uvu baluganu.” ³⁷ Ige degomoleau loui avoe, “Ose keike ni kedute ke ni hoesehavoge au nianu, e. Iale au osiohoike solekai loholive Lasolo hoesehavoge au vavahanimo momoleholisito unata bae au hatisege iave lohonu.”

Lasolou hatiale gulimo hovelahanu.

³⁸ Kateisege uvuu tota Iesu hamage au halei vutave tinu. Vutave keu metae vaha nahate. Iale mune moleu vutave ili ke bamunu. ³⁹ Ige Iesuu ata namigeveve avoe, “Mune ke evovoave.” Kateai louge hatiale ke amakini Mata keu Iesu namihai avoe, “Kosive, no ke abavuale vanie ni abuita abuitaeau uoholilu. Iale kena hisiai.” ⁴⁰ Ige Iesuu avuho loui avoe, “Di subuta aho loui kosea, ‘Ana a uvu mai daemo mamoniege Dilava vuvune vaveve ke elehanela.’ Dana aho kateai lounu, e.” ⁴¹ Kateai keate keho lousege abu mune ke evovoalu. Ige Iesuu ehue niai loui avoe, “Di Mama, a di hoto eviale kemo di a vahaeho vanu. ⁴² Di hilokage a vani bahata di hoto evima. Isito ata kobiau kove uale kemoike di hoto ko loui isivialeike abu ke evisi hilokage a di hanavonu.” ⁴³ Kateai louito ke iae baita hoai loui avoe, “Lasolo, velemai loho.” ⁴⁴ Kateai hoage hatiale keu velemai lohonu. Velemai lohoge abu subuta ogota viliale keu sohu vavavemo ua. Ige nive viliale keta emo ua. Ige Iesuu ata namigeveve avoe, “Vavavemo ogo ke bodiage auna oai tai.”

Abu Iesu maveve humahada kaovama.

(Matiu 26.1-5; Maka 14.1-2; Luka 22.1-2)

⁴⁵ Kateige Diue ataeau Meliluvuta uvulahalo lohoale kebia degomoleau Iesu vaveve ke elehai abu uvu mai avuemo mavolu. ⁴⁶ Isege degomoleau hoideveve tiliale Iesuu vale hoto ke loui Balisia ata namigevelu. ⁴⁷ Ige Balisia ata keau dubu nalimale kosivebiahi igaetolahi hotohotoai mole namigeveve avoe, “Iesu keu vikoe vaveve moaga vaevunu. Iale nahiabuna ono vade igae avuemo vai. ⁴⁸ Nahiabuna ke nimo tahoige kena vani bahata katelage ata bahataebuna ehovai ivive ebagevage Loma gamani kosive abuna loholiege nahie dubu baluga koilahai nahie ata bahata havehatui.” ⁴⁹ Kateai louge kebia vigomo dubu nalimale kosive baluga Kaiabasi keu hovelahai namigeveve avoe, “La keau lulelehililu. ⁵⁰ Nahi ata ke igae hamage au hatige ke duave. Onoilage ata ke igaeho Loma ataeau loholiege nahie ata bahata havehatuge uoholima.” ⁵¹ Keu hoto ke louale keu au isivimo louholinu. Isito keu dubue kosive baluga holiiale kemoike au Iesuu Diue ataho hativeve ke hilokai lounu. ⁵² Au hoto ke louale keu Diue ata unahaho au louholinu. Isito Iesuu hatiale kemo Dilava ese bahata oleve uale kebia auna bevaveve abuna igaetolahi ui. ⁵³ Iale vani kemoike Diue kosiveau lavisi Iesu hamaveve humaha ke kaovama. ⁵⁴ Iale kemo Iesuu Diudasi vata keve ohanoi tiveve keu anekianu. Katealemo Iesuu vata ke halei tiale tomagie vavae o mole ivi Ibelemi keve au esemuhi ua.

⁵⁵ Keve usege Diue vahaeho vani mole Basova keu vuguvuguanu. Ige ata moagaeau hoveveveve abu o haleveve o baluga Dielusalema keve tilu. Keve tiale isivilahai vasohuta abu vaveve toela ulihaito gabie Basova lovi ke isi. ⁵⁶ Isi katelahai tiliale abu dubu baluga keve Iesu kaovalu. Isi mole belagevei avoe, “La huhuige kena valive Basova lovi koho lohohi. Mena au bae loholivebene.” ⁵⁷ Abu hoto ke louale keu koseanu. Dubu nalimale kosiveve isi Balisia ata keau isivialeike Iesuu lohoge abu mai kotai. Iale keau ata namigeveve avoe, “Iesuu oleve uale ke la hilokaliege no haiveve.”

12

Meliu Iesuu hativevemo hoesehavonu.

(Matiu 26.6-13; Maka 14.3-9)

¹ Basova vahaeho vani ke bula igae usege Iesuu Betenie tinu. O keu Lasolo o. Lasolo keike hatige Iesu etuvage au hovelahanu. ² Iale Iesuu tiale keve velemage Matau avuho lovi vanu. Matau lovi vasege Lasolou Iesuti uguiaivoi molehi sisilama. ³ Sisilasege Meliu deholo mole hagote mai lohonu. Deholo keu ibina balugate. Iale au ke mai lohoale Iesu velomo ehosivai au kinata velove ulihanu. Ige deholo ke hagou oe uvu bahata hagotinu. ⁴ Ige Iesu esemu mole avuho haiaveve Diudasi Kaliota keu ke elehai kemo hoto lounu. ⁵ Avoe, “Keate keu osiohoike ke ehosivanu. Keu kemo moni baluga hatunu. Iale abege au mai voiai kemo tili handele kina (K300) malei kunaiholimale kebia ovei.” ⁶ Au hoto louale

keu koseanu. Keu kunaiholimale kebia huhuevei hoto ke louholinu. Isito au ebikaike au huhuai hoto ke lounu. Kosealemo keu vavoloe ata. Isi keu Iesuta esemuiabeta moni nalimale ata. Iale kemoike au moni ke huhuai isivialeike moni ke malei otovelive gabie moni kemo au ebika tedahoi. ⁷ Iale Diudasiu kateai louge Iesuu avuho loui avoe, “Halege au ke valeu duave. Di hativeveu vuguvuguike vage au deholo hagote keta di gadehavoma. ⁸ Kunaiholimale keabuna vani bahata lahehi uge lana kebia tedeaveve. Isito dau bae vani bahata lahehi ulivebene.”

Abu Lasolo maveve humahada kaovama.

⁹ Diue ata moagaeau Iesu Betenie uale ke evisi keve tilu. Keve tiale Iesu igae elehaho tihohililu. Isito isivialeike Lasolou hatige Iesu etuvale keta abu elehai. ¹⁰ Ige kemo dubu nalimale kosiveau isivialeike Lasolota hamage au hatai. ¹¹ Kosealemo Lasolou hovelahale kemo Diue ata moagaeau abu kosive halevei abu uvu mai Iesuemo mavoi ehovalu.

Iesuu o baluga Dielusalema keve tinu.

(Matiu 21.1-11; Maka 11.1-11; Luka 19.28-40)

¹² Iesuu Betenie tisege Diue ata moagaeau Basova vahaeho vani keho lohoale Dielusalemae ua. Iale keau vavita evige Iesuna Dielusalemae lohoi. ¹³ Ige ata keau ke evisi idi mole niue vana ke nahate heisi bohisi malei Iesu beiavoi tilu. Beiavoi tai baita loui avoe, “Seloo, Iselalae kosive kou Dilava ivimo lohoale ko nahi hoesehavoi. Ata keu Iselala ata nahie kosive. Iale Dilavana ke hoesehavoi.” ¹⁴ Kateai lousege Iesuu donikimo ugulamoi lohonu. Ugulamoi lohoale keu Bukae Hotou louale ke mai selevetinu. ¹⁵ Bukae Hotou loui avoe,

“Saioni omo umale ataea, lainaho vabulahalive.

La kosiveike donikie dogamo ugulamoi lohoma.”

¹⁶ Iale vani kemo Iesu esemu keau hoto kemo luleleholilu. Isito vani mole Iesuu hovelahai ehue tiale kemoike abu lulelahai hilokage Iesu vaveve keu Bukae Hoto ke mai selevetinu. Iale keike abu ke avuho valu.

¹⁷ Ata moagaeau Iesu beiavoi tiale kebia degomoleau subuta Iesuu Lasolo etuvale ke abu elehalu. Elehasege Iesuu hoage Lasolou abu abavuale ke gulimo hovelahai lohonu. Iale keau ke elehai tialeau hoto ke loui ata moaga namigevelu. ¹⁸ Ige ata keau Iesu vuvune vaveve ke vale hoto ke eviale kemoike abu Iesu beiavoi tilu. ¹⁹ Beiavoi tige Balisia ataeau ke elehai moleho loui avoe, “Elehave. Ata bahataeau Iesu ehovalu. Iale nahiabuna oleve kateai humahave bamui.”

Giliki ata degomoleau Iesu kaovama.

²⁰ Basova vahaeho vani keho Dielusalemae lohoale ata kebia degomoleau Giliki ataea. ²¹ Iale keau lohoale Iesu esemu mole Bilibi namihalu. Bilibi keu Galili vata kemo o mole ivi Betesaida ke ata. Iale abu ata ke namihai avoe, “Kosive, no isiviai Iesu elehai.” ²² Katelahai louge Bilibiu tiale Andulu namihanu. Isi avuti tiliale Iesu namihalu. ²³ Ige Iesuu abuhu loui avoe, “Atae Eseau hativeve vaniu lohoale auna hatige Mamavena hoesehavoi tota atagave omisi. ²⁴ Iale di hoto seleve louge evive. Di vaveve keu konee nie bai nahate. Lana konee nie bai igae mai hatuholige keu bae moagalivebene. Isito lana ke igae mai hatuge nive igae kemo konee luhu abuna moagai. ²⁵ Vata kove ata oleu au ebika unaha huhuaniege auna gabie ukolikoli hosidisi. Isito ata oleu au ebika huhuholiale kena ehue tiniege ukolikoli malei ue dua vai. ²⁶ Iale oleuleu isivilahai di lovi valiho valiege abu di esemu holisi di ehovai. Ige dana kebia holoevei tige abuna di uale keve daluvuta ui. Ige di Mamana oleuleu di lovi vale kebia ivi tabagevei.”

Iesuu au hativeve deiada lounu.

²⁷ Iesuu kateai abuhu louito tota hoto mole loui namigevei avoe, “Di uvuu aike hadanu. Iale dana hoto vade loui. Dana vali loui kosea, ‘Mamai, ainaho vani ke halege au daemo loholive. Isito di bae kateale loulivebene. Dana eve negoai vatehani ke malei. Kosealemo vatehani ke malehoike di lohonu.” ²⁸ Hoto kateale louito au Mama imihai avoe, “Mamai, di isiviale ataeau di vavevemo a ivi ebagevai.” Kateai louge hoto moleu otogomo lohoi avoe, “Di subuta a vavevemo di ivi ebagemanu. Iale dana tota a vavevemo di ivi ebagama moleai.”

²⁹ Ige ataeau Iesu vavamo laviale keau hoto ke evisi loui avoe, “Hatau luluanu.” Isege degomoleau loui avoe, “Aneluike avuho hoto lounu.” ³⁰ Ige Iesuu abuhu loui avoe, “Hoto keu di totonamo lohoholinu. Isito hoto keu la totonamoike lohonu. ³¹⁻³² Iale dana aike ata bahataho idie domo hatige ata oleuleu abu uvu mai daemo mavoale kebia Dilavana uvuiabe kaovai hilokaevei valive Vatae Kosive ke vuvunemo au ebikaho malevei.” ³³ Iesuu hoto kateai loui isivialeike ataeau hilokage auna oleve kateai hatai. ³⁴ Kateai louge ata moaga keau hotove ibina vai avuho loui avoe, “No menaka kemo no

hilokage ata tadeavemale kosive Keliso keu bae hatilivebene. Isito kena vani bahata ui tigei. Iale osiale moike a loui kosea, ‘Abuna Atae Ese mai idie domo hamai.’ Iale Atae Ese keu oleike.”³⁵ Kateai louge Iesuu namigeveve avoe, “Atagau bae vani moaga lahehi ulivebene. Iale ataga keu lahehi usege nenilahi ataga kela olahai teve. Lana kela tige vaviu bae laemo loholivebene. Isito oleuoleu vavimo timale keau abu oleve timale ke hilokaholilu.”³⁶ Iale ataga keu lahehi usege la uvu mai avuemo mavove. Ilive elike atagae ata holive.”

Diue ataeau abu uvu mai Iesuemo mavoholilu.

Iesuu kateai louito haleveve lilikateve tinu.³⁷ Kosealemo au atae nimo vikoe vaveve moaga vaveveale ke abu elehaito abu uvu mai avuemo mavoholilu.³⁸ Vaveveabe keu beloveta mole Aisaia ke hoto mai selevetinu. Beloveta keu subuta loui avoe, “Kosive, di a hoto louge ataeau a hoto ke evisito maholilu. Ige a vuvune vaveve vale keta abu elehaito a ehovaholilu.”

³⁹ Katealemo evievi vaveve keu abuemo anekianu. Iale kemo Aisaiau tota hoto mole lounu.⁴⁰ Isi avoe,

“Dilavau niabe bamui uvuiabeta bamunu.

Kosealemo keau isiviholilu Dilavae lohoge au hoesegevelihio.

Katealemo au niabeta uvuiabeta bamuge elike abu elehai lulele halevai.”

⁴¹ Aisaiau hoto ke louale keu koseanu. Keu Iesuu ataga elehale kemoike au vaveveve ke louge ataeau kemo luleleholilu.

⁴² Isito Diue ata kebiamu Diue kosive degomoleau abu uvu mai Iesuemo mavolu. Abu katelahaito isiviholialeike ataeau ke hilokaliho. Kosealemo Balisia ataeabuna ke hilokaliage Diue kosive kebia iovege abu bae tota loholive dubue guligulihalivebene.⁴³ Vaveveabe keu tolanu. Kosealemo abu Dilavau kebia tabageveveve ke huhuoholisito isivialeike ataeau niabe tabageveve.

Iesuu louale hoto kena bae atae vaveve kaovai.

⁴⁴ Iesuu tota ata haivei baita abuhou loui avoe, “Ata oleuoleu abu uvu mai daemo mavoale keau abu uvu mai da igaemo mavoholilu. Isito keau abu uvu mai di hanavoale ata ketamo mavolu.⁴⁵ Isi ata oleuoleu di elehale keau di hanavoale ata ketaike abu elehalu. Kosealemo dau ke vaveve nahate.⁴⁶ Di vatae lohoale ataga nahate vanu. Iale oleuoleu abu uvu mai daemo mavoale keau bae vavimo ulivebene.⁴⁷ Isi oleuoleu di hoto evisito di ehovaholige di bae kebia vaveve abuemo kaovei abuhou hoto loulivebene. Kosealemo dau vatae atae vaveve kaovalihio lohoholinu. Isito dau vatae ata kebiaike malevelihio lohonu.⁴⁸ Iale oleuoleu di kabebihavoi di hoto maholige olena abuemo vaveveabe kaovai. Atabeu bae vaveveabe kaovalivebene. Isito vanie gabila di louale hoto kena bae vaveveabe abuemo kaovai.⁴⁹ Kosealemo di hoto louale keu da igae hoto holioholinu. Isito di Mamau di hanavoale keike di onole loui ata haiveveve hoto ke loui di namihanu.⁵⁰ Iale di hilokage hotove kemo lana ukolikoli maleve. Kosealemo di hoto louale keu di hoto holioholinu. Isito di Mamau daho louale hoto keike di laheho lounu.”

13

Iesuu au esemue velo totoevenu.

¹ Iniale Basova vahaehoe vani keu lohoholisege vanive igaeu usege Iesuu hilokage au vata halei hoilalahai au Mamae tiveve ke vaniu lohonu. Ige isiviveu au vatae esemuemo ualemo au isiviale vaveve mole vage abu elehai isivive ke hilokai.² Iale vavi kemo Iesuu au esemuhi ugulamoi lovi isege esemuiaabe kebia vigomo Seteneu esemueve mole Saimoni mo Diudasi Kaliota ke uvumo Iesuho haiaveve ke huhuihuhui mai avuemo mamonu.³ Isito Iesuu hilokage Mamaveu vuvune bahata ominu. Isi hilokage keu Dilavamo lohoale kemo auna tota hoilalahai Dilavae tai.⁴ Iale abu lovi isege Iesuu hovelalahai au ogo iamoi tauvela mai holovanu.⁵ Isi e hai disimo ehosivai mai tiale au esemue velo totoeveve tauvela keta veloeabe ulihanu.⁶ Isi lohoale Saimoni Bitu velo totoalioho vage au avuhou loui avoe, “Kosive, seleveta ana di velo totoai.”⁷ Ige Iesuu namihai avoe, “Di aike onole vamale ko a hilokaholinu. Isito gabie ana bae hilokanela.”⁸ Ige Bitau avuhou loui avoe, “A bae di velo totoalivebene.” Ige Iesuu avuhou loui avoe, “Di a velo totoalioho a bae di esemu holilivebene.”⁹ Ige Bitau loui avoe, “Kosive, a di velo totoaniege di adata di kinata totoanela.”¹⁰ Ige Iesuu namihai avoe, “Ata oleu baita emoaniege au bae tota au vava bahata emohavolivebene. Isito auna au veloe voto unaha totoai. Iale ke nahate di la uvu hoesegevege duaveanu. Isito la vigomo ata mole igae di ke hoesehavoholinu.”¹¹ Iesuu hoto ke louale keu koseanu. Keu hilokage ata kena avuhou haii. Kemoike au loui avoe, “Di la bahata hoesegevenu. Isito la vigomo ata mole igaeu di hoesehavoholinu.”

¹² Iesuu kateai loui veloeabe bahata totoai gabiaito tota au ogo mai hatui tota abuhi ugulamoi abuhu loui avoe, “Lana di laemo vadeu vale ke ihu hilokalu. ¹³ La di ivihai daho loui kosea, ‘No haivemale ata.’ Isi daho loui kosea, ‘Kosive.’ La daho kateai louale keu duave. ¹⁴ Kosealemo dau la haivemale ata. Isi dau la Kosive. Iale di la velo totoale ke nahate mole velo totoeveve. ¹⁵ Di aike la haiveale ke nahate vai mole hoesegeveve. ¹⁶ Di hoto seleve loui la namigevege evive. Esemubeu bae au kosive evihalivebene. Ige ata oleu au kosive hoto loumale keu bae au kosive ke evihalivebene. ¹⁷ Di aike vaveve mole vale kemo lana lulelelahai ke valiege lana vahaeholahave.

¹⁸ “Isito di hoto ko louale la bahataho louholinu. Di hilokage di la bahata tabagevenu. Isito la mole igaena di aiohavoi. Ige vaveve kena Bukae Hoto mai selevetisi. Bukae Hotou loui avoe, ‘Ata moleu daiti lovi iale kena dahoe haiai.’ ¹⁹ Iale hoto ke ihuu sohu lohoholisege di isiviale vasohuta la namigeveve. Iive elike gabie vaveve keu lohoge lana kemo di hoto ko mai hilokage dau di louale ata ke da. ²⁰ Di seleveta la namigevege evive. Di la hanavege ata olena la tedaevi la hoesegeveniege dataike au ke tedahoi hoesehavonu. Isi olena di tedahoi di hoesehavoniege di hanavoale keike au ke hoesehavonu.”

Iesu esemu molena avuho haiai.

(Matiu 26.20-25; Maka 14.17-21; Luka 22.21-23)

²¹ Iesuu hoto ke loui gabiasage uvuu hamanu. Ige kemo au inuta kebia namigeveve avoe, “Seleveta di la namigevege evive. La molena bae di mai atae toela ovege abuna dahavoi.” ²² Kateale louge esemuiabeau hoto ke evisi dolodololahai mole nibievei lotilu. Isi huhulalahai avoe, “Kou oleike au huhuai hoto ke lounu.” ²³ Isege Iesu uvue esemu mole keu vavavemo ugulamoi ua. ²⁴ Ige Saimoni Bitau esemu ke sitohavoi namihai avoe, “Iesu belahai kosea, ‘Esemu oleike au huhuai hoto ke lounu.’” ²⁵ Kateai louge esemu keu valolahai mulumuluai Iesu namihai avoe, “Kosive, ata oleike a ke lounu.” ²⁶ Ige Iesuu namihai avoe, “Elehalive di valavae ivi mai melegimo manemei mai ata mole omige ata ke avuike ke.” Iesuu hoto ke louito valavae ivi mai melegimo manemei mai Saimoni mo Diudasi Kaliota ke ominu. ²⁷ Ige Diudasiu Iesu adamo lovi ke masege solekavesite Seteneu uvuvemo holomanu. Ige Iesuu Diudasihu loui avoe, “A isiviai onole valiho vaniege solekai vanela.” ²⁸ Kateai avuho louge esemuiabeau keve uguivoale keau Iesu hotoe ihu ke hilokaholilu. ²⁹ Ige degomoleau huhulalahai avoe, “Diudasiu nahie moni naliale kemoike Iesuu avuho louge auna vahaeho vanie lovi voiai.” Isege degomoleau huhulalahai avoe, “Mesoho Iesuu namihage auna moni malei kunaiholimale kebia ovei.” Esemu keau katelahale huhulalahu. ³⁰ Isito Diudasiu Iesu adamo valavae ivi male keta solekavesite heie dobai tinu. Keu vavimoike au ke vanu.

Menakae doga

³¹ Diudasiu halei tisege Iesuu au esemu namigeveve avoe, “Atae Eseu tota au ataga maleveveu vuguvuguanu. Vani kena lohoge Atae Esena hatai hovelahage ataeabuna ke elehai Dilava ivi ebagevai. ³² Ataeabuna avuemo Dilava ivi ebagevage Dilavana avuta solekai au mo mai tota atagave omisi. ³³ Di esea, di bae vani moaga lahehi ulivebene. Ige vani mole lana di kaovaito bae di elehalivebene. Iale di Diue ata namigeveale ke nahate di la namigeveve. La bae di tiveve matama keve talivebene. ³⁴ Di menakae doga laheho louge evive. Moleho isivilahai mole tedaeveve. Di laheho isiviale ke nahate vai moleho isivilahai mole tedaeveve. ³⁵ Lana moleho isivilahai mole tedaevege kemo ataeabuna hilokage laeau di esemuia.”

Iesuu Bitau vovohovevemo hoto lounu.

(Matiu 26.31-35; Maka 14.27-31; Luka 22.31-34)

³⁶ Kateai louge Saimoni Bitau belahai avoe, “Kosive, a oleveike taliho lounu.” Ige Iesu namihai avoe, “Di tiveve matama keve a bae aike talivebene. Isito gabie ana bae di ehomai keve tenela.” ³⁷ Ige Bitau namihai avoe, “Kosive, osialemoike a daho loui kosea, ‘A bae aike daiti talivebene.’ Di isivialeike aiti talive abu ahavoi data hamai.” ³⁸ Ige Iesuu namihai avoe, “Seleveta ana isiviai daiti talive hatai. Di a namihage evinela. Novae vavimo kokologuu hotoholisege ana di vovoho abuita igaetai kosea, ‘Di ata ke hilokaholinu.’”

14

Dilavae tiveve humadaha igaeike Iesu.

¹ Iesuu kateai Bitaho loui gabiaito tota au esemu namigeveve avoe, “Lainaha di louale ke evisi uvulahalive. Isito la uvu mai Dilavamo mavoi datamo mavove. ² Di Mamae o keve oe uvu moagamoagaeanu ua. Iale dana keve tiniege laheho kebia hoesegeveve. Hoto

keu loboholivatege di la namigeveholinu. Isito hoto keu seleve. ³ Iale dana tiniege laheho oe uvu kebia hoesegevei gabiaito tota hoilahai lohoniege la malevege lana daluvuta keve teve. Ilikege di uale keve lana daluvuta uve. ⁴ Di tiveve matama ke la hilokalu. Isi matama ke humahata la hilokalu.” ⁵ Iesuu kateai louge esemuve mole Tomasiu namihai avoe, “Kosive, a oleve tiveve ke no hilokaholilu. Iale noeabuna oleve kateai humahave ke hilokai.” ⁶ Ige Iesuu namihai avoe, “Humaha ke dailiko. Isi dau hoto seleve loumale kosive. Isi dau ukolikoli biage. Iale da igaemo lana di Mamae teve.” ⁷ Kateai louito namigevei avoe, “La di hilokavatege di Mama keta hilokalu. Isito la aike di elehale kemo la di Mama elehai hilokalu.”

⁸ Ige Iesu esemu mole Bilibi keu Iesuho loui avoe, “Kosive, no isivialeike a Mama mai no haivenela. Ige elike kemo gabie no a belaha halevai.” ⁹ Ige Iesuu Bilibi namihai avoe, “Di subuta vani moaga lahehi ui la haivenu. Isito la sohu di hilokaholilu, ani. La oleuoleu di elehale la keau di Mama elehalu. Iale osialemoike a daho loui kosea, ‘A Mama mai no haivenela. ¹⁰ Di aho loui kosea, ‘Dau di Mamati ua. Ige di Mamau daiti ua.’ Isito mesoho a hoto ke maholinu. Di laheho hoto louale keu da iga hoto holioholinu. Isito di Mamau daiti umale ke hotoike di laheho lounu. Keu daiti ui au lovi vama. ¹¹ Iale lana di hoto mai hilokage dau di Mamati ua. Ige di Mamau daiti ua. Isito mesoho hoto keu laemo isuige di vuvune vaveve vage la eleveale kemo la uvu mai daemo mavove. ¹² Seleveta di la namigevege evive. Oleuoleu abu uvu mai daemo mavoale keabuna di lovi vale ke nahate abuna vai. Ige loviabe kena di lovi ke evihai balugai. Kosealemo dana tota hoilahai di Mamae tisege loviabe kena kateai. ¹³ Ige vani kemo lana di ivimo onoleho di imihage dana la isivi ke vai. Dana vaveve kateale vage kemo di Mamae ivi kena balugai. ¹⁴ Iale lana di ivimo onoleho di imihage dana la isivi ke vai.”

Iesuu Munanae Tumu hanavoveve hoto lounu.

¹⁵ “La di huhuai la isivi daoliege di menaka ehovave. ¹⁶ Ige dana di Mama namihage auna la hoesegeveve Munanae Tumu ke laovege auna di hoto seleve mai la haivei vani bahata la uvumo ugei. ¹⁷ Isito vatae ataeau bae ke malivebene. Kosealemo Munanae Tumu ke elehai hilokaveve keu abuemo anakianu. Isito laeau ke hilokalu. Kosealemo keu aike lahehi ua. Iale auna bae la uvumo ugei.

¹⁸ “Dana la halevei tai. Isito di la halevege la bae la unahahame ulivebene. Isito dana tota hoilahai lae lohoi. ¹⁹ Di aike hatige vatae ataeau bae di elehalivebene. Isito laeabuna di elehave. Isi di hovelahale kemo lana lata hovedevei ukolikoli maleve. ²⁰ Ige vani keu lohoge kemo lana hilokage dau di Mamati ua. Isege laeau daluvuta ua. Ige data lahehi ua.

²¹ “Ata oleuoleu isivi daole keabulike di hoto evisi ehovai abu uvu daovalu. Iale abu isivi daovai abu uvu daovale kebia di Mamana avuta huhuevei au isivi ovei. Ige dana data kebia huhuevei di vaveve haivege abuna ke hilokai.” ²² Kateai louge Diudasi Kaliota ke haleito Diudasi mole keu Iesuho loui avoe, “Kosive, osiohoike a vaveve no haiveito vatae ata kebia haiveholisi.” ²³ Ige Iesuu namihai avoe, “Ata oleuoleu di huhuai abu uvu daovale keabuna di hoto evisi ehovai. Ige di Mamana avuta kebia huhuevei au uvu ovei. Ige no Munanae Tumu kemo noeabuna no Mamati kebia isivi ovei loholiege abuhi ui hoesegevei. ²⁴ Isito oleuoleu daho isiviholiale keau bae di hoto evisi ehovalebene. La di hoto eviale keu di hoto holioholinu. Isito di hanavoale di Mama ke hotoike.

²⁵ “Di lahehi ualemoike di hoto ko bahata laheho lounu. ²⁶ Iale dana la halevei tisege di Mamana di ivimo la hoesegeveve Munanae Tumu ke hanavoi. Ige kena vaveve bahata la haivege lana kemo di louale hoto ke bahata huhueveve.

²⁷ “Lainaho di la halevei tiveve ke huhulahage la uvuu kibikibiai vabualive. Kosealemo di uveve duaika ke mai laovenu. Uveve keu vatae uveve ke nahate holioholinu. ²⁸ La evige di laheho loui kosea, ‘Dana la halevei tiniege tota hoilahai lohoniege la elegevei.’ Iale la daho isivivatege di di Mamae tiveve ke evisi vahaeholalalu. Kosealemo di Mama keu di evihai kosive baluga holinu. ²⁹ Di louale vaveve keabuna bae daemo lohoi. Katealemoike di hoto ko loulive elike gabie vaveve keu lohoge lana elehai la uvu mai daemo mavove. ³⁰ Di bae gabie lahehi hotomoagalivebene. Kosealemo Vatae Kosiveu di aiovoholiho lohoma. Isito vuvuneve keu di vuvune nahate holioholinu. ³¹ Di isivialeike di Mamau daho louale ke bahata vage vatae ataeau ke elehai kemo hilokage di di Mama isivi omisi di uvu bahata ominu. Di hotou kemo kateai ua. Iale lohoge nahi halevai tai.”

15

Iesu keu hote mole uaini ke nahate.

¹ Iesuu kateai louito abuhi tialeu namigevei avoe, “Seleveta dau hote mole uaini ke nahate. Isege di Mamau hote ke biage. ² Iale hote ke atiana hahumaholige auna ke heisi

etulei mai mihatui. Isito atiave degomoleau hahumale kebia auna hoesegevege abuna nenilalahai baie dua vai. ³ Iale laeau hote ke atia nahatea. Di hoto laheho louale keua hoesegevege la kemo ue dua vama. ⁴ Iale negolalahi daemo uve. Ige datana lahehi ui. Hotee atia keua bae heiata hahumalivebene. Isito kena hote tava kemo igaetoai uniege auna hahumae dua vai. Ke nahate la daluvuta igaetolahaholiliege la bae vaveve dua valivebene. Isito lana daluvuta igaetolahaliege vaveve dua vave.

⁵ “Dau hote mole uaini ke nahate. Isege laeau atiave. Lana daluvuta igaetolahai uge dana lahehi ui. Ige kemo lana vaveve dua vave. Isito la di halevaliege la bae onobe dua valivebene. ⁶ Ata oleuoleu daluvuta igaetoholiale keau idie adau giliihi bokolahale ke nahate. Ataebuna idie ada kateale homoi malei venemo mahoi. ⁷ Isito lana daluvuta igaetolahage di hotona laemo negoai ui. Ige la onoleho isiviai di imihage dana ke laovei. ⁸ Lana katelalahi di esemu seleve holisi idiu hahumale ke nahate vage di Mamae ivina kemo balugai. ⁹ Di Mamau dahoe isiviai au uvu bahata daoale ke nahate di data di uvu bahata laovenu. Iale di isivi kemo negolalahi ugeve. ¹⁰ Lana di hoto ke ehovalliege di di Mamae hoto ehomai isivivemo uale ke nahate lata di isivi kemo negolalahi uve.

¹¹ “Di laheho hoto ko loui isivialeike lata di vahaeho ke nahate vave. Ige elike kemo la vahaehona balugai. ¹² Di hoto keu koseanu. Di laheho isiviai la tedeaveale ke nahate lata moleho isivilalahi mole tedeavegeve. ¹³ Ata moleho isivi balugatahoale keu koseanu. Ata molena au haokaho isivianiege auna avuho hatai. ¹⁴ Iale lana di laheho onole louale ke valiege di haokuvu holive. ¹⁵ Di aike laheho loui kosea, ‘Di esemuia.’ Isito di bae gabie laheho kateale loulivebene. Kosealemo esemuia au kosive vaveve bahata hilokaholilu. Isito dana laheho loui kosea, ‘Di haokuvuia.’ Kosealemo di di Mamae vaveve bahata laheho louge la ke evilu. ¹⁶ Laeau di ebagevaholilu. Isito di la tabageveve isivialeike la talive di lovi vage idiu hahumale ke nahate la lovi keu balugai ui tigei. Kosealemo lana onoleho di ivimo di Mama imihage auna la isivi ke laovei. ¹⁷ Di laheho louale keu koseanu. Di isivialeike moleho isivilalahi mole tedeavegeve.”

Vatae ataeau Iesu ataho isiviholilu.

¹⁸ “Mesoho vatae ataeau laheho itumulalahi la aioegevege di hoto ko huhulahave. Keau vasohuta daho itumulalahi di aiohavolu. ¹⁹ La vatae ata holivatege vatae ataeau laheho isivilalahi. Isito di vatae ata kebiamo la tabageveve la malevege laeau di ata holievelu. Kosealemoike vatae ataeau laheho isiviholisi la aiogevema. ²⁰ Iale di subuta laheho louale ke huhulahave. Di la namigeveve kosea, ‘Esemubeu bae au kosive evihalivebene.’ Vatae ataeabuna di aiohavoi vatehani daovaliege abuna lata aioegeveve vatehani laovei. Isito abuna di hoto evisi ehovalliege abuna la hotota evisi ehovai. ²¹ La di esemu holiale kemo ataeabuna vaveve tola ke laemo vai. Ata keau di hanavoale ata ke hilokaholilu. ²² Di lohoi kebia haiveholivatege abu di aiohavoaale vaveve tola keu abumo uoholinu. Isito di lohoi haiveale kemo vaveveabe tola keu abumo ua. ²³ Iale ata oleuoleu daho isiviholisi di aiohavoaale keu di Mamatahoike abu ke isiviholilu. ²⁴ Di kebia nimo vikoe vaveve vaholivatege di aiohavoaale vaveve tola keu abumo uoholinu. Isito di vikoe vaveve moaga vaveveale kebia abu elegeveito daho isiviholisi di aiohavoi di Mamata aiohavolu. ²⁵ Vaveveabe keu Bukae Hoto mole mai selevetinu. Hoto keu loui avoe, ‘Di vavevebe tola vaholisege abu daho isiviholisi di aiohavolu.’”

²⁶ Iesu kateai louito tota namigeveve avoe, “Dana Munanae Tumu laheho hanavoge auna di hoto seleve loui la haivei la hoesegeveve. Keu aike di Mamati ua. Iale gabie dana hanavoge auna lohoniege di vaveve laheho loui. ²⁷ Ige kemo latana di vaveve loui ata namigeveve. Kosealemo di vasohuta vata kove di lovi vage laeau daluvuta ui di vaveve elehai lohoma.”

16

Munanae Tumuu lohoveve hoto

¹ “Di hoto ke laheho louale kemo isiviale la la evievimo dobuluvi halevai. ² Kosealemo Diue ataeabuna gabie abu dubumo la nunuvei. Iale vani kemo ata oleuoleu lahaveliege abuna loui kosea, ‘Noeau Dilava loviliike ko vama.’ ³ Abuna di Mamata ata hilokaholiliege laemo vaveve kateale vai. ⁴ Di hoto ke laheho loui isivialeike gabie vani keu laemo lohoge di laheho louale hoto ke huhulahave. Di subuta lahehi uale kemoike di laheho hoto ko louholinu. Isito di la halevei talihoike hoto ke laheho lounu.”

⁵ “Dana aike hoilalahi di hanavoale ata keve tai. Isito laheho hoto kemo di belahaholisi di namihai kosea, ‘A oleveike taliho.’ ⁶ Di hoto ke laheho louale kemoike la uvu balugalu. ⁷ Iale di hoto seleve ko louge evive. Di la halevei tige keu duave. Kosealemo di la halevei tiholige la hoesegeveveve Munanae Tumuu bae lae loholivebene. Isito dana la halevei tiniege laheho hanavoge auna lohoi. ⁸ Auna lohoniege vatae ata haivege abuna abu

vaveve toela hilokai Dilava vaveve dua keta hilokai. Isi Dilavau atae vaveve abuemu kaovaveve keta abuna hilokai. ⁹Ataeau vaveve toela vai abu uvu mai daemo mavohiale ke auna vaveveabe loui. ¹⁰Di hatai hovelahai di Mamae tige la bae di elehalivebene. Isito Munanae Tumu kena di vaveve ata haivege abuna hilokage di vaveve inutolotoloanu. ¹¹Dilavau Vatae Kosive vaveve kaovaliho louale kemo Munanae Tumu nahi haivege nahi hilokage seleveta Dilavau Setene vaveve kaovage vuvunevena bae uoholisi.

¹²“Di isiviai hoto degomoleta loui la haivei. Isito dana hoto keta louge ke vavevena laemo isuai. ¹³Isito hoto seleve loumale Munanae Tumu kena lohoniege la haivege lana hoto seleve bahata hilokave. Keu bae au kinae hoto loui la haivelivebene. Isito auna au ehue eviale ke loui gabie vaveve lohoveve keta loui la haivei. ¹⁴Munanae Tumu kena di hoto di vaveve ke bahata loui la haivege kemo di ivina balugai. ¹⁵Di Mamae onobenobe bahata keau di onoea. Iale kemo di la namigevei kosea, ‘Munanae Tumu kena di vaveve bahata loui la haivei.’”

Uvulahi vahaeholahaveve deiada

¹⁶Iesuu kateai au esemuho louito tota namigevei avoe, “Dana aike la halevege la bae di elehalivebene. Iniege ke iae vanie ni degomoleau uoholige lana tota bae di elehave. ¹⁷Kateai louge esemuiabe degomoleau moleho loui avoe, “Keu hoto vadeike au ke lounu. Au loui avoe, ‘Dana aike la halevege la bae di elehalivebene. Iniege ke iae vanie ni degomoleau uoholige lana tota bae di elehave.’ Isi tota loui avoe, ‘Dana hoilalahi tota di Mamae tai.’ ¹⁸Vanie ni degomoleau uoholige nahi tota elehaveve ke ihuike ono vade. Nahi hotove ke evisi kemo daudaulahalu.” ¹⁹Kateai lousege Iesuu hilokage abu isivialeike belahai. Iale kemo Iesuu namigevei avoe, “Ose di laheho louale keike la ko loui mole belagevema. Di laheho loui kosea, ‘Di aike la halevege la bae tota di elehalivebene. Iniege ke iae vanie ni degomoleau uoholige lana tota bae di elehave.’ Hoto kenike la moleho louma, ani. ²⁰La katelahalelua di hoto seleve laheho louge evive. Lana bae uvulalahi ninalahave. Isege vatae ataeabuna vahaeholahai. Keau katelahasege la uvu kena ekovehage lana lata vahaeholahave. ²¹Di louale keu koseanu. Keate mole eseu uho vage tumuu hamage auna vatehani malei kemo ue toela vai. Iniege ese kena uge vateve hani keu uoholige keate kena vahaehoai. Kosealemo eseveu ua. ²²Vaveve ke nahate lana vave. La nova uvulalahu. Isito gabie di hatai hovelahage lana tota di elehai vahaeholahave. Ige ataeau la aiogevege la vahaeho keu bae laemo gabialivebene.

²³“Iale di Mamae tiveve vani kela la bae onobeho di namihalivebene. Isito di louge evive. Lana di ivimo onoleho isiviai di Mama imihage auna la isivi ke laovei. ²⁴La subuta di ivimo onobeho di Mama imihaholilu. Isito nova komo lana lavisi di ivimo onoleho imihage auna la isivi ke laovei. Ige kemo la vahaehona balugai.”

Iesuu tota hoilalahi au Mamae tiveve hoto

²⁵“Di subuta laheho dovudovue hotomo la haivenu. Isito vani mole di bae dovudovue hoto loulivebene. Isito dana vani kemo inuta di Mamae hotoe ihu laheho loui. ²⁶Iale vani keu lohoge la biaebuna di ivimo di Mama imihave. Di louale keu koseanu. Di laheho di Mama imihaveve ke louholinu. Isito la biaebuna di ivimo imihave. ²⁷Ige biagena laheho isiviai la isivi ke vai. Di Mamau laheho isiviale keu koseanu. La daho isivilalahi la uvu mai daemo mavoi hilokage dau Dilavamo lohonu. ²⁸Di seleveta di Mamaemo lohoi vata kove lohonu. Isito dana tota vata halei hoilalahi di Mamae tai.”

²⁹Iesuu hoto ke louge esemuiabeau avuhu loui avoe, “A keu nova dovudovumo louholisito inutaitae a ko noheho lounu. ³⁰Ige no nova a hoto kemo hilokage a keu onobenobe bahatamo luleleanu. Iale kemo atabeu bae onobe loui a haivulivebene. Kemoike no no uvu mai aemo mavoi hilokage au Dilavamo lohonu.” ³¹Ige Iesuu hotoeabe ibina vai namigevei avoe, “Seleveta lana nova la uvu mai daemo mavolu. ³²Di louge evive. Di louale vani keu aike lohoma. Iale ataeabuna di maliho lohoge lana di halevai detuluvisi la o igaegae tisege dana dahuvela ui. Isito di bae dahuvela ulivebene. Di Mamana daiti ui. ³³Di hoto ke loui isivialeike la la uvu mai daemo mavoime uveve dua vai. Vatae ataeabuna la aiogevege lana kemo vatehani maleve. Isito kemo vabu halevaito negolahave. Kosealemo di vatae vaveve toela vaholisi aehale ke nahate lata ke aehave.”

17

Iesuu au esemuho guliguliale deiada

¹Iesuu hoto ke loui gabiaito otogoe niai au Mama imihai avoe, “Mamai, di hativeve vani lohonu. Iale di ivi ebagemanela. Ige dana data a ivi ebagemai. ²A di ebagemai vuvune daoge ata bahata keau di adae valamo ua. Iale dana ukolikoli malei a ata malevai daoale kebia ovei. ³Ukolikoli maleveve keu koseanu. Ataeabuna hilokage a igae Dilava

seleve. Isi abuna hilokage a di hanavoge di lohonu. Abuna katelahai abu uvu mai daemo mavoliage ukolikoli malei. ⁴ A lovi mai daoale ke bahata di vai gabianu. Ige kemo a iviu vatae ataemo baluganu. ⁵ Subuta mole vatau uoholisege di aiti uge a di ivi ebagemanu. Iale Mamai, tota di ivi ebagemai vuvune kateale mai daonela.

⁶ “Di a vaveve loui a vatae ata malevei daoale kebia haivenu. A kebia malevege keau a ataea. Iale di kebia haivege keau a hoto evisi malu. ⁷ Iale keau hilokage di onobenobe bahata maleale keau aemo lohohu. ⁸ A daho hoto louale ke di loui kebia namigevege keau ke evisi malu. Iale keau hilokage di seleveta aemo lohonu. Isi keau hilokage ailike di hanavonu.

⁹ “Iale kebiaho di guliguli ko vama. Di vatae ata bahataho guliguliholima. Isito a malevei daoale kebiahoike di guliguli ko vama. Kosealemo keau a ataea. ¹⁰ Di ata maleveale keau bahata a ataea. Ige a ata maleveale keau bahata di ataea. Iale nahi ata kebia maleveale keau di ivi ebagevalu. ¹¹ Iale dana nova vata halei ae tai. Di bae kove ulivebene. Isito di esemuabuna kove ui. Di Mama, au tumute. Ige a iviu vuvuneanu. Iale a ivie vuvune kemo di esemu kobia nibieve tumutumuanela. Ige elike keau naiti uvu igaeale ke nahate abuta uvu igaeai. ¹² Keau daluvuta usege di a ivie vuvunemo kebia nibieve tumutumuanu. Di kebia nalievege keau di halevaholilu. Isito kebia vigomo ata mole igae Diudasi keu di halei hatihatie humahamo tima. Ige vaveve keau bahata uvu igaeai. ¹³ Iale dana nova vata halei ae tai. Isito di kove ui hoto ko loui isivialeike di vahaeho vaveve keu di esemue uvumo ui balugai. ¹⁴ Di a hoto loui kebia haiveale kemo vatae ataeau aiogevelu. Kosealemo keau vatae ata holioholilu. Ige data vatae ata holioholinu. ¹⁵ A kobia vatamo malevelihu di a imihaholinu. Isito di a imihai isivialeike koeau vatae usege a neniai kebia nalievege Seteneu kebia maleveholisi. ¹⁶ Di vatae ata holioholiale ke nahate di esemu kebiata vatae ata holioholilu. ¹⁷ Iale a hoto seleve kemo kebia hoesegevege abu atae tumu holievei. ¹⁸ A di hanavoge di vatae lohoale ke nahate dana kebia hanavege abuna vata bahatae tai a hoto loui ata haivei. ¹⁹ Di debika mai aoi isivialeike kebiata seleveta abu ebika mai aoge ana kebia hoesegevei.

²⁰ “Di ata kobia unahaho guliguliholima. Isito ata degomoleau di esemu kobia hoto evisi abu uvu mai daemo mavoveve kebiatahoike di guliguliai a imihama. ²¹ Mamai, di a imihai isivialeike di esemu koeau isi gabie daemo uvu mavoveve keau bahata uvu igaeai. Di isivialeike a daiti usege di aiti uale ke nahate abu vai nahehi igaeatolahai. Ige elike vatae ataeau hilokage a di hanavonu. ²² A di ebagemale ke nahate di kebia tabagevenu. Ige elike naiti uvu igaeale ke nahate keau uvu igaeai. ²³ A daiti uge di kebiahi ua. Iale keabuna seleveta uvu igaealahai. Ige kemo vatae ataeabuna hilokage a di hanavonu. Isi abuna hilokage a daho isiviale ke nahate a kebiaho isivianu.

²⁴ “Mamai, a di esemu kobia malevei daonu. Iale di isivialeike keau di oleve uale keve abu daluvuta ui. Ilive elike a di ivi ebagemale ke abu elehai. A di ivi ebagemale keu koseanu. Subuta vatau uoholisege a daho isivi balugai di ivi ebagemanu. ²⁵ Di Mama, au inutolotolote kosive. Vatae ataeau a hilokaholilu. Isito di a hilokanu. Ige esemu koeau hilokage ailike di hanavonu. ²⁶ Di a vaveve loui kebia haivenu. Iale dana vani bahata kateigei. Ige elike a daho isiviale ke nahate abuna moleho isivilahai. Abuna katelahage dana abuhi ugei.”

18

Abu Iesu umuvale deiada

(Matiu 26.47-56; Maka 14.43-50; Luka 22.47-53)

¹ Iesuu kateai guliguliai au Mama imihage uoholige ke iae au esemu leveni (11) holoevei abuhi e mole ivi Kidoloni ke houi bulu moleve tiale ua. ² Isege Iesuho haiale Diudasi keu matama ke hilokanu. Kosealemo vani moaga Iesuna matama keve au esemu bevuevei abuhi keve ugei. ³ Iale keau keve usege Diudasiu tuvali ata holoevei abuhi keve lohohu. Ige dubue kosiveau Balisia atahi dubue udaha nalimale bukate hanavege kebiata keve lamebata hatita malei lohohu. Isi Iesu hamaveve kudavata malei lohohu. ⁴ Lohoale matama keve velehovoge Iesuu kebia elegeveve vaveve bahata avuemo lohoveve ke hilokanu. Iale keu vabuholisito kebia beiavei tiale abuhou loui avoe, “Ata vadeike la kaovama.” ⁵ Ige abu namihai avoe, “Nasaleta ata Iesu keike no kaovama.” Ige Iesuu loui avoe, “Ke dailike ko.” Kateai lousege avuhou haiale Diudasi keu keve abuhi lamisi ua. ⁶ Iesuu kateai abuhou loui avoe, “Ke dailike, ko.” Ige abu ke evisi vikolahai vatamo dobuluvilu. ⁷ Vatamo dobuluvige Iesuu tota belageveve avoe, “Ata oleike la kaovama.” Ige abu avuhou loui avoe, “Nasaleta ata Iesu keike no kaovama.” ⁸ Ige Iesu namigeveve avoe, “Di subuta laheho loui kosea, ‘Ke dailike ko.’ Iale la da igae kaovaliege di esemu kobia iovege abu tai.” ⁹ Kateai loui isivialeike au subuta louale hoto ke mai selevetisi. Au subuta au

Mama imihai avoe, “Mamai, a kobia daoveale ke di bebe haleveholinu.”¹⁰ Kateai louge Saimoni Bitau au siga mai dubu nalimale kosive baluga ke esemu golema inute heisi etulenu. Esemu ke ivilike Malakasi.¹¹ Ige Iesuu Bita namihai avoe, “A siga mai lovovemo mamu. A huhuige di Mamau daho e mole hale ke di bae ilivebene. Ba, dana ke isi kemo vatehani malei.”

Iesu Anasi vudimo laminu.

¹² Ige tuvali ataeau abu kosivehi isi Diue dubue bukate keau Iesu evudei mai umuvalu.¹³ Isi vasohuta mai Anasi oe tilu. Dubu nalimale kosive baluga Kaiabasi ke valuike Anasi. Vagana kemo Kaiabasi ke Diue atae kosive baluga holinu.¹⁴ Iale Kaiabasi keike subuta Diue kosive namigevei avoe, “Nahi ata ke igae hamage au hatige duave. Ige kemo nahi bahata haluvi halevai.”

Bitau Iesu vovohonu.

(Matiu 26.69-70; Maka 14.66-68; Luka 22.55-57)

¹⁵ Abu Iesu mai Anasi oe tisege Saimoni Bitau Iesu esemu moleti ehovei tilu. Esemu mole ke dubue kosive baluga keu ke hilokanu. Iale esemu keu Iesu ehomai dubue kosive baluga ke oe uvue tinu.¹⁶ Isege Bitau heie lamisi ua. Ige esemu keu tota hoilalahi tiale dubue kosive baluga ke udaha nalimale ma ke namihage keu udaha alavoge Bitau oe uvue tinu.¹⁷ Oe uvue tisege udaha nalimale ma ke avuho loui avoe, “Ose au Iesu esemu mole ailike ko.” Ige Bitau namihai avoe, “Ba, dau ke esemu holioholinu.”

¹⁸ Kateai lousege dabau lohoge dubue kosive baluga ke esemuiau dubue bukate kebiahi vene beisi hevemo lavisi ua. Isege Bitau tiale abuhi vene ke hemo ua.

Dubue kosive balugau Iesu belahanu.

(Matiu 26.59-66; Maka 14.55-64; Luka 22.66-71)

¹⁹ Keve usege dubue kosive baluga keu oe uvue Iesu belahama. Keu isivialeike Iesu esemu kebia hilokaevai. Isi isivialeike Iesuu hoto onole loui ata haivemale hoto keta hilokai.²⁰ Ige Iesuu namihai avoe, “Di vani bahata ata bahatae vudimo lamisi di hoto loui haivema. Diue dubu baluga kemo isi dubue ese igaegae kela nahie ataeau mole bevuevei igaetoai uale kebia di hogohogomo loui kebia haiveholinu.²¹ Iale osialemoike a hoto kateale loui di belahama. Ainaho di belahalive. Isito di ata haivesege abu di hoto eviale ata kebia belagevenela. Keau di louale hoto ke hilokalu. Iale ana kebia belagevege keabuna di hoto onole louale ke abuna aho loui.”²² Iesuu hoto kateale louge dubue bukate moleu vavavemo lamiale keu Iesu golema beisi avuho loui avoe, “Osialemoike a hoto kateale dubue kosive balugaho lounu.”²³ Ige Iesuu namihai avoe, “Di hotoe toela onole louge ke daho lounela. Isito di hoto louale keu inutolotoloige osialemoike a daho loui dahamonu.”

²⁴ Kateai louge Anasiu louge abu Iesu umuvalu keta melavei dubue kosive baluga Kaiabasi oe tilu.

Bitau tota Iesu vovohonu.

(Matiu 26.71-75; Maka 15.1-5; Luka 22.58-62)

²⁵ Keau keve tisege Bitau sohu venehemo uma. Ige ata degomoleau avuho loui avoe, “Ani, a keu Iesu esemu mole.” Ige Bitau hotoeabe hamai loui avoe, “Dau ke esemu holioholinu.”²⁶ Ige dubue kosive baluga ke esemu moleu Bitu namihanu. Esemu ke ata mole golemaike Bitau heisi etulenu. Iale esemu keu Bitu belahai avuho loui avoe, “Ose a koike Iesuluvuta bulue usege di a elehanu.”²⁷ Ige Bitau tota loui avoe, “Ba, dau ke holioholinu.” Kateai lousege solekavesite kokologuu hotoanu.

Iesuu Bailoti vudimo laminu.

(Matiu 27.1-2, 11-14; Maka 15.1-5; Luka 23.1-5)

²⁸ Iniale vavita vau alamosege abu tota Iesu melavei Kaiabasi o ke halevai gamani baluga oe tilu. Tialeau velehoivoito gamani baluga ke oe uvue tihohililu. Kosealemo vaveve katealemo Diue menakau ua. Menaka keu koseanu. Diue ata keau Diue ata holioholiale ke oe uvue bae talivebene. Abuna o ke uvue tiliege bae Basova lovi ke ilivebene. Katealemoike abu tiale gamani oe uvue tihoholisito heie lavisi ua.²⁹ Iale kemo gamani baluga Bailoti keu heie lohoale ata kebia belagevei avoe, “Ata kou vaveve vade vaive vage la mai lohohu.”³⁰ Ige abu namihai avoe, “Malaha kou vaveve toela vaholivatege no ko mai lohoholilu. Isito kou vaveve toela baluga vaive vage no mai lohohu.”³¹ Ige Bailotiu namigevei avoe, “La biaeau ke mai talive la menakamo vaveveve avuemo kaovave.” Ige Diue ata keau Bailoti namihai avoe, “No isiviale hamai. Isito a gamaniau menaka mavoale kemo no bae atabe hamalivebene.”³² Abu hoto kateale louale keu Iesu hoto mole mai selevetinu. Iesuu subuta loui avoe, “Ataeabuna di mai idie domo hamage dana hatai.”

Iale abu hoto kateale louale keu Iesu hoto mai selevetinu. ³³ Ige Bailotiu au o uvue tiale Iesu hohavoge au avue lohonu. Ige Bailotiu belahai avoe, “A Diue kosive anike ko.” ³⁴ Ige Iesuu namihai avoe, “A kinamo nike a hoto ke lounu. Mena ata moleu di vaveve aho louike vage a hoto ke lounu.” ³⁵ Ige Bailotiu belahai avoe, “A huhuige dau Diue ata. Dau Diue ata holioholinu. Isito a ata isi a dubue kosive keau a mai dae loholu. Iale a vadeu vale ke daho lounela.” ³⁶ Ige Iesuu namihai avoe, “Dau vata ko kosive holioholinu. Isito di vata ko kosive holivatege di ata keau di tedahoge Diue ata keau di mai kove lohoholilu. Isito dau vata ko kosive holioholinu.” ³⁷ Ige Bailotiu tota belahai avoe, “A hoto louale kemo seleveta au kosive baluga, e.” Kateai louge Iesuu namihai avoe, “A louale keu seleve. Dau kosive baluga. Isito di vatae lohoi uale ke ihuu koseanu. Di isivialeike hoto seleve loui ata haivei. Ige oleuoleu abuemo hoto seleve umale keabuna di hoto ke evisi mai.” ³⁸ Ige Bailotiu Iesu belahai avoe, “Hoto seleve keu hoto vade.”

Kateai Iesu belahaito halei tota heie tiale Diue ataho loui avoe, “Di vaveveve avuemo kaovage vavevebe toelau avuemo uoholinu. ³⁹ Isito la vaveve keu koseanu. Vagana bahata Basova vani keu lohoge lana louge dana dibulae ata mole iomage auna tigei. Iale lana isiviage di ke nahate vai Diue kosive ke iomage au tai.” ⁴⁰ Ige Diue ata keau itumulahai baita avuho loui avoe, “Ke ioma hale. Isito malaha mole Balabasi ke iomanela.” Kateai loui Bailoti namihalu. Ige Balabasi keu vavoloe ata.

19

Abu Iesu hamaveve mai selevetilu.

(Matiu 27.15-31; Maka 15.6-20; Luka 23.13-25)

¹ Bailotiu au tuvali ata namigevege abu Iesu mai visuhavoi aiohavolu. ² Isi kinaveho hote mole beikabeikate mai viliai kinave hanubelu. Isi ogo tahote vatae kosiveau hatumale ke nahate mai avuemo hatulu. ³ Isi lohoaleau vudivemu lavisi behavoi avuho loui avoe, “Diue kosive baluga, ana duave.” Katelahai behavoi golema beisi aiohavolu.

⁴ Katelahasege Bailotiu tota dombai tiale Diue ata namigevege avoe, “Elehave. Dana mai lohoge lana ke elehai hilokage di vaveveve avuemo kaovaito vavevebe toela avuemo elehaholinu.” ⁵ Kateai namigeveito louge Iesuu heie lohonu. Abu hote beikate mai viliai kinave hanubei ogo nehe tahote mai avuemo hatuale keta heie lohonu. Ige Bailotiu Diue ata namigevege avoe, “Elehave. Malaha nehe keike ko.” ⁶ Ige dubu nalimale kosiveau abu bukatehi Iesu elehai baita loui avoe, “Mai idie domo hamave. Mai idie domo hamave.” Ige Bailotiu abuhu loui avoe, “La biaeau mai idie domo hamave. Di vaveveve kaovage vavevebe toelau avuemo uoholie kemo di ke hamavevu daemo anekianu.” ⁷ Ige Diue kosiveau avuho loui avoe, “Ata keu subuta loui avoe, ‘Dau Dilava mo.’ Iale kemo no menakau loui avoe, ‘Ata kateale hamage au hatai.’ Iale keu hoto kateale louale kemo no isivialeike a ke hamage au hatai.”

⁸ Abu hoto kateale louge Bailotiu ke evisi vabu baluganu. ⁹ Isi Iesu melamei au oe uvue tiale Iesu belahai avoe, “A oleve lohonu.” Kateai louge Iesuu hotove ibina louholinu. ¹⁰ Kateige Bailotiu avuho loui avoe, “A daho hoto louliho isiviholinu, ani. A hilokage dau gamani baluga. Iale dana isivianiege a iomage tenela. O dana isivianiege a mai idie domo hamai.” ¹¹ Ige Iesuu avuho loui avoe, “A vuvune maleale ke Dilavaike aonu. Iale ata moleu di mai aonale ata keu a vaveve ko evihai vaveve toela baluga vanu.” ¹² Kateige Bailotiu Iesu hoto ke evisi humaha kaovai isivialeike iomage au tai. Kateaito halei tiale hoto ke loui Diue ata namigevege abu avuho loui avoe, “Ana ke iomage keu tige a keu Loma kosive baluga Sisa ke haoka holioholinu. Kosealemo ata keu loui avoe, ‘Dau kosive baluga.’ Iale ata oleu isiviai kosive baluga holiiale keu Loma kosive baluga ke aiohavonu.” ¹³ Kateai louge Bailotiu hotoeabe evisi Iesu melamei heie tiale kotae matama keve ugulamou. Matama keu abu mune detiale matama. Iale Diue hotomo abu matama ke ivihai avoe, “Gabata.”

¹⁴ Iale bulae esemo abu Basova lovi ke iho vage vani ke lilimo Bailotiu Iesu melamei kotae matamae lohonu. Isi Diue ata namigevege avoe, “La kosive baluga keike ko.” ¹⁵ Ige abu hoveveve baita loui avoe, “Hamage au hatai. Mai idie domo hamave.” Ige Bailotiu belagevege avoe, “Kou la kosive baluga. Iale lana isiviage dana mai idie domo hamai.” Ige dubu nalimale kosiveau namihai avoe, “Ata keu no kosive holioholinu. Isito Loma kosive baluga ke igaeike no kosive baluga.”

Abu Iesu mai idie domo hamalu.

(Matiu 27.32-44; Maka 15.21-32; Luka 23.26-43)

¹⁶ Kateai louge Bailotiu hotoeabe evisi Iesu mai hamaliho tuvali ata ovunu. Ige abu Iesu mai tilu. ¹⁷ Mai tiale keau idie do mai omige au ke ebamoge abu tiale keau matama mole ivi Gologota keve velehovolu. Diue hotomo hoto ke ihuu koseanu. Lolokue matama.

¹⁸ Abu keve velehovoi Iesu mai idie domo hamalu. Isi malaha abuitata malevei avuluvuta igaetolahi havelu. Moleu adave agiteatae. Isege moleu adave inuteatae. ¹⁹ Ige Bailotiu idie vakimo hoto mole hisaliage abu ke mai kinave tatamo hamale keu koseanu. Avoe, "Nasaleta ata Iesu keike ko. Kou Diue atae kosive baluga." ²⁰ Iale Diue ata moagaeau hisali ke elehai dodavema. Kosealerno abu Iesu mai hamale matama keu haeava holioholinu. Isito keu Dielusalema vavamo ua. Ige Bailotiu Diue hotomo Loma hotomo isi Giliki hotomo hoto ke igae hisalianu. ²¹ Ige Diue dubu nalimale kosiveau Bailoti namihai avoe, "Ainaho hisaliai loui kosea, 'Kou Diue atae kosive baluga.' Keu no kosive baluga holioholinu. Isito hisaliai kosea, 'Kou au ebika ebagemai loui avoe, Dau Diue atae kosive baluga.'" ²² Ige Bailotiu namigeveve avoe, "Di hisaliai gabianu. Iale di bae tota ke ekovehalivebene."

²³ Ige ke iae tualie ata abuita abuitaeau Iesu mai hamale keau ogove mai dikohai mole ovelu. Isi tota Iesu dabae ogo mai elehage keu ogo egete igae. ²⁴ Iale kemo abu moleho loui avoe, "Nahi ko dikoha halevai. Isito nahi ogo ko mai kasilahage oleu kasi kemo negoaniege bae ogo ko mai." Abu vaveve kateale vale keu Bukae Hoto mai selevetinu. Hoto keu loui avoe, "Keau di ogo dikohai mole ovelu. Isi di dabae ogo keho kasilahalu." Iale tualie ataeau Bukae Hotou louale ke nahate valu.

²⁵ Keau katelahasege Iesu neinau abu tatati Iesu valamo lavisi ua. Ige Kolobasi mahina Meli isi keate mole Meli Magidaleni keau abuhi lavisi ua. ²⁶ Ige Iesuu elehage neinau uvuve esemu moleti keve lavisi ua. Ige Iesuu au neinaho loui avoe, "Amia, esemu keu a moike." ²⁷ Kateai au neinaho louito esemu ke namihai avoe, "Keu a neinaike." Hoto ke louge esemu keu vani kemo keate ke melamege au neinave holisi avuti ua.

Iesuu hatiale deiada

(Matiu 27.45-56; Maka 15.33-41; Luka 23.44-49)

²⁸ Iesuu hilokage loviveu bahata gabianu. Iale kemo keu isiviale Bukae Hoto mole mai selevetisi. Isi loui avoe, "Di enuanu." ²⁹ Kateai louge abu uaini mai baidisimo ehosivale kemo ono mole ogomu ke nahate mai uaini e kemo maneveito ke kavitsi mai avemo mavolu. ³⁰ Ige Iesuu uaini ke teveito loui avoe, "Elemua." Kateai louito hatige tuveu dakolahanu.

Tualie esemu moleu Iesu etekamo binu.

³¹ Iniale gutuige Diue ataeau tiliale Bailoti namihai isivialeike au louge tualie ataeau talive idie domo haveale kebia velo havei bokoevege abu haluvisi. Keau isiviholialeike ata keau bulamo idie domo uliho. Kosealerno vane keu vanie tumu seleve. ³² Ige Bailotiu tualie ata namigevege abu tiale keau vasohuta mole velo hamai bokoige keu hatinu. Ige abu halevai mole velo hamai bokoige keta hatinu. ³³ Ige abu halevai lohoale isiviai Iesu velota hamai bokoai. Isito abu elehage keu subuta hatinu. Iale kemo abu velove hamai bokoholilu. ³⁴ Isito tualie esemu mole igae keu bi mai Iesu etekamo binu. Ige solekavesite kemo tahou eti laluvai lohohu. ³⁵ Kateisege di ke elehanu. Iale kemo di ko hisaliai isivialeike lata ko evisi la uvu mai avuemo mavove. Di louale kou lobo hoto holioholinu. Isito di hilokage di louale hoto kou hoto seleve. ³⁶ Tualie ataeau vaveve ke vale keu Bukae Hoto mole mai selevetinu. Bukae Hoto keu loui avoe, "Itavavebeu bae bokolahalivebene." ³⁷ Ige Bukae hotou tota loui avoe, "Ataeabuna abu biale ke elehai."

Abu Iesu mai abavulu.

(Matiu 27.57-61; Maka 15.42-47; Luka 23.50-56)

³⁸ Vaveve ke iae Alimatia malaha mole Dioseba keu isiviai Iesu vava mai abavui. Iale keu tiale keho Bailoti belahanu. Dioseba keu Iesu ehomamale ata mole. Isito keu Diue kosive vabugeveale kemo au evievi ke mahogovanu. Iale keu Bailoti belahage Bailotiu avuhu loui avoe, "Talive vavave mai abavu." Ige Diosebau tiale vavave manu. ³⁹ Isege malaha moleu subuta vavimo Iesue tiale Nikodimasi keu Diosebatu tinu. Tiale mulamula hagote balugataho malei lohonu. ⁴⁰ Iale malaha abu keu mulamula ke bahata malei Iesu vavamo keiohai ogota viliiai tilu. Diue ataeabuna ata abavueveliho vaveve kateale vagei. ⁴¹ Abu Iesu mai hamale ke vavae bulu moleu uale keve abata moleu ua. Abu subuta lovoi kemo atabe mai abavuholilu. ⁴² Iale abata kemo abu Iesu vava mai mavolu. Bulau lohovevevu vuguvuguike vage abu Iesu vava mai vuguta hamale ke vavamo abavulu.

20

Iesuu Sande vavita gulimo hovelahanu.

(Matiu 28.1-8; Maka 16.1-8; Luka 24.1-12)

¹ Sande vavita vae alamo Meli Magidaleniu Iesu vutae tinu. Tiale elehage abu mune baluga mai gulive ili bamuale keu uoholinu. ² Ige keu ke elehai hoilaha bibuai tiale

Saimoni Bita namihai Iesu uvue esemu mole keta namihanu. Namigevei avoe, "Ataeau nahie Kosive ke vava vavolohai mai tilu. Mai tiale olevue mavoale ke no hilokaholilu." ³ Ige Bitau esemu mole keti hoto ke evisi halevai Iesu vuta elehalilo. ⁴ Bibuluvisi tilage esemu mole keu Bita halei uli holisi tiale vasohuta Iesu vutae velemanu. ⁵ Keve velemaito abata ke uvue tiholinu. Isito abu Iesu mai mavoale ke ilimo holumai elehage abu ogota viliale ogo ke unahaeau ua. ⁶ Ige ke iae Saimoni Bitau tiale velemaito abata ke uvue tinu. Tiale elehage abu ogota viliale keau ua. ⁷ Isege abu kinave viliale ogo keu ogo kebiahi igaetoai uoholinu. Isito ogo keu lilikateve bokoai ua. Iale keta Bitau elehanu. ⁸ Ige esemu moleu uli holisi tiale abatae velemaito keta bae ke uvue tinu. Tiale ogo elegevei hilokage Iesuu hovelahanu. ⁹ Bukae Hotou louale Iesuna hatihatimo hovelahai. Iale keau subuta kemo luleleholisito ke elehalemo Bukae Hotou louale kemo lulelelahalu. ¹⁰ Keau ke elehaito hoidevei abu oe tilu.

Iesuu Meli Magidaleniemo velemanu.
(*Matiu 28.9-10; Maka 16.9-11*)

¹¹ Isege iaeabe Meliu lohoale guli keve lamisi ui ninama. Keve ninanata holumai abu Iesu mai mavoale lovo ke elehanu. ¹² Elehasege anelu abuiou ogo taete holovealeta Iesu lovo kemo uguiaivoi ua. Moleu kinaveu uale keve ugulamou. Isege moleu loveveu uale keve ugulamou. ¹³ Iale keau Meli belahai avoe, "Osiohoike a ninama." Ige keu namigevei avoe, "Ataeau di Kosive vava vavoloi mai tilu. Keau mai tiale olevue keve mavoale ke di hilokaholilu." ¹⁴ Kateai louito hoilahi au iae niai elehage Iesuu lamisi ua. Isito keate keu Iesu hilokaholilu. Keu huhuai avoe, "Mesoho ata moleiko." ¹⁵ Ige Iesuu belahai avoe, "A osiohoike ninama. Ata vadeike a kaovama." Ige Meliu huhuai avoe, "Mesoho malaha kou bulu ko biage." Isi kateai avuho loui avoe, "A Iesu vava mai olevue keve mamoniege daho louge di talive mai." ¹⁶ Ige Iesuu ivive iviloi loui avoe, "Meli." Kateai louge Meliu hoilahi valitisi Diue hotomo avuho loui avoe, "Laboni." Hoto ke ihuu koseanu. Kosive. ¹⁷ Ige Iesuu avuho loui avoe, "Ainaho di levelive. Kosealemo di sohu di Mamae veatisi tiholinu. Iale talive di haokuvu namigevei kosea, 'Di di Mamae veatisi tima. Keu di Mama isi la Mama. Keu di Dilava isi la Dilava.'" ¹⁸ Kateai Meli Magidaleniho louge au tiale Iesu esemu namigevei avoe, "Di nova Iesu elehanu." Kateai abuhou loui Iesuu avuho louale hoto keta loui namigevenu.

Iesuu au esemuemo velemanu.
(*Matiu 28.16-20; Maka 16.14-18; Luka 24.36-49*)

¹⁹ Vani ke igae gutumo esemuiabeau bahata mole bevuevei oe uvue uito abu inohoho udaha bamulu. Kosealemo keau Diue kosive kebia vabugevelu. Iale keau oe uvue usege Iesuu lohoale vigoabemo lamisi namigevei avoe, "Lana duave." ²⁰ Kateai louito au adae samaguta au etekae samaguta mai haivenu. Ige esemuiabe keau abu Kosive ke elehai vahaeho balugalu. ²¹ Ige Iesuu tota abuhou loui avoe, "Lana ue dua vama. Di Mamau di hanavoale ke nahate dana aike la hanavei." ²² Kateai louito au lu ovei abuhou loui avoe, "Lana Munanae Tumu maleve." ²³ Lana ata namigevei kosea, 'Dilavana la vaveve toela ulihai.' Ige auna vaveveabe toela ulihai. Isi lana ata namigevei kosea, 'Dilavau bae la vaveve toela ulihalivebene.' Ige au bae vaveveabe toela ulihalivebene." Iesuu kateai louito halevei tinu.

Iesu isi Tomasi

²⁴ Esemu tuelo (12) kebia vigomo esemu mole ivilike Tomasi (ivive moleike Didimasi). Iale Iesuu esemu kebiae lohoale vani kemo Tomasiu abuhi uoholinu. ²⁵ Ige esemu degomoleau namihai avoe, "Noeau Kosive elehalu." Ige Tomasiu abuhou loui avoe, "Dana di ada mai adave samagu levei etekave samaguta leveniege kemo bae la hoto mai hilokage au hovelahanu. Isito di kateholiniege di bae la hoto malivebene."

²⁶ Iniale bula igaeu uoholisege esemu nehe keau mole bevuevei oe uvue uito abu inohoho udaha bamulu. Kateimale kela Tomasiu bae abuhi ua. Keau keve usege Iesuu tota lohoale vigoabemo lamisi abuhou loui avoe, "Lana duave." ²⁷ Kateai abuhou louito Tomasi namihai avoe, "A ada mai di adae voto ko levei elehanela. Isi di etekata levei elehanela. A kebia elegeveniege ainaho dolodololive. Isito a uvu mai daemo mamonela." ²⁸ Ige Tomasiu avuho loui avoe, "Di Kosive, au di Dilava." ²⁹ Ige Iesuu avuho loui avoe, "A di elehale kemoike a a uvu mai daemo mamonu. Isito ata degomoleau di elehaholisito abu uvu mai daemo mavoale keabuna vahaeholahi."

Buka ko deiada

³⁰ Iesuu au esemu vudimo vuvune vaveve moaga vavevele kebia bahata di buka komo hisalieveholinu. ³¹ Isito di kobia hisalievei isivialeike la ko dodavei la uvu mai Iesuemou

mavoi hilokage keu ata tedaevemale kosive Keliso. Isi hilokage keu Dilava mo. Iale la evievi kemo ngolahalive elike ivivemo ukolikoli maleve.

21

Iesuu au esemu seveniemo (7) velemanu.

¹ Vani mole Iesuu Taibiliasi tabu keve au esemue ti moleanu. Au keve tiale deiadave keu koseanu. ² Iesu esemu degomoleau keve mole bevuevei igaetoai uale kebia iviabeike koea. Saimoni Bitu. Ige ese nehe Tomasi (ivive mole Didimasi). Ige Galili vatamo umale Keina ata mole ivi Nataniela. Ige Sebedi mo abuita. Ige Iesu esemu mole abuita. Keau keve mole bevuevei ua. ³ Isege Saimoni Bitau namigevei avoe, “Dana tiniege e mahoi.” Ige esemu degomoleau avuho loui avoe, “Noeabuna aluvuta tai.” Katealahai avuluvuta vanagi mai tiliale vavi igae kemo e maholata huenabe maleholilu. ⁴ Ilage vau alamoge Iesuu lohoale tabu ke esagae lamisi ua. Ige esemuiabe keau ke elehaito valitiholilu. ⁵ Ige Iesuu hohavei avoe, “Esemuia, lana huenabe malelu.” Ige abu loui avoe, “No bebe maleholilu.” ⁶ Kateai louge Iesuu namigevei avoe, “La ugabi mai ada inuteveatae mihatuliege lana huena moaga maleve.” Ige abu hotove evisi ugabi mai au louale keveatae mihatuge huena moagamoagaeau ugabi kemo uge abu butuhai mai vanagimo mavovevu abuemone anekianu. ⁷ Ige Iesu uvue esemu keu ke elehai Bitu namihai avoe, “Ata keu nahie Kosive.” Ige Saimoni Bitau di hoto ke evisi au ogo elokohale ke mai holovai emo biloai Iesue tinu. ⁸ Isege noeau vanagita ugabi butuhai lohohu. No esagamo haeava holioholilu. ⁹ Katealemo no lohoaleau esagae dobuluvisi elehage Iesuu vene beisi kemo huena mahoevei valavata malei otovenu. ¹⁰ Isi noheho loui avoe, “La huena maleale kebia degomole malei lohove.” ¹¹ Ige Saimoni Bitau tiale ugabi ke butuhai esagae lohohu. Ige ugabi kemo huena moagamoagaeau ua. Huena keau bahata uani handele viviti tili (153). Ugabi keu ililohoi to levelahaholinu. ¹² Ige Iesuu noheho loui avoe, “Lohoi lovi ive.” Ige no vabulahale kemo koseai Iesu belahaholinu, “A ole a.” Kosealemo no hilokage keu no Kosive. ¹³ Katealahage Iesuu tiale valavata huenata malei lohoale noevenu.

¹⁴ Iesuu hatai hovelahale ke iae au ebika mai au esemu haiveale abuita. Isi tota nova kota louge abuita igaeata.

Iesuu Bitu belehanu.

¹⁵ No lovi ke isi gabilahasege Iesuu Saimoni Bitu namihai avoe, “Dioni mo Saimoni, a daho isiviale a isivi kena esemu koeau daho isiviale ke evihanu. Emena.” Ige Bitau namihai avoe, “Ito, Kosive, a hilokage di aho isivianu.” Ige Iesu avuho loui avoe, “A katealemo di mamoe ese nalievenela.” ¹⁶ Kateai avuho louito tota belahai avoe, “Dioni mo Saimoni, ana seleveta daho isivi baluganu.” Ige Bitau namihai avoe, “Ito, Kosive, a hilokage di aho isivianu.” Ige Iesuu avuho loui avoe, “Di mamoe kebia nalievenela.” ¹⁷ Kateai louito tota belaha moleai avoe, “Dioni mo Saimoni, ana daho isivianu.” Kateai Bitu belaha abuita igaeage Bitau hotove kemo isuanu. Iale kemo au Iesu namihai avoe, “Kosive, a vaveve bahata hilokanu. Iale di aho isiviale ke a hilokanu.” Ige Iesuu avuho loui avoe, “Di mamoe kebia nalievenela.” ¹⁸ Kateai avuho louito namihai avoe, “Seleveta di hoto mole louge evinela. A mohohota ui a ogo vai a isivi matama keve ohanoi tinu. Isito gabie ana a ebika holiniege bae kateai a isivi valivebene. Isito ana a ada hatuge ata molena a ada umudievei a melamei a isiviholiale matama keve tai.” ¹⁹ Iesuu kateai louale keu Bitau hatai Dilava ivi ebagemaveve hotoike au ke lounu. Au kateai avuho louito namihai avoe, “Di ehomai lohonela.”

Bitau Iesu esemu molemo Iesu belahanu.

²⁰ Kateige Bitau hoilahai Iesu uvue esemu ke elehanu. Esemu keike subuta Iesu vavamo ugulamoi namihai avoe, “Kosive, ata olena aho haiai.” ²¹ Iale Bitau hoilahai esemu ke elehai Iesu namihai avoe, “Kosive, a di hatihati hoto ke lounu. Isito ata kona oleve kateai avuta hatai.” ²² Ige Iesuu Bitau loui avoe, “Dana isiviage kena ulage dana tota lohoi. Iale di ehomai lohonela. Ainaho bae ata mole vaveve ke kaovagelive.” ²³ Iesuu hoto louale kemo hoto mole igaau evievi ata bahata sonumavei gabianu. Hoto keu loui avoe, “Esemu keu bae hatilivebene.” Isito Iesuu hoto kateale louholinu. Keu loui avoe, “Dana isiviage kena ulage dana tota lohoi. Iale ainaho ata mole vaveve kaovagelive.”

Hotoe gabi

²⁴ Iesu uvue esemu seleve keike vaveve ko bahata elehai hisalianu. Iale esemu ke daliko. Iale la hilokage di hoto louale keu hoto seleve. ²⁵ Isito di buka komo Iesu hoto bahata hisaliholinu. Iesu keu vaveve moagataho vaevenu. Iale dana ke bahata hisaliage di huhuige auna buka moagamoaga holisi.

Abostolo

Iesuu au Mamae veatiale deiada

¹ Di haoka, Teovilasi. Di isiviai tota deiada mole a haivui. Di subuta Iesuu vatae lohoale ata haivei vale ke hisaliai ahoē hanavonu. ² Iesuu otogoe tiholisito Munanae Tumue vuvunemo au esemu tuelo (12) malevei abu vaveve deiada loui namigevenu. ³ Au hatihatimo hovelahaito vanie ni voti (40) ke uvumo au ebika mai au esemu haivege abu kemo hilokage au hatihatimo hovelahanu. Isi vani moaga abue lohoale Dilava matamae dogae uveve deiada loui haivenu. ⁴ Iniale vani mole abu igaetoai usege au namigevei avoe, “Lainaho Dielusalema halevai tigelive. Isito usege di subuta la namigeveale ke di Mamau bae laovei. ⁵ Dioni ata babatisogevemale keu e unahataike ata babatisogevenu. Isito vani degomoleau uoholisege Munana Tumue vuvunena bae laemo lohoi.”

⁶ Vani mole Iesuu au esemuhi igaetoasege abu belahai avoe, “Kosive, Iselala ata noeau subuta no vata sisihalu. Isito novae vani komo ata nimoleau lohoale no vata ko sisihama. Iale ana valive no kosive holisi no tedaevēge no tota no vata ko mai sisihai.”

⁷ Ige Iesuu namigevei avoe, “Di Mamau au vuvunemo vaveve bahata hilokaevēnu. Isi isiviholiale la namigevege la ke hilokaliho. ⁸ Isito di hoto mole louge evive. Gabie Dilava Munanae Tumuna bae la vuvunetievege lana bae di hotege dua loui Dielusalema o kove, Diudia vatae, Samalia vatae isi vata bahatae kebia haiveve.” ⁹ Kateai louge uoholige esemuiabeau nibisege au otogoe veatisi tinu. Tigeto goeu bamuge abu elehaholilu.

¹⁰ Abu otogomo Iesu nibisege malaha abuitaeau ogo taete holovealeta solekavesite vavaebemo lavisi ua. ¹¹ Isi namigevei avoe, “Galili ataea, la osiohoike ehue nilahama. Iesuu ehue tige la elehale ke nahate auna bae tota dobai lohoi.”

Mataiasiu Diudasi lovo mai Iesu esemu holinu.

¹² Kateige abu Oliveta tana ke halevai hevaluvisi Dielusalemae lohoale keu haeava holioloholinu. ¹³ Kateai lohoale abu subuta o molemo uale kemo ua. Esemu keabulike koea: Bitu, Dioni, Diemisi, Andulu, Bilibi, Tomasi, Batolomi, Matiu, Aloveasi mo Diemisi, Selotie ata Saimoni, isi Diemisi mole mo Diudasi. ¹⁴ Keau bahata negolahaime Dilava imihama. Isege Iesu neina Meli, keate benahate isi Iesu hohuvu kebiau bahata keve Dilava imihama.

¹⁵ Kateimale vanila Bitau hovelahai evievi ata bahata uani handele tuenti (120) haivenu.

¹⁶ Haivei avoe, “Di haokuvuia, bahata evive. Subuta mole Dilava Munanae Tumuu Deividi namihage au Diudasiu Iesu maveve deiada ke lounu. Iale hoto keu nova seleve holinu.

¹⁷ Nahi hilokage keu nahehi Iesu lovi vamale ata mole. ¹⁸ Isito au Iesu male ke ibina malei vata mole voianu. Vata kemoike au dobai hatige gogoveu dikolahage deve holoeau veleholovu. ¹⁹ Ige Dielusalema ataeau evige Diudasiu hatinu. Ige abu matama ke abu hotomo ivihai avoe, ‘Akedama.’ Hoto ke ihuu koseanu. Tahoe matama. ²⁰ Deividu subuta Diudasi deiada Samusi bukamo hisaliai avoe,

‘Valadave kemo atabeu bae ulivebene.’

Isi tota hisaliai avoe,

‘Malaha molena bae lovove mai lovive vai.’

²¹⁻²² Iale nahi malaha mole mage au bae Diudasi lovo mai nahehi igaetoai Iesuu hovelahale hoto ke loui ata haivei. Isito ata ke ebagevaveve keu koseanu. Ata oleu subuta Dioniu Iesu babatisohavoale ke elehai ehomai lohoale Iesuu ehue tiale ke elehai hilokale ata ke nahiabuna ebagevaveve auna Diudasi lovo mai nahehi ui.”

²³ Bitau deiada kateale louge abu malaha abuita ebagevalu. Malaha mole ivilike Diöseba. Isege mole ivilike Mataiasi. Diöseba ivi moleike Basabasi. Isi ivive moleike Diasitasi. ²⁴⁻²⁵ Ige abu guliguliai loui avoe, “Kosive, a abostolo mole Diudasiu a lovi halei hatige a ibinave ominu. Iale no nova lovove malihoke ata abuita kobia tabagevelu. No Kosive, a ata bahatae uvu hilokaevemale alike. Ialelua no haivege no malaha igae ebagevavege au Diudasi lovo mai.” ²⁶ Kateaito ata abuita kebia ivi munemo hisalievei mai mihatuge ole iviu ehumo uale kena Diudasi lovo mai. Abu vaveve ke vage Mataiasi iviu ehumo ua. Ige abu ke ebagevavege keu Iesu abostolo mole holinu.

2

Munanae Tumuu otogomo lohonu.

¹ Iniale vani mole Diue vahaehoe vani mole Bentikosi keu lohonu. Iale vani kemo Iesu esemuiāu bahata bevuai o igaemo ua. ² Igaetoai o kemo usege lulu moleu hanunu ke nahate otogomo luluai lohoale oe uvu ke bahatamo lohoge abu evilu. ³ Isi nilahai elehage

keu venee vedodo ke nahate dobai lohohoi igaegaeai kinaeaberno ui lotinu. ⁴ Vaveve keu Dilava Munanae Tumuike abuemou ui vuvunetievege abu igaegaeai hoto nimoletemo hoto loui lotilu.

⁵ Vani kemo Dilava hoesehavomale Diue ata moagaeau Dielusalemale ua. Keau Dielusalemata ata holioholisito vata bahatamo lohoale eboulahai Dilava hoesehavoma. ⁶ Iale keau luluale ke evisi bibuluvisi o keve lohoaleu o kela velehoovi vikolahalu. Kosealemo keau evige Iesu esemuiau hotoeabe igaegaemo hoto loui lotilu. ⁷ Abu ke evisi vikolahai loui avoe, "Nahi hilokage malaha keau Galili ataeabulike. Keau nahie hoto hilokaholilu. ⁸ Iale oleve kateike abu vai nahie hoto selevemo hoto louma. ⁹ Nahiau o igaegaeai matama nimolete kebiamou loholu. Batia, Media, Elama, Mesobotamia, Diudia, Kadosia, Botasi, Esia vata kebiamou loholu. ¹⁰ Isi Vilisia, Babilia, Egubito, Keliti, Alebia, Libia (Keu Sailini vavae) vata kebiamou loholu. Isege nahi benahateau Loma o baluga kemo loholu. Nahi degomoleau Diue ata seleve. Isege nahi degomoleau Diue ata holioholisito Diue vaveve ke vama. ¹¹ Nahiau vata nimolete kebiamou loholu. Isito nahi malaha kebia hoto evige keau nahie hoto selevemo Dilava vaveve nimolete louma." ¹² Kateai tetelapai mole namigeve avoe, "Osialemoike abu vaveve kateale vama." ¹³ Isi kateige degomoleau helapai loui avoe, "Ba, keau e toela ilike vaimo katelalahu."

Bitau hovelapai Dilava vaveve louma.

¹⁴ Abu kateai louge Bitau abostolo degomolehi hoto ke evilu. Ige Bitau hovelapai baima namigeve avoe, "Diue ata bahataeau Dielusalemamo uale evive. Di isiviale vaveve ko deiaa loui la namigeve. ¹⁵ La huhuige no e toela ilu. Isito keu hoto seleve holioholinu. Elehave. Vau aike alamonu. Iale la huhuige atabena valive vavita vavita e toela isi. Ba. ¹⁶ Isito beloveta Dioelau subuta mole hisaliale keike esemu koeau aike vama. ¹⁷ Dioelau hisaliale hoto keu koeanu.

'Dilavau avoe, Dana vanie gabila di Munanae Tumou hanavoge auna dobai lohohoi la bahata vuvunetievege la esebuna ono vadeu gabie lohoveve ke loui ata namigeve.

Isege la atae doge keabuna lahoahoai.

Isege la malaha kosive keabuna tababu nimolete elegeve.

¹⁸ Ige Munana Tumutena dobai lohohoi di esemu bahata negotievege malaha keate bahataebuna ono vadeu gabie lohoveve hoto ke loui ata namigeve.

¹⁹⁻²⁰ Ige dana vaveve nimolete otogomo hanavege vanina loasege batana tahoai.

Isege heie vate kove taho, vene isi dio balugana ui.

Keau kateisege iave keve Kosive vani balugana bae lohohoi.

²¹ Vaveve katealeu velemage oleuleu Kosive ivimo Dilava imihage auna kebia malevei.'

²² Iselala ataea, di hoto evive. Iesu keu Nasaleta omo lohoge Dilavau tedahoge au vuvunevemo vaveve nimolete vai vikoe vaveve nimoleta vaevenu. Iale au vadeu vale ke la elehai hilokalu. ²³ Isito la isiviale hamage au hatisi. Isi kateai mai atae toela ovege abu mai idie domo hamage au hatinu. Isito subuta mole Dilavau au lulemo la vaveve ke hilokai loui avoe, Abuna katelapai. Ialeike la ke valu. ²⁴ Iesuu vatehani mai hatiale kemo Dilavau etuvage au hovelahanu. Kosealemo hatihati ke vuvuneu mage au gulimo uveve keu anekianu. ²⁵ Deividu subuta Samusi bukamo Iesu vaveve koseale hisalianu. Avoe, 'Di hilokage Kosive vani bahata daiti uma.

Keu di vavamo umalemo vaveve isutena daemo lohoge di bae kemo doalivebene.

²⁶ Ialemo di uvuu vahaeho balugage di Dilava hoesehavoveve hoto louma.

Di hilokage dana hatige auna tota di etuvai.

²⁷ Iale di hatige au bae di munana halege au bae odavae ulivebene.

Isi au bae au esemu tumute ke halege au bae gulimo ui sakalivebene.

²⁸ Au ukolikolie humaha di haivui vani bahata daiti uge di kemo vahaeho baluganu.'

²⁹ Di haokuvuia, di isiviale nahie buluve Deividi ke deiaa louge avuemo lulelelahave. Keu subuta mole hatige abu mai abavulu. Iale vutave keu nova avulike ua. ³⁰ Deividi keu Dilava beloveta holisi hilokage Dilavana au ono vade louale ke vai. Au Deividi namiapai avoe,

'Dana aemo a valada mole mage auna kosive holisi telonamo ugulamo.'

³¹ Ige Deividu ke evisi Dilavau gabie vaveve hilokai Kelisou hovelahaveve kemo loui avoe, 'Au hatige Dilavau bae munanave halege au bae odavae ulivebene.

Isi gulimo halege au bae ui sakalivebene.'

³² Hoto kateale loualemo Dilavau etuvage hovelahage no ke elehalu. ³³ Dilavau Iesu ebagamai au ada inuteve mamoi au louale ke nahate au Munana Tumute omige au Munanae Tumou noevege no vuvunevemo hoto ke louge la evilu. ³⁴ Deividu Iesuu vale ke nahate vai ehue tioholinu. Isito keu subuta loui avoe, 'Dilavau di Kosiveho loui avoe, Di ada inuteve ugulamonea.

³⁵ Isege di a aihavomale kebia malevei a veloe heimo otovege Kosiveabe holinela.'

³⁶ Iselala ata bahataea, hoto ko evive. La Iesu mai idie domo hamale keike Dilavau etuvage hovelahai Kosive holisi a tedaeveve ata Keliso holinu."

³⁷ Bitau hoto kateale louge abu ke evisi huhube nimole valu. Isi kateai Bitata abostolo degomoleta namigeveve avoe, "No haokuvuia, noeabuna vadeu vai." ³⁸ Ige Bitau namigeveve avoe, "La bahata la vaveve toela vamale ke halevave. Isime Iesu Keliso ivimo babatisoage Dilavana la vaveve toela ke ulihai au Munanae Tumu laovei. ³⁹ Dilavau isiviale au Munanae Tumu laovei la ese ovei olemeau haeavamole ui Dilava hoto eviale kebiata ovei." ⁴⁰ Bitau hoto ke loui hoto degomoleta loui namigeveve avoe, "Nova vata komo ataeau vaveve toela vage Dilavana ibinaeabe ovei. Iale kemo hoidevege Dilavana la malevei." ⁴¹ Kateai louge vani kemo ata moagaeau deiada ke evisi abu uvu mai avuemo mavoi babatistolahalau. Ata bahata tili taoseni (3,000) keau babatistolahai Iesu esemuhi igaetolahalau. ⁴² Isi vani bahata abuhi igaetolahai abostoloeau louale ke evisi negolahai gulgulilahai aleto isi Dilava hoesehavolu.

Evievi atae vaveve

⁴³ Abostolo ata keau vikoe vaveve isi vaveve nimolete vaveve ataeau ke elehai vikolahalu. ⁴⁴ Ata oleuoleu abu uvu mai Iesu omiale keau igaetoai lohoi Dilava hoesehavoi abu kunai bahata tasalievei mole ovelu. ⁴⁵ Isi abu vata abu kunai voivei moniabe malei kemo kunaiholimale kebia ovema. ⁴⁶ Abuna vani bahata abu dubu balugae tiliege igaetolahaime gulgulilahagei. Isime oe tiliege igaetolahaime lovi isi vahaeholahi mole tedaevegei. ⁴⁷ Keau katelahai Dilava hoesehavoge ata degomoleau ke elehai vahaehoabe vai Kosive hoto evige au kebia malevege abu Iesu esemuhi igaetoalu.

3

Bitau malaha mole velo golote hoesehavonu.

¹ Gutu mole tili (3) okolokimo Bitau Dioniti Diue dubu balugae gulgulihio tilu. ² Tiliale keau dubu balugae velehovoi ata mole velo golote elehage au abu dubue udaha mole ivihai avoe Udahe Dua kemo ugulamoi uma. Malaha ke neinaveu mamoge velove keau golohovoalelua ataeabuna ke ebavoi loholiege udaha kemo mavoge olemeau dubu kemo tai lohomale kebiama auna moniho imigevegei. ³ Iniale Bitau Dioniti dubu ke uvue tisege malaha keu moniho imigevenu. ⁴ Ige abu ke nibitumuage Bitau avuho loui avoe, "No niavenela." ⁵ Ige au niavei huhuai avoe, "Mesoho koeabuna monibe daovai." ⁶ Ige Bitau avuho loui avoe, "Dau monioholinu. Isito dana di mai lohoale ko mai aoi. Nasaleta malaha Iesu Keliso ke ivimo di a namihama. Hovelahai laminela." ⁷ Kateaito adave inutela holisi ebagemage solekavesite malaha ke veloeau negolahalu. ⁸ Ige au hovelahai vitoi lamisi oanu. Isi abuhi iaabela vitovitoai dubue Dilava hoesehavoliho tilu. ⁹ Malaha keu kateai Dilava hoesehavoi tige ata bahata keau ke elehalu. ¹⁰ Ke elehai hilokage malaha neheu dubue udahamo ugulamoi moniho ata imigevemale keike. Ke elehai ono vadeu avuemo velemaale kemo vikolahai tetelahalu.

Bitau dubumo ata haivema.

¹¹ Malaha nehe keu Bitata Dionita vudievei vahaehoabe vasege ata bahataeau igaetoai bibuluvisi tiale dubu ke hedaka abu ivihai avoe Solomoni keve malaha ke elehaho tilu. Keau malaha nehe ke elehai vikolahai tetelahalu. ¹² Ige Bitau ata kebia elegeveve abuhu loui avoe, "Iselala ataea, osiohoike la vikolahai no nibieve tumuima. La huhuige noeabuna no vuvunemo mesoho no vavevemoike malaha ke hoesehavoge au oai tima. ¹³ Dilava keu subuta nahie buluve Ebalahamu, Aisiki isi Diekobo kebia Dilava. Iale keike au esemu Iesu ebagemai vuvune omige no vuvunevemoike vaveve ke valu. Isito la Iesu ke mai gamani kosive Bailoti omige au isiviale iomage au tai. Isito la kabebihavoi avuho isiviholilu. ¹⁴ Keu ata tumute isi inutolotolote ata. Isito laeau avuho isiviholisi mai Bailoti omilu. Isi namihage au Iesu iomaholisito ata havemale ke iomanu. ¹⁵ La vaveve kateale vai gibosoune Kosive ke hamalu. Isito Dilavau hatihatimo etuvage hovelahanu. Iale noeau au hatai hovelahale ke elehale noeabulike koea. ¹⁶ No Iesu ivimo velo golote ke namihage au Iesu vuvunemo hovelahanu. No no uvu mai Iesuemo mavoalemoike malaha ke hoesehavoge au hovelahage la elehalu.

¹⁷ "Di haokuvuia, di hilokage la la kosivehi dolodololahalemoike Iesuemo vaveve ke valu. ¹⁸ Dilavau subuta au beloveta namigevege abu hisaliai avoe, 'Dilavana Keliso hanavoge auna vatehani malei.' Iale ke nahateike Iesuu mai selevetinu. ¹⁹ Katealemo nova la vaveve toela ke halevai hoideveve lohoge Dilavana la vaveve toela ke ulihai la negotievege lana bae vuvunevemo ue dua vave. ²⁰ Ige auna la tedaevemale kosive Iesu hanavoge auna tota dobai lohoi. ²¹ Isito Iesuu nova otogoe uale auna gabie dobai

lohoniage vata ko mai duatige auna subuta uale ke nahate vai. Dilavau hotoe deiada kateale au beloveta tumute kebiaho subuta louale kena bae lohoi. ²² Beloveta mole Moseseu subuta loui avoe, 'Dilavana bae di hanavoale ko nahate laheho beloveta mole hanavoi. Beloveta kena la valadamo lohoi hoto louge hotove bahata evive. ²³ Iale oleme abuna beloveta ke hoto evioholige Dilavana tasalievei havege abu uoholisi.' ²⁴ Hoto ke igae Samuelau hisaliage beloveta degomoleau iave lohoale kebiata hisaliai novae vanimo vemale ke loulu. ²⁵ Nahiau beloveta kebia valada. Iale nahiau kebia ese nahate. Subuta Dilavau au beloveta namigeveale hoto keu aike laemo lohonu. Dilavau vasohuta hoto ke loui Ebalahamu namihai avoe, 'A valada kemo dana ata bahata hoesegevei.' Dilavau hoto kateale loui mamoaale keu aike laemo lohonu. ²⁶ Dilavau au mo Iesu hanavoge au vasohuta dobai lae lohoi isiviale la bahata hoesegevege la vaveve toela ke halevai hoidevei avue lohoi."

4

Diue kosiveau Bitata Dionita malevei kotalahalu.

¹ Kateai lousege dubue kosive, dubu nalimale bukate igae, isi Sadukea ata degomole keau abue lohohu. ² Lohoale itumulahalu. Kosealemo Bitau Dioniti hotoe deiada loui ata haivei avoe, "Iesuu hatai hovelahale kemo nahiabuna hoveveve." ³ Hoto katealemo abu malevei dibulaa otovelu. Gutumoike abu malevei bamuevege abu vavimo keve ladevelu. ⁴ Isito ata bahata vai taoseni (5,000) keau hotoe dua ke evisi abu uvu malei Iesu omilu.

⁵ Iniale vani mole Diue dubue kosivea, oe kosivea isi Diue menaka loui hisaliamale keau Dielusalemae igaetoai lohohu. ⁶ Lohoale keau dubue kosive baluga Anasi isi esemuve degomole kebiatamo lohohu. Esemuiabe kebia ivilike koea: Kaiabasi, Dioni, Aleksisanda. ⁷ Iale keau Bitata Dionita malevei lohoi abu vigomo otovei belagevei avoe, "Ole vuvuneta ole ivitamoike la vaveve ke valu." ⁸ Ige Bitau Munanae Tumue vuvunemo namigevei avoe, "Dubue kosivea isi oe kosivea, di hoto ko evive. ⁹ Lana vaveve dua no velo golotemo vale kehonike no belagevema. Lana isiviai hilokai oleve kateike no vai ke hoesehavolu. ¹⁰ Keta duave. Di isiviale la namigevege la bahata hilokave. La louike vage abu Nasaleta malaha ke mai idie domo hamage au hatige abu mai gulialu. Isito Dilavau tota etuvage Iesuu tota hovelahanu. Iale vuvunemoike velo golote keu momoleai lamisi oanu. ¹¹ Iale di hoto mole louge evive. Bukae Hotou Iesu vaveve ke loui loui avoe, 'Laeau o mole hoomale ata kebia nahate.

La o hoveve mune ke kabebihavoale keike nova Dilava o hadebiveve mune dua holinu.' ¹² Iale avu igaemo nehane ukolikoli maleve. Heie vata kove vuvuneve ke nahatebu uoholinu. Isito vive ke igaemo nahiabuna ukolikoli malei."

¹³ Kateai louge Diue kosive keu ke evisi vikolahi huhuige malaha keu sikuluholialea. Isito luleleabe kemo abu elehage keau Iesu esemuia. ¹⁴ Kateai isiviale abuhu hoto loui. Isito abu elehage malaha nehe veloveu duaveale keu Bitame Dionimehi lamisi ua. ¹⁵ Kateige kosive keau Bitata Dionita hanavege abu heie usege abu unaha abu moletahi hotohotolahama. ¹⁶ Hotohotolahai mole namigevei avoe, "Nahiabuna malaha kebia ono vade igae vai. Kosealemo ata bahataeau Dielusalemae umale keu hilokage keu vikoe vaveve balugatahoike abu ke valu. Iale nahi bae kemo hotobe loulivebene. ¹⁷ Katealelua nahi ata kebia keluevege abu lako tota atabeho Iesu ivimo vuvune vaveve vale ke louliveve."

¹⁸ Kateai louito Bitata Dionita hohavege abu lohoge keu isuta namigevei avoe, "Lainaho bae tota Iesu ivimo hotobehame loui ata haivegeve." ¹⁹ Isito Bitau Dioniti namigevei avoe, "La biaeau Dilava nimo ko huhulahave. Noeabuna la hoto evisi. Emena Dilava hoto evisi. ²⁰ Isito no Iesu elehai hotove evialemo no bae ata haivevege ke halevalivebene." ²¹ Kateai louge Diue kosive keu isiviale banisigevei. Isito abu elehage ataeau velo golotemo vaveve dua ke elehai Dilava hoesehavoma. Katealemo abu banisigeveve humahau uoholige abu isuta namigevei avoe, "Lainaho bae tota gabie hoto ke lou molealive." Kateaito iovege abu tilu. ²² Malaha nehe abu hoesehavoale ke vagana mesoho voti (40) ke nahate.

Evievi ataeau guliguliage hamuu hatunu.

²³ Bitau Dioniti halevai tialeau kosive keau abuhu louale ke loui evievi ata namigevelu. ²⁴ Ige keau ke evisi igaetoai Dilava imihai avoe, "No Kosive, au vuvunete. Au otogo vai vata vai e vai avuemo onobenobe vaveve otovenu. ²⁵ Subuta mole a a Munana Tumute hanavoge au tiale no buluve Deividi ke negotige au loui avoe, 'Osiohoike Dilava hoto evioholimale keu itumulahalu. Isi osiohoike ata keau huhuihuhi toela ke huhu kavalu.

²⁶ Vatae kosiveau isiviale hovevevei mole bevuevei igaetoai Dilavau au mo hanavoale ke hamai.’

²⁷ Deividu subuta louale keu seleve. Iale nova o komo kosive Elodi, kosive mole Botiasi Bailoti, Diue ata holioholialea, isi Diue ata degomole keau bahata mole bevuevei a a esemu tumute Iesu ebagemai hanavoale ke hamage hatinu. ²⁸ Keau mole bevuevei vaveve ke vage a a vuvunemo vasohuta hilokage abuna ke vai. Iale a isivimoike abu ke valu. ²⁹ No Kosive, abu nova noheho isuta louale ke evinela. Noeau a esemu. Iale a nego noevege no vabu halevaito a hoto loui ata namigevei. ³⁰ Isime a vuvune hanavoge no a esemu tumute Iesu ke ivimo vavahanite ata hoesegevei vaveve nimoleleta vavei.” ³¹ Guliguli keu uoholisege abu igaetoai guliguliale o keu hadanu. Ige Munana Tumuteu kebiamo lohohi malevei negotiegege abu vabuoholisito tilialeau Dilava hoto loulu.

Evievi atae onobenobe keau igae

³² Vani kemo Iesu esemu bahata keau huhuihuhui igae isi uvu igae. Kunaite keau koseale louholilu. Kunai koeau noele. Isito abu kunai ke igaegaeai mole ovelu. ³³ Ige abostolo ata keau negolahai Iesuu hatisi hovelahale ke loui ata haivege Dilavau kebia bahata hoesegevenu. ³⁴ Ige keau bahata kunai maleale mole nahate unaha. Kosealemo ata kebiau abu vata abu o kebia voivevei ibinaeabe malei lohohu. ³⁵ Malei lohoale abostolo kebia ovege abu malei kunaiholimale kebia ovelu. ³⁶⁻³⁷ Ke nahate malaha mole Dioseba keu Livai malaha. Keu Saibalasi vata keve uniale au vata voiai ke ibina malei lohoale abostolo kebia ovenu. Ige abostolo keau ivihai avoe Banabasi. Ivi ke ihuu koseanu. Ata negotievemale ata.

5

Ananiasu isi Sabaela

¹ Malaha mole Ananiasu abu keate Sabaelati abu vata voiale ke ibina malelu. ² Isi ke malei mole namigevei avoe, “Nahi ibinave vaki molehame ovei. Isi vaki mole nahie ebikaho otovei.” Kateige Ananiasu moni ke vaki mole mai lohoaleu abostolo ovei loboe hoto loui namigevei avoe, “Vatae ibina avuhameike ko.” ³ Kateai louge Bitau avuho loui avoe, “Ananiasu, onoleike a ko vanu. Seteneu a uvumo lohohi vage a moni degomole a ebikaho otoveito Munana Tumute lobohavoi loui koseanu. Moni bahataike ko. ⁴ Subuta a vata ke voioholisege vata keu a vata. Isi gabie a ke voiage keu a moni. Iale a osiohoike hoto kateale lounu. A no igae lobogeveholisito Dilavataike a ke lobohavonu.” ⁵ Kateisege Ananiasu ke evisi lokilahi dobai hatinu. Kateige ata bahataeau ke evisi vabulalahu. ⁶ Kateige ata degomoleau ogo malei lohohi viliai ebavoi mai tiliale heie gulialu.

⁷ Iniale gutumo Ananiasu keateu lohohu. Isito keate keu onoleu koliaavemo velemale ke hilokaholinu. ⁸ Ige Bitau keate keho loui avoe, “Lobo haleito di namihanela. La vata ke ibina bahatanike ko.” Ige keate keu namihai avoe, “Ito bahataike ke.” ⁹ Ige Bitau avuho loui avoe, “Osiohoike a a koliatu isiviale Dilava Munana Tumuhavoi. Evine. Malaha keau a kolia mai guliale abulike aike udahamo lohoma. Iale abuna aike ata ebavoi tai.” ¹⁰ Isi kateisege solekavesite keate keu velove heimo lokilahi dobai hatinu. Ige malaha nehe keu lohoale keate nehe ke elehage hatige abu ebavoi mai heie tiale koliaaveta havaisi gulialu. ¹¹ Ige ekalesia bahata isi ata degomole keau ke evisime vabulalahu.

Iesu abostoloau vikoe vaveve moaga vaevelu.

¹² Vani kateimalela abostolo tuelo (12) keau vikoe vaveve nimolete moaga vavevege ataeau kebia elegevelu. Evievi ata kebiau bahata Diue dubu balugae hedaka Solomoni keve mole bevuevei igaetoai uma. ¹³ Isege evievi ata holioholiale keau evievi ata vabugevei isiviholilu abue lohohi. ¹⁴ Ige ata moagamoagaeau hoto ke evisi abu uvu mai Iesuemo mavoi mole bevuevei igaetoalu. ¹⁵ Ige abostolo keau vikoe vaveve vasege ataeau vavahanite kebia malevei lohoale heie humahamo ava tedisi kemo otovei huhuai avoe, “No kateige Bitau munanau haidolevege abu momolelahai.” ¹⁶ Kateige ata moagaeau abu o halevei o baluga Dielusalemale lohohi vavahaniamale ata kebia isi munanae toelau uvuiaabe holoeavomale kebiata holoevei lohohu. Ige abostolo keau kebia bahata hoesegevelu.

¹⁷ Abostolo keau kateige dubue kosive baluga keu au haokuvu Sadukeahi ke elehai mainaeabe mai ilu. ¹⁸ Isi kateai kebia malevei tilialeau dibulae otovelu. ¹⁹ Isito vavi kemo Dilavau au anelu mole hanavoge au tiale keu dibulae udaha alavoi kebia hanavege abu heie tilu. ²⁰ Isi namigevei avoe, “Talive dubue uvue lavisi ukolikolie hoto loui ata namigeveve.” ²¹ Kateai louge abu ke evisi tilu. Tilialeau vavita vau alamoge abu lohohi dubue uvue ata haivesege dubue kosive baluga keu au haokuvuhi Diue kosive bahata hohavege abu lohoale hotohotolalahu. Isi bukate hanavege abu dibulae abostolo

maleliho tilu. ²² Tiale keau dibulae velehovoi abostolo kaovege uoholige abu hoidevei lohoaleau kosive kebia namigevelu. ²³ Namigevei avoe, “No velehovoge udaha keu bamusege udaha nalimale keau heie lavisi ua. Isito no udaha alavoi uvuue tige ataeau uoholilu. ²⁴ Kateige dubue kosive isi bukate kebia kosive keau hoto ke evisi vikolalahu. Isi dolodololahi avoe, “Abostolo keau oleve katelalahu.” ²⁵ Kateisege malaha moleu lohoaleu namigevei avoe, “Di la namigevege evive. La malaha nehebia malevei dibulae otoveale kebia aike dubue uvue ata haivema.” ²⁶ Isi kateige bukate kebia balugau au esemu holoevei Iesu esemu malevelihio tilu. Tiliiale keau baita abuhu louholisi haveholilu. Kosealemo abu huhulahi avoe, “Noeabuna kobia havege ataeabuna mune malei nohavei.”

²⁷ Isi kateai abostolo kebia malevei dubue kosive kebia vudimo otovelu. Ige dubue kosive baluga keu hovelahi belagevenu. ²⁸ Belagevei avoe, “Lana no hoto evilu. No subuta la namigevei loui kosea, ‘Lainaho bae tota Iesu ivimo deiada loui ata haivegelive.’ Isito la nova hoto ke loui Dielusalemata bahata kebia namigevema. Isi la isiviale no vavamo lololahi loui kosea, ‘Keabulike Iesu hamalu.’” ²⁹ Ige Bitau esemu benahatehi abuhu loui avoe, “Seleveta no bae atabe hoto evilivebene. Isito noeabuna Dilava hoto unaha evisi. ³⁰ La Iesu mai idie domo hamage au hatige abu mai gulialu. Ige nahie buluvebia Dilava keu etuavege hovelahanu. ³¹ Isi mai au ada inuteve mamoge Iesu kosive baluga holisi ata tedaeveveve ata holinu. Iale Iselala ataeabuna abu vaveve tola halevage Kosivena vaveveabe tola ulihai hoesegevei. ³² Keike Munana Tumuteu no haivege no ke hilokai ata haivema. Iale oleuleu Dilava hoto evige auna au Munanae Tumu ovei.”

³³ Abostolo keau kateai lousege Diue kosiveau ke evisi itumulahi isiviale kebia havei. ³⁴ Isito Balisia malaha mole baluga Gameliela keu isiviale hovelahi hoto loui. Malaha keu Diue menaka bahatamo lulele selevanu. Isi malaha ke ata bahataeiu eahalema. Iale keu abostolo kebia hanavege abu heie tilu. ³⁵ Isi Diue kosive kebia namigevei avoe, “Iselala ataea, huhuihuhue dua vaito bae gabie abostolo kebia aiogeveve. ³⁶ La hilokage subuta vagana mole malaha tola Teodasi keu au ebika ebagemage ata moaga mesoho voa handele (400) keau igaetoai ehovalu. Abu isivialeike gamani aiohavoi. Isito gabie gamaniu Teodasi hamage hatige esemuiabe keu bahata vabulahi detuluvisi igaegaealu. ³⁷ Isi vani moleike gamaniu atae ivi dodavemale ke vanila Galili malaha mole Diudasi keu hovelahi ata moaga holoevei isiviale talive gamani aiohavoi. Isito gamaniu ke hamage hatige esemuiabeu detuluvisi igaegaealu. ³⁸ Iale katealemo di hoto onole louge evive. Lainaho bae malaha kebia havegelive. Isito hanavege abu tai. Kosealemo abuna abu negomo vaveve kateale valiege solekavesite uoholisi. ³⁹ Isito abuna Dilava vuvunemo vaveve kateale vage lana bae oleve kateai kebia havei aiogevei. Mesoho lana vaveve kateale valiege bae Dilava aiohavove.”

⁴⁰ Malaha keu kateai louge kebiau hotove ke evisi Iesu esemu kebia hohavege abu lohoge visugevei hanavei loui avoe, “Lainaho bae tota Iesu hoto loui ata haivegelive.”

⁴¹ Kateige esemu kebiau Diue kosive kebia halevei vahaeholahi tilu. Kosealemo kebiau Iesu ivimo vatehani malege Dilavau ke elehai kebia eahalegevenu. ⁴² Isi kateai vani bahata abu dubue isi oe timale hotoe dua loui ata haivei avoe, “Iesu keu ata tedaevemale kosive Keliso.”

6

Abu ata seveni (7) tabagevelu.

¹ Vani kateimalela ata moageau hoto ke evisi abu uvu mai Iesuemo mavolu. Isege vani mole Gilikie hoto loumale keau Diue hoto loumale kebiahi moleho louma. Giliki ata keau loui avoe, “Vani bahata no gobuvu keabuna loholiege lovie esehame malegei. Isito Diue gobuvu keabuna loholiege lovi baluga malegei.” ² Ige abostolo keau hoto ke evisi esemu kebia bahata hohavei abuhu loui avoe, “La huhuige noeabuna Dilava hoto ke loui ata haivevege ke halevai ata oveveve lovi unaha hoesehavoi. Ba, kateale keu tolanu. ³ Di haokuvuia, nahie vigomo malaha seveni (7) tabagevege elike keau ata oveveve lovi ko nalisi. Isito malaha lulelete isi Dilava Munanae Tumuu negotievemale kebia tabageveve. ⁴ Isege noeabuna vani bahata guliguliai ata haivegei.” ⁵ Kateai louge esemu benahateau loui avoe, “Keu duave.” Isi kateai vasohuta Sitiveni ebagevalu. Keu au evievimo negoige Munanae Tumuu mai negotinu. Isi Bilibi ebagevai Bokolasi, Nikano, Timoni, Bamenasi, tabagevei gabiabela Antioka malaha mole Nikolasi ke ebagevalu. Nikolasi keu Diue ata holioholisito gabieike au vaveveabe manu. ⁶ Kateai malaha seveni (7) kebia malevei lohoge abostolo keau abu ada malei tataeaberno otovei abuhu guligulilalahu.

⁷ Keau kateige Dilava hotou Dielusalemæ tai balugage ata moagaeau hoto ke evisi abu uvu mai Iesuemo mavolu. Ige Diue dubue kosive moagaeau hoto ke evisi abuta Iesu ehovalu.

Abu Sitiveni male deiada

⁸ Dilavau malaha nehe Sitiveni hoesehavoi vuvune omige au kemo vaveve nimolete isi vikoe vaveve moaga atae vigomo vaevunu. ⁹ Kebia vavevege Diue dubu mole Libetini ata degomole keau hotove hamalu. Abu kateige Salini ata degomole, Aleksandhia ata degomole, Silisia ata degomole, isi Esia ata degomole keau bahata igaetoai itumulahai isiviale Sitiveni hoto hamai. ¹⁰ Isito Munanae Tumuu Sitiveni negotige au lulelevemo hotoe dua unaha loui hotoeabe lobo ke hamanu. ¹¹ Kateige abu tiale malahæ toela kaovei malevei loholu. Ige ata keau lololahai avoe, “No evige malaha kou vani bahata Mosese menaka isi Dilava ivi aiohavoma.” ¹² Isi kateai louge Diue ataeau ke evisi itumulahalu. Ige Diue kosive isi Diue menaka loui hisaliamale keau lohoale Sitiveni evudei melavei kotaho tilu. ¹³ Isi tota malahæ toela kebia kaovei holoovei lohoge abu loui avoe, “Malaha keike Sitiveni keu vani bahata nahie dubu isi Mosese menaka kemo hotoe toela louma. ¹⁴ No evisige au loui avoe, ‘Nasaleta malaha Iesu kena nahie dubu koiai hatui. Isi Moseseu menaka tumu mai nahie buluve oveale keta aiohavoge auna uoholisi.’” ¹⁵ Abu hoto kateale lousege Diue kosive keau Sitiveni niavosege niveu atagale anelue ni ke nahate.

7

Sitiveniu Diue kosive vudimo au deiada louma.

¹ Ige dubue kosive baluga keu Sitiveni belahai avoe, “Abu a vavamo loumale kena selevenike.” ² Ige Sitiveniu namihai avoe, “Usege di hoto mole loui. Di ataea, di haokuvuia, la bahata di hoto gaehavove. Subuta mole nahie buluve Ebalahamu keu sohu Mesobotamiae ui Halani vatae tiholisege otogoe umale Dilava keu dobai lohoi avuho lounu. ³ Avuho loui avoe, ‘A ata, a vata kebia halevei tenela. Dana vata moleve a hanavoge keve te.’ ⁴ Kateai louge Ebalahamuu au vata Kalidia ke halei tiale Halani vatamo uniale mamaveu hatige Dilavau louge au Iselala vata kove lohonu. ⁵ Vani kateimalela Dilavau vatabe mai Ebalahamu omioholinu. Isito au louale auna bae gabie avuho vata ke mai omisi. Iale Dilavau louale Ebalahamu valadaeabuna bae vata ke mai. Isito vani kela Ebalahamuu eseholilike vasege Dilavau avuho hoto ke lounu. ⁶ Isi avuho loui avoe, ‘A valadaeabuna bae vagana voa handele (400) ke uvumo vata nimoleteve uliege ata kebiaho lolilahai vatehanei baluga malegei. ⁷ Vagana kateale abuna uoholige oleteau a valada kebiamo vaveve toela vage dana toelaebe ibina ovege a valada keabuna loholiege kove di hoesehavoi.’ ⁸ Dilavau kateai louito vaveve nimolete Ebalahamu haivui isiviale au au moe vudie vate etulelive kemo vani bahata Dilavau avuho hoto loui mamoaale ke huhuigei. Iniale gabie move Aisikiu uge bula igave uoholisege mamaveu vudie vate etulenu. Ige gabie Aisikiu au mo Diekobomo vaveve kateale vanu. Ige Diekobou au ese tuelo (12) kebiamo avuta vaveve kateale vanu. Iale ese kebiamoike nahie umukau lohonu.

⁹ “Diekobo ese degomole keau abu hoho Dioseba ke maina mai isi maime ata degomolemo voilahage abu mai Egubitoe tilu. Isito Dilavau keve avuti ua. ¹⁰ Ige vaveve toelau avuemo lohoge Dilavau hoesehavoi avuti uniale vani mole Diosebau Belo nimo lamige Dilavau au lulele mai omige au kosive kemo vaveve dua unaha vage au vahaehove vanu. Katealemoike Belou Dioseba mamoge au Egubitoe ata bahata nibievei ovemo atave kebiata nibievema. ¹¹ Iniale vani mole Egubito isi Keinani vata kebiamo vae balugatahou lohoge ataeau vaeho ue toela valu. Kateige nahie buluve kebiata vaelahalu. ¹² Ige Diekobou loviu Egubitoe uale ke evisi au ese hanavege abu lovi maleliho tilu. ¹³ Iniale tota vani mole maleliho tige Diosebau bae au ebika mai au nanuvu haivege Belou avuta bae kemo malaha kebia hilokaevunu. ¹⁴ Ige Diosebau au mama Diekoboho hoto hanavoi loui avoe, ‘A ese bahata holoovei kove loho.’ ¹⁵ Kateai louge Diekobou au ata bahata seveniti vai (75) kebia holoovei Egubitoe tiale keve uniale hatige eseabeta keve haluvilu. ¹⁶ Haluvisege eseabeau kakavei lohoale Ebalahamuu subuta Hamu ese kebiamo vata mole Sekamu ke ibina valemome gulievelu.

¹⁷ “Iniale gabie vagana moagaeau uoholige Dilavau subuta Ebalahamuhu hoto loui mamoaale ke vaniu lohoge Egubitoe umale ata keau moagatahou selevelu. ¹⁸ Vani kela kosive moleu Dioseba hilokaholiale keu Egubitoe ata kebia nalievema. ¹⁹ Kosive keu nahie buluve lobovevei loui avoe, ‘La eseau uge botoe halevege abu haluvisi.’ ²⁰ Vani kela ese mole dua Moseseu ua. Ese keu uge abu mai oe uvue mahogovalu. ²¹ Ige bata abuita igaetaeau uoholige mahogovaveve humahau uoholige abu mai botoe meavolu. Isege Belo mau tiale ese ke elehai mai au ebiaho lohoi au ese toanu. ²² Isi louge Egubitoe lulelete ata keau Mosese haivuge au vaveveabemo lulelei ata baluga holisi negoe vaveve vanu.

²³ “Iniale vagana votiu uoholige vagana molemo Moseseu isiviale talive au ata seleve elegevei. ²⁴ Isi tiniale Egubitoe ata mole elehasege keu Iselala ata mole hamai aiohavoma. Ige Moseseu au ata ke tedahoi Egubitoe ata ke hamage hatinu. ²⁵ Moseseu kateaito huhuai avoe, ‘Di kateige Iselala ataeabuna hilokage Dilavau di hanavoale dana kebia holoavei Egubito halei tai.’ Isito ata kebiau Moseseu huhuale ke hilokaholilu. ²⁶ Iniale vani mole au oai tisege Iselala malaha abuiuu mole havema. Ige au tiale elegevei keluevei abuhu loui avoe, ‘Di haokuvuia, di hoto evive. La keau avui igaealelua lainaho mole havegelive.’ ²⁷ Kateai louge malaha neheu au haokamo vaveve toela vale keu Mosese kabitisii avuho loui avoe, ‘Ana no kosive hollilike vaniale no keluevei no vavevemo hoto louma. ²⁸ Ani, a isiviai nivu Egubitoe ata hamale ke nahate dahamolihioke.’ ²⁹ Kateai louge Moseseu ke evisi Egubito halei detitisi tialeu Midianie ua. Keve uniale mahinai mo abuita houevenu.

³⁰ “Moseseu vata keve uale vagana votiu uoholige tomagie tiale tana mole baluga Sainai keve velemanu. Keve velemage anelu moleu avue lohoniale keu idiu lahai haetohaetoale kemo ua. ³¹ Ige Moseseu ke elehai vikoame isiviai talive vuguta neniai elehai. Kateai tialeu vavavemo lamisege Dilavau avuho hoto mole lounu. ³² Isi loui avoe, ‘Dau a buluve kebia Dilava. Ebalahamu Dilava, Aisiki Dilava, isi Diekobo Dilava dalike ko.’ Kateai lousege Moseseu vabuai teteai isiviholinu ke elehalihio. ³³ Kateige Dilavau avuho loui avoe, ‘A veloe vate ke tohoanela. Kosealemo a matama kemo lamiale keu vatae tumu. ³⁴ Di hilokage Egubitoe ata keau di ata aiogevege keau vatetumu malei kekolahage di ke evisi tadeaveho dobai lohonu. Iale lohoge di a hanavoage Egubitoe tenela.’

³⁵ “Dilavau kateai louge Moseseu halei tiale Iselala ata namigevege abu keho isiviholisi loui avoe, ‘Ana no kosive hollilike vaniale no nibieveho louma.’ Isito Dilavaike Mosese mai negotige au tiale au ata nibievenu. Au kateisege anelu nehe idiu lahale keve uale keike Mosese tedahonu. ³⁶ Iale kemoike au vikoe vaveve vavevei au ata holoavei Egubito halei tiale E Tahote kemo tota vikoe vaveve moleta vai tota tiale tomagie vikoe vaveve nimolete vaevenu. Kateale valage vagana votiu (40) uoholinu. ³⁷ Mosese keike Iselala ata namigevevei avoe, ‘Dilavana di hanavoale ko nahate bae beloveta mole hanavoi. Ige kena bae la vigomo lamisi la tadeavei.’ ³⁸ Mosese keike Iselala ata holoavei abuhi tomagie ua. Isege nahie buluve keau heie usege au Sainai tanae tiale anelue hoto evinu. Anelu keu ukolikolie hoto louge nahie buluve keau ke evisi hisaliage keike nahita nova evilu.

³⁹ “Nahie buluveau isiviholilu hoto ke maliho. Isito isiviale Mosese halevai hoidevei tota Egubitoe tai. ⁴⁰ Isi kateai Eloni namihai avoe, ‘Noheho dilava mole vage auna noheho uli holisi tai. Kosealemo no holoavei lohoale Mosese keu tanae tiale osioi lohoholinu.’ ⁴¹ Kateai louito dilava mole bolomakau nahate vai abu adatela vale keho ovo havei ke hoesehavoi havulahalu. ⁴² Abu vaveve kateale vage Dilavau au ebia abuemo bamui halevege abu didi, vanie ni, bata hoesegevema. Abu vaveve kateale vage beloveta malaha moleu Bukamo ke hisaliai avoe, ‘Iselala ataea, laeau vagana voti (40) kemo tomagie uale lana di hoesehavonihike ovo havei mohoevelu.

⁴³ Ba, di hilokage laeau loboe dilava Molokoike o eseta ebavoi tiale hoesehavoi loboe dilava mole Levani didi nahate keta ebavoi tilu.

Laeau loboe dilava kebia vavevei hoesegevemale kemo dana la iovege lana bae Babulonia ke iae matama moleve teve.’

⁴⁴ “Nahie buluveau tomagie valai balugata dubu mole hou Dilavau au menaka mai oveale ke abu mai valai dubu kemo mavolu. Dubu keu Dilavau Mosese haivuale ke nahateike abu houlu. ⁴⁵ Vani mole Diosuau nahie buluve kebia ese holoavege abu valai ke ebavoi Keinani vatae tilu. Ata degomoleau subuta vata kemo uge Dilavau kebia nunuvege abu tisege nahie buluveau vata kemo ui valai keta dubu houge uale uale Deividi vani ketala velemanu. ⁴⁶ Ige Deividi vanimo Dilavau Deividi hoesehavoge au isiviale Iselala atae Dilava keho dubu seleve houli. ⁴⁷ Isito move Solomoni keike Dilavahu dubu seleve hounu. ⁴⁸ Ke houito nahi hilokage Dilava ehue uale keu bae ataeau dubu houale kemo ulivebene. Beloveta moleu kemo hisaliai avoe,

⁴⁹ ‘Dilavau loui avoe, Otogo keu di ugulamomale telona.

Isege vata keu di velo mamomale matama.

Iale lana o oleteale dahoe houli.

Dana oleve kateai keve ui.

Keu daemo anekianu.

⁵⁰ Kosealemo dalike onobenobe bahata vaevenu.’

⁵¹ “La uvu keu osiohoike vage la Dilava hoto ke evioholilu. La keau nahie buluve kebia nahate. La vani bahata Dilava Munanae Tumuho isiviholisi kabebihavoma. ⁵² Nahie buluveau beloveta bahata havege abu vatehani malelu. Subuta vani kemo beloveta keu Dilava esemu inutolotoloteu lohoveve hoto ke louge nahie buluveau kebia havei hoto ke

bamuge novae vani komo la esemu ke mai atae toela ovege abu hamage hatinu. ⁵³ Dilavau au menaka mai anelu ovege abu mai la buluve ovege la menaka ke maito keho isiviholisi halevalu.”

Abu muneta Sitiveni hamalu.

⁵⁴ Sitiveniu abuhu kateale louge Diue kosive keau ke evisi avuhu itumulahai monogialu. ⁵⁵ Ige Munana Tumuteu Sitivenimo ualemo au ehue niai Dilava ataga elehage kemo Iesuu Dilava ada inuteatave laminu. ⁵⁶ Ige au ke elehai loui avoe, “Di elehasege otogou alavoge Atae Eseu Dilava ada inuteve laminu.” ⁵⁷ Ige abu hoto ke evisi baita kekolahai abu golema bamui isiviholilu hoto ke eviliho. Isi igaetoai tiale Sitiveni evudelu. ⁵⁸ Evudei mai tiale o ke iae abu dabae ogo bodievei malei malaha mole Solo omisito mune malei Sitiveni hamalu. ⁵⁹ Hamage au guliguliai loui avoe, “Di Kosive Iesu, di munana mage di hatai.” ⁶⁰ Kateai louito au kome bokoai vata bisi baita hoai loui avoe, “Kosive, ainaho vaveveabe toela kemo ibinae toela ovelive.” Kateai louito halei hatinu. Abu kateai Sitiveni hamasege Bolou ke elehai abuhu hotobe louholisito vahaehoanu.

8

Solou ekalesia aiogevemala

¹ Vani kateimalela ata keau ekalesiau Dielusalemae umale kebia bahata aiogevege abu vatehani baluga malelu. Vatehani malei Diudia vata isi Samalia vata keve detuluvisi tisege abostolo unahaeau Dielusalemae ua. ² Ige vani kela atae dua degomoleau Sitiveniho ninalahai mai abavulu. ³ Ige Solou isiviale ekalesia aiogevege abu uoholisi. Kateai o igaegae kela evievi ata kebia havei malevei lohoale dibulae otovenu.

Bilibiu Samalia oe ata haivema.

⁴ Ekalesiau detuluvisi matama bahatae tiale Iesu hoto loui ata haivelu. ⁵ Isege Bilibiu Samalia oe tiale keve Iesu Kelisoe hoto loui ata haivema. ⁶ Ige ata moagaeau hotove ke evie dua vai au vaveve nimolete vamale keta elehalu. ⁷ Abu ke elehasege Bilibiu munanae toela kebia abuemo nunuvege abu kekolahai ata halevei tilu. Isi vavaeabeu kibioholimale isi velo golote kebiata hoesegevenu. ⁸ Keu kateige ataeau ke elehai vahaeho balugalu.

⁹ Isege malaha mole Saimoni keu o kemo ui vani moaga au ebia mai mihatui ata lobogevege abu vaveve ke elehai vikolahalu. ¹⁰ Ata bahata kosi esebulu keau hotove evisi loui avoe, “Malaha ke vuvuneu balugatahoai Dilava vuvune nahate.” ¹¹ Lobeve vaveve vamale keu kateai ata lobogevege ataeau vabuhavoi hotove evima. ¹² Abu kateisege Bilibiu lohoale ataeau Dilava adae vuvunemo uveve hoto loui Iesu ivimo ata haivege ata bahatae au hotove evisi babatolahalu. ¹³ Ige Saimoni nehe keta hoto ke evige Bilibiu babatishavoge au avuti oima. Ige Bilibiu vikoe vaveve vage au ke elehai vikoanu.

¹⁴ Samalia ataeau Dilava hoto evisi male hoto ke abostoloeau Dielusalemae umale keau ke evisi Bitata Dionita hanavege abu tilu. ¹⁵ Tiale keu Samaliae velehovoi kebiaho guliguliai isiviale abu Munanae Tumu malei. ¹⁶ Kosealemo Munana Tumuteu kebiaho lohoholige keau Iesu ivimo babatisho unahalu. ¹⁷ Ige Bitau Dioniti abu ada malei tataeabemo otovege kebiaho Munanae Tumu malelu. ¹⁸ Kateisege Saimoni vaveveabe ke elehai isiviale moni malei Dionita Bitata ovei. ¹⁹ Isi namigeveve avoe, “Moni ko malei vuvune ke mai daovage elike data di ada malei atae tatamo otovege abu Munanae Tumu malei.” ²⁰ Ige Bitau namihai avoe, “A huhuale ana a moni keta Dilava vuvune ke ibina vai. A katealemo a moni keti matamae toelae tenela. ²¹ A vaveve kateale vaniege a bae no lovi ko valivebene. Kosealemo a uvu keu Dilava nimo inutolotoloholinu. ²²⁻²³ Di hilokage vaveve toelau a uvu ke mai aiohavoge a vaveve toelae isivi unaha vama. A huhuihuuie toela kateale huhuimalemo hoilalahai Dilava imihage au a vaveve toela ke ulihai.” ²⁴ Kateai louge Saimoni namigeveve avoe, “Daho Kosive imihage elike la louale keu daemo loho halei.”

²⁵ Bitau Dioniti Dilava hoto loui ata haivege uoholige halevai Dielusalemae hoidevei tilu. Tiale humaha tavae hotoe dua loui Samalia ata haivei tilu.

Bilibiu Itiobiae gamani kosiveti belemanu.

²⁶ Vani mole Dilava anelu moleu Bilibi namihai avoe, “Hovelahai valahae talive Dielusalemae velemai humahae eseu Gasa vatae tiale kela tenela.” ²⁷⁻²⁸ Ige Bilibiu hovelahai tiale humaha tavae Itiobia malaha moleti belemanu. Malaha keu Itiobiae gamani kosive baluga holisi Kuini Kadasiu vata ke naliale monive ke bahata nalima. Iale malaha keu Dielusalemae Dilava hoesehavoito halei au kaliotamo hoilalahai beloveta Aisaia buka dodavei lohoma. ²⁹ Ige Munanae Tumuu Bilibi namihai avoe, “Talive kaliota ke vavala tenela.” ³⁰ Kateige Bilibiu bibuai vavavela tai evisege malaha keu beloveta Aisaia buka ke dodavema. Ige au belahai avoe, “Ana a dodavemale ke ihu hilokanu.”

³¹ Ige malaha keu avuho loui avoe, “Dana oleve kateai ke hilokai. Isito ata moleu di haivuhutevage di bae ke hilokai.” Kateaime Bilibi namihage au veatisi kaliotavemo avui ugulamonu. ³² Malaha keu Aisaia bukamo dodavemale keike ko.

“Ata keu mamoe nahate.

Ataeabuna melavei tiliege bae hamai. Keu mamoe doge ke nahate.

Ataeabuna voveve bohige au bae kekoalivebene.

Iale abu mamomo vale ke nahate abuna ata ke hamage au bae hotobe loulivebene.

³³ Ataeabuna aiohavoi mai kotalahai vaveveve toela elehaholisi hamage au hatige valadavebeu bae uge ataeau bae hilokalivebene.”

³⁴ Isi kateige kosive nehe keu Bilibi belahai avoe, “Di namihanela. Beloveta kou ata oleike au huhuai ko hisalianu. Auna au ebikanike au ke huhuaime. Emena ata moleike.”

³⁵ Ige Bilibiu Bukae Hoto kemo Iesu hotoe dua loui haivunu. ³⁶ Isi avuti tiale e mole vavamo velehovoge kosive keu Bilibi namihai avoe, “E ko elehanela. Dana valive e komo babatisoi.”

³⁷ Ige Bilibiu namihai avoe, “Ana a uvu bahata mai Iesuemo mamoniege bae babatisoanela.” Ige malaha keu loui avoe, “Duave. Di hilokage Iesu Keliso keu Dilava mo.”

³⁸ Isi kateai au kaliota ke mamoge Bilibiu avuti dobuluvisi e keve tiale kosive ke babatisohavonu. ³⁹ Kateaito e kemo hoidevei lohosege Dilava Munanae Tumuu Bilibi mage uoholinu. Ige kosive keu Bilibi kaovai elehaholisi vahaehota tinu. ⁴⁰ Isito Bilibiu solekavesite o mole Asodasi keve velemai halei tiale o kebia bahatala hotoe dua loui ata haivei tiale Sesalia o ketala velemanu.

9

Dilavau humaha tavae Solo haivunu.

¹ Malaha mole Solo keu vani bahata Iesu esemu kebia bahata aiogevei haveveve hoto loui lohoale dubue kosive baluga namihanu. ² Namihai avoe, “Levaleva hisaliai mai daoge di Damasikasiae talive Diue dubue kosive ovei elike ata olemeau Iesu ehovamale kebia kaovei umudievei malevei loholive Dielusalemae dibulamo otovei.”

³ Kateaito halei Damasikasiae tiale keu oe vavae tisege ataga mole balugau otogomo lohoale bamunu. ⁴ Ige au lokilahi vatamo dobai hoto mole evige hoto keu loui avoe, “Solo, Solo, a osiohoike di aiohavoma.”

⁵ Ige Solou loui avoe, “Kosive, ole a.” Ige hoto keu avoe, “Iesu dalike a vani bahata aiohavoma.”

⁶ Iale hovelahai o baluga keve talive ata moleu bae a gabie onole vaveve ke ahoe loui.”

⁷ Kateai lousege malaha degomoleau Sololuvuta tiale keau lavisi tetelahalu. Kosealemo keau hoto ke evisito atabe elehaholilu. ⁸ Ige Solou vatamo hovelahage niveu keduge haokuvuiaabeau adavela holisi melavei Damasikasiae tilu. ⁹ Ige vanie ni abuita igaeta ke uvumo au lovi ioholisito u unahanu.

¹⁰ Vani kateimalela Iesu esemu mole Ananiasiu keu o keve usege vani molemo Kosiveu lahoahoamo hohavoi avoe, “Ananiasiu.” Ige au loui avoe, “Ito, Kosive, di a ho evinu.”

¹¹ Ige Dilavau namihai avoe, “Talive humaha mole ivi Inutolotolote keve Diudasi omo Tasisi malaha mole Solo kaovanela. Keu aike gulgulua di imihama. ¹² Malaha keu subuta lahoahoasege malaha mole Ananiasiu lohoale au ada mai nivemo mamoge niveu duaveanu. Iale talive di lahoahoamo a haivuale ke nahate vanela.”

¹³ Isito Ananiasiu Dilava namihai avoe, “Kosive, ata moagaeau malaha ke vaveve loui di namihai avoe, ‘Malaha keu Dielusalemae Iesu esemu moaga aiogevenu.’”

¹⁴ Isi keu Dielusalemae dubue kosive kebia namigevege abu vuvune omige au aike lohoale isiviai no umudigevei no malevei tai.”

¹⁵ Ige Dilavau avuho loui avoe, “Halege talive di a namihale ke nahate vanela. Kosealemo di Solo ebagemage auna tiniege di hoto evioholimale kebia, vatae kosive kebia isime Iselala ata kebia bahata auna haivei. ¹⁶ Iale dana ke haivuge auna bae di lovi ke vai vatehani maleveve ke hilokai.”

¹⁷ Dilavau kateale louge Ananiasiu tiale o keve velemai au ada mai Solo tatamo mamoi loui avoe, “Di haoka, Kosiveu humaha tavae aemo velefemale keike louge di kove ae lohonu. Au di hanavoale kemo ana tota nianela. Ige Munanae Tumuna bae aemo ui a negotisi.”

¹⁸ Kateai lousege solekavesite huenae gina ke nahateau Solo nimo keiohovoge niveu keduale keu uoholige au hovelahai babatisoanu. ¹⁹ Babatisoaito lovi ige vavaveu tota negoanu.

Solou Damasikasiae hotoe dua louma.

²⁰ Solou keve uniale Diue dubue tiale Iesu hoto loui ata haivei avoe, “Iesu keu Dilava mo.”

²¹ Ige ata bahataeaeu ke evisi vikolahai mole namigevei avoe, “Ani, malaha konike Dielusalemae Iesu esemu aiogevei isiviale malevei Diue kosive baluga ovei. Iale malaha kenike ko.”

²² Abu kateai louge Solou hovelahai ata haivege hotove keu ataemo vuvuneage Damasikasiae Diue ataeau hotove hamaveve keu anekianu. Kosealemo Solou hilokage Iesu keu Diue ata tedaevemale kosive Keliso.

²³ Vani moagaeau uoholige Diue ataeau mole bevavei Solo hamaveve humaha kaovama. ²⁴ Keau vanimo vavimo o ke balugae udahamo nilahai ui isiviale Solo mai hamai. Isito Solou vaveveabe ke hilokanu. ²⁵ Iniale vavi molemo Solo haokuvuiau bosea balugamo Solo mai mavoime o ke baluga iae vuindoamo manevege dobai detitinu.

Solou Dielusalemæ ata haivema.

²⁶ Detitisi tialeu Dielusalemæ velemai isiviale Iesu esemuhi igaetoai ui. Isito keau vabulahi huhuai avoe, “Ata kou no lobogeveike au ko vama. Keu Iesu esemu seleve holiolohinu.” ²⁷ Kateige Banabasiu Solo melamei tiale Iesu esemu kebia haivei namigeve i avoe, “Malaha kou humaha tavae Kosive elehage au avuho louge au Damasikase vabuoholisito Iesu hoto loui ata haivenu.” ²⁸ Banabasiu kateai haivege Solou bae abuhi ui timale Dielusalemæ Iesu hoto loui vuvunevemo vabuoholisito ata haivema. ²⁹ Kebia haivesege Diue ata degomoleau Giliki hotomo loulame keau isiviale Solo hamai. ³⁰ Ige Iesu esemuiaui ke evisime Solo melavei tiale Sesaliae velehovoi mai hanavoge au au o seleve Tasisie tinu. ³¹ Isi kateige Diudia, Galili isi Samalia vata kebiamu ekalesia bahata keau bae ue dua vai Kosive hoesehavoge Munanave Tumuu negotievege abu ata moaga holisi ua.

Bitau Lidata Diobatae tinu.

³² Bitau matama moagae oai tiale vani mole o mole Lida keve Dilava ata elegevelihohonu. ³³ Keve lohoale malaha mole Aniasi ke elehanu. Malaha ke vavau kibioholige au vagana eiti (8) ke uvumo gedae golo unahamo lahai uma. ³⁴ Ige Bitau lohoale elehai avuho loui avoe, “Iesu Kelisou a hoesehavoalelua hovelahai a geda mai egumai laminela.” Isi kateige malaha keu solekavesite hovelahanu. ³⁵ Ige Lida ata isi Saloni ata keau bahata malaha ke elehai hoideve Iesu ehovalu.

³⁶ Kateisege o mole Dioba keve evievi keate mole Tabita ivive mole Dokasi keu vani bahata vaveve dua vai kunaiholimale kebia tedaavei kunai ovema. ³⁷ Iale keate keu vavahanai hatige abu emohavoi ebavoi mai o ke ehue uvu moleve tilu. ³⁸ Isi Bitau Lida oe uale hoto ke evisi abu esemu abuita iovege abu avuho louho tilu. Dioba keu Lidati haeava holiolohilu. Ialaelu abu tiale Bitu namihai isiviale au abuhi hoilalahai. ³⁹ Ige Bitau hovelalahai abuhi tiale veleimage abu melavei o ke uvue tilu. Ige gobuvuiaui ninalahai vavavemo lavisi keate keu nita ui ogo vamale ke malei Bitu haivulu. ⁴⁰ Ige Bitau oe uvue gobuvu kebia iovege abu heie tisege au kome bokoai Dilava imihaito hovelalahai keate ke namihai avoe, “Tabita, hovelahanela.” Ige keate keu niai Bitu elehai hovelalahai ugulamou. ⁴¹ Ige au adavela holisi ebagemage au hovelalahai laminu. Isi gobuvu nehe kebia hohavege abu lohoge au keate neheu hovelalahale ke mai haivenu. ⁴² Kateige Dioba ata keau bahata hoto ke evige kebiamu moagaeau Kosive hoto evisi ehovalu. ⁴³ Ige Bitau vani moaga Dioba oe Saimoni mole omo ua. Malaha keu bolomakau vatemo onobenobe vavevemale malaha.

10

Bitu isi Koniliasi

¹ Sesalia o kemo malaha mole Lomae ame kosive baluga Koniliasi keu ua. Keu Italiae ame esemu kebia nalievema. ² Keu au ese bahata kebia holoevei abuhi Dilava vabuhavoi hoesehavoma. Keu negoai Diue ataeau kunaiholimale kebia tedaavei vani bahata guliguliai Dilava imihama. ³ Iale keu gutu mole tili (3) okolokie lahoahoi elehasege Dilava anelu moleu avue lohoale avuho loui avoe, “Koniliasi.” ⁴ Ige Koniliasiu ke evisi vabuai namihai avoe, “Kosive, a onoleho isivianu.” Ige anelu keu namihai avoe, “Dilavau a guliguli evisi a vaveve dua hilokai a huhu selevelanu.” ⁵ Iale ana a esemu degomole hanavege abu talive Diobae malaha mole ivi Saimoni Bitu namihage au lohoi. ⁶ Bitu keu Saimoni mole bolomakau vatemo onobenobe vamale ata keti davala vavae ovemo avuti ua.” ⁷ Kateai louito halei tisege Koniliasiu au esemu abui ovemo lovilahamale kebia hohavei au ame esemu mole Dilava hoesehavomale ata keta hohavonu. ⁸ Hohavege abu lohoge au deida ke loui namigevei hanavege abu Diobae tilu.

⁹ Ladeveliale vani mole tiliale Dioba oe vavae tisege Bitau vanie vigomo guligulihohoe hovadae tinu. ¹⁰ Keve tiniale guligulihaito vaeai isiviai lovi isi. Kateige abu lovi vasege au lahoahoa mole vanu. ¹¹ Lahoahoa kemo elehasege otogou dikolahage ogo mole baluga omokutialeu dobai lohonu. ¹² Ogo ke uvumo mesia nimolete moaga kosealeu ua. Ovo, mi, ute, ugu isi degomolea. ¹³ Ige hoto moleu avuho loui avoe, “Bitu, hovelalahi ke havei inela.” ¹⁴ Ige Bitau loui avoe, “Kosive, di bae mesiae toela kebia havei ilivebene. Subuta no menakau kateale louge di kemo menakanu.” ¹⁵ Kateai louge hoto keu tota avuho loui avoe, “Dilavau onobenobe vae dua vale keho ainaho bae loui kosea, ‘Keu toelanu.’” ¹⁶ Vaveve katealeu velema abuita igaetagego ogo keu veatisi tota otogoe tinu.

¹⁷ Ige Bitau lahoahoale ke huhuai isivialeike ke ihu hilokai. Kateai huhuisege Koniliasi esemuiāu Saimoni o kaovai lohoale heie lavisi ua. ¹⁸ Isi holahai avoe, “Malaha mole ivi Saimoni Bitā kena kove ua.” ¹⁹ Holahasege Bitau negobedai isiviale au lahoahoale ke ihu hilokai. Kateisege Munanae Tumuu avuho loui avoe, “Evinela. Malaha abuita igaetaeau lohoale ahoē nilahai a kaovama. ²⁰ Iale hovelahai heie dobai abuhi tenela. Dalike kebia hanaveale ainaho abuhi talihu vabualive.” ²¹ Kateai louge Bitau dobai tiale malaha kebia namigeveī avoe, “Lana dahonike nilahama. Dalike ko. Iale osiohoike la di kaovama.” ²² Ige abu loui avoe, “Ame kosive mole Koniliasi keike no hanavenu. No kosive keu atae dua. Keu Dilava hoesehavoge Diue ataeau bahata avuho isivilahalu. Iale Dilavau nivu anelu mole hanavoge tiale no kosive ke namihage no kosive keu kemoike no hanavege no aho loholu. Keu isiviale a talive hoto louge au a hoto evisi.” ²³ Ige Bitau malaha kebia namigevege abu avuluvuta vavi igaemo uliale vavita hovelahai esemu kebiahi tisege Dioba o kemo Diue evievi ata degomoleau bae abuhi tilu.

Bitau Koniliasi oe velemanu.

²⁴ Tiliāle humaha tavae ladevaliale vavita Sesaliae velehovoge Koniliasiu au eseta au haokuvuta holoēveī abuhi hemei sege Bitau velemanu. ²⁵ Velemaime Koniliasi oe udahamo velemaisege Koniliasiu vudivemo kome bokoai vata bisī isiviale hoesehavoi. ²⁶ Ige Bitau namihai avoe, “Hovelahai laminela. Dau Dilava holioholisito ata unaha dalike.” ²⁷ Kateai louge Koniliasiu hovelahai avuti hotohotoaniale uoholige abu oe uvue ata moagaēau igaetoai umale keve tilu. ²⁸ Tige Bitau namigeveī avoe, “La hilokage dau Diue ata. Iale no menaka keu koseanu. Diue ata keau bae Diue ata holioholiale kebiahi igaetoalivene. Isito Dilavau di haivuale keu koseanu. Ata bahata nahiau mole nahate unaha. Iale dau bae Diue ata holioholiale kebiaho huhu kosealealivene. Keau atae toela. ²⁹ Iale la daho hoto hanavoge di dolodoloholisito lohoale isiviai la daho hoto hanavoale ke hilokai.”

³⁰ Kateige Koniliasiu Bitā namihai avoe, “Di vavitege gutumo tili (3) okolokie di oe uvue guliguliasige malaha mole ogo taete seleve holovalē keu lohoale di vudimo laminu. ³¹ Isi loui avoe, ‘Koniliasi, Dilavau a guliguli ke evisi a lovie dua vamale kemo a huhuanu. ³² Iale ata degomole hanavege abu talive Diobae malaha mole ivi Saimoni Bitā ke namihai. Malaha keu Saimoni mole ovoē vatemo onobenobe vaevemale ke oe ua. Malaha ke ou davalae vavamo ua.’ ³³ Aneluu kateai louge di solekavesite aho di esemu hanavege a lohoale keu duave. Iale noeabulike ko bahata a hemei uma. No isiviale Dilavau onole a namihale ke loui no namigevenela.”

Bitau hoto loui ata haivema.

³⁴ Ige Bitau ata kebia namigeveī avoe, “Di nova hiloka selevelēge Dilavau huhuige ata bahata keau mole nahate unaha. ³⁵ Vatae ata oleuoleu Dilava vabuhavoī vaveve inutolotolote vage auna kebia maleveī. ³⁶ La hilokage Dilavau au hotoe dua Diue ata noheho hanavonu. Hotoe dua ke Iesu Kelisou ata malevege abu Dilavaluvuta uveve dua malege au ata bahatae Kosive holinu. ³⁷ La hilokage ata babatisogevemale Dioni keu vasohuta hotoe dua loui Galili ata haivegeto kemo hoto keu Diudia vata bahatae tinu. ³⁸ La hilokage Iesu keu Nasaletae malaha. Ige Dilavau Munanae Tumuu omisi vuvuneta omiale kemo au o bahatae tiale vaveve dua vai ata hoesegeveī munanae toela abuemo nunuvema. Kosealemo Dilavau avuti ualemoike. ³⁹ Iale Iesu keu Diudia vata isi Dielusalema o baluga kemo vaveve bahata vamale ke noēau elehai hilokalu. No hilokage abu mai idie domo hamage hatinu. ⁴⁰ Ige vanie ni abuita igaetaeau uoholige Dilavau etuvage hovelahanu. ⁴¹ Hovelahaime ata bahatae tiholisito Dilavau no unaha tabageveale kebiae tiale nohehi lovi isi e inu. ⁴² Isi no namigevege no tiale ata bahata haivei hotoe dua loui namigeveī kosea. ‘Dilavau Iesu ebagemale auna bae ataeau haluvisi nita umale kebia bahatae vaveve kaovai loui.’ ⁴³ Iale subuta beloveta bahata keau Iesu vaveve kemo loui avoe, ‘Oleuoleu abu uvu mai omige auna au ivimo vaveveabe toela ulihai.’”

Diue ata holioholialeau Munanae Tumuu malelu.

⁴⁴ Bitau kateai namigevesege Munanae Tumuu dobai lohoale hotove evimale kebiāmo ua. ⁴⁵ Ige Diue evievi ataeau Bitāluvuta Diobamo lohoale keau Dilavau au Munanae Tumuu mai Diue ata holioholiale kebia oveale ke elehai vikolahalu. ⁴⁶ Keau vikolahale keu koseanu. Abu evisege ata keau hoto nimoletemo hoto loui Dilava hoesehavoma. ⁴⁷ Ige Bitau Diue evievi ata namigeveī avoe, “Ata koeau nahi Munanae Tumuu maleale ke nahate abuta malelu. Iale nahi bae keau babatisoaveve kemo keluevelivene.” ⁴⁸ Isi namigevege abu Iesu Keliso ke ivimo babatisolahalalu. Isi Bitā namihai avoe, “No isiviale vani degomole nohehi unela.”

11

Bitau tota Dielusalemæ au deiada lounu.

¹ Iesu abostolo isi esemuaiabe bahataeau Diudiae uale keau evige Diue ata holioholiale keau Dilava hoto evisi malu. ² Iniale vani mole Bitau veatisi Dielusalemæ lohoge esemu degomoleau itumulahai avuho loulou. Kosealemo abu isiviale Diue ata holioholiale keau abu vudie vate bohisisito bae Dilava ehovai. ³ Esemu keau Bitau namihai avoe, "A vudie vate bohioholimale kebiahi igaetoai lovi iale keu tolanu." ⁴ Kateai louge Bitau ono vadeu avuemo velemale ke deiada bahata loui namigevenu. ⁵ Namigevevi avoe, "Di vani mole Diobae guligulianata lahoahoa mole mai elehasege otogomo ogo mole baluga omokutiale keu dobai lohoale di tatamo ua. ⁶ Ige di ke uvumo niai elehage ovo, botoe mi, ute isi botoe ugu keau ke uvumo ua. ⁷ Ige di evisege hoto moleu lohoale loui avoe, 'Hovelahai ke havei inela.' ⁸ Ige di loui kosea, 'Kosive, kateai lou halenela. Subuta mesiaie toela katealebiamo no menakau louale di bae ke ilivebene.' ⁹ Ige hoto keu tota otogomo lohoale loui avoe, 'Dilavau onobenobe vae dua vale keho ainaho bae loui kosea, Keu tolanu.' ¹⁰ Vaveve katealeu velema abuita igaetagego ogo keu veatisi tota otogoe tinu.

¹¹ "Kateisege di umale o keve Sesalia malaha abuita igaeta keau di melaveliho loholu. ¹² Ige Munanae Tumuu di namihai avoe, 'Dolodolo haleito abuhi tenela.' Ige Diobae evievi malaha sigisi (6) keau daluvuta tiale Sesalia oe velehovoi Koniliasii oe tilu. ¹³ Tige Koniliasiu no namigevevi avoe, 'Anelu moleu di vavamo lamisi di namihai avoe, A esemu hanavege abu talive malaha mole ivi Saimoni Bitau melavei lohohi. ¹⁴ Loholive au la haivege a isi a omo umale lana hoto kemo ukolikoli maleve.' ¹⁵ Kateai louge di lohoale kebia havesage Munanae Tumuu subuta nahieumo lohoale ke nahateu abuemo lohohu. ¹⁶ Ige Iesu louale ke di huhuanu. Au avoe, 'Dioniu e unahamo la babatisogevenu. Isito Munana Tumutena lohohi au vuvunemo la malevi vuvunetivevi.' ¹⁷ Iale di hilokage keau abu uvu mai Iesu omige Dilavau au Munanae Tumu nahioveale ke nahate kebia ovenu. Iale Dilavau vaveve kateale vasege di bae osioho ke bamui." ¹⁸ Bitau kateai louge Dielusalemæ evievi ata keau ke evisi vahaeholahai Dilava hoesehavoi loui avoe, "No hilokage Dilavau vaveve kateale vage Diue ata holioholiale keabuna abu vaveve toela kemo hoidevege Dilavana ukolikoli ovei."

Ekalesia ataeau Antiokæ umale

¹⁹ Abu Sitiveni hamamale vani kela abu evievi ata degomole aiogevege keau detuluvisi o igaegae keve tilu. Degomoleau Venisiae tisege degomoleau Saibalasi tisege degomoleau Antiokæ tilu. Keve tiale hotoe dua loui Diue ata unaha haivelu. ²⁰ Kateisege Saibalasi isi Sallinie evievi malaha degomoleau detuluvisi Antiokæ tiale Diue ata holioholiale kebia Iesu hotoe dua loui namigevelu. ²¹ Kateimale vanila Kosive vuvunehi abuhi uge ata moagaeau hotoeabe evisi Iesu ehovai.

²² Keau Iesu ehovale ke Dielusalemæ ekalesiaeau ke evisi Banabasi hanavoge Antiokæ tinu. ²³ Tiale keve velemage Dilavau Diue ata holioholiale kebia huhuevevi hoesegevege au ke elehai vahaeho balugai namigevevi avoe, "La evievi kemo negolahai la uvu bahata mai Kosivemo mavoi ehovageve." ²⁴ Banabasi keu atae dua isi evievie malaha seleve. Au kateige Munanae Tumuu keti uge ata moagamoagaeau Dilava ehovai tilu.

²⁵ Banabasiu kateaito Tasisie Solo kaovaliho tinu. ²⁶ Tiale kaovai elehaimelamei Antiokæ hoilahai lohoale vagana igae ke uvumo ekalesia bahata bevievevi haivei evieviholimale kebiata haivelu. Ige Antioka keve evieviholimale keau vasohuta evievi ata kebiaho loui avoe, "Keliso ehovamale ataea."

²⁷ Kateimalela ekalesia beloveta degomoleau Dielusalemæ halevai Antiokæ lohohu. ²⁸ Ige kebiame beloveta mole Agabasi keu hovelahai Munanae Tumue vuvunemo ata namigevevi avoe, "Gabie vae balugaa bae vata bahatamo lohohi." ²⁹ Kateai louge evievi ataeau ke huhulahai isiviale haokuvuiabeau Diudiae umale kebia tedaevi. Isi oleuoleu abuemo moniu uge malei abu haokuvuho hanavei. ³⁰ Isime kateai moni malei Banabasi Solota ovege abu malei Diudiae tiale ekalesiaie kosive ovelu. Iniale Kalodiasiu Loma gamanie kosive baluga holimale vani kemo vae balugau lohohu.

12

Aneluu dibulamo Bitau tedahoale deiada

¹ Vani kateimalela vatae kosive baluga Elodi keu ekalesia degomole aiogevenu. ² Isi louge esemuve moleu sigata Dionii nana Diemisi bige hatinu. ³ Elodiu vaveve kateale vage Diue kosiveau ke elehai vahaehoage au tota au esemu namigevege abu Bitau umuvai mai lohohu. Diue vahaeho vani baluga Basova ke vanilaikae abu ke valu. ⁴ Kateai Bitau mai lohoaleu dibulale bamuge tualie ata voa (4) keau Bitau nalisi ua. Iliale Basova vaveve

keu uoholige Elodiu isiviale Bitu mai atae vudimo mamoi kotai. ⁵ Kateisege Bitau dibuluae usege ekalesia bahataeau negobedai avuho guligulillahama.

⁶ Bitau dibuluae uniale vavita Elodiu isiviale melamei loholive atae vudimo kotai. Isito vavi kemo vaveve nimoletu Bitu vaveve vemanu. Tualie atae abuiaru seimi abuitala adave umuvai mai abu vigomo mavoge au vigoebemo lahasege tualie atae abuiaru udahamo lavilu. ⁷ Ige solekavesite Kosive aneluu lohoale o ke uvumo lalie atagaveve o uvumo halunu. Ige anelu keu Bitu hadala holisi etuvai avoe, "Solekai hovelahanela." Kateai lousege solekavesite seimi abuita keu Bitu adamo solahai dobuluvilu. ⁸ Ige anelu keu tota Bitu namihai avoe, "A beleta mai egigivai a veloe vateta hatu." Ige Bitau hotove evisi vage au avuho loui avoe, "A dabae ogo mai hatui daiti lohonela." ⁹ Ige Bitau anelu ke ehomai oese halei tinu. Bitau vaveve ke vaito kemo luleleholisi huhuai avoe, "Selevenike di ko vama. Emena di tababuima." ¹⁰ Isi avui lohoale tualie atae abuiaru lavimale kebia evigeve luholu. Lohoale keu tota tualie atae abuitaeau lavimale kebia evigeve luholeau udaha baluga abu aulita vale kemo lohoge udaha ke biageu avoge abu vellehovoi heie humahala tisege anelu keu uoholinu.

¹¹ Ige Bitau onoleu avuemo vemale kemo bae huhuai avoe, "Di nova huhuige keu seleve. Dilavau au anelu hanavoge lohoale di tedahoge Elodi vuvune keu daemo negoholinu. Katealemo gabie Diue ataeau bae vaveve toela daemo valibene." ¹² Kateaito halei Dioni Maka neina Meli ke oese tinu. Tiale heie usege atae moagaeau keve mole bevaveve oese uvue guligulillahama. ¹³ Guligulillahasege Bitau lohoale udaha hamage kemo lovialema ma mole Loda keu lohoale Bitu hoto valitinu. ¹⁴ Hotove valitisi vahaeho balugai udaha alavoholisito hoilahai tiale atae bahata namigeveve avoe, "Eve. Bitau lohoale heie ua." ¹⁵ Ige abu namihai avoe, "Ana tilogoanu." Ige ma keu baita namigeveve avoe, "Seleveta Bitu lohonu." Ige abu avoe, "Ba, munanaveike ke." ¹⁶ Kateai lousege Bitau negobedai udaha hamalage abu lohoale udaha alavoi elehai vikolahai vahaeho balugalu. ¹⁷ Ige Bitau adata namigeveve abu hotohotolisito tobekai usege au Kosivev dibulamo hanavale deiada ke loui atae kebia haivei namigeveve avoe, "Talive Diemisita esemu degomole kebia namigeveve." Kateai loui namigeveito halei o moleve tinu.

¹⁸ Iniale vau alamoge tualie atae neheau dibulamo lavimale keu hoveveve elehage Bitau uoholige abu dolodolalahai mole belageveve avoe, "Bitu oleve kateanu." ¹⁹ Ige Elodiu louge abu Bitu kaovalata elehaholige Elodiu tualie atae kebia maleveve abue mo kotanu. Kotage uoholige au au esemu namigeveve abu tualie atae havege haluvilu. Ke iae Elodiu Diudia vata halei tiale Sesalia o keve ua.

Elodiu hatiale deiada

²⁰ Vani mole Taea isi Saidoni atae keu vaveve mole vage Elodiu abuhou itumu baluganu. Ige abu mole bevaveve Elodi elehalihou vasohuta Elodi esemu mole Balasita ke sovavihu. Malaha keu Elodi omo atae baluga. Iale abu sovavihu namihai avoe, "No isivialeike a no tadeavege no Elodiluvuta itumu halevaito ue dua vai. Kosealemo noeau Elodi vatamo lovi malemalemo no isivialeike avuluvuta ue dua vai."

²¹ Kateai louge au abuhou vani mole ebagemale kemo Elodiu au ogoe dua vai au ebika ebagemai au telonamo ugulamo hoto lounu. ²² Ige abu ke evisi baita holahai avoe, "Dilavaike ke. Keu atae holioholinu." ²³ Kateai lousege solekavesite Kosive aneluu Elodi hamage vavahanianu. Vavahanive keu koseanu. Utee ese moagaeau uvuvemo ui uvuve ige au vavahanianata hatinu. Kosealemo keu atae hoto evisi ke huhuaito Dilava hoesehavoholinu.

²⁴ Kateisege Dilava hotou atae bahata sonumaevenu. ²⁵ Isege Solou Banabasiti moni malei Dielusalem tiale ekalesiae kosive oveito halevai Dioni Maka melavei tota hoidevei Antioke tilu.

13

Abu Solota Banabasita hanavelu.

¹ Antioke ekalesia atae kebiemo kosive degomoleau ua. Degomoleau beloveta atae. Isege degomoleau atae haivemale atae. Iale kosive kebia iviabulike koea. Mole ivilikie Banabasi. Ige malaha bukate Simioni. Ige Sailini malaha mole Lusiasi. Ige subuta Elodi omo umale atae mole Maniani. Ige Solo. ² Kosive keu vani mole lovi ioholisito Kosive hoesehavosege Munanae Tumuu abuhou loui avoe, "Di isiviale Banabasita Solota tabageveve abu talive di abuhou lovi mole louale ke abu avuti vai." ³ Kateai louge abu tota lovi halevai ioholisito Dilava imihai abu ada malei Solota Banabasita tatamo otovaito hanavege abu tilu.

Solou Banabasiti Saibalasi vatae tilu.

⁴ Munanae Tumuu Solome Banabasime malevei negotievege abu Selusia oe tiale keve bouti mai davalae nie vata mole Saibalasie tilu. ⁵ Tiliale keve velehovoi o mole Salamasi keve dobuluvisi Diue dubue Dilava hoto loui ata haivesege Dioni Makau abuhi tiale keu kebia tedaevunu. ⁶ Isi abuhi heila tilialeau o igaegae kela ata haivei o mole ivi Babosi keve velehovolu. O kemo Diue malaha mole Baliesu keu au vavevemo ata lobogevei au ebika mai loui avoe, "Dau beloveta." Malaha ke ivi moleike Elimasi. ⁷ Iale keu vata kemo kosive mole Segiasi Bolasi keti haokanu. Kosive keu lulelete ata. Iale keu Banabasita Solota hohavege abu avue lohohu. Kosealemo keu isivialeike Dilava hoto evisi. ⁸ Isito Elimasiu Solota Banabasita hoto hamanu. Kosealemo keu isiviholinu kosive keu hoto ke evisi Dilava ehomaliho. ⁹ Kateisege Munanae Tumuu Solo mai negotinu. (Kateimale vanila abu Solo ivihai avoe Bolo.) Ige au Elimasi nibi tumuai avuhu lounu. ¹⁰ Loui avoe, "A keu Setene vaveve ke nahate vai vaveve dua bahata aiogevemale ata alike. A uvu kemo onobenobe toelau uge a vani bahata loboe hoto loui Dilava hoto seleve ke bamuna. ¹¹ Iale Dilavana au adae vuvune mai aemo mamoge ana bae ni kedute holisi vanie ataga ke elehalivebene. A ni kena loaniege vani degomoleau uoholisege tota bae duaveai." Kateai lousege ono mole bukateu dobai lohoale nive bamuge niveu keduage au ada hatui tai loui avoe, "Loholive di adala holisi di melavei teve." ¹² Ige vatae kosive keu vaveve ke elehai vikoai au uvu mai Dilava ominu.

Abu Bisidia vatae tiale Antioka moleve tilu.

¹³ Vani mole Bolou au esemu holoevei abuhi bouti mai Babosi halevai vata mole Babiliae tilu. Vata keve o mole Bega keveike abu tiale velehovosege Dioni Makau halevei hoilalahi tota Dielusalemae tinu. ¹⁴ Isege Bolou Banabasiti Bega halevai abuta Bisidia vatae tilu. Vata keve tota o mole ivi Antioka keve tiale velehovoi keve uliale bulau lohoge abu tiale Diue dubue uvue uguiaivoi ua. ¹⁵ Uguiaivosege Diue kosiveau Mosese menaka ke dodavei belovetaeau hisialiale keta dodavei ata haivege uoholisege abu Bolota Banabasita belagevei avoe, "No haokuvuia, laemo hotobeu uge louge no bahataeau evisi."

¹⁶ Kateai louge Bolou hovelalahi loui avoe, "La degomoleau Diue ata. Isege la degomoleau Diue ata holioholilu. Isito la bahataeau Dilava hoesehavomale di hoto evive. ¹⁷ Subuta Dilavau nahie buluve kebia tabagevege valadaeabeau Egubito moagage Dilavau elegeve au vuvunemo vata kemo malevenu. ¹⁸ Ige abu tiale vagana voti (40) ke uvumo tomagie olahasege Dilavau kebia hoesegevenu. ¹⁹ Iniale vani mole Dilavau Keinani vata baluga kemo vata seveni (7) kebiamo ata nunuvege uoholige atave seleve keau vata ke mai avuemo ua.

²⁰ "Nahie valada keau vagana voa handele vivti (450) ke uvumo Egubito ui tomagie uale ke halevai Keinani vatae lohohu. Iniale ke iaeike Dilavau bae kebia nahieveve ata moaga oveniale kebia tedaevelage beloveta Samuelau bae kebia iae lohonu. ²¹ Iniale Samuela vani kemo Iselala ataeau kiniho isivilahage Dilavau Kisi mo Solo ebagemanu. Solo keu Benidiameni valadamo lohoniale vagana voti (40) ke uvumo Iselala ata kebia bevievei nibievenu. ²² Iniale vagana degomoleau uoholisege Dilavau Solo halei Deividi ebagemage keu Iselalae kini holinu. Dilavau Deividi huhuai loui avoe, 'Di ata katealeho isivianu. Di huhuige Diesi mo Deividi kena di onole louale ke vai.' ²³ Dilavau kateai louito au louale ke nahate vai Deividi valadamo Iesu ebagemage au Iselala ata tedaeveveve kosive holinu. ²⁴ Isito Iesu au lovi vaholisege Dioniu Iselala ata bahata haivei avoe, 'La vaveve toela halevai babatisolahave.' ²⁵ Iniale vani mole Dioni loviu uoholihovege au ata namigevei avoe, 'La huhuige ole dalike ko. Lana danike hemei uma. Ba, dau ata ke holioholisito ata keu di ehomai lohoma. Keu kosive baluga. Iale di bae velovemo velove voto iamolivebene.'

²⁶ "Di haokuvuia, no degomoleau Ebalahamu valadaea. Isege no degomoleau Diue ata holioholisito Dilava hoesehavoma. Isito Dilavau nahie maleveveve hoto ke nahi bahataho lounu. ²⁷ Isito ata degomoleau Dielusalemae umale keau abu kosivehi Iesu hilokaito isiviholilu ehovailiho. Isi abu bulamo belovetae hoto dodavemale kemo luleleholilu. Katealemoike abu Iesu hamage vavevebe keu belovetae hoto mai selevetinu. ²⁸ Abu Iesu vaveve toela kavage avuemo toelabeu uoholinu. Isito abu negolalahi isivialeike Bailotiu Iesu mai hamage au hatai. ²⁹ Abu vaveve bahata Bukae Hotou avuemo louale ke nahate vage uoholisege ata degomoleau tiale idie domo mai gulialu. ³⁰ Isito Dilavau hatihati kemo etuvage hovelahanu. ³¹ Hovelalahi vani moaga au subuta au abuhi Galili isi Dielusalemae oimale kebiae lohonu. Iale ata keabulike Iselala ata haivema. ³² Iale no hotoe dua keike mai la haiveho lohohu. ³³ Dilavau Iesu etuvage hovelahage au subuta nahie buluveho louale ke nahateu nova nahiemo velemanu. Deividu Samusi bukamo hoto ke nahate hisialiai avoe, 'Dau a Mama seleve.'

Isege au di mo.’

³⁴ Ige Aisaiau au bukamo Dilava hoto hisaliai avoe,

‘Di Deividihio vaveve mole dua loui mamoaale ke nahate dana aemo vai.’

Hoto ke ihuu koseanu. Dilavau Iesu etuvage hovelahale au bae tota hatilivebene. ³⁵ Ige Deividiu tota Samusi bukamo hisaliai avoe,

‘Dilavau bae au esemu tumute ke halege au bae gulimo ulivebene.’

³⁶ Nahi hilokage Deividiu Dilava isivimu au esemu kebia tedaevenata hatige abu mai guliage uoholinu. Iale ata tumute keu Deividi holioholinu. ³⁷ Isito ata mole igae Dilavau etuvale keu gulimo uoholisito tota hovelahanu.

³⁸ ‘Di haokuvuia, Iesu keike la vaveve tola bahata ulihage uoholinu. ³⁹ Iale lana la uvu mai Iesuemo mavoge auna la vaveve tola la huhulahamale ke ulihai. Kateige Dilavana laheho loui kosea, ‘Laeau di nimo duave.’ Mosese menakau bae laemo kateale valivebene. ⁴⁰ Katealemo huhuihuhuei dua vave. Onoilage belovetaeau subuta louale kou laemo lohoma. ⁴¹ Beloveta keau Dilava hoto hisaliai avoe, ‘Evide.

Ata molena lohoniage di aike laemo vamale ke louge la bae hotove evilivebene.

Iale lana di hoto louale ke kabebihavoliege haluvive.’”

⁴² Bolou kateai louge uoholisege au Banabasiti halevasege ataeau namigevei avoe, “Gabie bula kemo hoidevei loholive tota hoto degomole loui no haiveve.” ⁴³ Keau kateai lougeto Bolou Banabasiti halevai tisege ata degomoleau ehovei tilu. Kebia degomoleau Diue ata seleve. Isege degomoleau Diue ata holioholisito Dilava hoesehavoma. Ige Bolou Banabasiti abuhio loui avoe, “Dilavau nahie huhuevei nahie hoesegevemale ke huhulahai la evievimo negolahageve.”

⁴⁴ Iniale bula molemo o ke ataeau bahata lohoale isiviale Bolou Kosive hoto louge abu evisi. ⁴⁵ Ige Diue kosiveau ata moagamoaga elegeveime Bolou maina mai isime avuhio itumulahai hotove hamai avuhio hotoe tola loui aiohavolu. ⁴⁶ Kateige Bolou Banabasiti negolahai namigevei avoe, “No isiviale vasohuta Dilava hoto loui Diue ata seleve la haivei. Isito lana hoto ke kabebihavoi ukolikoliho isiviholiege noeabuna la halevei Diue ata holioholiale kebia haiveho tai. ⁴⁷ Kosiveu hoto ke nahate loui no namigevei avoe, ‘Di la tabagevege laeau atagee ata.

Iale talive Diue ata holioholiale kebia haive dua vai ukolikolie hoto mai vatae ata bahata haiveve.’”

⁴⁸ Abu hoto kateale louge Diue ata holioholiale keau ke evisi vahaeholahai Kosive hoto keho isivilahalu. Ige ukolikolie hoto keho isivilahale keau evievi ata holilu.

⁴⁹ Kateige Kosive hotou vata kemo o bahata sonumaevei tinu. ⁵⁰ Sonumaevei tige Diue ata seleve keau oe kosive isi oe keate ivite lobogevei abuhi Bolome Banabasimeho itumulahai aiogevei nunuvege abu tilu. ⁵¹ Isi o ke halevai Aikoniomue taliho abu velomo gogea sesiaito halevai tilu. ⁵² Isege Antiokae evievi ataeau Munanae Tumu malealemo vahaeho balugalu.

14

Bolou Banabasiti Aikoniomue ata haivema.

¹ Vani mole o kemo Bolou Banabasiti Diue dubue tiale hoto louge hoto keu vuvuneage Diue ata moaga isi Diue ata holioholiale moagaeau hoto ke evisi abu uvu mai Iesuemo mavolu. ² Ige Diue ataeau hotoe dua evioholiale keau hovevevei Diue ata holioholiale kebia lobogevege keau tota hovevevei hotoe tola loui Bolome Banabasime aiogevelu. ³ Isito keau o kemo vani moaga ui Kosive hoto loui Dilavau kebia huhuevei hoesegevale hoto ke loui haivege ataeau ke evisi hilokage hoto keu Dilava hoto seleve. Kosealemo Dilavau au vuvune abostolo kebia ovege abu vuvunevemo vaveve nimotele vai vikoe vaveve degomoleta vama. ⁴ Iale o kemo hoto evimale keau abostolo hoto evisege hoto evioholimale keau Diue ata hoto evima. ⁵ Ige Diue ata holioholiale isi Diue ata seleve kebia degomoleau abu kosivehi isiviale muneta abostolo kebia havei. ⁶⁻⁷ Kateisege Bolou Banabasiti ke evisi detuluvisi Lekonia vata kemo o abuita Lista isi Debi keve velehovoi ata haiveito halevai o degomolemo ata haivei tilu.

Abu Listata Debitae ata haivema.

⁸ Abu Lista keve usege malaha mole neinaveu mamoge veloveu golohovoale keta o kemo ua. Ige oaveve keu avuemo anekianu. ⁹ Iale Bolou ata haivesege keu keve ugulamoi hotove ke evima. Ige Bolou ke elehai huhuige malaha keu au uvu mai Dilavamo mamoaemo Dilavana velove ke hoesehavoage au duaveai. ¹⁰ Bolou kateale huhuaima niavai baita avuhio loui avoe, “Hovelahai laminela.” Ige malaha keu solekavesite hovelahai lamisi oanu. ¹¹ Bolou vaveve kateale vage ata moagataho keau ke elehai abu

hotomo baita loui avoe, “Nahie dilavaeabulike ko ata holisi nahie dobuluvisi lohohu.” ¹² Isi abu dilava mole ivita Banabasi ivihai avoe Susi. Isi abu dilava mole ivita Bolo Bolome dilava mole ivihale keu koseanu. Bolo keu dilavaeabe nahate hoto loumale ata. ¹³ Abu kateisege dilavaeabe Susi ke dubue kosiveu bolomakau malei valavala malei dubueabeu o ke iae uale ke halei lohoale isiviai ovo havei Bolome Banabasime hoesegevei. ¹⁴ Kateho vasege Bolou Banabasiti ke evisi itumulahi abu ogo dikohai bibuluvisi tiale ata moaga kebia vigoe tilu. ¹⁵ Tiale abuhou loui avoe, “La osiohoike katelahama. Noeau ata unaha la nahate. No hotoe dua ke loui la haiveho lohohu. Isito la keau lobo dilava unaha hoesegevema. Iale no isivialeike ke halevai ukolikolie Dilava selevu vata vai otogo vai davala vai avuemo onobenobe bahata vavei otoveale ke hoesehavove. ¹⁶ Subuta kemo Dilavau ata halevege abu abu isivi unaha vama. ¹⁷ Isito vani bahata Dilavau laemo vaveve dua vamale ke elehai kemo hilokave. Keu laheho veni hanavoge la lovi hamale keabuna abu bailahamale vanila bailahagei. Ige la lovi ke isi vahaeholahama.” ¹⁸ Kateai lousege ataeau ke evisito negobedai isiviale ovo havei kebia hoesegevei. Isito Bolou Banabasiti isiviholisi vaveve ke bamulu.

¹⁹ Iniale vani mole Diue ata degomoleau Antioka isi Aikoniomu o baluga kebiamo lohohu. Lohoale ata kebia lobogevege abu ke evisi itumulahi muneta Bolo hamai butuhai mai tiale oe iae mihatui huhuai avoe, “Eu hatinu.” ²⁰ Isito evievi ataeau lohoale evilikahavoge au hovelahai tota oe tiale vani mole Banabasiti o ke halevai Debie tilu.

Bolou Banabasiti abu vata seleve tilu.

²¹ Tiale o keve hotoe dua loui ata haivege ata moagaeau hoto ke evisi Iesu ehovahu. Ige abu tota halevai hoidevevi Listae tiale o keve velehovoi uliale vani mole tota hoidevevi Aikoniomue tilu. Tiale keve uliale vani mole bae halevai Bisidia vatae tiale Antiokae velehovolu. ²² Abu o kebiala ekalesia negotievi namigevei avoe, “La evievi kemo negolahave. Nahiabuna vaveve toela kebia evigeveliege Dilava matamae doga keve tai.” ²³ Kateai loui dubue eloda otovei tilu. Isi vani mole abu lovi ke halevai eloda kebiaho guligulilahi abuhou loui avoe, “La la uvu mai Iesuemo mavoale auna la hoesegevei.” ²⁴ Kateai louito Bisidia vata halevai Babilia vatae velehovolu. ²⁵ Isi tiale Bega isi Atalia o kebiala Dilava hoto loui ata haivelu. ²⁶ Isi Atalia o kemo bouti mai abu o seleve Antioka keve velehovolu. O kemoike ekalesiau subuta abuhou guliguliai avoe, “Dilavau lovi kemo la hoesegevei la tedeavege lovive ke vave.” Ige abu Kosive lovi ke vage uoholige abu tota halevai abu o keve hoidevelu.

²⁷ Hoidevevi lohoale ekalesia bahata namigevege abu igaetoasege Bolou Banabasiti Dilavau abuhi usege abu lovilahamale deiada ke loui ata haivei avoe, “Dilavau humahada alavoge Diue ata holioholiale keau aike Dilava hoto evisi evievi ata holihu.” ²⁸ Kateaito vani moaga bae ekalesia kebiahi ua.

15

Dielusalemae hotohoto baluga

¹ Abu abuhi usege Diudia malaha degomoleau Antiokae lohoale evievi ata namigevevi avoe, “Mosese menakau louale ke nahate la vudie vate bohisi bae ukolikoli mave.”

² Kateai louge Bolou Banabasiti abuhi moleho loui itumulahage ekalesiau Bolome Banabasime namigevevi avoe, “Evievi ata degomole holoovevi abuhi talive Dielusalemae velehovoi dubue kosive isi abostolo kebiamo hoto ke ihu kaovave.” ³ Kateai kebia hanavege abu halevai tiale Venisia vatae velehovoi tiale Samalia vatae velehovolu. Vata abu kebiamo o moagaeau ua. Iale o igaegaemo abu evievi ata haivei avoe, “Diue ata holioholiale keau Iesu hoto evisi ehovama.” Ige abu ke evisi vahaeholahahu. ⁴ Ige abu Dielusalemae velehovoge abostoloea, dubue kosivea isi ekalesia ataeau vahaehoabe valu. Ige Bolou Banabasiti Kosive lovi vasege au tedeavemale deiada ke loui ekalesia kebia bahata haivelu. ⁵ Ige Balisia ata degomoleau evievi ata holiale keau hoveveve avoe, “No isiviale Diue ata holioholiale keau abu vudie vate bohisi Mosese menaka ehovai.” ⁶ Kateai louge abostolo isi dubue kosive keau mole bevuevevi isiviale hoto ke kaovai.

⁷ Abu hotohoto ke vai butuhage Bitau hovelahai loui avoe, “Di haokuvua, la hilokage Dilavau vani mole di ebagemage di tiale Diue ata holioholiale kebia haivege abu Dilava hoto evisi ehovahu. ⁸ Ige atae uvu hilokamale Dilava keu Diue ata holioholiale keau Dilava nimo duaveage au au Munanae Tumu nahie oveale ke nahate ovenu. ⁹ Diue ata isi Diue ata holioholiale keau Dilava nimo mole nahate unaha. Diue ata holioholiale keau abu uvu mai Dilavaemo mavoge au vaveveabe toela ulihanu. ¹⁰ Iale osiale moike la isiviale Dilava vaveve kaovai evievi ata kebiamo Moseseu subuta louale ke louge abu vai. Subuta nahie buluveau menaka isute ke ehovaveve keu abuemo anekianu. Ige nahita ke ehovaveve keu nahimo anekianu. ¹¹ Isito nahie Kosive Iesuu nahie huhuevevi nahi tedeaveale kemo

nahiabuna nahie uvu mai avuemo mavoliege ukolikoli malei. Isi Diue ata holioholiale kebiata auna ovei.”

¹² Bitau kateai louge ata bahataeau ke evisi tobekai usege Bolou Banabasiti abu lovilahasege Dilavau tedeavesege abu vikoe vaveve ataemo vamale ke loui haivelu. ¹³ Abu hoto ke loui gabiasege Diemisiu avuta hovelahai loui avoe, “Di haokuvuia, di hoto evive. ¹⁴ Saimoni Bitau la haiveale keu koseanu. Dilavau aike Diue ata holioholiale kebia huhuevei isivialeike kebiama ata degomole malevege abu atave holisi. ¹⁵ Iale subuta belovetau louale keu nova seleve holinu. ¹⁶ Au avoe, ‘Kosiveu loui avoe, Gabie vani molena lohoge dana Deividi valadau o nahate koilahale ke ebagemai houge auna tota duave holisi.

¹⁷ Ige elike ata bahataebuna di kaovage dana Diue ata holioholiale kebia hohavege abuna di ata seleve holisi.

¹⁸ Kosiveu subuta hoto ke hilokaika vaimo lounu.’

¹⁹ “Katealemo di huhuige nahi Diue ata holioholiale kebiama menaka moaga lou halevai. Keau isiviale Dilava ehovai. ²⁰ Iale nahi aiogevae halevaito vaveve koseale vai. Nahi levaleva abuhohisaliai loui kosea, ‘Lainaho bae abu mesia havei loboe dilava hoesegevemale ke igelive. Isi lainaho mole keatehi ladevegeve. Isi lainaho mesia tahoveu lotioholimale ke igelive. Isi lainaho tahove igelive.’ Nahi hoto ke unaha hisaliai abuhohisaliai. ²¹ Kosealemo vagana moaga ke uvumo bula igaegae kemo abu Diue dubue Mosese menaka ke dodavelata o bahata haivei tilu.”

Diue ata holioholiale kebiaho hisialiale

²² Diemisiu kateai louge abostoleau, dubue kosiveau ekalesia atahi hotohotolahai ata abuita tabagevei isiviale abu Bolota Banabasita holoevei abu Antiokae ekalesiaho hisialiale keta mai tai. Iale malaha mole ivilike Diudasi. Ivive moleike Basabasi. Isege mole ivilike Sailasi. ²³ Abu levaleva ke hisaliai avoe, “No haokuvuia, Diue ata holioholialeau Antiokae umale, Silia vatae umale isi Silisia vatae umalebia lahehoike no ko hisaliai hanavolu. Abostolea, dubue kosivea isi ekalesia ata Dielusalemale umale noeabulike laheho no hoto ko hisaliai hanavolu. ²⁴ No evige no esemu degomoleau keve tiale hoto mole louge la uvuu kemo kibikibianu. Abu vaveve kateale vale ke no hilokaholisi kebia hanaveholilu. ²⁵ Llike no vaimo mole bevuevei hotohotolahai esemu abui kobia tabagevei hanavege abu no haokuvu Banabasita Bolota holoevei abuhi lae tilu. ²⁶ Abostolo abu keau nahie Kosive Iesu Keliso ke lovi valage ataeau isiviale havege abu haluvisi. ²⁷ No Diudasi Sailasi laheho hanaveale kebia lana belagevege abuna no louale ke laheho loui. ²⁸ Munanae Tumuu noheho louike vage no laheho loui isiviholiale la no menaka moaga ehovei kemo isulahaliho. Isito no louale ko unaha ehovave. ²⁹ Lainaho bae abu mesia havei malei loboe dilava hoesegevemale ke igelive. Isi lainaho tahove keta igelive. Isi mesia tahoveu lotioholimale ke igelive. Isi lainaho bae mole keatehi ladevegeve. Lana no louale ko valiege vaveve dua vave. No hotou kemo kateai ua. La nohovu.”

³⁰ Abu levaleva ke hisaliai mai esemu kebia ovei hanavege abu mai Antiokae tilu. Tiale ekalesia bahata hohavege abu igaetoasege abu levaleva ke mai ovelu. ³¹ Ige Antioka ataeau levaleva kemo abu hotoe dua hisialiale ke dodavei vahaeholalalu. ³² Ige Diudasi Sailasi belovetae ata holiale Antiokae ekalesia kebia haivelage abu abu evievimo negolalalu. ³³ Ige keau vani degomole abuhi uliale Antioka ataeau hanavege abu vahaehota hoidevei tota Dielusalemale tilu. ³⁴ Abu tisege Sailasi isiviale o kemo ui. ³⁵ Isege Bolou Banabasiti Antiokae ui ata degomolehi Kosive hoto loui ata haivema.

Bolou Banabasiti mole tasalievulu.

³⁶ Iniale vani mole Bolou Banabasi namihai avoe, “Naiti hoidevei talive nahi subuta vata bahatae Dilava hoto loui haivemale kebia elegeve. Mesoho keau ue dua vama o ue toela vama.” ³⁷ Kateai louge Banabasi namihai avoe, “Nahi Dioni Maka melamege au nahehi tai.” ³⁸ Isito Bolou isiviholialeike mo keu abuhi taliho. Kosealemo keu abuhi lovanata Babilia vata keve halevei hoilahai au oe tinu. ³⁹ Kateai ke loui moleho itumulahai kemo mole tasalievulu. Ige Banabasiu Dioni Maka melamei avui bouti mai Saibalasi tilu. ⁴⁰ Isege Bolou Sailasi melamei avuti tige ekalesiaeu namigeve avoe, “Dilavana bae la huhuevei au uvu laovei la hoesegeve.” ⁴¹ Ige abu halevai Silia isi Silisia vatae ekalesia haivege abu abu evievimo negolalalu.

¹ Bolou Sailasiti tiale Debi oe velehovoi tilialeau Listae velehovolu. O kemo evievi ata abuiua ua. Keabulike Timotiu abu neinati. Neinave keu Diue keate. Isege mamave keu Gilikie malaha. ² Ige evievi ataeau Lista isi Aikoniomue umale keau Timoti eahalema. ³ Katealemo Bolou isiviale melamei avuti tai. Isito Diue ataeau hilokage mamaveu Gilikie ata holiame Bolou melamei vudive vate etulenu. ⁴ Isi kateai au esemuhi o igaegaela tiliale Dielusalemae abostolo isi dubue kosive keau menaka nehe louale ke loui evievi ata haivei avoe, “Menaka ko evisime ehovave.” ⁵ Ige ekalesiaeau ke evisi abu evievimo negolahage ata degomoleau ke elehai Iesu ehovama.

Bolou Toloasie lahoahoanu.

⁶ Iniale vani mole Bolou au esemuhi isiviale Esia vatae tai. Isito Munanae Tumuu isiviholinu abu keve taliho. Ige abu halevai Vilisia vatae tiale halevai Galesia vatae tilu. ⁷ Tiale keau Misia vatae velehovoi isiviale Bitinia vatae tiho vasege Iesu Munanae Tumuu humahaabe bamunu. ⁸ Ige abu inuta Misia vatae tialeau o mole Toloasie velehovolu. ⁹ Keve velehovoa vavi kemo Bolou lahoahoasege Masedonia malaha moleu lamisi hohavoi avoe, “Loholive kove no tedaavenela.” ¹⁰ Bolou lohoahoa ke vageto no isiviale Masedoniae tai. Kosealemo no hilokage Dilavaike lahoahoa kemo no haivei isiviale no talive hotoe dua loui ata kebia havei.

Keate mole Lidia keu evievi ata holinu.

¹¹ Katealemoike no Toloasi halevai bouti mai inuta tiale Samotesie velehovolu. Isi vani mole tilialeau Masedonia vata keve o mole Niabolisie velehovolu. ¹² Velehovoi heila tialeau Masedonia vata kemo o mole baluga Bilibaie velehovolu. Loma ata moagaeau o kemo umale kemoike no tiale vani degomole ua. ¹³ Uliale bulamo huluhulai kosea, “Diue ataeabuna e bavae guligulilahi.” Isi kateai tige keate degomoleau keve mole bevuevi uge no hotoe dua loui kebia haivelu. ¹⁴ Ige Taiataila keate mole Lidia keu no hoto evima. Keate keu ogoe dua tahote voievemale keate. Keu Diue ata holioholisito Dilava hoesehavomale keate. Ige Dilavau keate ke uvu alavoge au Bolou hoto loumale ke evisi au uvu mai Iesu ominu. ¹⁵ Iniale keate keu ovemo umale kebiahi Iesu ehovai babatolahalu. Ige keate keu no namigevevi avoe, “La huhuige di evievie keate seleve holige loholive di oe nohehi uve.” Isi kateai negoai louge no avuluvuta tilu.

Abu Bolota Sailasita malevevi dibulae otovelu.

¹⁶ Vani mole no guligulihio tisege ma mole kosivevau mage au abuemoe heiata lovia male keu nohehi belemanu. Ma kemo munanae toelau uale kemo auna gabie ono vadeu lohoveve ke loui ata namigevege abuna ibinave vage kosiveve abuna kemo moni baluga malegei. ¹⁷ Iale ma keu no ehovei baita hoai loui avoe, “Malaha koeau Dilava esemu abulike koea. Iale keau la oleve kateai ukolikoli maveve ke louma.” ¹⁸ Vani moaga kateai loulage Bolou avuhu itumuai hoilalahai munanae toela ke namihai avoe, “Iesu Keliso ivimo di a imihama. Ma ke halei tenela.” Ige solekavesite munanae toela keu ma ke halei tinu. ¹⁹ Isi kateige ma ke kosiveau ke elehai loui avoe, “Noeabuna bae oleve kateai ma komo moni malegei.” Kateai ke loui Bolota Sailasita malevevi kotahou tilu. ²⁰ Kebia malevevi tialeau Loma kosive kebia vudimo otovei loui avoe, “Ata koeau Diue ataea. Iale abu nahie o komo vaveve toela vama. ²¹ Keau abu vaveve loui o komo Loma ata nahie menaka aiogevema. Iale nahi bae vaveveabe ke ehovai nahie vaveve halevalivebene.” ²² Keteai louge oe ataeau ke evisi isiviale Bolota Sailasita malevevi havei. Ige Loma kosivevau ogoeabe dikohai abu esemu namigevege abu visugevelu. ²³ Kebia visugevelata dibulae hanavei dibulae kosive namihai avoe, “Kobia malevevi otovei bamueve dua vanelu.” ²⁴ Ige dibulae kosive keu ke evisi malevevi oe uvu seleve otovei abu idi baluga kobugeveale ke uvumo vloeabe malei emei bamuevelu.

²⁵ Iniale vavie minamo Bolou Sailasiti nogoli loui Dilava hoesehavosege dibulae uale keau ke evima. ²⁶ Kateisege hamu balugau hatuge dibulae o keu kibikibiage solekavesite udaha bahataeau solahai alavoge abu seimita umudiveale keau bahata solahalu. ²⁷ Ige dibulae kosivevau hovelalahi elehage udaha bahataeau solahage au huhuavi avoe, “Atae abulemo bahata nova detuluvisi tihatulu.” Isime au siga mai isiviale au ebika bisi. ²⁸ Kateisege Bolou baita hohavoi avoe, “A ebika hama halenela. Noeabulike bahata kove ua.” ²⁹ Keteai louge dibulae kosivevau au esemu mole namihage au lameba mai omige au mai Bolome Sailasime oe uvue tiale teteai vudiabemo dobai hoesegevenu. ³⁰ Isi holovevi heie lohoale namigevevi avoe, “Di kosivea, dana ono vade vai ukolikoli mai.” ³¹ Ige abu namihai avoe, “A uvu mai Iesu Kelisomo mamoi bae a esehi ukolikoli mave.” ³² Keteai louito Kosive hoto loui haivui ovemo umale kebiata haivelu. ³³ Kateimale vavimo dibulae kosivevau Bolome Sailasime vatee ohe totoai hoesegevenu. Hoesegevege uholige au au

omo umale kebiahi babatisoalu. ³⁴ Ige kosive keu kebia holovevei au oe tiale lovi ovege abu ilu. Ige malaha keu au ese laluvei abu uvu mai Iesuemo mavoalemo vahaeholalahu. ³⁵ Iliale vavita Loma kosiveau abu bukate hanavege abu tiale dibulaa kosive ke namihai avoe, "Kebiah iovege abu tai." ³⁶ Ige dibulaa kosiveu ke evisi tiale Bolo namihai avoe, "Loma kosiveau hoto hanavoi isiviale Sailasiti teve. Iale halevai talive ue dua vave." ³⁷ Isito Bolou tiale bukate kebia namigevei avoe, "Keau no malevei kotaholisito ata moaga kebia vudimo no visugevei no malevei dibulamo otovelu. Isi aike isiviale no iovege no hoidevei tai. Iale no bae katelahalivebene. Kosealemo noeau Loma ataea. Iale Loma kosiveau bae loholive no iovege no bae tai." ³⁸ Kateai louge bukateau hoidevei tiale Loma kosive namigevei avoe, "La malaha abuita malevei dibulamo otoveale keau Loma atae abulike." Ige Loma kosiveau ke evisi vabulalahu. ³⁹ Isi tialeau Bolota Sailasita sovavigevei loui avoe, "La nohovu. No la aiogeveale keu toelanu. La o ko halevai tige duave." ⁴⁰ Kateige Bolou Sailasiti dibula halevai Lidia oe tialeau keve evievi ata elegevei hoto loui negotieveti halevai tilu.

17

Bolomeau Tesaloniae tilu.

¹ Halevai tilialeau Avibolisi isi Abolonia evihai tilialeau Diue dubuu Tesaloniae ualeve velehovolu. ² Keabuna oleve keve tiliege Diue dubuu uale keve guligulihagei. Iale bula abuita igaeta kebiamo Bolou tiale dubumo guligulihai Bukae Hoto dodavei ata haivenu. ³ Isi Bukae Hotou Kelisou lohoveve louale ke loui namigevei avoe, "Dilavana Diue ata tedeaveveve kosive ke hanavoge auna lohoniege vatehani maleime hatisi tota hovelahai. Iale di la namigevema. Diue ata tedeaveveve keike Iesu Keliso." ⁴ Kateai louge Diue ata degomole isi Dilava hoesehavomale Gilikie ata moaga isi keate ivite degomole keau hoto ke evisi Iesu ehovalu.

⁵ Ige Diue ata degomoleau hoto ke evisi itumulahai tilialeau laskolo namigevege abu mole bevuevei igaetoai lohohu. Lohoaleau o ke bahata aiohavoiito Bolome Sailasimeho nilahai lohoaleau evievie ata mole Diesoni ke omo lohohu. Keau isivialeike Bolome Sailasime elegevei havei malevei talive atae nimo otovei. ⁶ Isito nilahage uoholige abu Diesoni mai evievi ata degomoleta malevei tiale oe kosive nimo otovei baita abuhohu loui avoe, "Ata koabulike o bahatala vaveve toela vama. Iale keabulike o nahie oe lohohu. ⁷⁻⁸ Keau lohoge Diesoni malevei o hatuevenu. Iale keau bahata Loma kosive baluga Sisa ke menaka aiohavoma. Kosealemo abu loui avoe, 'Kosive mole baluga Iesu keu ua.'" Laskoloeau kateai louge Loma kosiveau ata bahatahi hoto ke evisi itumulalahu. ⁹ Ige Loma kosiveau louge Diesoni evievi atahi ke ibina vai moni ovege abu iovege tilu.

Bolomeau Beliae tilu.

¹⁰ Iniale vau giduige evievi ataeau Bolota Sailasita hanavege abu Beliae tiale velehovoiito halevai Diue dubue tilu. ¹¹ Keve tige ata kebia vaveveu Tesaloniae ata kebia vaveve nahate vaholisito duaveanu. Keau hotoeabe evisi ma seleveai vani bahata Bukae Hoto dodavei isiviale hilokage Bolou loumale kena vali seleve holisi. ¹² Vaveve katealemoike Diue ata moagaeanu hoto ke evisi Iesu ehovage Gilikie ata ivite degomoleta Iesu ehovalu. ¹³ Kateige Diue ataeau Tesaloniae umale keau ke evisi hilokage Bolou Beliae tiale Dilava hoto loui ata haivenu. Ige abu ke evisi lohoaleau isiviai ata holovevei abuhi talive Bolo hamai. ¹⁴ Kateige evievi ataeau ke evisi Bolo melavei avuluvuta davalava vavae tisege Sailasiu Timotiti oe ua. ¹⁵ Keau Bolo melavei tiale Atenie velehovoi mavoito hoidevei Beliae lohoho vage Bolou namigevei avoe, "Talive Timotita Sailasita namigevege abu solekai loholive komo daemo lohohi."

Bolou Atenie ua.

¹⁶ Bolou kateai louito o kemo Sailasime Timotime hemevei uime loboe dilava moagamoaga elegeveime kabebianu. ¹⁷ Au kebia elegevei tiale Diue dubue Diue ata isi Gilikie ata kebia haivenu. Isi tiale maketie Dilava hoto loui ata kebiata haivenu. ¹⁸ Kateige lulelete ata degomoleau Ebikulia hoto mai lohoale keau Sitoika hoto male kebiahi Bolo hoto kemo hoto nimolete louma. Kosealemo Bolou Iesuu hatai hovelahale ke loui namigevenu. Ige abu mole namigevei avoe, "Malaha vadeike ko au ebika mai mihatuma. Mesoho malaha keu dilava nimolete deiadaike au ke louma." ¹⁹ Kateai Bolo melavei kanisolo balugaeau umale keve tilu. Matama ke ivilike Aliobagasi. Abu Bolo mai tiale keve velehovoi avuhohu loui avoe, "A aike loumale hoto ke ihu loui no namigevenela. ²⁰ A hoto degomole louale keau noemo hotoe doge. Iale no isiviale aike ke ihu loui no namigevenela." ²¹ Kosealemoike abu hoto ke loulu. Ateni ata isi ata degomoleau abuhi umale keabuna vani bahata hoto mole doge loui mole haivei isiviale ke evigei.

²² Abu kateai louge Bolou hovelahai namigevei avoe, “Ateni malahaea, di elehage laeau dilava moagamoaga hoesegevema. ²³ Di la o kola lohoale la loboe dilava hoesegevemale ke elehanu. Isi la batabatae golomo la loboe dilava hoesehavoi hisialiai loui kosea, ‘No hilokaholiiale dilava ke no komo hoesehavoma.’ Isito la dilava hilokaholisito hoesehavomale ke dana nova loui la namigevei. ²⁴ Dilava keu vata vai onobenobe vaevei avuemo toveale abu otogoe Kosive isi vatae Kosive. Iale keu bae ataeau abu adala dubu houale kemo ulivebene. ²⁵ Dilava igaeu onobenobe bahata vaevei lu ata ovealemo nahiabuna oleve kateai bae adala vale mai omisi. ²⁶ Dilavau subuta ata mole igae vale kemoike ata bahataeau lohoale vata bahatamo igaegeaei ui lotilu. Isito ataeau uoholisege au abu oleve keve uveve isi vani vaesute uveve ke ovenu. ²⁷ Au ke vai isiviale ataeau kaovai huhuai elike hoesehavoi. Au ke vaito nahiemo haeava holioholinu. ²⁸ Iale nahiabuna vuvunevemo ui tigei. Di hoto ke igaeu la ata moleu loui avoe, ‘Nahita eseabe nahiabulike.’ ²⁹ Iale nahi Dilava ese holialeu huhuihuhui nimolete va halevai. Ataeau golo, silivi, mune malei abu lulelemo loboe dilava vaveale keau Dilava vaveu holioholinu. Isito Dilava seleve keu nimolete. ³⁰ Subuta ataeau vaveve kateale vage Dilavau kebia elegevei aiogeveholisito aike ata bahata namigevei avoe, ‘La vaveve toela ke halevai di ehovave.’ ³¹ Au louale keu koseanu. Au vani mole ebagemale kela au ata mole ebagemale kena bae ata bahatae vaveve kaovai abu vamale kemo ibinaeabe ovei. Iale ata keike Dilavau etuvage hovelahanu.”

³² Atau hatisi hovelahale ke Bolou louge ata degomoleau ke evisi hehavosege degomoleau loui avoe, “Loholive tota hoto ke loulomoleage no evisi.” ³³ Kateai louge Bolou halevei tinu. ³⁴ Isege ata degomoleau hoto evisi abu uvu mai Iesuemo mavoi Bolo ehovau. Iale kebiamu ata degomole abulike koea. Daioniasi (Keu Aliobagasie kanisoloe esemu). Ige keate moleike Damalisi. Ige ata degomolea.

18

Bolou Kolinitie tinu.

¹ Iniale vani mole Bolou Ateni halei Kolinitie tinu. ² Keve tiale Diue ata mole Akuila isi mahinave Bisila kebiamu tinu. Malaha ke neinaveu Bontasi vatae mamoge au halei tiale Itali vatae ua. Keve uniale Loma Kosive baluga Kalodiasiu menaka mamoge Diue ata bahataeau vata ke halevai vata degomoleve tilu. Kateige Akuilau abu mahinati Kolinitie lohoge Bolou tiale kebia elegevei abuhi ua. ³ Abuhi keve ui loviabe kei nahate vai abu valai houmale ke nahate vai kemo ibina malenu. ⁴ Isi bula bahata kela auna Diue dubue tiniege Diue ata isi. Giliki ata kebia haivei isivialeike abu Iesu hoto evisi ehovai.

⁵ Isege vani mole Sailasiu Timotiti Masedonia halevai Kolinitie lohohu. Lohoale velehovoge Bolou au lovi ke halei vani bahata hotoe dua loui Diue ata haivei avoe, “La tedeaveveve kosive keike Iesu.” ⁶ Kateai louge abu ke evilata hotove ke bamui avuhu hotoe toela louge au abuhu itumuai au ogo sesiai abuhu loui avoe, “La hoto ko bamualemo vatehani malege keu la isivimoike. Keu di isivi holioholinu. Iale nova komo dana la halevei Diue ata holioholiale kebia haiveho tai.” ⁷ Kateai louito halevei tiale Diue ata holioholiale malaha mole Tiasiasi Diasitasi ke ou Diue dubue vavamo ualemo biloanu. Malaha keu Dilava hoesehavomale ata. ⁸ Isege Diue dubue kosive Kilisibasiu au uvu mai Iesu omige ovemo umale kebiata abu uvu mai Iesu omilu. Ige Kolinitie ata degomoleau hoto ke evisi abu uvu mai Iesuemo mavoi babatistolahalau.

⁹ Vavi molemo Dilavau lohoahoa nahate Bolo omige au elehasege Kosiveu avuhu loui avoe, “Ainaho bae di hoto louveve ke vabuhavoi halegelive. Isito negobedai ata haivegenela. ¹⁰ Dana aiti uge atabeu bae a aiovaholivebene. Kosealemo di ata moagaabulike kove ua.” ¹¹ Ige Bolou vagana igae isi bata sigisi (6) ke uvumo o kemo ui Dilava hoto loui ata haivenu.

¹² Vani mole Loma gamaniu kosive mole Galio ebagemage au Giliki vata nalinu. Kateimalela Diue ataeau mole bevuevei Bolo mai kotaho tilu. ¹³ Mai tiale kotae kosive namihai avoe, “Malaha kou isiviale ataeau vaveve nimolete vai Dilava hoesehavoi Lomae menaka ke aiovavoi.” ¹⁴ Kateai louge Bolou isiviale hotoeabe ibina louhu vasege Galio Diue ata namigevei avoe, “Di la namigevege evive. Malaha kou lavamo vaveve toela vage dana la hoto evisi la tedeavei. ¹⁵ Isito di huhuige laeau la menaka kemo atae ivi unaha isi hoto moleike la ko loulomoleu di bae malaha kemo vaveveve kaovalivebene. Isito la biaeau bae ke kaovave.” ¹⁶ Isi kateai loui ata kebia nunuvege abu heie tilu. ¹⁷ Kosive keu hotoeabe evioholige abu heie tiale abu dubue kosive Soseteni evudei mai lohoale kotae oe ulidamo hamage Galio ke elehai hotobe louholisi momoleai ua.

Bolou Antiokae hoilahanu.

¹⁸ Vaveve keu uoholige Bolou Koliniti atahi uniale vani mole kebia halevei Akuilata Bisilata holoevei abuhi Senikiliae tilu. Keve usege Bolou Dilava ivimo menakale kemo Diue vaveve nahate vai au kina bohinu. Kateaito abuhi bouti mai Siliae tilu. ¹⁹ Tilialeau humaha tavae Evesasie dobuluvige Bolou avu igae tiale Diue dubue atahi hotohotoanu. ²⁰ Ige ataeau isiviale Bolou vani degomole abuhi ui. Isito au isiviholinu. ²¹ Isi kebia namigevei avoe, "Dilavana isivige dana tota lohoniage bae la elegevei." Kateai louito kebia halevei bouti mai tinu. ²² Tiale Sesaliae velemai bouti halei Dielusalemae tiale ekalesia kebiahi vahaehoitoo halevei Antiokae tinu. ²³ Keve velemai vani degomole unahamo uito halei tota Galesia isi Vilisia vatae tiale evievi ata tedaevei negotievenu.

Abolosiu ekalesia tedaevenu.

²⁴ Bolou kateai oisege Diue malaha mole Abolosiu Alekisandia o balugamo lohoale Evesasie lohonu. Malaha keu hoto loue dua vai Bukae Hoto kaovai kemo lulele baluganu. ²⁵ Subuta malaha moleu Dioniu Iesu deiada louale ke loui namihage au negobedai Iesu hoto loue dua vai ata haivenu. Isito keu Iesu vaveve bahata hilokaholisito Dioni ata babatisogevemale ke vaveve unaha hilokanu. ²⁶ Au kateai Diue dubumo vabuoholisi Kosive hoto louge Akuilau abu mahinati ke evisi melavei tiale abu oe Dilava deiada degomole neniai loui namihalu. ²⁷ Iniale vani mole Abolosiu isiviale Giliki vatae tai. Tige Evesasie ataeau haokuvuiabeau Giliki vatae umale kebiaho levaleva hisaliai isiviale abu Abolosi hoesehavoi mai o hatui. Iniale au keve velemai Dilavau kebia huhuevei hoesegeveale hoto ke loui kebia negotievenu. ²⁸ Negotievei ata moaga kebia vudimo lamisi Diue ata kebiaho hoto negote loui hotoeabe hamai Bukae Hoto mai selevetisi abuhu loui avoe, "Iesu keu Diue ata tedaeveveve kosive Keliso."

19

Bolou Evesasi oe lovianu.

¹ Abolosiu Kolinitie usege Bolou lohoale Esia vatae tiale Evesasi oe velemai evievi ata degomole elegevenu. ² Elegevei belagevei avoe, "La subuta evievi ata holige Munana Tumutena laemo lohonu." Ige abu loui avoe, "Noeau a Munana Tumute loumale ke hilokaholilu." ³ Ige Bolou belagevei avoe, "La ole hotoike evisi babatistolahalu." Ige abu namihai avoe, "Noeau Dioni hotoike evisi babatistolahalu." ⁴ Ige Bolou namigevei avoe, "Dioni ata babatisogevemale keu Diue ata namigevei avoe, 'La la vaveve toela halevaliege bae babatistolahave. Isi la uvu mai di iae lohemale Kosive Iesu kemo mavoi ehovave.'" ⁵ Kateai loui haivege abu ke evisi Kosive Iesu ke ivimo babatistolahalu. ⁶ Ige Bolou au ada mai kebia tatamo mamoge Munanae Tumuu abuemo lohoge abu hoto nimolete loui kemo Dilava hotota loulu. ⁷ Vaveve kateale vale keau bahata tuelo (12) unaha.

⁸ Ige Bolou ata kebia halevei bata abuita igaeta ke uvumo Diue dubumo ataeau Dilava adae vuvunemo uveve hoto ke loui ata haivenu. Au kateai baita loui isiviale ataeau hoto ke evisi Iesu ehovai. ⁹ Isito ata degomoleau hoto ke evisito isiviholilu ehovalihu. Isi atae uvumo Kosive ehovaveve ke aiahavoi hotoe toela louge Bolou kebia halevei evievi ata unaha holoevei abuhi tiale ebouamale o baluga kemo biloanu. O keu Tailanasi oike. Iale o kemo Bolou vani bahata hotohotoai ata haivema. ¹⁰ Vagana abuita ke uvumo ata haivelage hoto keu Esia vatamo o kebia bahata sonumai gabiage Diue ata isi Diue ata holioholiale keau bahata hoto ke evilu.

Sikiva esee deiada

¹¹ Dilavau au vuvune mai Bolou omige au vaveve nimolete vaevenu. ¹² Katealemo evievi ataeabuna Bolou muko isi omige ivi ke unaha malei tiliege vavahanite kebia golomo otovege vavahaniabe kena uoholigei. Isi munanae toela malemale kebia golomo otovege munanae toelana halevei tigei. ¹³⁻¹⁴ Bolou au esemuhi kateisege Diue ata degomoleau o igaegaela olahai munanae toela nunuvemale keau lohoale Bolou vamale ke nahate vai isiviale Iesu ivimo ata hoesegevei. Diue dubue kosive baluga Sikiva ke ese bahata seveni (7) abulike vaveve kateale vama. Iale vani mole keau tiale munanae toelau malaha molemo uale ke namihai avoe, "Bolou Iesu ivimo ata haivemale ke ivimo no a namihale halei tenela." ¹⁵ Kateai louge munanae toela keu abuhu loui avoe, "Di Iesuta Bolota hilokaevenu. Isito laeau olemea." ¹⁶ Kateai lousege malaha nehe munanae toelau avuemo uale keu kebia vudievei havei ogoeabe dikohage keau vatetumu malei ove ke halevai vava unahata detuluvisi tilu. ¹⁷ Abu kateige ata bahata Evesasie uale keau ke evisi vabulahalai Iesu hoesehavoge Kosive Iesu ke iviu abuemo baluganu. ¹⁸ Ige evievi ataeau lohoale ata bahatae vudimo vaveve toela abu vamale ke loui haivelu. ¹⁹ Ige eveimale ata degomoleau abu evee vaveve bukamo hisaliamale kebia malei lohoale ata bahatae

vudimo mahoevelu. Buka kebia bahata mahoeveale ibinaeabeu bahata vivti taoseni kina (K50,000).²⁰ Vaveve katealemoiki Dilava hotou negoi o bahata sonumai tinu.

Evesasie ata moleu Boloho itumuale deiada

²¹ Vaveve ke iae Bolou isiviale o ke halei Masedonia vata, Giliki vata isi Dielusalema o baluga kebiae tai. Kateai huhuai avoe, “Dana o kebiae taito bae halei tota Lomae tai.”²² Kateai Esia vatae uito au esemu Timoti isi Elasisi kebia hanavege abu vasohuta Masedonia vatae tilu.

²³ Bolou Evesasie usege vaveve toelau evievi ataemo lohoale keu koseanu.²⁴ O kemo abuna siliva mahoi loboe dilavae munana vavevegei. Loboe dilava ke ivilike Daiana. Iale keabuna lovi ke vai moni baluga malegei. Lovi ke vale malaha mole ivilike Demitiasi.²⁵ Iale malaha keu au haokuvu degomole abu avuluvuta lovimale kebia hohavege abu mole bevuesege malaha keu namigevegei avoe, “Di haokuvua, nahi lovi komoike ibinae dua malema.”²⁶ Isito Bolou vamale ke la elehai evige au ata haivei avoe, ‘Ataeau abu adata dilava nahate vaveve keu Dilava seleve holioholilu.’ Bolou hoto kateale louge Esia vata komo isi o baluga komo ata moagaeau hotove evisi ehovulu.²⁷ Katealemo ataeabuna nahi vamale ko voilahaholige nahiabuna monioholisi. Isi kateale vage nahie dilava Daiana ketana uoholige oleteabuna bae lohohi komo ke hoesehavoi. Aike Esia vatamo umale kebia isi vata degomolemo umale kebiabulike nahie dilava hoesehavoma. Isito ataeabuna Bolou hoto evisi ehovage nahie dilava kena uoholisi.”

²⁸ Demitiasiu kateai louge kemo mole bevueve uale keu hoto ke evisi detumulahai baita holahai avoe, “Nahie dilava Daiana keu Evesasi o komo balugataho.”²⁹ Kateai baita louge o kemo ata bahatae au ke evisi loui tai lohoma. Kateilata mole bevueve lohoale Bolou haokuvu Gaiasi isi Alistakasi kebia elegevelu. Masedonia ata abui keu Bololuvuta olahamale ataea. Iale abu kebia elegeve maleve ebove o tilu.³⁰ Ige Bolou ke evisi isiviale talive ata kebia namigevegei. Isito evievi ataeau katealeho isiviholisi kelualu.³¹ Ige Bolou haokuvua vata kemo gamani baluga holiale keu hoto ke evissime Boloho hoto hanavoi namihai avoe, “Ainaho eboumale o keve talive.”³² Kateisege o ke uvue ata bahatae au hoto ke loui daudauasege degomole au hoto nimolette lousege degomole au hoto mole louma. Kosealemo abu keve igaetoale ke ihu hilokaholilu.³³ Ata bahatae au kateisege Diue ataeau Alekisanda kabitisi iovai isiviale au talive atae vudimo lamisi hoto loui. Ige au tiale au adata kelueve isiviale namigevege abu hoto ke hilokai.³⁴ Isito abu ke elehage keu Diue ata. Katealemo abu tota hoto ke baita loui holahai avoe, “Nahie dilava Daiana keu Evesasi o komo dilava baluga.”

³⁵ Abu hoto ke unaha loui kateilage oe kosive balugau hovelahai kebia kelueve namigevegei avoe, “Evesasi ataea, ata bahatae au hilokage nahie o komo nahie dilava baluga Daiana ke nahiabulike nalima. Isi mune tumuteu otogomo dobai lohoale keta nahiabulike nalima.”³⁶ Atabeu bae ke vovoholivebene. Iale la osiohoike vaveve kateale vama. Vaveve kateale halevai tobekai uve.³⁷ La osiohoike malaha abuita kobai maleve loholu. Keau nahie dilavae dubu kemo onobe vai vavoloholilu. Isi nahie dilava keho hotobe toela louholilu.³⁸ Iale Demitiasiu au esemuhui isiviai kotah valiege kotae vaniu lohoge bae loholive vaveveabe lousege abuta la vaveve loui. Vani kela kotae kosive usege loholive bae ke louve.³⁹ Isi o komo hotobeta uge ke mai talive kanisolo hotohotomo bae louve.⁴⁰ Lana kateale vaholisito vaveve toela koseale vage Loma gamanina ke evisi nahie o ko aiohavoi. Isi nahie belagevege nahiabuna oleve kateai vaveve ke ihu loui namihai.”⁴¹ Kateai louito ata kebia iovege tilu.

20

Bolou Masedonia isi Giliki vatae tinu.

¹ Vaveve toela keu uoholisege Bolou evievi ata bahata hohavege abu igaetolasege au hotoe dua loui kebia negotiege uoholige au halei Giliki vatae lohonu.² Keve tiale o igaegaela ata haivei negotiege uoholige au halei Giliki vatae lohonu.³ Keve uale bata abuita igaetae au uoholige au isiviale bouti mai Silia vatae tai. Isito evige Diue ataeabuna mai hamai. Kateige au kemo au tiveve ke halei hoilahi Masedoniae tinu.⁴ Keve tige ata koeau nohehi tilu. Belia malaha mole Bilusi ke mo Sobata. Ige Tesalonia ata abui Alistakasi isi Sekudasi. Ige Debi malaha mole Gaiasi. Ige Esia ata abuita igaeta Timoti, Tikikasi isi Tolovimasi.⁵ No kebiahi tige keu tota vasohuta tiale Toloasie no hemevege ua.⁶ Keu keve usege no Bilibai o kemo uale Diue vahaeho vani mole Basova keu uoholige no bouti mai tiale vanie ni ada moleu uoholisege no Toloasie veleholu. Keve velehovoi evievi ata nehe kebiahi behovoi bula igaevu abuhi ua.

Bolou Toloasie au hotoe gabi lounu.

⁷ Iniale bulae vavimo no lovi iliho bahata mole bevuevei igaetolahasege Bolou vavita halevei taliho namigevelage tiale keu vae mina manu. ⁸ No hotohotoimale o ke uvue lameba moagaeau ua. ⁹ Iale ehue o ke vuindoamo mo mole ivi Iutikasi keu kerno ugulamoi Bolo hoto evinata niveu haniage au kemo lahanu. Inata o ke egete vuvhai heila dobage abu heie tiale ebagevai elehage hatinu. ¹⁰ Ige Bolou heie tiale mo ke ebagemai evudei loui avoe, "Ninalaha halevave. Mo kou hatioholisito nita ua." ¹¹⁻¹² Kateige abu mo ke melavei oe tiale mo ke elehage nita uge abu ke elehai vahaeho balugalu. Ige Bolou tiale oe uvue abuhi aleto isi tota haivelage vau alamoge halevei tinu.

Toloasi halevai Militasie tilu.

¹³⁻¹⁴ Bolou heila Asosie taito no namigevege no bouti mai tiale keau keve mai bae abuhi Mitilinie tilu. ¹⁵ Tiale vata mole ivi Kiosi evihai tialeau vani mole Samosie velehovolu. Isi vani mole tialeau Evesasi o kemo lavioholisito inuta tiale Militasie velehovolu. ¹⁶ Bolou Esia vata kemo uliho isiviholilike vage no inuta lohohu. Kosealemo au isiviale no solekai talive Dielusamae velehovoi solekaliege Diue vahaeho vani Bentikosi kemo keve ui.

Bolou au hotoe gabi loui Evesasi namigevenu.

¹⁷ Ialemo Bolou Militasi o kemo uito Evesasi dubue elodaho hoto hanavoi isivialeike keau lohohive avuemo lohohi hotohotoai. ¹⁸ Ige eloda keau tiale keve velehovoge Bolou abuhu loui avoe, "Vani moaga di Esia vatae lohoale lahehi uale ke la hilokai vaveve bahata di vamale keta la hilokalu. ¹⁹ La hilokage di di ebika mai mihatuholisiege Diue ataeau isiviale di aiovage di vatehani malei. Di vani bahata ninanamoike Kosive lovi ke vai vatehani malema. ²⁰ La hilokage di la o igaegae kela la haivei ologomo ataeau mole bevuevemale ketala la haivei hotobe laemo mahogovaholisito hoto bahata keike di loui la haivelage la kemo lulelelahalu. ²¹ Diue ata isi Diue ata holioholiale kebia di haivei isuta abuhu loui kosea, 'La vaveve toela ke halevai Dilava hoto evisi la uvu mai omisi nahie Kosive Iesu Keliso ke ehovave.' ²² Di hoto kateale loui la haive dua vanu. Iale aike Munanae Tumuu dahoe loualelua dana la halevei Dielusalemae tai. Iale mesoho dana keve tige vaveve oletealena keve daemo velemai. ²³ Isito di hilokage di o bahata kebiala lohosege Munanae Tumuu abu di mai dibulae mavoi vatehani daovavege ke loui di haivunu. ²⁴ Ige di hoto ke evisi di hatihati kemo vabuoholisito isivialeike Kosiveu lovi daoale ke vage au gabiai. Iesu lovi keu koseanu. Dana hotove dua loui ata haivege abu elike Dilavau au uvu ovei hoesegeveale ke hilokai.

²⁵ "Di subuta lahehi ui la Dilava adae vuvunemo uveve ke deiada loui la haivei hilokage la bae tota gabie di ni elehalivebene. ²⁶ Iale di hoto ko louge evive. La di louale ke evisi ukolikoli maholige keu bae di toela holilivebene. Isito keu la toela. ²⁷ Kosealemo di Dilava hoto loui la haivei laemo ke ihube mahogovaholisito Dilava vaveve bahata keike di loui la haivenu." ²⁸ Bolou kateai louito eloda kebia namigevei avoe, "La evievimo nenilahai negolahave. Isi Munanae Tumuu vuvune laoveale kemo evievi ata kebia nalieve dua vave. Kosealemo Dilavau au moe tahomo ata malevege abu atave holilu. ²⁹ Isito di hilokage dana la halevei tisege vavoloe ataeabuna lohohiege loboe hoto loui la uvu isi aiogevei. ³⁰ Ige vani moleu lohoge la vigomo la degomole abuna hovevevei loboe hoto louge evievi ata degomole abuna ke evisi ehovei. ³¹ Ialelua la ebua nenigeveve. Isi di vagana abuita igaetamo vavita gututa ninanamo la haivemale ke huhulahave.

³² "Iale dana nova Dilava adae uvumo la halevei tige au au uvu laovei la hoesegeveale hoto kena lahehi ui la negotievege Dilavau au ataho uveve dua louale ke lana maleve. ³³ La hilokage di subuta lahehi uale kemo la monita la ogotaho la imigeveholinu. ³⁴ Isito di di adatela loviai moni malei kemo di esemuhi lovi isi abuhi uma. ³⁵ Iale di vaveve katealeike la haiveale ke nahate vai negolahai lovilahalive elike ata degomoleau negoholimale kebia tadeaveve. Isi Iesuu louale ko huhulahave. Au loui avoe, 'Nahi onobenobe ata ovemale kemo vahaeho balugana ui. Isito nahi nahie ebika unahaho onobenobe malemale kemo vahaehou bae ulivebene.' " ³⁶ Bolou kateai louge uoholige abuhi au kome bokoai vata bisi Dilava imihanu. ³⁷ Imihai gabiageto abu lohohi Bolo evudei ninahavolu. ³⁸ Isi Bolou elegeveholiveve hoto ke abu evisi uvu balugai boutie halevahatuhu tilu.

21

Bolou Dielusalemae tinu.

¹ Tiale no halevehatuevegeto no bouti mai inuta tialeau vata mole Kosi ke evihai tilu. Isi vani mole tilialeau Lodasi vata evihai Batala oe velehovoi keve dobuluvilu. ² Isege bouti moleu Venisia vatae tiho vasege no kemo biloluvisi tilu. ³ Isi lohoaleau davala nie velehovoi Saibalasi elehai ke vavae giloai matama ke inuteatave tiale Silia vatae velehovoi tiale Taae dobuluvisege abu bouti kemo kako malei heie otovelu. ⁴ Isege no

tiale evievi ata kaovei elegevei abuhi bula igae uvumo ua. Ige evievi ata keau Munanae Tumue vuvunemo Bolo namihai avoe, “Ainaho bae Dielusalemāe tigei.”⁵ Kateige no keve abuhi uliale bula keu uoholige evievi ata keau abu ese abu mahinuvu kebiahi boutie no halevehatuhu tilu. No bahata tialeau esagae velehovoi kome bokoa Dilava imihalu.⁶ Keu uoholige abu no halevehatueveito hoidevei abu oe tisege no boutimo biloluvisi tilu.

⁷ Tilialeau Tolomeasi oe velehovoi kome dobuluvisi tialeau evievi ata kaovei elegevei abuhi ulialeau emo ladevelu.⁸ Iliale vavita hovevevei kebia halevei tilialeau Sesaliae velehovoi tilialeau Bilibi abu subuta Dielusalemāe ata seveni (7) tabagevemale kela keta ebagevale keluvuta ladevelu.⁹ Iale malaha ke mahoho bahata voa (4) keau kolivuholisito vani bahata abuna belovetae vaveve vai Dilava hoto lougei.¹⁰ Iale no vani degomole o keve usege Diudia vatamo beloveta mole Agabasi keu lohoale noe velemanu.¹¹ Velemai Bolo beleta mai au velota au adata umuvai loui avoe, “Munanae Tumuu daho louale nahateike di ko vanu. Iale beleta ko biage Diue ataeabuna Dielusalemāe umuvai mai Loma gamani kosive kebia ovei.”¹² Ige o ke evievi ata isi no bahataeau hoto ke evisi ninalahai isiviholilu Bolou Dielusalemāe taliho.¹³ Ige au namigevei avoe, “La osiohoike ninalahai di uvu aiohavoma. Halege di keve tige abu Iesu ivimo di umuvai dahavoi vatetumu daovale keta duave.”¹⁴ Kateai louge no keluveve ke halevai namihai kosea, “Halege Kosive isivi unaha.”

¹⁵ Kateaito no kunai bevuevei malei o ke halevai heila Dielusalemāe tilu.¹⁶ Keve tige Sesalia evievi ata degomoleau nohehi tiale keau no holoevei Nesoni oe tige no keve avuluvuta ladevelu. Malaha keu subuta Saibalasie evievi ata holisi lohoale Dielusalemāe ua.

Bolou Diemisie deiāi tinu.

¹⁷ No Dielusalemāe keve velehovoge evievi ataeau no vahaeho vai no tovu valu.¹⁸ Iniale vani mole Bolou no holoevei Diemisi elehaho tilu. No keve tige ekalesiae kosive keau bahata keve ua.¹⁹ Ige Bolou adaeabe hatuevei hoesegevei Dilavau lovivemo Diue ata holioholiale kebia tedeavemale ke loui haivenu.²⁰ Kateai haivege abu ke evisi Dilava hoesehavoi namihai avoe, “No haoka, a hilokage nahie Diue ata moagataho keau Iesu ehovaito isiviale Mosese menaka ke ehovai ma tumuai.²¹ Isito keau a vata degomoleve vamale hoto ke evige a Diue ata haivei namigevei kosea, ‘Lainaho Mosese menaka ke ehovai la esee vudie vate bohisi la buluve vaveve ke nahate vagelive.’²² A lohoale hoto ko abu evilu. Iale nahiabuna abuhu vaveve vade vai.²³ No isiviale no huhuale ko vanela. No ata abuita abuitaeau Dilava ivimo hoto loui menakale keau kove ua.²⁴ Iale kebia holoevei abuhi talive Diue dubue vaveve mole vai la ebika hoesegevege uoholige abu mesia malei mahoi Dilava hoesehavoveve ke ibina vanela. Igeto ke iae abuna bae abu kina bohige abu Dilava ivimo menakale kena uoholisi. Ana kateige ata bahataeabuna hilokage abu subuta a vaveve eviale keu seleve holioholisito a Mosese menaka ehomama.²⁵ Isito Diue ata holioholiale keau Iesu ehovale kebiaho no levaleva hanavoi namigevei kosea, ‘Lainaho abu lovi malei loboe dilava hoesegevemale ke igelive. Isi lainaho bae taho isi mesia tahota igelive. Isi lainaho bae mole keatehi ladevegeve.’²⁶ Kateai louge Bolou ata kebia holoevei vani mole abuhi tiale Diue menaka ehovai abu ebika hoesegevelu. Ige Bolou Diue dubu baluga ke uvue tiale dubue kosive namihai avoe, “No no ebika hoesegevege uoholiale noeabuna uliege bula igaeu uoholisege hoidevei loholive mesia malei Kosive hoesehavoi.”

Diue ataeau dubumo Bolo evudei malu.

²⁷ Iniale bula keu uoholiho vasege Diue ata degomoleau Esia vatamo lohoale keau dubue uvue Bolo elehai Diue ata bahata hohavei evudelu.²⁸ Evudei hohavei avoe, “Iselala ataea, lolohive no tedeaveve. Malaha koike matama bahatae timale ata haivei nahie ata aiogevoma. Isi Mosese menaka aiohavoi dubuta aiohavoma. Katealemoike au tota kove lohoale Diue ata holioholiale kebia holoevei dubue tumu ko aiohavoma.”²⁹ Abu hoto ke louale keu koseanu. Abu elehasege Bolou Evesasi malaha mole Tolovimasi ke melamei avuti o kemo olahama. Katealeno abu ke elehai huhulalahi avoe, “Mesoho Bololemo nova malaha ke melamei dubue lohonu.”³⁰ Iale dubumo ataeau hoto ke evisi dolodoloi loui tai lohoma. Ige oe ataeau ke evisi bibuluvisi lohoale keau Bolo evudei dubu halevai mai heie tilu. Isege ata degomoleau dubue udaha bamuevelu.³¹ Ige abu isiviale Bolo hamage au hatai. Kateisege ata moleu Loma ame kosiveho hoto hanavoi loui avoe, “Dielusalemāe ata bahataeau mole havema.”³² Ige solekavesite ame kosiveu au esemu holoevei ata moaga kebia vigoe tinu. Ige ataeau ame kosiveta esemuveta elegevei Bolo hamale ke halevalu.³³ Ige ame kosiveu tiale Bolo mai au esemuho louge abu seimi abuitata Bolo umuvage au deiadave evilihio ata belagevenu.³⁴ Kateisege ata degomoleau hoto nimolete lousege degomoleau hoto nimolete louge ame kosiveu kemo daudau ai esemu namigevege abu

Bolo melavei ame balikie tilu. ³⁵ Melavei tiale anakamo tige ataeau hamaho vage abu bae ehumo ebagevai mai tilu. ³⁶ Isege ataeau iaeabela tai baita loui avoe, "Hamave. Hamave." ³⁷ Ige abu mai tiale oe uvue tiho vasege Bolou Gilikie hotomo ame kosive ke namihage au vikoai avoe, "Ana Gilikie hoto hilokanu. ³⁸ Ana subuta Egubitoe malaha moleu lohoale ata bahata voa taoseni (4,000) malevei abuhi gamani aiohavoi to ataeau uvseiteve tiale malaha ke anike ko." ³⁹ Ige Bolou namihai avoe, "Ba, dau Diue ata dalike. Vata mole Silisia kemo o mole baluga Tasisi kemoike di lohonu. Iale a isiviage di ata kebiaho hoto loui." ⁴⁰ Ige ame kosiveu isiviage Bolou anakamo lamisi ata keluevege abu tobekai usege au Diue hotomo abuhu lounu.

22

Bolou Diue ataho au deiada lounu.

¹ Au loui avoe, "Di haokuvua, bahata di hoto evisege di di deiada louge evive." ² Isi kateai hotoeabe selevmo namigevege abu bahata hotohotoholisi ua. ³ Ige au namigevei avoe, "Dau Diue ata. Iale di neinau vata mole Silisia keve o mole Tasisie di mamoi to di esebuluta usege abu di mai hanavoge di Dielusalemae lohoale kove velemage menaka haivemale kosive baluga Gameliela keu di haivunu. Kosive keu nahie buluve vaveve isi menakaeabe ke bahata loui di haivuge di kemo negoai la nahate vai isiviale Dilava hoesehavo. ⁴ Isime di subuta Iesu evievi ata kebia havei aiogeve keate malaha kebiata havei malei dibulaa otovema. ⁵ Iale lana la dubue kosive isi kanisolo baluga kebia namigevege abuna bae di vaveve hilokamale ke loui la namigeve. Diue ataeau Damasikasie umale kebiaho abu levaleva hisaliai malei daovage di ke elehai isiviai talive Iesu evievi ata kebia seimita umudievei malevei loholive kove aiogeve."

Bolou Kosive elehale deiada lounu.

(Abostolo 9.1-19; 26.12-18)

⁶ "Di vaveve kateale huhuaito halei lohoale Damasikasi vavae lohosege vanie lilimo ataga mole balugau otogomo dobai lohoale di bamunu. ⁷ Ige di vatamo dobai evisege hoto moleu dahoe loui avoe, 'Solo, Solo, a osiohoike di aiohavoma.' ⁸ Ige di loui kosea, 'Kosive, ole a.' Ige au loui avoe, 'Dau Nasaleta ata Iesu keike a aiohavoma.' ⁹ Kateai di namihage daluvuta lohoale keau ataga ke elehaito daho loulmale hoto ke evioholilu. ¹⁰ Kateige di Kosive namihai kosea, 'Kosive, dana vadeu vai.' Ige au dahoe loui avoe, 'Hovelahai Damasikasie talive ata moleu bae Dilavau a ono vade vaveve louale ke loui a namihai.' ¹¹ Ige ataga balugau daemo lohoge di niu keduike daluvuta tiale keau di melavei Damasikasie tilu.

¹² "O kemo malaha mole Ananiaisi keu ui vani baita nahie menaka ehomai Dilava hoesehavo. Katealemo Diue ata bahatae au Damasikasie umale keau vaveveve ke elehai malaha ke eahalema. ¹³ Iale malaha keu lohoale di vavamo lamisi loui avoe, 'Di haoka Solo, bato nianela.' Kateai lousege di niai elehanu. ¹⁴ Ige keu loui avoe, 'Nahie buluvebia Dilavau a ebagemai isivialeike a isivive ke hilokai esemu tumute ke elehai biageu au hoto louale ke evisi hilokai. ¹⁵ Isi isivialeike a vadeu elehai eviale ke loui ata bahata haive. ¹⁶ Iale a ono vade nalisi uma. Hovelahai Kosive ivimo babatisoage a vaveve toelau uoholisi.' "

Dilavau lahoahoamo Bolo haivunu.

¹⁷ "Kateige di o kemo uniale hoilahi Dielusalemae lohoale dubue uvue gulugulianata lohoahoai Kosive elehanu. ¹⁸ Elehage au dahoe loui avoe, 'Solekai hovelahai o ko halei tenela. Kosealemo ata koeau bae a di hoto louale ke evisi malivebene.' ¹⁹ Ige di loui kosea, 'Kosive, keau hilokage di dubuiabe tiniale a ehovamale evievi ata kebia malei havei aiogevenu. ²⁰ Ige ata degomoleau a hoto loulmale esemu mole Sitiveni hamage di kebia kelueveholisito dabaeabe ogo nalievevege abu hamage hatinu.' ²¹ Kateai louge Kosiveu dahoe loui avoe, 'Dana a hanavoge haeavamoleve Diue ata holioholiale kebia haiveho tenela.' "

²² Bolou au deiada ke lounata Diue ata holioholiale kebiae tiveve hoto louge abu ke evisi hoveveve baita loui avoe, "Hamage au hatai uoholisi. Keu nita uale keu toelanu." ²³ Kateai loui itumulahi itolahai abu ogo malei hatui gogea mugai malei ehue hatulu. ²⁴ Kateisege Loma ame kosiveu au esemu namigeveve avoe, "Ko mai talive oe uvue visuhavoge au au vamale ke nahio louge elike nahi Diue ataeau avuemo vamale ko ihu hilokai." ²⁵ Kateai louge abu mai tiale oe uvue visuhavoho umuvage au ame esemu moleu vavavemo lamiale ke namihai avoe, "La di toela kaovai hilokaholisito dahavo kavage keu toelanu. Dau Loma ata. Iale lana daemo vaveve kateale valiege Loma menaka ke eguvave." ²⁶ Ige ame malaha keu ke evisi tiale au kosive baluga namihai avoe, "Ata keu Loma ataike. Iale nahi hamage keu toelanu." ²⁷ Ige ame kosiveu tiale Bolo belahai avoe,

“Au ana Loma ata.” Ige Bolou loui avoe, “Ito.” ²⁸ Ige kosive keu namihai avoe, “Dau Loma ata holihilo ibina baluga vanu.” Ige Bolou loui avoe, “Au kateanu. Isito dau di mamau Loma ata.” ²⁹ Kateai lousege ame esemu keau visuhavoho vavavemo laviale keau halevalu. Ige ame kosive keu Bolou Loma ata holiiale ke evisi vabuanu. Kosealemo au au esemu namigevege abu Bolo umuvalu. ³⁰ Iniale vavita ame kosive keu isiviale Bolo mai Diue ataeau avuemo hoto lounale ke kaovai. Isi louge abu dibulae melavei lohohu. Isi hoto hanavoge Diue dubue kosive isi kanisolo ata bahata keau lohoale usege au Bolo mai vudiabemo mamonu.

23

Bolou kanisolo kebia vudimo laminu.

¹ Bolou kanisolo kebia niavei abuho loui avoe, “Di haokuvuia, di uvumo toelabeu uoholige di hilokage di vaveve keau Dilava nimo duave naha.” ² Kateai louge dubue kosive baluga Ananaiasiu au esemu namigevege Bolo vavamo lavisi uale keau avimo hamalu. ³ Ige Bolou kosive ke namihai avoe, “Dilavana bae ahamoi. Kosealemo a vaveve keu abu momolue golomo o beniale ke nahate. A keve ugulamo nahie menakamo di vaveve kaovama. Isito a esemuhu louge abu dahavoale kemo a menaka ke egumanu.” ⁴ Ige ata degomoleau vavavemo laviale keau avuhou loui avoe, “A hoto kateale louale keu Dilava dubue kosive baluga ke ke aiahavonu.” ⁵ Ige Bolou abuho loui avoe, “Di hilokage keu dubue kosive baluga holiivatebe di kateai avuhou lohoholinu. Kosealemo Bukae Hotou loui avoe, ‘Lainaho la nalievemale kebiaho hotoe toela lougelive.’”

⁶ Kateai louito elehasege kanisolo kebia degomoleau Sadukea ataea. Isege degomoleau Balisia ataea. Ige au baita hoai kebia namigevei avoe, “Di haokuvuia, dau di mamati Balisia ata. Iale la daemo di vaveve kaovale keu koseanu. Di hilokage haluviale keabuna hoveveve.” ⁷ Bolou kateai louge Balisia ata isi Sadukea ata keau ke evisi moleho loui itumulahai mole tasalievelu. ⁸ Mole tasalievege Sadukea ataeau loui avoe, “Haluviale keau bae hovevevebene. Abu haluvige munanaeabe keta uoholinu. Ige anelu kebiata uoholilu.” Keau kateai lousege Balisia ataeau abuho loui avoe, “Ba, la louale keau kateholilu.” ⁹ Kateai baita louge hotou kutikutiai ua. Isege Balisia menaka haivemale malaha moleu hovelahai loui avoe, “Malaha kou atae dua. No avuemo vavevebe toela elehaholilu. Iale mesoho alue munanaike avuhou lounu. O mesoho anelu moleike avuhou lounu.”

¹⁰ Au kateai louge ataeau moleho itumulahai moleho baita louge ame kosive ke evisi huhuai avoe, “Mesoho abuna nova Bolo hamai aiahavoi.” Kateai au esemu hanavoge abu lohoale ata kebia vighomo Bolo melavei ame balikie tilu. ¹¹ Kateimale vavimo Iesuu Boloe lohoale vavavemo lamisi namihai avoe, “Ainaho vabualive. A Dielusalema kove di hoto louale ke nahate Loma o baluga ketave di hoto lounela.”

Diue ataeau Bolo hamaveve hoto louna.

¹² Vavita Diue ata degomoleau mole bevievei igaetoai hotohotoai hoto isute loui loui avoe, “Nahi lovi i halevai e i halevai Bolo hamaito bae lovita eta isi.” ¹³ Ata bahata votiabulike (40) hoto ke huhuai lounu. ¹⁴ Isime tilialeau dubue kosive isi oe kosive kebia namigevei avoe, “No hoto mole isute louale no bae onobehame ilivebene. Usege no Bolo hamaito bae lovi isi. ¹⁵ Iale laeau kanisolo ata kebiahi Loma ame kosiveho hoto hanavoge au Bolo hanavoge au lohohoi. Ame kosive ke namihai kosea, ‘No isiviale Bolo vaveve ke avuemo kaovai hilokai.’ Ige ame kosive hanavoge au lohosege no talive humaha tavae hamage au hatai.”

¹⁶ Kateai lousege Bolo dumuhu hoto ke evisi tiale ame oe uvue deluai tiale Bolo namihanu. ¹⁷ Ige Bolou ame esemu mole hohavoi namihai avoe, “Mo ko melamei ame kosive balugae tige au hoto mole loui namihai.” ¹⁸ Ige ame esemu keu mo ke melamei au ame kosive balugae tiale namihai avoe, “Dibulae malaha mole ivi Bolo keike di hohavoi di hanavoge di mo ko melamei lohohou. Kosealemo mo kou isiviale hoto mole loui a namihai.” ¹⁹ Ige ame kosive baluga keu mo ke adala holisi melamei lilikateve tiale belahai avoe, “A onoleike daho loulou lohohou.” ²⁰ Ige mo keu avuhou loui avoe, “Diue kosiveau isivialeike nivu Bolo hanavoge au kanisolo ata kebiae tai. Kanisolo keabuna nivu a lobohavoi loui kosea, ‘No isiviale Bolo hanavoge au lohoge no avuemo vaveve kaovai hilokai.’ ²¹ Abu kateai louge ainaho hotoeabe ke evilige. Kosealemo ata bahata voti (40) keabuna Bolo hamalihou humaha tavae hogodevei ui. Keau hoto mole isute loui loui avoe, ‘No bae onobehame ilivebene. Usege no ulive Bolo hamaito bae lovi isi.’ Keau kateale loui hemei ui isiviale au Bolo hanavoge au tai.” ²² Ige ame kosive keu mo ke namihai avoe, “Ainaho a loui di namihale ko loui atabe namihalive.” Isi kateai louito mo ke hanavoge tinu.

Ame kosiveu Bolo hanavoge kosive mole elehaho tinu.

²³ Ame kosive keu au esemu abuita hohavege abu lohoge au abuhu loui avoe, “Talive tuvalie ata bahata tu handele (200) malevei osimo tiveve ata bahata seveniti (70) malevei kebia tediaeveveve ata tu handele (200) kebiata maleveve. Isi hau bahata gadehavolive vavie naini (9) okolokie hovevevei Sesaliae teve. ²⁴ Isi osi mole Boloho malive au avuemo tai. Isi avuluvuta tie dua valve gamanie kosive baluga Velisie velehovove.” ²⁵ Kateai louito levaleva mole hisaliai gamani kosive baluga Velisiho hanavonu. ²⁶ Isi loui avoe, “Di kosive baluga, ana duave. Di ivilike Kalodiasi Lisiasi. Di deiada ko louge evinela. ²⁷ Diue ataeau isiviale malaha ko mai hamai. Isito di hilokage malaha keu Loma ata. Ige di di esemu holoovei tiale ke melavei ame oe lohohu. ²⁸ Di ata ke vaveve kaovalihioike melamei Diue kanisolo kebiae tinu. ²⁹ Kebiae tiale ke kaovage malaha keu vavevebe toela vaholiale dana oleve kateai ke mai hamai o mesoho mai dibulae hanavoi. Keau Diue menaka ke unahamo hoto mai avuemo mavolu. ³⁰ Ige ata moleu abu Bolo hamaveve hoto ke loui di namihaike vage di ke hanavoge ae tinu. Iale dana bae Diue ata namigevege abu talive vaveveve hoto loui a namihai.” ³¹ Iniale vavimo tuvalie ataeau levalevave ke mai Bolota melavei tilialeau o mole Atibatase tisege vau alamonu. ³² Isege vavita tuvalie ataeau heila tiale keau hoidevei ame oe lohosege osimo tiale keau Bololuvuta tilu. ³³ Keau ke melavei tilialeau Sesaliae oe velehovoi Bolo melavei gamani kosive baluga oe mavolu. Isi ame kosive levaleva ke mai kosive ke omilu. ³⁴ Ige au levaleva ke dodavei Bolo belahai avoe, “Au oleve vata ke ata.” Ige Bolou namihai avoe, “Dau Silisia ata.” ³⁵ Ige kosive keu Bolo namihai avoe, “A vaveve elehai louale keau kove lohogoeto di bae a deiada evisi.” Kateai louito au esemu namigevege abu Bolo melavei kosive mole Elodiu o balugataho houale keve mai bamuhu tilu.

24

Abu Bolo mai kotalahama.

¹ Iniale vanie ni ada moleu uoholisege dubue kosive baluga Ananiasiu Diue kosive degomole holoovei kotae hoto hilokamale Tetulasi keta melavei Sesaliae oe tilu. Keve tiale velehovoi gamani kosive Velisi ke vudimo Bololuvuta kotalahalu. ² Isi Tetulasi namihage au hovelahai Bolo vaveve ke loui Velisi namihai avoe, “No kosive baluga, au no nibievei no hoesegevei vata komo vaveve dua vage no kemo ue dua vama. ³ A kateige no vani bahata ue dua vai a vahaeho vama. ⁴ Iale no isiviholilu hoto moaga loui butuhaliho. Isito no hoto kohame louge evinela. ⁵ No malaha ko vaveve elehage malaha kou malaha toela seleve. Kena vani bahata tiniege vata bahata keve Diue ata bahata aiogevei uvuiahe igei. La hilokage Iesu keu Nasaleta ata. Iale ata kou Iesu ehovamale kebiae kosive. ⁶ Vani mole malaha kou isivialeike Diue dubu baluga aiohavoi. Kateike vage no ko mai isiviale no menakamo vaveveve kaovai. ⁷ Isito ame kosive Lisiasiu solekai lohohale noemo malaha ko adala holisi mai tinu. ⁸ Isi no namigevevei avoe, “Talive bae gamani kosive baluga Velisi kemo ko vaveve toela louve.” Ilike vage no kove lohohale deiadave aho loumale kou seleve. Iale a biageu bae belahage au bae au deiada loui a namihai.” ⁹ Kateai louge Diue ataeau hotove ivi ebagevai loui avoe, “Hoto seleveike au ke lounu.”

Bolou Velisi vudimo au deiada louma.

¹⁰ Abu kateai louge gamani kosiveu Boloho loui avoe, “Hovelahai a deiadate lounela.” Ige Bolou hovelahai loui avoe, “Di hilokage au vagana moaga vata ko nalisi no ata kebiata nibievenu. Iale dana vahaehomo a vudimo lamisi di vale hoto aho loui. ¹¹ Di lohohale Dielusalemae velemai guliguliale vanie ni tueloau (12) aike uoholilu. Ana ata belagevege abuna seleveta di vale ke loui a namihai. ¹² Di Diue dubu baluga keve guliguliale vavevebe toela vaholisi kebia aiogevei hotobe toela abuhu lohoholisi ebouamaleve mesoho heie vaveve katealibe vaholinu. ¹³ Iale ata koeau daemo hotoe toela louale abuna oleve kateai hoto ke ihu mai selevetisi. Keu abuemo anekianu. ¹⁴ Koeau no buluvebia Dilava hoesehavoi Moseseu hisaliae isi belovetaeau hisaliae ke ehovage dataike kebia ehovema. Isito Iesu humaha seleveike dau ehovai hoesehavoma. Ige abu loui avoe, ‘Iesu humaha keu loboe humaha.’ ¹⁵ Isito di hilokage ata kobiata hilokage atae toela, atae dua haluviale keabuna bae hovevevei. ¹⁶ Katealemo di isiviale di uvu hoesehavoi vani bahata Dilava nimo isi atae nitamo negobedai vaveve dua unaha vagei.

¹⁷ “Di vagana moaga Dielusalemae tiholinata tiale keu koseanu. Di moni malei di ata seleve kebia ovege uoholige di halevei dubue tiale mesia havei Dilava hoesehavonu. ¹⁸ Di keve ui atabe aiohavoholisi vaveve ke vai di ebika hoesehavoniale uoholisege abu di vaveve elehai hilokalau. ¹⁹ Isito Diue ata degomoleau Esia vatamo lohohale keau abege lohohale a vudimo lavisi di vale ke loui a namihai. Isito keau lohoholilu. ²⁰ Iale kobia namigevege abu subuta kanisoloe vudimo di vaveve kaovage di vavevebe toelau

uoholiale ke loui a namihai. ²¹ Isito kateimalela di kebiaho baita loui kosea, ‘La di mai kove lohoale keu koseanu. Di hilokage haluviale keabuna bae hovevevei.’”

²² Bolou kateai louge Velisiu abu Iesu vaveve loui namihalemo Boloemo kotaveve ke halei ata namigevevei avoe, “Usege ame kosive Lisiasiu lohogeto di bae tota kotaveve deiada loui la namigevevei.” ²³ Kateai louito au esemu namigevevei avoe, “Bolo melavei talive dibulae bamuito lainaho avuemo dibulae vaveve ke nahate valive. Haokuvuiabeau isiviai tedahoho vage kelueve halevaito isiviabe ke vave.”

Bolou Velisita mahinaveta vudimo laminu.

²⁴ Iniale vani degomoleau uoholisege Velisiu abu mahina Dulusilati loholu. Mahinave keu Diue keate. Iale keau lohoale louge abu Bolo melavei tige Bolou Iesuemo evievi maveveve ke loui haivenu. ²⁵ Isi namigevevei avoe, “Uveve dua vai la isivi unaha va halevaito Iesu isivi ke vave. Kosealemo Dilavana bae vatae atae vaveve bahata kaovai.” Kateai louge Velisiu vabuai namihai avoe, “Halei talive di vani maniege a hohavoge tota lohonela.” ²⁶ Kateai loui isiviale Bolou moni omige au iomage au tai. Kateai lohomale vani igaegaela Bololuvuta hotohotoai namihama. Isito Bolou monibe omioholinu.

²⁷ Kateilage vagana abuitaeau uoholige gamani kosive mole Bosiasi Vesitasi keu Velisi lovo manu. Isege Velisiu Diue atae isivi vai dibulae Bolo halenu.

25

Bolou isiviale Loma o baluga keve kotai.

¹ Iniale vanie ni abuita igaetaeau uoholige kosive nehe Vesitasiu au o Sesalia halei Dielusalemame tinu. ² Tiale keve velemage Diue dubue kosive isi oe kosive degomoleau avue lohoale Bolou vamale deiada ke loui namihalu. ³ Namihai avoe, “Ana vali Bolo hanavoge au Dielusalemame lohoi.” Abu hoto ke loui isivialeike Bolou lohosege abu humaha tavae hamai. ⁴ Abu kateai louge kosive keu namigevevei avoe, “Bolou aike Sesaliae dibulae uale di hoilahi tivevu vuguvuguanu. ⁵ Ialelua la oleulua vuvune malealeau daluvuta Sesaliae talive keve Boloemo vavevevebe toelau uge kaovave.

⁶ Vesitasiu deiada kateale louge uoholige au abuhi ui bula mole ke vaito bula mole ke uvue halevei Sesaliae tinu. Iniale davita au kotamale keve ugulamoi louge abu Bolo melavei loholu. ⁷ Lohoge Diue ataeau Dielusalemame lohoale keau Bolo mai evilikahavoi au vaveve degomole vaveveholimale ke loulu. Abu kateai hoto ke mai selevetiveve humahadau uoholinu. ⁸ Kateige Bolou hotoeabe hamai loui avoe, “Dau Diue menaka isi dubuiabe aiahavoholisi Loma kosive baluga Sisa keta di aiahavoholinu.” ⁹ Kateai louge Vesitasiu isivialeike Diue atae isivi vai. Kateai Bolo namihai avoe, “Ana isiviage naiti Dielusalemame talive keve kotalahai bae hoto ko inutolotolohavoi.” ¹⁰ Ige Bolou avuho loui avoe, “Di bae keve talivebene. Loma gamani balugau kotamale komo dana di vaveve bahata louge au uoholisi. Di hilokage dau vaveveve toela Diue ata kebiaho vaholige ata di vaveve ke hilokanu. ¹¹ Iale mesoho di vaveve toela vai menaka aiahovoge a dahamoge di hatige keta duave. Isito di vaveve toela vaholisege a bae di mai ata kobia ovelivebene. Di isiviale Loma gamani kosive baluga Sisa keu di deiada evisi.” ¹² Kateai louge Vesitasiu au esemuhi hotohotoai gabiai Boloho loui avoe, “Duave. A isivialeike Loma kosive balugau a hoto evisi. Iale dana a hanavoge avue tenela.”

Bolou Agilibata amakiniveta vudimo laminu.

¹³ Vani mole Kini Agilibau abu amakini Benisiti Sesaliae dei ai Vesitasie loholu. ¹⁴ Lohoale vani degomole avuluvuta usege au Bolo deiada loui Agiliba namihai avoe, “Di Velisi lovo mage au dibulae ata mole halege keu ua. ¹⁵ Ige di vani mole Dielusalemame tige Diue dubue kosive isi oe kosive degomole keau daemo ata ke vaveve kaovai isiviale di ke hamage au hatai. ¹⁶ Ige di kebia haivei kosea, ‘Keu Loma gamani vaveve holioholinu. Iale vasohuta mole vudimo lavisi mole vaveve kaovai kotalahai ke hilokaito bae hamave.’ ¹⁷ Iniale abu kove kotaho lohoge di vavita solekai tiale kotamale keve ugulamoi louge abu malaha ke melavei dae loholu. ¹⁸ Isi lohoge Diue ataeau hovevevei vaveveve toela louge di huhuai kosea, ‘Mesoho abuna malaha ke vaveve toela baluga loui.’ Isito abu kateholilu. ¹⁹ Isito abu guliguliamale ke hoto unaha louma. Ige Bolou malaha mole Iesuu hatiale kemo loui avoe, ‘Keu hovelahanu.’ ²⁰ Abu kateige di dolodoloi huhuai kosea, ‘Dana oleve kateai hoto kobia ihu hilokavevei.’ Isi kateai Bolo namihai kosea, ‘Ana isiviage naiti Dielusalemame talive kotalahai hoto ko ihu kaovai.’ ²¹ Ige keu katealio isiviholisi isiviale tige Loma kosive balugau bae deiadave evisi. Ige di iomage au dibulae usege di au tiveve ke humahada kaovama.” ²² Velisiu hoto kateale loulage Agilibau namihai avoe, “Di isivialeike data malaha ke hoto evisi.” Ige au avuho loui avoe, “Duave. Nivu loholive bae hotoveevinela.”

²³ Iniale vavita Agilibau Benisiti Bolo elehalihio lohoge ata moagaeau lohoale isiviale kosive kebia vaveve elegeve. Ige ame kosiveau oe kosivehi bahata igaetoai loholu. Kateisege Vesitasiu hoto hanavoge abu Bolo melavei loholu. ²⁴ Ige Vesitasiu loui avoe, “Kini Agiliba isi la bahataea, malaha ko elehave. Kove isi Dielusalema keve Diue ataeu malaha ko vaveve toela loui di namihai isivialeike di ata ko hamage au hatai. ²⁵ Kateige di ata ko vaveve kaovage vavevebe toelau uoholige di hamaveve ke humahadau uoholinu. Isito biageu isiviale Loma kosive baluga elehai au deiada loualemo dana iomage auna tai. ²⁶ Isito dana hanavoniege hoto vade toelai Loma kosive haivui. Kateike di vaima mai lae lohonu. Iale Kini Agiliba, di isiviale neniai ata ko hoto evisi bae tota di haivuge di Loma kosive balugaho levaleva toelai haivui. ²⁷ Kosealemo di dibulaa atae vaveve toela hilokaholisito levaleva hisalikavai hanavoale keu daemo anekianu.

26

Bolou Kini Agiliba vudimo hoto louma.

¹ Vesitasiu kateai louge Agilibau Bolo namihai avoe, “Di a namihama. A biageu hovelahai a deiada lounela.” Ige Bolou hovelahai au ada ebagemai loui avoe, “Kini Agiliba, di deiada ko louge evi. ² Di a vudimo lamisi Diue ataeau daemo lounela ke loui a haivui vahaehonu. ³ Kosealemo di hilokage au Diue menaka isi vavevebe ke hilokale di isiviale kabebi haleito di louale ke evinela. ⁴ Di esebuluta ui lohoale ke bahata Diue ataeau hilokalu. Isi di vata seleve uniale kosi holisi halei lohoale nova velemanu. ⁵ Iale abu hilokale ke abuna louge keu duave. Abu hilokage dau Balisia ata. Iale Balisia keau Diue menaka kebia ehovei vavevebe kemo negoai ke vama. Ige data vavevebe kemo negoai ke vama. ⁶ Iale di nova lamisi kotamale keu koseanu. Di huhuige Dilavau subuta no buluvebiaho louale keike lohoale nova velemanu. ⁷ Iale hoto ke igaeike Diue valada tuelo (12) keau ke kaovai vavita gututa Dilava hoesehavoi isivialeike ke mai. Diue ataeau di mai kotalahale keu di menakaeabe aiahavoholisito hoto nehe ke igae no abuhi ehovamale keike di louge abu di mai kotalahalu. ⁸ Iale Iesuu hatai hovelahale hoto kemo la osiohoike dolodolohalu. Ose la huhuige Dilavau haluviale kebia tatuveveve keu avuemo anekianu.

⁹ “Di subuta huhuai kosea, ‘Dana vaveve toela moaga vai Nasaleta ata Iesu ke ivi aiahavoi.’ ¹⁰ Isi kateai subuta Dielusalemae ui vaveve kateimale vai Diue kosivebiamu vuvune malei Iesu ata kebia aioegevei malei dibulaa otovema. Kosealemo kosive keau isiviale evievi ata kebia havege abu haluvisi. Ige data katealeho isivianu. ¹¹ Vani degomole di no dubu moagae timale Iesu ata kebia kaovei malevei aioegevei isivialeike abu Iesu ehovamale ke halevai. Isi dana itumu baluganiege tiniege o degomole keve kebia degomoleta aioegevegei.”

Bolou au ekalesiale deiada louma.

(Abostolo 9.1-19; 22.6-16)

¹² “Di kateai vani mole isiviai talive dubue kosivebiamu vuvune malei Damasikasi oe talive ata katealebia aioegevei. ¹³ Isi kateai tiale keu humahada tavae vanie lilimo tisege ataga baluga vanie ni ke evihaleu daemo halui daluvuta tiale kebiatamo halunu. ¹⁴ Ige no bahata vatamo dobuluvisage da igaeu Diue hotomo hoto mole evige au loui avoe, ‘Solo, Solo, a osiohoike di aiahavoma. A di ata aiogevemale kemo onoinata a ebikata aiahavoma.’ ¹⁵ Ige di hoto ke evisi loui kosea, ‘Kosive, ole a.’ Ige au loui avoe, ‘A di aiahavomale Iesu ke dalike. ¹⁶ Iale hovelahai laminela. Di ae lohoi isiviale au di esemu holisi a nova elehale ko loui ata haivei di gabie onole vaveve a haivuge keta loui ata haivenela. ¹⁷ Isege dana bae Diue ata isi Diue ata holioholiale kebiama a tedahoi a hanavoge kebiae tenela. ¹⁸ Kebiae tiniege niabe alavoge abuna vavie vaveveta Setene vaveveta halevai atagae vaveve vai Dilava ehovai. Abuna kateale vai abu evievi mai daemo mavoge dana vavevebe toela ulihage abuna otogoe tai Dilavau au ata maleveale kebiahi ui.’”

Bolou au lovie deiada louma.

¹⁹ Bolou kateai loui Kini Agiliba namihai tota loui avoe, “Hoto keu otogomo lohoge di ke kabebihavoholisito evinu. ²⁰ Di ke evisi vasohuta tiale Damasikasi ata haivei halei tiale Dielusalemae velemai ata haivenu. Isi Diue ata isi Diue ata holioholiale kebia vata bahatae tiale haivei namigevei kosea, ‘La vaveve toela halevai Dilava ehovai vaveve dua vage auna ke elehai huhuige laeau ekalesia seleve.’ ²¹ Katealemoike di vani mole Diue dubu baluga keve usege abu isiviale dahavoge di hatai. ²² Isito kateimalela Dilavau di tedahoge di aike uniale hotove loui vatae kosive isi ata bahata kebia haivema. Subuta beloveta degomole isi Mosese keau louale nahateike di loui ata haivema. ²³ Abu loui avoe,

‘Kelisona hatiniege tota hatihatimo hovelahai ukolikolie hoto loui Diue ata isi Diue ata holioliuale kebia haivege abuna kemo lulelelahai.’ Iale ke nahateike data louma.”

²⁴ Bolou hoto kateale louge Vesitasu baita avuho loui avoe, “Bolo, ana tilogoanu. Mesoho a lulele moaga kaovalage a kinau toelanu.” ²⁵ Ige Bolou avuho loui avoe, “Kosive, di tilogoholisito hoto seleveike di ke lounu.” ²⁶ Kateai louito Kini Agiliba namihai avoe, “Di huhuige vavege ko bahataeau hogodeveholige a vavege bahata kobia hilokaevenu. Iale di vabuholisito momoleai hoto ko louma.” ²⁷ Iale Kini Agiliba, ana belovetaeau louale ke evisi manu. Di huhuige a ke evisi manu.” ²⁸ Kateai louge Agilibau namihai avoe, “Bolo, a huhuige ana valive hotoe esehame kemo di mage di evievi ata holisi Dilava ehomai.” ²⁹ Ige Bolou namihai avoe, “Hotoe esehame mesoho hoto baluga keta duave. Isito di Dilava imihai isiviale a isi ata bahata komo ualeau da nahate vai evievi ata holisi Dilava ehovai. Di katealeho Dilava imihaito isiviholinu la seimita di ada umuvale ko nahate valiho.”

³⁰ Bolou kateai louge gamani kosive Vesitasi, Kini Agilibau abu amakini Benisiti isi esemuiabe bahata keau hoveveve heie tilu. ³¹ Heie tiale mole namigeveve avoe, “Malaha kou vavevebe toela vaholiuale nahiabuna oleve kateai dibulae hanavoi mesoho hamage au hatai.” ³² Ige Agilibau Vesitasi namihai avoe, “Malaha keu Loma kosive baluga Sisa elehaho namihaholivetebe nahi iovage au oe tinu.”

27

Bolou bouti mai Lomae tinu.

¹ Iniale vani mole kosive keau Bolo mai Italie hanavoveve humaha ke kaovaliale bae bouti mole elehai Bolota dibulae ata degomoleta maleve ame kosive mole Diuliasi omisi isiviale va nalievi. Keu ame etule mole Ogasita ke kosive. ² Ige no bouti kemo biloluvilu. Bouti keu Adalamiti kemo lohoale isiviale Esia vatae tai. Kateige no kemo biloluvisi tige malaha mole Alistakasi keu nohehi tinu. Malaha keu subuta Masedonia vatae o mole Tesalonia ke halei lohonu. ³ No vani mole lohoale Saidoni oe velehovoge ame kosive Diuliasiu Bolo hoesehavi namihage au tiale au haokuvu elevege abu isivige hau omilu. ⁴ Ige no o ke halevai tota tige no tiveve keveatae heluka balugau lohoma. Ige no hedeveve vata mole Saibalasi ke iae lotilu. ⁵ Keve lotilialeau Silisia vata evihai lotilialeau Babilia vata keta evihai tilialeau Lisia vatae velehovoi o mole Maila keve dobuluvilu. ⁶ Isi keve usege ame kosive keu bouti kaovasege bouti moleu Alekisandia kemo lohonu. Iale bouti keu Italie tihovage kosive keu no holoeveve kemo tinu.

⁷ Kemo tiale heluka balugau lohoge no saiaivi tilialeau o mole Naidasi keve velehovolu. Isi kemo inuta tiholisito hedeveve vata mole Keliti keve tilialeau matama mole Salomone ke evihai Keliti vatae iae lotilu. ⁸ Keve lotiale vatae vava unahala lotilu. E keu toela balugage no saiaivi tilialeau boutiu lamimale matamae duae lavilu. Matama ke vavamo o mole Lasia keu ua.

⁹ Ige no keve dobuluvisi vani moaga ua. No isiviai taito eu toela seleveage no keve usege Diue ataeau abu vavege toela ulihamale ke vaniu uoholinu. Ige Bolou hoto mole loui kebia namigevenu. ¹⁰ Isi avoe, “Di la namigevege evive. Nahiabuna vani kosealemo tiliege boutina toelage kunaiabuna emo tai uoholige mesoho nahiabuna haluvisi.” ¹¹ Bolou kateai lousege ame kosive keu hotove evioholisito bouti ke biage isi matahamale kebia hoto evinu. ¹² Abu isiviale ke halevai o moleve tai. Kosealemo boutiu vaganamole keve lamiale keu toelanu. Kateige abu isiviai talive Keliti vatamo o mole Vonisi keve ui. Keu boutiu lamimale matamae dua. Helukau lohoito negoholimale matama.

Hanunu balugau lohoale deiada

¹³ Iniale vani mole heluka esehameu lohoi duaveage abu loui avoe, “Nahi tai.” Isi kateai abu boutie anika butuhai mai mavoi vatae vava unahala tilu. ¹⁴ Tisege hanunu baluga bouti matahamaleau ivihai avoe, Elokadoni keu vataeatae lohoale boutiemo lohonu. ¹⁵ Keu lohoale bouti mai tige abu isiviai bouti giloai hoideveve vataeatae tai. Isito hanunu balugau negoalemo abu kateige anekianu. Ige abu halevasege hanunu keu bouti mai e ni seleve tinu. ¹⁶ No katelahalata lohoale e nie vata mole Kolada ke iae loholu. No ke iae lohoime vanagi mai bouti baluga iae etunuvale ke ebagevage keu toloanu. Isito no negoi ke ebagevai mai boutie uvue mavolu. ¹⁷ Ige eu no bouti baluga ke aiohavoge toelale ke no hote mai bouti ke valahatui umuvage bouti matahamale keau vabulalahai valai butuhai etolevalu. Abu huhuai avoe, “Onoilage hanunuu no malevevi Avilikae tiniege esagamo vatoge no haluvima.” Kateisege hanunuu no malevevi tota e nie tinu. ¹⁸ Iniale vani mole eu balugai toelage abu kako degomole malei davalamo hatuge boutiu vokovokoanu. ¹⁹ Iniale vani mole eu tota kateige abu boutie hau degomole malei davalamo hatulu. ²⁰ Hanunuu kateai vani moaga lohohage vau bukai loalage no vanita didita elehaholisi moleho loui kosea, “Nahi bae ulivebene.”

²¹ Keau katelahai vani moaga lovi ioholige Bolou vigoebemo lamisi namigevei avoe, “Evive. Di Keliti vatae laheho loui kosea, ‘Ti halevave.’ Ige la di hoto evioholige nahi lohoalemoike vaveve toela kou nahiero velemanu. ²² Isito di hoto mole louge evive. Negolahave. Labeu bae hatilivebene. Lana bahata usege bouti unahana toelai uoholisi. ²³ Di hilokale keu koseanu. ²⁴ Di Dilava baluga ke hoesehavoi atave holialemo au nivu vavimo au anelu hanavoqe dae lohonu. ²⁴ Isi loui avoe, ‘Bolo, ainaho vabualive. Ana bae Loma kosive baluga Sisa ke vudimo lamisi a deiada lounela. Ige Dilavau a guliguli ke evialemo aluvuta timale kebiataebuna ue dua vai.’ ²⁵ Anelu keu dahou louale deiadaike di loui la namigevealemo negolahave. Di huhuige Dilavau hoto ke louale auna bae velemai. ²⁶ Velemage bouti kona tiniege vata moleve vunavunai toelai.”

²⁷ Bolou kateai lousege hanunu balugau bula abuita ke uvumo no bouti mai e baluga Meditelenia kemo tiniale vavi ke vigomo bouti matahamaleau huhulahai avoe, “Mesoho nahi aike vatae vavaike ko lohoma.” ²⁸ Kateai loui isiviai hilokage esagana vuguvuguanu. Emena egeanu. Kateai hote mai mune mai avuemo etunuvai emo manevege keu dobai esaga male egeveu uani handele tuenti (120). Ige abu uito tota ke nahate va moleage egeveu dobai naintianu (90). ²⁹ Kateai vabulahai loui avoe, “Nahi aike onolahalata munemo tima.” Isi kateai bouti iae anika abuita abuita malei emo hatui isiviale vau solekai alamoi. ³⁰ Isi vabulahai isiviale vanagi mai bouti baluga halevai vatae tai. Isi lobogevei loui avoe, “No anika malei vanagimo talive boutie ulimo hatui.” ³¹ Kateai vanagi mai manevesege Bolou ame kosiveta esemuiabeta namigevei avoe, “Koeabuna bouti halevai tige laeabuna bahata uoholive.” ³² Bolou kateai louge ame esemu keau vanagie hote heisi bohige keu emo dobage eu mai tinu.

³³ Iniale vau alamoho vasege Bolou isiviale namigevege abu lovi isi. Isi loui avoe, “Nahi vanie ni votini (14) ke uvumo lovi ioholisito u unahalu. ³⁴ Iale di isiviale lovi ilive elike negolahave. La bae haluvilivebene. Nahi bahataebuna vatehani maleholisi bahata vatae velehovoi.” ³⁵ Kateai loui namigeveito lovi mai kebia vudimo hoesehavoi vakoai inu. ³⁶ Ige abu bahata ke elehai negolahai bae abuta lovi ilu. ³⁷ Ata bahata bouti kemo uale noeau bahata tu handele seveniti sigisi (276). ³⁸ Ata keau bahata lovi ige uniabeu hanilahage abu tiale boutie uvue laisu busi moaga malei emo hatuge boutiu vokovokoanu.

Boutiu toelale deiada

³⁹ Iniale vau alamosege bouti matahamale keau vata elehai ke hilokaholilu. Isito esagae dua elehai isiviale keve bouti mavoi dobuluvisi ui. ⁴⁰ Isi kateai anikae hote bohisi abu tali umuvale ke lulehai isiviale matahage boutiu inuta esagae tai. Isi boutie ulimo valaie ese ebagevai isiviale helukau bouti mai esagae tai. ⁴¹ Isito bouti keu tiale munemo vatoge uliveu munemo dai gigiai usege e balugau deive hamasege keu vunavunama.

⁴² Ige tualive ataeau isiviale dibulae ata bahata havege abu haluvisi. Kosealem keau isiviholilu abu esagae talive detuluviliho. ⁴³ Kateige ame kosive keu Bolo huhuai isiviholinu abu haveliho. Isi etolahai hilokale kebiaho louge abu vasohuta emo biluvuvisi esagae tilu. ⁴⁴ Isege no degomoleau etolahai hilokaholiale keau boutiu bokobokoale ivi malei avuemo tige no bahataeau esagae tihatulu.

28

Abu Malita vatae ua.

¹ No bahata vatae tialebeu toela holioholige vatae biaeau no namigevei avoe, “Vata ko ivilike Malita.” ² Isi kateai nohehi haokuvuage veniu lohoge dabage abu no hoesegevei noheho vene beilu. ³ Ige Bolou tiale vene homoi malei lohoale vene beiale ke golomo otovesege vevu vuvunage ute mole toelau velemai adavemo uahanu. ⁴ Uahai adavemo kikokasege vatae biaeau ke elehai loui avoe, “Elehave. Kou mesoho ata havemale atae toela. Keu nova davalamo hatioholialemoike vatae lohoale au ibina manu.” ⁵ Kateisege Bolou au ada hatuge uteu dobai venemo lahanu. Isito Bolou vatehanibe maleholinu. ⁶ Abu kateai hemei ui avuemo nilahai huhuai avoe, “Adave kena uvui tumuige auna lokilahai dobai hatai.” Kateai hemei nibisi ulage Bolou momoleai uge abu tota huhulahai avoe, “Mesoho no dilava moleike ko.”

⁷ Kateisege no lohoale vata ke biage seleve Bubuliasiu no vahaeho vai no tedeavege no vanie ni abuita igaetamo avuluvuta ovemo ua. ⁸ Keve usege Bubuliasiu mamau hobeiai debibiai oe uvue lahai ulage Bolou tiale avuhu guliguliai au ada mai golovemo mamoi hoesehavoge momoleai hovelahanu. ⁹ Kateige vata kemo vavahaniamaleau lohoge Bolou kebiata hoesegevege vavahaniabeau uoholilu. ¹⁰⁻¹¹ Kateige abu onobenobe moaga noeveliale bata abuita igaetaeau uoholige no bouti mole ivi Kavoloe Mohoho

mai tiho vage abu no tiveve onobenobe ke malei boutimo otovelu. Bouti keu subuta Alekisandiamo lohoniale hanunuu loholage au lohoale vata kemo nihomai ua.

Abu Malita halevai Lomae tilu.

¹² No bouti ke mai Silakusie tialeau velehovoi vanie ni abuita igaetamo keve ua. ¹³ Isi tota kemo bouti ke igae mai tilialeau Legumu oe velehovoliale vavita helukae duau no iae no hanavege no vanie ni abuitamo tiale Buteolie velehovolu. ¹⁴ Keve velehovoi dobuluvisi tiale evievi ata degomole kaoveliale elegevege abu noheho louge no abuhi bula igaemo uliale halevai heila Lomae tilu. ¹⁵ Isege Loma evievi ataeau no tiale hoto ke evisi ulila no beiavei lohoale Abiasie noemo lohosege gabie lohoale keau Tilio Tabenie noemo loholu. Ige Bolou kebia elegevegi vahaehoai Dilava hoesehavonu.

Abu nova Lomae velehovolu.

¹⁶ No abuhi tiale Lomae velehovoge Bolou au ahuveta o molemo uho vage ame kosiveu tuvalie ata moleho louge au Bolo nalisi ua. ¹⁷ Iniale vanie ni abuita igaetaeau uoholige Bolou Diue kosive kebiahi hotohotoaho hohavege keau mole bevuevei igaetoai lohoge au namigevegi avoe, “Di haokuvuia, di Dielusalemie usege Diue ataeau di mai kotaho Loma gamanie tai isiviale dahavoi. Isito di nahie ata aiogeveholisi nahie buluve menaka kebiata aiogeveholinu. ¹⁸ Ige Loma kosiveu di vaveve ke kaovai daemo vavevebe toela elehaholige dahavoveve ke humahau uoholige au isiviale di iomage di tai. ¹⁹ Isito Diue ataeau negolahai kosive ke namihage di data negobedai kosive ke namihai kosea, ‘Di isiviai talive Loma gamanie kosive baluga Sisa kemo bae di deiada loui.’ Katealemoike di lohoale isiviholinu kateale vai nahie ata aiogeveliho. ²⁰ Isito di isiviale laeau lohoge nahi hotohotoai. Kosealemo di isiviale seimi kou daemo uale ko hilokave. Iselala ataeau ata tetaeveveve ke hemei umale ke ivimoike abu di mai dibulae mavolu.” ²¹ Kateai louge abu avuho loui avoe, “No Diue ataeau levaleva maholisi no haokuvuia Diudia vatamo uale kebiamo a vavevebe toela evioholilu. ²² Iale no isivialeike a deiada evisi. No kosealahame unaha hilokalu. Vatae ata bahata keau evievi ata laemo hotoe toela louma.”

²³ Abu kateai louito avuho vani mavoale keu lohoge Diue ata moagaeau lohoale Bolo oe igaetoai uge au vanimo vavimo ataeau Dilava adae vuvunemo uveve hoto ke loui Iesu deiadata loui namigevema. Isi Moseseu buka hisalieveale isi belovetaeau hisalieveale kebiamo Iesu deiada loui isiviale abu kemo luleleai hilokai. ²⁴ Kateai haivelage ata degomoleau evi unahasege degomoleau evisi abu uvu mai Iesu omilu. ²⁵ Abu katelahai halevai tiho vasege Bolou hoto mole igae loui namigevegi avoe, “Dilava Munanae Tumuu louale keu seleveike. Au beloveta Aisaia namihage au avuta loui la buluve kebia namigevenu. ²⁶ Isi Aisaia namihai avoe, ‘Talive ata kobiahio loui namigevegi kosea, Laeabuna hoto ko evisito bae ihuve malivebene. Isi kaovalata bae nenilahai hilokalivebene.

²⁷ Kosealemo uvuiabe keau toloige keau golemata holievei ni kedutebia holievelu. Isito abuna vaveve kateale vaholisi hoidevegi di ehovalege abuna hoto evie dua vai neniai elehai bae kemo lulelelahage dana kebia hoesegevegi.’”

²⁸ Bolou Bukae Hoto ke louito namigevegi avoe, “Di isiviale hilokave. La hoto evioholialemo Dilava ukolikolie hoto mai Diue ata holioholiale kebia ovege abuna hoto ke evisi.” ²⁹ Kateai louge Diue ataeau itumulahai halevai moleho louma.

³⁰ Bolou vagana abuita ke uvumo biageu au o mole male kemo usege ataeabuna avue deiai lohoge auna kebia vahaeho vagei. ³¹ Auna kateaito ataeau Dilava adae vuvunemo uveve hoto ke loui nahie Kosive Iesu Keliso ke deiadata loui haivegegi. Keu au uvu bahata mai Kosive omisi vani bahata negobedai hoto ke louge atabeu ke keluoholinu.

Loma

Bolou ekalesiaho levaleva ko hisalianu.

¹ Iesu Keliso esemu Bolo dailike ko. Dilavau di hohavoi di ebagemage dau abostolo ata holisi hotoe dua loui ata haivema. ² Dilavau subuta au hotoe dua mai au ata oveve hoto ke loui au beloveta ata haivege abu Bukae Hoto ke hisalilahalu. ³ Hoto keike Dilava mou loholive hoto. Nahie Kosive Iesu Kelisomo hoto keu lohonu. Ige Iesu keu atae elehilehi nahate vai Deividi valadamo lohonu. ⁴ Ige vani mole Dilavau au vuvunemo etuvage keu hatihatimo hovelahanu. Ige kemoike nahi hilokage keu ata tumute. Isi keu Dilava mo negote. ⁵ Iesu kemoike Dilavau au uvu daoi di ebagemage di abostolo ata holisi Iesu Keliso ivimo vatae ata bahata haivelike vage abu hoto ke evisi evievi ata holima. ⁶ Ige Dilavau Loma o balugae umale ata lata hohavege la Iesu Keliso ata holilu.

⁷ Katealemoike di ko hisaliai laheho hanavonu. Dilavau au uvu laovei la hohavege laeau atave holilu. Kemoike di isiviale nahie Mama Dilava isi nahie Kosive Iesu Keliso keau la huhuevei la hoesegevege ue dua vave.

Bolou kebia vahaeho vai guligulianu.

⁸ Di hotoe umuka louge evive. Di Iesu Keliso ivimo guliguliai laheho vahaehoale ke loui Dilava namihanu. Kosealemo di evige vata bahatae ataeau loui avoe, “Loma ata keau evievi ataea.” ⁹ Dilavau hilokage di hoto kou seleve. Di uvu baita omisi move hotoe dua loui ata haivema. Keu hilokage di vani bahata la huhuevei laheho guliguliana. ¹⁰ Guliguli kemo di isiviale Dilava imihage auna au isivimo humaha alavoge dana vani mole lae deiai lohoi. ¹¹ Di isivi balugale lae lohoi la elegevei Munanae Tumuu au vuvune daoi di hoesehavoale kemo data la negotiegege kemo negolahave. ¹² Di louale keu koseanu. Lana di evievi elehai kemo negolahage dana data la evievi elehai kemo negoai. Ige nahi kemo mole hoesegevevi mole tedaevi.

¹³ Di haokuvua, di isiviale la hilokage di subuta vani moaga isiviai lae deiai lohoi. Isito humahau uoholinu. Di matama moagae oai tiale evioholimale kebia haivege abu eviale ke nahate di isiviai lae lohoi la haivege lata evive. ¹⁴ Dilavau lovi ko mai daoale kemo di bae halelivebene. Isito dana vai ata bahata haivei. O balugae umale isi botoe umale kebia dana haivei. Isi luleleamale isi luleleholimale kebiata dana haivei. ¹⁵ Katealemoike di isivi balugale Loma o balugae umale lae lohoi hotoe dua loui la haivei.

Hotoe duae vuvune

¹⁶ Di hotoe dua ke louliho matioholinu. Kosealemo Dilava hoto keu vuvunete. Diue ata keau vasohuta hoto ke evilu. Ige gabie Diue ata holioholiale kebiata hoto ke evilu. Ke vuvunemo Dilavana ata kebia malevei. ¹⁷ Hotoe dua keu nahie haivege nahi kemo hilokage Dilavau nahie evievi unahamo nahi malevege nahie vavevena Dilava nimo inutolotoloai. Bukae Hotou kemo loui avoe, “Olemeau abu uvu mai Dilava omisime nivemo inutolotoloale keabuna abu evievimo ui tigei.”

Dilava itumu

¹⁸ Ata oleuoleu vaveve toela vai hoto seleve bamumale kebiaho ehue umale Dilava kena itumuai aiogevevi. ¹⁹ Kosealemo Dilavau au onobenobe vamale kemo ataeau hilokage Dilavau ua. ²⁰ Ataeau abu nita Dilava elehaholilu. Isito Dilavau subuta vata vai otogo vale ataeau elehai hilokage Dilavau vani bahata au vuvunemo ui lohomale kemoike au onobenobe ke bahata vaevenu. Isi keau hilokage Dilavau vatae kosivebe nahate holioholinu. Isito keu ata bahata evigevenu. Iale kemo keabuna lobolalahi loui kosea, “Noeau Dilava ke hilokaholilu.” Isito keau lobo unaha. ²¹ Keau hilokage Dilavau ua. Isito keau isiviholilu ke ebagevai hoesehavoliho. Isi keau Dilava vahaeho vaholilu. Katealemoike huhuihuhuiabeu toelage luleleabeu uoholige keau momage uvuiabeu agaholinu. ²² Keau loui avoe, “Noeau lulelete ataea.” Isito keau tilogoe ata ke nahate. ²³ Keau gibosoune Dilava ke ataga halevai vatae onobenobe unaha hoesegevema. Atae munana, ugue munana, ovoo munana, utee munana kebia unaha hoesegevema.

²⁴ Katealemo Dilavau kebia halevege keabuna abu vavae isivi vadeu uvuiabemo umale ke vai mole vavae vaveve toela vagei. ²⁵ Keau Dilava hoto seleve ke mai loboe hoto toaime Dilava hoesehavoholisito Dilavau vamale ke hoesehavoi guligulihavoma. Nahiau vani baita Dilava hoesehavoge duave. Isito keau kateholima. Hoto seleveike di ko louma.

²⁶ Ata keau vaveve kateale vage Dilavau halevege keabuna abu molete vavae vaveve toela vagei. Keate keabuna malahahi ladeveho isiviholisito keatena keateho isiviai avuti vaveve toela vagei. ²⁷ Ke nahate malaha keabuna keatehi ladeveho isiviholisito

molehi ladeveho isivi balugagei. Keau abu moletemo vaveve toela kateale vamale kemo vavaeabena toelai. Ige keabuna ibinae toela malei.

²⁸ Ataeau Dilava keho isiviholisi ke vaveve kabebihavoge Dilavana kebia halevege abuna vaveve toela unaha huhulahai ke unaha vagei. ²⁹ Vaveve duau abuemoo uoholige vaveve toela unahana uvuiabemo tobalohoge. Abuna teibae vaveve vai mole kunaiho isivilahai mole aioegevegi. Abuna mole maina mai isi mole havei mole lobogevegi mole aioegevegi. Abuna mole vaveve toela loui mole haivegegi. ³⁰ Abuna Dilava aiovai moleho hotoe toela loui mole aioegevegi abu ebika tabagevai vaveve toela unaha huhulahai mamuvu neinuvue hoto evioholigei. ³¹ Abuna luleleholisito moleho hoto loui mavoi kemo mole lobogevegi moleho uvulahaholisito mole aioegevegi. ³² Ata keau hilokage Dilava menakou loui avoe, “Vaveve kateale vai umale keabuna ibinae toela mai haluvisi.” Keabuna ke hilokaito vani baita vaveve toela kateale vai ata degomoleau vaveve kateimale vamale kebia vahaeho vagei.

2

Dilava kotae vaveve

¹ La oleu au haokae vaveve toelamo hoto louge keu Dilava nimo toelanu. Lana la vaveve toela ke bamuho la haokae vavevete toela louge keta la ebikatahoike la ke loulu. Iale keu laemo toelanu. ² Nahi hilokage Dilavau vaveve toela vamale kebiamoo hoto louge keu duave. ³ Isito la olenau au vaveve toela bamuho au haokae vaveve toelamo hoto louito vaveve ke vage Dilavau bae vaveveve toela momahavolivebene. Isito auna kemo hoto loui. ⁴ O mesoho Dilavau la aiogeveholisito laheho uvuai la tedaevemale kemo lana Dilava vovoholu. Mesoho la hilokaholige Dilavau laheho uvuai la tedaevai la hemevegi umale kemo isiviale la vaveve toelamo hoidevegi. ⁵ Isito la olenau au vaveve toelamo hoilahaholisito uvuvana keho isiviai vani bahata ke vai tiniege gabie Dilava itumue vani balugau lohoge auna vaveveve toela ke bahatamo hoto loui. Ige ata kena ke ibina bahata malei. ⁶ Vani kela Dilavana atae vavevemo ibinaeabe igaegae ovei. ⁷ Ata degomoleau vani bahata vaveve dua vaimo isiviale Dilava ivi ebagevale kebia Dilavana ukolikoli ovei. ⁸ Isito ata degomoleau vaveve dua kabebihavoi vaveve toela ehovai vamale kebiaho Dilavana itumuai. ⁹ Ige vani kela vaveve toela vamale ata bahata keabuna vatetumu baluga malei. Diue ataeau vaveve toela vamale keabuna vasohuta vatetumu ke malei. Ige gabie Diue ata holioholiale keau vaveve toela vamale kebiate abuna vatetumu ke malei. ¹⁰ Isito vaveve dua vamale kebia bahata Dilavana iviabe tabagevegi hoesegevegi uveve dua ovei. Auna vasohuta Diue ata kebia hoesegevegi. Isi gabie Diue ata holioholiale kebiate hoesegevegi. ¹¹ Dilavau bae mole toela kaovaito molele halelivebene. Isito auna ata bahatae vaveve kaovai kemo hoto loui ibinaeabe ovei.

¹² Diue ata holioholiale keau Mosese menaka hilokaholilu. Keau vaveve toela vage Dilavau Mosese menaka kemo vaveveabe kaovalivebene. Keau vaveve toela vamale kemo keabuna haluvisi uoholisi. Isito Diue ataeau Mosese menaka hilokale keau vaveve toela vage Dilavana menaka kemo vaveveabe toela kaovai hoto loui. ¹³ Ataeau Mosese menaka hilokale kemo vaveveabeau bae Dilava nimo inutolotololivebene. Isito menaka ke hoto evisi vamale kemo vaveveabena Dilava nimo inutolotoloi. ¹⁴ Diue ata holioholiale keau Mosese menaka ke hikokaholilu. Isito keau abu isivimo menaka ke hotou louale vaveve nahate vama. Abu menaka ke hilokaholisito abu uvumo huhulahai menaka vaveve ke nahate vama. ¹⁵ Katealemo nahi hilokage Dilavau uvuiabemo menaka hoto ke mamonu. Kemo abuna abu uvumo huhulahai hilokage vaveve oleteu duave. Vaveve oleteu toelave. Abuna vaveve toela vage uvuiabena duavevebene. Isito abuna vaveve dua vage uvuiabena duaveai. ¹⁶ Katealemo di hotoe dua loui ata haivei loui kosea, “Vani kela Dilavau louge Iesu Kelisona ataeau abu huhuihuhui toela vai mahogovamale ke hoto loui daii.”

Diue atae vaveve

¹⁷ Di hoto mole louge evive. La degomoleau Diue atae. La la ebika tabagevegi loui kosea, “Noeau Dilava atae. Keu au menaka noevege no kemo ue dua vama.” ¹⁸ La Dilava isivi hilokale. Dilavau au vaveve la haivege la kemo hilokage vaveve oleteu duave. Oleteu toelave. ¹⁹ La huhuige Dilava humaha hilokaholimale kebia la holoevegi Dilava humaha haivema. La huhuige la ataga keu vavie vaveve vai umale kebiamoo ataganu. ²⁰ La hilokage menaka kemo lulele bahata isi hoto seleve keu ua. Katealemo la luleleholimale kebia haivema. Isi esebulu nahate holimale kebiate haivema. ²¹ La ata degomole haivema. Isito laeau la ebika haiveholima. La ata haivei loui kosea, “Vavolo halevave.” Isito laeau vavoloima. ²² La ata haivei loui kosea, “Lainaho mole keatehi ladevegive.” Isito laeau vaveve kateale vama. La ata haivei loui kosea, “Loboe dilava

hoesehavo halevave.” Isito laeau Dilava lobohavoi dubuvemo vavoloe vaveve nahate vama. ²³ Laeau Dilava menaka kemo la ebika tabagevema. Isito la menaka ke eguvai kemo Dilava aiohavoma. ²⁴ Bukae Hotou kemo loui avoe, “Diue ata laeau vaveve kateale vamale kemo Diue ata holioholiale keau Dilava ivi aiohavoi hotoe toela louma.”

²⁵ Laeau la vudie vate bohisi loui kosea, “Vaveve kemo noeau Diue ata selevea.” Lana katelahai Dilava menaka hoto evisi vage keu duave. Isito lana katelahaito Dilava menaka hoto evioholige la vate bohimala keu la isivi unahaika la ke vama. ²⁶ Katealemo Diue ata holioholiale keau abu vudie vate bohioholisito Dilava menaka evisi vage la huhuige Dilavana vaveveabe ke elehai huhuai kosea, “Keau di ata selevea.” Mane, auna ke vai. ²⁷ Diue ata laeau la vudie vate bohisi Dilava menaka ke hilokalu. Isito la menaka huhulahai ehovaholima. Isito Diue ata holioholiale keau abu vudie vate bohioholisito Dilava menaka huhulahai ehovama. Kemoike abu la evievi ke evigevelu. ²⁸ Katealemo ata oleteau Dilava nimo Diue ata selevea. La huhuige ataeau abu vudie vate bohimala keabuna Diue ata seleve holisi. ²⁹ Ba, auna ke vai. Dilava hoto keu seleve. Isito Dilava Munanae Tumuu ata oletebia uvu hoesegevemale ata keau Diue ata selevea. Ataeabuna kebia elegeve hoesegevelivebene. Isito Dilavau uvuiabe elehamale auna kebia hoesegeve.

3

Dilava igaeu inutolotolote.

¹ Di louale kemo la huhuige Diue ata holisi vudie vate bohimala kena duave. Emena tolanu. ² Di huhuige keu duave. Kosealemo Dilavau vasohuta au hoto mai Diue ata ovenu. ³ Ige ata kebia degomoleau abu evievimo negoholisi dobuvige la huhuige Dilavana avuta au hoto au louale ke vaholisi. ⁴ Ba, auna ke vai. Dilava hoto keu seleve. Ata bahatae abuna huhuihuhui lobo vasege Dilava hotona seleveai. Katealemo Deividuu Bukae Hotomo Dilava imihai loui avoe, “Mesoho ataeabuna a hoto mai kotalahamale ke nahate valiege a hoto keu bae lobo holilivebene.

Isito a hoto kena seleve unaha.

Ige a hoto keu negoige atabeu bae ke egumalivebene.”

⁵ Hoto kemo ata degomoleau loui avoe, “No vaveve toela vamale kemo Dilavau ke ibina noevei no aiogevege keu tolanu. Kosealemo no vaveve toela vage Dilavau no toela ke ibina noveholige ataeabuna ke elehai hilokage Dilava vaveve keu inutolotoalanu. Kemoike Dilavau no vaveve toela ibina noevege keu tolanu.” ⁶ Ata keau kateale huhulahale keu tolanu. Dilavau bae vaveve toela ke elehai halelivebene. Isito auna ata bahata vaveve kaovai kemo hoto loui ibinaeabe ovi.

⁷ Ata degomoleau loui avoe, “No lobe hoto loui ata haivege abu kemo hoto seleve huhulahai Dilava hoesehavoge vadeuhoike Dilavau no vaveve toela ke ibina noevema.”

⁸ Ata keau loui avoe, “Bolo keta hoto kateale louma.” Isito di hoto kateale louholima. Abu hoto kateale loui isiviale nahi vaveve toela vage elike vaveve duau kemo lohoi. Hoto katealemo ata keau di aiohavoma. Iale Dilavana bae ata kebia aiogevevi ibinae toela ovi.

Ata bahata keau vaveve toelate

⁹ Katealemo la huhuige Diue ata nahiau Dilava nimo Diue ata holioholiale kebia evigevelu. Ba, di louale kemo la hilokage Diue ata isi Diue ata holioholiale nahi bahataeau vaveve toela vamale ataea. ¹⁰ Bukae Hotou kemo loui avoe, “Atabeu Dilava nimo inutolotoloholinu.

¹¹ Atabeu Dilava vavevemo luleleai kemo Dilava kaovaholima.

¹² Ata bahataeau Dilava humahamo hoidevevi vaveve toela vama.

Katealemo atabeu vavevebe dua vaholima.

¹³ Ataeau abu aimo hotoe toela loumale keu haluvimale abata alavoge sohoale ke nahate. Keabuna abu nememo lobe hoto unaha lougei.

Ute toelau au aimo hatihatie mesulu mamoa ke nahate ata keau hotoe toela loui ata aiogevema.

¹⁴ Keau abu aimo itumue hoto unaha loui ata aiogevema.

¹⁵ Itumu kemo abuna solekai ata degomole havege abuna haluvigei.

¹⁶ Abuna oleve keve tiliege ata aiogevevi havegei.

¹⁷ Vaveve kateimale vamaleau uveve duae humaha hilokaholilu.

¹⁸ Keau Dilava vabuhavoholilu.”

¹⁹ Bukae hoto kemoike nahi hilokage Dilavau subuta au menaka mai Mosese omisi isiviale ata bahata hilokage Dilavana vaveveabe toela kaovai kemo hoto louge keau bae Dilava menaka ke hoto hamalivebene. ²⁰ Katealemo nahi hilokage ataeau negolahai

isiviale Mosese menaka ke ehovage vaveveabena Dilava nimo inutolotolohai. Isito keu anekianu. Mosese menaka kemo ataeau abu vaveve toela ke hilokalu.

Dilavau nahie malevei inutolotologevenu.

²¹ Isito Dilavau aike humahae doge alavoge ataeabuna Dilava nimo inutolotoloai. Mosese menaka hoto isi subuta belovetae hoto keau humahae doge alavoliho kemo hoto loulu. Isito Dilavau subuta menaka kemo humahae doge alavoholinu. ²² Keu humahae doge alavoale kemo ata oleuoleu abu uvu mai Iesu Kelisomo mavoge Dilavana hoesegevege vaveveabena Dilava nimo inutolotoloai. Ata bahata keau mole nahate. ²³ Nahi bahata vaveve toela vamale ata nahia. Kemoike nahi Dilava atagamo vugeholilu. Nahi ehue tai Dilava ataga elehalivebene. ²⁴ Isito Dilavau au isivimo au uvu nahiovei Iesu Keliso hanavoge keu nahie toelae ibinaho hatige nahi kemo Dilava nimo inutolotolohai. Nahiau nahie isivimo louge au ke hanavoholinu. Isito au isivimoike au ke hanavonu. ²⁵ Iale kemo Dilavau Iesu hanavoge lohoale hatinu. Ige ataeau abu uvu mai Iesu omige Dilavana kemo vaveveabe toela ulihai. Dilava vaveve keu nahi haivege nahi kemo hilokage vaveveve keu inutolotoloanu. Kosealemo Dilavau subuta atae vaveve toela ke hilokanu. Isito vaveveabe toela ke ibina oveholinu. ²⁶ Isito novae vani komo au atae vaveve toela ibina bahata mai Iesuemo mamoge au lohoale hatinu. Vaveveve keu nahi haivege nahi hilokage vaveveve keu inutolotoloanu. Katealemo ataeabuna abu uvu Iesu omige Dilavana kebia hoesegevege vaveveabena inutolotoloai.

²⁷ Dilavau au isivimo nahio uvuai nahi maleveale kemo nahi nahie ebika tabageve halevai. Mosese menaka evisi vamale kemo nahi bae Dilava nimo inutolotoloalivene. Isito nahi nahie uvu Iesu omisi ke ehovage nahie vavevena Dilava nimo inutolotoloai. ²⁸ Nahi hilokage Mosese menaka kemo atae vaveveve inutolotoloholinu. Isito ataeau abu uvu mai Iesuemo mavoike vage vaveveabe keu Dilava nimo inutolotoloanu. ²⁹ La huhuige Dilava kena Diue ata kebia Dilava igaenike. Ba, Dilava keu nahi bahata Dilavaike ke. ³⁰ Dilava seleve igaue ua. Ige Diue ata keau abu uvu mai omige vaveveabe keu nivemo inutolotoloanu. Ige Diue ata holiolahiale keau abu uvu mai omige vaveveabe keu nivemo inutolotoloanu. ³¹ Nahi nahie uvu mai Iesu omiale kemo la huhuige nahiaabuna Mosese menaka ke aiohavoi. Ba, nahie evievi kemo nahiaabuna menaka keta mai selevetisi.

4

Ebalhamu evievi vaveve

¹ Nahiau Ebalhamu valada nahiabulike. Iale la huhuige Ebalhamu vaveve keu osionu. ² Ebalhamuu vaveve vamale kemo Dilavau avuho koseale louholinu. Au inutolotoloae ata. Keu kateai louvatebe Ebalhamuu au ebika ebagemanuu. Isito vaveveve keu kateholige keu Dilava nimo au ebika ebagemaholinu. ³ Bukae Hotou loui avoe, “Ebalhamuu au uvu mai Dilava ominu. Au evievimo kateige Dilavau hoesehavoi ebagemai avuho loui avoe, ‘Au inutolotolote.’” ⁴ Ata olena lovaniege au ibina mai. Au bae heiata au ibina malivebene. Isito au ono vadeho loviale auna ke ibina mai. Atae vaveve keu kateanu. Abu isiviai abu negomo abu ebika tabagevei Dilava nimo inutolotoloai. ⁵ Isito Dilava vaveve keu koseanu. Ata olena au vavevemo negoholisito au uvu mai Dilava omisi kemo negoige Dilavana ata ke evievi elehai loui kosea, “Ata ke vaveveve inutolotoloanu.” Dilava keike atae toela malevei hoesegevege vaveveabe keu inutolotoloanu. ⁶ Ataeau abu vamale kemo vaveveabeu inutolotoloholinu. Isito keau abu uvu mai Dilava omige vaveveabeu Dilava nimo inutolotoloanu. Ige keau kemo vahaeholahai. Deividii subuta hoto kateale lounu. ⁷ Keu loui avoe, “Dilavau atae vaveve toela ulihahatuge abuna kemo vahaeholahai.

⁸ Dilavau atae vaveve toela ulihai huhuoholige abuna kemo vahaeholahai.”

⁹ Deividii louale vahaeho kena vali vudie vate bohiale kebia unahamo lohoi. Ba, vate bohioholimale kebiatamo vahaeho kena lohoi. Bukae Hotou kateai louge di kemo loui kosea, “Ebalhamuu au uvu mai Dilava ominu.” Au evievimo kateige Dilavau hoesehavoge vaveveve keu inutolotoloanu. ¹⁰ Vani vadeimalela Dilavau ke hoesehavonu. Au vate etuleholisege Dilavau ke hoesehavonu. Ige gabie Dilavau louge Ebalhamuu au vudie vate etulenu. ¹¹ Ebalhamuu au vate etuleale keu nahie haivege nahi kemo hilokage Ebalhamuu au vate etuleholisito au uvu mai Dilava omige Dilavau ke hoesehavoge vaveveve keu inutolotoloanu. Au vale ke nahate oleuoleu abu vudie vate bohioholisito abu uvu mai Dilava omige auna kebia hoesegevege vaveveabena inutolotoloai. Ebalhamu keu evievi ata kebia mama. ¹² Isi vudie vate bohiale kebia mamata. Isito keau abu vate bohiale kemo Dilavau kebia hoesegeveholinu. Isito keau abu mamae vaveve nahate vai abu uvu mai Dilava omiale kemoike au kebia hoesegevenu.

Oleve kateai Dilava nimo inutolotoloi.

¹³ Dilavau Ebalahamuho hoto mamoi loui avoe, “Ana a valadahi vata bahata malenela.” Hoto keu koseanu. Ebalahamuu Mosese menaka hoto eviale kemo Dilavau avuho hoto kateale louholinu. Isito au uvu mai Dilava omige Dilavau hoesehavoge vaveveve keu inutolotoalemoike Dilavau avuho hoto kateale lounu. ¹⁴ Ata degomoleau Mosese menaka unaha evisi isiviale kemo Dilavau Ebalahamuho louale ke malei. Isito keu kateholinu. Keu katevatege ata degomoleau Mosese menaka halevai abu uvu mai Dilava omiale keau Dilavau Ebalahamuho louale ke maleholilu. Isi keu katevatebe Dilavau hoto loui mamoaale ke ihuu uoholinu. ¹⁵ Isito nahi hilokage Dilavau hoto louale ke ihu ua. Nahi Mosese menaka ke unaha evisi vage Dilavana nahiho itumuai. Menaka keu uholige nahi bae menaka ke hoto bokoalivebene. Isito keu uge nahi oleve kateai ke vai. Evievi unahamo.

¹⁶ Katealemo nahiabuna nahie uvu mai Dilava omige auna au louale ke nahiovei. Keu nahie vavevemo nahiovelivebene. Isito Ebalahamuu au uvu mai Dilava omiale ke nahate nahi vage seleveta Dilavana au isivimo au louale ke nahiovei. Ebalahamu keu Diue atae mama, Diue ata holioholiale mama, isi nahi bahatae mama. ¹⁷ Bukae Hotou kemo loui avoe, “Dilavau Ebalahamu namihai avoe, ‘Au vatae ata moagae mama.’” Ebalahamu keu au uvu mai Dilava omiale kemo Dilavau huhuige Ebalahamu keu nahie mama nahate. Dilava keike haluvimale tatuvege abu hovedevema. Keike louge onobenobe uvesite keau ua. ¹⁸ Dilavau Ebalahamuho loui avoe, “A valadana moagai.” Isito keu velemaholisege Ebalahamuu hoto ke huhuai avoe, “Di koli holiale komo oleve kateai kena daemo velemai.” Kateaito au uvu bahata mai Dilavau avuho louale kemo mamonu. Katealemoike vatae ata moagae mama holinu. ¹⁹ Ebalahamuu uale vaganave uani handeleu (100) uoholige koli holinu. Ige mahinave Sela keta koli holige ese maveve keu anekianu. Isito Ebalahamuu ke huhuholisito au evievimo negoanu. ²⁰ Dilavau avuho au hoto loui mamoaale ke kabebihavoi au evievi haleholinu. Isito au evievimo negoai Dilava ivi hoesehavonu. ²¹ Keu seleveta hilokage Dilavana bae au vuvunemo au louale ke vai. ²² Ebalahamu evievi katealemoike Dilavau avuho loui avoe, “Au di nimo duave.” ²³ Ebalahamuu Dilava nimo duaveale hoto ke abu subuta hisalihalalu. Isito abu Ebalahamu unahaho hoto ke hisaliholilu. ²⁴ Isito nahitaho abu hoto ke hisaliai loulu. Nahi oleuoleu nahie uvu mai Dilava omige auna nahiho loui kosea, “Laeau di nimo duave.” Dilava keike nahie Kosive Iesu etuvage hovelahanu. ²⁵ Iesu keu nahie toela ibinaho hatinu. Ige Dilavau etuvage keu hovelahanu. Hovelahai isiviale nahie malevei nahi hoesegevege nahi Dilava nimo inutolotoloi.

5

Evievimo nahi Dilava nimo duavealu.

¹ Nahiau nahie uvu mai nahie Kosive Iesu Keliso omiale kemo Dilavau nahiho loui avoe, “Laeau di nimo duave.” Katealemo nahi Dilavaluvuta igaetolahai uveve dua vama. ² Nahi nahie uvu mai Iesu omige keu nahi malevege Dilavau au uvu nahiovei nahi hoesegevemale kemoike nahi ui tima. Ige nahi Dilava ataga elehalihohuhulahale kemo nahie uvu mavoi vahaeholahalalu. ³ Isi nahi vani bahata vatehani malemale ke kabebihavoholisito kemo vahaeholahalalu. Kosealemo nahi hilokage vatehani malemale kemo nahiabuna negolahai ui tigei. ⁴ Nahi katelahage Dilavana nahie vahaeho vai. Keu kateige nahiabuna gabie vaveve ke huhulahai kemo negolahai. ⁵ Ige Dilavau bae gabie vaveve kemo nahi lobogevelivebene. Isito keu au Munanae Tumu hanavoge au nahie uvumo lohoge nahi kemo hilokage Dilavau au uvu bahata nahiovenu.

⁶ Nahi negoholige Dilavau Keliso vani mamoaale vani kela keu nahie toela ibinaho hatinu. ⁷ Ata moleu ata mole duaho hativeve keu toloanu. Mesoho ata mole negotena ata mole duaho hatai. Isito atabeu bae atae toela keho hatilivebene. Atae vaveve keu kateanu. ⁸ Isito nahi hilokage Dilavau au uvu bahata nahiovenu. Nahi vaveve toela vai usege keu au mo Iesu Keliso hanavoge au nahie toela ibinaho hatinu. ⁹ Au hatiale kemo Dilavau nahiho loui avoe, “Laeau di nimo duave.” Katealemo nahi hilokage auna nahie malevei Dilava itumu kemo haliohatui. ¹⁰ Nahiau subuta Dilava aiahavomale ataea. Isito moveu hatiale kemo nahi Dilava ata holisi avuluvuta igaetolahalu. Katealemo nahi hilokage nahiahuna Kelisou hovelahale kemo ukolikoli malei. ¹¹ Kemo hoto moleu ua. Nahie Kosive Iesu Keliso keu nahie malevege nahi aike Dilava ata holisi avuluvuta igaetolahalemo nahi Dilava vahaeho vagei.

Adamu isi Keliso

¹² Vaveve toelau oleve kateai vatae lohonu. La hilokage ata igae Adamu keu vaveve toela vage toela kemo hatihatui lohonu. Ige ataeau vaveve toela vamale ke ibinaho

hatihatiu ata bahata sonumaevenu. ¹³ Subuta Mosese menakau uoholisege ataeau vaveve tola vama. Isito menaka keu uoholisege Dilavau atae vaveve tola ibina oveholima. ¹⁴ Kateigeto Adamu vani kemo hatihatiu ui lohoaleu Mosese vani ketala velemanu. Vani kemo Adamu Dilava hoto evioholisi bokoale ke nahate ataeau vaholima. Isito Adamu vale kemo hatihatiu ata bahatamo lohonu. Adamu keu vasohuta lohoi umuka mole holinu. Ige Keliso keu gabie lohoale umuka mole holinu.

¹⁵ Adamu keu vaveve toelae umuka. Ige Keliso keu vaveve duae umuka. Adamu vaveve tola vale kemo ata moagaeau haluvilu. Isito Iesu Kelisou vale kemo Dilavau au isivimo ata moaga hoesegevenu. ¹⁶ Adamu vaveve kemo ibina moleu ua. Ige Keliso vaveve kemo ibina moleu ua. Adamu vaveve tola vale kemo Dilavana ibinae tola ata ovei. Isito Iesuu vaveve dua vale kemo Dilavau au isivimo atae vaveve tola ulihage vaveveabeu nivemo inutolotoloanu. ¹⁷ Ata igae Adamuu vaveve tola vage hatihatiu ata bahata malevenu. Ige ata igae Iesu Kelisou vaveve dua vage Dilavau au isivimo au uvu bahata ata ovei hoesegevege vaveveabeu inutolotoloige abu Iesuemo uveve dua malelu.

¹⁸ Toela ke igaemo ata bahataeau vaveve tola ibina malema. Isito Keliso vaveve dua ke igaemo ataeabuna inutolotololahai ukolikoli malei. ¹⁹ Ata ke igaeu Dilava hoto evioholige ata bahataeau vaveve tola vama. Isito ata mole igaeu Dilava hoto evialemo ata moagaeabuna Dilava nimo inutolotololahai.

²⁰ Subuta ataeau vaveve tola valage Dilavau au menaka mai ovege abu menaka kemo hilokage vaveveabe keau toelalu. Ige Dilavau ata huhuevei toelamo maleveveve keu abuemole balugataho. ²¹ Subuta ataeau vaveve tola vage hatihatiu kebia malevenu. Subuta vaveve toelau atae moa ui lohoale kemoike ataeau toelae ibinaho haluvima. Isito aike Dilavau nahie huhuevei nahi tetaevei nahiho loui kosea, "Laeau di nimo duave." Katealemo nahiabuna nahie Kosive Iesu Keliso kemo ukolikoli malei.

6

Iesuu hatiale moa uveve doge maleveve

¹ Di louale kemo la huhuige nahiabuna vaveve tola vai tigei. Isi loui kosea, "Dilavana au uvu mai nahie moa avuta nahie vaveve tola ke ulihai tigei." ² Ba, seleveta au bae katealivebene. Nahiau vaveve toelamo haluviale nahate. Isi vaveve tola ke hilokaholilu. Iale oleve katealemoike nahi vaveve tola ke vai tima. ³ Lana hilokaholilu. Nahi babatisolalahai Iesu Kelisoluvuta igaetolalahai. Katealemoike au hatiale kemo nahi avuluvuta igaetolalahai. ⁴ Nahi babatisolalahai keu Iesu Kelisou hatige abu mai abavuale ke nahate. Iesuu au Mamae vuvunemo hatai hovelalahale ke nahate nahiabuna vuvuneve kemo uveve doge malei.

⁵ Di louale keu koseanu. Nahiabuna Iesuu hatiale kemo avuluvuta igaetolalahalige Iesuu hovelalahale ke nahate nahiabuna hoveveve ukolikoli malei. ⁶ Nahi hilokage Iesuu nahie vaveve tola malei idie domo hatige kemoike vaveve tola ke vuvuneu uoholinu. Kosealemo Iesuu vaveve tola ke bahataike au mai hatisi hovelahage vaveve toelae vuvune keu uoholinu. Katealemo nahi bae nahie vaveve toelae isivi valivebene. ⁷ Ataeau haluvige vaveve toelae vuvuneu abuemo uoholiale ke nahate vaveve tola ke vuvuneu bae nahi malevelivebene.

⁸ Iesuu hatiale kemo nahie vaveve tola ke vuvuneu uoholige nahi ke huhulahai kemo hilokage nahiabuna Iesu uveve nahate vai avuluvuta igaetolalahai ui. ⁹ Nahi hilokage Dilavau Iesu etuvage hovelalahale tota bae hatilivebene. Hatihati keu avuemo vuvuneholinu. ¹⁰ Iesuu vaveve tola bahataho tava igae hatige vaveve tola kebia vuvune bahata uoholisegevenu. Ige au hovelalahai aike Dilavati igaetoai uma. ¹¹ Ke nahate nahi huhulahai kosea, "Iesu Kelisou hatai hovelalahale kemo vaveve tola vuvuneu bae nahi malevelivebene. Isito nahiabuna Dilavaluvuta igaetolalahai ui."

¹² Vaveve toelau la vavamo lohoho vage lainaho ke isivi vagelive. ¹³ La subuta vavae vaveve tola moaga vama. Isito lainaho aike la vavamo vaveve toelae humaha alavolive. Isito Dilava isivi la vavamo vageve. Dilavau hatihatimo la maleveale kemo la vava bahata omive. Kateige la vavevena inutolotoloai. ¹⁴ Ige vaveve toelau bae la malevelivebene. Kosealemo la Mosese menaka ke vuvunemo uoholisito Dilavau au uvu laoevi la hoesegevevi la tola ke ulihage la vuvunevemo uma.

Dilavau la malevege esemuve holilu.

¹⁵ Nahi Mosese menaka ke vuvunemo uoholisito Dilavau au uvu nahiovei nahi hoesegevemale kemo la huhuige nahiabuna vaveve tola vagei. Ba, nahi kate halevai. ¹⁶ La hilokage ata moleu au isivi ata mole omisi hotove evige keu ke kosive holinu. Ke nahate lana vaveve toelae isivi valiege kena la kosive holige ke ibinaike hatihati. Isito Dilava isivi vai hotove evilive Dilava vaveve dua nahate vave. ¹⁷ Laeau subuta vaveve

toelae isivi vamale ataea. Isito vani mole abu Dilava hotoe dua loui la haivege la ke evisi la uvu bahatamo hoto ke malu. Katealemo di vahaehoai Dilava hoesehavoma. ¹⁸ La vaveve toela vamale kemo Dilavau la malevenu. Keu la malevei isiviale laeau esemuve holisi vaveve dua unaha vai. ¹⁹ Isito la negoholilike vage di atae vaveve nahate loui la haivema. Subuta la Vatae Kosive esemu holisi la isivi bahata omisi vaveve toela moaga vama. Iale ke nahate lana nova Dilava esemu holisi vaveve dua ke unaha vai la uvu bahata mai vaveveve dua kemo mavove.

²⁰ La subuta vaveve toelae isivi vamale kemo la vaveve dua ho isiviholilu. ²¹ La subuta vaveve toela ke vamale ke ibinaike hatihati. Ialemo la aike ke huhulahai matilahama. ²² Isito vaveve toela kemo Dilavau aike la malevege la esemuve holilu. La esemuve holisi la uvu bahata omisi isivive vamale ke ibinaike ukolikoli. ²³ Vaveve toela vamale ke ibinaike hatihati. Isito nahie Kosive Iesu Keliso kemo Dilavana au isivimo ukolikoli nahiovei.

7

Dovudovue deiada mole

¹ Di haokuvuia, la Mosese menaka hilokale kemo dana hoto mole loui la haivege ke huhulahave. La hilokage ata moleu hatige menaka ke vuvunemo avuemo uoholinu. ² Menaka kemo di louale keu koseanu. Keatebeu kolianiege koliaveu uge au ke halelivebene. Isito koliaveu hatige menakae hotou loualemo auna isivianiege kolia moleai. ³ Isito koliavena usege auna vavoloai ata moletu lahage ataeabuna menaka kemo loui kosea, "Keu vaveve toela vanu." Isito koliavena hatige auna isivianiege kolia moleage keu menaka ke egumaholinu. ⁴ Di haokuvuia, la vaveve keate ke nahate. Ige menaka keu koliave nahate. Iale menaka keu vani bahata ui timalemo lana oleve kateai menaka ke haliohatui kolia moleai. Kolia mole keike Keliso. Iale Kelisou hatialemo nahita haluviale nahate vale kemo nahi bae menaka ke vuvunemo ulivebene. Isito nahiabuna Kelisou hatisi hovelahale ke vuvunemo ui avuluvuta igaetolahai vaveve dua unaha vai Dilava hoesehavogei. ⁵ Nahi subuta uime vavae isivi vai vaveve toela vama. Subuta menakae hoto keu nahie vaveve toela bamuoholinu. Katealemo nahi vavae isivi vai kemo haluvima. ⁶ Isito menaka keu aike nahiemo uoholinu. Kosealemo nahiau haluviale ke nahate. Kemoike nahi subuta menaka ke evioholima. Nahi subuta menaka ke vai nahie uvu bahatamo vaholisito nahie vavae isivi unahamo vama. Isito Dilavau nova au Munanae Tumu nahiovege keu nahie uvumo ualemo nahi isivive unaha vama.

Menakau nahie toela nahie haivenu.

⁷ Di louale kemo la huhuige subuta menaka kena toelanu. Ba, menaka keu toela holioholinu. Subuta menaka kemo nahi nahie vaveve toela hilokalu. Menaka keu loui avoe, "Lainaho la haokae kunai elehai isivi omigelive." Menaka keu kateale louholivatege di toela ke di hilokaholinu. ⁸ Vaveve toelau di mai daiti uale keike di negotige di isiviale menaka ke egumai vaveve toela moaga vagei. Menaka keu uoholivatege vaveve toela keu vuvuneholinu. ⁹ Di subuta Mosese menaka ke hilokaholisi huhuige di uveve duave. Isito menaka keu daemo lohoge di kemo hilokage di vaveve toela vai hatima. ¹⁰ Dilavau subuta menaka ke ata ovei isiviale abu kemo uveve dua vagei. Isito menaka kemo di uveve dua vaholige hatihati keu daemo lohonu. ¹¹ Vaveve toelau daiti uale keike di lobohavoge vaveve toelae isiviu daemo ualemo di menaka ke egumai vaveve toelamo hatiale nahate vanu.

¹² Nahi hilokage menaka keu tumute. Menakae hoto keu inutolotolote isi hotoe dua. ¹³ Katealemo la huhuige menakae hotoe dua kenike daemo lohoi di aiohavoge di hatima. Ba, keu kateholinu. Isito vaveve toela keike daemo lohoi di aiohavoma. Menakae dua kemo di hilokage vaveve oleteu toelanu. Menakae dua keu vaveve toela di haivuge di kemo hilokage di vaveve toela vamale keu toela baluganu.

Huhuihuhui abuitana ata aiogevei.

¹⁴ Nahi hilokage Dilavau au menaka ata ovege keu duave. Isito dau vatae ata. Dau vaveve toela vamale esemu. ¹⁵ Dau di vaveve vamale kemo di dolodoloama. Di vadeuho isiviamale ke di vaholima. Isito di isiviholimale ke di vama. ¹⁶ Di isiviholimale vaveve ke di vamale kemo di hilokage menaka keu seleve. ¹⁷ Di isiviholimale vaveve di vamale kemo di hilokage vaveve toelau di uvumo umale kemoike di ke vama. ¹⁸ Di hilokage vaveve duabeu di uvumo uoholiholinu. Isito vaveve toela unahau di uvumo ua. Di isiviai vaveve dua vai. Isito dau kemo negoholinu. ¹⁹ Di isiviai vaveve dua vai. Isito di ke vaholima. Di vaveve toelaho isiviholinu. Isito di ke vama. ²⁰ Di isiviholimale vaveveike di vama. Katealemo di hilokage vaveve toelau di uvumo umale kemoike di vaveve toela vama.

²¹ Vaveve ke hotou koseanu. Di vani bahata isiviai vaveve dua valiho vasege vaveve toelana daemo lohogei. ²² Di huhuihuhui kemo di isiviai Dilava hoto evisi menakave vai. ²³ Isito di vavae isivi keu mole. Di vavae isivi keu di huhuihuhuiti mole aiogevema. Katealemo di vavae isivi vamale kemo vaveve toelau di mama.

²⁴⁻²⁵ Katealemo dau vahaehoholinu. Vavae isivi keu di mage di hatihatie humahae tima. Di huhuihuhui kemo di isiviai Dilava hoto evisi ehomai. Isito vavae isiviu di mage di vaveve toela vama. Katealemo olena di mage di ke aehai. Nahie Kosive Iesu Keliso keike di manu. Ige kemoike di ke aehai Dilava vahaeho vai hoesehavoma.

8

Munanae Tumue vuvunemo umalebia

¹ Nahi Iesu Kelisoluvuta igaetolahale kemo Dilavau bae ibinae toela nahiovelivebene. ² Kosealemo Munanae Tumue vuvuneu nahi malevege nahi Iesu Kelisoluvuta igaetolahai uveve doga malelu. Subuta nahi vaveve toela vai ehovamale kemoike nahi haluvima. Isito nova Munanae Tumu keu vaveve toela ke vuvunemo nahie malevege nahi Iesu-luvuta igaetolahalu. ³ Nahi nahie vavae isivi vamale kemoike nahi Mosese menaka ehovaveve keu nahiemo anekianu. Ige Dilavau au mo hanavoge keu dobai lohoale ata holisi vatae vaveve vaito vavevebe toelau avuemo uoholinu. Keu lohoale vatae ui nahie vaveve toelae ibinaho hatige Dilavau kemo nahie vavae toelae isivi vamale kemo menaka meamonu. ⁴ Katealemo nahi vavae isivi vamale ke halevai Munanae Tumue vuvunemo Dilava isivi vage nahie vavevena inutolotoloi Mosese menaka mai selevetisi. ⁵ Vavae isivi unahamo umale keabuna vavae isivi unaha huhulahai vagei. Isito Munanae Tumue vuvunemo umale keabuna Munanae Tumue isivimo ui tigei. ⁶ Nahiabuna vani bahata nahie vavae toelae isivi huhulahai valiege haluvisi bae Dilavati ulivebene. Isito nahiabuna vani bahata nahie vavamo Munanae Tumue isivi huhulahai valiege ke ibinaho ukolikoli malei uveve dua vai. ⁷ Ata oleu vani bahata vavae toelae isivi huhuai vamale keu Dilava hoto evioholisi aiohavoma. Dilava hoto eviveve keu avuemo ninioholinu. ⁸ Katealemo Dilava hoto evioholisi vavae isivi unaha huhulahai vamale kebia Dilavau bae vahaehoabe valivebene.

⁹ Isito laeau vavae toelae isivi vaholima. Dilava Munanae Tumu la uvumo uale kemo la Munanae Tumue isivi unaha vama. Isito Munanae Tumu keu ata molemo uoholige keu Keliso ata holioholinu. ¹⁰ Vaveve toelae ibinaho la vavana hatisege Kelisou lahehi ualemo la munana kena ui. Kosealemo la vaveve keau Dilava nimo inutolotoloalu. ¹¹ Dilava Munanae Tumu Iesu etuvage hatihatimo hovelahanu. Munanae Tumu keu la uvumo ualemo lana haluviliege hoveveve vavae doga maleve.

¹² Di haokuvuia, di louale kemo nahi vavae isivi va halevaito Dilava isivi vagei. ¹³ Lana vavae isivimo uliege kemo haluvive. Isito lana Munanae Tumue isivimo ui vavae isivi va halevaliege ukolikoli maleve. ¹⁴ Ata oleuoleu Dilava Munanae Tumue isivi vamale keau Dilava esea. ¹⁵ Dilava keu nahie Mama. Iale au Munanae Tumu ke nahioveale kemo nahi vabuhavo halevaito Munanave Tumu kemo eseve holisi avuho loui kosea, “No Mama.” ¹⁶ Dilava Munanae Tumu nahie uvumo uale keike nahie haivege nahi kemo hilokage nahiau Dilava esea. ¹⁷ Nahi Dilava ese holiiale kemo nahiabuna Dilavau au ataho onobenobe dua vai otoveale ke malei. Isi Dilavau au mo Keliso ho vai otoveale ke avuluvuta malei. Kelisou vatehani maleale ke nahate nahiabuna maleliege avuluvuta Dilava atagamo ui.

Otogo keve bae vatehani malelivebene.

¹⁸ Nahi nova vatehani ke huhu halevaito huhulahai kosea, “Kehameu esevehame.” Kosealemo nahiabuna bae Dilava ataga baluga elehai vatehani ke huhulahalivebene. ¹⁹⁻²² Dilavau vata vai otogo vai onobenobe bahata vale keu duave unaha. Iniale vaveve toelau vatamo lohoge vatae onobenobe bahataeau toelalu. Kebiau abu isivi unahamo toelahlisito vaveve toelau lohoale kemoike abu toelalu. Isito Dilavau subutaitke vaveve toelau lohoveve ke hilokanu. Kateike au vai onobenobe bahata hoesegeveveve humaha mamonu. Au isivialeike au lohomale kela au ata malevei au ese toevei au onobenobe vale kebiata hoesegevege abu tota dua vai. Isito novae vani komo au onobenobe vaveve keau keate mole eseve uho vage tumuu hamale ke nahate. Abuta isivilahale Dilavau au ata malevei au ese toevemale ke vanila tota duaveai. ²³ Ige nahita katealiho isivilahalu. Dilavau au Munanae Tumu nahioveale kemo nahi hilokage nahiabuna bae Munanae Tumue vaveve dua moaga malegei. Katealemo nahi hemei ui isiviale Dilavau nahi malevege nahi eseve holisi vavae doga malei uveve dua vai. ²⁴ Nahi gabie uveve dua huhulahale kemo Dilavau nahi malevenu. Nahi gabie uveve dua ke elehalolilu. Nahi gabie uveve dua ke elehaliege nahi bae ke hemei ulivebene. Isito aike nahi ke hemei

uma. ²⁵ Nahi aike uveve dua ke elehaholilu. Isito nahi ke huluhahai kabebi halevaito ke hemei negolahai uma.

²⁶ Dilava Munanae Tumuna vani bahata nahie tedeavege nahiabuna negolahagei. Nahi hoto vade loui Dilava imihamale ke nahi hilokaholilu. Dilava imihaveve hotobeu nahiemio uoholige Munanae Tumuna nahiho Dilava imiha tumutumuai. ²⁷ Ige Dilavau ata bahatae uvu hilokamale kemo auna Munanae Tumue huhuihuhui hilokai isivive vagei. Kosealemo Munanae Tumuu vani bahata Dilava isivimo ataveho imihama.

²⁸ Dilavau au isivimo nahi hohavege nahi uvu bahata omiale kemo nahi hilokage vaveve vadeu nahiemio lohoge Dilavana kemo nahi hoesegeve dua vai. ²⁹ Dilavau subuta hilokale auna nahie tabagevei. Katealemo keu isiviale nahi move nahate vai. Move keu vasohuta ui nahi bahatae nana baluga nahate holinu. Ige nahiau hohuvuiabe nahate holilu. ³⁰ Dilavau nahie hohavei nahi tabagevei nahie uvu hoesegeve nahiho loui avoe, "Laeau di nimo duave. Lana bae gabie di ataga kemo uve."

Dilavau nahiho isiviai Iesu hanavonu.

³¹ Dilavau nahiho vaveve kateale valemio nahiabuna ono vade loui. Dilavau nahehi uge atabeu bae nahi aiogevelivebene. ³² Dilavau au moe humaha ke bamuoholisito ke hanavoge keu nahi bahataho hatinu. Katealemo auna au isivimo onobenobe bahata nahiovei. ³³ Dilavau au ata tabagevei hoesegevege abu nivemo duaveale kemo atabeu bae koseale loulivebene. "La keau vaveve toela vamalea." ³⁴ Iesu Keliso keike hatai hovelahai Dilava ada inuteve ugulamoi nahiho Dilava imihama. ³⁵ Kelisou au isivi nahioveale kemo atabeu bae ke bamulivebene. Ige vavevebe toelau bae ke bamulivebene. Mesoho vatetumuu nahi malevege mesoho nahi vaelahai mesoho ogoholige mesoho ataeau isiviai nahie havege nahi haluvige vaveve katealeau bae Kelisou au isivi nahioveale ke bamulivebene. ³⁶ Bukae Hotomo Deividu Dilava imihai loui avoe, "A lovimoike abu vani bahata no kaovei nohavema. Niabemo noeau mamoe nahate.

Mamoe havei enoabe bohiale ke nahate abu isiviai nohavei."

³⁷ Keau subuta vaveve kateale vama. Isi aike katelahama. Isito Kelisou au isivi nahioveale kemo nahiabuna vaveve kebiamio negolahai ugei. ³⁸ Katealemo di hilokage vaveve katealebeu bae Keliso isivi ke nahiemio bamulivebene. Nahi ui mesoho haluvige vaveve katealebeu bae Keliso isivi ke nahiemio bamulivebene. Ige anelubeau mesoho munanae toelaeau nahie bamuevelivebene. Isi vaveve vadeu aike nahiemio lohomale mesoho gabie lohoveve keau kemo bae nahie bamuevelivebene. ³⁹ Dilavau otogo vai vata vale kemo onobeu bae nahi bamuevelivebene. Nahie Kosive Iesu Kelisou nahiho hatiale kemo nahi hilokage Dilavau au uvu nahiovenu. Iale kemo onobeu bae nahie bamuevelivebene. Isito vani bahata nahiabuna Dilava isivimo ui tigei.

9

Dilavau Diue ata tabageveale deiada

¹ Dau Keliso ata. Dau loboholisito hoto seleve louma. Munanae Tumuu vani bahata di uvumo umale kemo di hilokage di hoto kou seleve. ² Di ataho di uvuu tumuige di kemo uvu baluganu. ³ Di uvue ataeau Dilava kabebihavoale kemo di abuhu uvuanu. Katealemo di isiviale Dilavau kebia tononamo di aiohavoge di Iesu isivi kemo uoholige elike di ata keau kemo lulelelahai. ⁴ Dilavau subuta Iselala ata kebia tabagevege abu eseabe holisi atagave elehalu. Dilavau au ata kebiahi ui hoesegeveve hoto abuhu lounu. Isi au menakata ovei au vaveve hoto loui mamoaale kemo abu guliguli seleve valu. ⁵ Dilavau subuta buluveabe tabagevege Iselala ataeau valada kebiamio lohohu. Ige Keliso keta valadaebemo lohonu. Keu ata bahata onobenobe bahatae Kosive. Katealemo nahi vani bahata Dilava ivi ebagevai hoesehavoge. Hoto keu seleve.

⁶ Dilavau au hoto loui mamoaale keu dobaholinu. Iselala ata keau bahata Dilava ata holioholilu. Isito Iselala ata kebiamio Dilavau ata degomole tabagevege abu atava holilu. ⁷ Ebalhamu valada keau bahata Dilava ata holioholilu. Isito Dilavau degomole tabagevege keau atave holilu. Dilavau Ebalhamuho loui avoe, "A mo Aisiki ke eseabuna a valada holisi." ⁸ Hoto kemo nahi hilokage Ebalhamu valada bahata keau Dilava ata holioholilu. Isito Iselala ata oleuleu Dilavau au hoto loui mamoaale ke evisi kemo uge keau Ebalhamu valada selevea. ⁹ Dilavau au hoto loui Ebalhamuho mamonu. Au namihai avoe, "Di vani mole ebagemale vani kemo dana vuvune aoge a keate Sela kena mo mole mai."

¹⁰ Di kemo hoto mole louge evive. Ebalhamu mo Aisiki keu Lebeke melamenu. Ige kemo move abuitau ua. Ese keau mama igae. ¹¹⁻¹² Isito ese keau abu neinae unie uvue ui vaveve dua vaveve toela vaholisige Dilavau keate keho loui avoe, "Moe ovokina kena au

hohoe isivi vai.” Hoto ke ihuu koseanu. Dilavau vavevabemo mole ebagemaholinu. Isito Dilavau au isivimo mo igae ebagemai hohavonu. ¹³ Bukae Hotomo Dilavau loui avoe, “Di isivi Diekobo ominu. Isito di nanave Iso kabebihavoi halenu.”

¹⁴ Dilavau louale kemo nahiabuna vali loui kosea, “Dilava vaveveu inutolotoloholinu.” Ba, nahi kate halevai. ¹⁵ Dilavau Mosese namihai avoe, “Dana di isivimo ataho uvuai tetaevei.” ¹⁶ Katealemo Dilavau atae isivi atae vavevemo abuhu uvuholinu. Isito au isivimoike au abuhu uvuai tetaevenu. ¹⁷ Bukae Hotomo Dilavau Kini Beloho loui avoe, “Di a mamoge a Egubito vatae kosive holinu. Iale dana aemo di vuvune vaveve vage elike vatae ata bahata keabuna ke evisi hilokai kemo di ivi hoesehavoi.” ¹⁸ Hoto kemo nahi hilokage Dilavana isivianiege ataho uvuai tetaevei. Isito olemebia uvuu toloige auna kebia halevege abuna abu isivi vai.

Dilava vaveve keau bahata duave unaha.

¹⁹ Hoto kemo mesoho la molena daho loui kosea, “Dilava vaveve keu kateige vadeuhoike keu nahie vaveve toelamo hoto louma. Ataeau bae Dilava isivi ke bamulivebene.” ²⁰ Ata oleu Dilava vavevemo hoto kateale louge keu toelanu. Ata moleu debata sosibani vage sosibani keu bae avuho hoto koseale loulivebene. “Vadeuhoike a kateale vanu.” ²¹ Debata sosibani vamale kena au isivimo deba malei sosibani igaegae vagei. Auna isivianiege debata lovi iveve sosibani vaevei. Isi mesoho auna isivianiege momolu otovemale sosibani vaevei.

²² Dilava vaveve keu ke nahate. Auna isivianiege olemeau negoai vaveve toela vai timale kebiamu au itumu hanavoge abu kemo toelai. Isito keu kateholisito hemevei ui isiviale abu hoidevei. Isito abu hoideveholige auna abuhu au itumu ke hanavoi. ²³ Keu ata hemevei ui isiviale olemeau hoidevei lohoale kebiaho uvuai hoesegevege abu atagave baluga elehai. ²⁴ Dilavau nahi hohavege nahi atave holilu. Nahi degomoleau Diue ata. Isege nahi degomoleau Diue ata holioholilu. Isito au nahi bahata hohavege nahi atave holilu. ²⁵ Au buka mole Hosea kemo loui avoe,

“Di ata holioholiale kebia dana hohavege abuna di ata holisi.

Di ata oletebiaho isiviholiale kebia dana hohavege abuna di uvue ata holisi.

²⁶ Di subuta Diue ata holioholiale kebiaho loui kosea, ‘Laeau di ata holioholilu.’

Isito dana gabie ata kebiamo ata malevege abuna di ese holisi daluvuta ukolikoliai.”

²⁷ Ige Aisaiau kemo hoto mole lounu. Isi avoe,

“Diue ata keabuna davalae esaga nahate moagai.

Isito Dilavana kebiamo moagaveite malevei.

²⁸ Vani kela auna vatae atae vaveve kaovai ibinaeabe solekai ovei.”

²⁹ Aisaiau kemo hoto mole lounu. Isi avoe,

“Kosive vuvunete keu nahi havehatuvatege nahi Sodomame Gomalame ata kebia nahate vai uoholilu.

Isito Kosiveu kateholialemo nahie valadau ua.”

Diue ataeau evievi vaveve vaholilu.

³⁰ Hoto kemo nahi hoto vadeu loui. Diue ata holioholiale keau isiviholiale abu ebika malevei Dilava humaha inutolotolote kemo otovelihu. Isito evieviabe kemoike Dilavau abuhu loui avoe, “Laeau di nimo inutolotolotea.” ³¹ Ige Diue ata keau Mosese menaka ehovai isiviale kemo negolahai Dilava nimo inutolotoloi. Isito keau kemo negoholige Dilavau abuhu loui avoe, “Laeau inutolotolote ataholiholilu.” ³² Vadealemoike Dilavau kateale lounu. Kosealemo abu evievi vaveve vaholisito abu isivie vaveve vama. Abu Munemo hatoi dobuluvilu. ³³ Mune ke deiada Bukae Hotou lounu. Isi avoe, “Elehave.

Dana Saioni keve Mune mole mamoge ataeabuna Mune kemo hatoi dobuluvisi.

Isito oleuoleu abu uvu mai kemo mavoge auna kebia hoesegeve.”

10

¹ Di haokuvuia, di uvu bahata Iselala ata ovei di ata kebiaho guliguliai isiviale abu hoidevege Dilavana kebia malevei. ² Di hilokage ata keau isivi balugale Dilava hoesehavoi. Isito keau kemo lulele dua vaholilu. ³ Keau Dilavau ata malevei humaha inutolotolote kemo otoveveve ke hilokaholilu. Isito keau abu isivie humahate ke ehovama. Katealemo keau Dilava isivi vai humahave inutolotolote kela tiholima. ⁴ Kelisou lohoale Mosese menaka ke mai selevetinu. Ige ata oleuoleu abu uvu mai avuemo mavoale keau Dilava nimo inutolotolote ataholilu.

Ukolikoli maleveve deiada

⁵ Subuta Moseseu hisaliai loui avoe, “Ata oleuoleu isiviai Dilava nimo inutolotolohalo valiege menakave bahata ehovai elike kemo ui tigei. ⁶ Subuta vaveve keu kateanu. Isito aike ata oleuoleu abu evievimo negolahaliege abuna Dilava nimo inutolotolohalai. Katealemo lainaho loui kosea, “Olena otogoe tai Keliso melamei dobai lohoi.” ⁷ Isi lainaho loui kosea, “Olena vatae uvue tai haluvimale kebiamo Keliso melamei lohoi.” ⁸ Lainaho hoto kateale loulive. Kosealemo Dilava hotoe dua keu laemo ua. No lae tiale la haivege la evievie hoto ke evige hoto keu la uvumo ui la aimo ua. ⁹ Katealemo lana la aimo loui kosea, “Tesu keu Kosive.” Isi lana la uvu bahatamo huhulalai kosea, “Dilavau hatihatimo Iesu etuvage hovelahanu.” Lana katelahaliege Dilavana la malevei. ¹⁰ Nahi nahie uvu bahata Dilava omiale kemo nahi Dilava nimo inutolotolohalu. Iale nahie evievi kemo nahiabuna hotove loui kemo hilokage Dilavana nahi malevei. ¹¹ Bukae Hotou kemo loui avoe, “Ata oleuoleu abu uvu mai avuemo mavoliege abu bae dolodolohalalibene. Isito abuna ukolikoli malei.” ¹² Dilava nimo Diue ata isi Diue ata holioholiale keau mole nahate. Dilava keu ata bahatae Kosive holinu. Katealemo ata oleuoleu Dilava imihage auna kebia tedaeve dua vai. ¹³ Bukae Hotou kemo loui avoe, “Ata oleuoleu Kosive ivi loui imihale kebia auna tedaevei ukolikoli ovei.”

¹⁴ Hoto keu kateanu. Isito ataeabuna abu uvu mai avuemo mavoholiliege abuna oleve kateai ke imihai. Isi abuna hotove eviholiliege abuna oleve kateai abu uvu mai avuemo mavoi. Ige ataeabuna hotove loui kebia haiveholige abuna oleve kateai hotove evisi. ¹⁵ Ige Dilavana hoto loulmale ata hanaveholige abuna oleve kateai hoto loui kebia haivei. Bukae Hotou kemo loui avoe, “Hoto loulmale ata keabuna hotoe dua mai lohoge ataeabuna kemo vahaeholalai.” ¹⁶ Isito ata degomoleau hotoe dua evisi maholilu. Aisaiau kemo loui avoe, “Kosive, ataeau di a hoto loulmale ke evioholilu.” ¹⁷ Di louale keu koseanu. Ataeau Keliso hoto loui ata haivege degomole abuna hoto ke evisi abu uvu mai avuemo mavoi.

¹⁸ Isito ata degomole keau kateale valivebene. La huhuige ataeau subuta hotoe dua ke evioholilu. Ba, seleveta abu ke evilu. Bukae Hotou kemo loui avoe, “Hoto loui ata haivemale keau vata bahatae tiale hoto ke loui ata haivege abu ke evisi gabilhalu.”

¹⁹ Di la belageve moleage evive. La huhuige Iselala ata keabuna hoto ke hilokaholilu. Ba, keau ke hilokalu. Moseseu subuta kemo loui avoe, “Di Dilava hoto louge la eviholimale kemo auna ata degomole kebia humaha alavoge abuna hotove evisi vage lana kebia maina mai isi kebiaho itumulahave.”

²⁰ Ige Aisaiau kemo Dilava hoto mole inuta lounu. Isi avoe, “Ataeau di kaovai di elehaholiale kebia dana haivege abuna di hilokai. Ataeau di imihaholimale kebia dana di ebika haivege abuna kemo di hilokai.”

²¹ Dilava hilokaholimale ata kebiaho Dilavau hoto kateale lounu. Isito Iselala ata kebiaho Dilavau loui avoe,

“Di vani bahata di ada hatui isiviale abu dae lohoi.
Isito abu di kabehivaoi di hoto evioholilu.”

11

Dilavau Diue ata haleveholinu.

¹ Di la belageve moleage evive. Subuta Iselala ataeau Dilava hoto evioholige Dilavana kebia haleve selevaenu. Ba, keu kateholinu. Dau Iselala ata. Di Ebalahamu valada holisi Benidiamenimo lohonu. ² Dilavau subuta au ata kebia malevenu. Isi aike kebia haleveholinu. Lana Bukae Hotomo hoto mole huhulhalu. Hoto kemo Ilaidiau Iselala ata kebia vaveve loui Dilava namihanu. ³ Au loui avoe, “Kosive, keau a beloveta ata havei a hoesehavomale mune vitale ke koilahalu. Ige da igae uge abu isiviale dahavoi.” ⁴ Elaidiau hoto kateale louge Dilavau hotove ibinaho loui avoe, “Ba, di seveni taoseni (7,000) ata malevege abu loboe dilava Baelo ke hoesehavoholisito da igae hoesehavoma.”

⁵ Subuta Dilavau Iselala ata bahatamo seveni taoseni (7,000) unaha malevenu. Isi novae vani komo ata bahatamo ata degomole malevema. Kebia isivimo maleveholisito au isivimoike au malevema. ⁶ Atae vaveve kemo au kebia maleveholima. Ataeau ono vade vamale kemo Dilavau maleveholima. Isi abu ono vade vamale kemo au malevevatebene isivive keu seleve holioholinu.

⁷ Vadealemoike Iselala ata keau Dilava vaveve inutolotolote kaovai elehaholilu. Kosealemo uvuiabeu toloige keau ke elehaholilu. Isito Dilavau aike au isivimo ata degomole tabagevege abu hotove evima. ⁸ Subuta vaveve kemo Bukae Hotou loui avoe, “Dilavau uvuiabe bamuge huhuihuhuiabeu momanu.

Isi niabe bamui golemaeabeta bamuge keau hotove evisi elehaholilu.

Subuta keu kateanu.

Isi novae vani komo auna katealeta vai.”

⁹ Deividu subuta vaveve katealemo hoto mole lounu. Isi avoe, “Keau Dilava hoto evioholisito abu vahaeho lovi vamale ke unaha huhulahai vamale keu mavinahate malevema.

Keau kemo dobuluvisi vatetumu malema.

¹⁰ Ige Dilavau niabe bamuge keau neniai elehaholima.

Isi vani bahata vaveve toela isute hovadaeabemo otovema.”

¹¹ Hoto kemo di la namigevege evive. Lana huhuige Iselala ata keau vaveve kemo dobuluvisi uoholilu. Ba, keau kateholilu. Kosealemo keau vaveve toela vamale kemo Dilavau kebia halevei Iselala ata holioholiale kebiata malevema. Dilavau vaveve kateale vai isiviale Iselala ata keau kebia elegevei touiabe mai isi elike kemo hoidevei. ¹² Iselala ata keau vaveve toela vamale kemo Dilavau vatae ata degomole hoesegevenu. Keau dobuluviale kemo Dilavau Iselala ata holioholiale kebia malevei hoesegevenu. Isito vani mole Iselala ata keabuna hoidevei Dilava ehovage auna kebia hoesegevege vatae ataebuna kemo ue dua vai.

Diue ata holioholiale kebiata otogoe tivee.

¹³ Diue ata holioholiale laheho di hoto mole loui la namigevei. Diue ata holioholiale laheho Dilavau di ebagemage di abostolo holisi la haivema. Dilavau di ebagemage di lovive ke vae dua vama. ¹⁴ Di kateale vai isiviale di ataebuna vaveve ke elehai hoidevege Dilavana kebia degomole malevei. ¹⁵ Dilavau Diue ata kebia halevege Diue ata holioholiale kebiau Dilavaluvuta igaetolahalu. Diue ata keau nova haluviale kebia nahate. Isito vani mole Dilavana kebia malevege abuna haluvisi hoveveale ke nahate vai.

¹⁶ Ebalahamu isi Diue umuka keau idie alumu ke nahate. Ige valadaeabe keau idie ada kebia nahate. Iale alumuve abuna tumute holige adave kebiatana tumute holisi. ¹⁷ Isito idi kemo idie ada degomoleau toelage Dilavau heiovei bohisi botoe idie ada degomole malei lovoeabemo otovenu. Diue ata holioholiale la kebiau botoe idie ada kebia nahate. Isi Diue ata kebia vuvunemo nego malema. ¹⁸ Dilavau idie ada degomole bokoale kemo lainaho la ebika tabagevei huhulahai kosea, “Dilavau no malevege noeau duave.” Lainaho katelahalive. Laeau idie ada unahaea. Alumuve keu idie adamo nego maholima. Isito idie adaeau alumuve kemo nego malema.

¹⁹ Hoto kemo la degomole abuna loui kosea, “A hoto keu seleve. Isito Dilavau idie ada degomole bokoale noeau lovoeabemo ua.” ²⁰ La hoto kateale louge keu seleve. Isito lainaho ke huhulahai la ebika tabagevelive. Kosealemo keau abu uvu mai Dilava omiholiale kemoike Dilavau kebia halevenu. Isito laeau la uvu malei Dilava omiale kemoike la lovoeabe maleu. Katealemo lainaho la ebika tabagevelive. Isito Dilava vabuhavoi la ebika nenigeveve. ²¹ Diue ataeau subuta Dilava idimo idie ada nahate holilu. Isito keau abu uvu mai avuemo mavoholige Dilavau kebia halevenu. Katealemo lainaho la ebika tabagevelive. Lana katelahage Dilavana la halevei. ²² Di louale kemo la Dilava vaveve elehalu. Ata degomoleau subuta dobuluvige Dilava abuhu itumuanu. Isito keu laheho uvuai la tedeavenu. Lana Dilava isivi vage auna la tedeavei tigei. Isito lana isivive vaholige auna la halevei. ²³ Ige Diue ataeau subuta dobuluvisi Dilava halevale keabuna tota hoidevei lohoge Dilavana kebia malevei. Dilavana au negomo kebia malevege abuna hoidevei abu subuta umale kemo ui. ²⁴ Diue ata holioholiale laeau botoe idi ke nahate. Isege Diue ata keau bulue idie dua ke nahate. Dilavau bulue idi ke ada bokoai botoe idie ada malei ke lovomo otovege ulilu. Katealemo Dilavana isivianiege idie ada bokoale kebia malei tota lovovemo otovege abuna ulisi.

Diue ataeau Dilava ehovaveve

²⁵ Di haokuvuia, Dilavau subuta hoto ko loui ata namigeveholinu. Evive. Diue ataeau aike Dilava halevage uvuiabeau tololahalu. Isito keau vani bahata tololahai ulivebene. Vani mole Dilavana Diue ata holioholiale kebia malevei gabiage Diue ata keabuna hoidevei. Katealemo lainaho huhulahai loui kosea, “Noeau lulelelahai Diue ata kebia evigevelu.” ²⁶ Dilavana gabie Diue ata bahata malevege abuna uveve dua vai. Bukae Hotou kemo loui avoe,

“Ata maleveve Kosive kena Saionimo dobai lohohoi Diekobo valadamo vaveve toela bahata ulihage uoholisi.

²⁷ Di abuhu hoto loui mamoaale kemo dana vaveveabe toela ke ulihai.”

²⁸ Diue ataeau Dilava hotoe dua evioholiale kemo keau Dilava aiovavoma. Isito Diue ata holioholiale laeau vaveveabe kemo hotoe dua malu. Dilavau subuta Diue atae umuka kebia tabagevenu. Katealemo auna au isivimo valadaeabe ata kebia malevei. ²⁹ Dilavau subuta au hoto loui mamoaale ke au bae huhuai ke halelivebene. Isito auna au isivimo au ata tabagevei hoesegevei.

³⁰ Ige Diue ata holioholiale laeau subuta Dilava hoto evioholima. Isito Diue ataeau aike Dilava hoto evioholige Dilavau laheho uvuai la malevege la hotove evima. ³¹ Diue ataeau aike Dilava hoto evioholima. Isito Dilavau laheho uvuai la maleveale ke nahate gabie auna kebiaho uvuai malevei. ³² Dilavau hilokage ata bahata keau hotove evioholimale ataea. Kemo auna au isivimo kebia bahataho uvuai.

Dilava ivi hoesehavoveve hoto

³³ Nahie Dilava keu baluga. Ige luleleve keta balugataho. Olena huhuihuhui kaovai vaveveve ke hilokai. Atabeu bae ke hilokalivebene. ³⁴ Bukae Hotou kemo loui avoe,

“Olena Kosive huhuihuhui ke hilokai.

Olena huhuihuhui kemo ke haivui.

³⁵ Kosiveu onobenobe bahata vaevenu.

Iale olena vali onobe mai Kosive omige au ke ibina vai.”

³⁶ Kosiveu onobenobe bahata vaeveale ke vuvunemo onobenobe bahataeau ui tima. Isi onobenobe bahata keabuna hoesehavogei. Katealemo nahi vani bahata Dilava ivi hoesehavogei. Hoto seleveike.

12

Dilava lovi vaveve deiada

¹ Di haokuvuia, Dilavau nahiho uvuai nahie tedaaveale kemo di la namigevei isiviale la vava hoesegevei vaveve tumute holisi Dilava vahaeho vai hoesehavove. Lana katelahalie gulguli seleve vave. ² Lainaho vatae vaveve ehovagelive. Isito huhuihuhui doge vai Dilava ehovage auna la huhuihuhui ekovehage lana kemo isivive hilokai vahaehove vai hoesehavove.

³ Dilavau au uvu daoi di hoesehavoale kemo di la bahataho louma. Lainaho la ebika unaha huhuevei la ebika malei hatuevelive. Isito Dilavau au evievi laoveale kemo la vaveve huhuevei la ebika tatolevave. ⁴ Nahie vava keu igae holioholinu. Isito velo, ada, golema, nie bai kebiamo nahi vaveve igaegae vama. ⁵ Ke nahate nahiau moagamoaga. Isito Iesu Keliso kemo nahiau bahata igae. Iale kemo nahiaabuna igaegaeai mole hoesegevei. ⁶ Katealemo Dilavau au uvu nahiovei au lovi igaegaeai nahioveale ke nahi vai. Isi mesoho au hoto louveve ke lovi nahiovege nahi evievimo hoto ke loui ata haivei. ⁷ Isi mesoho au ata tedaaveve ke lovi nahiovege nahi ke vai. Isi mesoho au ata haiveveve lovi ke nahiovege nahi ke vai. ⁸ Isi mesoho au ata negotiveve lovi ke nahiovege nahi ke vai. Isi mesoho au ata degomoleau kunaiholimale kebia tedaaveho louge nahi kebia tedaave dua vai. Isi mesoho au ata nibieveve vuvune nahiovege nahi kebia nibieve dua vai. Isi mesoho au isiviale nahi ata degomoleho uvulahai tedaavege nahi vahaehota ke vai.

⁹ Moleho isivilahai mole tedaavemale kemo lainaho mole lobogevelive. Vaveve toela vai mole aiogeve halevave. Isito vaveve dua la vamale ke unaha vageve. ¹⁰ Kelisoluvuta igaetolahai molehi haokuvulahale kemo moleho isivilahai mole tedaaveve. Lainaho mole aiogevelive. Isito mole hoesegeveve. ¹¹ Lainaho Kosive lovimo kabebilahalive. Isito tubunalahai lovie dua vave. ¹² Gabie vavevete keho huhulahai vahaeholahave. Vate-tumuun laemo lohosege avuemo negolahave. Isi vani bahata Dilava imihageve. ¹³ Dilava ataeau kunaiholimale kebia tedaaveve. Ataeau deiai lohoge malevei o hatueveve. ¹⁴ Ata oleu la aiogevege lainaho vaveveve toela ke ibina vai avuho lougelive. Isito Dilava imihage auna ke hoesehavoi. ¹⁵ Ata oleuoleu vahaeholahage kebiahi vahaeholahave. Isi ata oleuoleu uvulahai ninalahage kebiahi uvulahai ninalahave.

¹⁶ La vaveve dua vamale ke ata bahataho vageve. Lainaho la ebika malei hatuevei loui kosea, “Noeau atae dua.” Isito la ebika tatolevai ivioholimale kebiata tedaavegeve. ¹⁷ Ata oleu laemo vaveve toela vage lainaho vaveve toelata ibinave valive. Isito vaveve dua vai mole hoesegevege ataeau la vaveve dua ke elehai hilokage vaveve katealeu duave. ¹⁸ Lainaho atahi uveve toela valive. Isito negolahai ata bahatahi uveve dua vai ugeve. ¹⁹ Di haokuvuia ataeau la aiogevege lainaho ke ibina valive. Isito ke halevage Dilavana bae ke ibina vai. Bukae Hotomu Dilavau loui avoe, “Ataeau la aiogevege lainaho ke ibina valive. Dana bae vaveveabe ke ibina ovei.” ²⁰ Katealemo Bukae Hotou louale ko nahate vageve. Au loui avoe, “La aiogevemale ata keau vaelahage lovi oveve. Mesoho keau enulahage e hai oveve. Lana vaveve kateale abuemoo vage keabuna abu laemo vaveve toela vale ke huhulahai matilahai.” ²¹ Lainaho vaveve toela keho humaha alavogelive. Isito vaveve dua vai avuemo negolahage vaveve toelau bae la malevelivebene.

13

Nahi vatae gamani kebia hoto evisi.

¹ Di hoto mole louge evive. Nahi bahata vatae gamani kosive kebia hoto evigei. Kosealemo Dilavaike au isivimo kebia otovege abu vuvune malei gamani holilu. ² Ata olemeau kosive kebia hoto evioholiliege Dilava hototaike abu ke evioholilu. Keabuna katelahage Dilavana kebiamo hoto loui ibinae toela ovei. ³ Hoto evioholisi vaveve toela vamale keau bae kosive kebia vabugevelivebene. Isito hoto evisi vaveve dua vamale keabuna kosive kebia vabugevei hotoeabe evisi. Lana isivilahai kosive kebia vabugevei vaveve dua vage keabuna la hoesegevei. ⁴ Dilavau kosive kebia tabagevege keau la uveve dua valiho lovilahai la tedaevema. Isito lana vaveve toela valiege kemo vabulahave. Kosealemo abuna abu vuvunemo la vaveve toelae ibina vai. Dilavau kebia tabagevei isiviale keau vaveve toela vamale kebia ibina ovei. ⁵ Nahi hilokage menaka ehovamale keu duave. Isito nahiabuna menaka ehovaholiliege Dilavana ibinae toela nahiovei. Katealemo gamanie hoto evisi ehovave. ⁶ Dilavau gamani kosive kebia tabagevege keau lovilahai la tedaevema. Katealemo abu louge hotoeabe evisi takesie moni otovegeve. ⁷ Abu takesi otoveve deiada louge ke vai kebia vabugevei hotoeabe evisi hoesegeve dua vave.

Moleho isivilahai vaveve dua vaveve

⁸ Lana ata molemo onobe maliege ke ibina vai omive. Lainaho ke momahavolive. Isito moleho isivilahai mole tedaeveve. Kosealemo ata oleu au haaka isivi omisi hoesehavoale keu menakae hoto bahataike au ke vanu. ⁹ Menakae hoto keu loui avoe, “Lainaho mole keatehi hotohotoai ladevegeve. Lainaho ata havelive. Lainaho vavoloalive. Lainaho la haokuvue kunai elegevei isivilahalive.” Isi menaka degomole kebiatamo hoto kou baluganu. Hoto keu avoe, “Nahi nahie ebika isivi oveale ke nahate nahi nahie haokuvu kebia isivi ovei kebia hoesegevei.” ¹⁰ Nahi moleho isivilahai mole tedaevemale kemo nahi bae molemo vaveve toela valivebene. Nahi isivi mole ovemale kemo nahi menakae hoto bahataike evisi vama.

¹¹ La hilokage vanie gabiu lohoma. Katealemo ladeve halevave. Isito hovevevei di louale ke nahate vave. Kosealemo nahi subuta nahie uvu mai Dilava omiale vani keu egeanu. Isito Dilavau nahie maleveve vani keu vuguvuguanu. ¹² Vaviu aike uoholima. Isege vau alamoma. Katealemo nahi vavie vaveve vamale ke halevaito atagae vaveve vai vaveve toela bamui. ¹³ Nahiau atagae ataea. Katealemo nahi vaveve dua unaha vai ui. Nahi iveve toela va halevai e toela i halevai keate vavolo halevai teibae vaveve halevai mole have halevai mole maina mai i halevai. ¹⁴ Isito nahie Kosive Iesu Keliso ke vaveve unaha vai nahie vavae isivie toela nahi vamale ke va halevai.

14

Mole vaveve kaova halevave.

¹ Evievi ata moleu lae lohoi Bukae Hotomo hoto vade louge lainaho avuhu itumuai hotove koiagei. Isito halege au huhuale ke loui. ² Evievi ata molena loui kosea, “Dana lovi bahata igei.” Ige evievi ata molena loui kosea, “Dana mesia i haleito bulue lovi unaha igei.” ³ Lovi bahata imale keau mesia ioholimale kebia vavevemo hoto louge keu toelanu. Ige mesia ioholimale keau lovi bahata imale kebia vavevemo hoto louge keu toelanu. Kosealemo Dilavau kebia malevege keau esemuve holilu. ⁴ Keau esemuve holiiale kemo olena kebia vavevemo hoto loui. Lainaho katelahalive. Isito Kosive igae kena vaveveabemo hoto loui. Vaveveabeu dua vage mesoho toelage kena ke kaovai hoesegevege keabuna hovevevei negolahai.

⁵ Ata degomoleau huhuige vani moleu tumute. Ige vani degomoleau tumuoholilu. Isege ata degomoleau huhuige vani bahata keau mole nahate. Hoto kemo nahi huhuihuhui abui va halevaito igaegeaei nahi ebikaho huhulahai. ⁶ Ata degomoleau vani mole ebagevai huhulahai kemo Dilava hoesehavoma. Ige ata degomoleau lovi bahata iveve kemo lovi ke hoesehavoi ke isi kemo Kosive hoesehavoma. Isege ata degomoleau mesia ioholimale keau Dilava ivi hoesehavoi mesia ke ioholisi kemo Kosive hoesehavoma. ⁷ Nahiau nahie ahuvula ui haluviholima. ⁸ Isito Kosiveluvuta ui haluvima. Nahi ui mesoho haluviliege nahiau bahata Kosive ataea. ⁹ Kelisou hatai hovelahale kemo haluviale isi nita uale kebia Kosive holinu.

¹⁰ Katealemo la vadeuhoike la haokuvue vavevemo hoto loui aiogevema. Nahiabuna bahata Dilava nimo lavisege auna nahie vaveve kaovai kemo hoto loui. ¹¹ Bukae Hotou kemo loui avoe, “*Dau vani bahata uveve Kosive.*” Katealemo ata bahataebuna di nimo kome bokoai vata bisi.

Isi keabuna di ivi hoesehavoi loui kosea, ‘Dilava.’”

¹² Kosiveu hoto kateale louale kemo nahiaabuna igaegaeai nivemo lavisi nahi vamale ke loui.

Ainaho vaveve toela vai a haoka aiahavogei.

¹³ Katealemo lainaho mole vavevemo hoto loui mole aiogevelive. Isi mesoho vaveve mole vage abu kemo dobuluvisi vaveve toela valive. Isito vaveve dua unaha vai la haokuvu kebia hoesegeveve. ¹⁴ Di nahie Kosive Iesu keti igaetoale kemo di hilokage iveve lovimo toelabeu uoholinu. Isito ata olemebiau huhuige lovi keu toelage lovi kena abuemotoelai. ¹⁵ Katealemo lana la haoka nimo mesia mole au ioholimale ke ige uvuvena kemo toelage la ke aiahavolu. La kemo ke isivi omioholilu. Kelisou ata keho hatialemo lainaho lovi ke isi ke aiahavolive. ¹⁶ La huhuige la ke iale keu duave. Isito la haokae nimo la ke ige auna huhuai kosea, “Keu toelanu.” Kate halevave. ¹⁷ Nahi Dilava adae vuvunemo ui lovi isi e iveve keu baluga holioholinu. Isito Dilavau au Munanae Tumu nahiovege nahi kemo vaveve inutolotolote vai uveve dua vai vahaeholahaveve keu baluga. ¹⁸ Iale oleuoleu vaveve katealemo Keliso hoto evisi ehomage Dilavana kemo vahaehoabe vai. Ige ataeabuna vaveveabe elehai loui kosea, “Vaveveabe keu duave.”

¹⁹ Katealemo nahi vani bahata molehi uveve dua vai mole tedaevei kemo negolahagei. ²⁰ Lainaho lovi iveve kemo Dilava vaveve aiahavolive. Nahi lovi bahata iveve keau duave. Isito lana la haokae nimo lovi mole au ioholimale ke ige kena ke elehai avuta ke isi huhuige au lovi iale keu avuemotoelage lana kemo vaveve toela vave. ²¹ Isito vaveve duaika ko. Lainaho mesia mole isi e mole isi vaveve mole la haoka nimo vage au kemo dobalive. ²² Hoto kemo la huhuihuhui mole vasege la haokau huhuihuhui mole vage lainaho kemo la haoka aiahavolive. Isito Dilava imihage auna ke hilokai. Lana la iveve ke huhulahi Dilava nimo ke ige Dilavau kemo hoto louhohige lana kemo vahaeholahave. ²³ La huhuige lovi moleu laemo toelasege la ke ige Dilavana kemo hoto loui. Kosealemo la huhuige lovi keu laemo toelanu. Isito la ke iale keu vaveve toelaike la ke valu. Isi la vaveve onoleta huhuige keu laemo toelasege la ke vale keta vaveve toelaike la ke valu.

15

Ainaho a ebika unaha hoesehavogelive.

¹ Evievimo negolahamale nahiau evievimo negoholimale kebia tedaevei nahie ebika unaha huhu halevai. ² Isi nahie haokuvu huhuevei kebia tedaevege abu evievimo negolahai. ³ Keliso keu au ebika unaha huhuoholinu. Kemo Bukae Hotou loui avoe, “Ataeau hotoe toela loui Dilava aiahavoale hoto ke bahatau daemo lohonu.” Kelisoike hoto ke mai selevetinu. ⁴ Abu subuta Bukae Hotomo hisialiale hoto ke bahatau nahie haivege nahi kemo kabebiholisito negolahai gabie vaveve ke huhulahama. ⁵ Dilava keike nahie tedaevege nahi kabebiholisito kemo negolahai uma. Katealemo di isiviale keu la negotievege la Iesu Keliso vaveve ke huhulahi uvu igaemo mole hoesegeve. ⁶ Ige elike nahi bahata uvu igaehalahai hoto igaemo nahie Kosive Iesu Keliso ke Mama hoesehavoi.

Diue ata holioholiale keau Dilavaluvuta igaetoaveve.

⁷ Kelisou nahie hoesegevei nahie tedaevemale ke nahate nahi mole tedaevei mole hoesegevegei. Nahi katelahage ataeabuna Dilava ivi ebagevai hoesehavoi. ⁸ Di kemo hoto mole louge evive. Dilavau subuta Diue buluve kebiaho hoto loui mamonu. Iniale vani mole Kelisou Diue esemu holisi Dilavau hoto louale ke mai selevetige nahi kemo hilokage Dilava hoto keu seleve. ⁹ Kelisou ke vai isiviale Diue ata holioholiale keau Dilavau abuhu uvuai tedaeveale kemo abu hoesehavoi. Bukae Hotou kemo loui avoe, “Dana Diue ata holioholiale kebiahi a ivi ebagevai nogoli loui a ivi hoesehavoi.”

¹⁰ Isi tota loui avoe,

“Diue ata holioholiale lana Dilava atahi igaetolahai vahaeholahave.”

¹¹ Isi tota loui avoe,

“Diue ata holioholiale la bahata oleve keve umale la bahata Kosive ivi hoesehavove.”

¹² Ige Bukae Hotomo Aisiau loui avoe,

“Deividi mama Diesi ke valadana bae lohoi.

Dilavau ke ebagemage auna Diue ata holioholiale kebia kosive holige keabuna ke huhulahi abu uvu avuemomavo.”

¹³ Dilava keu gabie vavevu lohoveve ke kosive. Iale la evievimo di isiviale au uveve dua laovege lana kemo vahaeholahave. Ige elike Munanae Tumue vuvune kemo lana Dilavau gabie vaveve ke huhu balugave.

Osiohoike Bolou hoto isute hisalianu.

¹⁴ Di haokuvuia, di hilokage la bahataeau lulelelahai vaveve dua vai kemo negolahai mole haivema. ¹⁵ Isito di subuta loui la haiveale kemo di isiviale tota levaleva koma isuta loui la namigevei la negotievei. Dilavau au uvu daoi di tedahoge di lovive ko vai la haivema. ¹⁶ Di Iesu Keliso esemu holisi Dilava hoto loui Diue ata holioholiale kebia haivema. Di katege Munanae Tumuu uvuiabe hoesegevei malevege keau Dilava nimo duave. ¹⁷ Di Iesu Kelisoti igaetoai Dilava lovi vae dua vameve kemo di vahaehoanu. ¹⁸ Isito di isiviholiale di vemale ke louliho. Keliso keike nego daoge di Diue ata holioholiale kebia haivege abu Dilava hoto evisi ehovama. ¹⁹ Di hoto negote loui Munanae Tumue vuvunemo vaveve nimote vai vikoe vaveve vage keau kemo Dilava ehovalu. Di Dielusalemae lamisi Keliso hotoe dua loui o igaegae kebia haivei tialeu Ililikami ketala velemanu. ²⁰ Di isiviale vani bahata ataeau Iesu Keliso hotoe dua evioholimale kebia haivege abu hoto ke evisi. Di isiviholiale ataeau Iesu hoto eviale keve taliho. Di isiviholinu subuta ata moleu loviale kemo lovialiho. ²¹ Bukae Hotou kemo loui avoe, "Ataeau hotove evioholimale keabuna hotove evisi kemo lulelelahai."

Bolou Lomae dei ai taliho

²² Vani moaga di isiviai lae lohoi la elegevei. Isito di kove lovi baluga vemale keu di tiveve humaha bamunu. ²³ Vagana moaga di la elegeveholinu. Isito di aike kove loviafemale uoholima. Iale dana bae lae lohoniege la elegevei. ²⁴ Di huhuale keu koseanu. Di isiviale matama mole Sibeini keve tai. Isito dana vasohuta Lomae lohoniege la elegevei lahehi ukaukaniege Sibeinie tiho vage di tedahoge di tai. ²⁵ Isito dana vasohuta Dielusalemae tai keve Dilava ata tedaavei hoesegevei. ²⁶ Kosealemo Masedonia ekalesia isi Giliki ekalesia keau abu isivimo Dilava ataeau kunaiholimale kebia tedaavei moni otovele ke dana malei Dielusalemae tai. ²⁷ Di kebia namigeveholinu. Isito keau abu isivimo ke otovelu. Abu katelahale keu duave. Kosealemo vasohuta Diue ataeau Dielusalemae umale keau Dilava hotomo Diue ata holioholiale kebia tedaavelu. Ige Diue ata holioholiale keau abu kunaimo Diue ata kebia tedaavelu. ²⁸ Dana moni ke malei Dielusalema ata kebia ovege uholigie dana lohoniege la elegeveito tota halei Sibeinie tai. ²⁹ Di hilokage dana lae lohoi Keliso hoto loui la haivege auna la hoesegeve dua vai.

³⁰ Di haokuvuia, nahie Kosive Iesu Keliso keu nahi hoesegevege Dilava Munanae Tumuu au isivi nahioveale kemo di isiviale daluvuta igaetolahai guligulilahai daho Dilava imihave. ³¹ La daho guligulilahage evievholimale ataeau Diudiae umale keau bae dahavolivebene. Isi tota daho guligulilahage Diue evievi ataeau Dielusalemae umale keabuna Diue ata holioholiale moni otovege di malei oveveve ke kabebihavo halevaito moniabe ke malei vahaeholahai. ³² Keabuna katelahage datana kemo vahaehoai. Ige Dilavau isiviage dana lae lohoge nahi mole negotievei. ³³ Di isiviale Dilavau nahie uvu hoesegevege nahi vani bahata uveveve duamo ugei. Hoto seleveike.

16

Bolou vahaehoe hoto hisalianu.

¹ Di hoto mole louge evive. Nahie evievi keate mole keu Senikilia dubumo loviai ata kebia tedaevema. Iviveike Voibe. ² Keate keu lae lohoge Kosive ivimo mai o hatuve. Laeau Dilava ataea. Katealemo onobeu avuemo uholigie ke tedahoi omive. Keate keu ata moaga tedaave dua vai data tedahonu.

³ Akuilau abu mahina Bisilati daluvuta Iesu Keliso lovi vemale ataea. Di vahaeho hoto ko hanavoi isiviale la ko loui namigevei. ⁴ Vani mole ataeau dahavoho vasege keau di tedaholu. Katealemo di vahaehoabe vanu. Ige Diue ata holioholiale kebiamo degomoleau ekalesia holiiale kebiata vahaehoabe valu. ⁵ Ekalesiau kebia omo guligulilahamale kebiaho di vahaeho hoto ko loui namigeveve.

Di uvue haoka mole Ebanatasi keho di vahaeho hoto kota loui namihave. Malaha keu vasohuta Esia vatae Keliso hoto evisi evievi ata holinu. ⁶ Keate mole Meli keu laemo loviai negoimale keho di vahaeho hoto ko loui namihave. ⁷ Isi Diue ata abuita Adolonikasi isi Diuniasi kebiaho di vahaeho hoto loui namigeveve. Keau subuta daluvuta dibulae ua. Abostolo ataeau kebia hilokagevelu. Di subuta evievi ata holioholisege keau Keliso ehovai evievi ata holilu.

⁸ Di vahaeho hoto ko loui di uvue haoka Abilatasi namihave. Keu Kosive ata. ⁹ Keliso lovimo nahi tedaevemale Ebanasi keho di vahaeho hoto ko loui namihave. Isi di uvue haoka mole Sitakasi keta namihave. ¹⁰ Ige ata mole Abelasi keu Keliso lovi haleholisito kemo negoimale keho di vahaeho hoto loui namihave. Isi Alistobulasi omo umale kebiaho di vahaeho hoto ko loui namigeveve. ¹¹ Ige Helodioni no avuti Diue ata holiiale keho di vahaeho hoto ko loui namihave. Isi di haokuvuia Kosive ata holisi Nasisasi omo umale kebiata namigeveve.

¹² Keate abuita Talaivanea isi Talaivosa keau Kosive lovimo negolahamale kebiaho di vahaeho hoto ko loui namigeveve. Isi di uvue haoka Besisi keu Kosive lovimo negoimale keho di vahaeho hoto ko loui namihave. ¹³ Luvasiu Kosiverno lovie dua vamale keho di vahaeho hoto ko loui namihave. Isi neinaveu vani bahata di mai au mo toamale ke namihave. ¹⁴ Isi Asikitasi, Belegoni, Hemesi, Batobasi, Hemasi, isi ekalesia ata bahata kebiahi umale kebia bahataho di vahaeho hoto ko loui namigeveve. ¹⁵ Isi Bilologasi, Diulia, Neleasi isi amakinive, Olimibasi, isi Dilava ata bahata keve umale kebiaho di vahaeho hoto ko loui namigeveve.

¹⁶ Di isiviale la mole elegeveliege mole vahaeho vai mole ada hatuve. Keliso ataeau kove umale keau bahata laheho abu vahaeho hoto ko hanavolu.

Deiadae gabi

¹⁷ Di haokuvua, dana hoto mole loui la namigeveve. La subuta hotoe dua evisi malu. Ige ata degomoleau lae lohoi la uvu isi la tasaligevema. Katealemo nenilahi ata kebia vaveve aehave. ¹⁸ Ata keau vaveve kateale vamale keau nahie Kosive Iesu Keliso lovi vaholima. Isito keau abu isivi vaveveike abu ke vama. Hotoeabe kena heai dua vai. Hoto kemo abuna luleleholimale kebia lobogeveve malevegei. ¹⁹ Laeau hotoeabe evioholisito hotoe dua evisi ehovama. Katealemo di la vahaeho vai isiviale la vaveve duamo lulelelahaito vaveve toela huhu halevai. ²⁰ Dilava keu uveve dua nahioveveve ke Kosive. Katealemo auna vuvune laovei la negotievege lana Setene vaveve toela ke aehai negolahai tigeve. Ige di isiviale nahie Kosive Iesu keu vani bahata la huhueveve la hoesegevegei.

²¹ Di haoka Timoti daiti lovimale keu laheho au vahaeho hoto hanavonu. Ige Lusiasi, Diesoni isi Sosibata keau abuta laheho abu vahaeho hoto hanavolu. Keau no abuhi Diue ataea.

²² Di lousege di hoto hisaliamale ivilike Tesiasi keu avuta Kosive ata. Kemo au avuta laheho vahaeho hoto ko hanavonu.

²³ Ige Gaeasi keu di mai o hatui ekalesia bahata hoesegevemale keta laheho vahaeho hoto ko hanavonu. Ige taunie moni nalimale Elastasi isi nahie haoka Koatasi keau laheho vahaeho hoto ko hanavolu.

²⁴ Di isiviale nahie Kosive Iesu Keliso keu vani bahata la huhueveve la hoesegevegei. Di hoto keu seleve.

²⁵ Di Dilava ivi ebagevai hoesehavoi isiviale au vuvune laovei la negotievege lana di Iesu Keliso hotoe dua loumale kemo negolahai uve. Dilavau subuta au hoto mahogovage ataeau ke hilokaholilu. Isito au nova au hoto ke daii nahi haivege nahi hilokalu. ²⁶ Subuta beloveta keau hoto ke hisalilahage ataeau kemo luleleholilu. Isito ukolikoli Dilavau aike hoto ke daiage ata bahatae au ke hilokalu. Ige ata oleuoleu isivilahaliege hoto ke evisi abu uvu mai avuemo mavoi ehovai tai.

²⁷ Dilava ke igaeu lulelete. Katealemo nahi vani bahata Iesu Kelisomo Dilava ivi ebagevai hoesehavogeve. Di hotoe gabiu kemo kateanu.

1 Koliniti

Bolou Koliniti ekalesiaho ko hisalianu.

¹ Dau di ivilike Bolo. Dilavau au isivimo di hohavoge di Iesu Keliso abostolo holisi lohive vama. Da isi nahie haoka mole Soseteni noeabulike levaleva ko laheho hanavoma. ² Dilava ataeau Koliniti oe umale lahehoike no ko hanavoma. Dilavau la hohavei isiviale la Iesu Keliso ata holisi vaveve nahate vai. Kemoike no laheho levaleva ko hanavoma. Isi ataeau oleve keve nahie Kosive Iesu Keliso ke ivi hoesehavomale kebia bahatahoike no hoto ko hisaliai hanavoma. Iesu keu kebia bahata isi nahi bahatae Kosive. ³ Di isivialeike nahie Mama Dilava isi nahie Kosive Iesu Keliso keau la huhuevei la hoesegevege lana ue dua vave.

Dilavau Iesu Kelisomo la hoesegevenu.

⁴ Di vani bahata laheho guligulai Dilava imihama. Kosealemo keu Iesu Kelisomo la huhuevei la hoesegevenu. ⁵ La Iesuluvuta igaetolahale kemo Dilavau la vaveve bahata hoesegevege la kemo lulele baluga malei hotove louma. ⁶ Di subuta Keliso hoto loui la haiveale keu la uvumo u tumutumuanu. ⁷ Katealemo laeau nahie Kosive Iesu Kelisou lohoveve ke hemei umale kemo Dilavau la hoesegevege au lovi vaveve vuvune laovenu. ⁸ Auna la negotievelage vanie gabila nahie Kosive Iesu Keliso keu lohoge vaveve toelabeu bae laemo ulivebene. ⁹ Nahi hilokage Dilavau la negotieveho louale ke auna vai. Dilavau la hohavei isivialeike la move Iesu Keliso nahie Kosive keluvuta igaetolahai ui.

Ekalesiaeau mole tasalieveale

¹⁰ Di haokuvuia, nahie Kosive Iesu Keliso ke ivimo di la namigevema. Lainaho mole tasalievei uvu abualive. Isito la bahata uvu igaeave. Lana katelahaliege igaetolahai huhuihuhui igae vageve. ¹¹ Di haokuvuia, Koloe omo umale ata degomoleau di namihage di hilokage la moleho itumue hoto loui mole aiogevema. ¹² Di louale keu koseanu. La degomoleau loui kosea, “No Bolo ehovama.” Ige la degomoleau loui kosea, “No Abolosi ehovama.” Ige la degomoleau loui kosea, “No Bita ehovama.” Ige la degomoleau loui kosea, “No Keliso ke ehovama.” La hoto kateale louge keu toelanu. ¹³ Di la namigevema. Kelisonike la tasalievenu. Mena la huhuige Bolo danike laheho idie domo hatinu. Lana di ivimonike babatisolalahu.

¹⁴ Di kateholinu. Di la babatisogeveholinu. Isito Kilisibasi isi Gaiasi ata abuita ke unaha di babatisogevema. Di ata moaga babatisogeveholiale keu duave. ¹⁵ Kosealemo labeu bae koseale loulivebene. “Noeau Bolo ivimoike babatisolalahu.” ¹⁶ Di huhuige di ata moaga babatisogeveholinu. Isito di ata abuita kebia babatisogevege Sitevanasi omo umale kebiata babatisogevema. ¹⁷ Ata babatisogeveho Kelisou di hanavoholinu. Isito hotove dua loulivoike au di hanavonu. Keu isiviholialeike di atae lulelemo hoto ke loulivo. Dana kateige Kelisou idie domo hatiale ke vuvuneu bae daemo ulivebene.

Iesu kemo Dilava vuvune isi luleleveu ua.

¹⁸ Ata oleuoleu evioholisito hatihatie humahala timale keau Kelisou idie domo hatiale hoto kemo luleleholisi huhulahai loui avoe, “Momae hotoike.” Isito nahiau ukolikolie humahala timale nahi hilokage hoto kemo Dilava vuvuneu ua. ¹⁹ Bukae hotomo Dilavau loui avoe,

“Dana luleletebiamu luleleabe malege auna uoholisi.

Isi ataeau abu lulelemo ono vade vamale ke dana bamui.”

²⁰ Dilava hoto kemo vatae vavevemo luleleamale keabuna oleve kateai. Ige vatae vaveve huhulahai kemo lulelelahamale keabuna oleve kateai. Dilavau nahie haivege nahi hilokage vatae lulele keu momae vaveve.

²¹ Dilavau au lulelemo humahadaeabe bamuge ataeau bae abu lulelemo Dilava hilokalivebene. Ataeau huhuige nahi Dilava hoto loumale keu momae hoto. Isito ata oleuoleu hoto ke evisi kemo lulelelahage Dilavana kebia malevei. ²² Diue ataeau isiviai vikoe vaveve elehai hilokaito bae hoto ke ehovai. Isege Giliki ataeau hoto keho isiviholisi vatae lulele ke unaha kaovama. ²³ Isito nahiau Iesu Kelisou idie domo hatiale ke hoto loui ata haivema. Ige Diue ataeau hoto ke evisi itumulalahai isiviholilu eviliho. Isege Giliki ataeau hoto ke evisi loui avoe, “Momae hotoike.” Ata keau katelahama. ²⁴ Isito Dilavau Diue ata isime Giliki ata degomole hohavege abu hilokage Keliso kemo Dilava vuvuneu luleleveti ua. ²⁵ Ataeau huhuige Dilava hoto keu momae hoto. Isito Dilava hoto keu atae lulele atae hoto ke evihanu. Ataeau huhuige Dilava vaveve keu negoholinu. Isito Dilava nego keu atae nego ke evihanu.

²⁶ Di haokuvua, Dilavau la hohaveale ke huhulahave. Laeau atae nimo luleholisi vuvneholisi ata baluga holioholilu. Mesoho la igaegaeau atae nimo katelalahu. Isito la bahata kateholilu. ²⁷ Ataeau huhuige laeau momae vaveve vamalea. Isito Dilavau la tabagevei lulele laovege vatae vavevemo lulelelahamale keabuna ke elehai abu laheho hotoe toela louale ke huhulahai matilahi. Ataeau huhuige laeau vuvneholilu. Isito Dilavau la tabagevei vuvune laoveale ke abuna elehai matilahi. ²⁸ Atae nimo oleuoleu vuvuneai ata baluga holimale kebia Dilavau tabageveholinu. Isito vuvneholisi ivite holioholiale kebia Dilavau tabagevei isivialeike vatae huhuihuhui vaveve ke bamui. ²⁹ Di louale keu koseanu. Atabeu bae Dilava nimo au ebia ebagemalivebene. ³⁰ Isito Dilavau nahi malevege nahi Iesu Kelisoluvuta igaetolahalu. Dilavau Iesu Keliso ke ebagemage keu nahiho lulelete ata holinu. Ige nahi kemo lulelelahai Dilava nimo inutolotoloi atae dua holige au vaveve toelamo nahie malevenu. ³¹ Bukae Hotou kemo loui avoe, “Atabeu bae au ebia ebagemalivebene. Isito Kosive ivi unaha auna ebagemai hoesehavo.”

2

Bolou Dilava lulelemo ata haivema.

¹ Di haokuvua, di subuta lae tiale Dilava hoto loui la haiveale kemo di hoto nimoletu loui atae lulelemo la haiveholinu. ² Di onobenobe bahata huhuholisito Iesu Kelisou idie domo hatiale ke unaha di huhuai la haivenu. ³ Di subuta lae tiale negoholisito vabuvabumo la haivenu. ⁴ Di lae tiale atae lulelemo la haiveholinu. Isito di Munanae Tumue vuvunemo la haivege la hilokage hoto keu seleve. ⁵ Di isiviholialeike la atae lulelemo evievi ata holiliho. Isito di isivialeike la Dilava vuvunemo evievi ata holisi.

Dilava lulele

⁶ Ata oleuoleu abu evievimo negolahale kebiaho dana lulele hoto loui. Isito vatae lulelemo di kebia haiveholinu. Isi vatae kosive lulelemo di kebia haiveholinu. Kosealemo vatae kosive kebia vuvunena uoholisi. ⁷ Katealemo di vatae lulele louholisito Dilava lulele ke louma. Dilavau subuta lulele ke mahogovage ataeau ke hilokaholilu. Dilavau subuta vata vaholisito au lulele kemo nahie huhuevei isivialeike nahi otogoe valele ke elehai. ⁸ Vatae kosiveau Dilava lulele ke hilokaholilu. Abu ke hilokavatebe abu atagae Kosive ke mai idie domo hamaholilu. ⁹ Kemo Bukae Hotou loui avoe, “Dilavau ehue otogoe olemeau abu uvu mai avuemo mavoale kebiaho onobenobe vale ke atabeau elehai evisi huhulahaholilu.”

¹⁰ Bukae Hoto keu kateanu. Isito Dilavau au Munanae Tumumo nahie haivege nahi otogoe onobenobe ke hilokalu. Munanave Tumuu vavevege bahata hilokale kemoike auna vavevege ke loui nahie haivei. ¹¹ Di louale keu koseanu. Atabeu bae au haoka vaveve bahata hilokalivebene. Isito biagena au vaveve bahata hilokai. Ke nahate atabeu bae Dilava vaveve bahata hilokalivebene. Isito Dilava Munanae Tumuu vavevege bahata hilokanu. ¹² Nahi vatae vavevemo luleleholilu. Isito Dilavau au Munanae Tumuu hanavoge nahie malevei luleletievege nahi onobenobe bahata Dilavau nahiho vai otoveale ke hilokalu.

¹³ Katealemo nahi atae lulelemo hoto loui ata haive halevai. Isito Munanae Tumuu nahie haiveale hoto seleve ke loui olemeau Munanae Tumuu maleale kebia haivei. ¹⁴ Isito olemeau Dilava Munanae Tumuu maholiale keau bae Dilava vavevemo lulelelahalivebene. Isi Dilava Munanae Tumuu ke vaveve bae hilokalivebene. Ata kateimale keabuna huhuige Dilava vaveve keu momae vaveve. Kosealemo Munanae Tumuu male kebia unahaeabuna Dilava vavevemo lulelelahai. ¹⁵ Munanae Tumuu male keabuna onobenobe bahatamo lulelelahai kemo hoto loui. Isito atabeu bae Munanae Tumuu male kebia vaveve kaovai kemo hoto loulivebene. ¹⁶ Katealemo Bukae Hotou loui avoe,

“Olena Kosive huhuihuhui hilokai.

Olena luleleai ke haivui.

Atabeu bae ke haivulivebene.”

Isito nahiau Keliso huhuihuhui male kemo nahiau onobenobe bahatamo lulelelahalu.

3

¹ Di haokuvua, di isiviai hoto mole loui la haivei. Isito la vatae vavevemo negolahalemo Munanae Tumue vavevemo negoholilu. La Keliso ehovamale kemo eseese evievi nahate. ² Di subuta lae tiale isiviai Dilava hoto bahata loui la haivei. Isito la vaveve toelage di hoto bahata loui la haiveholinu. ³ Kosealemo la aike sohu vatae vaveve vama. La mole vaveve elehai mole maina mai ima. Isi moleho itumulahai moleho hoto louma. La vaveve kateale vamale kemo di hilokage la vatae atae vavevemo negolahalu. ⁴ La degomoleau

loui kosea, “No Bolo ehovama.” Ige la degomoleau loui kosea, “No Abolosi ehovama.” La kateimale kemo vatae atae vaveve vama.

⁵ La huhuige Abolosi keu oleike. Isime Bolo keu oleike. Noeau ata la nahate. Noeau Dilava lovi vai la haivege la Dilava ehovama. Kosiveu lovi igaegae noevege no ke vama. ⁶ Laeau bulu nahate. Isege dalike bulu hamale ata. Abolosi keu e omimale ata. Isege Dilavaike ke hoesehavoge ulima. ⁷ Bulu hamale isi e omimale keau baluga holioholilu. Isito Dilavau ke bahata hoesehavoale keike baluga. ⁸ Bulu hamale isi e omimale keau lovi igaieke abu ke vama. Keabuna lovie dua vage Dilavana ibinaeabe ovei. ⁹ Katealemo noeau igaetolahi Dilava lovi vamale ataea. Isege laeau Dilava bulu nahate. Isime Dilava o nahate.

¹⁰ Dilavau au lovi vaveve vuvune daoale kemoike di o houmale ata holisi lovive dua vai hade negote uluvanu. Ige ata degomoleau ke golomo o houma. Di louale keu koseanu. Di isiviale la igaegae hade ke golomo nenilaihi o houe dua vai. ¹¹ Dilavau Iesu Keliso ebageage keu la hade negote igae holinu. Hade ke igae golomo lana la o houe. ¹² Hade ke golomo evievi ata degomoleau golota silivata mune duata o houma. Isege degomoleau idita kuluta o houma. ¹³ Gabie Iesu Keliso vani kela auna ata bahata vaveve elehai hilokage vaveveabe kena duaveai mena toelai. Kosealemo vani kela venena ata bahata vaveve mahoge Kelisona elehai hilokage oleteu lahanu. Isege oleteu lahaolilu. ¹⁴ Ataeabuna hade ke golomo o houe dua valiege vaveveabe kena venemo lahaolige keabuna abu vavevemo ibina malei. ¹⁵ Isito atabe vavevena venemo lahai uoholige keu bae au vavevemo ibina malivebene. Ata mole ona lahage kunaive bahataeabuna ladevesege auna ada unahala ui. Iale ke nahate ata mole vavevena venemo ladevesege ata kena ada unahala ehue tai.

¹⁶ Lana hilokaholilu. Laeau Dilava oe tumu holige Munanave Tumuu la uvue uma. ¹⁷ Katealemo ata olena Dilava oe tumu aiohavoge Dilavana avuta ke aiohavoi. Kosealemo Dilava o keu tumute. Ige lata ove tumute.

¹⁸ Lainaho la ebika lobogevlive. Mesoho la moleu huhuai kosea, “Dau vatae vavevemo lulelete.” Isito lulele kateale keu lobo lulele. Katealemo lulele kateale halevai lohoi Dilava vavevemo lulelelahave. ¹⁹ Kosealemo vata ko luleleu Dilava nimo momae lulele. Kemo Bukae Hotou loui avoe, “Vatae ataeau abu lulele lulelelahamale kebia Dilavana luleleabe malege luleleabe kena uoholisi.” ²⁰ Isime Bukae Hotou tota loui avoe, “Kosiveu hilokage vatae lulelete kebia huhuihuhui keu lobo unaha.” ²¹⁻²³ Laeau Keliso ataea. Ige Kelisou Dilava ata. Katealemo lainaho la ebika tabagevei vatae lulele ehovagelive. Kosealemo Dilavau onobenobe ke bahata laovenu. Dilavau Abolosi, Biti, isi da no malei laovege no la tediaevema. Au vatamo onobenobe ke bahata malei laovenu. Aike lohoveve, gabie lohoveve, hatihati isi uveve ke bahata malei laovenu. Iale onobenobe ke bahataeau laele.

4

Iesu Keliso esemuia

¹ No elegevei koseale huhulahave. “Keau Keliso esemuia. Dilavau subuta au hoto seleve mahogovale ke mai ovege keau nova hoto ke loulmale esemuia.” ² Noeau Keliso esemuia. Katealemo Dilavau isiviale no nenilaihi hotove lougei. ³ Halege la di vaveve kaovai louge di bae ke huhualivebene. Ige ata degomoleau di vaveve kaovai louge keta di bae huhualivebene. Isi di bae di vaveve kateimale huhualivebene. ⁴ Di uvuu duave. Di huhuige vaveveabe toelau daemo uoholinu. Isito Dilavana bae di vaveve kaovai daemo di vaveve onole loui. ⁵ Katealemo lainaho mole vaveve kaovai kemo hoto loulive. Gabie Kosiveu lohemale vani kela auna bae atae vaveve kaovai kemo hoto loui. Ataeau vavie vaveve vai mahogovamale kebia auna loui daiai. Isi ataeau abu uvumo huhulahamale ke auna bae loui daiai. Vani kela ata oleuoleu vaveve dua vamale kebiaho Dilavana loui kosea, “La vaveve duave.”

⁶ Di haokuvuia, di hoto ke loulmale kemo lana di vaveve Abolosi vaveve kebia nahate vave. Di ke loui isivialeike la Bukae Hotou louale ke huhuai ehovai. Lainaho ata mole ebagevai mole etolevalive. ⁷ Laeau mole nahate. Oleike la haivege la la ebika tabagevema. Dilava keike onobenobe bahata laovenu. Katealemo lana oleve kateai la ebika tabagevei huhulahai kosea, “No negomoike no ke bahata malelu.”

⁸ La lololahi loui kosea, “No Dilava vaveve dua ke bahata vama. Isi no ke bahata malei vai avuemo kosive holilu.” La kosive holisi vaveve ke bahata vavatege nahi bahataeau kosive holilu. Isito la kateholilu. ⁹ Noeau Dilava abostolo ataea. Isito di huhuige Dilavau no malevei atae gabila otovenu. Katealemo ataeau huhulahai avoe, “Atae toela abulike ko. Ialemo havege abu haluvisi.” Kateaime atae nimo isi anelue nimo vatehani noevema. ¹⁰ No Keliso lovi vamale kemo ataeau no elegevege noeau

loboe ata nahate. Ige la lobolohai loui kosea, “No Keliso hilokai lulelelahalu.” Iale kemo laeau negolahasege noeau negoholilu. Loboe vaveve kateimalemo ataeau no aiogeveito la hoesegevema. ¹¹ Katealemo no aike vani komo vaelahai enulahai tima. Isime ogoe toela vama. Ataeau nohavei no aiogeveima. No uveve ou uoholige no matama igaegae ohanoi tima. ¹² No adatelaikē no negolohai lovilohai lovi ima. Ataeau no ivi aiogeveima. Isito noeau hoesegevei abuhu hotoe dua louma. Ataeau vatehani noevema. Isito no ke ibina vaholima. ¹³ Ataeau noheho hotoe toela louma. Isito noeau abuhu hoto savate louma. Vani bahata no katelahage ataeau no kabebigevei huhulahage noeau vatae momolu nahate.

¹⁴ Di laheho ko hisaliai isiviholinu la ko evisi matilahaliho. Laeau di uvue ese nahate. Kateike vage di ko hisaliai isiviai la haivei. ¹⁵ Ata moagamoagaeau lae tiale Keliso hoto loui la haivelu. Isito keau la mamuvu nahate holioholilu. Di vasohuta lae tiale hotoe dua loui la haivege la eviale kemoike dau la mama nahate holinu.

¹⁶ Katealemo di la namigevege evive. Di vamale ke nahate vai di ehovave. ¹⁷ Dana bae Timoti hanavoge auna lae tai di hoto loui la haivei. Timoti keu di uvue mo. Keu evievi ata hohisi Kosive lovimo negoanu. Iale auna bae lohoniege di Iesu Keliso humaha ehomai ekalesia bahata haivemale ke deiada loui la namigevei.

¹⁸ Isito laemo ata degomoleau abu ebika tabagevei huhuige di bae lae dei ai loholivebene. ¹⁹ Isito Kosivena isiviage dana solekai lae lohoniege bae ataeau abu ebika tabageveale kebia vaveve kaovai hilokai. Vaveveabena vuvuneanu. Mena hoto unahaikē abu vama. ²⁰ La la ebika tabagevei loui kosea, “Noeau Dilava adae vuvunemo ua.” Kateaito la hoto unahaikē ke louma. Kosealemo la hoto kemo vuvune vavevebu uoholinu. ²¹ Katealemo dana lohoniege oleve kateai la haivei. La huhuige di la vaveve toela kemo hoto isute louge kena duave. Emena lana la vaveve hoesegevege di kemo hoto savate loui la hoesegevege kena duave.

5

Ekalesia ata moleu vaveve toela baluga vale.

¹ Ata degomoleau di namihage di hilokage vaveve toela balugau laemo ua. Evievi ata holioholiale keau vaveve toela kateale vaholima. Isito evievi ata la kebiamo ata moleu au mamea keate melamei avuti lahama. ² Katealemo la osiohoike la ebika tabagevema. Abege vaveve toela kemo la uvulohai malaha keu vaveve toela vale ke iovage au guliguli halei u unahai. ³ Di lahehi uoholinu. Isito di vaveve ke huhuai loui kosea, “Malaha keu vaveve toela vanu.” Di uvatege hoto kateai loui malaha ke iomage au tinu. ⁴⁻⁵ Isito di lahehi uoholige vaveve koseale vave. La bahata nahie Kosive Iesu ke ivimo igaetolohai di huhuale ke vai nahie Kosive Iesu Keliso ke vuvunemo ata ke mai iovage au Setene vuvunemo ui. Ige elike vaveve toela balugau avuemo lohoge au ke elehai au vaveve toela kemo tota hoilohai. Ilive elike Kosiveu lohomale vani kela ukolikoli mai.

⁶ Katealemo lainaho la ebika tabagevelive. La hilokage beikini bauta esevehame mai valavamo mamoge auna ke lahoai. Ke nahate vaveveve toela kena la bahata lahoivei la aiogevei. ⁷ Katealemo vaveve toela vale ata ke iovage au guliguli halei u unahai. Isege laeau vaveve dua vave. Kemoike lana valavae doga beikini bauta mamoholiale ke nahate vave. Iesu nahie Basova mamoe ke nahate vai nahie vaveve toelaho hatisi ulihanu. ⁸ Nahie vaveve toela keu beikini bauta nahate. Katealemo nahi subuta vavevete toela ke bahata halevai huhuihuhuiē dua vai vaveve dua vai Iesu ehovai.

⁹ Di subuta hoto mole hisaliai laheho hanavoale kemo di loui kosea, “Ataeau vaveve toela vai keatehi ladevemale kebiahi igaeto halevave.” ¹⁰ Evievi ata holioholiale kebiaho di hoto ke lougholinu. Isito evievi ata lahehoike di ke lounu. Evieviholimale keau keatehi ladevei mole kunaiho isivilahai vavolohai loboe dilava hoesegevema. Vaveve katealeu vata ko bahatamo ua. Lana oleve keve tige vaveve katealeu ua. ¹¹ Isito di laheho hisaliale keu koseanu. Evievi ata moleu vaveve toela vamale keti lainaho igaetolahalive. Mesoho ata keu loui kosea, “Dau evievi ata.” Isito keu vani bahata keatehi ladevei mole kunaiho isivi balugai loboe dilava hoesegevei hotoe toela loui e toela isi vavoloima. Evievi ata keu kateige keluvuta igaetolohai avuluvuta lovi i halevave.

¹²⁻¹³ Ekalesiaholiale kebia vaveve di bae kaovai kemo hoto loulivebene. Isito Dilavana vaveveabe kaovai kemo hoto loui. Isito abege la la molete vaveve kaovai kemo hoto louge au ke halei. Keu ke haleholige Bukae Hotou kemo loui avoe, “Vaveve toela vamale ata ke iovage au laemo haliohatui.”

6

Ekalesiau oleve kateai molemo kotaveve.

¹ La moleu evievi ata moleti itumuai hotoe toela isute moleho louge hoto ke mai evieviholimale ata kebia nimo loui kota halevave. Isito ekalesia kebiahi uguavi hoto ke loui hoesehavoge au uoholisi. ² Lana hilokaholilu. Gabie Dilava ataeabuna vatae atae vaveve kaovai kemo hoto loui. Laeau Dilava ataea. Lana bae vatae atae vaveve kaovai kemo hoto louve. Katealemo novae vani komo mole vaveve esehame kaovai louge au uoholisi. ³ Lana hilokaholilu. Gabie nahiabuna anelue vaveve kaovai kemo hoto loui. Katealemo nahi novae uvevemo mole vaveve kaovai hoesehavoge keu toloholinu. ⁴ La ekalesiaholimale kebia nimo kotae hoto loumale keu toelanu. ⁵ La matilahage duave. Kosealemo laemo lulelete atana uoholinu. Abege la laemo lulelete ata ebagevage au elike la vaveve toela molemo louale ke kaovage uoholisi. ⁶ Isito la kateholisimo molemo hoto loui kotama. La kateisege evieviholimale ataeau la vaveve kaovai kemo hoto louma.

⁷ La molemo hoto loui kotalahamale kemo di hilokage laeau la evievimo negoholilu. Ataeau laemo vaveve toela vage lainaho ke ibina valive. O mesoho ataeau la vavogevege keta duave. Lainaho itumulahai malevei kotalahalive. ⁸ Isito di evige evievi ata laeau molemo vaveve toela vai mole vavogevei mole malevei kotalahama. ⁹ La hilokage vaveve toela vamale kateimale keau bae Dilava otogoe matama doge keve talivebene. Lainaho la ebika lobogevive. La hilokage ataeau vaveve toela vai molehi ladevemal, loboe dilava hoesegevemale, malahaeau keateu mole halevei ata degomolehi ladevemal, isi malahaeau molehi ladevemal kateimale keau bahata Dilava otogoe matama doge keve talivebene. ¹⁰ La hilokage vavoloimale ataea, mole kunaiho isivi balugamale ataea, e toela imale ataea, moleho hotoe toela loumale ataea, ata lobogevei moniabe vavoloimale kateimale ata keau Dilava otogoe matama doge keve bae talivebene. ¹¹ La degomoleau subuta katelahama. Isito la Kosive Iesu Keliso ke ehovage Dilavau ivivemo laemo vaveve toela ulihai la hoesegevege Munanave Tumuu la malevege la nivemo inutolotololalahalu.

A vava keu Dilava Munanae Tumue o.

¹² La molena loui kosea, “Dilavau humaha bamuoholige dana di isivi vaveve vai.” Keta duave. Isito vaveve degomoleau la hoesegeveholima. Dana loui kosea, “Dilavau humaha bamuoholige dana di isivie vaveve vai.” Isito di isiviholiale vaveve degomoleau di mage di isiviabe valiho. ¹³ La molena loui kosea, “Dilavau lovi vale keu ilihoike au ke vanu. Isime lovihoike au uni ke vanu.” La hoto keu seleve. Isito Dilavana isiviage la vava la lovi kena gabiai. Di louale keu koseanu. Dilavau isiviholiale nahie vava kemo nahi vaveve toela vai mole keatehi ladevelihio. Isito keu isiviale nahi nahie vava kemo Kosive hoesehavoi. Ige Kosivena nahie vava hoesegeve. ¹⁴ Dilavau au vuvunemo nahie Kosive etuvage hovelahanu. Ke nahate nahi haluvige Dilavana au vuvunemo nahi tatuvage nahiabuna hovevevei vavae doge malei.

¹⁵ La hilokage la vava keu Kelisoel. Katealemo lana teibae vaveve vage la vavana ata ke vavati igaetoai. Kemo lana Keliso vava aiohavove. ¹⁶ Lana hilokaholilu. Ata olena teibae keatehi igaetoai lahage ke vavana keate ke vavati igaetoai. Kemo Bukae Hotou loui avoe, “Malaha olena keate moleti lahage kebia vavana igaetoai.” ¹⁷ Iale ata olena Kosiveti igaetoage ke uvuna Kosiveti igaetoai.

¹⁸ Katealemo lainaho mole keatehi ladevegeve. La vaveve toela degomole vage keu bae la vava aiohavalivebene. Isito lana vaveve toela vai ata moleti lahaliage lana kemo la vava aiohavove. ¹⁹ Lana hilokaholilu. La vava keu Dilava Munanae Tumue o. Dilavau au Munanae Tumu laovage keu la uvue uma. La vava keu la vava holioholinu. ²⁰ Isito Dilavau la vavae ibina vai la maleveale kemo la vavevemo Dilava hoesehavove.

7

Kolivuai mahinuvuaveve deiada

¹ La subuta daho hisaliai hanavoale kemo dana hoto loui la namigeve. Di huhuige ata moleu mahinaholiale keu duave. ² Isito ata moagaeau vaveve toela vai molehi ladevemal kemoike di isiviale la bahataeau mahinuvulahai kolivulahave. ³ La oleu mahina kolianiege molehi igaetoai ladeveve. Lainaho mole halevei lahuvela ladeveve. ⁴ Kosealemo keate ke vavaike kolivave vava. Ige malaha ke vavaike mahinave vava. Keate kena au vavamo au kolia isivi vai. Ige malaha kena au vavamo au keate isivi vai. ⁵ Malahaeau keatehi moleho kabebi halevai vani bahata igaetolahai ladevege duave. Isito vani mole lana mole namigeve loui kosea, “Nahi molehi igaetolahai ladeve halevai gulgulilahai.” Keta duave. Isito lainaho vani moaga mole halevei lahuvela ugei. Kosealemo vani moaga lana mole halevesege Setenena huhuihuhui toela laheho hanavoge kemo dobuluvive.

⁶ Di hoto ke louale keu menaka hoto holioholinu. Isito di isivie hotoike. ⁷ Kemoike di isiviale ata bahata da nahate vai mahinuvuholisi. Isito di hilokage Dilavau vuvune

igaegae ata oveale kemo ata degomoleabuna mahinuvulahasege degomoleau bae mahinuvulahalivebene.

⁸ Katealemo mahinuvuholisi kolivuholisi gobuvu holisi umale kebiaho dana hoto mole loui haivei. Evive. Di mahinaholiale ke nahate la mahinuvuholisi kolivuholige duave. ⁹ Isito lana negoholisi koliaveve huhulahai mahinaveve huhulahaliege keta duave. Hovedevei la isivi vai kolivulahai mahinuvulahave. Isito lana kateholisito vani bahata vavoloe vaveve ke huhulahage keu toelanu. ¹⁰ Isito mahinuvulahai kolivulahamale kebiaho dana menakae hoto mole loui haivei. Kou di hoto holioholinu. Isito Kosive hotoike. Keu loui avoe, "Mahinai bae au kolia halelivebene." ¹¹ Isito auna au kolia haleniege au bae malaha mole melamelivebene. Vani mole auna tota hoilahi au kolia keti igaetoage keta duave. Mahinaho hoto keu kateanu. Ige koliave keta bae au mahina halelivebene.

¹² Dana hoto mole loui ata degomole haivei. Kosiveu hoto ko louholinu. Isito di isivi hotoike di ko louliho. Mesoho malaha moleu evievi ata holisege mahinaveu evievi ata holioholisito au isiviai abu koliati uge koliaveu bae halelivebene. ¹³ O mesoho keate moleu evievi ata holisege koliaveu evievi ata holioholisito isiviai abu mahinati uge mahinaveu bae ke halelivebene. ¹⁴ Kosealemo keate keu au evievimo abu koliati uveve dua vage mesoho Dilavana koliave uvu ekovehage auna hoilahi evievi ata holisi. Ke nahate malaha moleu au evievimo abu mahinati uveve dua vage mesoho Dilavana mahinave uvu ekovehage auna hoilahi evievi ata holisi. Keau katelahage mesoho eseabe keabuna evievi ata holisi. Isito keau kateholige eseabe keau bae mesoho evievi ata hollivebene. ¹⁵ Ige evieviholimale ata moleu isiviai evievi ata halege keta duave. Lainaho keluige au ulive. Kosealemo Dilavau isiviale atave keau molehi uveve dua unaha vai. ¹⁶ Evievi keatea, la hilokaholilu. Vaveve oletemo lana la kolivu hoesegevege keabuna evievi ata holisi ukolikoli malei. Evievi malahaea, lata hilokaholilu. Vaveve oletemo lana la mahinuvu hoesegevege abuna evievi ata holisi ukolikoli malei.

Dilavau a hohavoqe a ehomale kemo unela.

¹⁷ La lovi onole vasege Dilavau la hohavei vuvune igaegae laoveale kemo ui tigeve. Katealeike di dubu igaegae tiale ekalesia haivema. ¹⁸ Subuta Dilavau la hohaveholisege la degomoleau Diue vaveve vai la vudie vate bohilu. Isito Dilavau aike la hohavege la ke ehovamale kemo lainaho la subuta vale ke huhulahagelive. O mesoho la degomoleau la vudie vate bohioholige Dilavau la hohavege la ke ehovamale kemo lainaho Diue vaveve vai la vate bohilive. ¹⁹ Kosealemo vudie vate bohimalo o vudie vate bohioholimalo keu Dilava nimo baluga holioholinu. Isito Dilava menakae hoto evisi ehovamale keu baluga. ²⁰ La lovi vade vasege Dilavau la hohaveale kemo uve. ²¹ La degomoleau heiatu lovilahasege Dilavau la hohaveale keta lainaho huhulahagelive. Isito la vamale lovi ke valage vani mole abuna la iovege la lovi ke halevai la isivi unaha vave. ²² Di louale keu koseanu. Dilavau ataeau heiatu vatae kosivebiaho lovilahamale kebia hohavege abu ehovamale kemo keau kosive kebia ata holioholisito Dilava ata holilu. Ige abu isivimo loviamale kebia Dilavau hohavege keau Keliso lovi vamale ata holilu. ²³ Dilavau ibina baluga vai la malevenu. Katealemo lainaho vatae atae isivi vai vaveve toela vagelive. ²⁴ Di haokuvuia, la lovi onole vasege Dilavau la hohaveale kemo uve. Ige Dilavana lahehi ui la lovi ke hoesehavo.

Kolivuiai mahinuvuholiveve deiada

²⁵ Dana hoto mole loui mahinuvuai kolivuholimale kebia haivei. Kosiveu menakae hoto loui di namihaholinu. Isito keu au uvu mai daoi lulele daoale kemo dana hoto mole loui la haivei.

²⁶ Di huhuige vatetumu balugau aike ekalesiamo lohoale kemo lainaho mahinuvulahalive. ²⁷ Lana aike mahinuvulahalu. Keta duave. Lainaho ke halevalive. Mena lana mahinuvuholilu. Keta duave. Lainaho mahinuvuveve huhulahalive. ²⁸ Isito lana mahinuvulahage keta duave. Keu vaveve toela holioholinu. Ige mahohoeau kolivulahage keta duave. Keu vaveve toela holioholinu. Isito lana kolivulahai mahinuvulahaliege vatae onobenobe huhu balugaito Kosive huhu eseveave. Katealeho di isiviholinu.

²⁹ Di haokuvuia, di hilokage vaniu vuguvuguanu. Katealemo di isiviale mahinuvulahamale keau mahinuvuholimale kebia nahate vai Dilava lovimo negoagei. ³⁰ Lainaho vanie duamo vanie toelamo Dilava momahavo lovive vaholilive. Isi lainaho kunai vade voilahaveve huhulahai kemo lovive vaholilive. ³¹ Lainaho vatae onobenobe huhulahai la uvu bahata kemo mavolive. Kosealemo vatae onobenobe aike umale keabuna bahata uoholisi.

³² Katealemo di isiviale vatae onobenobe ke huhu moaga halevave. Mahinuvuholimale keau isiviai Kosive lovimo uvu igaeani lovive vai Kosive vahaeho vai. ³³ Isito mahinuvulahamale keau vatae onobenobe huhulahai isiviale abu mahinuvue vahaeho vai. ³⁴ Ige kemoike mahinuvulahamale keau uvu abuilahalu. Keau Kosive lovi huhulahai vatae onobenobe keta huhulahama. Isege kolivuholimale keau kateholisito abu vava abu uvu bahata Kosive lovimo mavoi ke unaha huhulahama. Isito kolivulahamale keau vatae onobenobe huhulahai isiviale abu kolivue vahaeho avi.

³⁵ Keatealemo di hoto ko loui isiviai la tedaavei. Di isiviholinu menaka isute laheho mamoliho. Isito di isiviale la vaveve dua vai la uvu bahata Kosive lovimo mavoi kemo negolahave.

³⁶ Mo moleu mesoho ma moleti moleho isivilahaito mole holoeveholilu. Kosealemo abu isiviale Kosive lovi vai. Iniege mo keu ma ke elehage keu belika holima. Isi kateai isiviale ma ke melamei. Kateige au ma ke melamege keta duave. Kemo vaveveve toelau uoholinu.

³⁷ Isito mesoho mo keu au isivimo loui kosea, “Di bae ma ke melamelivebene; Dana Kosive lovi vai.” Kateige keta duave. Au ma ke melame halei. ³⁸ Di louale keu koseanu. Mo keu au ma melamege keu duave. Isi mesoho au ma melameholige keu duave seleve.

³⁹ Kolivulahamale keate keau bae abu kolivu halevelivebene. Isito kolivuiabeau haluvige keabuna malaha mole melavei. Humaha kateale di bae bamulivebene. Isito di isiviale keau evievi ata unaha holoevei. ⁴⁰ Di huhuige gobuvu keabuna kolivuholisito abuhuvula uge keu duave. Keabuna kemo vahaeholahi. Keu di huhuihuhuilike. Isito di huhuige Kosivelike au Munanae Tumumo huhuihuhui ke mai daonu.

8

Lovi malei loboe dilava hoesehavomale deiada

¹ Ataeau lovi malei loboe dilava hoesehavomale ke ivevemo dana aike hoto mole loui. Di hilokage nahi bahata lulelelahalu. Isito nahiabuna nahie lulelemo nahie ebika tabagevege keu toelanu. Isito nahiabuna nahie lulelemo moleho isivilahai mole tedaavege keu duave. ² Ata oleu huhuai loui kosea, “Di vaveve bahatamo luleleanu.” Keu kateige nahi hilokage keu luleleholinu. ³ Isito ata oleu au uvu mai Dilava omisi avuho isiviage auna au lulele omisi.

⁴ Di loboe dilavae lovi iveve kemo hoto louge evive. Ataeau lovi malei loboe dilava hoesehavomale kemo nahi hilokage loboe dilava hoesehavomale ke ihuu uoholinu. Kosealemo nahi hilokage Dilava igaue ua. ⁵ Ata degomoleau loui avoe, “Otogoe dilava moagaue ua. Ige vatae dilava moagaue ua.” ⁶ Isito nahi hilokage dilava moagaue uoholilu. Nahie Mama Dilava ke igaue ua. Keike onobenobe bahata vavevunu. Keike nahie uveve nahiovenu. Isi nahi hilokage Iesu Keliso keu nahie Kosive igae. Dilava louge keike onobenobe bahata vaveve uveve nahiovenu.

⁷ Isito evievi ata bahata keau kemo luleleholilu. Kebia degomoleau subuta loboe dilava hoesegevema. Kemoike abu nova huhulahai avoe, “Abu lovi ke malei loboe dilava hoesegevemale ke no bae ilivebene. No lovi ke ige keu noemo vaveve toela.” Abu kateale huhulahai lovi ke ioholima. ⁸ Isito nahi lovi imale mesoho ioholimale keu Dilava nimo bae nahie hoesegevelivebene. Lovi iveve keu Dilava nimo baluga holioholinu.

⁹ Keu kateanu. Isito kemo la ebika nenigeveve. Lana hoto ke evisi loui kosea, “No loboe dilavae lovi ke ige duave.” Kateige evievimo negoholimale keabuna la lovi iale ke elehai abuta lovi ke isi huhulahai kosea, “No vaveve toela valu.” ¹⁰ Di louale kemo mesoho la moleu evieviveve vaveve kateimalemo negoholialeu elehasege evievi ata moleu lovi ke hilokai ige ata kena gabie avuta lovi ke isi. ¹¹ La lovi ke iale kemo Kelisou la haoka evieviveve negoholiale keho hatiale kena la vaveve kemo au ebika aiohavoi. ¹² Laeau vaveve toela kateale vai kebia aiogevemale kemo uvuiabeu toelanu. La vaveve kateimale vamalemo Kelisotaikela ke aiohavoma. ¹³ Di lovi vade ige di haokau ke elehai isi kemo dobage keu toelanu. Katealemo di bae loboe dilavae lovi ke ilivebene. Di isiviholinu di haokau di vaveve elehai kemo dobalihu.

9

Abostoleau ono vade vaveve deiada

¹ La huhuige dana di isivi unaha vai di haokuvu aiogeveve. Ba, Dilava au abostolo lovi daoge di nahie Kosive Iesu ke elehanu. Di Kosive lovi vamale kemo laeau evievi ata holilu. ² Ata degomoleau huhuige dau abostolo ata holioholinu. Isito laeau hilokage dau abostolo ata. La evievi ata holiale kemo la hilokage dau Kosive abostolo ata seleve.

³ Isito di abostolo holisi Kosive lovi vasege ata degomoleau di abostolo kemo loui avoe, “Ata keu abostolo seleve holioholinu. Keu loboai atae lovi isi moniabe malema.” Kateige

dana hoto koseale loui hotoeabe ke hamai. ⁴Di Kosive lovi vasege abu lovi daovamale keu duave. ⁵Ige abostolo degomole, Kosive hohuvuia isi Bita keau abu mahinuvuhi olahai tai ata haivemale ke nahate di data vage keu duave. ⁶Abostolo degomole kebia la tetaevei lovi ovema. Isito la huhuige noeabuna Banabasiti no unaha no adatela no lovite vai. ⁷Tuvali ataeau gamanie lovi vage gamani kena ibinaeabe vai moni ovegei. Ige ata moleu bulue lovi vamale kena au bulumo lovi igei. Ige bolomakau nalievemale kena bolomakau amue e malei loviho igei. Ke nahate no Kosive hoto loui ata haivesege abu no tetaevei lovi noevege keu duave.

⁸Di louale keu atae vaveve unaha holioholinu. Isito Dilava menaka keta kateanu. ⁹Nahi Mosese menakae hoto dodavege keu loui avoe, “Bolomakau bulumo loviasege lainaho aive bamui umuvalive. Keu bulu kemo loviai lovi ige keu duave.” La huhuige Dilavau bolomakau vaveve hotonike au ke lounu. ¹⁰Ba, keu nohehoike au ke lounu. La hilokage vata hamale isi lovi lovomale keau abu lovi vai isiviale bulu kemo lovi igei. Iale no Banabasiti ata kebia nahate. ¹¹Noeau lae tiale Dilava hotoe dua loui la haivelu. La huhuige no la haivesege la no tetaevei lovi noevege kena duave. ¹²Abostolo degomoleau subuta la haivesege la lovi ovemale ke nahate la huhuige noeau la haivesege la lovi noevege kena duave. Di huhuige keu duave. Isito noeau loviho la imigeveholisito no adataike no lovilahaimo lovi ima. Kosealemo no isiviholiale la huhulahai kosea, “Keau Keliso hoto loui no haivemale ibinahoi ke abu loviho no imigevema.” ¹³La hilokage ataeau Diue dubu baluga kemo lovilahamale keabuna dubu ke lovi malei igei. Ataeau lovi malei lohoge abuna Dilava hoesehavoito lovi ke vaki mole malei igei. ¹⁴Ke nahate Kosiveu isiviale oleuleu hotove dua loui ata haivemale keabuna ata kebiamu abu iveve lovi malegei.

¹⁵Isito di katealio isiviholinu. Di laemo kunai maleliho hoto ko hisaliholinu. Di Dilava hoto loui ata haivenata vaeho hatige keta duave. Isito di ke ibinahalo laemo kunai malelivebene. Dana laemo kunai malege di hoto ko louale kena dohai. ¹⁶Di Dilava hoto loumale kemo di ebika ebagealivebene. Kosealemo Kosiveike di hanavoge di hoto ke louma. Di Dilava hoto loui ata haiveholige da nohoma. ¹⁷Dana di isivimo lovi ke vaniege huhuai kosea, “Dana lovi ke ibinae dua mai.” Isito Dilavau lovi ke daoale kemo dana isivive vai lovi unahai. ¹⁸Katealemo dana ibina onole mai. Di hotoe dua loui ata haivesege abu evimale keu di ibinaike. Di isiviholinu ata haivemale ke ibinahalo kunai maleliho.

¹⁹Di ataemo di ibinahalo lovi ke vaholima. Dau ata mole esemu holioholinu. Isito di ata bahatae esemu nahate vai isiviai kemo Kosiveho ata moaga malevei. ²⁰Dana Diue oe tiniege Diue vaveve nahate vai. Katealio kebiamo Kosiveho ata malevei. Dau Mosese menakae hoto ke ehomaholima. Isito dana oleve keve tiniege mesoho Diue ata haiveniege kebia vaveve nahate valive elike kemo ata malevei. ²¹Dana Diue ata holioholiale kebia oe tiniege kebia vaveve nahate vai. Ata keau Mosese menakae hoto ke ehovai tiholima. Ige data menaka ke ehomaholisi Diue ata holioholiale kebia vaveve nahate valive kemo kebia malevei. Di vaveve kemo di Dilava menaka ke kabebihavoholinu. Isito di Iesu Keliso menakae valamo ui ke ehomama. ²²Dana evievimo negoholimale kebiae tiniege hoto tolote loui namigevelivebene. Isito dana di ebika etolemai kebia hoesegevelive kemo kebia negotivei. Katealemo dana ata bahatae vaveve nahate vai elike ata degomole malevei ukolikoli humahamo otovei.

²³Di vaveve kateale vamale keu koseanu. Di hotoe dua loui ata haivemale kemo Dilavana kebia hoesegeveke data hoesehavoi. ²⁴La hilokage ataeau gilumolemo bibuluviale kemo ata moage abuna bibuluvisi. Isito kebiamo mesoho ata igaena ibina mai. Ke nahate la nova Dilava hotomo negolahai tige auna ibinae dua laovei. ²⁵Gilulahamale ata keabuna gilue tovetove vai hilokaito bae gilulahai. Abuna negolahai gilulahaliege ibina mai. Isito ibina kateale male keu bae ui egealivebene. Isito nahi Dilava hotomo negolahage au ibina nahiovevege keu bae uohollivebene. ²⁶Katealemo di Dilava humahamo inuta bibuai tima. Abu mole baisigeveho tovetove vai negolahale ke nahate di vai loboholisito Dilava lovima negoanu. ²⁷Dana di vaveve tovetovehavoholisi di vaveve hoesehavoholisi Dilava lovi kemo negoholige Dilavana di lovoho ata mole mage auna hotove loui ata haivei.

10

Abu subuta vaveve toela vale keu nahie haivenu.

¹Di haokuvuia, di isiviale nahie buluveau subuta Mosese ehovamale kebia vaveve huhulahave. Vani kemo Dilavau goemo abuhi ua. Isege abu e baluga ivi Tahote ke houu tilu. ²Goe keu ata kebia bamuevesege keau Moseseluvuta e kemo babatisoale ke nahate vai e ke houu vaki moleve tilu. ³Ige Dilavau otogoe lovi hanavoge abu bahata ke ilu. ⁴Isime louge e duau munemo lohoge abu bahata ke ilu. Mune keike Iesu Keliso. Keu vani bahata

kebiahi timale kemoike abu lovi isi e ima. ⁵ Keau katelahaito hoto evie dua vaholige Dilavau kemo kebia vahaeho vaholisi hanavege abu tomagie tiale igaegaeai haluvilu.

⁶ Ata keau subuta vaveve toela vale keu nova nahie haivege nahi vaveveabe toela ke nahate va halevai. ⁷ Subuta ata kebiau loboe dilava hoesehavomale kebia nahate nahi va halevai. Bukae Hotou louale ata keau uguaivoi lovi isi e isi hovevevei loboe dilava hoesehavoi havulahama. ⁸ Ata keau vaveve toela vai molehi ladevemale kebia nahate nahi va halevai. Keau vaveve toela ke vamale kemo ata moagamoaga tuenti tili taoseni (23,000) keau vani igaemo haluvilu. ⁹ Ata keau Kosive vuvune vaveve kaovamale kebia nahate nahi va halevai. Keau kateige Dilavau ute hanavege kebia uagevege ata moagaeau haluvilu. ¹⁰ Lainaho ata keau Dilavaho itumue hoto loumale kebia nahate valive. Keau kateige Dilavau anelu hanavoge kebia havege abu haluvilu.

¹¹ Ata keau vaveve toela vamale ke hoto Moseseu Bukamo hisaliai nahie haivei isiviale nahi kebia nahate va halevai. Kosealemo nahiau vanie gabila ua.

¹² Mesoho la degomoleau huhulahi loui kosea, “No negolahalau. No bae vaveve toela kateale valivebene.” Isito la ebika nenigeveve. Onoilage la moleu avuemo dobama. ¹³ Vaveve toela bahatau laemo lohomale keau ata bahatamo lohoma. Isito Dilavau la negotieeve louale kemo au bae vaveve toela la avuemo dobuluviveve ke bae laovelivebene. Vaveve toelau laemo lohosege auna nego laovei laheho humahae dua alavoge lana vaveve toela ke evihai tigeve.

¹⁴ Di uvue haokuvuia, lainaho loboe dilava hoesehavogelive. ¹⁵ Laeau lulelete ataea. Katealemo di louale ko elehage au laemo duaveage ehovave. ¹⁶ Nahiau aleto kabu mai ke hoesehavoi huhulahi kosea, “Kelisou noheho hatai no hoesegevenu.” Nahi katelahai ke ige lana huhuige nahi Keliso taho kemo igaetolahalau. Isime nahiau valava vakoai ke ige lana huhuige nahiau valava kemo Kelisoluvuta igaetolahalau. ¹⁷ Seleveta nahi bahata valava ke ige imale kemo nahiau Iesuluvuta vava igeae.

¹⁸ Iselala ata kebiae vaveve keu ke nahate. Abu mesia malei vaki mole mahoi Dilava hoesehavoi vaki mole ima. Katealemo abu huhulahi loui avoe, “Noeau Dilavaluvuta igaetolahalau.” ¹⁹ Di louale keu koseanu. Ata degomoleau lovi malei loboe dilava hoesehavomale ke ihuu uoholinu. ²⁰ Kosealemo keau lovi malei mahoi Dilava seleve hoesehavoholima. Isito lovi malei loboe dilava hoesegevemale keau kemo munanae toela ke hoesegevema. Katealemo di isiviholiale la munanae toela hoesegevemale kebiahi igaetolalahi. ²¹ La vani mole Kosive kabumo aleto isi vani mole ataeau loboe dilavata munanaeabe toelata hoesegevemale kebia kabumo e ige keu anekianu. Isi la vani mole Kosive batabatamo aleto isi vani mole munanae toela batabatamo lovi ige keu anekianu. ²² La vaveve kateale vage Kosivena itumuai. La huhuige la vaveve katealena Kosive nego evihai. Ba, keu anekianu.

²³ Isito la degomoleau loui kosea, “Noeabuna no isivi unaha vai.” La kateai louito di kemo loui kosea, “Vaveve bahata keau duave seleve holioholilu.” La tota loui kosea, “Noeabuna no isivi unaha vai.” Isito mesoho vaveve keu bae la tedeavelivebene. ²⁴ Atabeu bae au ebika unaha huhualivebene. Isito ata degomole huhuevei kebia tedeave dua vai.

²⁵ Mesia malei maketiemale kebiama mesiae ibina vai ke ige duave. Lainaho mesia ke huhuai deiadaveho belagevei loui kosea, “Mesia kona loboe dilava hoesegevemale kevenike au lohonu. Emena.” ²⁶ Kosealemo Bukae Hotou loui avoe, “Vatae uale onobenobe bahata keau Kosive onobenobe.”

²⁷ Mesoho evieviholimale atau laheho louge la ke oe deiai tige keu lovi vadeu hamai laovege ke ive. Lainaho lovi ke huhuai deiadaveho belahalive. ²⁸ Isito mesoho la moleu loui kosea, “Loboe dilava hoesehavoale loviliko.” Kateige lainaho lovi ke igelive. Kosealemo la ke ige la degomole abuna ke elehai kemo abu ebika aiogevai. ²⁹ La degomoleau hilokage lovi ke iale keu toela holioholinu. Isito la degomoleau ke hilokaholilu. Katealemo lainaho lovi ke igelive.

Mesoho la degomoleau di hoto kemo loui kosea, “Dilavau onobenobe bahata vale kemo noeabuna lovi bahata isi. Vadealemoike noeabuna ata degomole huhuihuhui kemo lovi i halevai. ³⁰ Noeabuna lovi kemo Dilava hoesehavoi ke ige keta duave. Isito vadealemoike ata degomoleau noheho loui kosea, ‘La lovi ke iale keu toelanu.’”

³¹ Isito di laheho louge evive. La lovi isi e isi vaveve onole vamale kemo Dilava ivi ebagevai hoesehavove. Ige ataeabuna la vaveve elehai kemo Dilava hoesehavoi. ³² Lana vaveve dua kateale vage Diue ata mesoho evieviholimale ata mesoho Dilava ekalesia ata keabuna la vaveve elehai kemo dobuluvilivebene. ³³ Di vale ke nahate vave. Dau di vaveve duamo di ebika ebagemaholinu. Isito dana ata bahata huhuevei vaveve dua vai malevei ukolikolie humahamo otovege abuna tigei.

11

Keateau dubumo vaveve

¹ Di Iesu Keliso vaveve vai ehomamale ke nahate lata vai di ehovave. ² Di haokuvuia, di la vahaeho vanu. Kosealemo di hoto bahata loui la haivemale ke la huhulahai vama. ³ Isito di hoto ko igae louge kemo lulelelahave. Keliso kinaike Dilava. Keu ke valamo ui isivive vama. Iale ke nahate malaha kebia kinaike Keliso. Ige keate kebia kinaike malahaea. ⁴ Katealemo malaha oleu guligulihio mesoho Dilava hoto louluiho dubue uvue tai au saneka mai kina aneale keu kemo Keliso aiohavonu. ⁵ Isito keate oleu guligulihio mesoho Dilava hoto louluiho dubue uvue tai au kina bamuholiale keu au kolia aiohavonu. Evievi keateau abu kina bamuholisi dubue timale keau teibae keateau abu kina bohige kouale ke nahate. ⁶ Evievi keate oleuoleu abu kina bamuholimale keau abu kina bohige au kouage duave. Ige abu ke elehai matilahaliege abu kina bamui guligulihio tai. ⁷ Isito malaha keabuna dubue tiliege abu kina bamulivebene. Kosealemo Dilavau malaha vale keabuna valavemo ui hoesehavoi. Isito keate keabuna abu kina bamui. Kosealemo keabuna malahae valamo ui abuta Dilava hoesehavoi. ⁸ Dilavau keatemo malaha vaholinu. Isito keu malahamo keate vanu. ⁹ Keu keateho malaha vaholinu. Isito malahaho keate vanu. ¹⁰ Katealemo keate keabuna abu kina bamuge ataeabuna hilokage keau abu kolivu vuvune valamo umalea. Keau katelahage aneluiabuna ke elehai vahaeholahi. ¹¹ Kosiveu isiviholiale keateau malaha halevi abuhuvula uliho. Isi malahaeau keate halevi abuhuvula uliho. Isito keabuna molehi igaetolahi ui. ¹² Kosealemo onobenobe bahata keau Dilavamo loholu. Dilavau malahamo keate vanu. Ige keatemo malahaeau ua.

¹³ La huhuige keate keabuna dubue uvue Dilava hoesehavoi guligulihio abu kina bamuholige kena duave. Ba, keu toelanu. ¹⁴ La hilokage malahaeau abu kina halevage egeige abuna kemo matilahi. ¹⁵ Isito keateau abu kina halevage egeige duave. Kosealemo Dilavaike kina egete ovege au kinaeabe bamunu. ¹⁶ Mesoho atabena isiviai di hoto bokoige dana hoto koseale loui. No hoto ke igae loui ata haivema. Iale Dilava ekalesia keau vaveve ke igae vama.

Aleto iveve

¹⁷ Dana aike hoto mole loui bae kemo la hoesegevelivebene. Kosealemo ekalesiau mole bevuevei mole hoesegevege duave. Isito laeau kateholisito mole aiogevema. ¹⁸ La vaveve toela mole vale di evige keu koseanu. La igaetoai mole bevuevei hoto isivito hoto kemo moleho loui mole tasalievema. Di hoto ke evivi huhuige mesoho seleve. ¹⁹ La moleho loui mole tasalieveale kemo dana hilokage la oleteau vaveve seleve vama. Isege la oleteau vaveve lobo vama. ²⁰ Katealemo la mole bevuevei igaetolahi Kosiveu louale ke nahate aleto ioholima. ²¹ Isito la degomoleau lovi baluga e baluga malei lohoale dubue ima. Isege la degomoleau adala lohoalelua lovi ioholisi e ioholisi vaeta uma. La kemo lovi isi e isi mole oveholige keu toelanu. ²² La vadeuhoike la oe lovi ioholisi e ioholima. La kunaiholimale kebia nimo lovi baluga imale kemo Dilava ekalesia aiogevema. Katealemo la huhuige dana la hoesegevei laheho hotoe dua loui. Ba, di kemo bae la hoesegevelivebene. ²³⁻²⁴ Di subuta vaveve kateale loui la haiveholinu. Isito Kosive vaveve ke di loui la haivenu. Diudasiu nahie Kosive Iesuho haiale vavi kela Iesu valava mai hoesehavoi vakoai loui avoe, “Di misilike ko di laovema. Ke isi di huhulahave.” ²⁵ Ige esemuiabeau ke ige uoholige au kabu mai namigevei loui avoe, “E kou di tahoi ke ko. Iale di tahona lotige Dilavana di taho kemo laheho menakae dogava. La ko iliege di hatiale ke huhulahave.” ²⁶ Iesu hoto keu kateanu. Iale la valava ke isi e ke imale ke ataeabuna elehai Kosiveu hatiale ke hilokai. Ilage au lohoi.

²⁷ Katealemo ata oleu Iesu tahota vavata huhuige keu avuemo baluga holioholinu. Isi kateai au vaveve toela hovadamu aleto iniege tahoveta vavavetai ke au ke aiohavonu. ²⁸ Ialemo di isiviale la vasohuta la vaveve toela huhulahai louito bae valavata e keta isi. ²⁹ Valava keu Kosive vavae misi nahate. Ige kabu ke eu tahove nahate. Katealemo lana la toelata ke ige Dilavana la vaveve ke kaovai ibinave laoevi. ³⁰ Katealemoike la moagaeanu vavahanai negoholisi haluvima. ³¹ Isito nahiaabuna vasohuta nahie vaveve toela huhulahai louito ke ige Dilavau bae nahi aiogevelivebene. ³² Nahi nahie vaveve toela kaovai lougholige Dilavana nahie vaveve kaovai vatehani nahiovege nahiaabuna kemo lulelelahai. Katealemo nahi bae vatae atahi ibinae toela malivebene.

³³ Katealemo di haokuvuia, la Kosive aleto ilio valiege lainaho mole malevei iahtui ke ilive. Isito mole bevuevei igaetolahaito bae ke ive. ³⁴ La oe lovi ioholisito lohoi aleto iale keu toelanu. Isito la oe lovi isito bae lohoi igaetolahai aleto iale keu duave. Lana katelahage Dilavau bae vatehani laovelivebene. Isito dana bae gabie lae lohoi kemo hoto mole loui la haivei.

12

Munana Tumue vuvune vaveve

¹ Di haokuvua, Dilava Munanae Tumuu vuvune vaveve nahioveale kemo di hoto loui la haivege lulelehavave. ² La hilokage la subuta evievi ata holioholilu. Isi la loboe dilava hotoholimale kebia hoesegeve negolahai ehovei tima. ³ Katealemo di la namigevei. Atabeu bae Dilava Munana Tumue vuvunemo Iesuho hotoe toela loulivebene. Isito Munanae Tumuu avuemo uale kemo auna loui kosea, "Iesu keu di Kosive."

⁴ Vuvune vaveve nimoleteau ua. Isito Dilava Munanae Tumu ke igaeu vuvune vaveve nahioveama. ⁵ Kosive lovi vaveve kemo humaha moagau ua. Isito nahi lovive ke vai Kosive igaeike ke hoesehavoma. ⁶ Kosive lovi vaveve kebiama humaha moagau ua. Isito Dilava ke igaeu au vuvune nahiovege nahi lovive vama. ⁷ Ige Dilava Munanae Tumuike vuvune vaveve igaegaeai nahiovei isiviale nahi kemo mole negotievei. ⁸ Munanae Tumuu nahi degomole vuvunetievege abu kemo lulele hoto loui nahi haivema. Munanae Tumu ke igaeu nahi degomole vuvunetievege abu kemo Dilava hoto kaovai nahie haivema. ⁹ Munanae Tumu ke igaeu nahi degomole vuvunetievege abu kemo abu evievimo negolahama. Keu nahi degomole vuvunetievege abu vavahanite degomole hoesegevema. ¹⁰ Munanae Tumu ke igaeu degomole vuvunetievege abu vikoe vaveve vama. Ige degomoleau Dilava hoto loui ata haivema. Ige degomoleau Munanae Tumu ke vuvunemo hilokage vaveve oleteu seleve. Isege vaveve oleteu lobo. Munanae Tumu keu nahi degomole vuvunetievege abu hoto nimoletemo hoto louma. Ige nahi degomoleau hoto ke evisi Munanae Tumu ke vuvunemo hoto ke ekovehai ihuve louma. ¹¹ Iale Munanae Tumu ke igaeu au isivimo vuvune vaveve kateale nahiovege nahi ke vama.

Ada, velo isi vava degomole deida

¹² Nahie vavamo velou uge adau uge kinau ua. Isi keau bahata vava igaemo dalu. Ke nahate evievi ata nahiau moaga. Isito nahiau Kelisomo igae. ¹³ Mesoho nahi degomoleau Diue ata. Isege degomoleau Diue ata holioholilu. Isi mesoho degomoleau heiaata lovilahamale ataea. Isege nahi degomoleau nahie isivimo loviamale ataea. Isito nahi bahata Munanae Tumu ke igaemo babatisoale kemo vava igae holilu. Ige Munanae Tumu ke igaeu nahie uvumo ua.

¹⁴ Nahie vava kemo ada unahau uoholiholinu. Isito velou uge kinau uge nahie vavae onobenobe bahataeau ua. ¹⁵ Mesoho velona loui kosea, "Dau ada holioholisito dau velo unaha. Kemoike di isiviholinu vavae lovi valiho." Velou hoto kateai louale kemo au bae vavae lovi ke kabebihavoi au lovo halelivebene. ¹⁶ O mesoho golemana loui kosea, "Dau ni holioholisito dau golema unaha. Kemoike di isiviholinu vavae lovi valiho." Golemau hoto kateai louale kemo au bae vavae lovi ke kabebihavoi au lovo halelivebene. ¹⁷ Mesoho la vava bahata kena ni unaha holige lana oleve kateai hoto evisi. O mesoho la vava bahata kena golema unaha holige lana oleve kateai hagota sohota evisi. Keu anekianu. ¹⁸ Isito Dilavau ada velo kina vavae onobenobe bahata au isivimo vavamo vai otovenu. ¹⁹ Mesoho Dilavana nahie vavamo golema unaha vage la huhuige nahie vavana oleve kateai. ²⁰ Au kateholisito nahie vavamo ada velo golema kateale vai otovege keau bahata mole isivi vama.

²¹ Katealemo niu bae ada iomalivebene. Ige kinau bae velo iomalivebene. ²² Kosealemo vavae onobenobe moleu nahie nimo baluga holioholinu. Isito vavae onobenobe keu uoholige nahiabuna osoi. ²³ Katealemo nahie vava degomoleau balugaholimale kebia nahiabuna hoesegeve dua vai. Isime ogota atae nimo bamuevei. ²⁴ Nahie vava degomoleau balugamale kebia nahi hoesegevelivebene. Keabuna abu ahuvela ue dua vai. Isito nahie vava degomoleau baluga holioholimale kebia Dilavau hoesegevei otovege keabuna kemo ue dua vai. ²⁵ Katealemo nahie vavae onobenobe keau bae mole tasalivebene. Isito keabuna molehi igaetolahi mole hoesegevei. ²⁶ Mesoho la vava molena tumuige la vava bahata keabuna tumulahai. Isito la vava moleu dua vage la vava bahata keabuna kemo dua vai.

²⁷ Di vavae hoto louale keu koseanu. La bahataeau Keliso vava. Katealemoike la igaegae lovive vama. ²⁸ Dilavau au lovi igaegae ekalesia ovenu. Keu vasohuta abostolo otovenu. Kebia valamo beloveta otovenu. Kebia valamo Dilava hoto loui ata haivemale otovenu. Kebia valamo vikoe vaveve vamale otovenu. Kebia valamo vavahanite hoesegevemale otovenu. Kebia valamo mole hoesegevei tedaevemale otovenu. Kebia valamo ekalesia bahata igaetoevei nibievemale otovenu. Kebia valamo hoto nimoletemo hoto loumale otovenu. ²⁹ Dilavau au lovi igaegae ekalesia ovege keau bahata abostolo holioholilu. Keau bahata beloveta holioholilu. Keau bahata hoto loui ata haivemale ata holioholilu. Keau bahata vikoe vaveve vamale ata holioholilu. ³⁰ Keau bahata vavahanite hoesegevemale ata holioholilu. Keau bahata hoto nimoletemo hoto loumale ata holioholilu. Keau bahata

hoto nimoletemo hoto loumale kebia hoto ekovehai loumale ata holioholilu. ³¹ Katealemo Dilavau au vuvune vaveve dua laoveale ke huhulahai kemo negolahave. Isito di aike humaha mole dua loui la haivege ko huhulahave.

13

Mole hoesegevei isivi mole oveveve

¹ Moleho isivilahai mole tedaevemale keu baluga. Dana ata degomole hotomo hoto loui mesoho anelue hoto ketamo Dilava hoto loui luleleaito kemo ataho isiviholisi kebia tedaevéhohige di hoto keu bae ihualivebene. ² Dana gabie vaveve loui kemo luleleai Dilavau au vaveve mahogovale ke ihu loui ata haivei di evievimo negoai tana moleho louge au halei lotai moleve lamige keu duave. Isito dana kateaito ataho isiviholisi kebia tedaevéhohige di vaveve kemo ihuveu uoholinu. ³ Dana di kunai bahata malei kunaiholimale kebia oveale keu vaveve dua. O mesoho di Dilava hoto loui ata haivesege abu di mai mahoge di hatige keta duave. Isito dana kateaito ataho isiviholisi kebia tedaevéhohige di vaveve keu bae ihualivebene.

⁴ Ataho isivilahai kebia tedaevemale vaveve keu koseanu. Nahiabuna solekai itumuholisito mole hoesegevei mole isivi vagei. Vaveve kemo nahi bae mole maina mai isi nahie ebika tabagevelivebene. ⁵ Moleho isivilahai mole tedaevemale kemo nahi bae nahie isivimo mole aioegevei moleho itumualivebene. Vaveve kemo ata moleu nahi aioegeve nahi bae ke ibina vai aiohavolivebene. ⁶ Moleho isivilahai mole tedaevemale kemo nahi bae vaveve toelae vahaeho valivebene. Isito nahiabuna hoto seleve vahaeho vai. ⁷ Nahi moleho isivilahai mole tedaevemale kemo abu nahie aioegeve nahi ke huhu halevaito nahie evievimo negolahai ono vadeu gabie lohoveve ke huhulahai tigei.

⁸ Gabie vaveve hoto loui ata haivemale kena bae gabiai. Ige abu hoto nimoletemo hoto loumale kena bae gabiai. Nahi vatae vavevemo lulelelahamale kena bae gabiai. Isito nahi moleho isivilahai mole tedaevemale keu bae uoholilivebene. ⁹ Nahie lulele keu aike esevehame. Ige nahi nova gabie vaveve ke loui hilokamale keta eseve. ¹⁰ Isito vanie gabila nahiabuna gabie vaveve ke bahata hilokai avuemo lulele balugai.

¹¹ Di esebuluta usege di huhuihuhui di hoto keu esebulue huhuihuhui esebulue hoto. Isito di aike kosi baluga holiiale kemo esebulue vaveve ke bahata di halenu. ¹² Nahi aike Dilava elehaholisito vaveveve ke unaha hilokalu. Isito nahiabuna gabie nahie nitela Dilava elehai vaveveve kemo lulelelahai. Di aike luleleamale keu esevehame. Isito Dilavau aike di vaveve bahata hilokamale ke nahate dana gabie Dilava vaveve bahata hilokai lulele balugai. ¹³ Nahi aike vaveve abuaita igaetamo uma. Vaveve moleike nahie evievi. Vaveve moleike nahi ono vadeu vanie gabimo lohoveve huhulahamale. Isi vaveve moleike nahi moleho isivilahai mole tedaevemale. Isito vaveve abuaita igaeta kebiamo moleho isivilahai mole tedaevemale keu balugataho.

14

Munana Tumue vaveve degomole

¹ Katealemo moleho isivilahai mole tedaevemale kemo negolahave. Isi Dilava vuvune vaveve kebiata huhulahai kebiamo negolahave. Isito di isivi balugale Dilava hotoe dua loui ata haivei kemo negolahave. ² Ata moleu hoto nimoletemo guluguliai hoto louale keu ataho louholisito Dilavahoi ke louma. Kosealemo ataeau hotove ke hilokaholilu. Isito Munana Tumue vuvunemoike au Dilavau au vaveve mahogovale ke louma. ³ Ata oleu Dilava hoto loui ata haivemale kena kemo ekalesia tedaevei hoesegevege abuna kemo negolahai ue dua vagei. ⁴ Ata oleu hoto nimoletemo hoto loumale keu hoto kemo au ebika unaha tedahoma. Isito ata oleu Dilava hoto loui ata haivemale keu ekalesia bahata tedaevei hoesegevema.

⁵ La bahata hoto nimoletemo hoto louge keu duave. Isito di isiviale la bahata Dilava hoto loui ata haivegei. Kosealemo ata moleu Dilava hoto loui ata haivemale keu baluga. Keu ata moleu hoto nimoletemo loumale ke evihanu. Isito mesoho hoto nimoletemo loumale ata kena hoto ke ekovehai loui ekalesia bahata haivege keu duave. Ekalesia bahata keabuna kemo lulelelahai. ⁶ Di haokuvuia, dana lae lohoniege hoto nimoletemo loui la haivege lana oleve kateai di hoto ke hilokai. Keu anekianu. Isito dana lae lohohi la hotomo Dilava hoto loui lulele hoto loui la haivege lana hoto ke hilokai kemo lulelelahave.

⁷ Ke nahate ata oleu gita mesoho bibo hamae dua vage kemo ataeabuna ke evisi eneve hilokai. Isito kena neniai ke hamahohige ataeabuna oleve kateai eneve ke hilokai. ⁸ Mesoho kibi uvumale ata kena kibi uvui neniai eneve vahohige tualai ataeabuna oleve kateai eneve evisi mole bevuevei tualilahai. ⁹ Iale ke nahate la hoto nimoletemo loui neniai ata haivehohige keabuna oleve kateai la hoto evisi kemo lulelelahai. Lana kateige la

hoto ke ihuna uoholisi. ¹⁰ Vata komo hoto nimolete moagaeau ua. Ige hoto nimolete kebia biaeau abu hoto ke hilokalu. ¹¹ Isito di ata mole hoto hilokaholiale kemo au daho louge dana kemo dolodoloi. Isi dana data di hotomo louge ata kena avuta kemo dolodoloi. ¹² La la ebika naha huhuevei isiviale Munana Tumue vuvune vaveve kebiamo negolahai. Keta duave. Isito di isiviale la kebiamo negolahai ekalesia bahata tedaevei hoesegevege abu negolahai.

¹³ Katealemo ata oleu hoto nimoletemo loulale kena Dilava imihage Dilavana vuvune omige auna hoto ke ekovehai ihuve loui. ¹⁴ Dana hoto nimoletemo Dilava imihai guliguligali di uvuna avuemo ui. Isito di huhuihuhuina kemo uoholige di bae kemo lulelelivebene. ¹⁵ Katealemo dana vadeai. Dana di uvuta di huhuihuhuitamo guliguligali Dilava imihai. Isi di uvuta di huhuihuhuitamo nogoli loui Dilava hoesehavo. ¹⁶ Lana la uvu unahata guliguligali Dilava hoesehavo Dilava vavevemo luleleholiale kena oleve kateai la guliguli ke evisi luleleai loui kosea, "Hoto keu seleve." Keu anekianu. Kosealemo la hoto nimoletemo guliguligali ata keu ke evisi kemo dolodoloanu. ¹⁷ Mesoho lana katelahai hoto molemo guliguligali Dilava hoesehavo dua vai. Isito ata molena oleve kateai la guliguli ke hilokai kemo luleleai.

¹⁸ Dilavau vuvune daomale kemo di hoto nimolete moagamo hoto loui la bahata evigevu. ¹⁹ Isito dubue guligulimo dana hotoebemo hoto moaga vesite loui ata haivege abu kemo luleleage keu duave. Isito dana hoto nimoletemo hoto moagamoaga loui ata haivege keau kemo dolodoloage keu toelanu.

²⁰ Di haokuvuia, lainaho esee se huhuihuhui nahate valive. Isito esee seau vaveve toelamo negoholimale ke nahate vave. Isi la huhuihuhui kemo kosie huhuihuhui nahate vave. ²¹ Bukae Hotou loui avoe,

"Kosiveu loui avoe,

'Dana hoto nimolete loulale ata hanavege abuna tiliege di hoto loui di ata haivei.

Dana hoto nimolete loulale kebia hanavege abuna tiliege di hoto loui di ata namigevei. Isito abu bae ke evilivebene.'"

²² Bukae Hotou louale ke ihuu koseanu. Ekalesiau hoto nimoletemo guliguligali isiviale evieviholimale keabuna ke evisi loui kosea, "Dilava vuvunemoike abu ke vama." Isito abu Dilava hoto loui isiviale evievi ataeau ke evisi hoto kemo negolahai.

²³ Katealemo ekalesia bahataebuna mole bevuevei igaetolahai hoto nimoletemo loui guliguligali luleleholimale isime evieviholimale ata keabuna dubue uvue loholiege hoto ke evisi loui kosea, "Tilogo ataeabulike." ²⁴ Isito ekalesiau Dilava hoto loui mole haivesege evieviholimale mesoho luleleholimale keabuna loholiege hoto ke evisi loui kosea, "La hoto kateale louge no ke evisi hilokage noeau vaveve tola vama ataea." ²⁵ Ige hoto kemo abu abu uvumo huhuai mahogovamale kena dailahai. Ige keabuna vaveve tola ke halevai abu kome bokolahai Dilava hoesehavo loui kosea, "Seleveta Dilavau lahehi uma."

Oleve kateai dubumo guliguliveve deiada

²⁶ Di haokuvuia, di hoto louale keu koseanu. La igaetoi guliguligali ata molena nogoli loui ata haivei. Ige ata molena Bukae Hotomo loui ata haivei. Ige ata molena Dilavaemo hoto male ke loui. Ige ata molena hoto nimoletemo hoto loui. Ige ata molena hoto nimolete ke ekovehai ihuve loui. Isito vaveve ke bahatamo ekalesia tedaevei hoesegeveve. ²⁷ Mesoho ata degomoleau isiviale hoto nimoletemo hoto loulilo valiege ata abuita mesoho abuita igaetaeau hoto ke loui. Isito keau mole nenita hoto loulivebene. Isito molena hovelahai hoto louge molena hoto ke ekovehai ihuve loui ata haivei. Ige molena hovelahai hoto loui. ²⁸ Isito hoto ekovehai ihuve loulale atau uoholige hoto nimoletemo loulale keau bae hoto loulivebene. Isito keabuna tobekai ui abu uvumo Dilava huhulahi ke imihai. ²⁹ Ige Dilava hoto loui ata haivemale ata abuita mesoho abuita igaeta keabuna Dilava hoto loui ekalesia haivei. Keau katelahage ekalesia keabuna hoto ke evisi abu ebikaho huhulahi. ³⁰ Ige mesoho Dilava hotou ekalesia mole uvumo doba seleveage Dilava hoto loulale keabuna hoto halevai. Ige ata kena hovelahai Dilava hoto ke loui. ³¹ La igaegaai Dilava hoto loui mole haivege ekalesia bahataebuna kemo lulelelahai negolahai. ³² Dilava hoto loulale ata keau bae bahata mole nenita hoto loulivebene. Isito keabuna mole hemevei igaegaai hoto loui ekalesia haivei. ³³ Kosealemo Dilavau isiviholiale la mole nenita hoto louge ekalesia ataeau evisi dolodolohaliho. Isito keu isiviale la mole hemevei igaegaai hoto louge elike ataeau evisi lulelelahai.

Dubu bahatamo ekalesia vaveve keu koseanu. ³⁴ Dubue guligulimo keateau bae sevesi mai hoto loui ata haivelivebene. Diue menaka keu subuta hoto kateale lounu. Avoe, "Keateau bae hoto loui malaha haivelivebene." ³⁵ Keate keau sevesimo hoto mole evisi

hilokaholilige abu lako dubumo hoto lougelive. Isito oe talive hoto kemo abu kolivu belageve. Kosealemo keateau sevesimo hoto loui ata haivege keu toelanu.

³⁶ La huhulahai kosea, “Dilava hotou noemo umukanu.” Isi huhuai kosea, “Dilava hoto keu no unahae lohonu.” Kateike la vai keateau sevesi maveve kemo di hoto loualemo isiviholilu. ³⁷ Mesoho laemo atabeu huhuai loui kosea, “Dau Dilava hoto loumale ata. Dau Munana Tumue vuvune vaveve kemo negoanu.” Keu kateige di isiviale hoto mole ko louge au hilokai. Di laheho hisaliale kou di hoto holioholinu. Isito Kosive hotoike.

³⁸ Katealemo ata keu di hoto ko evioholige lainaho hotove evigelive.

³⁹ Di haokuvuia, di hoto mole louge evive. La uvu bahatamo negolahi Dilava hoto lougeve. Isi hoto nimoletemo hoto loumale kebia humaha lainaho bamugelive. ⁴⁰ Vani bahata la guligulimo vaveve dua unaha vai mole hoesegeve tigeve.

15

Iesuu hatisi hovelahale deiada

¹ Di haokuvuia, di subuta lae tiale hotoe dua loui la haivege la hoto ke evisi malu. Isi aike kemo negolahi uma. Katealemo di isiviai tota hotoe dua loui la haivei. ² Di hoto ke loui la haiveale ke matahae dua vave. Lana hoto ke matahae dua vage Dilavana la maleve. Ke matahae dua vaholige Dilavau bae la malevelivebene.

³ Keliso hotoe dua di mai lae tiale la haiveale keu koseanu. Bukae Hotou louale ke nahate Kelisou nahie toelae ibinaho hatinu. ⁴ Au hatige Bukae Hotou louale ke nahate abu mai abavuge vani abuita igaeta uoholisege au hovelahanu. ⁵ Hovelahai tiale au ebika mai Bita haivuito vani molela bae au ebika mai abostolo tuelo (12) kebia haivege abu elehalu. ⁶ Ige vani mole evievi ata vai handele (500) keau igaetoai usege Kelisou tiale au ebika mai haivege abu elehalu. Evievi ata kebiamo degomoleau haluvilu. Isege degomoleau ua. ⁷ Ige vani mole au tialeu au ebika mai Diemisi haivui au esemu bahata haivege abu elehalu.

⁸ Ige Kelisou gabila au ebika mai di haivuge di ke elehanu. Evievi ata keau vasohuta Keliso elehalu. Isege di gabila ke elehai abostolove ata holinu. ⁹ Isito dau abostolo ata kebiamo baluga holioholinu. Di isiviholiale keau daho loui kosea, “Abostolo ata.” Kosealemo di subuta Dilava ekalesia aiogeve vatehani ovema. ¹⁰ Isito Dilavau daho uvuai di ebagemage di abostolove holinu. Keu daho uvuai di ebagemage di u unahamale holioholinu. Isito Dilava lovimo di negoai abostolove degomoleau evigevunu. Di isivimo di lovi ke vaholima. Isito Dilavau daho uvuai di tedahoge di lovive ke vama. ¹¹ Di hoto loui la haivema. Isege abostolo degomole keau hoto loui la haivema. Hoto ke igaeike no loui la haivemale ke la evisi malu.

Haluvimale keabuna oleve kateai hoveveve.

¹² No hotoe dua loui ata haivei loui kosea, “Keliso keu hatihatimo hovelahanu.” Isito la degomoleau loui kosea, “Haluvimale keabuna oleve kateai hoveveve.” ¹³ La hoto ke louale keu selevevatege Keliso keu hatihatimo hovelahaholinu. ¹⁴ Keliso keu hatihatimo hovelahaholivatege no hotove loui ata haivemale ke ihuu uoholinu. Ige la evievi ke ihuta uoholinu. ¹⁵ Di kemo hoto mole louge evive. No la haivei loui kosea, “Dilava hatihatimo Keliso etuvage keu hovelahanu.” Isito la degomoleau loui kosea, “Haluvimale keau bae hovevevebene.” La hoto ke louale keu selevevatege no hoto loui la haivemale keu loboe hoto. ¹⁶ Kosealemo haluvimale keu hoveveveholivatege Dilavau Keliso etuvage hovelahaholinu. ¹⁷ Isime Dilavau Keliso etuvage hovelahaholivatege la evievi ke ihuu uoholinu. Ige la toela keu sohu laemo ua. ¹⁸ La hoto ke louale keu selevevatege evievimo haluvimale keu haluvisi uoholilu. ¹⁹ Nahi nahie evievi Kelisomo mavoi ehue tiveve keu uoholivatege evieviholimale keau nahi elegeve loui kosea, “Ata kebia nohovu. Keau loboe hoto ke evisi ehovamale.”

²⁰ Isito hoto seleve keu koseanu. Dilavau hatihatimo Keliso etuvage hovelahanu. Kelisou hovelahale kemo nahi hilokage novae uveve ke unahau uoholiholinu. Isito nahiabuna hoveveve ukolikoli malei. ²¹ Hatihati keu ata igaemo lohonu. Ke nahate hatihatimo hovelahamale keu ata igaemo lohonu. ²² Nahi bahataeau Adamo lolohu. Isi Adamu vaveve toela vale kemo nahiabuna bahata haluvigei. Isito nahi Kelisoluvuta igaetolahale kemo nahiabuna bahata hatihatimo hoveveve. ²³ Hoveveveveve kemo Kelisou vasohuta nahiho hovelahanu. Ige ivivemo haluviale keabuna emo au lohomale kela bae abuta hoveveve. ²⁴ Vani kela Kelisona au vuvunemo vuvunete bahata aiovevege abuna uoholisi. Otogoe umale vatae umale kebia bahata evigevege keabuna vuvuneve valae ui. Ige Kelisona au vuvune mai au Mama Dilava omisi avuho loui kosea, “Di ata bahata nalievenela.” ²⁵ Kelisona kebia nalievelage Dilavana aiohavomale kebia bahata aiovevege vuvuneveabuna uoholisi. ²⁶ Dilava aiohavomale kebia vuvunetana

uoholige hatihati ke vuvunetana uoholisi. ²⁷ Bukae Hotou louale keu kateanu. Avoe, “Auna vuvunete bahata evigevēi.” Isito nahi kemo hilokage au bae Dilava evihalivebene. Kosealemo Dilava keike vuvune bahata malei Keliso ominu. ²⁸ Dilavau vuvune bahata malei Keliso omige auna Dilava aiahavomale kebia bahata aiogevēge uoholige auna au vuvune bahata malei Dilava omige auna au vuvune igaemo au ata bahata nalivei.

²⁹ La degomoleau loui kosea, “Haluviale keau bae hovelevelivebene.” Isito oleve katealemoike la haluviale kebiaho babatisolahama. Kosealemo nahi hilokage haluviale keabuna bae hoveveve. ³⁰ Haluvimale keau hoveveveholige vadeuhoike no vani bahata vatehani malema. ³¹ Di haokuvuia, vani bahata hatihatie vaveveu daemo lohoma. Nahiau nahie Kosive Iesu Kelisoluvuta igaetolahamale kemo di la vahaeho vai hoto kateale loui la namigevema. ³² Di kove ui Dilava lovi vasege Evesasi atae toelaeau ovo aihanite nahate vai di aiahavoma. Isito haluvimale keau hoveveveholige vadeuhoike di ata kebiamo vatehani malema. Haluvimale keau hoveveveholige nahi nahie isivi unaha vai lovi isi e isi u unahai. Nahi katealahaito vani mole haluvisi uoholisi.

³³ Ata degomoleau hoto kateale loui la lobogevema. Isito lainaho hoto ke evilive. Lana hoto ke evisi ehoveliege la vaveve dua halevai vaveveabe toela nahate vave. ³⁴ Iale la vaveve toela halevai huhue dua vai vaveve inutulotolote vave. La degomoleau Dilava humaha hilokaholilu. Di ke loui la mati vanu.

Haluvimale keabuna hoveveve vava oleteale mai.

³⁵ Mesoho la molena di belahai loui kosea, “Haluvimale keabuna oleve kateai hoveveve. Abuna hoveveve vava oleteale mai.” ³⁶ Dolodolo halevave. Lana lovie i mai vatamo hage visovena ulisi baie doga mamosege ivena sakavai uoholisi. ³⁷ Lana kone i mesoho i degomole haliege la bae mesoho avata ive ke bahata malei halivebene. Isito lana ive ke unaha hage auna ulisi. ³⁸ Dilavau au isivimo i igaegae oleve kateai uliveve kebia ovealemo keabuna abu vaveve kemo igaegaeai ulisi.

³⁹ Ke nahate onobenobeu vatamo umale keau vava igae holioholilu. Atae vava keu mole. Ige ovoe vava keu mole. Ige ugue vava keu mole. Ige huenae vava keu mole.

⁴⁰ Ke nahate otogoe onobenobe isi vatae onobenobe keau mole nahate holioholilu. Otogoe ataga otogoe elehilehi keu mole. Ige vatae elehilehi keu mole. Keau mole nahate holioholilu. ⁴¹ Vani ke elehilehiu mole. Ige bata ke elehilehiu mole. Ige didi ke elehilehiu mole. Ige didi kebiamo elehilehiabe keau nimolete.

⁴² Iale ke nahate haluvimale keabuna hoveveve vavae doga malei. Halege vavaeabe malei abavuge abu sakavai. Isito keau vavae sakavamo bae hovelevelivebene. Keabuna hoveveve vavae doga malei. ⁴³ Ataeabuna haluvige vavaeabe elehilehi kena toelage negoabena abumu uoholisi. Isito abuna gabie hovevevege vavaeabe elehilehi kena negoai duaveai. ⁴⁴ Haluvimale kebia vavau vatae vava. Isito keabuna hoveveve otogoe vava malei. Nahi hilokage vatae vavau ua. Ige kemoike nahi hilokage otogoe vavau ua. ⁴⁵ Bukae Hotou loui avoe, “Dilavau subuta Adamu vage keu vatae ata holisi ua.” Isito vani mole Dilavau Keliso hanavoge au otogomo lohonu. Ige kemo ataeau uveve doga malelu. ⁴⁶ Nahi nova otogoe vava maleholisito nova vatae vava malelu. Isito nahiaabuna bae gabie otogoe vava malei. ⁴⁷ Dilavau subuta vatamo Adamu vanu. Isito gabie Kelisou lohoale keu otogomo lohonu. ⁴⁸ Adamu vatamo lohoale kemo ataeau vatae vava malelu. Isito Kelisou otogomo lohoale kemo atave keabuna otogoe vava malei. ⁴⁹ Nahiau Adamumu vatae vava malelu. Isito gabie otogomo lohoale Keliso ke vava nahate nahiaabuna malei.

⁵⁰ Di haokuvuia, di louale keu koseanu. Vatae vavata nahi bae Dilava otogoe matama keve talivebene. Vatae vava kena vatamo sakavai ui. Katealemoike nahi bae vatae vavata otogoe talivebene.

⁵¹ Dilavau hoto mole mai mahogovale ke dana aike louge evive. Nahi degomoleabuna haluvisege degomoleabuna usege Iesuna lohoge nahi bahataeabuna vavae toela halevai vavae doga malei. ⁵² Vanie gabila kibi hotoige solekavesite nie vaga hamale ke nahate haluvimale keabuna hoveveve vavae doga malei. Ige nita umale kebiaatae abuna vavae doga malei. ⁵³ Vani kela nahiaabuna vatae vava halevai vavae doga malei. Nahiaabuna haluvimale vavae toela halevai vavae doga malei kemo vani bahata ugei. ⁵⁴ Vani kela nahiaabuna vatae vava haluvimale ke halevai vavae doga malei vani bahata ugei. Ige nahie vaveve kena Bukae Hoto mai selevetisi. Hoto keu loui avoe, “Kelisou hatihatie vuvune ke aiahavoge ukolikolie vuvune keu negoai hatihatie vuvune ke evihanu.”

⁵⁵ Bukae Hotou tota kemo loui avoe,

“Hatihati, a vuvuneike oleve ke.

Hatihati, a negoike oleve ke.”

⁵⁶ Nahi hilokage vaveve toelamoike hatihati keu vuvuneanu. Ige menaka kemoike vaveve toela keu negoanu. ⁵⁷ Isito nahie Kosive Iesu Keliso ke vuvunemo Dilavau nahi

hoesegevege nahi vaveve toelata hatihatitamo negolahalu. Kemo nahi vahaehoai Dilava ivi hoesehavoge.

⁵⁸ Di uvue haokuvuia, lainaho hoahoalive. Isito negolahai lavive. Vani bahata Kosive lovimo negolahai lovie dua vageve. Kosealemo la hilokage la Kosive lovi vamale keu lovi unaha holioholinu. Isito la vamale ke ihuu ua.

16

Obelenimo Dilava ata tedaeveveve

¹ Di aike obelenie hoto louge evive. Di Galesia ekalesia namigeveale ke nahate vai Dilava ataeau Diudiae umale kebia tedaeveve. ² Bula bahata la ibina malemale ke badi mole malei obeleniho otovege au ui. Ige di bae lohoniege moni maleveve hoto loulivebene. ³ Isito dana bae lohoi la ata oletebia tabageveale kebia deiada loui levalevamo hisialiai mai ovege abuna monita levaleva keta malei tai Dielusalema ata kebia ovei. ⁴ Di hilokaholinu. Mesoho di tige abu isivialege bae daluvuta tai.

⁵ Isito dana vasohuta Masedonia vatae taito bae hoilahai la elegevei. ⁶ Dana lae lohoniege mesoho vaganamo lahehi uniege vaeahamo tota oai tiho vage lana di tedahoge dana tota oai o moleve tai. ⁷ Di isiviholinu lae deiiai lohoi vanie ni moaga vesitahame lahehi uliho. Isito Kosiveu humaha alavoge di isiviale vani moaga lahehi ui.

⁸ Di aike oai talivebene. Isito dana Evesasi o kove uniege Diue vahaeho vani Bentikosi keu uoholisege dana halei oai tai. ⁹ O kove Kosiveu au lovie udaha dahoga alavoge dana kove uniege Kosive lovi ke baluga vai. Di aiohavomale ata moagaeau kove ua. Isito dana kove ui lovi ke vaito bae tai. ¹⁰ Isito mesoho Timotiu gabie lae lohoge ke hoesehavoi mai o hatuve. No keti Kosive lovi vama. ¹¹ Lainaho ke elehai huhulahai kosea, "Kou kosi holioholinu." Isito ke hoesehavoi tedahoge auna vahaehota hoilahai dae lohoi. Ige no evievi ata degomolehi ke elehai vahaeholahai. ¹² Dana aike nahie haoka Abolosi kemo hoto louge evive. Di isivi balugale Abolosi keu evievi ata degomole holoovei lae deiiai tai. Isito keu ke huhuai isiviholinu aike lae taliho. Isito vani molela auna bae lohoi.

Bolo hotoe gabi

¹³ La ebika nenigeveve. La evievimo negolahai lavive. Lainaho vabulahalive. Isito hovevevei negolahai lavie tumu vave. ¹⁴ La vaveve bahata vamale kemo moleho isivilahai mole tedaeveve.

¹⁵ La hilokage di Giliki vatae tiale ata haivege Sitevanasiu ovemo umale ata kebiahi vasohuta di hoto ke evisi evievi ata holilu. Ige gabie ata degomoleau vata keve evievi ata holige Sitevanasiu au oe ata kebiahi Dilava ata kebia tedaevei hoesegevema. ¹⁶ Di haokuvuia, di isivialeike la ata kebia vaveve nahate vai tedaevegei. Isi ata degomoleau ata kebia nahate vai Dilava lovi vamale kebiata tedaevegei.

¹⁷ La keve usege Sitevanasi, Votunaitasi, Akaikasi ata keau la lovo mai lohoale la vaveve loui di haivuge di ke evisi vahaehoanu. ¹⁸ Keau la vaveve loui di mai vahaehotilu. Isi keabuna hoidevei abuta di vaveve loui la malevei vahaehotievei. Katealemoike ata katealebia hoesegevei iviabe tabageveve.

¹⁹ Esia vatamo umale ekalesia keau laheho vahaeho hoto ko hanavolu. Ige Akuilau abu mahina Bisilati laheho vahaeho hoto ko hanavolu. Ige ekalesiau oabemo igaetolahai guligulilahamale kebiata laheho vahaeho hoto ko hanavolu. ²⁰ Ige evievi ataeau kove umale keau bahata laheho vahaeho hoto ko hanavolu. La mole elegeveleige mole vahaeho vai mole ada hatueveve.

²¹ Bolo daliko aike di adata vahaehoe hoto ko hisialiai laheho hanavonu.

²² Ata olena nahie Kosive keho isiviholige Dilavana ke aiohavoi. Kosive, no isiviale solekai loho. ²³ Di isiviale nahie Kosive Iesu keu vani bahata la huhuevei la hoesegevegei.

²⁴ Di hotoe gabilike ko. Iesu Keliso kemo di uvu bahatau laemo ua.

2 Koliniti

Bolou Dilava hoesehavoale deiada

¹ Di ivilike Bolo. Dilava isivimoike di Iesu Keliso abostolo holisi nahie haoka Timotiti levaleva ko laheho hanavoma. Ekalesiau Koliniti oe umale isime Dilava ataeau Giliki vatae umale la kebia bahataho no ko hisaliai hanavoma. ² No isivialeike nahie Mama Dilava isi nahie Kosive Iesu Keliso keau la huhuevei la hoesegevege lana ue dua vave.

³ Nahie Kosive Iesu Keliso ke Mamau nahiho uvuima. Dilava keike vani bahata nahie tedaevema. Keu katealemo nahi vani bahata ivive ebagevai hoesehavoagei. ⁴ Nahi vatehani malege Dilava keu nahie tedaevie isiviale ata degomoleau vatehani malege Dilavau nahie tedaevemale ke vuvunemo elike nahi kebia tedaeviegei. ⁵ Kelisou vatehani moaga maleale ke nahate nahita vatehani malema. Isito vatehani kemo Kelisou nahie negotievege nahi ue dua vama. ⁶ Kelisou vatehani maleale ke nahate no vatehani malema. Ige Kelisou au vuvunemo no tedaeviege no vatehani kemo negolahai uma. No isivialeike la no vaveve ke elehai la vatehani maleale kemo kabebi halevaito kemo negolahai uge Dilavana la malevei. ⁷ No huhuige la vatehani malemale kemo la bae dobuluvilivebene. No hilokage no vatehani malege Kelisou no tedaevemale ke nahate la vatehani malege auna la tedaevie.

⁸ No haokuvuia, no isiviai la namigevege hilokave. No Esia vata keve vatetumu baluga malelu. Vatehani isuteu noemo lohoge no huhuige noeabuna oleve katelahai ui. ⁹ No huhulahai kosea, "Vatehani kena no aioegevege noeabuna haluvisi." Isito vatehani keu noemo lohoge Dilavau isiviale no no nego huhulahaholisito negove huhulahai kosea, "Keu haluvimale kebia tatuvemale ke vuvunemo auna no tedaevie." ¹⁰ Katealemo Dilavau no tedaeviege no vatehani kemo haluviholisito uma. No uvu mai Dilava omisi kemo hilokage auna vani bahata no tedaeviegei. ¹¹ Katealemo lata no tedaevie noheho guligulilahageve. Lana vani bahata katelahai guligulilahage Dilavana la hoto evisi no tedaevie. Ige noeabuna negolahai lovilahage ata moagaeabuna vahaeholahai Dilava hoesehavo.

Osihoike Bolou matama degomoleve deiati tiholinu.

¹² No haokuvuia, no vahaeholahalu. No hilokage no vatae vaveve vaholisito vaveve dua unaha vage la ke elehalu. No la lobogevege atae lulelelo la haiveholilu. Isito Dilavau no huhuevei no hoesegeveale kemo no Dilava hoto loui la haivelu. ¹³ No dolodoloe hoto laheho hanavoholilu. Isito no laheho hisaliai isiviale la ke dodavei ke bahatamo lulelelahai. ¹⁴ La aike no vaveve bahata hilokaholilu. Isito di isiviale nahie Kosive Iesu ke vaniu lohoge lana no vaveve bahata hilokai no vahaeho vave. Ige noeabuna vani kela la vahaeho vai.

¹⁵ Di hilokage vaveve keabuna kateai. Katealemo di subuta lae tiveve ke huhuai isivialeike deiati ti abuai. Ige elike la kemo negolahai ue dua vai. ¹⁶ Di huhuige dana vasohuta lae tai la elegeveito bae Masedonia vatae tai. Iniege tota hollahai lohohi la elegevege lana di tedahoge dana Diudia vatae tai. ¹⁷ Di lae tiveve ke huhuale vaholige la degomoleau loui kosea, "Loboe ataike." La huhuige di isivie huhuihuhuilike di vaimo la lobogevenu. Vani mole dana loui kosea, "Ito, dana bae lohohi." Isi vani mole dana loui kosea, "Ba, di bae lohohivebene." ¹⁸ Dilava keu seleve. Ige di hoto keta seleve. Di hoto bahata keu dolodoloe hoto holiolohinu. ¹⁹ Dilava mo Iesu Keliso ke hotoike Sailasi, Timoti, da noeau loui la haivelu. Iesu Keliso hoto keu dolodoloe hoto holiolohinu. Isito hotove keu seleve. Au louale ke auna vai. ²⁰ Dilavau au hoto mai mamoa ke Iesuna hoto ke bahata mai selevetisi. Kemoike nahi Dilava ivi hoesehavo guligulilai loui kosea, "Iesu Keliso kemo hoto keu seleve." ²¹⁻²² Dilava keike au vuvunemo nahi malevei hoesegevege nahi Kelisoluvuta igaetolahai negolahama. Keu nahi tabagevevi au Munanae Tumu mai nahie uvumo otoveale kemo nahi hilokage nahiau Dilava ataea. Isi kemo nahi hilokage au nahiho otoveale ke bahata nahiabuna malei.

²³ Dilavau hilokage di subuta lae lohohiale keu koseanu. La vaveve toela degomoleau uike vage di isiviholinu lae tai hoto isute loui la aiogeveliho. ²⁴ Di isiviholinu la evievi aiohavo hoto louge la di isivi unaha valiho. Isito di isiviai laemo lovie dua vage kemo vahaeholahave.

2

¹ Di subuta lae lohohi hoto isute laheho louge la kemo uvulahalu. Di aike ke huhuai isiviholinu tota lae lohohi hoto isute louliho. ² Dana lae lohohi hoto isute ke loui la aioegevege lana kemo uvulahage olenae bae di mai vahaehotisi. ³ Katealemo di subuta levaleva mole

hisaliai laheho hanavonu. Di subuta lae lohoaleu hoto isute loui la haivege la kemo uvulalahai di vahaeho vaholilu. Isito di isiviale la vaveve toela ke bahata halevage di lohoi elehai vahaehoige la bahata vahaeholahave. ⁴ Di levaleva ke hisaliai laheho hanavoge di uvuu kibianu. Di ninanataike ke hisalianu. Di isiviholinu la ke dodavei uvulalahaiho. Isito di isiviale la ke dodavei hilokage di uvu bahatau lae ua.

Mole vaveve toela momageveveve

⁵ La moleu subuta vaveve toela vale keu da igae aiohavoholisito la kebiata aiogevenu. Ige kemoike nahi bahata uvulalahalu. Isito di isiviholinu vaveve toela vale keho hoto tolote louliho. ⁶ Kosealemo la moagaeau avuho hoto tolote louge au vatehani malege elemua. ⁷ Lainaho au vaveve toela vale ke huhulalahive. Isito aike ke hoesehavoge au negoai. La kateholige kena uvu balugai au evievi halei. ⁸ Katealemo di isiviale la ke hoesehavoge auna hilokage la avuho isivi balugalu. ⁹ Di levaleva nehe ke hisialiale keu koseanu. Di isiviai la uvu kaovai hilokage di la haivemale kemo la di hoto evima. Emena evioholima. ¹⁰ Ata moleu laemo vaveve toela vage lana ibinave vaholisito halevage dana data la vale ke nahate vai. Ige mesoho ata moleu daemo vaveve toela vage dana Iesu Keliso vuvunemo ke huhuoholige lana di vale ke elehai lulelelahave. ¹¹ Isito nahiabuna vaveve toela ke loui hoesehavoholige Setenena vaveve toela kemo nahie aiogevei. Nahi hilokage Seteneu au huhuihuhui kemo isiviale nahi lobogevei nahie malevei.

¹² Di subuta Toloasi oe tialeu Kosiveu daho lovie humaha alavoge di Keliso hotoe dua loui ata haivege keau hoto ke evilu. ¹³ Di o keve Kosive lovi baluga vanu. Isito di haoka Taitasiu lohoholige di ke huhu baluganu. Kosealemo di la deiada eviliho ke hanavoge au lae tialeu tota hoilalahai lohoholinu. Kemoike di ata kebia halevei Masedonia vatae tinu.

Dilavau Vatae Kosive vuvunemo nahie malevenu.

¹⁴ Di aike Dilava ivi hoesehavoi vahaehoanu. Kosealemo Dilavau Vatae Kosive vuvunemo nahie malevege nahi Kelisoluvuta igaetolalahalu. Keu nahie malevei isiviale nahi matama bahatae tai Keliso hoto loui ata haivege abu kemo lulelelahai. Ige Keliso vaveveu abuemmo senisi hagote ke nahate vai. ¹⁵ Ige Dilavau nahie malevege nahi Keliso hoto loulmale keu evievi ataemo senisi hagote nahate. Isito evieviholialebiammo haghoholinu. ¹⁶ Evieviholimale keau ke evisi huhuige keu sohoe toela vanu. Isi kemo haluvima. Isito evievi ataeau ke evisi huhuige keu hagogee dua vanu. Isi kemo uveve dua malema. Iale nahi Dilava lovi kemo negoai. ¹⁷ Ata degomoleau Dilava lovi vai isiviale kemo ibina baluga malei. Isito noeau kateholima. Dilavau no hanavege no Dilava nimo Keliso hoto seleve loui ata haivema.

3

Laeau no levaleva nahate

¹ No hoto kateale louale kemo la huhuige noeau no ebika tabagevema. Ata degomoleau abu lovilahamale deiada loui abu ebika tabagevema. Isito noeau molemo kateholima. ² Kosealemo laeau no levaleva nahate. Ataeau levaleva dodavei kemo lulelelahale ke nahate ata bahataeau Keliso vaveve laemo elehai hilokage noeau laemo lovie dua valu. ³ Ataeau hilokage noeabulike vasohuta Keliso hoto ke loui la haivelu. Isito Keliso biageike au hoto ke la uvumo hisalianu. Keu benita muneee tavamo levaleva ke hisaliholinu. Isito Dilava Munana Tumue vuvunemo la uvumo hoto ke hisalianu.

⁴ Iale no laemo Keliso lovi vamale keu no negomoike no vaholisito Dilava negomoike no lovi ke vama. ⁵ No bae no ebika tabagevei koseale huhulalahivebene. No vuvunemoike no lovi ke vama. Isito noeabuna huhulalahai kosea, "Dilava vuvunemoike no lovive ke vama." ⁶ Dilava keike Kelisomo menakae dogaa mamoi no negotievege no menaka ke ehovai louma. Menaka keu Mosese menaka holioloholinu. Isito Munana Tumue menaka. Kosealemo Mosese menaka keu hatihatie hoto. Isito Munana Tumue hotoe dogaa keu ukolikolie hoto.

⁷ Subuta mole Dilavau au menakae hoto munemo hisaliai Mosese omige atagaveu Moseseom lohoge niveu ataganu. Ataga keu vani mole Mosese nimo uoholinu. Isito ataga keu usege Iselala ataeau ataga ke elehage niabemmo levokage abu elehavage keu anekianu. Mosese menakate kemo atagau ua. Isito menaka kemo ataeau bae ukolikoli malelivebene. ⁸ Iale Munana Tumue hotoe dogaa ataga keu Mosese menaka ke ataga evihai balugatahoanu. ⁹ Mosese menaka kemo atagau ua. Isito menakae dogaa kemo ataga balugatahou ua. Kosealemo Mosese menaka kemo ataeau Dilava nimo inutolotoloholilu. Isito menakae dogaa kemo ataeau Dilava nimo inutolotoloholalu. ¹⁰ Menakae dogaa atagate keu aike balugatahoai Mosese menakate ke ataga evihage keu uoholinu. ¹¹ Mosese menakate ataga keu vani moaga uoholioloholinu. Isito menakae dogaa atagate kena vani bahata ui tigei.

¹² Katealemo nahi vani bahata vabu halevaito negolahai hotoe doge ke loui ata haivegei. ¹³ Nahi Moseseu vale ke nahate va halevai. Moseseu Dilava atagau nivemo ualeu uoholimale ke ogota vavahai isiviholiale Iselala ataeau ke elehaloho. Iale nahi ke nahate va halevaito Dilava hoto loui ata haivei. ¹⁴ Subuta Iselala ata kebia huhuihuhui keu toloanu. Isime novae vani komo huhuihuhuiabe keta toloai ua. Keau Mosese menakae hoto ke dodaveito kemo luleleholilu. Kosealemo ata oleuleu Kelisoluvuta igaetolahaliege kebia unahaebuna hoto kemo lulelelahai. ¹⁵ Isito subuta vani kemo isi novae vani komo Iselala ataeau Mosese menakae hoto ke dodavege huhuihuhuiabe keu toloige abu kemo luleleholilu. ¹⁶ Isito olemeau hoidevei Kosive ehovaho valiege abu huhuihuhui tolo halevaliege keabuna hotovemo lulelelahai. ¹⁷ Kosive keike Munana Tumute. Ige Munanae Tumu keu ata ole uvue tige ata kena subuta huhuihuhui ke halei hotoe doge ke huhuai luleleai. ¹⁸ Katealemo nahi evalie vaveve nahate vai ataemo Kosive vaveve dua ke atagage Munanave Tumue vuvunemo atagave kena nahiemo uge nahiabuna avunahate vai ui tigei.

4

Vaveve dua vamalemo vatehani malema.

¹ Dilavau noheho uvuai au hoto louveve lovi ke noevege no ke kabebihavoholisito kemo negolahama. ² No matie vaveve halevalu. No isiviholilu ata lobogeveliho. No isiviholilu Dilava hoto ekovehai loboe hoto louliho. Isito no Dilava nimo hoto seleve loui ata haivege ata bahataeau ke evisi huhulahage hoto keu seleve. ³ No isiviholilu Dilava hoto mahogovaliho. Isito evieviholimale keau ke evige hoto keu abuemo hogolahale ke nahate. ⁴ Vatae Kosiveu evieviholimale kebia huhuihuhui bamuge keau isiviholilu Dilava hoto eviliho. Keu kebia bamuevege keau Keliso hotoe dua ke ataga elehaholilu. Keliso keu Dilavati mole nahate. Ige atagaeabe keu balugataho. Isito Seteneu ata bamuevege keau ataga ke elehaholilu. ⁵ Katealemo noeau no ebika tabagevei no hoto loui ata haiveholima. Isito Iesu Keliso hotoiho no loui ata haivei loui kosea, “Keu nahie Kosive. Ige noeau la esemu nahate holisi Iesu lovimo la tedeavema.” ⁶ Subuta mole Dilavau loui avoe, “Vavi kemo atagana bae lohoi.” Dilava keike louge Iesu Kelisou atagave mai lohoale nahie haivege nahi avuemo Dilava ataga elehai hilokalu.

⁷ Nahiau vaveve toela vamale ataea. Isito Dilavau au hotoe dua mai nahie uvumo mamoi isiviale ataeau atagave ke elehai hilokage atagave keu ataemo lohoholisito Dilava vuvune balugamo lohonu. ⁸ Vaveve isute moagau noemo lohoma. Isito vaveve keau nahie aiogevoholima. Vani degomole no dolodoloima. Isito no kemo kabebilahai halevaholima. ⁹ Atea vatehani noevei nohavema. Isito Dilavau nohehi uge no kemo haluviholilu. ¹⁰ Iesuu vatehani malei hatiale ke nahate no lovive vai vani bahata vatehani malema. Ige ataeau no vaveve elehai hilokage Iesuu vaveve doge mai lohoi vatehani maleale ke nahate no vaveve doge vai vatehani malema. ¹¹ Vani bahata no Iesu lovi vamale kemo ataeau isiviai nohavei. Isito kemoike ata degomoleau no vaveve elehai hilokage no vaveve keu Iesu vaveve nahate. ¹² No la uvue dua vai ukolikoli maleveve keho lovilahai vatehani baluga malema.

¹³ Ata moleu Bukae Hotomo loui avoe, “Di evievimoike di hoto ko loui ata haivema.” Ige nota katelahai evievi ke igaemo hoto ko loui ata haivema. ¹⁴ No hilokage Dilavau nahie Kosive Iesu ke etuvage hovelahale ke nahate aina nahie tatuvege nahiabuna hoveveve. Ige Dilavana nahi bahata holoevege nahiabuna Iesuluvuta igaetolahai ui. ¹⁵ Lahehoike no lovi ko vai avuemo vatehani malema. No isivialeike hoto kou ata bahata sonumaeveve tige Dilavau kebia hoesevege keabuna guliguliai Dilava hoesehavoi ivive ebagevegei.

Evievimo uveve deiada

¹⁶ Katealemo no bae lovi ke kabebihavolivebene. No vava keu ohelekama. Isito Dilavau vani bahata no uvu ke hoesehavoi negotima. ¹⁷ No vatehani malemale keu egeai baluga holioholinu. Isito vatehani kemo Dilavana au ataga baluga noevege kena vatehani ke evihai egeai vani bahata ugei. ¹⁸ Katealemo no vatae onobenobe aike elegevemale ke huhuoholima. Isito no otogoe onobenobe elegevoholimale ke huhulahama. Kosealemo nahi aike elegevemale keabuna uoholisi. Isito nahi elehaholimale keabuna vani bahata ugei.

5

¹ No hilokage nahiabuna vata kove vatehani malei haluviliege Dilavau otogoe vavae doge nahiho otoveale ke nahiabuna malei vani bahata ugei. ² Katealemo nahi aike otogoe vava maleliho huhu balugai isivilahale Dilavau ke malei nahiovei. ³ Nahi ogoe doge hatuho isivilahale ke nahate nahi isiviale vavae doge malei otogoe tai. ⁴ Nahi vata

kove umalemo vaveve isutena nahie mo lohosege nahieabuna ke isumo kekolahagei. No isiviholilu nahi vatae vava keta hoveveveleho. Isito no isiviale nahi vatae vava ke halevai otogoe vavae doga malei. Ige hatihatie vava kena uoholige gibosoune vava kena vani bahata ugei. ⁵ Dilava keike nahiho vavae doga mamonu. Iale nahieabuna bae ke malei. No hilokage Dilavau au Munanae Tumu nahioveale kemo auna vavae doga nahiovei.

⁶ Katealemo no vani bahata ke huhulaha negolahama. Nahie vatae vavae nahehi uge no hilokage nahi Kosiveluvuta otogoe uoholilu. ⁷ Nahi aike Kosive elehaholilu. Isito nahieabuna ke huhulaha nahie evievimo negolahaliege gabie ke elehai. ⁸ Katealemoike no negolaha isiviale vatae vava halevai otogoe tai vavae doga malei Kosiveluvuta igaetolaha ui. ⁹ Katealemo vata kove mesoho otogoe no Kosive isivi vama ke baluga. No isiviale Kosive isivi unaha vagei. ¹⁰ No hilokage nahieabuna bahata Keliso vudimo lavige auna nahie vaveve kaovai nahi vatae ui vama ke bahata hilokai. Nahi vata kove ui vaveve dua vai vaveve toela vama ke ibina auna nahiovei.

Nahi Iesu Kelisomo Dilavaluvuta haokuvuvalu.

¹¹ Katealemo no Dilava vabuhavo negolaha ata haivema. Dilavau no vama ke bahata hilokanu. Ige di huhuige la uvumo lata hilokage no vama ke duave. ¹² No hoto kemo no isiviholilu la nimo no ebika tabageveleho. Isito no isiviale no vaveve bahata loui la haivege lana ke hilokai talive ata degomoleau lae lohoi abu ebika tabagevemale kebia no vaveve loui namigeveve. Ata kebia elehilehi ke duave. Isito uvuiabe ke tolanu. ¹³ Ata keau huhuige noeau tilogoe ata. Isito no Dilava lovi vama kemoike abu hoto kateale louma. Noeau tilogoholilu. Isito noeau lovi komo la tedaevema. ¹⁴ Kelisou au isivi nahioveale kemo no lovi ko vama. No hilokage ata igae Keliso keu ata bahataho hatige nahi nahie vaveve toelaho haluviveve ke halevalu. ¹⁵ Kelisou ata bahataho hatiale kemo isiviale ataeau abu isivi unaha va halevaito abuho hatai hovelahale ke isivi unaha vai.

¹⁶ Katealemo no atae vaveve ke unaha elehai avuemo hoto louholima. No subuta Keliso vaveve ke elehai huhuai kosea, “Keu mesoho ata unaha.” Isito no aike ekalesia holialemo no huhuihuhui ke bahata halevalu. ¹⁷ Kosealemo ata olena Kelisoti igaetoage Kelisona uveve doga mai omisi. Ige subuta vavevete kena avuemo uoholisi. Isege vaveve dogana avuemo lohoi. ¹⁸ Nahi subuta Dilavaemo haeavamole ua. Isito Dilavau Iesu Kelisomo nahie malevege nahi haokuvuiabe holilu. Isi au lovi nahiovei isiviale nahi ata haivege elike abu Dilava haokuvu holisi. ¹⁹ No ata haivege loui kosea, “Iesu Keliso kemoike Dilavau isiviale ata bahatahi haokuvuai.” Keu isiviholilu atae vaveve toelae ibina oveliho. Isito keu isiviale no hotove loui ata haivege abu haokuvuiabe holisi.

²⁰ Dilavau no nahavege no Keliso hoto loui ata haivema. Dilava keike au hoto mai noevege no laheho louma. Keliso ivimo no la namigevege loui kosea, “La vaveve toela halevai Dilavaluvuta haokuvulaha.” ²¹ Kelisou vavevebe toela vaholinu. Isito Dilavau nahie toela mai Kelisomo mamoge uoholiale kemo nahieabuna avuluvuta igaetolaha Dilava nimo inutolotololaha.

6

¹ Dilavau au lovi noeveale kemo no la namigevege loui kosea, “Dilavau la huhuevege la hoesegeveale ke lainaho halevalive.” ² Bukae Hotomo Dilavau loui avoe, “La di hohavoale kemo di isiviale novae vani komo la tedaevai. Dana nova la tedaevai la malevai.”

Di kemo hoto mole louge evive. Aike vani komo Dilavau isiviale la hotove evige elike au la malevai.

³ No isiviholilu no lovimo vaveve toela vage ataeau ke elehai dobuluviliho. ⁴ Isito no isiviale no lovimo vaveve dua vage ataeau ke elehai hilokage noeau Dilava esumuia. Katealemo vaveve toela onoleu noemo lohoge no kemo vatehani malei ke huhuholisito negolahama. ⁵ Ataeau nohavei no malevege dibulae otovei no aiogevema. No vaeta lovi baluga vai ladeveholima. ⁶⁻⁷ No no uvu mai ata kebia ove selevealemo no itumuholisito vaveve dua vai Dilava luleho hoto loui ata haivege hoesegevema. Ige kemo ataeau no elevege hilokage noeau Dilava esumuia. Dilavau Munanae Tumumo no negotiege no hotove seleve loui ata haivema. Ige no vaveve inutolotolote keu no mihisi nahate. ⁸ Ata degomoleau noheho hotoe dua loui no hoesegevema. Isege ata degomoleau no aiogevege noheho hotoe toela louma. Keau noheho loui avoe, “Laeau loboe hoto louma.” Isito no abuho hoto loumale keu hoto seleve unaha. ⁹ Ata degomoleau no vaveve hilokaholilu. Isege degomoleau no vaveve bahata hilokalu. Ata degomoleau huhulaha avoe, “Keabuna mesoho haluvisei.” Isito noeabulike kou ua. Keau nohavei vatetumu noevema. Isito no kemo haluviholilu. ¹⁰ Abu no aiogevemale kemo no uvulaha. Isito no vani bahata vahaeholaha. Noeau kunaite holioholilu. Isito no ata moaga malevege haivege abu

otogoe vavevemo kuneaite holima. Vatae onobeu noemo uoholinu. Isito no otogoe onobenobe malei vahaeholahama.

¹¹ Koliniti ataea, no hotobe laemo mahogovaholisito no uvumo hoto ke bahataike no loui la namigevema. ¹² No laemo no uvube dua bamuoholilu. Isito laeabulike noemo la uvu bamuma. ¹³ La no ese nahate holilike vage no uvu bahata laemo uale ke nahate lata la uvu bahata mai noeveve.

Evieviholimalebiahi igaetoholive

¹⁴ Lainaho evieviholimale kebiahi igaetoalive. Vaveve dua vamale keau bae vaveve toela vamale kebiahi igaetoalivebene. Ke nahate atagau bae vaviti igaetoalivebene. ¹⁵ Kelisou Seteneti bae uvu igaeealivebene. Ke nahate evievi ataeau bae evieviholimale kebiahi igaetoalivebene. ¹⁶ Dilava ekalesia keabuna oleve kateai loeboe dilava hoesehavomale kebiahi igaetolahai. Keu anekianu. Kosealemo ukolikolie Dilava ke ata nahiabuliko. Di hoto louale kemo Dilavau subuta hoto mole lounu. Avoe,

“Dana di atae vigomo ui Dilavaeabe holige keabuna di ata holisi.”

¹⁷ Katealemo Kosiveu Bukae Hotomo tota loui avoe,

“Vaveve toela vamale kebia vaveve va halevai abuemo haliohatuve.

Abuhi vaveveabe toela va halevave.

Lana vaveveabe toela vaholige dana la malevei.

¹⁸ Dana la mama holige lana di ese holive.

Kosive vuvunete dailike hoto ke lounu.”

7

Bolou ekalesiae vavevemo vahaehoanu.

¹ Di uvue haokuvua, Dilavau nahihō hoto kateale louale kemo nahi Dilava vabuhavoi vavae vaveve toela, huhuihuhui toela ke bahata halevai vaveve dua unaha vai uveve tumute vai. ² Noeau laemo vaveve toela vaholilu. No la lobogevi la aiogevoholilu. Katealemo la uvu bahata mai noeveve. ³ Di hoto ke loui isiviholinu la aiogeveliho. Di hoto louale kemo la hilokage no uvu bahatau lae ua. Katealemo no ui mesoho haluvige nahiau uvu igae. ⁴ Di la vaveve huhuai la vahaeho vai hilokage la vaveve kena duaveagei. Katealemo vatehanu noemo lohoge di ke huhuholisito negoai vahaehoanu.

⁵ No vani mole Masedonia vatae tiale usege vaveve toela moagaeau noemo loholu. Ataeau molehi ugologoloai moleho louma. Ige no vaveveabe ke elehai huhulahai vabulahalu. ⁶ Isito Dilavau no uvu negotievege no negolahalu. Kosealemo Taitasiu lohoge no kemo vahaeholahai negolahalu. ⁷ Taitasiu lohoale ke unahamo no vahaehoholilu. Isito au lohoale la vaveve dua loui no namigeveale ketamo no vahaeholahalu. No evige la Taitasi tedahoe dua valage au hoilahanu. Isi la subuta di hoto evioholiale ke huhulahai uvulahai hoidevei tota di tedahoveve ke di evisi vahaehoanu.

⁸ Di laheho levaleva hanavoale ke huhuige di uvuu isuanu. Di vabuai huhuige mesoho Koliniti ataeabuna levaleva ke elehai isu balugai. Isito di ke hanavoge duave. Kosealemo la vasohuta ke ehage la uvuu isuanu. Isito la aike isuholilu. ⁹ Di aike la hoto ke evisi vahaehoanu. La isulahale kemo di vahaehoholinu. Isito la isulahage Dilavau la hoesegevege la vaveve toela ke halevale kemoike di vahaehoanu. Di hilokage di hoto keu la aiogevoholinu. ¹⁰ Isito la isulahale kemo Dilavau la uvu ekovehage la vaveve toela halevai ukolikolie humahala tima. Isi kemo lana uvuoholisito vahaeholahave. Isito vatae ataeau isulahamale kemo hatihatie humahala tima. ¹¹ La di levaleva evisi isulahamale kemo Dilavau la hoesegevenu. Ige kemo la hovevevei isiviale vaveve toela ke halevai. Di la vaveve toela kemo hoto louveve ke la vabuhavoi isiviale di tota la vahaeho vai. Katealemo la vaveve toela vale keho hoto loui mai dubumo haliohatuale kemo di bae hotobe loulivebene.

¹² Di levaleva ke hisialiai laheho hanavoale keu vaveve toela vale ke unahata avuemo vaveve toela vale kebia unahaho di ke hanavoholinu. Isito di la bahataho ke hisialiai isiviale la Dilava nimo la uvu ekovehale kemo ataeabuna hilokage la noheho isivilahalū. ¹³ No la vaveve duae hoto evisi vahaeholahalu. Ige la Taitasi tedahoi hoesehavoge keu vahaehoai negoanu. Ige no ke evisi vahaeho balugalu. ¹⁴ Di vani mole Taitasi namihai kosea, “Koliniti ata keau vaveve dua vamale ataea.” Ige la ke tedahoi hoesehavoge kemo di hoto louale keu lobo holioholinu. Isito di vani bahata hoto seleve loumale ke nahate di Taitasiho louale keu seleve. ¹⁵ La bahata Taitasi mataulaihavoi hotove evisi vahaehove vai hoesehavoge keu la huhuivei au uvu mai laovei vahaehoanu. ¹⁶ Ige data vahaehoanu. Di la vaveve huhuai hilokage la vaveve kena duaveagei.

8

Ekalesiau mole tedaeveveve hoto

¹ Di haokuvuia, Dilavau Masedonia ekalesia huhuevei hoesegeveale hoto ke di loui la namigevege evive. ² Ekalesia keau vatehani baluga malema. Isito keau ke huhuoholisito kemo vahaeholahi hoveveve abu onobenobemo ata degomole tedaevema. Ata keau kunaite ata holioholilu. ³ Isito di hilokage keau abu isivimo kunai baluga malei ata tedaeveliho noevelu. ⁴ Abu hoveveve no namigeveve isivi balugale no kunaiaabe ke malei Dilava ataeau Diuidiae umale kebia tedaeveve ovei. ⁵ No huhulahage keau kunaite holioholilu. Isito keau hoveveve vasohuta abu uvu mai Kosive omisito Dilava isivimo abu uvu mai noevei abu kunai malei noevei isiviale no malei ata kebia ovei. ⁶ Taitasilike vasohuta Diuidia ata tedaeveveve hoto ke louge la ke huhuale di isiviale tota hanavoge au talive laemo moni malei ata kebia tedaeveve. ⁷ La vaveve bahata vama ke duave. La evievimo la negolahama. Isi la hotomo lulelelahai ata haivema. Isi la isivi noevei no tedaeveve negolahama. Katealemo no isiviale la uvu mai ata kebia ovei la kunaimo kebia tedaeveve dua vave.

⁸ Di isiviholinu vaveve kemo menakage la ke valiho. Isito Masedonia ata keau vai kebia tedaevemale keike di loui la namigevege la isivi unahamo la kunaimo kebia tedaeveve. ⁹ La hilokage nahie Kosive Iesu Keliso keu la huhuevei la hoesegevenu. Otogo keve keu kunai moagate. Isito keu ke halei vatae lohoale kunaiholimale kebia nahate holinu. Keu vaveve kateale vale kemo isiviale la otogoe kunaite holisi.

¹⁰ Keu vaveve kateale vale kemo di huhuige la subuta vaganatemo obeleni otoveale ke ivi mole otovege au uoholisi. La dubu degomolebiamu vasohuta la isivimo moni otovelu. ¹¹ Katealemo hoveveve negolahai ivi mole otovege au uoholisi. La lovilahamale kemo la subuta louale moni ke otovege au uoholisi. ¹² Lana la isivimo moni ke otovege Dilavana ke elehai vahaehoi. La moni baluga malemale kemo moni baluga otovege keta duave. Mesoho la monie ese malemale kemo monie ese otovege keta duave. ¹³⁻¹⁴ Di isiviholinu la moni baluga malei ata kebia ovei vaeta uliho. Isito la aike kunai baluga malemale kemo kebia tedaevevevani mole vanie toelau laemo lohoge keabuna abuta la tedaeveve. Katealemo la bae abuhi ue toela valivebene. ¹⁵ Bukae Hotou kemo loui avoe, "Dilavau lovi mole mana Iselala ata kebia ovege degomoleau baluga malesege degomoleau eseve malelu.

Ige baluga malemale keau eseve malemale kebia ovege keau mole nahate."

¹⁶ No Dilava vahaeho valu. Kosealemo Dilavau Taitasi uvu hoesehavoge no la haivei la tedaevemale ke nahate keu isivi balugale la haivei la tedaeveve. ¹⁷ No au lae tiveve hoto ke loui namihage keu vahaehoi au isivimo isiviale lae tai la haivei la tedaeveve. ¹⁸ No ke hanavoge evievi ata molena avui tai. Evievi ata keu Dilava hoto loui ata haivege ekalesia bahatae au lovi kemo ivive ebagevalu. ¹⁹ Ke ebagevai isiviale no avui obeleni malei talive Diuidia ata kebia ovei. Ige keabuna nahi kebia tedaeveve ke elehai kemo Dilava ivi hoesehavoi.

²⁰ No ata abui kebia hanavege keabuna lae lohohoi moni ke malei. No isiviholilu la ke huhulahai kosea, "Bolou au ebikahoike au moni baluga ke malema." ²¹ Isito no isiviale Kosive nimo vaveve dua vai atae nitamo vaveve dua vai.

²² Katealemo noebuna no haoka mole hanavoge auna Taitasiti abu ata mole ebagevale kebiahi tai moni ke nalisi. Ata keu atae dua. No hilokage keu vani bahata Dilava lovimo negoima. Keu isiviale lohohoi la tedaeveve. Keu hilokage laeabuna hotove evisi tedahoi hoesehavoi. ²³ La hilokage Taitasi keu daiti loviai la tedaevemale ata. Taitasi kena bae evievi ata abui kebia holoeve lae lohohoi. Ekalesiau kove umale keau kebia hanavege keabuna lae lohohoi vaveve dua vai la tedaeveve kemo Keliso ivi hoesehavoi. ²⁴ Keau lohoge isivi ovei kebia hoesegeveve. Katealemo ekalesiau kove umale keabuna ke evisi hilokage no la vaveve loui la tabagevemale keu seleve.

9

Diuidiae umale kebia tedaeveveve hoto

¹ Dilava ataeau Diuidiae umale kebia tedaeveveve hoto ke la evilu. Katealemo di bae hoto moaga loulivebene. ² Di hilokage laeau negolahai isiviale ata kebia tedaeveve. Di la tabageveve la vaveve loui Masedonia ata kobia namigeveve loui kosea, "Koliniti ata keau subuta vagona kemo negolahai obeleni otovelu." Di la vaveve ke louge keau negolahai la vaveve nahate vama. ³ Di aike ata abuita igaeta kobia hanavege keabuna lae lohohoi laheho louge lana hotoeabe evisi tota obeleni otoveve. Lana katelahage di la vaveve loui la tabageveve kena seleve holisi. ⁴ Isito lana kateholige Masedonia ataeabuna daluvuta lohohoi la vaveve ke ehage di hoto loumale ke ihu uoholige dana kemo matiai. Ige

lataeabuna kemo matilahai. ⁵ Katealemoike no ata abuita igaeta kebia hanavege keau noheho uli holisi lae lohoma. No isiviale keau laheho no hoto louge la subuta louale obeleni ke otovege usege no lohohi. Ige Masedonia ataeabuna hilokage di laheho hoto louge la ke otoveholilu. Isito la isivimoike la ke otovelu. ⁶ Di hoto ke huhulahave. Olena bulue ese vaniege avuerno lovi moaga vesite malei. Isito olena bulu baluga vaniege avuerno lovi moaga malei. ⁷ Katealemo di louale ke huhulahai momolelahai ono vadeu laemo uale ke la isivi unahamo obeleni otoveve. Di isiviholiale di hoto louale kemo la obeleni otovei huhu moagalihohi. Kosealemo Dilavau isivialeike la igaegaeau vahaehota moni ke otovei. ⁸ Lana katelahage Dilavana au vuvunemo kunai moaga laovege lana ke malei vani bahata kemo ue dua vai ata degomole tedaeve dua vagei. ⁹ Bukae Hotou kemo loui avoe. “Ata olena au kunaimo kunaiholimale kebia tedaeve dua vage vaveve dua kena vani bahata Dilava nimo ui tigei.” ¹⁰ Dilava keike lovie i bahata ata ovege abu hai kemo lovi ima. Ke nahate auna kunai laovege kunai keu balugage nehane la kunai kemo ata tedaeve dua vage. Ige Dilavana la hoesegevege lana vani bahata vaveve kateale vageve. ¹¹ Dilavana onobenobe bahata laovege la kunai keu balugage lana kemo vani bahata ata degomole tedaeveve. Lana kemo obeleni noevege no ke mai ata kebia ovege keabuna kemo vahaeholahai Dilava ivi hoesehavoi. ¹² La kunai kemo ata tedaevemale keu vaveve dua. Kemo Dilava ataeabuna ue dua vai vani bahata Dilava ivi hoesehavoge. ¹³ La vaveve dua kateimale vamale kemo ataeabuna la vaveve elehai hilokage laeau seleveta Keliso hoto evisi vamalea. La kebia tedaevei ata degomole tedaevemale kemo keabuna Dilava ivi hoesehavoge. ¹⁴ Isi keabuna abu uvu bahata laovei laheho guligulilahagei. Kosealemo Dilavau la huhuevei la hoesegevege la kemo ata degomole tedaeve dua vama. ¹⁵ Dilavau la huhuevei la hoesegevefemale kemo lana oleve kateai ibinave omisi. Keu anekianu. Isito nahi vani bahata ivive ebagevai hoesehavoge.

10

Bolou au vaveve loui ekalesia namigevema.

¹ Hoto mole evive. La degomoleau loui kosea, “Bolou nohehi umale kemo hoto savate loui no namigevema. Isito au nohehi uoholimale kemo hoto isute noheho hanavoma.” Isito Kelisou hoto savate loui ata hoesegevefemale ke nahate di vama. ² Di isiviholinu lae lohohi hoto isute loulilo. Isito di lae lohoge la degomoleau loui kosea, “Bolou vatae vavevemo negoima.” Keau kateai louge dana negoai abuhohi hoto isute loui. ³ Seleveta nahi vata kove uma. Isito nahi vatae vavae isivimo negoholima. ⁴ Nahiabuna vatae vaveve vuvuneta bae Setene vaveve bamulivebene. Isito nahiabuna Dilava vaveve vuvuneta Setene vaveve bamuge auna uoholisi. ⁵ Vuvune kemo nahiabuna atae hotoe lobo hamage au uoholisi. Ige ata degomoleau abu ebika tabageve isiviholiale ataeau Dilava hotomo lulelelahale kebia hoto nahiabuna vuvune kemo hamage huhuihuhuiabe kena ekovehage keabuna Keliso hoto evisi ehovai. ⁶ Noeabuna lohohiege vuvune kemo la vaveve kaovege la oleuoleu Keliso hoto evige noeabuna abuhohi hotoe dua loui. Isito la oleuoleu Keliso hoto evioholige noeabuna abuhohi hoto isute loui toelaeabe kemo ibinaeabe ovei.

⁷ Di la duatieveho la vaveve toelamo hoto isute loumale kemo la huhuige dau atae toela. Mesoho la molena loui kosea, “Dau Keliso atae dua.” Isito nahi bahata keau mole nahate Keliso ataea. ⁸ Kosiveu au vuvune noeveale kemo di ebika ebagemage keta duave. Kosealemo vuvuneve kemo di la aiogevholisito la negotievema. ⁹ Di ko loui isiviholiale la di levalevaho vabulalahiho. ¹⁰ La degomoleau loui kosea, “Bolou au levalevamo hoto isute louma. Isito nohehi umaleu negoholige hotoveu isuholinu.” ¹¹ Abu kateai louito luleleholilu. Abuna hilokage di levaleva hisaliai hanavomale ke hotou di lahehi ui la namigevefemale hoto ke nahate. Dana bae lae lohohi di levalevamo louale ke nahate vai.

¹² La degomoleau abu ebika tabageve huhulahai kosea, “Noeau duave.” Isito ata keau kemo luleleholilu. Keau abu ebika tabageve loui avoe, “No ata degomole evigeve vaveve dua vama.” Isi abu vaveve kemo hoto loui loui avoe, “Noeau vaveve dua vamalea.” Keau katelahama. Isito noeau katelaholima. ¹³ Keau abu ebika tabagevefemale ke nahate no vaholima. Isito Dilavau au lovi noeveale ke unahaie no laemo vama. No laemo lovilahamale ke unahamo noeabuna no ebika tabageve. ¹⁴ Dilavau au lovi mai noevege no subuta lae lohoale Keliso hotoe dua loui la haivelu. Iale Dilavau no haivei no hanaveale ke unahamoike no lohoale la haivelu. ¹⁵ Ata degomoleau oleve keve Dilava lovi vamale kemo no hoto loui no ebika tabageveholima. Isito Dilavau au lovi noeveale kemo no hoto loui no ebika tabagevema. No huhuige lana la evievimo negolahage balugage noeabuna negolahai la haive dua vai. Dilavau au lovi noeveale ke unaha noeabuna laemo vai. ¹⁶ Noeabuna lovi ke vage uoholige la halevei vata degomoleve hotoe dua loui ata kebia

haivei. No isiviholilu subuta ata degomoleau Dilava lovi vale keve lovilahai no ebika tabagevelihō. Isito no isiviale ataeau lovioholiale keve lovilahai.

¹⁷ Bukae Hotou kemo loui avoe, “Lainaho la vadeu vamale kemo la ebika tabagevelive. Isito Kosive vuvunemoike la ke vamalemo ivive ebagevave.” ¹⁸ Ke nahate ata oleu au lovimo au ebika ebagemale keu toelanu. Isito Kosiveu ata ke lovimo ebagemage keu duave.

11

Bolo isi lobe abostolo

¹ La hilokage nahi nahie ebika tabagevemale keu vaveve toela. Isito dana aike di vaveve loui di ebika ebagemaveve hoto louge lainaho ke evisi kabebihavolive. Kosealemo lahehoike di ke louma. ² Laeau ma moleu ata moleti lahaoholige vaveveveu duaveale ke nahate. Dilavau isiviholinu la vaveve toela valiho. Ige data kateanu. Di isiviale la vaveveu duaveage Kelisou la malevege elike di vahaehoai. ³ Isito di ke kuhuai vabuanu. La Kelisoluvuta igaetolahai la uvu bahata omiale kemo onoilage ata degomoleau lae lohōi la uvu isi la lobogevege kemo Keliso halevama. Subuta mole ute lulelete keu Ivi uvu isi lobohavoale ke nahate onoilage abu laemo vama. ⁴ Abu lae lohōi la lobogevei Iesu hotomo hoto nimolete loui la namigevema. Isito noeau kateholisito lae tiale Iesu hotoe dua loui la haivege la kemo Dilava Munanae Tumu malelu. Iale lana no hoto ke kabebihavoi kebia hoto evilige munanae tumu nimolete maleve.

⁵ La loui kosea, “Ata keau no abostolo atae duaea.” Kateike la vai di hoto evioholima. Isito di huhuige ata keau abostolo lovimo di evihaholilu. ⁶ Mesoho la huhuige di neniai la haiveholima. Isito di Dilava vaveve hilokai kemo luleleanu. No vani moaga lae lohōi la haivemale kemo la hilokage di lulelemoike la haivema.

⁷ Di Dilava hotoe dua loui la haivemale kemo di isiviholiale laemo ibina maliho. Isito di isiviale di ebika etolemaito la tabageveī la haive dua vai. Di kateige la huhuige di vaveve kena toelanu. ⁸ Di lahehi ū loviasege ekalesia degomoleau di ibina vama. Ige moniabe kemoike di loviai la tedaevema. ⁹ Di lahehi usege di moniu uoholige di moniho la belageveholinu. Isito evievi ata degomoleau Masedonia halevai lohoale di isivie kunai daovalu. Di subuta laemo kunai maleholinu. Isi di bae gabie laemo kunai malelivebene. ¹⁰ Keliso hoto selevu di uvumu umale kemo di laemo kunai maleholiale hoto ke lounu. Katealemo Giliki vatamo umale la keau bae koseale loulivebene. “Bolou au ebikaho no kunai malema.” ¹¹ Vadeuhoike di hoto kateale laheho louma. Mesoho la huhuige di laheho isiviholinu. Isito Dilavau hilokage di uvuu laemo ua.

¹² Lobe abostolo keau abu ebika tabageveī loui avoe, “Bolou ata haivei kemo ibina malemale ke nahate nota vama.” Keau katelahai lobolahamale kemo dana di vani bahata vamale ke nahate vai di ibinahō la haivelivebene. Elike kemo di lobe abostolo kebia hoto hamai. ¹³ Keau abostolo ata seleve holioholilu. Isito keau lobe abostolea. Abu lovi kemo ata lobogeveī abostole vaveve nahate vage ataeau elegeveī loui kosea, “Keau Keliso abostolo selevea.” ¹⁴ Keau katelahage lainaho elegeveī vikolahalive. Kosealemo Seteneu ata lobogeveī au ebika ekovehai anelu nahate holige ataeabuna elehai loui kosea, “Otogoe anelu.” ¹⁵ Iale ke nahate esemuvetaebuna ata lobogeveī vaveve inutolotolote nahate vage ataeabuna elegeveī loui kosea, “Vaveve inutolotolote esemuīabulike ko.” Keau katelahage lainaho elegeveī vikolahalive. Kosealemo keabuna vanie gabila bae abu lobolahamale ke ibina malei.

Bolou abostolo holisi vatehani malema.

¹⁶ Di tota hoto ke lou moleai. Lainaho huhulahai kosea, “Bolo keu momae hoto loumale ata.” La di mai momate toale keta duave. Isito di hoto louale evive. Ata degomoleau abu ebika tabageveī abu vaveve loumale ke nahate momate dalua dana di ebika ebagemai di vaveve loui la namigeveī. ¹⁷ Dana hoto kateale loui di ebika ebagemage keu Kosive isivi holioholinu. Isito hoto kemo dana luleleholiale hoto nahate loui. ¹⁸ Lobe ata moagaeau vatae vavevemo abu ebika tabagevemale ke nahate datana isivianiege di ebika ebagemai. ¹⁹ La huhuige laeau lulele ataea. Isito osiohoike luleleholimale ataeau lohosege la vahaehoabe vai abuhi igaetoama. ²⁰ Keau lae lohōi la lobogeveī la uvu isi la malevema. Isi abu ebika tabageveī la onobenobe malei la aiogevema. Keau katelahasege laeau ke huhuoholisito hotoeabe evisi vahaehoabe vai abuhi igaetoama. La katelahamalemo la keau luleleholilu.

²¹ Keau laemo vaveve kateale vage di matianu. Abu laemo lobe vaveve vale ke nahate di laemo vaholinu. Isito keabuna abu vamale kemo abu ebika tabagevege dana data di vamale kemo di ebika ebagemai. La hilokage nahi nahie ebika tabagevemale keu vaveve toela. Isito dana ke vage lana ke elehai di hoto evive. ²² Lobe ata keau loui

avoe, “Noeau Hibulu hoto loumale ataea.” Ige kemo di loui kosea, “Dataike.” Keau loui avoe, “Noeau Iselala ataea.” Ige dataike. Keau loui avoe, “Noeau Ebalahamu valada.” Ige dataike. ²³ Keau loui avoe, “Noeau Keliso esemuia.” Isito di Keliso esemu seleve holisi kebia evigevenu. Di hoto kateale loui di ebika ebagemage toelanu. Isito di louge evive. Di Kosive lovimo negoai vatehani malemale kemo ata kebia evigevenu. Vani moaga ataeau di mai dibulale mavolu. Vani moaga abu di visuhavoai dahavolu. Ige kemo di hativeveu vuguvuguanu. Di vatehani baluga maleale kemo di loboe ata kebia evigevenu. ²⁴ Dana vatehani maleale ke hoto mole louge evive. Diue ataeau vani moaga di aiohavolu. Abu di mai dibulamo mavoaleu bahata ada mole (5). Isi kemo di visuhavoale teti naini (39). ²⁵ Ige Loma ataeau di mai dibulamo mavoi di visuhavoaleu bahata abuita igaeta. Ige ata degomoleau vani mole muneta dahavolu. Ige vani mole di boutimo tiale keu mutuanu. Isi vani molemo tiale keta mutuanu. Isi tota molemo tiale keu vani mole mutuage di davala goloale ualeu vani igae isi vavi igae uoholinu. ²⁶ Di vani moaga oai timale kemo eu lalamoi di mai tima. Isime vavoloale ataeau dahavoma. Isime Diue ataea isi Diue ata holioholialea keau dahavoma. O balugae timale botoe timale mesoho davala timale keve vatetumu malema. Di oleve keve tige loboe evievi ataeau di lobohavoai dahavoma. ²⁷ Di vani moaga Dilava lovi vai neniai lahalohisi vaeta enuta ke vama. Loviu uoholige ou uoholige ogou uoholige di ke huhuoholisito negoai lovi ke vama. ²⁸ Di vatehani degomole malemale ke di bae loulivebene. Isito hoto ko igae di louge evive. Di vani baita ekalesia kebia huhueve tumutumuige keu daemo isuima. ²⁹ Evievi ata molena au evievimo negoholige dana ke huhu balugai. Ige evievi ata molena vaveve toelae humahala tige dana ke huhuai isiviale ke tedahoi.

³⁰ Dana di ebika ebagemaniege deiada mole loui la haivege lana kemo di negoholiale ke hilokave. ³¹ Nahi vani bahata nahie Kosive Iesu ke Mama hoesehavomale ke ivimoike di la namigevema. Keu hilokage di la lobogevholima. ³² Vani mole di Damasikasia usege vatae kosive baluga Aletasi ke valamo uale kosive moleu o baluga ke nalima. Kosive keu louge tualie ataeau o ke baluga udahae vavamo di maliho lavisi uma. ³³ Isege di haokuvu degomoleau di maima bosea baluga uvumo mavoi vuindoamo manevege di heie dobai tialeu detitinu. Iale di deiada kemoike lana di negoholiale ke hilokave.

12

Bolou tababuai otogoe vaveve elehanu.

¹ Di katealemo di ebika ebagemage keu toelanu. Isito Kosiveu tababumo di haivuale ke dana loui la haivei. ² Vagana votiniu (14) uoholisege Dilavau di melamei ehue otogoe tinu. Mesoho seleveta di otogoe tinu. O mesoho di tabau unahamoike tinu. Di ke hilokaholinu. Dilava ke igaeu hilokanu. ³ Isito di hilokage Dilavau di melamei ehue tinu. Mesoho tababumo au di melamei tinu. O mesoho seleveta au di melamei tinu. Di ke hilokaholinu. Dilava ke igaeu hilokanu. ⁴ Di keve tiale hoto mole dua evinu. Isito louveve keu daemo anekianu. Kosealemo Dilavau isiviholinu di hoto ke louliho. ⁵ Dilavau daemo vale kemo dana ke loui. Isito di bae kemo di ebika ebagemalivebene. Isito dana di vaveve degomole loui la haivege lana kemo di negoholiale ke hilokave. ⁶ Dana isiviai di ebika ebagemaniege momae hoto loulivebene. Kosealemo Dilavau di haivuale hoto seleve ke unaha dana loui. Isito di bae kemo di ebika ebagemalivebene. Dana kemo di ebika ebagemai di vaveve loui la haivege lana ke evisi huhuige Bolo keu baluga. Isito di isiviale la di vaveve elehai di hoto evisi kemo hilokage di vadeu loui vamale keau Dilavau di haivumale unahaikai di loui la haivema.

⁷ Dilavau isiviholiale di otogoe tiale onobenobe dua elehale kemo di ebika ebagemalihu. Kemoike au vaveve mole nimolete beikanahate di vavamo mamoge tumuima. Ige Seteneu ke elehai isiviale di lobohavoge di kemo dobai. Isito Dilavau ke mai daemo mamoa ke isiviholiale di otogoe elehale kemo di ebika ebagemalihu. ⁸ Vani abuita igaeta di Kosive imihanu. Di loui kosea, “Daemo vaveve nimolete ke mai evihanela.” ⁹ Ige au di namihai loui avoe, “Halege di a huhuai a hoesehavomale keu baluga. A negoholialemo di vuvune keu aemo baluga.” Dilavau daho kateale louge di vahaehoanu. Dana di negoholiale ke unahamo di ebika ebagemalive elike Keliso vuvune keu daemo ui di negotigei. ¹⁰ Di Keliso ivimo loviemale kemo ataeau daho hotoe toela loui vaveve toela daemo vai di aiohavoge di vatetumu malei negoholiale kemo dana vahaehoai. Kosealemo di negoholialemo Kelisona di negotisi.

¹¹ Di hoto ke louale keu momae hoto nahate. La di ebagevai di hoesehavovatege di hoto kateale louholinu. Di hilokage dau ata baluga holioholinu. Isito di loboe abostolo kebia bahata evigevenu. ¹² Di lahehi ui kabebiholisito negoai vikoe vaveve nimolete moaga vaveve la ke elehai hilokage dau abostolo seleve. ¹³ La huhuige dana ekalesia degomole

tedaeveto la tedaevholinu. Di kateholinu. Di la tedaeveto kunaiho la imigeveholinu. Isito lainaho di kunaiho la imigeveholiale keta huhulahagelive.

Bolou Koliniti kebia huhuevenu.

¹⁴ Dana nova tota lae loho abuita igaetai. Isito dana lae lohoniege onobenobeho bae la imigevelivebene. Di isiviholinu la moni, la kunai maleliho. Isito di isiviale la malevei. La hilokage eseau bae abu mamuvu abu neinuvi lovi ovei kebia tedaevlivebene. Isito mamuvuiabe neinuviabe keabuna lovi abu ese ovei kebia tedaevi. ¹⁵ Di isivi keu laheho balugalemo dana di moni di kunai di nego bahata laovei la tedaeve dua vai. Isito la di vale ke nahate vaholisito la dahoe isiviale keu esevehame.

¹⁶ Mesoho la molena di hoto kemo loui kosea, “Seleveta Bolo keu noe deiai lohomale no kunaibe maleholima. Isito keu lulelete. Mesoho keu no lobogevei no malevei isiviale kemo humaha mole vai noemo kunaita monita malei.” ¹⁷ Laeau hoto kateale louma. Isito di oleve kateanu. La huhuige di ata degomole hanaveale keabuna lae tiale laemo kunaita monita malelu. ¹⁸ Di Taitasita evievi ata moleta hanavege keau lae tilu. Keabuna laemo onobe malelu. Di huhuige keau kateholilu. La hilokage noeau Taitasiti uvu igeaei vaveve igeaealu.

¹⁹ Di uvue haokuvuia, di hoto kateale loualemo lainaho huhulahai kosea, “Bolou hoto ke loui isiviale au ebika ebagemage elike no kemo ivive ebagevai.” Kosealemo Dilavau hilokage di Keliso isivimo hoto ke bahata loui la haivei isiviale di hoto kemo la tedaevi. ²⁰ Isito di vabuanu. Dana lae lohoniege la vaveve toela elehage nahiabuna kemo molehi ugologoloi. Dana lae lohoniege la moleho hotoe toela loui mole maina mai isi moleho itumulahai mole havei la ebika tabagevei mole aiogevei vaveve kateale vamalemo dana laheho hoto louge nahiabuna molehi ugologoloi. ²¹ Di vabuanu. Dana tota gabie lae loho moleaniege la degomolebiamo vaveve toela elegevei Dilava nimo uvuai. Isime vaveve toela moaga elegevei uvuai ninai. La teibae vaveve vai molehi ladevei vaveve toela ke halevaholimalemo dana kemo uvuai ninai.

13

Bolo hotoe gabi

¹ Dana nova tota lae loho abuita igaetai. Bukae Hotou loui avoe, “Ata oleu vaveve toela vage ata abuita mesoho abuita igaeta keau ke elehai louge ataeau hilokage seleveta au ke vanu.” ² Bukae Hotou louale ke nahate di subuta lae lohoale vaveve toela vamale kebia elegevei vaveveabe bamunu. Isito di aike evige abu vaveve toela vai uma. Katealemo dana tota lohoniege subuta vaveve toela vai umale isi aike vamale kebiaho hoto isute loui. ³ Dana lae lohoniege Keliso negomo laheho hoto isute louge lana hilokage Keliso negomoike di hoto ke lounu. Keliso vuvune keu baluga. Auna au vuvune kemo la vaveve toela kaovai loui. ⁴ La hilokage Iesu vavau negoholige au idie domo hatinu. Isito Dilava vuvunemo au hovelahai aike uma. Ke nahate no vavau negoholinu. Isito no Kelisoluvuta igaetolahage Dilava vuvuneu noemo ua. Ke vuvunemoike noeabuna lae lohohi la hoesegevei la negotievei.

⁵ La evievi kaovai elehage laeau seleveta evievi ataea. Emena evievi ata holioholialea. Kelisona la uvumo uge lana hilokage laeau evievi ataea. Isito au la uvumo uoholige laeau evievi ata holioholilu. ⁶ La hilokage Kelisou no uvumo uge noeau evievi ataea. ⁷ Halege la degomoleau huhuige noeau evievi ata holioholimalea. Isito keta duave. No ke huhuholisito laheho Dilava imihai isiviale la vaveve toelamo dobuluvi halevai. No Dilava imihamale kemo no isiviholilu no ebika tabageveliho. Isito no isiviale la kemo vaveve inutolotote vai. ⁸ Katealemo no bae hotoe lobo loui la haivelivebene. Isito noeabuna hoto seleve unaha loui la haivegei. ⁹ No negoholige la negolahage no kemo vahaeholalahu. No vani bahata laheho gulgulillahamale kemo lana vaveve inutolotote vageve. ¹⁰ Di levaleva ko hisaliai laheho hanavoale keu koseanu. Di isiviholinu Kosive vuvunemo lohohive hoto isute loui ibinae toela laovelihohi. Isito vuvune kemo dana lohoniege la malevei negotievei. ¹¹ Di haokuvuia, di hotoe gabi ko louge evive. Di la haivemale hoto ke evisi la vaveve toela halevai igaetolahai vaveve inutolotote vai ue dua vageve. Ige Dilavau au uvu laovei uveve dua laoveale kena lahehi ui tigei.

¹² La mole elegeveliege mole vahaeho vai mole ada hatugeve. ¹³ Dilava ataeau kove umale keau laheho vahaeho hoto ko hanavolu.

¹⁴ Di isiviale nahie Kosive Iesu Keliso keu la huhuevei la hoesegevegei. Isi di isiviale Dilavau au uvu laovei. Di isiviale Dilava Munanae Tumuu vani bahata lahehi ugei. Di hotou kemo kateai ua.

Galesia

Bolou Galesiabiaho hisaliale

¹ Dau di ivilike Bolo. Ataeau di ebagevai di hanavoge di abostolo lovi ko vaholima. Isito nahie Mama Dilavau hatihatimo Iesu Keliso etuvale keike di ebagemage di abostolo lovi ko vama. ² Di levaleva ko hisaliai Galesia dubu bahata laheho hanavonu. Ige kove evievi ataeau daluvuta uale keau abu vahaeho hoto loui laheho hanavolu.

³ Di isivialeike nahie Mama Dilava isi nahie Kosive Iesu Keliso keau la huhuevei la hoesegevege lana ue dua vave.

⁴ Iesu Keliso keu au isivi vaholisito Dilava isivi vai nahie toelaho hatinu. Keu hatai isivialeike Dilavau nahi malevege nahi aike vatae vaveve toela va halevai. ⁵ Katealemo nahi vani bahata Dilava ivi ebagevai hoesehavoale keu duave.

Iesu hoto igaeike hotoe dua

⁶ Di la vaveve ke evisi vikoanu. Kosealemo Dilavau la hohavege la hotove evige Iesu Kelisou laheho uvuai la tedaevenu. Isito solekavesite la ke halevai ata degomolebia hoto evisi ehovei loui kosea, “Keu mesoho hotoe dua.” ⁷ La katelahaito hoto mole duau uoholinu. Iesu Keliso ke hoto igaeike hotoe dua. Di hilokage ata degomoleau lae lohoale la uvu isi isiviale Iesu hoto ke aiahavo hoto nimole loui. Kemoike la dolodolohalu. ⁸ No subuta lae lohoale hoto seleve loui la haivelu. Isito mesoho no moleu hoto seleve ke halei hoto ni molete loui la haivege lainaho ke evilive. Isi mesoho anelu moleu lae lohoi hoto nimolete louge lainaho keta evisi malive. Ata oleu hoto seleve ke halei hoto ni molete loui la haiveale ke di isivialeike keu tai venemo lahai vatehani malei. ⁹ No subuta tiale laheho louale hoto ke di isivialeike tota laheho lou moleai. Ata oleu lae lohoi no subuta laheho louale hoto kateale lougholisito hoto nimolete louge hoto keu hoto seleve holioholinu. Di isivialeike ata katealeu tai venemo lahai vatehani malei.

¹⁰ Di hoto kateale louge la huhuige ataeabuna ke evisi di ivi ebagevai. Ba, abu katelahalivene. Di katealeho isiviholinu. Isito di isivialeike Dilava ivi ebagemai. Dana atae isivi vai kemo hoto louniege di bae Keliso esemu seleve holilivebene.

Bolou abostolo holiale deiada

¹¹ Di haokuvua, di la namigevege evive. Di hotoe dua loui la haiveale keu atae hoto holioholinu. ¹² Atabeu hoto ke loui di haivuholinu. Di ataemo hoto ke evioholinu. Isito Iesu Keliso keike hoto ke daho loui di haivunu.

¹³⁻¹⁴ La hilokage dau Diue ata. Di subuta Diue vaveve kemo luleleai di simini kebia evigevenu. Isi di vavivue vaveve ketamo negoinata ke manu. Di kateinata ekalesiaho uvuholisi vatehani ovei isivialeike kebia bahata havehatui.

¹⁵ Isito di uoholisege Dilavau di huhuai daho uvuai di ebagemanu. Iniale di uge vani mole au di hohavo isivialeike di lovive vai. ¹⁶ Vani mole Dilavau au moe vaveve daho loui isivialeike di hotove dua loui Diue ata holioholiale kebia haivei. Dilavau daho hoto ke louge di ke ihu kaovalihio atabe namihaholinu. ¹⁷ Dilavau di ebagemage di abostolo ata holinu. Isege abostolo degomole keau Dielusalemae ua. Iale di kebiamo hoto ke ihu kaovalihio tioholinu. Di kebiae tioholisito solekai halei Alebia vatae tinu. Di keve uniale halei tota hoilahai Damasikasie tinu. ¹⁸ Iniale vagana abuita igaetaeu uoholisege di bae Dielusalemae deiai tinu. Di keve velemai bula abuita uvumo abostolo mole Bitati ua. ¹⁹ Di keve ui abostolobe moaga elegeveholinu. Isito Bitata nahie Kosive ke hoho Diemisita di elegevenu.

²⁰ Di hoto ko louale kou seleve. Dilavau hilokage di la lobogeveholinu.

²¹ Di Dielusalemae uniale halei Silia vata isi Silisia vata kebiae tinu. ²² Vani kemo Diudia ekalesia keau di Dielusalemae uale ke hilokaholisi elehaholilu. ²³ Isito ata degomoleau di deiada louale ke unaha abu evilu. Ata keau loui avoe, “Nahi aiogevei nahi havemale ata keu aike Dilava ehomai hotoe dua loui ata haivema. Keu subuta evievi ata havei isivialeike kebia bahata havehatui. Isito keu aike ke halei hotoe dua loui ata haivema.” ²⁴ Iale evievi ata keau di deiada evisi Dilava hoesehavolu.

2

Bolou Dielusalema ekalesiahi hotohotoale

¹ Di Dielusalema halei tiale vagana votiniu (14) uoholige no Banabasiti Taitasi melavei avuluvuta Dielusalemae tota hoidevei tilu. ² Dilavau di namihage di keve tiale Diue ata holioholiale kebiaho di loumale ke loui Dielusalema dubue kosive haivenu. Di

ekalesia bahata haiveholisito kosive kebia unaha haivei isivialeike keau di vaveve ke evisi hilokage di lovi di subuta vamale isi nova vamale keau seleve holilu. ³ Di kebia haivege keau di hoto evisi malu. Di keve uge di haoka Taitasi keta ua. Keu Diue ata holioholinu. Isito keu Giliki ata. Iale keau di hoto evisi male kemo isiviholialeike Taitasi hanavege au Diue vaveve vai au vudie vate etuleliho. ⁴ Isito loboe evievi ata keau lohoale evievi atae vaveve nahate vai hovevevei Taitasi namihai loui avoe, "A vudie vate etulanela." Ata keau abu vaveve mahogovai tobekai lohoaleau isivialeike Iesu Kelisou no malevege no Diue menaka ehovaholiale ke abu kaovai elehaito no malevege no isiviabe ke unaha vai Diue menaka ehovagei. ⁵ Keau katelahage no kebia hoto evisi isiviabehame vaholilu. Isito no hotoeabe hamai isivialeike loboe hoto ke bamui. Ige elike kemo lana hoto seleve ke mai hilokage Dilavana la evievimo la malevei.

⁶ Isito Dielusalema keve dubue Kosive nehe degomole keau uito di kebia huhueveholinu. Kosealemo Dilavau bae atae vavae vaveve ke huhuai kaovalivebene. Isito auna atae uvu unaha kaovai ke unaha huhuigei. Iale di kosive kebiaho di deida louge keau Diue vaveve kemo hotobe loui di namihaholilu. ⁷ Keau di hoto ke evisi hilokage Dilavau lovi ke mai daonu. Ilike vage di tiale hotoe dua loui Diue ata holioholiale kebia haivenu. Keau hilokage Dilavau subuta Bita ebagemage Bitau hotoe dua loui Diue ata kebia haiveale ke nahate Dilavau data ebagemanu. ⁸ Dilavau vuvune mai daoge di abostoloe lovi vai Diue ata holioholiale kebia haivema. Dilavau subuta kateai vuvune mai Bita omige Bitau abostolo lovi vai Diue ata haivema. ⁹ Bita igaue lovi ke vaholinu. Isito Diemisi, Bita isi Dioni keau lovi ke kosivea. Iale keau hilokage Dilavaike daho lovi ke ebagemanu. Ige kosive keau data Banabasita no ada hatuevei noheho loui avoe, "Laeau talive tota Diue ata holioholiale kebia haiveve. Isege noeau Diue ata kobia haivei." ¹⁰ Keau katelahai noheho louito hoto ko igae noheho loulu. Avoe, "No isivialeike laeau kunaiholimale kebia tediaevei hoesegeveve." Abu katelahai louge di data lovi katealeho isivianu.

Bolou atae nimo Bitaho lounu.

¹¹ Iniale vani mole di Antiokae usege Bitau lohoale vaveve mole toela vage di ke elehai atae nimo avuho hoto mole lounu. Vaveve kosealemoike di avuho lounu. ¹² Bitau Diue ata holioholiale kebiahi igaetaoi ugulamo i abuhi lovi ima. Isege Diemisi Dielusalemae evievi ata degomolebia hanavege abu Antiokae lohohu. Ige Bitau kebia elegeve au abuhi lovi imale kebia halevenu. Keu kebia halevei tota abuhi lovi ioholinu. Kosealemo Dielusalema ata keau negolahi isivialeike Diue ata holioholiale keau vaveveabe nahate vai abu vudie vate bohisi. Kemoike Bitau kebia elegeve vabuai Diue ata holioholiale kebiahi tota lovi ioholinu. ¹³ Bitau kateige Antioka Diue ata degomoleau Bitaluvuta igaetolahai lovi imale keau Bitau vaveve elehai abuta Diue ata holioholiale kebiahi lovi ioholilu. Keau katelahai loboe vaveve vage Banabasita kebia elegevei ehovenu. ¹⁴ Ige di vaveveabe ke elehage vaveveabe keu hoto seleve ke ehomaholinu. Hoto seleve keu loui avoe, "Diue ata isi Diue ata holioholiale keau mole nahate." Ilike vage di atae nimo hovelahai Bitaho loui kosea, "Au Diue ata. Isito a kove lohoale Diue vaveve vaholisito Diue ata holioholiale kebiahi igaetaoi abuhi lovi ima. Di ke elehage a vaveve keu duave. Isito Diue ataeau Dielusalema halevai lohoge a Diue ata holioholiale kebia halevei tota a subuta vamale Diue vaveve ke vanu. A kateai isivialeike Diue ata holioholiale keau ke elehai Diue vaveve ke nahate vai." Di hoto kateale Bitaho lounu.

Evievi unahamo ataeabuna Dilava nimo inutolotoloi.

¹⁵ Isito di laheho louge evive. Bitau isi da noeau Diue ataea. No neinuviuiau no hovevege no Diue ata holioholiale ata kebia toela nahate vaholisito Diue menaka ehovale. ¹⁶ No hilokage no Diue menaka ehovamale kemo Dilavau bae noheho hoto koseale loulivebene. "Laeau inutolotolote ataea." Noeabuna Diue menaka ke ehovaholisito no uvu mai Iesu Kelisomo mavoliege Dilavana noheho loui kosea, "Laeau inutolotolote ataea." Di louale keu koseanu. Ata oleu Diue menaka ehomamale keho Dilavau bae inutolotolote hoto ke loulivebene. ¹⁷ Isito noeabuna Iesu Keliso ehovai isiviale no vaveve keu Dilava nimo inutolotoloi no tota hoidevei Diue menaka vage la huhuige Iesuemonike vaveve toela keu lohonu. Ba, keu kateholinu. ¹⁸ Di hilokage di subuta Diue menaka onole haleale ke dana tota hoilalahai va moleaniege dau vaveve toela vamale ata da. ¹⁹ Di subuta Diue menaka ehomanu. Isito di aike ke halenu. Ata oleu hatiale keu bae atae hoto evilivebene. Ke nahate di vai menaka ke ehomaholima. Di kateale vai isivialeike Dilavau vamale ke nahate di vagei. ²⁰ Iesu Kelisou idie domo hatiale ke nahate data vanu. Di aike uale keu di uveve holioholinu. Isito Iesu keike uveve doga daoge di kemo uma. Di hilokage keu Dilava mo. Keu daho isivi balugaike vaimo di toelaho hatinu. Keu daiti uale kemo dana vani bahata di uvu mai avuemo mamoniege ui tigei. ²¹ Iale di bae Dilavau daho

uvuai au mo hanavoale ke kabebihavolivebene. Ataeau Diue menakamo Dilava nimo inutolotolovatebe Iesu Keliso keu hatioholinu.

3

Diue menaka emena Dilava hoto

¹ Galesia ataea, lana tilogolahalu. Oleike la uvu inu. Di subuta lae lohoale Iesu Kelisou idie domo hatiale hotove ke loui neniai la haivege la ke evisi lulelelahalu. Isito oleike aike lohoale la uvu ige la hoto ke halevalu. ² Di hoto mole ige loui la namigevege evive. La oleve kateike vaima Dilava Munanae Tumu malelu. Lana Diue menaka ehovaike vaima ke malelu. ³ Iale osialemoike la tilogoe vaveve ke nahate vama. La subuta Dilava hoto evige Munanae Tumuu la malevei la negotievenu. Isito ose la isivialeike ke halevai la vuvune unahamo negolahai. ⁴ La Iesu ehovaima vatetumu maleale keu oleve kateanu. Lainaho ke huhulahai Iesu halevalive. ⁵ Osialemoike Dilavau Munanae Tumu laovei la vigomo vikoe vaveve vaevunu. La huhuige la Diue menaka ehovamale kemonike au au Munanae Tumu laovenu. Ba, la hilokage la hotove evisi maike vage au au Munanae Tumu laovenu.

⁶ Ebalahamu vaveve ke nahate. Bukae Hotou loui avoe, “Ebalahamuu Dilava hoto evisi au uvu mai avuemo mamonu. Kemoike Dilavau vaveveve elehai avoe, ‘Keu di nimo inutolotolote ataike.’”

⁷ Iale di laheho louge evive. Ata oleuleu abu uvu mai Dilavamo mavoale keau Ebalahamu valada selevea. ⁸ Subuta mole Bukae Hotou Dilavau gabie vaveve elehai loui avoe, “Diue ata holioholiale keabuna bae abu uvu mai daemo mavoge dana abuhu loui kosea, ‘Laeau inutolotolote ataea.’” Iale hoto kemo Dilavau Ebalahamuho loui avoe, “A a uvu mai daole kemo dana vatae ata bahata hoesegevei.” ⁹ Ebalahamu au uvu mai Dilavamo mamoge Dilavau hoesehavonu. Iale olena Ebalahamu vale ke nahate vai abu uvu mai Dilavamo mavoge Dilavana kebiata hoesegevei.

¹⁰ Isito ata oleuleu Diue menaka unaha ke huhulahai negolahamale ata kebia nohovu. Kosealemo Bukae Hotou loui avoe, “Ata oleuleu menaka bahata ehovaito menaka ige hosidiale kebia Dilavana aioegevei.” ¹¹ Nahi hilokage ata oleu Diue menaka ehomamale ke vaveve bae Dilava nimo inutolotoloalivebene. Kosealemo Bukae Hotou loui avoe, “Olemeau abu uvu mai Dilava omisime nivemo inutolotoloale keabuna abu evievimo ui tigei.” ¹² Isito ata oleuleu menaka unaha ehovamale keau abu uvu mai Dilavamo mavoholilu. Bukae Hotou loui avoe, “Ata oleuleu abu uvu mai menakamo mavoi ke bahata vamale keabuna menaka ke unahamo ugei.”

¹³ Isito Iesu Keliso nahie toelae ibinahato hatinu. Bukae Hotou loui avoe, “Ataeau ata mole mai idimo umuvai hamage keu keve uale ata keho Dilavana itumuai aiohavoi.” Iale Iesu idie domo hatai nahie toelae ibina vage Dilavau nahi aiogeveholinu. ¹⁴ Iesu Kelisou hatiale kemo Dilavau isivialeike Diue ata hoesegevei Diue ata holioholiale kebiata hoesegevei. Dilavau subuta Ebalahamu namihai avoe, “A vavevemo dana vatae ata bahata hoesegevei.” Iale Iesu hatiale kemo Dilavau loui avoe, “Dana di Munanae Tumu laovei.” Ige nahibuna nahie uvu mai Dilava omiliege Munanave Tumu ke malei.

¹⁵ Di haokuvuia, nahi vani bahata vamale nahie vaveve kemo dana hoto mole loui la haivege kemo lulelelahave. Mesoho atabe abuiou ono mole loui ke mai selevetisi bebamo hisialisege ke iae ata moleu bae lohoi hotoeabe ke egumalivebene. ¹⁶ Subuta Dilavau Ebalahamuho hoto loui mamoi namihai avoe, “Dana ata a valada keta hoesehavoi.” Bukae Hoto kemo Dilavau hoto koseale louholinu. “Dana a valada kebiata hoesegevei.” Isito keu loui avoe, “Dana a valada keta hoesehavoi.” Au valada ke louale keu Iesu Keliso. ¹⁷ Di hoto louale ke ihuiki ko. Dilavau au ono vade vaveve ke hoto Ebalahamuho lounu. Au avuhou loui avoe, “Di bae di hoto aho louale ke halelivebene.” Iniale vagana voa handele tetiu (430) uoholige Dilavau menaka mai Mosese ominu. Ige menaka keu subuta Dilavau Ebalahamuho louale hoto ke bamuholinu. Isito hoto keu ui egeanu. ¹⁸ Dilavau Ebalahamuho hoto ke loui mamonu. Iale nahi bae Mosese menakamo Dilava onobenobe ke malelivebene. Isito Dilavau Ebalahamuho louale hoto kemo nahibuna Dilava onobenobe ke malei.

¹⁹⁻²⁰ Iale osialemoike Dilavau menaka mai Mosese ominu. Dilavau menaka ke mai Mosese omisi isivialeike menaka kemo ataeau abu vaveve tola vamale ke hilokai. Isi isivialeike menaka keu ulage Ebalahamu valada keu lohogeto menaka keu bae gabiai uoholisi. Subuta Dilavau Ebalahamuho louale valada keike di louma. Isito Dilavau menaka ke mai anelu ovege aneluiou mai Mosese omilu. Ige Moseseu ke mai ata ovunu. Mosese keu Dilavata atata vigomo laminu. Isito Dilavau Ebalahamuho louale ke vigomo atabeu lamioholinu. Isito Dilava igeau inuta Ebalahamu namihanu.

²¹ Iale la huhuige Dilavau menaka mai Mosese omiale kena subuta Dilavau Ebalahamuho louale ke bamunu. Ba, keu kateholinu. Keu katevatege ataeau menaka kemo ukolikoli malelu. Isito menaka kemo atae vaveveu Dilava nimo inutolotoloholinu. ²² Kemoike Bukae Hotou louale vaveve toelau vatae ata bahata bamuevei gabianu. Isito oleuoleu abu uvu mai Iesu Kelisomo mavoale keabuna Dilavau louale ukolikoli ke malei. ²³ Isito evievie vaveve keu loholoholisege menaka keu nahie malevenu. Keu nahi umudievei malevei dibulae otoveale ke nahate vanu. ²⁴ Evievi vani keu loholoholisege nahiau menaka valamo ua. Ige Iesu Kelisou lohoge nahi nahie uvu mai avuemo mavoge. Dilavau nahie hoesegevei isiviale nahie vaveveu nivemo inutolotoloai. ²⁵ Katealemo menaka keu aike nahi nalieveholima. Isito nahi nahie uvu mai Iesuemo mavoge keu aike nahi nalievema.

La Dilava ese holilu.

²⁶ La la uvu mai Iesu Kelisomo mavoale kemoike la bahata Dilava ese holilu. ²⁷ La bahata babatisoale kemo Iesuluvuta igaetolahai avu nahate vaime vaveve dua ke vama. ²⁸ Katealemo Diue ata isi Diue ata holioholiale keau nimole holioholilu. Isito keau mole nahate. Ige heiatu lovilahamale isi eve abu isivi vamale keau mole nahate. Ige malahaehu keatehi mole nahate. La bahata Iesu Kelisoluvuta igaetolahai atave holilu. ²⁹ Lana Iesu Keliso ata holiliege kemo lana Ebalahamu valada holive. Isi Dilavau subuta Ebalahamuho onole louale ke lana maleve.

4

¹ Isito di tota hoto mole louge evive. Ese molena au ebia holisito au mamae kunai ke bahata malei. Isito keu esebuluta uale kemo au bae au mamae kunai ke malelivebene. Keu au mamae esemu kebia nahate. ² Ese keu esebuluta usege ata degomole abuna ke nalisi kunaive keta nalisi. Iniege mamaveu vani ebagemale kena lohoge abuna bae kunaive ke malei omisi. ³ Nahie humahau ke nahate. Subuta Iesu loholoholisege nahiau esebulu ke nahate. Vatae vaveveu nahi malevege nahi atae menaka unaha vama. ⁴ Ilage Dilavau vani ebagemale ke vaniu lohoge Dilavau au mo hanavoge keu Diue vatae keate mole ese holinu. Isime Diue menaka ke ehomanu. ⁵ Menaka ke ehomai isiviale Diue ataeau menaka valamo uale kebia ibina vai malevege abu Dilava ese holisu.

⁶ Nahi Dilava ese holilike vage au au moe Munanae Tumu hanavoge au nahie uvumo lohoale nahie tediaevege nahi Dilavaho loui kosea, "No Mama." ⁷ Katealemo nahi bae tota vatae esemu hollivebene. Nahiau Dilava esa. Nahi Dilava ese holiale kemo Dilavau louge nahiabuna onobenobeve ke malei.

Bolou Galesiabiaho huhuanu.

⁸ La subuta Dilava seleve hilokaholilu. Kemo la onobenobe adata vale kebia hoesegevei kebiaho loui kosea, "No dilavaea." La katelahaito keau Dilava seleve holioholilu. ⁹ Isito novae vani komo la Dilava seleve hilokalu. O dana loui kosea, "Dilavau la kebia hilokagevenu." Kateaito vadealemoike la isiviai hoidevei la subuta vamale ke nahate tota vai. Mesoho la isivialeike vatae vaveveu tota la malevege la isivive unaha vagei. ¹⁰ La vani mole mesoho bata mole mesoho vagana mole ebagevai ke mai tumutisi ke hoesehavoi huhuige Dilavana kemo no malevei. ¹¹ La katelahage di ke elehai la vabugevenu. Mesoho di la haivege la luleleholialemoike di lovi keu ihuoholinu.

¹² Di haokuvuia, di isivialeike la di vale ke nahate vage duave. Di subuta la kebia nahate vama. Isito di aike kateale vaholima. La vaveve toela vamale keu di aiovoholinu. ¹³ Di dogata lae lohoniale vavahanita hotoe dua loui la haiveale ke lana huhulalahu. ¹⁴ Di vavau kateai toelage keu laemo isuige la di kabebihavoi di iovaholilu. Isito Dilavau anelu hanavoge la ke hoesehavoveve ke nahate la di hoesehavolu. Isi Iesu lae lohoge la hoesehavoveve ke nahate la di hoesehavolu. ¹⁵ Vani kemo la di vahaeho vai di tedaholu. Nie bai iavoveve keu toloholivatege la la nie bai iavoi mai daoge di mai di nimo mamoge di niu duave holinu. La subuta katelahai di vahaeho valu. Isito la aike osiolu. ¹⁶ Di subuta hoto seleve loui la haivenu. Iale kemo lana aike di kabebihavoi daho itumulahama.

¹⁷ Di la haiveito lohosege ke iae ata degomoleau lae lohoale la haivei la hoesegevelu. Isito uvuiabe keu toelanu. Keau isiviai daemo la malevelive elike la di hoesehavomale ke nahate kebia hoesegevei. ¹⁸ Ata keau vani bahata uvue duamo la hoesegevege keu duave. Isito keau kateholilu. Di lahehi usege keau vaveve mole valu. Iliale di la halevesege keau tota vaveve nimolette valu. ¹⁹ Evive. Laeau di ese nahate. Keate mole eseu uho vage tumuu hamale ke nahate di tota la vaveve ke huhuai laheho uvuanu. Dana vani bahata uvualage la Iesu Keliso vale ke nahate vage dana bae uvuale ke halei. Isito la aike kateholige di ke huhuai laheho uvuanu. ²⁰ Di isivi balugaleike di lahehi ui. Ilive elike la vaveve elehai laheho uvuai la hoesegevei. Kosealemo di la huhueve baluganu.

Heigata Selata vaveve

²¹ Di isiviai hoto mole loui la namigevei. La oleuoleu isiviai tota Diue menaka ehovamale lana menaka ke hoto mole huhulahalu. ²² Hoto keu loui avoe, “Ebalahamuu ese abuita hovevenu. Keateve seleveu mole mamonu. Isege keate moleu abuhu heiate loviyamale keu eseve mole mamonu.” ²³ Heiate loviyamale keate keu vatae keateau ese malemale ke nahate vaime ese ke mamonu. Isito Dilavau subuta louale ke vuvunemoike Ebalahamu mahina seleveu ese ke manu. ²⁴ Subuta vaveve kemo dovudovue hotou ua. Keate abui keau Dilavau hotoe tumu abui louale ke nahate. Dilavau vasohuta Sainai tana keve au ono vade vaveve hoto mai au ata ovenu. Iale hoto keu heiate loviyamale keate Heiga ke nahate. Ke eseau heiate loviyamale esa. ²⁵ Sainai tana keu Alebia vatamo ua. Keve Moseseu Dilava menaka malei ata ovenu. Iale Heiga keu tana ke nahate. Isi keate keu ataeau aike Dielusalemāe ui menaka ke valamo umale kebia nahate. Ata keau heiate loviyamale ke nahate. ²⁶ Isito Dilavau hotoe tumu mole loui Ebalahamu mahina seleveho louale hoto keu otogoe Dielusalemāe ke nahate. Otogoe Dielusalemāe umale keau vatae Dielusalemāe ui heiate loviyamale kebia nahate holioholilu. Nahiau otogoe Dielusalemāe keve uveve ataea. Iale Sela keu nahie neina nahate. ²⁷ Isito Sela keu eseholisege Bukae Hotou kemo loui avoe,

“Keate moleu ese houholiale kena vahaehoai.

Keu subuta eseholige tumuu hamaholinu.

Isito gabie tumuna hamage auna kekoai vahaehoai.

Kosealemo keate ke valadana bae balugai.

Keate ke koliau halei tiale keate moleti uge eseveu ua.

Isito vasohuta keate ke valadana bae keate mole ke ese evigevei balugai.”

²⁸ Deiadaveu kateanu. Isito di haokuvuia, nahiau nova Dilava esa. Dilavau subuta louale kemo Ebalahamu mo Aisikiu ua. Iale Dilavau louale kemoike nahita Dilava ese holilu. ²⁹ Subuta vani kemo vatae ese keu Munanae Tumumo uale ese ke vatetumu ominu. Iale ke nahate novae vani kemo vatae ataeau evievi ata aiogevema. ³⁰ Ige kemo Bukae Hotou onole lounu. Keu loui avoe, “Heiate loviyamale keate isi move kebia nunuveve. Kosealemo heiate loviyamale keate ke eseu bae au mamae kunai malelivebene. Isito Ebalahamu mahina seleve ke esena bae au mamae kunai malei.” ³¹ Iale di haokuvuia, nahiau heiate loviyamale keate ke ese holioholilu. Isito nahiau Ebalahamu keate seleve ke esa.

5*Lainaho Diue menaka ehovalive.*

¹ Iesu Kelisou nahi maleveale nahi bae Diue menaka ehovalivebene. Isito nahiabuna Iesu isivi unaha vai. Katealemo lainaho Diue menaka ke isivi valive. Isito negolahai Iesu isivi unaha vageve.

² Evive. Bolo daliko laheho louma. Mesoho ata keau isiviai la vudie vate bohiohio vage lainaho niabemo taholahalive. Kosealemo abuna la vudie vate bohisi isiviale la kemo Dilava nimo inutolotoi. Isito la hilokage Iesu Kelisou bae kemo la tedeavelivebene.

³ Di tota laheho louge evive. Ata oleuoleu isiviai abu vudie vate bohiliohio valiege abu Diue menaka bahata ehovai. Lainaho mole ehovei mole halevalive. ⁴ La oleuoleu menaka ke ehovai huhulahai kosea, “Noeabuna menaka ehovage Dilavana no hoesegevege no vavevena inutolotoi.” La kateai huhualemo Keliso halevalu. Iale Dilavau bae laheho uvuai la hoesegevelivebene. ⁵ Nahi kate halevaito nahie evievimo negolahai ui loui kosea, “Dilavana nahi hoesegevege nahie vavevena inutolotoi.” Nahi kateai Dilava Munanae Tumu ke vuvunemo hemei ui isivialeike Dilavau nahie hoesegevei. ⁶ Keu nahi hoesegevege nahi Iesu Kelisoluvuta igaetolahai ua. Iale kemo nahie vudie vate bohiveve keu baluga holioholinu. Isito nahi Iesu ehovai nahie evievimo negolahai moleho isivilahai mole tedeavemale keu baluga.

⁷ Hoto seleveu vasohuta lae lohoge la ke evie dua valu. Isito oleike lohoale laheho louge la ke halevalu. ⁸ La hohaveale Dilava keu kateai laheho louholinu. Isito mesoho atae toelae abulike laheho kateale loulu. ⁹ Ataeabuna beikini bauda esehame mai valavata ebuehage valava kena balugai. Ke nahate ataeau lae lohoale lobo hoto esehame loui la haiveale hoto kena bae laemo balugai. ¹⁰ Isito di huhuige laeau Kosiveluvuta igaetolahale kemo la bae lobo hoto ke malivebene. Ige ata oleu la uvu isi la aiogevemale ata ke Dilavana ibinave omisi.

¹¹ Di haokuvuia, dau vudie vate bohilive hoto loui la haiveholima. Katealemoike Diue ataeau daho itumulahi di aiohavoma. Di hoto kateale louvatege keau daho itumulohilu. Isito Iesuu idie domo hatiale hoto ke di louike vage abu daho itumulahi di aiohavolu.

¹² Iale di isivialeike ata oleuoleu la vate bohiliho la uvu isi la aiogevemale keau abu vudie vate bahata bohige uoholige la bae vaveveabe nahate valivebene.

¹³ Di haokuvuia, Dilavau la hohavei la maleveale kemo la bae Diue menaka ehovai malivebene. Iale la huhuige lana valive la isivi unaha vai vavae isivi vagei. Ba, Dilavau isivialeike la moleho isivilahai mole tedaeveve. ¹⁴ Dilava menaka mole keu loui avoe, "La la ebika hoesegeveale ke nahate la haokuvuho isivilahai hoesegeveve." Lana menaka ke igae ehovaleige kemo Diue menaka bahata ke ehovave. ¹⁵ Isito lainaho ovoo vaveve nahate vai vatehani mole ovelive. Lana kateale valiege molehi ugologoloi mole aiogeveve.

Munana Tumue vuvunemo uve.

¹⁶ Di louale keu koseanu. Munana Tumue vuvunemo uve. La ke vuvunemo ui isivive valiege la bae la vavae isivive vaveve ke valivebene. ¹⁷ Nahie vavae isivi keu bae Munana Tumue isivi ke valivebene. Ige Munanae Tumu keu bae nahie vavae isivi ke valivebene. Keau molehi ugologoloi. Katealemo nahi bae olete ke isivi valivebene. ¹⁸ Isito nahiabuna Munana Tumue isivi valiege kemo nahi bae Diue menaka ke vuvunemo ulivebene.

¹⁹ Nahi hilokage vavae isivive vaveve keu koseanu. Mole keatehi ladevei teibae vaveve vai huhuihuhui toela kateale huhulahagei. ²⁰ Isi loboe dilava hoesegevei evelahai moleho itumulahai abu ebia tabagevei kemo mole tasalievei moleho loui mole havegei. ²¹ Isi mole kunai elehai mole maina mai isi e toela isi tilogoai havue toela vai kemo iveve toela vagei. Di subuta laheho louale ke dana tota laheho lou moleai. Ata oleuoleu vavae isivi kateale vamale ata keau bae Dilava matamae doge keve talivebene.

²² Isito Munanae Tumue vaveve keu koseanu. Ataeu Munanae Tumue vuvunemo uale keabuna moleho isivilahai vahaeholahi ue dua vagei. Isi moleho itumuholisito mole tedaevei vaveve dua moleho vai kemo abu evievimo negolahai ui tigei. ²³ Isi abu ebia nenigevei solekai itumuholisito saiaivoi moleho lougei. Vaveve katealemo atae menakau ke bamuholinu. ²⁴ Iesu Keliso ata holiiale keau abu vavae isivi ke huhuholisito Iesuu idie domo hatiale ke huhulahai vaveve toela halevalu. ²⁵ Munanae Tumuu uveve doge nahioveale kemo nahi negolahai vuvunemo ui tigei. ²⁶ Katealemo nahi nahie ebia malevei hatu halevai. Isi mole malevei itumutieve halevai mole maina mai i halevai.

6

Moleho vaveve dua vave.

¹ Di haokuvuia, evievi ata moleu vaveve toela vage la oleuoleu Munanae Tumumo negolahaleau ata ke tedahoi haivuge vaveveve inutolotoloi. Isito saiaivoi avuho louve. Isi la ebika nenigeveve. Onoilata lata vaveveve toela nahate vama. ² Mole toela kemo mole tedaevei mole haiveve. Katealemo laeabuna Keliso menaka ke ehovave. ³ Mesoho ata moleu huhuai avoe, "Dau baluga. Di ata mole tedaholivebene." Keu kateaimo ua ebika lobohavoi ata baluga holiololu. ⁴ Isito nahi igaegae nahie vaveve elehai loui kosea, "Di vamale kou duave. Emena tolanu." Ige nahie vaveveve dua vage nahiabuna kemo vahaeholahi hilokage nahie vaveveve inutolotoloanu. Nahi katelahaito ata moleu vamale ke elehai loui kosea. "Kena duave. Emena tolanu." Nahi kate halevai. ⁵ Kosealemo ata igaegae abuna abu vamale ke ibina malei.

⁶ Ata oleu hoto seleve loui la haivege ata ke tedahoi lovi omisi kunaita omive.

⁷ Lainaho dolodolohalalive. Kosealemo atabeu bae Dilava lobohavolivebene. La hilokage nahi bulumo onole hale ke nahie biaebuna tota ke lovoi. ⁸ Di louale keu koseanu. Nahiabuna vavae isivi vai tiliege gabie nahiabuna haluvisi. Isito nahiabuna Munana Tumue isivi vai tiliege gabie ukolikoli malei. ⁹ Iale nahie vaveve dua vamale ke nahi kabebihavo halevai. Nahiabuna ke kabebihavoholiliege vaniveu lohoge nahiabuna nahi vamale ke ibina malei. ¹⁰ Katealemo Dilavau humaha alavoge nahi ata bahata tedaevegei. Isito kebia vigomo evievi ata kebia tedaeve dua vagei.

Bolo hotoe gabi isi vahaehove hoto

¹¹ Di louge ata moleu levaleva ko hisalianu. Isito levaleva kou gabiho vage di biageike di adala ko hisaliage la elehage hisali kou baluga. ¹² Di isivialeike ehue di louale hoto ke lou moleai. Osialemoike ata keau isiviale la vudie vate bohisi. Kosealemo keau Diue ata vabugevei isiviholialeike Diue ataeau vatehani oveliho. Kemoike abu isiviai la vudie vate bohige iviabeu balugai. Keau isiviholialeike Iesuu idie domo hatiale hoto ke unaha lougeliho. Abuna katelahai hoto ke unaha louge Diue ataeabuna vatehani ovei. ¹³ Vudie vate bohiale ata keau Diue menaka bahata ehovaholima. Isito keau isiviai la vate bohisi kemo elike abu ebika tabagevei loui kosea, "Ata keau no hoto evisi malu." ¹⁴ Keau katelahama. Isito dau bae kateai di ebika ebagemalivebene. Dana nahie Kosive Iesu

Kelisou idie domo hatiale hoto ke unaha loui ebagemai. Kosealemo Iesuu hatiale kemo vatae vaveveu bae di malivebene. Ige di bae vatae isivi valivebene. ¹⁵ Mesohe nahi nahie vudie vate bohisi o bohioholige keu keti baluga holioholinu. Isito nahi subuta vamale ke halevai vaveve doge vage keu baluga. ¹⁶ Iale ata oleuoleu abu uvevemo vaveve kateale valiege abuna ue dua vai Dilava ata seleve holisi. Ige Dilavana kebiaho uvuai kebia tetaevegei.

¹⁷ Di hotou kemo kateai ua. Iale lainaho di aiohavolive. Kosealemo di Iesu lovi vasege ataeau dahavoge di vavau oheai samaguale kemo la hilokage dau Iesu esemu seleve.

¹⁸ Di haokuvua, di isivialeike nahie Kosive Iesu Kelisou vani bahata la huhuevei la hoesegevegei. Di hotou kemo kateai gabianu.

Evesasi

Bolou Evesasi ekalesiaho hisialiale

¹ Dau di ivilike Bolo. Dilava isivimo di Iesu Keliso abostolo holisi lovine vama. Dilava ataeau Evesasi oe umale la kebiahoike di levaleva ko hisialiai hanavonu. Di hilokage la keau la evievimo negolahai Iesu Kelisomo uma. ² Iale di isivialeike nahie Mama Dilava isi nahie Kosive Iesu Keliso keau la huhuevei la hoesegevege lana ue dua vave.

Dilavau Iesu Kelisomo nahie malevenu.

³ Di isivialeike nahi nahie Kosive Iesu Keliso ke Mama Dilava hoesehavoi. Kosealemo keu Iesu Keliso hanavoale kemo nahie hoesegeveime otogoe vuvune bahata nahiovege keu nahie uvu negotievenu. ⁴ Dilavau vata vaholisito nahi huhuevei isivialeike Iesu Kelisou nahie malevege nahi atave holisi. Keu isiviale nahie vaveve hoesegevege nahie uvevena nivemo inutolotoloi. ⁵ Dilavau nahiho isivi balugale kemoike au nahie huhuevei isivialeike Iesu Kelisou nahie malevege nahi atave holisi. Dilavau au isivi unahamo vaveve kateale vanu. ⁶ Iale nahi ke hoesehavo dua vai. Kosealemo keu au uvu bahata mai nahiovenu. Isi au ibinavesite au uvue mo mai nahiovege nahi kemo atave holilu.

⁷ Iesuu au tahota nahie toela ibina vage Dilavau nahie toela bahata ulihanu. Dilavau au uvu mai nahioveale keu balugataho seleve. Kemoike au nahie toela ulihanu. ⁸ Au au uvu bahata mai nahioveale kemoike nahi vaveveve hilokai lulelelahalu. ⁹ Nahi subuta vaveveve kemo luleleholilu. Isito au aike au isivimo nahie haivege au gabie Iesuemu vadeu vaveve ke nahi hilokalu. ¹⁰ Nahi hilokage Dilavau louale vani kena lohoge otogoe umale isi vatamo umale keabuna bahata Iesu Keliso ke adae valamo igaetoai ui. Ige auna kebia bahata Kosive holisi.

¹¹ Iesu Keliso kemoike Dilavau nahiho onobenobe otoveale ke nahiabuna malei. Kosealemo Dilavau subuta nahie huhuevei nahi tabagevege nahi aike atave holilu. Keu subuta au isivimo onobenobe bahata huhuevei avoe, "Koeabuna katelahai." ¹² Keu kateai nahi tabageveale kemo no oleuoleu vasohuta Iesu Keliso huhulahai ehovale noeabuna Dilava hoesehavoi ivive ebagevai.

¹³ Ige lata katelahave. Kosealemo no subuta hotoe dua loui la haivege la ke eviale kemo lana ukolikoli maleve. Ige Dilavau au subuta louale Munanae Tumu ke laovege la kemo hilokage laeau atave selevea. ¹⁴ Dilavau au Munanae Tumu nahioveale kemo nahi hilokage nahiabuna gabie Dilavau nahiho onobenobe otoveale ke malei. Isi kemo nahi hilokage Dilavau nahie toelae ibina vale kemo auna lohoniege nahie malevei. Katealemo nahi Dilava hoesehavoi ivive ebagevai.

Bolou ekalesiaho Dilava imihamale deiada

¹⁵ Di evige la hoto seleve ke evisi nahie Kosive Iesu Keliso ke ehovai Dilava ata bahataho isivilahai kebia tedaevema. ¹⁶ Di hoto ke evisi vahaehoai vani bahata laheho Dilava imihai guliguliamu. ¹⁷ Di laheho guliguliai nahie Kosive Iesu Keliso ke Mama imihama. Dilava keu atagae Mama. Iale di ke imihai isivialeike keu au vaveve la haivei negotiegege lana kemo lulelelahai vaveveve hilokave. ¹⁸ Di imihai isivialeike au la uvu alavoi lulele laovege lana kemo au la hohavei laheho onobenobe otoveale ke hilokai huhulahai uve. Dilavau au ataho onobenobe otoveale keau balugataho. ¹⁹⁻²⁰ Di guliguliai isivialeike la hilokage Dilavau vuvune baluga mai evievi ata nahiovenu. Iesu Kelisou hatige Dilavau hatihatimo etuvale vuvune keu vuvune ke nahate. Keu vuvune kemo Keliso mai otogoe au ada inuteveatae mamonu. ²¹ Ige keu keve ui otogoe ata isi vatae kosive kebia bahata evigevei Kosive baluga holinu. Iale oleuoleu vatae vuvune malei otogoe vuvune maleale keau bae ke evihalivebene. ²² Dilavau onobenobe bahata malei velove heimo otovei ebagemage keu onobenobe bahata nalisi ekalesia bahata kebia kina holinu. ²³ Ige ekalesia keau Iesu vava nahate. Ige Iesu keu ekalesia bahata kebia kina. Iale kena ekalesia kebia bahata vuvune ovege abuna avu nahate vagei.

2

Nahi Kelisomo uveve dogu malelu.

¹ La subuta Dilava hoto evioholisi vaveve toela vamale kemo laeau haluviale ke nahate valu. ² Vani kemo la vatae vaveve ehovai Vatae Kosive ke isivi vama. Vatae Kosive keu ata oleuoleu Dilava hoto evioholimale kebia nibievema. ³ Nahi bahataeau subuta ui kebiahi vaveveabe ke nahate vama. Vani kemo nahi nahie vavae isivi vai huhuihuhue toela

unaha huhuievema. Nahi ata kebia nahate vai uvue isivi vamale kemo Dilavau nahita kebiataho itumuanu.

⁴ Isito Dilava keu aike nahiho uvuai nahiho isiviai nahi tetaeveale keu balugataho. ⁵ Katealemo nahi subuta vaveve toela vai haluviale ke nahate vasege Dilava keu Keliso hanavoge keu nahie tetaevege nahi kemo uveve dogo malelu. Dilavau au uvu bahata mai nahioveale kemoike au nahie toelamo nahie malevenu. ⁶ Iesu Keliso nahie tetaeveale kemoike Dilavau nahi tabagevege nahiaabuna Iesuluvuta tiliege otogoe igaetolahi ui. ⁷ Dilavau au uvu mai nahie ovei Iesu Kelisomo nahi tetaevei isiviale ataeau aike umale isi gabie uveve keabuna bahata hilokage Dilavau kateale nahiero vale keu balugataho. ⁸ Dilavau au uvu nahiovei nahie toelamo nahi maleveale kemo nahi hilokage Dilavau nahiho isivi baluganu. Isito nahi hilokage Dilavau nahie vavevemo nahi maleveholisito au isivimoike nahi malevenu. ⁹ Nahi uveve dogo maleale kemo nahi nahie ebika tabageve halevai. Kosealemo nahi vadeu vamale kemo Dilavau uveve dogo ke nahioveholinu. Isito au isivimoike au ke nahiovenu. ¹⁰ Dilava keike Iesu Kelisomo nahi malevei uveve dua nahiovenu. Au kateai isivialeike nahi atave holisi vaveve dua vai au subuta lovi vadeu nahiho mamoaale ke nahi vai.

Nahiau Iesu Kelisomo mole nahate unaha.

¹¹ Di hoto mole louge evive. Laeau Diue ata holioholilu. Iale Diue ataeabuna la mattigeve i la ivi aiahavo i laheho loui kosea, "Noeau vaveve dua vai no vudie vate bohilu. Isito laeau no vale ke nahate vaholilu. Iale kemo laeau Dilava ata holioholilu." Keabuna laheho kateai loui. Isito vaveve keu atae vaveve unaha. Iale la subuta vale ke huhulahave. ¹² Vani kemo la Kelisoluvuta igaetoholilu. Dilavau subuta Diue ata tabagevege abu atave holilu. Isito la keau ata molea. Dilavau subuta Diue ataho hoto loui mamoi avoe, "Dana la hoesegevege lana ue dua vave." Isito la kebiaho hoto kateale louholinu. Kosealemo laeau vatave vaveve vai gabie otogoe tiveve ke huhulahaholisi Dilava hilokaholilu. ¹³ La subuta Dilavamo haeavamole. Isito Iesu Kelisou hatiale kemo Dilavau la malevege la aike avuluvuta igaetolahi ua.

¹⁴ Iesu Keliso kemoike nahi bahata molehi ue dua vama. Subuta Diue ata isi Diue ata holioholiale keau moleho itumulahi mole tasalievei lilikate ua. Isito Iesuu aike humaha alavoge nahi ata igae holisi molehi ue dua vama. ¹⁵ Iesuu humaha alavoale keu koseanu. Diue menaka kemo Diue ata isi Diue ata holioholiale keau molehi ugologoloi ua. Iale Iesuu au hatihati kemo Diue menaka ke vuvune aiahavoge uoholinu. Keu kateai isivialeike Diue ata isi Diue ata holioholiale keau avuluvuta igaetoai ata igae holisi. Katealemoike nahi molehi ue dua vama. ¹⁶ Nahi subuta molehi igaetoholisito molehi ue toela vama. Isito Iesuu idie domo hatiale kemo isiviale Diue ata isi Diue ata holioholiale nahi bahata vava igaemo molehi igaetolahi Dilava ata holisi ue dua vai. ¹⁷ Iesu Keliso keu dohai lohoi hotoe dua louale kemo au isiviale Diue ata holioholialeau Dilavamo haeavamole umale isi Diue ataeau Dilava vavamo umale keu bahata molehi uveve dua vai. ¹⁸ Katealemo Iesu humaha alavoge nahi bahataebuna Munanae Tumuluvuta humaha igaela nahie Mama Dilavae tai.

¹⁹ Katealemo Diue ata holioholiale la keau haeavabia holioholilu. La subuta ata mole holilu. Isito Dilavau aike la malevege la atavehi igaetolahi ese igae holilu. ²⁰ Di louale keu koseanu. Laeau Dilava o nahate. Iesu Keliso keu hade tolote nahate. Ige abostolo isi beloveta keau hade golomo idi hatuale ke nahate. Isege laeau idi ke golomo o hou etatavoale ke nahate. ²¹ Iesu keike o ke bahata hadebige keu negoai lamisi balugai ui o tumute holige Dilavau avuemo ua. ²² Iale laeau Dilava o tumute ke nahate. Iesu Kelisou la malevei la negotievege la molehi igaetolahage Dilava Munanae Tumuu lahehi ua.

3

Bolou Diue ata holioholialebiaho loviale deiada

¹ Dilavau au lovi mai daoge di Iesu Keliso ivimo lovi ke vai Diue ata holioholiale la haivema. Di lovi ke vaika valage abu di mai dibulae mavolu. ² Di huhuige laeau di vamale deiada ke evilu. Dilavau au uvu mai daoi au lovi ke mai daoge di lovi ke vai la tetaevenu. ³ Dilavau au subuta au hoto nehe mahogovale ke loui di haivuge di ke hilokaike vaima laheho levaleva komo benahatehame hisalianu. ⁴ Lana di levaleva ko dodaveliege Dilavau subuta Keliso vaveve mahogovale kemo di luleleale ke hilokave. ⁵ Dilavau subuta vaveve ke loui ata haiveholinu. Isito au aike au Munanae Tumu hanavoge keu hoto ke loui au abostolo tumute isi au beloveta tumute kebia haivege abu ke hilokalu. ⁶ Au subuta mahogovale hoto keike ko. Iesu Keliso hotoe dua keu Diue ata holioholiale kebiae tige keu ke evisime Diue atahi igaetolahi ata igae holige

Dilavau kebia bahata hoesegevenu. Katealemo Diue ata holioholiale keabuna Diue atahi igaetolahi Iesu Kelisomo Dilavau au ataho louale ke abuna malei.

⁷ Dilavau di ebagemai au uvu mai daoge di esemuve holisi vuvuneve balugamo hotoe dua ke loui ata haivema. ⁸ Di lovi ke vaito di huhuige dau Dilava ata kebiamo baluga holioholinu. Dau kebia valae ua. Isito Dilavau di ebagemai di hanavoge di Diue ata holioholiale kebiae tiniale Iesu Kelisou abuhu onobenobe dua vamale ke bahata loui haivenu. Iesuu abuhu vile vale moaga otoveale ke nahi bae dodavelivebene. ⁹ Dilavau isiviale di ata bahata haivege abu kemo hilokage Dilavau ata bahatamo au ata malevema. Dilava keike vata vai onobenobe bahata vaveito au ata bahatamo au ata maleveale ke mahogovai subuta ata kebia namigeveholinu. ¹⁰ Isito Dilavau aike ata bahatamo au ata malevei isivialeike abu ekalesia holige otogoe vuvuneteau isi aneluiua ke elehai hilokage Dilava keu kemo lulele baluganu. ¹¹ Subuta vatau uoholisege Dilavau Iesu vaveve ke huhuai halege ua. Iniale vani mole au louge nahie Kosive Iesu Kelisou hotove ke mai selevetinu. ¹² Ige nahi nahie uvu mai avuemo mavoale kemo nahiaabuna avuluvuta igaetolahi vabuoholisito negolahi Dilava imihagei. ¹³ Katealemo di la namigevege evive. Lainaho di aike vatehani maleale ke huhulahi negoholilive. Isito negolahave. Kosealemo di la tedaevelihoike vatehani ko malenu.

Bolou tota ekalesiaho gulguliale deiada

¹⁴ Dilavau au uvumo Iesu vaveve huhuale kemoike di kome bokoai vata bisi nahie Mama ke imihama. ¹⁵ Dilava kemoike otogoe umale isi vatae umale evievi ata bahata keau ivive malu. ¹⁶ Nahie Mama Dilava ke vuvuneu balugataho. Keu otogoe ui onobenobe bahata ke kina. Kemoike di ke imihai isivialeike au au Munanae Tumu laoveale kemo vuvune laovei la uvu mai negotige lana kemo negolahi ugeve. ¹⁷ Lana la evievimo negolahi uge Kelisona la uvumo ui tigei. Di laheho gulguliali isivialeike la moleho isivilahai mole tedaevemale vaveve keu laemo balugage idie alumuu vatae uvue dobai tige idiu negoale ke nahate lana negolahave. ¹⁸ Lana katelahaliege Dilava ata bahatahi Kelisou laheho isiviai la tedaeveale ke hilokai lulelelahave. Kelisou laheho isiviale keu eseve holioholinu. Isito isivive keu balugataho. ¹⁹ La bae au laheho isiviai la tedaeveale ke bahata hilokalivebene. Isito Kelisou laheho isiviai la tedaeveale ke lana kaovai hilokage Dilava vaveve bahatana laemo balugai. Katealehoike di vani bahata gulguliali laheho Dilava imihama.

²⁰ Dilava keu negote. Ke vuvuneu nahie uvumo ua. Iale mesoho nahiaabuna vadeu huhulahi imihage keu bae avuemo isualivebene. Isito auna nahie isivi ke evihai moaga nahiovei. ²¹ Dilavau Iesu Keliso hanavoge ekalesiaho humaha vale kemo nahi vani bahata ivive ebagevai hoesehavoage ivivena vani bahata balugai ui tigei.

4

Nahi Munanae Tumue vuvunemo igae holilu.

¹ Di la namigevege evive. Di Kosive lovi vamale kemoike abu di mai dibulae mavoge di aike kove ua. Isito di isiviale Dilavau la hohavei uveve dua laoveale kemo negolahi vaveve dua vageve. ² Lainaho la ebika tabagevelive. Isito mole huhuevei mole hoesegeveve. Lainaho moleho itumulahalive. Isito moleho isivilahai mole tedaevegeve. ³ Munanae Tumuu la malevege la ata igae holiale kemo negolahi molehi igaetolahi ue dua vageve. ⁴ Munanae Tumu igaevu nahie malevege nahi Iesuluvuta vava igae holisi otogoe tiveve ke igae huhulahama. ⁵ Nahie Kosive ke igaevu balugalemo avuemo evievi igae, babatisoe humaha igae. ⁶ Ige Dilava keu nahie Mama igae. Isi nahi bahatae Kosive. Keu vani bahata nahie ui nahie negotievema.

⁷ Kemoike nahi bahata ata igae. Isito Kelisou au vuvunemo au lovi igaegae nahiovenu. ⁸ Keliso vaveve kemo Bukae Hotou koseale lounu. Avoe, "Au ehudae taliho Seteneu atave aiogevemale kebia toelamo haliohatuito lovi igaegae au ata ovenu." Bukae Hoto keu kateanu. ⁹ Isito au ehudae tiale ke ihuিকে vadeu. Ke ihuu koseanu. Keu vasohuta au o halei vatae dobai lohonu. ¹⁰ Dobai lohoale ata nehe ke igaeike tota hoilahi otogo bahata evihai au oe tinu. Keu keve tiale onobenobe bahata ke baluga holisi nibievema. ¹¹ Iale Keliso keike au isivie lovi igaegae ata ovenu. Keu kebia tabagevei vuvune ovege degomoleau abostolo lovi vama. Isege degomoleau beloveta lovi ke vama. Isege degomoleau o igaegae ohanoi ata haivemale lovi ke vama. Isege degomoleau ekalesia nibievemale lovi ke vama. Isege degomoleau ata haivemale lovi ke vama. ¹² Keu kebia tabagevei vuvune ovei isivialeike keau lovi ke vai atave haivei tedaevege abu abu evievimo negolahi Keliso ata degomole haivege keabuna negolahi. ¹³ Keabuna katelahage nahiaabuna bahata igaetolahi nahie evievimo negolahi Dilava mo ke vavevemo lulelelahai. Nahiaabuna katelahage nahie evievi kena balugage nahie vavevena Iesu vaveve nenita ui.

¹⁴ Katealemo nahi bae nahie evievimo esebulue vaveve nahate valivebene. Loboe ata keabuna lohohi esebulu lobogevege abuna hotoeabe evisi mai. Isito nahi kate halevai. Mesoho loboe ataeau lohohi hoto nimolete loui nahi lobogevege nahi hotoeabe ke ma halevai. ¹⁵ Nahi ke ma halevaito hoto seleve loui moleho isivilahai mole tedaevai. Nahiabuna katelahaliege nahi baluga Keliso ke vaveve bahatamo negolahagei. ¹⁶ Keliso keu ekalesiaie kina nahate. Ige ekalesia keau vavave nahate. Nahie vavamo nahie ada nahie velo nahie ni keabuna kinae isivi unaha vagei. Ke nahate nahi igaegae Keliso valamo uale kemo nahiabuna lovive vai moleho isivilahai mole tedaevagege ekalesiaie vaveve kena negoai.

Nahi uveve doga malemo vaveve dua vai.

¹⁷ Katealemo di Kosive ivimo hoto loui la haivege evive. Lainaho bae evievi ata holioholiale kebia vaveve nahate valive. Kosealemo keau huhuihuhuiibe dua vaholilu. ¹⁸ Keau katelahage vavie vaveve ke unahau abuemo ua. Uvuiabeu toloige keau Dilava hotomo luleleholiale kemo abu bae Dilava ukolikoli malelivebene. ¹⁹ Nahiabuna ata katealebia vaveveabe toela abuhu loui haivege abu bae matilalalivebene. Kosealemo keau abu uvu mai vaveve duamo mavoholisito abu uvu mai vaveve toela unahamo mavoale kemo abuna ke unaha huhuluhai vagei. ²⁰ Keau katelahama. Isito laeau Iesu Kelisomo vaveve katealebe evioholilu. ²¹ No subuta tiale Iesu hoto seleve loui la haivege la ke evisi malu. ²² Katealemo lainaho la subuta vamale ke vagelive. La subuta vamale kemo vavae isivi keau la lobogevei la aiogevema. ²³ Kate halevaito uveve doga huhuluhai la uvu nenigeveve. ²⁴ Kosealemo Dilava keu tumute. Ige vaveveve keta inutolotoloanu. Keu uveve doga mai laoveale kemo la vaveve hoesegevei Dilava vaveve nahate vai ugeve.

²⁵ La bahata lainaho mole lobogevelive. Isito hoto seleve loui mole hoesegeveve. Kosealemo nahi bahataeaa atae ige ataea. ²⁶⁻²⁷ Mesoho la itumulalalialiege lainaho la itumu ke vai ulage vaniu dobalive. Lana ke mai egetiliege vaveve toela vai Seteneho humaha alavove. ²⁸ Di isiviale ata oleuoleu vavoloamale keau vavolo halevaito lovilalalive elike moni malei abu ebia tedaevai ata degomoleau kunaiholimale kebiata tedaevai.

²⁹ La molehi hotohotoaliege lainaho hotoe toela lougelive. Isito hotoe dua unaha lougeve. Ilive elike ata degomole aiogevave halevaito kebia hoesegevege keabuna la hoto kemo negolahai ue dua vagei. ³⁰ Lainaho la vavevemo Dilava Munanae Tumu mai uvutilive. Kosealemo Munanae Tumu la uvumo uale keu Dilava hisai nahate. Kemoike la hilokage Dilavana vani mole bae la malevei au matamae tai. ³¹ Lainaho mole toela ke huhu vololoai moleho itumulahagelive. Isi lainaho atae nimo mole vaveve loui moleho hotoe toela lougelive. Lainaho huhuihuhuiibe toela kateale vagelive. ³² Isito mole huhueveve vaveve dua vai mole hoesegeveve. Ata moleu laemo vaveve toela vage lainaho ke ibina valive. Isito Dilavau Iesu Kelisomo la vaveve toela ulihale ke nahate mole toela huhu halevaito ke momahavove.

5

Nahi uveve doga malemo atagae vaveve vai.

¹ Laeau Dilava uvue esea. Katealemo negolahai ehovai vaveveve nahate vave. ² Kelisou nahiho isiviai au ebia mai nahiovei nahiho hatiale keu abu subuta ovo mai Dilava nimo mahoge au ke elehai vahaehoale ke nahate. Iale Dilavau Keliso vaveve ke elehai vahaehove vanu. Ige Kelisou vale ke nahate nahata vai moleho isivilahai mole tedaevagei. ³ Laeau Dilava ataea. Katealemo vaveve toela bahata halevave. Lainaho molemo teibae vaveve vagelive. Isi huhuihuhuiibe toela vagelive. Isi lainaho mole kunai elegevei isivi omigelive. ⁴ Isi lainaho vaveve toela hoto ke loui hotou ihuholimale keta lougelive. Hotoe toela kateimale lou halevaito hotoe dua unaha loui Dilava hoesehavoageve. ⁵ La hilokage ata oleuoleu vaveve kateale vai molemo teibae vaveve vai vaveve toela unaha huhuluhai mole kunaiho isivilahamale keau bae Dilavau Kelisoti umale matamae doge keve talivebene. Ata oleuoleu mole kunaiho isivi balugamale keu kunai kena dilavaeabe holisi. ⁶ Mesoho ata moleu la uvu isi la lobogevei loui kosea, "Vaveve kateale vale keu duave." Abu kateale louge lainaho hotoeabe evisi valive. Kosealemo ata oleuoleu Dilava hoto evioholisito vaveve toela kateale vamale kebiaho Dilavana itumu balugai. ⁷ Iale lainaho ata katealebiahi igaetolahai vaveveabe nahate vagelive.

⁸ La keau subuta vavimo ui vavie vaveve vama. Isito la nova Kosive ese holisi atagamo ua. La Kosive ese holialemo atagae vaveve vaveve. ⁹ Ataga kemo vaveve koseale abuna lohohi. Vaveve dua, vaveve inutolotolote, isi hoto seleve. ¹⁰ Iale hoveveve Kosive mai vahaehotiveve vaveve ke kaovai vaveve. ¹¹ Lainaho ono moleu ihuholimale ke vagelive. Vaveve katealeu vavie vaveve. Iale lana atagamo ui vaveve kateale bamuge keu bae laemo lololivebene. ¹² Ataeau vavie vaveve kateale vai mahogovale vaveve keu toela

balugale kemo lainaho vaveve toela kateale loui mole haivegelive. ¹³ Isito vaveve ke bahata bamuve. Kosealemo Kosive atagamo vaveve keabuna bahata bae umidamo ui. Ige Kosive atagamo lana bae vaveve ke elehai hilokage vaveve oleteu duave, vaveve oleteu toelave. ¹⁴ Katealemoike Bukae Hotou loui avoe, “Ladevemale ataea, hoveveve. La keau haluviale nahate. Iale hoveveve Keliso atagau laemo halui.”

¹⁵ Hoto katealemo la uveve nenigeveve. Lainaho luleleholimale ata kebia nahate valive. Isito lulelete kebia nahate vave. ¹⁶ La onole vamale kemo vaveve dua unaha vaveve. Kosealemo la hilokage novae vani kou vanie toela. ¹⁷ Lainaho luleleholimale kebia nahate vagelive. Isito Kosive isivi ke kaovai kemo lulelelahai ke vaveve. ¹⁸ Lainaho e toela isi tilogoalve. Lana kateige kena la aiogeve. Kate halevaito Munanae Tumuu lahehi uale kemo negolahai ugeve. ¹⁹ Katelahaime moleho Bukae Hoto loui dubue nogoli lougeve. Isi nogoli kateale loui la uvumo enehavo dua vai Kosive hoesehavogeve. ²⁰ Isi vani bahata nahie Kosive Iesu Keliso ke ivimo la vaveve bahatamo nahie Mama Dilava ke ivi ebagevai hoesehavogeve.

Malaha isi keateho deiada

²¹ La Keliso vabuhavoi hoesehavomale kemo mole huhuevei mole isivi vaveve. ²² Keatea, la Kosive hoto evisi ehovamale ke nahate la kolivue hoto evisi isiviabe vaveve. ²³ Kosealemo Keliso keu ekalesiae kina holisi vaveve toelamo au ata maleveale ke nahate malahaeau keate kina holilu. ²⁴ Katealemoike ekalesiau Keliso hoto evisi isivive vamale ke nahate keate abuna abu kolivue hoto bahata evisi isiviabe vagei. ²⁵ Malahaea, Kelisou ekalesiaho isiviai abuhu hatiale ke nahate la mahinuvuho isivilahai tedeaveveve. ²⁶ Kelisou hatiale kemo ekalesiae vaveve toela ulihanu. Keu kateai isivialeike abu hotove evisi babatisolahage au kebia malevei tumutievei. ²⁷ Keu kateai isivialeike ekalesia hoesegevege elike vaveveve toela isi huhuhuhueabe toelau uoholige abu atae tumu holige auna bae au ebikaho kebia malevei.

²⁸ Malahaea, la ebika hoesegeveale ke nahate di isivialeike la keate hoesegeve dua vai isiviabemo tedeaveve. Malaha oleuleu abu keateho isivilahai hoesegeve dua vale keabuna kemo abu ebikata hoesegeve. ²⁹ Atabeu bae au vava aiohavolivebene. Isito auna au vava ke nalisi hoesehavoi. Ke nahate Kelisou au ekalesia nalievei hoesegeveve. ³⁰ Nahiau Keliso ata holisi vavave nahate holilu, Kemoike au nahie nalievema. ³¹ Kemoike Bukae Hotou loui avoe, “Malaha molena au mamata au neinata halevei au keateti igaetoaniege avuti vava igae nahate vai.” ³² Mole holoeveale hoto kemo hoto mole selevue ua. Hoto keu koseanu. Kelisou ekalesia kebiahi igaetoale keu mole holoeveale ke nahate. ³³ Deiada keu kateanu. Isito malahaea, la la vava hoesegeveale ke nahate la keateho isivilahai hoesegeveve. Ige keatea, lata la kolivue hoto evisi isiviabe vave.

6

Ese isi mamuvu neinuvu deiada

¹ Esebuluua, Kosiveu isivialeike la la mamuvu neinuvue hoto evisi vave. La vaveve kateale vage duave. ²⁻³ Kosealemo Dilavau subuta menaka molemo loui loui avoe, “La mamuvu neinuvu kebia hoto evisi hoesegeveve.” Menaka kemo Dilavau hoto mole tumute loui loui avoe, “Lana katelalahalige vata komo ue dua vage la uvevena egeai.” ⁴ Ige mamuvu, neinuvuua, lainaho vani bahata la eseho hoto tolote lougelive. Lana katelalahalige keabuna laheho itumulahai bae la hoto evilivebene. Isito Dilava hoto loui haiveve. Isi abu humaha hosidige kemo luleleabe vave.

⁵ Heiata loviyamale ataea, vatae kosive oleuleu la malevege la abuemo lovilalahalige kebia hoto mai vabugevei hotoeabe evive. Lainaho kemo dolodololahagelive. Isito la Keliso hoto evisi hoesehavomale ke nahate kebia hoto evisi hoesegeveve. ⁶ Lainaho huhulahai kosea, “No kebia nimo lovie dua vage abu no elegevei no tabagevei.” Lainaho kateale huhulahagelive. Isito la Iesu Keliso esemu holiiale kemo la uvu bahata mai Dilava omisi isivive vai vatae kosive kebia lovi vae dua vageve. ⁷ Kosealemo laeau vatae kosive kebia lovi unaha vaholima. Isito la Iesu Keliso lovi vamale ke nahate vahaeho unahamo kosive kebia lovi vageve. ⁸ La hilokage ata oleuleu vaveve dua vamale ke ibina Kosivena ovei. Halege heiata loviyamale, mesoho au ibinaho loviyamale keau Dilava nimo mole nahate. Kosivena kebia bahata ibina ovei. ⁹ Ige ata nalievemale kosivea, lainaho la esemuhu vabue vaveve hoto lougelive. Isito abu la hoesegeveveale ke nahate lata kebia hoesegeveve. La hilokage laeau laemo heiata loviyamale kebiahi ehue Kosive ke nimo mole nahate. Kosive kena bae la bahatae vaveve kaovai laheho loui.

Dilavau Setene lobo bamuveve onobenobe nahiovenu.

¹⁰ Iale di haokuvuia, di hotoe gabi louge evive. Kosive kemo negolahai vuvuneve kemo ugeve. ¹¹ La hilokage ataeabuna mole haveliho tiliege mole haveveve onobenobe malei tai. Ke nahate Dilavau Setene lobo ke bamuveve onobenobe laovenu. Iale hoveveve au laoveale kemo negolahai Setene lobo vaveve ke bamui uve. ¹² Di louale keu koseanu. Nahiau ata haveveve ata holioholilu. Isito nahiau Seteneluvuta mole havei atavehi mole haveveve ataea. Setene munanae toela keau moaga. Degomoleau vatamo vuvune balugai vavie vaveve vama. Isege degomoleau otogomo vaveve toela vama. ¹³ Katealemo hoveveve Dilavau onobenobe laoveale ke bahata maleve. Lana katelahaliege vanie toelau laemo lohoge lana kemo negolahai Setene vaveve ke bahata aevevealemo lavie dua vai. ¹⁴ Iale hoveveve Dilavau laoveale ke malei la ebiamo hatuve. Hoto seleve ke beleta nahate. Iale beleta ke mai la unimo beive. Dilava vaveve inutolotolote keu ivuka bamumale ke nahate. Iale ke mai hatuge au la ivuka bamui. ¹⁵ Dilava uveve duae hoto mai tai ata haivemale keu veloe vate nahate. Iale ke malei velomo otovave. ¹⁶ La evievi keu mihisi nahate. Iale lana ke mai la ebia bamuge Setene bi vuvuneteu bae laemo dalivebene. ¹⁷ Ige Dilavau hatihatimo nahie maleveale keu tuvali saneka nahate. Iale saneka ke mai la kina hanubeve. Ige Dilava hoto keu benisi nahate. Iale Dilava Munanae Tumu hoto ke mai laoveale ke mataha tumuave.

¹⁸ Vaveve ke bahata vai vani bahata guligulilahi Dilava imihageve. Lainaho guliguli ke kabibihavogelive. Isito Dilava Munanae Tumue vuvunemo negolahai Dilava ata bahataho Dilava imihage au kebia tedaevei. ¹⁹ Isi dataho gulililahave. Ige Dilavau dahoe humaha alavoge di vabu haleito negoai hotove loui kove ata haivei. Di isivialeike negoai Dilavau subuta hoto mahogovale ke loui ata haivege abu ke evisi hilokai. ²⁰ Di subuta hoto ke loui ata haiveike valage abu di mai dibulae mavoge di aike dibulae ua. Isito dahoe guligulilahage elike di vabuholisito negoai hoto ke loui ata haivegei.

Hotoe gabi

²¹ Di deiadau kemo kateai ua. Isito di hoto molehame louge evive. Nahie uvue haoka, Tikikasi kena bae di vaveve bahata loui la haivei. Keu Kosive lovimo negoimale ata. ²² Katealemo dana ke hanavoge auna lae tai. Di isivialeike au di vaveve bahata loui la haivei la uvu mai negotievei. ²³ Di hotou gabianu. Isito di isivialeike nahie Mania Dilava isi nahie Kosive Iesu Keliso keau uveve dua mai laovege lana la evievimo negolahai moleho isivilahai mole tedaevegeve. ²⁴ Ata oleuleu seleveta abu uvu mai nahie Kosive Iesu Keliso kemo mavoge di isivialeike Dilavau kebia huhueveve hoesegeve.

Bilibai

Bolou Bilibai ataho hisaliale

¹ Bolou isi Timoti noeau Iesu Keliso esemuia. Dilava ataeau Bilibai oe umale laheho no levaleva ko hisaliali hanavoma. Eloda, dikini, ekalesia la bahataho no ko hisaliali hanavoma. ² Di isivialeike nahie Mama Dilava isi nahi Kosive Iesu Keliso keau la huhuevei la hoesegevege lana ue dua vave.

Bolou ekalesiaho guliguliama.

³ Di vani bahata la huhuevei Dilava hoesehavoi laheho ke imihama. ⁴ Di vani bahata vahaehomo laheho guliguliama. ⁵ Kosealemo di vasohuta lae tiale hotoe dua loui la haivege la ke evisi kemo negolahalata nova kotala vai tima. ⁶ Katealemo di hilokage Dilavau au hotoe dua kemo la negotievei lohemale au bae la halelivebene. Isito auna la negotievelage Iesu Kelisona dobai lohoi. ⁷ Di uvu bahatau lae ua. Kemoike di vani bahata la huhuevei laheho guliguliama. Dilavau nahi tedaevei au lovi mai daoge la di tedahoge nahi lovive ke vama. Di subuta dibulae uoholisege la di tedahoge di hotoe dua loui ata haivema. Isi di nova dibulae usege la ketamo di tedahoma. ⁸ Dilavau hilokage di louale kou seleve. Iesu Kelisou au uvu laoveale ke nahate di uvu bahatau lae ua.

⁹ Di laheho guliguliali isiviale la moleho isivilahai mole tedaeveale keu ui tigei. Lana katelahaliege Dilava vavevemo lulele balugave. ¹⁰ Isi lana lulele kemo huhulahai hilokage vaveve oleteu duave, vaveve oleteu toelanu. Lana vaveve dua unaha valage Iesu Kelisou lohemale vani kela la vaveve keabuna nivemo inutolotoloi. ¹¹ Lana katelahalage Iesu Keliso kemo la vaveve bahataebuna inutolotoloi Dilava ivi mai hoesehavotisi.

Bolou dibulae uale deida

¹² Di haokuvuia, di isiviale hilokave. Abu di mai dibulae mavoale keu hotoe dua ke bamuoholinu. Isito hotoe dua keu ata bahata sonumai tinu. ¹³ Ige bukateau gamani kosive o nalimale isi ata bahata kove umale keau hilokage dau Keliso esemu holiane kemoike abu di mai dibulae mavolu. ¹⁴ Di dibulae uime vabuholisito ata haivema. Ige evievi ataeau vaveve kateale elehai abuta vabuholisito negolalahai ata haivema.

¹⁵ Evievi ata kebiamo degomoleau daho isiviholisi di maina mai isi loui avoe, “Noe-abuna Keliso hotomo negolalahai Bolou evihai tai.” Isito degomoleau uvue duamo hotoe dua loui ata haivema. ¹⁶ Ata keau daho isiviai kateale vama. Kosealemo abu hilokage Dilavaike au lovi mai daoi isiviale di hotove loui ata haivege abuna hilokage Dilava hoto ke seleve. ¹⁷ Abu daho isiviholimale ata keau abu uvu selevemo Keliso hoto loui ata haiveholima. Isito keau abu uvumo huhulahai isiviai di evihai balugai. Abu huhulahai kosea, “Bolou dibulae usege no vaveve kateale vage Bolona ke evisi no maina mai isi.”

¹⁸ Isito keta duave. Di vaveveabe evisi vahaehoanu. Kosealemo keau bahata Keliso hoto loui ata haivema. Degomoleau abu uvu seleveta hoto ke loui ata haivema. Isege degomoleau abu uvue lobomo hoto ke loui ata haivema. Di ke evisi vahaehoanu. ¹⁹ Di huhuige la daho guliguliage Iesu Keliso Munanae Tumuna di tedahoge abuna dibulamo di iovage dana tai. ²⁰ Di uvu bahatamo huhuige di bae Iesu hoto kemo matiai lovive ke halelivebene. Isito dana lovive kemo negoai di vaveve bahatamo Keliso ivi ebagemai. Di uge keu duave. Di hatige keta duave. Di ke huhuoholisito isiviai vani bahata Keliso ivi ebagemagei. ²¹ Dau di uveve ke huhuholima. Di uge Kelisona daiti ui. Di hatige keta duave. Dana kemo ehue tai ue dua vai. ²² Katealemo di dolodoloanu. Mesoho di uniege Keliso lovi vage lovive kena daemo balugai. ²³ Isito di uvu abuanu. Di isiviai hatai Iesu Kelisoti ui. Keu duave seleve. ²⁴ Isito di vatae uniege la tedaevege keta duave. Di hatige olena la tedaevei. ²⁵ Katealemo di huhuige di bae hatilivebene. Isito dana lahehi ui la tedaevei. Ige lana la evievimo negolalahai vahaeholahave. ²⁶ Iale vani mole abuna di iovage dana deiai lohoge lana tota di elehai Iesu Keliso ivimo vahaeholahave.

²⁷ Mesoho di lohoma. O mesoho di lohoholima. Isito mesoho di lohoholige Iesu Kelisou au hotomo louale ke unaha vageve. Lana katelahage dana ke evisi hilokage laeau uvu igaemo negolalahai Iesu lovi vai hotove dua loui isiviale ata haivege abu evievi ata holisi. ²⁸ Isi ata degomoleau la aiogeveliho hotoe toela loumale kebia vabugeve halevave. Isito la evievimo negolalahave. Ige la aiogevemale ata keabuna ke elehai hilokage Dilavana nego laovei la maleveito kebia aiogevai. ²⁹ La la uvu mai Iesu Kelisomo mavoale kemo la bae ehova unahalivebene. Isito lana Dilava isivimo vatehanita malei tigeve. ³⁰ Di subuta vatehani maleale ke la elehalu. Isi di nova tota vatehani maleale keta la evilu. Di vatehani maleale ke nahate lana lata nova maleve.

2

Nahi Iesu vaveve nahate vai.

¹ Di la namigevei. Lana la uvu mai Kelisomo mavoi negolahalu. Auna au isivi laovei la hoesegevenu. Lana Munanave Tumu mage lahehi ua. Lana moleho uvulahai mole hoesegevei mole tedaevema. ² Lana katelahasege dana ke evisi vahaehoigei. Di isivialeike uvu igaeai huhuihuhui igaeave. Isi kemo moleho isivilahai mole tedaeveve. ³ Lainaho la ebika anaha huhulahai la uvu tabagevelive. Isi lainaho huhulahai kosea, “*Dau baluga. Isege ata degomoleau eseve.*” Lainaho katelahalive. Isito la ebika tatolevai molemo vaveve dua vave. ⁴ Lainaho la ebia igae huhuevelive. Isito mole huhuevei mole tedaeve dua vave. ⁵ Iesu Kelisou vamale vaveveve ke nahate lata vageve. ⁶ Iesu keu Dilava. Isito au Dilava vuvune maleale ke huhuholisito ke bahata halenu. ⁷ Keu au isivimo ke bahata halei vatae lohoale keu kosive baluga holioholisito esemu nahate holinu. Isi atae elehilehi nahate holinu. ⁸ Iesu keu kateanu. Keu au ebika ebagemaholisito Dilava isivi vaime abu atae toela idie domo havemale ke nahate vaime mai idie domo hamalu. ⁹ Keu kateai Dilava isivi vage Dilavau etuvai ebagemage keu ehue tinu. Ige Dilavau ivive ebagemage atabeu ivive nahate uoholinu. ¹⁰ Katealemoike Dilavau isiviale vanie gabila ata bahata keabuna Iesu ivi hoesehavoi. Otogoe umale, vatae umale isi kumoe umale kebia bahataebuna kome bokoai vata bisi Iesu hoesehavoi. ¹¹ Keabuna bahata hoesehavoi loui kosea, “*Iesu Keliso keu Kosive baluga.*” Keabuna katelahaimo Mamave Dilava keta hoesehavoi.

Atage vaveve unaha vageve.

¹² Di uvue haokuvuia, di subuta lahehi usege la di hoto evimale ke nahate nova di hoto evive. Di nova lahehi uoholinu. Isito hovedevei Dilava vabuhavoi ukolikoli maleveveve ke huhulahai la vaveve hoesegeveve. ¹³ Kosealemo Dilava keike vani bahata lahehi ui nego laovei isivialeike la hotove evisi isivive vagei.

¹⁴ Lainaho ogoloi moleho loui itumulahalive. Isito lovi bahatamo lovie dua vageve. ¹⁵ Katealemo lana vaveve inutolotolohave. Lana katelahage Dilavau bae laemo vaveve toela elehalivebene. Ige vaveve toela vamale ataeabuna la atage vaveve elehai hilokage laeau Dilava esea. Vaveve toela vamalebia vigomo lana atage vaveve vageve. ¹⁶ La uveve duae hoto ke loui ata haivemalemo vanie gabi kela Iesu Kelisou lohoge di bae matialivebene. Isito dana di laemo lovie dua vamale kemo vahaehoai.

¹⁷ Abuna dahavoge di hatige keta duave. Di hilokage laeau la uvu mai Dilava omisi lovie vai hoesehavoma. Ialemo di hatihati kemo la evievi kena balugage dana vahaehoai. ¹⁸ Katealemo di isiviale nahi bahata vahaeholahai.

Timoti isi Ebavodaitasi

¹⁹ Nahie Kosive Iesu kena isiviage dana Timoti hanavoge au tige bae elehave. Auna tiniege hoillahai lohohi la vaveve hoto louge dana evisi vahaehoai. ²⁰ Atabeu di teda-hoveveve uoholinu. Isito Timoti ke igaeu la huhuevei isiviai la tedaevei. ²¹ Ige ata degomoleau Iesu Keliso lovi ke huhuholisito abu ebia unaha huhuevema. ²² Isito la hilokage Timoti keu lovie dua vamale ata. Keu di mo nahate. No avuti uime hotoe dua loui ata haivema. ²³ Di huhuige dana bae hanavoge au lae tai. Isito di isiviholinu solekai hanavoliho. Dana vasohuta abu daemo vadeu vaveve ke hilokaito bae hanavoi. ²⁴ Nahie Kosive isiviage datana bae aike lohohi.

²⁵⁻²⁷ La subuta nahie haoka Ebavodaitasi hanavoale ke di tota hanavoge tima. Keu lohoale di tedahoge no avui negoai lovilahama. Ilage au vavahanianata hatiliho vekeanu. Isito Dilavau avuho uvuai dataho uvuage keu momoleanu. La vavahanive deiada evisi avuho uvulahale ke au evisi nova momoleai isiviai talive la elegevei. ²⁸ Katealemo di nova hanavoge lae tima. Ige la ke elehai vahaeholahage di uvuimale kena uoholisi. ²⁹ Au lae tige vahaehove vai hoesehavove. Keu Kosive ataike. Ata kateimalebia hoesegeveve. ³⁰ Kosealemo la lohohi di tedahohililu. Isito la ke hanavoge keu Keliso lovimo di tedahonu. Keu lovi ke vanata vavahaniai hatiliho vekeanu. Katealemoike lana ata kateimalebia hoesegeveve.

3

Vatae vaveve keu baluga holioholinu.

¹ Di haokuvuia, laeau Kosive ata holimale kemo vahaeholahave. Di subuta hoto ko hisaliai laheho hanavonu. Isito dana tota nova laheho hisali moleai hanavoi. Ige lana ke elehai evisi kemo ue dua vave. ² Hoto keu koseanu. Vaveve toela vamale kebiomo nenilahave. Lainaho hotoeabe evigelive. Kosealemo keau atae toela. Keau isiviai la vudie vate bohisi la aiogevei. ³ Isito vate bohimale kemo nahiau bae Dilava ata holilivebene.

Isito nahi Munana Tumue vuvune kemo Dilava hoesehavoi Iesu Kelisoluvuta igaetoale kemo nahiabuna Dilava ata holisi vahaeholahai. Di isiviholiale nahi Diue vaveve vamale ke huhulahai kosea, “Dilavana kemo no malevei.”⁴ Ata keau abu Diue vaveve kemo negolahai huhulahai kosea, “Dilavana kemo no malevei.” Isito di isivianiege dana data vaveve kemo balugai kebia evigevei.⁵ Kosealemo di neinau di mamoge di uale bula igaue uoholige di mamau di vudie vate bohinu. Di neinau di mamoge dau Diue ata seleve. Dau Benidiameni valada. Di Balisia ata holisi Diue menaka bahata ke vanu.⁶ Diue menaka kemo di negoai ekalesia aioegevei vatehani ovenu. Diue menaka hoto ke bahata di evisi vanu. Di huhuai kosea, “Mesoho dana Diue vaveve bahata vage di vaveve keabuna Dilava nimo inutolotoloi.”

⁷ Di subuta Diue vaveve ke bahata vai kemo negoanu. Isito di aike ke bahata halei Iesu vaveve ke vama.⁸ Di Diue vaveve ke unaha haleholinu. Isito di huhuige vatae vaveve ke bahatau baluga holioholinu. Di ke bahata halei isiviai di Kosive Iesu Keliso ke hilokai vaveve kemo lulelei. Ke ivimo di vatae vaveve toela ke huhuai kosea, “Keu momolu nahate.” Isi ke bahata malei hatunu. Katealemo di ke halei isiviai Iesu Keliso ke vavevemo negoai.⁹ Isi di isiviai negoai Iesuti igaetoai. Subutaike di Diue menaka ehomai huhuai kosea, “Dana kemo di ebika hoesehavoi.” Di subuta kateanu. Isito di nova di uvu mai Iesu omiale kemo di Dilava nimo inutolotoloanu. Nahi atae menakamo bae inutolotoloalivebene. Isito nahi nahie uvu bahata mai Iesu omialemo nahiabuna Dilava nimo inutolotoloi.¹⁰ Di isivi balugale Iesu Keliso ke vaveve hilokalive au vuvunemo hovelahale ke vuvune hilokai. Di isiviale au vatehani maleale ke nahate malei au hatiale ke nahate vai.¹¹ Ige elike Dilavana bae au vuvunemo di etuvage dana hovelahai bae ukolikoli mai.

Ibinae dua maliho negolahave.

¹² Di aike ukolikoli ke maholinu. Isi di lovi vamale ke di vai gabioholinu. Isito Iesuu subuta di mai isiviale di ukolikoli ke mai. Kateike vage di ke huhuai negoai loviama.¹³ Di haokuvuia, di aike ukolikoli ke maholilu. Isito di aike vaveve igea huhuima. Di subuta vamale ke huhuholisito ono vadeu lohoveve ke huhuai kemo negoima.¹⁴ Dilavau Iesu Kelisomo di hohavoale kemo di negoalive valive au ibinae dua daoi.

¹⁵ La oleuoleu la evievimo negolahale lana lata di huhuimale ke nahate huhulahai negolahave. Isito mesoho la degomoleau di huhuimale ke huhuholige Dilavana bae vaveve kemo haivei.¹⁶ Isito nahi subuta onole duamo negolahai lohemale kemo nahi nova kotamo avuemo negolahai tigei.

¹⁷ Di haokuvuia, di onole vamale ke nahate vageve. Ige oleu di vamale ke nahate vage lana vaveveve elehai ke nahate vai ehovageve.¹⁸ La hilokage ata moagaeau Iesuu idie domo hatiale ke hotoho isiviholisitu abu vaveve toelamo ke aiohavoma. Di subuta hoto kateale loui la namigevenu. Isi tota nova ninanamo loui la namigevena.¹⁹ Iesu aiohavomale ata kebia Dilavana bae aioegeve abuna uoholisi. Kosealemo keau Dilava hoesehavoholisitu vavae isivi unaha vama. Abu matioholisitu abu ebia tabagevei vavae isivi ke unaha vai vatae vaveve toela unaha ke huhulahama.²⁰ Isito nahiau kateholisito otogoe tiveve ataea. Nahie Kosive Iesu Kelisou otogomo dobai lohoveve nahi ke hemei ui isiviale au loholive nahi malevei tai.²¹ Auna bae lohoniege nahie vavae toela hoesegeveve keabuna vavave ataga nahate holisi. Au au vuvunemo onobenobe bahata vage abu vuvunevemo ui timale kemo auna bae nahie vavae toela hoesegevei.

4

Molehi ue dua vaveve deiada

¹ Di uvue haokuvuia, di laheho uvuai isiviai la elegevei. La vaveve dua vamale kemo di la vahaeho vai la vaveve dua ke huhuai isiviale la Kosive ivimo la vaveve dua kemo ui tigei.

² Di isiviai keate abuitaho hoto mole loui. Eodia isi Sinitike, laeau Kosive ataea. Lainaho moleho itumulahalive. Isito molehi ue dua vave.³ Daiti lovie dua vamale Susugasi, dana aho hoto mole loui. Keate abuita kebia namigevei hoesegevenela. Kosealemo keau subuta daluvuta hotoe dua loui ata haivema. Isi Kelemeti isi ata degomoleau daluvuta loviama kebiata hoesegevenela. Kosealemo kebia iviu Dilava ukolikoli bukae uvue ua.

⁴ Kosiveu uveve dua laoveale kemo vani bahata vahaeholahageve. Dana tota la namigeve moleai. Vahaeholahageve.

⁵ Lainaho moleho baita lougelive. Isito savosavoai moleho lougeve. Kosealemo Kosiveu lohovevuu vuguvuguanu.⁶ Lainaho la ono vade vaveve huhu moagalive. Isito vahaehomo guliguligiai la isivi bahataho Dilava imihave.⁷ Ige Dilavana uveve dua ataeau

hilokavesite ke mai laovei la uvu hoesegevege la bae onobenobe ke huhulahlivebene. Isito lana Iesu Keliso ivimo huhuihuhuiue dua unaha vageve.

⁸ Di haokuvuia, di hotoe gabi louge evive. Vaveve dua unaha huhulahai vageve. Lainaho huhuihuhui nimole valive. Isito onoleike seleve, onoleike duave, onoleike inutolotolote, onoleike Dilava nimo vaveve dua, onoleike ata hoesegeve dua vamale, vaveve kateale huhulahageve. ⁹ Di subuta hoto loui la haiveale ke evisi vave. Isi di la nimo di vaveve vamale keta vai tigeve. Kateige Dilavana uveve dua laovei lahehi ui.

Ekalesiau Bolo tedahoge au vahaehoanu.

¹⁰ La tota kunai hanavoi di tedahoale kemoike di vahaehoai Kosive hoesehavoma. Di hilokage la subuta isiviai di tedahoi. Isito humahau uoholinu. Isito la aike di tedahoge di kemo vahaeho baluganu. ¹¹ Di louale keu koseanu. Di laemo onobenobe maleve ke huhualivebene. Halege daemo ualehame avuike ke. ¹² Mesoho daemo onobenobe baluga uale mesoho esevehame uale ke di huhualivebene. Isi mesoho di vaeage mesoho di uniu haniage keta duave. Vaveve katealeu nova igae daemo velemaholinu. Isito di vani bahata ke vai lohomaleike. ¹³ Iesu Kelisoike au vuvune daoge dana vaveve katealemo negoai ugei.

¹⁴ Isito aike vaveve toelau daemo lohoge la kemo di tedaho dua valu. ¹⁵ Bilibai ataea, la hilokage di vasohuta la vata Masedonia halei tiale hotoe dua loui ata degomole haivesege la igaeau onobenobemo di tedahoma. Ekalesia degomoleau onobenobemo di tedahoholima. Isito la unahaea. ¹⁶ Di Tesaloniae oe usege vani degomole la di tedahoi di isivie onobenobe daho hanavoma. ¹⁷ Isito di bae koseale huhualivebene. Dana laemo onobenobe malei ugei. Di kateale huhualivebene. Isito la di tedahoale kemo dana lovie dua vage lana kemo ibinae dua maleve. ¹⁸ La onobenobe malei Ebavodaitasi omige keu malei lohoale daoge di kemo ue dua vama. La vaveve la vamale keau Dilava nimo duave baluga. ¹⁹ Katealemo nahie Dilavana laemo onobenobe uoholimale ke Iesu Keliso ivimo laovei.

Hotoe gabi

²⁰ Di isivialeike nahi vani bahata nahie Mama Dilava ke ivi ebagevai hoesehavogei. Hoto seleveike. ²¹ Isito Iesu Kelisou la malevege laeau atave holialemo di laheho di vahaeho hoto ko hanavoma. Ige evievi ata degomoleau daluvuta umale keau abuta laheho vahaeho hoto ko hanavoma. ²² Ige Dilava ata bahata kove umale keau isiviai laheho vahaeho hoto hanavoi. Ige kebiamo gamani kosive baluga Sisa ke omo lovilahamale kebiata isivi balugale abu vahaeho hoto laheho hanavoi.

²³ Di isivialeike nahie Kosive Iesu Kelisou vani bahata la huhuevei la hoesegevegei. Di hotou kemo kateai ua.

Kolosa

Bolou Kolosa ataho hisialiale

¹ Dau di ivilike Bolo. Dilava isivimo di Iesu Keliso abostolo holisi lovive vama. Iale dalike di haoka Timotiti levaleva ko hisialiai Kolosa evievi ata laheho hanavoma. ² No haokuvuia, no hilokage laeau la uvu mai Iesu Kelisomo mavoï la evievimo negolahalu. Kemoike no isivialeike nahie Mama Dilavau la huhuevei la hoesegevege lana ue dua vageve.

Bolou vahaehoai guligulianu.

³ No vani bahata vahaehomo laheho guliguliai nahie Kosive Iesu Keliso ke Mama imihama. ⁴ Kosealemo no evige laeau la uvu mai Iesu Kelisomo mavoï la evievimo negolahalu. Isi evievi ata bahataho isivilahai kebia tedaevei hoesegevema. ⁵ Hoto selevu vasohuta lae lohoge la ke evisi otogoe tiveve ke huhulahai hoto ke malu. Isi Dilavau otogoe laheho onobenobe otoveale ke la huhulahai la evievimo negolahai moleho isivilahama. ⁶ Hotoe dua keu vata bahata sonumai tima. Ige ataeau ke evisi ehovama. Isi lataemo tige la ke evisi Dilavau laheho uvuai la tedaeveale ke evisi lulelelahage keu la uvumo balugai tima. ⁷⁻⁸ Di haoka mole no avuti loviemale Ebalvasi keike tiniale la haivege la hoto selevemo lulelelahalu. Ebalvasi keu Keliso lovi vae dua vamale ata. No lae tioholilu. Isito keu lae tiale la vaveve elelai hoilalahai lohoale Munanae Tumuu la negotievege la moleho isivilahai mole tedaevemale hoto ke noheho lounu.

⁹ Ilike vage no la vaveve ke evisi kemo negolahai vani bahata laheho guligulilahama. No laheho guligulilahai Dilava imihai isivialeike au lulele bahata laovege lana kemo isivive hilokave. ¹⁰ No laheho guligulilahai isivialeike Kosive isivi ke vai la uveve kemo mai vahaehotisi. Ilike elike vaveve dua unaha vage luleleve kena laemo balugai. ¹¹ No isivialeike Dilavau au nego balugamo la negotievege vaveve toela onoleu laemo lohoge la bae homasialivebene. Isito kemo negolahai ui tigeve. ¹² No isivialeike la vani bahata vahaeholahai nahie Mama hoesehavoi imihageve. Kosealemo Dilava keike la hoesegevei isivialeike la atagave matama keve talive au au ataho onobenobe otoveale ke malei. ¹³ Dilava ke igaeike vavie vaveve vuvunemo nahie malevege nahi uvuve mo ke adae vuvunemo ui tima. ¹⁴ Dilava uvue mo keike nahie toela ibinahohie nahie lovo manu. Iale kemoike Dilavau nahie vaveve toela ulihanu.

Iesu vaveve isi lovive

¹⁵ Ataeau Dilava elehaholilu. Isito move Iesu keu lohoge ataeau elehalu. Iale move keu au Mamae elehilehi nahate. Onobenobe bahataeau uoholisege move keu ua. ¹⁶ Iale move kemoike onobenobe bahata otogomo umale isi vatamo umale keau ua. Kemoike nahi onobenobe elegevemale isi elegeveholimale keau bahata ua. Kemoike onobenobe tumuteau otogoe uma. Keu au vuvunemo onobenobe bahata vavevi isivialeike keau hoesehavogei. ¹⁷ Onobenobe bahataeau uoholisege keu ua. Iale ke vuvunemo onobenobe bahata keabuna ui tigei. ¹⁸ Iesu keu ekalesia bahata kebia kina. Isegeto ekalesia keau vavave. Keu ekalesia umuka. Keu vasohuta hatihatimo hovelahanu. Kemoike ekalesia keabuna hatihatimo hoveveve. Au hatai hovelalahale kemoike au onobenobe bahata evigevenu. ¹⁹ Dilavau au isivimo au mo ebagemai au vaveve bahata malei avuemo mamonu. ²⁰ Moveu idimo hatiale kemo Dilavau isiviale au ata bahata hoesegevege abu subuta avuemo haeavamole uale kemo malevei abuhi ui. Isi isiviale onobenobe bahata otogoe isi heie vata kove vavevele kebiata hoesegevege abuna tota ue dua vai.

²¹ La subuta Dilavamo haeavamole ui huhuihuhuie toela vai vaveve toelata vai ke aiohavoma. ²² La subuta katelahama. Isito Iesuu idie domo hatiale kemo Dilavau la malevege la aike atave holilu. Keu la malevei isiviale la nivemo ata tumute holivege au bae laheho hotobe toela loulivebene. ²³ Lana la evievimo negolahai otogoe tiveve ke huhulahai uge keu duave. Isito mesoho la hoto seleve ke huhulahaholisito ke halevage Dilavana laheho loui. La hoto seleve ke evilu. Ige hoto seleve keu aike vata bahata sonumai tima. Iale hoto seleve keike di aike loui ata haivema.

Bolou ekalesiaho loviale

²⁴ Di hotoe dua loui la haivemale kemo di vatehani maleime kemo vahaehoama. Kosealemo Iesu Kelisou subuta vatehani malenu. Iale dana data vatehani malei ekalesia ata kebia tedaevege abu Iesu Kelisou vatehani maleale ke nahate vai. ²⁵ Dilavau di ebagemage di ekalesia haivemale ata holinu. Ke vuvunemoike di lae lohoale hotove bahata loui la haivenu. ²⁶ Dilavau subuta uale ata kebiama au hoto mahogovage abu ke

hilokaholilu. Isito au aike au hoto bahata daiai au ata haivege abu hotove hilokai malu. ²⁷ Dilavau subuta Iesu Kelisou lohoi atahi igaetoai uveve hoto ke mahogovanu. Isito keu aike hoto ke daiai isivialeike ata bahataeau hotove ke evisi kemo ue dua vagei. Ige lata Iesuu lahehi igaetoai umale kemo lana otogoe Dilava atagama uveve ke huhuluhai tigeve. ²⁸ Iale no matama bahatae tiale Dilava lulelemo Iesu hoto loui ata haivema. Kosealemo no isivialeike ata igaegaeanu Iesu Keliso ehovamale kemo abu vaveve hoesegevelive elike vaveveabeu Dilava nimo inutolotoloi. ²⁹ Katealemoike Iesuu au vuvunemo di mai negotige di negoai lovive vai ata haivema.

2

¹ Di hoto mole louge evive. La hilokage di lovive ke vai la tedaave dua vanu. Isi Laodesia evievi ata kebiata tedaavei ata degomoleau di elehaholiale kebiata di tedaave dua vanu. ² Di lovi baluga vamale kemo isivialeike la malevei negotiegege laeabuna uvu igeai moleho isivilahai mole tedaavegei. Di kateai isivialeike la Dilava hotomo lulelelahai. Lana kemo lulelelahaliege Dilavau hoto mahogovale ke hilokave. Au mahogovale keike Iesu Keliso hoto. ³ Iesu Keliso kemo luleleu ua. Dilavau au lulele bahata malei ominu. ⁴ Di laheho louale keu koseanu. Ata degomoleau loholive la lobogevege la sovavigegege lainaho hotoeabe evilive. ⁵ Kosealemo di lahehi ualebene bae la haivei. Isito di keve uoholige di uvuu lahehi ua. La la uvu mai Iesu Kelisomo mavoi negolahai igaetoai lovillahamale ke di evisi vahaehoanu.

Evievi selevemo Iesuluvuta uveve

⁶ La uvu mai Iesu Kelisomo tiale au la Kosive holialemo avuluvuta igaetolahai uve. ⁷ Idumukau vatae uvue dobai tavale ke nahate la la evievi mai Iesuemomo mavoale kemo negolahave. La Iesu ehovale kemo vani bahata negolahai ui tigeve. Isi no hoto selevemo loui la haiveale kemo negolahai vani bahata vahaeholahai Dilava hoesehavogeve.

⁸ La ebika nenigeveve. Kosealemo ata degomole abuna hotou ihuholiale ke loui la uvu ige lainaho hotoeabe evigilive. Keau Iesu Keliso hoto lohoholisito abu lulelemo vatae hoto unaha loui la haivema. ⁹ Iesu Kelisou vatae lohoale ata holige Dilavau au vaveve bahata malei avuemo mamonu. ¹⁰ Ige Iesuu vuvune kemo otogoe umale kebia bahata evigevenu. Iale ke vuvunemo laeau avuluvuta igaetolahai uveveve nahate malelu.

¹¹ La Iesuluvuta igaetolahage au la vava unaha hoesehavoholisito la uvue toela bahatamo la hoesegevenu. ¹² Katealemo abu la babatisogevege la tabagevege la Iesu Kelisou hatai hovelahale kemo avuluvuta igaetoalu. Dilavau Iesu etuvage hovelahale ke vuvunemo la la uvu mai avuemo mavoi babatisolahai avuluvuta igaetoalu. ¹³ La subuta vaveve toela vamale kemo la haluviale ke nahate valu. La Dilavamo uveve dogo maleholilu. Vavae isivi keu laemo lohoge la isivive ke unaha vama. Isito Iesu Kelisou hatai hovelahale kemo Dilavau la vaveve toela ulihai la malevei uveve dogo laovenu. ¹⁴ Isi vaveve toelaeanu la halie uale kebia isi la menakave evisi ehovaholimale ke bahata malei idie domo hatige vuvuneabeu uoholinu. ¹⁵ Iesuu idie domo hatai hovelahale kemo Setene isi atave kebia vuvunemo nahie haliohatuge kebia vuvuneu nahiemomo negoholinu. Iesuu atae nimo hatai hovelahage ataeau hilokage Setene vuvuneu negoholinu.

¹⁶ Iale lainaho atae menaka ehovalive. Ata degomoleau abu kinamo menaka mavoi isiviale la lovi mole mesoho e mole i halevai. Abu kinamo vani ebagevai isiviale la vani ke hoesehavoi. ¹⁷ Vaveve katealeu selevemo holioholilu. Isito Iesu Keliso vaveve keau selevemo. ¹⁸ Mesoho ata moleu lae lohoi la lobogevege lainaho hotove evilive. Ata kena loui kosea, "Di tababuai hilokage nahi anelu hoesegevege." Keu kateai louge lainaho hotove evigilive. Kosealemo hotove keu loboe hoto. Ata katealeu au kinamo hoto kateale loui au ebia ebagemai isiviale la hotove evisi ehovai. ¹⁹ Keu katealemo Iesuti igaeto holioholinu. Iesu keu ekalesia kebia kina. Isege ekalesiau vavave. Iesu keu ekalesia bahata negotiegege abu avuemo nego malei Dilava vavevemo negolahai tima.

Lainaho atae menaka ehovalive.

²⁰ La Iesuluvuta igaetolahai haluviale kemo osiohoike la atae menakamo negolahai tima. ²¹ Loboe ataeau loui kosea, "Lainaho ke matagevelive. Isi lainaho ke igelive. Isi lainaho ke levelive." ²² Menaka kateale abuna bahata uoholisi. Kosealemo menaka keau atae menaka unaha. Ataeau menaka kebia otovei isivialeike ataeau menaka ke loui mole haivei ke ehovagei. ²³ Loboe ata keau lobolahai loui avoe, "Noeau atae dua." Kateai anelu hoesegevege abu ebika havei tahotieveli lobolahai abu ebika tatolevege ataeau huhuai kosea, "Ata kobiau luleletea." Isito abu vamale kemo keau luleleholilu. Nahi hilokage vaveve kateimaleau bae vaveve toela bamulivebene.

3

Uveve mami isi uveve doge

¹ Iesu Kelisou hatihatimo hovelahale kemo la uveve doge malelu. Iale kemo negolahai otogoe uveve ke huhulahave. Otogo keve Kelisou au Mamae ada inuteveatae ugulamoi ua. ² Iale lainaho vatae onobenobe huhuevegelive. Isito la uvu hoesegevei otogoe uveve ke huhulahageve. ³ Kosealemo laeau haluviale ke nahate valu. Ige la uveve doge maleveve keu nova Iesu Kelisota Mamavetamo ua. ⁴ Iesu Keliso kemo la uveve selevelu ua. Iale vani mole kena hoilahi lohoge lana avuluvuta igaetolahai atagavemo uve.

⁵ Katealemo lainaho vatae isivi huhulahagelive. Vatae vaveve ke bahata halevave. Lainaho mole keatehi ladevegelive. Isi lainaho tebalahagelive. Isi lainaho vaveve toela vaveve ke huhulahagelive. Isi lainaho moni o onobenobe keho isiviai ke huhu balugagelive. Lana kunai kebia huhueve balugage kena la dilava holisi. ⁶ Oleuoleu Dilava hoto evioholisi vaveve kateale vage Dilavana bae abuhu itumuai. ⁷ La keau subuta vatae atahi vaveve kateale vama.

⁸ Isito aike vaveve kateale halevai va halevave. Lainaho moleho itumulahai mole aiovegelive. Isi lainaho Kosive ivi aiohavogelive. Isi lainaho moleho hotoe toela loui mole aiovegelive. ⁹ Isi lainaho mole lobogevagelive. Kosealemo la subuta vavevete ke vaveveike halevalu. ¹⁰ Ke halevai vaveve doge malu. Dilavau au uveve doge laovei la malevei duatievege lana vaveveve kemo lulelelahai hilokave. ¹¹ La vaveve doge male kemo ata bahata keau mole nahate. Diue ata mesoho Diue ata holioholiale, vudie vate bohimale mesoho vudie vate bohioholimale, botoe ata mesoho luleleholimale, heiata loviamale mesoho ibinahalo loviamale keau bahata Kelisomo igae. Ige Keliso keu kebia bahatamo ua.

¹² Ige Dilavau laheho isiviai la tabagevege la atave holilu. Katealemo la vaveve koseale vage duave. Lana moleho uvulahai mole tedaeveve. Isi la ebika tatolevei solekai moleho itumulaha halevaito saiavoi moleho lougeve. ¹³ Mesoho ata moleu la aiovegeve lainaho ke huhulahai ibinave valive. Isito ke momahavoi mole hoesegeveve. Kosiveu nahie toela ulihale ke nahate mole toela huhu halevaito mole hoesegeveve. ¹⁴ Isito vaveve kebia bahatamo vaveve koseale igaeu baluga. Moleho isivilahai mole tedaeveve. Lana kateale valiege molehi igaetolahai ue dua vave. ¹⁵ Iesu Kelisou uveve dua mai laoveale ke huhulahai molehi ue dua vavege. Kosealemo laeau ata igae ataea. Kemoike Dilavau la hohavei isivialeike la molehi ue dua vai ivive hoesehavoge. ¹⁶ Lana vani bahata katelahai Iesu hoto evisi ehovaliege lana hotovemo lulele balugave. Iale lulele kemo mole haivei mole hoesegeveve. Isi Deividu Samusi bukamo hisaliale nogoli kebia loui nogolie dua kebiata loui Dilava vahaeho vai hoesehavogeve. ¹⁷ Di isivialeike la vani bahata onole loui vamale ke bahata nahie Kosive Iesu ke ivimo loui vavege. Isi ivivemo nahie Mama Dilava ke vahaeho vai hoesehavogeve.

Molehi uveve duae deiada

¹⁸ Keatea, la kolivue hoto evisi isiviabe vavege. La Kosive ata holialemo Kosiveu isivialeike la vaveve kateale vagei.

¹⁹ Ige malahaea, la keateho isivilahai kebia hoesegeveve. Lainaho kebia aiovegelive.

²⁰ Ige esebuluia, vani bahata la mamuvu neinuvu kebia hoto evisi ehovave. Lana katelahage Kosivena ke elehai vahaehoai.

²¹ Ige mamuvuia, lainaho vani bahata hoto isute la eseho lougelive. Lana katelahage abuna kabebilahaliege la hoto evioholisi.

²² Ige heiata loviamale ataea, vatae kosive oleuoleu la malevege la abuemo lovialiege kebia hoto bahata evigeve. Lainaho loui kosea, "Abu no nibievesege no bae niabemo vaveve dua vage abu ke elehai no vahaeho vai." Lainaho huhuihuhui kateale vagelive. Kosealemo laeau Kosive ehovamale ataea. Iale abu usege mesoho abu niteisege vaveve dua unaha vavege. ²³ La lovi onole vamale kemo la uvu bahata mavoi vavege. Kosealemo la atae nimo lovi ke vaholima. Isito Kosive nitamoike la lovi ke vama. ²⁴ Iale ke huhulahave. Kosivena bae la lovilahamale ke ibina laovei. Iesu keu la Kosive selevelu. Iale keu au ataho onole otoveale ke lana bae maleve. ²⁵ Isege oleuoleu vaveve toela vamale kebia ibina Kosivena bae ovei. Vani kemo Kosiveu atae vaveve kaovai bae bebe halelivebene. Isito auna ata bahatamo vaveveabe kaovai ibinaeabe ovei.

4

¹ Ige ata nalievemale kosivea, vaveve bahatamo la esemu kebia nalieve dua vavege. Kosealemo la hilokage la keau otogoe umale Kosive ke esemuia.

² La bahata guligulimo kabebi halevaito negolahai vani bahata Dilava vahaeho vai hoesehavogeve. ³ La guligulihalaliege notaho Dilava imihave. Ige elike Dilavau noheho

humaha alavoge no Iesu Keliso hotoe dua loui ata haivei. Di lovi ke valemoike di aike dibula kove ua. ⁴Lana dahō Dilava imihage dana neniai hotove ke loui ata haivege abuna ke evie dua vai.

⁵ Di hoto mole louge evive. Evievi ata holiōholiale kebia nimo la vaveve bahata nenigeveve vaveve dua unaha vageve. Ige Dilavau laheho humaha alavoge hotove loui namigeveve. ⁶ Di isivialeike la kebiahi uge la hotou abuemō madea nahate vai. La hotona kateige laeabuna hotoeabe ibina vaveve hilokave.

Hotoe gabi

⁷ Di uvue haoka mole Tikikasi kena bae di deiada laheho loui. No keti Kosive lovi vamale kemo keu negoai lovi ke vae dua vama. ⁸ Katealemoike di hanavoge keu lae tima. Di isivialeike au no vaveve loui la haivei. Ige lana no deiada ke evisi kemo vahaeholahave. ⁹ Di ke hanavoi la ata mole Onesimasi keta hanavoge au avui tima. Keu no uvue haoka seleve. Isi keu lovimo tubunamale ata. Iale keabuna bae no kove umale ke deiada bahata laheho loui.

¹⁰ Ige di esemu mole no avuti dibulae uale iviveike Alistakasi keu isiviai au vahaeho hoto laheho hanavoi. Ige Banabasi dumu Maka keta kateai laheho au vahaeho hoto hanavonu. Di subuta Maka ke hotoike laheho hanavoi loui kosea, “Elehalive au lohoge hoesehavo mai o hatuve.” ¹¹ Ige Iesu ivimini mole Diasitasi keu au vahaeho hoto laheho hanavonu. Di esemu abuita igaeta keau Diue evievi ataea. Iale Diue ata kebia unahaebuike daluvuta ataeau Dilava adae vuvunemo uveve lovi kemo di tedaho balugalu.

¹² Ige la ata mole Ebavalasi keta laheho au vahaeho hoto hanavonu. Keu Iesu Keliso lovi vamale ata. Keu vani bahata au uvu mai Dilava omisi laheho guliguliamā. Keu kateai isivialeike la Dilava isivi vai vaveveve bahata kemo negolahai lulelelahai. ¹³ Di seleveta la namigevege evive. Ata keu la momageveholisi Laodesia isi Helabolisi evievi ata kebiata momageveholisito la bahataho Dilava imihai guliguliamā. ¹⁴ Ige nahie doketa mole Luka keu Dimasiti abu vahaeho hoto laheho hanavolu.

¹⁵ Di isiviale di vahaeho hoto loui Laodesia evievi ata kebia namigeveve. Isi keve ata mole Nivasi isi ekalesiau ovemo igaetolahai guliguliamale kebia bahataho di vahaeho hoto loui namigeveve. ¹⁶ La levaleva ko elehai gablalahaliege tota mai Laodesia evievi ata kebia ovege abuta elehai. Ige abutana di abuhō mole hisialiale ke abuna mai laovege lata elehave. ¹⁷ Isi Agibasi namihai loui kosea, “Bolou isiviale Kosiveu lovi aoale ke neniai vai gabianela.”

¹⁸ Hotou kemo kateai ua. Isito Bolo dailike beni mai hoto kohame hisialiai laheho loui kosea, “Lana duave.” Lainaho di dibulae uale ke momahavolive. Di isivialeike Dilavau la huhueveve la hoesegeveve.

1 Tesalonia

Bolou Tesalonia ekalesiaho hisaliai vahaehoanu.

¹ Tesalonia ekalesia, Bolo, Sailasi isi Timoti no hoto ko hisaliai laheho hanavoma. No huhuige laeau la uvu mai Kosive baluga Iesu omiale kemo laeau Dilava ataea. Katealemoike no isiviale nahie Mama isi nahie Kosive Iesu Keliso keau la huhuevei la hoesegevege lana ue dua vave.

² No vani bahata vahaehomo laheho Dilava imihama. ³ Kateai imihai la vaveve dua ke huhulahama. La vani bahata la evievi mai Dilava omisi vaveve dua vama. Vani bahata la isivi mai Iesu omisi lovine kemo negolahama. Isi vani bahata negolahai Iesuu lohoveve ke huhulahai hemei uma. ⁴ No haokuvuia, no hilokage Dilavau au uvu au isivi laoveale kemoike au la tabagevei la malevege la atave holilu. ⁵ La maleveale keu koseanu. No lohoale deiadae dua la namigeveale keu atae hoto holioholinu. Isito Munana Tumute keu hotoe vuvune ke mai la uvumo mamoge la loui kosea, “Hoto seleveike.” Ige no lahehi uge la no vaveve dua elehai hilokalu. ⁶ Isi kateai no vaveve nahate vai Kosive vaveve nahateta valu. La hotoe dua ke eviale mo vatetumu baluga malelu. Isito Munana Tumuteu la hoesegevege la vahaeho balugalu. ⁷ Kateike vage Masedonia isi Giliki evievi ataeau la vaveve dua evisi kemo negolahalu. ⁸ Kosealemo la Kosive hoto ke mai Masedonia isi Giliki vata bahatae tale ata haivelu. Ige la evieve deiadau vata bahatae tinu. Iale no bae hotoe loui haivelivebene. ⁹ Ata ke biaeau la no hoto eviale ke loui noheho loui avoe, “Tesalonia ata keau abu loboe dilava halevei ukolikolie Dilava seleve hoesehavoma.” ¹⁰ Isi avoe, “Tesalonia ata keau Dilava mou otogomo dobai lohoveve ke hemei uma. Iesu keu hatige Mamaveu vuvune omige hovelahanu. Iale vani mole Dilavae itumuna vatamo lohoge Iesuna no malevege no bae itumu ke malelivebene.”

2

Bolo vaveve duau ekalesia haivenu.

¹ No haokuvuia, la hilokage no lae lohoi la haiveale hoto keu ihuanu. ² La hilokage no lae lohoholisege Bilibai ataeau no aiogevege no vatehani malelu. Ige la o ketamo ata degomoleau no hoto evilioh isiviholisi no humaha bamulu. Isito Dilavau no negotievege no lohoi hotoe dua ke loui la haivelu. ³ No loboe hoto loui la haiveholilu. Isito hoto seleveike no loui la namigevelu. No la haiveale keu no isiviholilu la uvu isi la lobogeviliho. ⁴ Dilavau no tabagevei hotoe dua no haivege no vani bahata hoto ke louma. No vadeu huhuale ke Dilavau hilokanu. Ialemoike no isiviholilu ataeau no vahaeho valiho. Isito no isivialeike Dilavau no vahaeho vai. ⁵ Dilavau lovi ko noevei no hilokaevunu. Ige lata hilokage ataeau la sovavigevei laemo moni malemale ke nahate no vaholima. ⁶ No hoto mole louge evive. No isiviholilu la no ivi tabageveho. Isi isiviholilu ata degomoleau abuta no ivi tabageveho. ⁷ Noeau Iesu esemu. Iale noeabuna isivialiege laemo kunai malei. Isito no katealeho isiviholilu. Keateau ese hoesegevemale ke nahate noeau lae lohohiale la hoesegeve dua valu. ⁸ Isi kateai no uvu bahata mai laovelu. No Dilava hotoe dua ko loui la namigeveale kemo no vatehani maleveve ke huhuholilu. ⁹ No haokuvuia, seleveta la hilokage no subuta lae lohoale lovilahai negolahalu. No Dilava hotoe dua unaha loui la namigeveholilu. Isito no vanimo no ibinaho lovilahaito vavimo Dilava lovi valu.

¹⁰ No lahehi uge laeau no vaveve elehage Dilava keta no vaveve elehanu. Evievi ata la vigomo no neniai ui vaveve dua unaha valu. ¹¹ La hilokage malaha moleu au ese hoesegevemale ke nahate no la igaegae hoesegeve dua valu. ¹² No vani bahata negoe hoto laheho loui isiviale la uveve dua vai Dilava hoesehavoge auna la vahaeho vagei. Dilavau la hohavei isiviale la matamave doga keve avuluvuta atagavemo ui.

¹³ No hoto mole louge evive. No vani baita Dilava imihai la vahaeho vama. Kosealemo no lae lohoale Dilava hoto loui la haivege la hoto ke evisi loui kosea, “Hoto keu atae hoto holioholisito Dilava hoto seleveike.” Isi kateai la uvu mai Dilava omige keu aike la uvu hoesehavoma. ¹⁴ No haokuvu, nohovu. La hoto ke evialemoike la ata keau vatehani laovelu. Ekalesia degomole Diudia vatamo uale keau Diue atae hoto eviholimale kebiameo vatetumu maleale ke nahate lata la ata seleve kebiameoike vatehani malelu. ¹⁵ Diue ata keabulike Iesu hamage hatinu. Isi subuta beloveta moaga havege haluvilu. Isi aike nota aiogevema. Abu vaveve kateale vai atahi ugologoloage Dilavau vahaehoabe vaholinu. ¹⁶ Diue ata keau isiviholilu no ukolikolie hoto loui Diue ata lohoholiale kebia

haiveleho. Vaveve katealemo vaveveabeu toela balugage Dilava itumu balugau aike abuemo lohoma.

Bolou isiviale tota ekalesia elegevei.

¹⁷ No haokuvu, nohovu. No la halevei tiale ukaukaito no uvuu laemo uale kemo no laheho uvulahalu. Kemo no isiviale tota loholive la elegevei. Isito no lohoveve keu anekianu. ¹⁸ No isiviale tota hoidevei tai. Ige Bolo data isiviale vani moaga tota hoilalahai. Isito Seteneu di humaha bamuge di lohoholinu. ¹⁹⁻²⁰ Vadeuhoike no isiviale hoidevei tai la elegevei. Kosealemoike laeau la uvu mai Iesu omige no vahaeholalahu. Vani mole nahie Kosive Iesu Keliso keu hoilalahai lohoge noeabuna nivemo lahehi lavige auna la elegevei ibinae dua noevei. Kemoike no la vaveve ke huhulahai vahaeholalahu.

3

Timotiu avuta ekalesia deiada eviho tinu.

¹ No la halevei lohoaleu Ateni kove ui tota la deiadabe evioholilike vaimo Timoti hanavoge au tota la elegeveliho tinu. ² Timoti keu no haoka. No abuhi Dilava lovi vaimo Iesu deiada ata haivema. No ke hanavoi isiviale au la negotievege la la evievi kemo negolahai. ³ Katealemo no isiviale vatetumu laemo lohoge la evievi kemo hoideve halemavaito negolahave. La hilokage vatetumu katealeu nahiemu lohoge keu Dilava isivi unaha. ⁴ No subuta lahehi uime la haivei loui kosea, "Vatetumuna bae nahiemu lohohoi." Ialeike lohohoi. ⁵ Di uvuu laemo uale kemoike di Timoti hanavoge la evievi kemo la negotieveho tinu. Di loui kosea, "Onoilata Setene lobomo dobuluvige no laemo loviale keu ihuoholima."

⁶ Isito nova Timotiu hoilalahai lohoniale la deiadae dua loui no haivei loui avove, "Evieviabeu negoage abu mole hoesegevema. Tesalonia ata keau vani bahata la huhuevei isivialeike la elegevei." Timotiu kateale loui no namigevege nota isiviale la elegevei. ⁷ No haokuvuua, no kove uale vatetumu moaga malesege la deiada keu lohohoi. La evievimo negolahale keu no negotievege no ke evivi vahaeho balugalu. ⁸ Katealemo vatetumuu no malevege no bae ke huhulahalivebene. No hilokage laeau la evievimo negolahahu. ⁹ No la evievi hoto evige no hotou uoholinu. Isi kateai aike laheho Dilava imihama. No vahaeho balugalu. Iale noeabuna oleve kateai no vahaehoe hoto ke loui Dilava imihai. ¹⁰ Katealemo no uvu mai Dilava omisime vanimo vavimo imihai isivi balugale au humaha alavoge no loholive ono vade la evievimo negoholiale kemo la tedeavei.

¹¹ No isiviale nahie Mama Dilava isi nahie Kosive Iesu keabuna humaha mole vage no bae lohohoi la elegevei. ¹² No isiviale Kosiveu la negotievege no isivi laoveale ke nahate la isivi mole ovei mole tedeavei kemo ata bahatata tedeaveve. ¹³ Lana vaveve kateale vasege auna la uvu ke mai negotievege Iesuu lohoveve vani kemo Iesu ataeabuna avuluvuta lohoge nahi bahataebuna avuluvuta ehue tai nahie Mama Dilava vudimo lavige auna nahie elegevege nahiaabuna nivemo inutolotolalahai.

4

Oleve kateai Dilava hoesehavoveve deiada

¹ No haokuvuua, no Iesu ivimo la namigevege hoto ko evive. No lohoaleu la vaveve vade vai Dilava hoesehavoveve deiada ke loui la namigevele. Ige laeau no hoto ke evivi vaveve kateale vama. Katealemo no isivilahale la vaveve keu ui tigei. ² No Iesu vuvunemo la haivege la ke hilokalu. ³ Iale Dilavau isiviholialeike la mole keatehi teibalahaliho. Isito isivialeike laeau ke evivahi atae tumu holisi. ⁴ Isi isiviale la bahata la keatehi mole hoesegeveve ke hilokai. Iale vaveve dua vai la keate hoesegeveve. ⁵ Lainaho Dilava hoto eviholimale kebia nahate vai la vavae isivi unaha la keatemo vagelive. ⁶ Vaveve kateale va halevave. Lainaho la haokuvue mahinuvuhi teibalahagelive. Deiada kateale no subuta la haivelu. Lana vaveve kateale vage Dilavana la banisigevei. ⁷ Dilavau nahie hohavei isiviholiale nahi vaveve toela kemo uliho. Isito isiviale nahi nahie vava nibisi vaveve dua unahamo ugei. ⁸ Oleu hoto ke kabebihavoale keu atae menaka unaha kabebiholisito Dilavau au Munanae Tumu laoveale ketaike au ke kabebihavonu.

⁹ No haokuvuua, laeau moleho isivilahai mole hoesegeveve ke hilokalu. Dilavau la haivege la biaeau vaveve ke hilokalu. Iale no bae tota ke loui laheho hisialilivebene. ¹⁰ Isi la vaveve kateale vale keu la ata degomoleau Masedonia vatamo umale kebia hoesegevenu. Iale no haokuvuua, no la namigevege evive. Vaveve kateale vai avuemo negolahai tigeve. ¹¹ No subuta la namigeveale ke nahate lainaho la haokuvue vaveve ke elehai avuemo hoto lougelive. Isito la vavevete ke unaha vai avuemo negolahageve. ¹² La negolahai lovilahamalemo la bae onobeho ata imigevelivebene. Katealemo

ekalesiaholimale keabuna la vaveve ke elehai loui kosea, “Seleveta ata koeau evievie ata selevea.”

Iesuu lohoge haluvialeau hoveveveve

¹³ No haokuvuia, no isiviale haluviale kebiamo hoto seleve loui la namigevei. Lainaho ata degomoleau Iesu lohoveve kemo abu uvu mavoholiale kebia nahate vai haluviale kebiaho uvu moagagelive. ¹⁴ Kosealemo no hilokage Iesu keu hatisi hovelahanu. Isi no hilokage ata olemeau abu uvu mai Iesu omisito haluviale keabuna hoveveveve Dilavana malevege abuna Iesuluvuta tai.

¹⁵ Kosiveu no namigevealeike no la haivema. Kosiveu lohoveve vaniu lohoge nahi oleuoleu nita uale nahiabuna haluviale ata kebiaho uli hollivebene. ¹⁶ Vani kemo Kosivena otogomo dobai lohosege Dilavana louge anelu ivite kena ho balugage Dilava kibina hotoai. Ige oleuoleu abu uvu mai Iesu omisi haluviale keabuna vasohuta hoveveve. ¹⁷ Ige vani kela nahi oleuoleu nita uale kebia Dilavana malevege nahiabuna bahata otogomo mole bevievei Kosiveluvuta behovoi vani bahata Kosiveluvuta igaetolahi ugei. ¹⁸ Katealemo hoto ke loui mole negotigeveve.

5

Kosive vani keu vavoloe atau lohoale nahate.

¹ No haokuvuia, no vadeuho bae ono vadeu velemaveve ke loui la haivei. ² La biaeau hilokage Kosiveu lohoveve vani keu vavoloe atau vavimo lohoale ke nahate. Iale no bae tota hisaliai la haivelivebene. ³ Vani kela ataeabuna loui kosea, “Toelabeu noemo lohoholige no ue dua vama.” Kateai lousege vaveve toelana keate mole eseveu uho vage tumuu hamale ke nahate abuemo lohoi aiogevei. Ige abu bae kemo detuluvivebene. ⁴ Laeau vavie ata holioholilu. Isito laeau vanie ata. Iale Iesu lohoveve keu vavoloe atau lohoi la malevei vikogeveale ke nahate bae la malevei vikogevevebene. ⁵ La bahata Dilava atagamo ui vanie ata holilu. Nahiau vavie ata holioholilu. ⁶ Iale lainaho vavie ataeau ladevemale kebia nahate valive. Isito hoveveve dolodolo halevaito nita uve. ⁷ Ataeabuna vavimo ladevegei. Isime vavimo e toela isi dolodolohagei. ⁸ Isito nahiau atagae ataea. Iale nahi dolodolo halevaito nita ui. Katealemo nahi evievimo negolahi mole hoesegevege Setene vaveveu bae nahie malelivebene. Isi nahie isivi mole ovei ehue tiveve ke huhulahamale keu saneka mai kina hanubeale ke nahate. Vaveve toelau bae lohoi nahie huhuihuhui ke aiohavelivebene. ⁹ Dilavau nahie tabagevei nahi malevei au itumu kemo otoveholinu. Isito nahie malevei isiviale nahi Iesuu hatiale kemo ukolikoli malei. ¹⁰ Iesuu nahiho hatai isiviale haluviale isi nita uale nahi bahataeau avuluvuta igaetolahi ui. ¹¹ Katealemo la aike vamale ke nahate mole negotievei mole tedaeveve.

Hotoe gabi

¹² No haokuvuia, no la namigevei isiviale Dilava esemuia la vigomo loviemale kebia hoto evisi hoesegeveve. Dilavaike kebia tabagevenu. Iale abu vadeu louge hotoeabe ke evisi vave. ¹³ Kebiau lovi ke vamalemo la isivi ovei hoesegeveve. Molehi ugolologo halevaito molehi ue dua vave.

¹⁴ No haokuvuia, no hoto mole louge evive. Loviho isiviholimale kebia haiveve. Ataeau vabulahamale kebia namigevei negotieveve. Evievimo negoholimale kebia nibieveve. Solekai ataho itumu halevaito kebia bahata hoesegeveve. ¹⁵ Nenilahave. Ata moleu laemo vaveve toela vage ibinave va halevave. Isito vaveve dua unaha molemo vageve. Isime vaveve dua unaha ata bahatamo vageve.

¹⁶ Vani bahata vahaeholahageve. ¹⁷ Vani bahata Dilava imihageve. ¹⁸ Laeau Iesu Keliso ataea. Iale vaveve vadeu laemo lohoge viko halevaito Dilava vahaeho vageve. Dilava isivilike.

¹⁹ Lainaho Munanae Tumu kabebihavolive. ²⁰ Oleuoleu Dilava hoto louge lainaho hotoeabe hamalive. ²¹ Isito hoto bahata sesievei elehage oleteu seleveage ke evive. ²² Vaveve toela bahata haliohatuve.

²³ Dilavau uveve dua nahioveale kemo no isiviale au la vaveve bahata hoesegevei la munana, la uvu, la vava ke bahatamo vaveve toela ulihage nahie Kosive Iesuu hoilahi lohoge lana nivemo inutolotolohai lavive. ²⁴ Dilavau la hohaveale keu loboe ata holioholinu. Au vadeu louale ke auna vai. Iale auna la vaveve bahata hoesegevei.

²⁵ No haokuvuia, noheho Dilava imihave.

²⁶ Ekalesia ata la bahata, nohovu. No isiviale mole vahaeho vai mole hoesegeveve.

²⁷ Bolo dau Kosive ivimo la namigevei isiviale hisali ko mai ekalesia ata bahata uvumo dodaveve.

²⁸ Di isiviale nahie Kosive Iesu Keliso keu vani bahata la huhuevei la hoesegevegei. Di hotou kemo kateai ua.

2 Tesalonia

Bolou tota Tesalonia ekalesiaho hisaliale

¹ Bolo, Sailasi, Timoti noeabulike levaleva ko hisaliai Tesalonia ekalesia ata laheho hanavoma. Nahie Mama Dilava isi nahie Kosive Iesu Keliso keau la malevege laeau ataeabe holievelu. ² Iale no isivialeike abu la huhuevei la hoesegevege ue dua vave.

Dilavau atae toela ibina oveveve

³ No haokuvuia, no vani bahata la vahaeho vai laheho Dilava imihama. Kosealemo la evievi kemo la negolahage keu balugai lohoge la moleho isivilahamale ketau balugai lohoma. ⁴ La vaveve kateimale vamale kemoike no la ivi tabagevei ekalesia ata haivema. Kosealemo vaveve toela isi vatehani keau laemo lohosege la evievi kemo dobuluviholisito kemo negolahama.

⁵ La vaveve bahata kemo no hilokage Dilava vaveve keu seleve unaha. Iale la vatetumu kemo negolahalemo auna bae la malevege matamave doge keve uve. ⁶ Isito oleteau la aiogevei vatehani laovemale kebia auna bae vatehani ovei. Vatehani oveale kemo nahi hilokage Dilava vaveve keu seleve unaha. ⁷⁻⁸ Vani kela nahi vatehani malemale kemo auna nahie hoesegevege nahiaabuna ke halioi ue dua vai. Iesuna au anelu vuvunetebiahi otogomo dobai lohoniege Dilava hilokaholimale kebia malevei venemo hatuevege abuna vatehani baluga malei. Oleuoleu nahie Kosive Iesu Keliso hoto evisi vaholige auna vatehani ovei. ⁹ Vatehani ovege Kosiveu au atagev matamamo umale keve abu bae talivebene. Isito abuna Dilavamo uoholi seleveai. ¹⁰ Vani kela Kosivena dobai lohoge atave abuna hoesehavoi ivive ebagevai loui kosea, "No Kosive kou baluga." Ige la no hoto louale ke evisi la uvu mai avuemo mavoale lataeabuna vani kela abuhi Dilava hoesehavove.

¹¹ Katealemoike no vani bahata laheho guligulilahi isiviale Dilavau la hoesegevege lana isivive vai vaveve dua unaha vageve. No Dilava imihai loui kosea, "Tesalonia ata keau isiviale vaveve dua vagei. Iale ana a vuvunemo evieviabe ke negotige abuna a lovi ke vage uholisili." No kateai Dilava imihama. ¹² Iale ataeabuna la vaveve ke elehai nahie Kosive Iesu ivi ebagevai. Ige nahie Dilavana Iesuti la ivi tabagevei abu uvu laovei la tedeavei.

2

Atae toelana au ebika mai Dilava toai.

¹ No haokuvuia, nahie Kosive Iesu Kelisou loholive nahi bevievege nahiaabuna avulu-vuta igaetoai uveve kemo di isiviai hoto mole loui la namigevei. ² Ata degomoleau tababulalahai lobolalahai la haivei loui kosea, "Kosive vani keu subuta lohonu." Isege degomoleau lobolalahai loui kosea, "Bolou noheho levaleva hanavoi loui avoe, 'Kosive vaniu subuta lohonu.'" Kateai louge lainaho hotoeabe evisi huhulalahai kemo dolodololive. ³⁻⁴ Ataeau kateale vai la lobogevege lainaho kemo dolodololahagelive. Kosealemo nahi hilokage vani keu vuguvuguage ata moagaeabuna abu evievimo dobuluvisi Dilava kabebihavoi. Isege ata mole toela igaena lohoniege au ebika ebagemai loui kosea, "La Dilava isi onobenobe hoesegevemale kebia haleveito da igae hoesehavove." Isi Dilava dubu baluga ke uvue tiniege ugulamoi loui kosea, "Dau Dilava dalike." Auna kateige Dilavana bae mai veneu lahai hodovavesiteve hanavoi.

⁵ Subuta di lahehi ui hoto kateale la haiveale ke lana huhulalahu. ⁶ La hilokage vaveve katealena vata komo lohoi. Isito ono moleu aike humahave bamuale keta la hilokalu. Iale vani mole igaena lohoge atae toela kena lohoi. ⁷ Novae vani koma ataeau ata nehe ke nahate vaime Dilava halevai menakave aiogevema. Isito vani moleu lohoge Dilava vaveve humaha ke bamumale kena uoholige atae toela kena lohoi. ⁸⁻⁹ Vani kemo atae toela kena lohoniege Setene vuvunemo loboe vaveve nimolete vaevei tete vaveve vaevei. Ke vaevege uoholige Iesuna au vuvunemo dobai lohoniege au aie vivimo ke aiohavoi hamage auna hatai. ¹⁰ Isito auna lohoholisege atae toela kena vasohuta loboe hoto loui ata lobogevege abuna ukolikolie humaha hosidisi haluviveve humaha keve tai. Kosealemo keau hotoe dua ke kabebihavoi isiviholilu eviliho. ¹¹ Vaveve katealemo Dilavana halevege abuna loboe hoto ke evisi ke unaha vagei. ¹² Abu hotoe duaho isiviholisi halevai vaveve toela unaha vamale ke ibini Dilavana bae ovei.

Hoto seleve mataha tumutumuaave.

¹³ No haokuvuia, no hoto mole louge evive. No vani bahata la vahaeho vai laheho guligulilahama. No hilokage Kosiveu au uvu mai laemo mamonu. Subuta Dilavau la tabagevei la maleveale kemo no hoto seleve loui la haivege la ke evisi malu. Isege Munana Tumuteu la hoesegevege la Dilava ata holilu. ¹⁴ No subuta tiale hotoe dua loui la haivei loui kosea, “Dilavau la hohavei la malevege lana bae nahie Kosive Iesu Keliso keti igaetoai atagavemo uve. ¹⁵ Iale no haokuvuia, no laheho hoto seleve loui mesoho hisialiale ke evisi avuemo lavisi mataha tumutumuave. ¹⁶⁻¹⁷ Nahie Mama Dilavau au uvu mai nahiovei nahi hoesegevealemo nahi vani bahata negolahai gabie ukolikoli maveve hemei ui. Iale no isiviale nahie Kosive Iesu Kelisona abu Mamati la uvu hoesegevei negotiegege lana bae negolahai hotoe dua loui vaveve dua vageve.

3

Noheho noinoilahave.

¹ No haokuvuia, no hotoe gabi igae ko louge evive. Noheho noinoilahave. Ige no valive hotoe dua loui ata moaga haivege abuna la hoto ke evie dua vamale ke nahate abutana vai. ² La noheho noinoilahale kemo Dilavana atae toleemo nahie malevei. Kosealemo atae tola kebiau hotoe dua eviholimalea.

³ Isito la ke evialemo Dilavau bae la halevelivebene. Auna la nibievei negotiegege tolabeu bae laemo lohohi la aiogevelivebene. ⁴ No evievi nahie Kosivemo mavoi hilokage no la haivemale hoto ke lana vani baita vageve.

⁵ No isiviale Kosiveu la uvu hoesegevege lana Dilavau au uvu bahata laoveale ke hilokave. Isi au lohoveve ke hototamo homasilaha halevave. Isito ke hemei ugeve.

Hoto eviholimale kebiamo haliohatuve.

⁶ No haokuvuia, nahie Kosive Iesu Keliso ke ivimo no la namigevege evive. Evievi ata degomoleau loviholisito u unahamale kebiamo haliohatuve. Keau no hoto loui haiveale ke ehovaholilu. ⁷ No lahehi ui lovilahamale ke la hilokage noeau homasiholilu. Iale ke nahate lana vave. ⁸ Noeau laemo heiata lovibe ioholilu. Isito vavita gututa noeau negolahai lovilahalu. Katealemoike la noemo la monibe hatuoholilu. ⁹ No laemo kunai malei lovi ige keta duave. Isito no katealeho isiviholilu. Kosealemo no isiviale negolahai lovilahage lana ke elehai ke ehovave. ¹⁰ No lahehi ui la namigevei kosea, “Olena loviholiniege au bae lovi ilivebene.”

¹¹ No kateale louale keu koseanu. No evige la degomoleau lovilahaliho isiviholilu. Isito isiviale u unahai lovite kebiamo hoto loui aiogevegei. ¹² Iale nahie Kosive Iesu Keliso ke ivimo no isuta kebia namigevei kosea, “Uveve dua vai lovilahalive la lovi ke isi uve.”

¹³ No haokuvuia, no hoto mole louge evive. Lainaho vaveve dua vamale kemo kabebilahagelive. ¹⁴ No laheho levaleva ko hisaliai hanavoge mesoho ata degomoleau bae hoto ko malivebene. Abu katelahage kebia hilokaevei haliohatueveve. Ige elike abu matilahai vaveve kateale halevai. ¹⁵ Abu katelahage lainaho la bahoe kebia vaveve ke nahate abuemo valive. Isito ese igaeau vamale ke nahate vai namigevege abu ke halevai hoidevei.

Hotoe gabi

¹⁶ Kosive ke igaeike uveve dua mai nahiovenu. Iale di isiviale auna vani bahata lahehi ui la vaveve bahata kemo la tedaevgege lana kemo ue dua vageve.

¹⁷ Iale Bolo dailike aike beni mai di adala hisaliai kosea, “La nohovu. Lana duave.” ¹⁸ Di levaleva bahatamo di adata hoto kateale hisaliai. Di isiviale nahie Kosive Iesu Keliso keu vani bahata la huhuevei la hoesegevegei. Di hotou kemo kateai ua.

1 Timoti

Bolou Timotiho hisaliale hoto

¹ Bolo dailike levaleva ko hisalianu. Dau Iesu Keliso abostolo. Nahie tedaevemale Kosive Dilava isi nahi hemei umale Iesu Keliso keau louge di loviabe vama. ² Timoti, di a haivuge au evievi ata seleve holinu. Iale di isiviale nahie Mama Dilava isi nahie Kosive Iesu Keliso keau a huhuai aho uvulahai a hoesehavoge ana ue dua vanela.

Loboe ataemo la ebia nibieveve.

³ Di subuta Masedoniae lohoho a namihai loui kosea, “Di isiviale au Evesasie unela.” Kosealemo ata degomoleau loboe hoto loui ata haivemale kebiaho louge abu halevai. ⁴ Kebia namigevei kosea, “Lainaho la vavivue tenia toela ke lougelive. Isi lainaho la vavivue ivi kebia dodavei huhuevegelive.” Kateale loui namigevenela. Kosealemo abuna katelalahiege moleho loui ke unaha huhulahagei. Isime abu evievimo negoholisi Dilava lovi ke vaholigei. ⁵ Di kateale louale keu koseanu. Di isiviale abu huhuihuhue toela halevai abu uvu hoesegevei abu evievimo negolahai. Katealemo elike abuna abu uvu mole ovei mole tedaevegei. ⁶ Ata degomoleau vaveve dua kateale vaholisito hotou ihuholiale kemo hoto louma. ⁷ Ata keau abu ebika malevevi loui avoe, “Noeau Dilava menaka loui ata haivema.” Isito keau abu loumale ke ihu hilokaholisi luleleholilu. Abu katelahaito negobedai eve ata haivema.

⁸ Nahiabuna nenilahai Dilava menaka ke ehovaliege hilokage menakave keau duave unaha. ⁹ Isito di hoto mole louge evinela. Dilavau menaka ke atae duaho vaholinu. Isito atae toelaeau hotove evioholimale kebiahoike au ke vanu. Abu Dilavaho isiviholisi guliguliholisi abu isivi unaha vaevema. Uvuiabeau toelage abu abu mamuvu neinuvu kebia aiogevevi havei ata degomoleta havema. ¹⁰ Isi abu keate degomolehi hotohotolahaito tota halevai malahaeau abu moletahi vaveve toela vama. Isi ata umudigevevi malevevi ataemo maketilahama. Isi lobolahi loboe hoto loui ata haivema. Isi vaveve degomole kateale vaevemaleu hoto seleve ke aiohavoma. ¹¹ Isito ataga Dilava keike hoto seleve ke mai daoi di haivuge di ke loui ata haivema.

Dilavau Bolo toelamo hoesehavoale

¹² Nahie Kosive Iesu Keliso keu au nego daoi di elehage di nivemo duaveage au di ebagemage di hotove loualemo di isiviale ivive ebagemai hoesehavoi. ¹³ Isito dau subuta kateholisito Kosiveho hotoe toela loui atave aiogevevi kebia havelage au daho uvuai hilokage dau evievi ata holioholinu. Isi di ono vade vamale ke hilokaholinu. ¹⁴ Kateige au daho uvuai au uvu bahata daoi di tedahoge di Iesu Keliso kemo evievi ata holige isivive keu daemo ua. ¹⁵ Di hoto mole seleve louge evie dua vanela. Iesu Keliso keu vatae dobai lohoale isivialeike vaveve toela vamale kebia tedaevevi malevevi. Iale di vaveve toela keau ata bahatae vaveve toela evigevunu. ¹⁶ Isito Dilavau daho uvuai di tedahoale keu baluga. Di vaveve toela baluga kateale valage Iesu Kelisou di kabebihavoholisito di hemei unata di humaha vage di Iesu ehomanu. Dilavau kateale vai isiviale ataeabuna gabie di vaveve ke elehai hilokage Dilava keu vaveve toela vamale kebia hemevevi umale Dilava. Keu isiviale abu abu uvu mai avuemo mavoi elike ukolikoli malei. ¹⁷ Dilava keu ukolikoli Dilava igae. Dilava ke nahate moleu uoholinu. Isito ke igae keu vani bahata ata nalievemale Kosive. Iale atabeu ke elehaholinu. Isito nahi vani bahata ivive ebagevai hoesehavoge. Hoto seleveike.

¹⁸ Di uvue mo, di hoto ko aho louale evi tumuanela. Ekalesiaeau subuta a Kosive lovi vaveve hoto ke loulu. Iale hotoeabe keu a evievi negotiale kemo negoai lovie dua vanela. ¹⁹ Isi a evievi kemo negoai vaveve dua unaha huhuanela. Ata degomoleau kateholisito huhuihuhue toela vai abu uvu aiogevevi evievimo dobuluvilu. ²⁰ Kebia vigomo ata abuita Hameneasi isi Alekisanda kebia di iovege abu ekalesiaholisito Setene vuvunemo ua. Kateige elike abu vali Dilava ivi aiohavo halevai.

2

Dubumo guligulieveve deiada

¹ Vasohuta di a namihai. Vani bahata a noinoianiege ata bahata kebiaho noinoianela. Isi a isivi keta loui Dilava namihai vahaehoveta vage. ² Vatave kosivea isi kosive degomoleau ata nalievemale kebiataho noinoianela. Ige elike nahi kemo tobekai ue dua vaime Dilava igae huhulahai vaveve dua unaha vagei. ³ Ige Dilavana ke elehai vahaehoai. Dilava keike nahi tedaevevi nahi malevemale Kosive. ⁴ Iale keu isiviale ata

bahataeau hoto seleve evisi kemo elike uveve dua malei. ⁵⁻⁶ Dilava keu Dilava seleve igae. Ige Iesu Kelisou dobai lohoaleu ata holisi ata bahatae toelae ibinahō hatai malevei abu Dilavaluvuta igaetoaveve humaha alavonu. Iale Dilavau Iesu hativeve vani ebagemale kemo nahi hilokage au isiviale ata bahataeau ukolikoli malei. ⁷ Katealemoike Dilavau di hanavoi isiviale di esemuve holisi Diue ata holioholiale kebiaho hoto seleve loui kebia haivege abu evievi ata holisi. Di hoto keu lobo holioholinu. Isito hoto seleveike di ke loui a namihānu.

⁸ Di isiviale matama bahata ataeau abu vaveve hoesegevei itumuholisi hotoe toela louholumale keau kome bokoai vata bisi guligulilahagei.

⁹ Isi di isiviale keateau atae nimo ogo egete unaha hatuevegei. Isi abu kina bisi onobenobe dua avuemo otoveveve ke huhu moaga halevai. Isi ogoe dua ibina balugate keta huhu halevai. ¹⁰ Isito di isiviale Dilava ehovamale keate keau vaveve dua unaha huhuevegei. ¹¹ Isi keate abulako abu ebika tabageve halevaito tobekai ui hoto unaha evigei. ¹² Di isivihialeike keateau malaha haivei abuemo vuvunealiho. Isito abu hotoeabe evisi tobekai ugei. ¹³ Kosealemo subuta Dilavau vasohuta Adamu vanu. Isito bae gabie Ivi vanu. ¹⁴ Ige Seteneu Adamu lobohavoholinu. Isito Ivi lobohavoge au Dilava menaka egumanu. ¹⁵ Katealemoike keateabuna ese maleliege vavaeabena haniagei. Isito abuna abu evievimo negolahai moleho isivilahai mole tedaavei vaveve dua unaha vage Dilavana vatetumu kemo kebia tedaavegei.

3

Elodae vaveve

¹ Hoto seleveike ko. Ata oleu dubue eloda lovi keho isivianiege lovie duahoike au ke isivianu. ² Iale oleu eloda loviho isivianiege vaveveve keau bahata atae nimo duaveai. Isi aulako mahina abualive. Isi aulako ata aiogevegeve. Isito ata hoesegevei. Isi au vaveve bahata vamale kemo vae dua vai. Isi deia oleu lohoge au ke mai o hatui. Isi ata haive dua vagei. ³ Isi aulako e toela ilive. Isi aulako solekasolekai itumualive. Au kate haleito tobekai uveve dua unaha vai ugei. Isi aulako moniho isivi balugagelive. ⁴ Isi au ese kebia hoesegevege eseabe keau esee dua unaha holievei abu mama hoesehavoī hotove evigei. ⁵ Isito mesoho malaha oleu au ese nenigevei hoesegeveholiniege auna oleve kateai ekalesia kebia nenigevei nalievei. ⁶ Ainaho ekalesia dogā ke ebagemage au eloda lovi valive. Ana kateige kena huhuai kosea, “Dau ata baluga.” Isi kateige Dilavau Seteneu dobage avuemo louale ke nahate avuemo loui. ⁷ Isito malaha ole vaveveve keu ata bahatae nimo isi ekalesiaholiāle kebia nimo duaveale ke ebagemage au eloda lovi vai. Onoilage au Setene mavimo holomai atae nimo matiamā.

Dikini vaveve

⁸ Dikini vaveve keta kateanu. Ata olemeau dikiniho isivilahaliege vaveveabe keau bahata atae nimo duaveai. Abulako e toela isi moniho isivi balugagelive. ⁹ Isi abu huhuihuhuiē dua vai hoto seleve matahai abu evievimo negolahai ugei. ¹⁰ Isito vasohuta vaveveabe bahata kaovege vaveveabeu dua vage kebia tabagevege abu dikini lovi ke vai. ¹¹ Ige mahinuvuiābe kebia vaveveta atae nimo duaveai. Abulako e toela isi ata degomole vaveve moleho lougelive. Abulako loboe vaveve vagelive. Isito vaveve seleve unaha vagei. ¹² Dikini aulako mahina abualive. Isito mahina igae avui ese hovevei haive dua vage eseabe keau hotoeabe evie dua vai. ¹³ Dikini oleu lovie dua vamale kemo ataeabuna vaveveve elehai hotove evisi. Ige auna au evievi kemo negoai lamisi Iesu Keliso hoto loui ata haivei.

Dilavau Iesu vaveve nahie haivenu.

¹⁴ Di aho levaleva ko hisaliai isiviale solekai loholive a elehai. ¹⁵ Isito mesoho di solekai lohoholige ana levaleva ko elehai hilokage nahi oleve kateai Dilava ata kebia vigomo nahie ebika nenigevei. Ekalesia ata keau ukolikoli Dilava ke ataea. Iale keau hotove mataha tumuimale ataea. ¹⁶ Nahi hilokage ataeau subuta Iesu vaveve elehai hilokaholilu. Ilage vani mole Iesuu dobai lohoale atae elehilehi nahate vanu. Ige Dilava Munanae Tumuu Iesu vaveve elehai loui avoe, “Ke vaveveu inutolotoloanu.” Ige keu hatai hovelahai otogoe tisege aneluiāu ke elehalu. Isege esemuiabeau vata bahatae hotove ke loui ata haivege abu ke evisi ehovalu.

4

Loboe ata

¹ Munanae Tumuu nahie haive seleveige nahi hilokage vanie gabila munanae toela keabuna loboe hoto loui ata namigevege hotoeabe kemo ekalesia ata degomole abuna

abu evievi halevai hotoeabe ke evisi ehovei. ² Loboata kebia hotou seleve nahate. Isito huhuihuhuiabemo loboata hotou moaganu. Katealemo loboata vaveve keau uvuiabe lahoevege abu vaveve dua momahavo selevealu. ³ Loboata keau ata haivei loui avoe, "Lana mahinuvulahaliege menaka eguvave." Isi loui avoe, "Lainaho lovi degomole igelive." Isito nahi hilokage Dilavau lovi ke bahata ilihoike au vaevenu. Iale oleuoleu evievi ata holisi hoto seleve ke male keabuna Dilava hoesehavoito bae lovi ke isi. ⁴ Dilavau lovi ke bahata vaveale keu duave unaha. Iale nahi bae bebe halevalivebene. Isito nahiabuna ke malei Dilava hoesehavoito bae isi. ⁵ Kosealemo Dilavau lovi ke bamuholinu. Iale nahi ke hoesehavoito ige keu Dilava nimo duave.

Iesu Keliso esemue dua

⁶ Di hilokage a keu hoto seleve ke evisi Iesu ehomai a evievimo negoanu. Iale ana hoto ke loui evievi ata kebia haiveniege a kena Iesu Keliso esemue dua holinela. ⁷ Isi subuta buluveau teniae toela loumale hoto ke aehanela. Isito vani bahata negoai Dilava vaveve ke ehomai vagenela. ⁸ Ana a vava hoesehavoliho bibuai oige a vava unahana dua vai. Isito ana Dilava vaveve ke vai kemo negoige a uvu a vava keabuna bahata dua vai. Ana kateaniege novae uveve isi gabie uveve kemo a uvevena dua vai. ⁹ Di hoto louale keau seleve. Iale ke evisi mataha tumutumuanela. ¹⁰ Nahi nahie uvu malei ukolikolie Dilava ke omige keu nahi malevenu. Isi isiviale ata bahata malevei tedaevei. Iale oleuoleu abu uvu mai omige auna kebia tedaeve dua vai. Katealemoike nahi negolahaimelovive vama. ¹¹ Iale hoto ke isuta loui ata haivenela.

¹² Timoti, au atae doga. Iale evievi ataeabuna a elehai aho loui kosea, "A keu luleleholinu." Abu kateai louge ainaho hotoeabe evilive. Isito abuhotoe dua loui isivi ovei vaveve dua unaha vanela. Isi a evievimo negoai ata tedaevege abuna a vaveve dua ke elehai a hoto evisi. ¹³ Isi dubumo lamisi Bukae Hoto dodavei kemo hotoe dua loui kebia haivegenela. Kateai kebia haivelage di bae lohoi. ¹⁴ Elodaeau a Kosive lovi vaveve hoto loui abu ada malei a tatamo otovege Dilavau a lovi ke vaveve vuvune aoale ke ainaho kabebihavolive. ¹⁵⁻¹⁶ Isito hovelahai abu louale kemo negoai vani bahata ke vagenela. Isi a vaveve a hoto luvave kemo a ebika nenihavonela. Ige elike ata bahatae abuna a vaveve dua elehai a hoto evisi. Ana negobedai kateale valage Dilavana a tedahoi a haivemale kebiata auna tedaevei.

5

Ata bahata hoesegeveve.

¹ Ainaho oe kosivehame kebiaho hoto isute loulive. Isito saiamoi a mamaho louale ke nahate abuhoto lounela. Isi kateai a nanuvuemo vamale ke nahate atae doga kebiama vagenela. ² Isi keate kosivehame kebiama a neinaemo vamale ke nahate vai tedaevegenela. Isime keate doga kebiama a amakinimo vamale ke nahate vai tedaevei huhuihuhui e dua unaha abuhoto vage.

³ Isi gobuvue ata holisi abu ahuvula umale kebia hoesegevenela. ⁴ Isito gobu mole esete vavivute ke vavivuiabe eseebe keabuna tedahoi. Kosealemo gobu keu subuta au ese au vavivu tedaevenu. Iale ke ibinahoto abuna ke tedahoge Dilavana ke elehai vahaehoi. ⁵ Isito mesoho keate mole koliaveu hatige keu gobu holige ke tedahoveve atau uoholige kena au uvu mai Dilavamo mamoi vanimo vavimo ke imihagei. ⁶ Isito gobu mole keu mesoho au isivi unaha vai vaveve toela vai oimale ke vaveveve keau hatiale ke nahate. ⁷ Iale di hoto louale ko loui gobuvu namigevenela. Ige keau vaveve dua valive elike ataeau bae abuhoto vavevebe toela elehalivebene. ⁸ Isito ata oleu neniai au oe ata tedaevholimale keu au evievimo dobai evieviholimale ata kebia nahate vanu.

⁹ Ainaho keate dogaeau gobuvu holiiale kebia tabagevege abu dubue lovi valive. Isito gobuvuiabu abu ebia holiiale kebia tabagevege abu dubue lovi ke vai. Gobu oleu kolivu moaga holoeveholisito kolia igae melameale ke dubue lovi ominela. ¹⁰ Gobu oleu au ese nenigeve deia malevei o hatueveikealesia ata tedaevei vatehani malemalebia tedaevei au vaveve bahata hoesehavoilovive dua vamale ke ebagemai dubue lovi ke ominela. Ataeau gobu ke elehai hilokage keu gobue dua.

¹¹ Isito ainaho keate dogaeau gobuvu holiiale kebia tabagevelive. Kosealemo keabuna lovi ke valiege gabie kolivuhu isivilahaliege Keliso lovi ke halevai. ¹² Isi kemo abu subuta Keliso lovi valiholoale ke momahavoi. ¹³ Gobuvu keabuna u unahai o igaegaela vealuvisi molehi sisilai hotoe toela loui ata degomole vaveve kemo hoto lougei. ¹⁴ Iale di isiviale gobuvue doga keau kolivulahai ese hovevei elike abu ese nalievei ue dua vai. Katealemo elike nahi aiogevemale keau nahihotoe toela lou halevai. ¹⁵ Kosealemo gobuvu degomoleau humahae dua halevai Setene ehovalu. ¹⁶ Iale di isiviale evievi ata olememo gobuvuiabu uge abu kebia nenigevei tedaevege kebia nalieveve keu bae

ekalesiamo isualivebene. Katealemo ekalesia abuna gobuvu degomole nalieveve ataeau uoholiale kebia tedaevi.

¹⁷ Eloda oleuoleu ata nibievei lovie dua vamale kebia ibinae dua ovenela. Isi oleuoleu hotoe dua loui ata haivemale kebiata ibinae dua ovenela. ¹⁸ Kosealemo Bukae Hotou loui avoe, “Ovoeau lovilahai lovi iho vasege lainaho bamuvevelive. Isege abu lovi isi lovilahai.” Ige Buka mole hotota loui avoe, “Lovilahamale keabuna abu ibina malei.” ¹⁹ Mesoho ata moleu loholive eloda vavamo hoto mole louge ainaho hotove evilive. Isito mesoho ata abui o abuita igaeta keau loholive hoto ke igae loui a namihage kebia hoto evisi kaovanela. ²⁰ Ige eloda keu vaveve toela ke vage mai talive ekalesia vudimo au onole vale ke louge au matiai. Ige elike ekalesiaeu ke elehai vabulahai ke nahate va halevai.

²¹ Iale di a namihage evinela. Di aho louale hoto ke loui ata bahata haivenela. A haaka moleu vavevebe toela vage ainaho vaveve toela ke mahogovalive. Isito vaveveve toela ke avuemo lou. Kosealemo au vani bahata Dilava, Iesu Keliso isi anelu tumute kebia nimo loviamana. ²² Ainaho Kosive lovi vaveve kemo solekai ata mole ebagemai a ada mai golovemo mamolive. Isi ainaho ata degomoleau vaveve toela vage abuhi ke valive. Isito vani bahata a ebika hoesehavoi huhuihuhui dua vanela. ²³ Isi a vani moaga vavahaniamale kemo ainaho e unaha igelive. Isito uaini esehame ehosivai ige keu elike a uni hoesehavoi.

²⁴ Ata degomoleau vaveve toela vage ataeau ke hilokalu. Isege degomoleau abu vaveve toela mahogovale ke Dilavana gabie loui daiage ataeabuna elehai. ²⁵ Ige vaveve dua keta ke nahate. Ata degomoleau vaveve dua vage ataeau ke elehai hilokalu. Isege degomoleau abu vaveve dua mahogovale ke Dilavana gabie ke loui daiage ataeabuna elehai.

6

¹ Di isiviale evievi ataeau kosive degomolemo heiatu loviemale keau hotoeabe evisi hoesegeve. Onoilage evieviholimaleau vaveveabe elehai Dilava ivi aiohavoi hotove keta aiohavoma. ² Ige mesoho evievi ataeau heiatu loviemale kosiveabe kebiata evievi ataea. Iale abulako kebia aiogevelive. Isito abu abuemona nenilahai lovie dua vai. Kosealemo keau abuhi evievi ese igaea. Iale keau abu uvu mai mole ovei mole tedaevege keu duave.

Moniho isivi baluga halevave.

³ Timoti, negoai di louale ko loui ata haivenela. Ata oleuoleu nahie Kosive Iesu Keliso ke hoto ehovaholisi nahi haivemale hoto ko abu evioholisi loboe hoto loui ata haivege keu toelanu. ⁴ Ata keau abu ebika tabageveito luleleholilu. Abu vani bahata molehi heiatu hoto loui mole aiogevema. Ata keau kateimalemo vaveveabe keu koseanu. Abuna mole maina mai isi moleho hotoe toela loui mole aiogevege. ⁵ Ige uvuiabeve toelale kemo abuna vani bahata moleho itumulahagei. Abu bae hoto seleve loulivebene. Isito abuna mole namigeveve loui kosea, “Nahi talive ata haivei kemo elike moni baluga malegei.” Iale ata kateimale kebia aegevenela.

⁶ Kosealemo nahi Dilava lovi vamale kemo bae moni baluga malelivebene. Isito au nahiovealehame kemo nahi vahaeholahage duave. ⁷ Nahie neinuviuiau nahi hoevege nahi kunaita lohoholilu. Iale nahi haluviliege bae kunaita malei talivebene. ⁸ Katealemo nahi lovita ogota malege elemua. ⁹ Isito oleuoleu isiviai kunai moaga malege Setenena lobogevege abuna mavivemo holoeavoi abu vavae isivi vage huhuihuhuiabe kena malevi humaha toelamo tai. ¹⁰ Moniho isivi balugamale keu vaveve toela bahatae umuka. Ata degomoleau moniho isivi balugamale kemo abu evievimo dobuluvige huhuihuhuiabe keu aiogeveve malei uvutievunu.

Bolou Timotiho louale deiada

¹¹ Isito au Dilava ata. Iale vaveve kateale bahata aehanela. Isi vaveve dua unaha vai a evievimo negoai ata isivi ovei tedaevi abuhona itumu haleito saiamoi haivegenela. ¹² Abu bibuluvisi mole evigeveale ke nahate a evievimo negoai ukolikoli manela. Ukolikoli maveve kemo Dilava a hohovoge a hovelahai ekalesia ata moaga kebia vudimo a Iesu ehomale ke loui namigeve. ¹³ Dilava igaeu onobenobe vaveve uveveabe oveale isi Iesu Kelisou Botiasi Bailoti vudimo vabuholisito au evievi hoto louale kebia nimo di isuta aho louge evinela. ¹⁴ Hotove evisi ehomai a vaveve nenihavoi a ebika hoesehavolage nahie Kosive Iesu Keliso keu dobai lohoi. ¹⁵ Dilava vanive ebagemale kemo auna dobai lohoi. Dilava keu vuvunete Kosive. Keu kosivebia Kosive. Iale ke igaina ata bahata nalievege. ¹⁶ Dilava keu vani bahata umale Dilava. Keu ataga balugamo ualemo atabeu bae vavave talivebene. Atabeu subuta ke elehaholinu. Isi elehaveve keta anekianu. Vuvuneve keu vani bahata uma. Iale nahi ivive ebagevai hoesehavogeve. Keu hoto seleve.

¹⁷ Iale kunaite kebia namigevege abu abu kunai uoholiveve kemo abu uvu mavoi abu ebika tabageve halevaito abu uvu mai Dilava omisi. Kosealemo keike onobenobe moaga

nahiovege nahi kemo vahaeholahama. ¹⁸Kunaite kebia namigevege abu abu kunai kemo ata tedaeve dua vai. Ilive elike vaveve dua katealemo Dilava vavevemo balugai. ¹⁹Abu katelahai ata tedaevealemo Dilavana ehue kunaiabe seleve otovei. Ilike abuna gabie otogoe kunai kemo ue dua vai uveve seleve malei.

²⁰⁻²¹Timoti, Dilavau lovi mai aoale ke mataha tumuanela. Ainaho hotoe toela ihuveu uoholiale ke evigelive. Kosealemo ata degomoleau lobolohai loui avoe, “Hoto keu lulele hoto.” Isi hoto ke mai kemo abu evievimo dobuluvilu. Isito di a namihai. Hoto keu hoto seleve holioholinu. Di hotou kemo kateai ua. Isito di isiviale Dilavau vani bahata la huhuevei la hoesegevegei.

2 Timoti

Bolou Timotiho hisali moleai negotinu.

¹ Timoti, di uvue mo. Bolo dailike tota ahoe levaleva ko hisalianu. Dilavau louge di Iesu Keliso abostolo holisi ata haivei loui kosea, “La uvu mai Iesu omisi kemo ukolikoli maleve.” ² Iale di isiviale nahie Mama Dilava isi nahie Kosive Iesu Keliso keau a huhuai aho uvulahai a hoesehavoge ana ue dua vanela.

³ Di buluveau subuta Dilava hoesehavoi lovive vamale ke nahate di vai huhuihuhui duamo Dilava lovi vai vavita gututa guliguliai aho Dilava imihama. ⁴ Di a halei tige a ninale ke di huhuai isivi balugale a elehai elike vahaehoai. ⁵ Subuta a vavia Loisi isi a neina lunesi keau evievimo negolalahu. Iale di hilokage a evievi keu kebia evievi nahate vai negoanu. ⁶ Katealemo di subuta aemo onole vale ke ainaho momahavolive. Di ada mai a tatamo mamoge Dilavau au vuvune mai aoge au negoanu. Iale kemo hovelahai negoanela. ⁷ Kosealemo Dilavau Munanae Tumu nahioveale keu nahi vabutieveholisito nahi negotievege nahi nahie ebika nenigevei moleho isivilahai mole tedaevegei.

⁸ Iale ainaho nahie Kosive hoto loui ata haiveveho ata vabugevelive. Isi di Kosive lovi vaime dibulale ketamo ainaho ata vabugevelive. Isito Dilavau a negotiale kemo hotoe dua loui di vale ke nahate vai avuemo vatehani malenela. ⁹ Dilavau vaveve toelamo nahi hohavei nahi malevege nahi atave holilu. Nahi vaveve dua vale kemo keu nahi maleveholinu. Isito au isivi unahamo nahiho uvuai nahi tedaevunu. Subuta mole keu vata vaholisito Iesu Kelisou nahi tedaeveve ke huhuai vanive mamonu. ¹⁰ Iniale Iesu Keliso hanavoge au lohoniale hotoe dua loui hatihati kemo negoai hovelahai nahi maleveale kemo hatihati keu bae nahiamo vuvunealivebene. Isito nahiabuna hotove dua ke eviilege ukolikoli malei.

¹¹ Iale Dilavau di ebagemage di abostolo holisi hotoe dua ke loui ata haivema. ¹² Isi kemoike di vatehani malema. Di kateaito sohu negoai di uvu bahata mai Dilava ominu. Iale di hilokage auna di evievi ke negotisi di nalilage Iesuna lohoniege di melamei tai. ¹³ Iale di hoto seleve loui a namihale ke evisi mataha tumuai ehomanela. Di aho louale ke ehomalive elike Iesu Kelisou nahie evievi kemo au isivi nahiovege nahi avuluvuta igatolalahai ui. ¹⁴ Iale Munanae Tumuu nahehi uale ke vuvunemo hoto seleve ke mataha tumuanela.

¹⁵ A hilokage Asia vatamo umale keau bahata di tedahoholisito di halevalu. Ige Vugelasi isi Hemogenesi kebiata abulike di halevalu. ¹⁶⁻¹⁷ Isito Onesibolasi keu kateholinu. Iale di isiviale Kosiveu eseabe kebiaho uvuai tedaevei. Kosealemo keu lohoale Loma o kove velemai di kaovanata di dibulae uale ke hilokai vabuholisito di tedahoge di vahaehove vanu. ¹⁸ Iale di isiviale Kosive vani keu lohoge au avuhu uvuai tedahoi. A hilokage di subuta Evesasi o keve usege au ketave di tedaho dua vanu.

2

Iesu Kelisoe tualie ata seleve

¹ Di mo, Timoti. Iesu Kelisou au uvu mai aoi a tedahoale kemo negoai unela. ² Di atae nimo ata haivesege a eviale ke loui evievite namigevege abuta ke loui ata degomole namigevei.

³ A Iesu Keliso tualie esemu holialemo ana bae vatehani malenela. ⁴ Tualie esemu keu bae au isivi unaha valivebene. Isito auna au kovive hoto ke ehomai au louale ke unaha vagei. ⁵ Ige bibuamale keta ke nahate. Auna bibuaveve menaka ehomaholiniege au bae ibina malivebene. Isito auna menaka ehomai bibuaniege ibinae dua mai. ⁶ Ige emo bulumo loviemale keta ke nahate. Kena negoai loviianiage lovi keabuna baeige auna ulive ke isi. ⁷ Ana di onole louale ke evisi ehomaniege Dilavana a negotige ana kemo luleanela.

⁸ Iesu Keliso huhuanela. Keu Deividi valadamo lohoale hatihati kemo hovelahanu. Ige di hotove dua ke loui ata haivema. ⁹ Di hotove dua loui ata haivemale kemoike di vatehani malema. Di vaveve toela vaholisito abu di mai dibulae mavolu. Isito kemo abu bae Dilava hoto ke bamulivebene. ¹⁰ Iale di vatehani malemale ke huhuoholisito isiviale Dilavau ata tabageveale keabuna di vaveve elehai Iesu Keliso ke vuvunemo ukolikoli malei avuluvuta vani bahata atagave kemo ugei. ¹¹ Hoto kou hoto seleve. Nahiabuna Iesuluvuta vatehani malei haluviliege nahiabuna ehudae avuluvuta ui. ¹² Isi nahiabuna vatehani kemo negolahaliege nahiabuna avuluvuta ata nalievei. Isito nahiabuna vovohoge auna avuta

nahie vovogevei. ¹³ Isi mesoho nahiabuna evievimo dobuluvisi. Isito hotove keu bae dobalivebene. Au hoto loumale ke bahata avuna vagei.

Dilava nimo lovie dua vamale ata

¹⁴ Hoto ko isuta loui a ekalesia ata kebia namigevenela. Namigevei loui kosea, "Lainaho Kosive nimo moleho loui itumulahagelive." Hoto katealena la vavamo umale kebiamo duavealivebene. Isito auna kebia aiogevei. ¹⁵ Isi a lovi kemo negoai lovie dua vanela. Ana neniai hotoe dua loui ata haivege Dilavana aho loui kosea, "Au lovie dua vamale ata." Ige a bae kemo matialivebene. ¹⁶ Ainaho hotoe toela ihuveu uoholiale ke evigelive. Hoto katealena Dilavamo ata nunuvegei. ¹⁷ Vate oheu a vate isi tiale ke nahate hotoe toela kena ata degomole uvue dua aiogevei. Hotoe toela loumale ata abui iviabeike koea, Hameneasi isi Biletasi. ¹⁸ Ata atui keau hoto seleve halevai loboe hoto ke loui ata haivei avoe, "Nahie ataeau haluviale keau subuta hovelevelu." Ige ata degomoleu ke evisi dolodololahai abu evievimo dobuluvisa. ¹⁹ Isito Dilava hoto seleve keu mune nahate. Au bae kibialivebene. Iale hoto keu loui avoe, "Kosiveu au ata seleve hilokaevenu." Isi tota loui avoe, "Oleuoleu loui avoe, 'Dau Kosive ata.' Iliege abu vaveve toela halevai."

²⁰ O balugamo melegi, disi nimotele moagaeau ua. Kebia degomole abu silivata vaavelu. Isi degomole golota vaavelu. Isi degomole idimo vaavelu. Isi degomole debata vaavelu. Iale kebia vaveve moagamoaga. Abuna degomolemo lovi isi degomolemo momolu otovei degomolemo toe lovi otovei. Isege degomoleau ke nahate. ²¹ Iale ata oleu vaveve toelamo au ebika hoesehavoale keu melegie dua ke nahate. Iale Kosivena keho loui mole ebagemage auna kemo lovie dua vai. ²² Iale ainaho mohoho vaveve toela nahate vagelive. Isito ke aehanela. Isi a evievimo negoai vaveve dua unaha vai moleho isiviai molehi uveve dua vai olemeau uvue duamo Dilava ehovamale kebiahi igaetoage. ²³ Isi ainaho hotou ihuholiale keho golema kekeagelive. Hoto katealeu itumuta vaveve toela malei lohomaleike. ²⁴ Kosive esemu keau bae atahi moleho loui itumulahalivebene. Isito abuna ata bahatamo vaveve dua vai hotoe dua loui haivegei. ²⁵ Ateaeu esemu kebiaho hotoe toela lounge abu bae ibinave isuta loulivebene. Isito abuna saivai abuhou lona. Ige Dilavana isivianiege uvuiabe ekovehage abuna hoto seleve evisi. ²⁶ Isi kemo lulelelahai Dilava ehovai. Seteneu subuta kebia malevege abu isivive vai mavivemo holoeavolu. Isito abuna hoidevei Dilava ehovaliege kemo abuna Setene mavi ke vavehai tai.

3

Vaveve toelau vanie gabimo lohoveve

¹ Vanie gabila vaveve toloteu vatae lohoveve ke huhuanela. ² Vani kemo ataeabuna abu ebika unaha huhuevei moniho isivi balugai abu vaveve kemo hoto loui abu ebika tabagevei. Isi ata degomoleho hotoe toela loui abu mamuvu neinuvu hoto eviholisi mole tedaevoholisito mole aiogevei vaveve toela unaha vagei. ³ Keau bae moleho uvulahai molemo vaveve dua valivebene. Isito abuna moleho hotoe toela loui itumulahai mole havei vaveve dua ke kabebihavoi vaveve toela unaha vagei. ⁴ Isi abu haokuvuho hailahai biketilalahai abu ebika tabagevei. Abuna katelahai Dilava huhuholisito vatae vaveve ke unaha huhulahagei. ⁵ Vaveveabe keau ekalesia vaveve nahate. Isito uvuiabe kemo ekalesia vuvune vaveveu uoholinu. Iale ata kateimalebia haliovenela. ⁶ Kebia degomole abuna tiliege keate degomoleau vaveve toela vai ke huhulahale kebia oe velehovoi lobogevei haivege abuna isivibe vai. ⁷ Keate keau vani bahata loboe ata kebiamo hoto kaovama. Isito hoto seleve hilokaveve keu abuemo anekianu. ⁸ Subuta malaha mole abuita Dianasi isi Diabalasi keau Mosese menaka eviholisito eguvalu. Iale ke nahate loboe ataeabuna hoto seleve ke aiohavoi eguvai. Uvuiabeu toelale kemo abuna hoto seleve eguvai ekalesiae humaha ke halevai. ⁹ Abu bae loboe vaveve ke vai egeta butuhalivebene. Isito subuta ataeau malaha nehe abuita vaveveabe toela hilokale ke nahate ataeabuna kebia loboe vaveve ke hilokai.

Bukae hoto keu baluga.

¹⁰ Timoti, di ata haivei vaveve dua vai u unahaholisito di vaveve huhuai di evievimo negoai ataho isiviai vani bahata kebia tedaevemale ke a hilokanu. ¹¹ Isi a hilokage ataeau di aiohavoge di vatehani baluga malenu. Antioka, Aikoniomu, isi Lista o kebia ataeau vatehani balugataho daovalu. Isito vatehani kemo Kosiveu di tedahoge di aike ua. ¹² Iale ata oleuoleu isiviai Iesu Keliso ehovai Dilava vaveve nahate valiege abuna vatehani malei. ¹³ Isito atae toela isi loboe ata keabuna ata lobogevege ataeabuna abuta kebia lobogevei. Abuna katelahalage lobo keu balugage abuna vaveve toela ke vai tigei. ¹⁴ Isito au ainaho vaveve kateale vagelive. Isito negoai no hoto seleve loui a haivuale ke ehomai vagenela. A hilokage subuta evievi ataeau hoto seleve ke loui a haivulu. ¹⁵ Ana huhuanu. A

subuta esebuluta ui Bukae Hoto hilokaeveale kemo a a uvu mai Iesu Keliso omialemo Bukae Hoto keabuna a mai luleletisi a tedahoge ana a evievi kemo negoanata ukolikoli manela. ¹⁶ Bukae Hoto keu atae hoto holioholinu. Isito Dilavau louge abu hotove ke hisalilahalu. Iale hotove kena nahie haivege nahiabuna hilokage vaveve oleteike seleve isi nahie haivege nahiabuna hilokage vaveve oleteike duave isi toelave. Isime nahie malevei humaha inutolotolotome otevei nahie tedavege nahi vaveve dua unaha vagei. ¹⁷ Katealemoike Dilava ataeabuna lovive ke hilokai neniai vai.

4

Bolou hativeve vaniu vuguvuguanu.

¹ Timoti, Dilava isi nahie Kosive Iesu Keliso kebia nimo di hoto mole loui a namihage evinela. Iesu Keliso kena dobai lohoniage ataveau adave vuvunemo ui haluvisi nita uale kebia bahatae vaveve kaovai ibinaeabe ovei. ² Iale negoai hotove ko loui ata haivenela. Mesoho vanie toela o vanie dua keu lohoge kemo eve negoai ata haivei vaveveabe toela ke bamui hotoe dua loui negotievenela. Ainaho abuhu itumualive. Isito neniai haive dua vanela. ³ Kosealemo vani kemo ataeau bae hoto seleve evilivebene. Isito abuna abu isivi unaha vai kemo haivemale loboe ata moaga ehovege abuna isiviabe unaha loui kebia haivege abu hotoeabe evigei. ⁴ Isi abuna hoto seleve evimale kemo hoideveito teniae toela ke unaha loui ehovagei. ⁵ Iale a vaveve bahata kemo a ebika hoesehavoi vatehani kemo negoanela. Isi o igaegae tai hotoe dua loui ata haivei a lovi kemo negoanela.

⁶ Isito dau di hativeve vaniu vuguvuguanu. Iale ataeabuna dahavoge dana hatisi. ⁷ Abu bibuluviale ke nahate di di evievimo negoai Dilava lovi vanata ivivela velemanu. ⁸ Katealemoike vani kela nahie Kosive kena gibosoune hanogo mai daoi. Kosive keu vaveve duate. Auna ata bahatae vaveve kaovai di hanogote mai meamoale ke mai daoi. Isi oleuoleu au lohoveve ke hemei umale kebiata hanogoeabe ovei.

Bolo hotoe gabi

⁹ Timoti, di isiviale solekai dae loho. ¹⁰ Kosealemo Dimasiu vatae onobenobeho isiviaime di halei Tesaloniae tinu. Isege Kalesiniu Dilava lovi valiho Galesia vatae tinu. Ige Taitasi keta lovi ke igae valiho Damasia vatae tinu. ¹¹ Keau tisege Luka igae daiti ua. Iale a lohoniage Maka melamei avuti lohonela. Kosealemo keu loholive elike di lovi kemo di tedahoi. ¹² Di subuta Tikikasi hanavoge au Evesasie tinu. ¹³ A lohoniage Toloasi vatae velemaniege talive malaha mole Kabasi omo di dabae ogota bukata di haleveale ke malei lohonela. Buka kebiama di isivi balugale oove vateta buka vale kebiata malei lohonela.

¹⁴ Isito di hoto mole louge evinela. Aulimo onobenobe vaevemale malaha mole igae ivive Alekisanda keu vaveve toela daemo vanu. Iale Kosivena au onole daemo vale ke ibina omisi. ¹⁵ Keu nahie hoto evioholisito isiviale hoto ke bamui. Iale malaha ke nibie tumu vanela.

¹⁶ Abu vasohuta di mai kove kotage atabeu kotae hoto kemo di tedahoholinu. Isito keau bahata di halevai detuluvige di dahuvela kotanu. Iale vaveveabe kemo di isiviholinu Dilavau kebia aiogeveliho. ¹⁷ Abu katelahage Dilavau di haleholisito daiti ui di negotinu. Ige di hotove bahata loui evieviholiale ata kebia haivei isivialeike abu bahata hoto ke evisi. Di kateisege ata moleu laioni vaveve ke nahate daemo vage Dilavau vaveveve toela kemo di tedahonu. ¹⁸ Iale di hilokage Kosivena vaveve toela bahatamo di tedahoge dana bae ehue matamave doge keve tige auna di nalisi. Iale ivive ke igae nahi vani bahata hoesehavoi tigei. Hoto seleveike.

¹⁹ Di isiviale di vahaeho hoto ko loui Akuila isi mahinave Bisila kebia namigevenela. Isi Onesibolasita eseabeta namigevenela. ²⁰ Di kove lohosege Elasitasi keu Koliniti oe ua. Isege Tolovimasi keu vavahaniage di Militasi omo keluige au ua. ²¹ Iale di isiviale solekai vaeahamo loho.

Isito evievi ata bahata kove umale keau isiviale abu vahaeho hoto ahoe hanavoi. Evievi ata kebia uvumo Eubulasi, Budenisi, Lainasi, Kalodia ata keau aho loui avoe, "Ana duave."

²² Di isiviale Kosiveu vani bahata aiti ui la bahata huhuevei hoesegevegei. Di hotou kemo kateai ua.

Taitasi

Bolou Taitasiho hisaliale

¹ Dau Bolo. Dilava esemu isi Iesu Keliso lovi vamale abostolo da. Dilavau di hanavoi isiviale di au ata tabageveale kebia evievi negotisi kebia haivege abu Dilava hoto seleve hilokai. ² Ilive elike ukolikoli ke huhulahlive ukolikoli malei. Dilavau subuta vata vaholisito nahi ukolikoli maleveve hoto ke lounu. Iale keu lobo holioholisito hoto seleveike au ke lounu. ³ Au hoto ke louale vaniu lohoge au hoto ke loui di haivuge di tiale hoto ke loui ata haivenu. Dilava keu nahi tedaevemale ata. Iale keike di namihage di tiniale ata haivema.

⁴ Taitasi, di uvue mo, dalike levaleva ko aho hisaliama. Naiti evievi igae. Iale di isiviale nahie Mama Dilava isi naitie tedaevemale Iesu Keliso keau a huhuai aho uvuai a hoeshavoge ue dua vanela.

Taitasiu Keliti vatae loviemale deiada

⁵ Di Keliti vata keve a haleale keu koseanu. Di isiviale au ekalesia kebia haivege abu abu vaveve toela kebia hoesegevei. Di a haivuale ke nahate o igaegae kela eloda tabagevenela. Kebia tabagevei di a namihale ke nahate haivenela. ⁶ Vaveveabe kaovage vaveveabeu dua vage kebia tabageve. Ata keau mahina igaeage eseabe keau laskolo vaveve vaholisito abu neinae mamae hoto evisi evievi ata holige ataeau kebia hilokaevale ata kebia tabageve. ⁷ Iale ata oleu isiviai Dilava lovi vai eloda holiho vaniege au vaveve toela va haleito vaveve dua unaha vagei. Isi au ebia mai hatu halei solekai itumu halei e toela i halei ata have halei moniho isivi baluga va halei. ⁸ Isito deia oleu lohoge auna ke mai o hatui hoeshavoi vaveve dua avuho vai. Isi au ebika hoeshavoge vaveveve kena inutolotoloi. Ige kemo auna huhuihuhuei dua vai au isivi va haleito Dilava isivi unaha vagei. ⁹ Isi au hotoe dua eviale ke au mataha tumuai. Katealemo auna neniai hoto seleve loui ata haivei. Ige ata oleteau hoto keho isiviholisi mai lobotige eloda kena neniai kebia haivei.

¹⁰ Kosealemo ata moaga keu hoto seleve keho isiviholilu. Isito Diue ata kebiama vaveve keu baluga. Abu abu vaveve ke unaha loui ata lobogevema. ¹¹ Abu katelahasege hotoeabe ke hamanela. Kosealemo abu hoto nimolette loui ata haivei isiviale abu vaveve kemo ataemo moni malei. Kateige evievi ata moagaeanu abu esehi kemo dolodololahama. ¹² Vaveveabe kemo di evige oeabe ata moleu loui avoe, “Keliti ata no kobiau loboe ata. Isi ovoi vaveve ke nahate vai u unahaito teigeve isi kemo batalahama.” ¹³ Hoto keu seleve. Iale ana ata kebiaho isuta lounge abuna a hoto evisi abu evievimo negolahi. ¹⁴ Isi Diue tenia toela ke halevai. Ata degomoleau hoto seleve kabebihavoi hoideveale kebia hotota halevai. ¹⁵ Oleuoleu uvuiabeu dua vage vaveveabe keabuna dua vai. Isito vaveve toela vai evievi ata holioholiale kebia vaveve bae dua valivebene. Kosealemo uvuiabe isi huhuihuhuiabe keau toelalu. ¹⁶ Ata keau loui avoe, “Noeau Dilava ehovamale ataea.” Isito vaveveabe kemo nahi hilokage keau Dilava ata holioholilu. Keau hotoe dua eviuholisili Dilava nimo vaveve toela unaha vamale kemo oleve kateai bae vaveve dua vai.

2

Bukae Hotou louale ke loui ata haive.

¹ Aihano vaveveabe ke nahate valive. Isito Bukae Hotou louale ke loui ata haivege abuna kemo vaveve dua vai. ² Malaha kosivehame kebia haivei loui kosea, “Lainaho e toela igelive. Isito huhuihuhuei dua vai la ebika nalieveve. Ige la evievi keu balugage lana kemo moleho isivilahai mole tedaevei tigeve.” ³⁻⁴ Isi hoto ke nahate loui keate kosivehame kebiata namigevei kosea, “Lainaho e toela isi atae vavamo budiagelive.” Isi lounge abu abu ebika hoesegevei hoto seleve loui. Keate doga haivege abuna abu kolivuta abu eseta huhuevei kebia tedaevei. ⁵ Isi abu onole vamale kemo huhuihuhuei dua vai. Isi katealemo oe keate dua holievei abu kolivu isivi vagei. Elike vaveveabe dua kemo atabeu bae hotobe toela loui Dilava hoto aiohavolivebene.

⁶ Isi hoto ke nahate loui malahae doga kebiata namigevege abuna abu onole vamale kemo huhuihuhuei dua vai. ⁷ Ata a vaveve bahata kemo a ebika nenihavoi vaveve dua vage ataeabuna a vaveve ke elehai a hotoe dua loui haiveale ke evisi ehovai. ⁸ Ana hotoe dua kateale loui ehomage evieviholimale keau bae oleve kateai nahie uveve kemo hotoe toela loui.

⁹ Isi ibinaholisito lovi kavamale kebia haivege abu lovi ke biae hoto evisi isiviabe ke vagei. Abulako abuhu hoto ibinate loulive. ¹⁰ Isi abulako kunaiabe vavoloagelive. Isito abu vani bahata vaveve dua unaha vage lovi ke biaeabuna kebia eahavegei. Keabuna

vaveve dua kateale vage ataeabuna kebia elegevei hilokage nahi tedaevemale Dilava ke hotou seleve.

¹¹ Nahi hilokage Dilavau ata bahata haivei au uvu mai oveime malevelihio tedaevenu. ¹² Dilavau nahi maleveale kemo isiviale nahi vatae vaveve vavae vaveve halevai vaveve dua unaha vagei. Au isiviale nahi vata kove uliege nahie ebika nalievei isivive unaha vagei. ¹³ Au isiviale nahi move Iesu Kelisou lohoveve kemo nahie uvu mai mavoi vanive baluga ke hemei ui. Vani kela nahie Dilava Iesu Keliso kena au atagamo lohohi nahie malevei. ¹⁴ Keu nahie toela ibinahohi hatinu. Katealemoike au nahi vaveve toela vamale kemo nahi malevei nahie uvu hoesegevei isiviale nahi atave seleve holisime negolahai vaveve dua vai.

¹⁵ Iale hoto kateale loui ata haivenela. Negobedai ata kebia negotievei vaveveabe toelamo isute abuhohi lounela. A kateholige abu bae a hoto ke evilivebene.

3

Ekalesiaeau vaveve

¹ Ata kebia namigevei loui kosea, “Gamani kosive kebia hoto evisi oe ata nalievemale kebia hotota evive. Kosive keau onole louge hotoeabe ke evisi isiviabe ke vave.” ² Kebia namigevei kosea, “Lainaho moleho hotoe toela loui mole vavamohi budiagelive. Isito saiaivoi moleho loui molehi ue dua vai ata bahata hoesegevei tedaevenu.” ³ A hilokage nahita subuta katelahai luleleholisi hoto evioholisi vaveve toela vama. Iale kemoike huhuihuhui toela isi vaveve toela moaga keau nahie malevege nahi isiviabe vama. Ige nahi kemo vani bahata mole maina mai isi ata kebiahi moleho itumulahai mole aiogevema. ⁴ Isito nahi vaveve kateale vasege nahie tedaevemale kosive Dilava keu nahi elegevei nahio uvuai nahie tedaevenu. ⁵ Keu nahie dua elehai nahie malevehohi. Isito nahie toela ke au elegevei nahio uvuai nahie malevenu. Keu nahie vaveve toela ulihai nahie uvu malei dogatievei au Munanae Tumuhohi vaveve keu nahie malevei humahae duamo otovenu. ⁶ Nahie tedaevemale ata Iesu Keliso ke ivimohi Dilavau au uvu bahatamo au Munana Tumute nahiovenu. ⁷ Iale kemoike nahiau Dilava nimo duave unaha. Keu au uvu nahiovei nahie malevei au ese toevei isiviale nahi ehue tiveve ke huhulahai elike ukolikohi malei. ⁸ Di aho louale hoto keu seleve.

Iale di isiviale vani bahata negobedai hoto ke loui ata haivenela. Ige oleuoleu Dilava ehovamale keabuna nenilahai ke evisi vaveve dua vai mole tedaevenu. Ige kemo ataeabuna bahata ue dua vai. ⁹ Isito mesohohi abu hoto ihuvsite loui isiviabi abu vavivue ivi kaovei mesohohi Mosese menaka kebiatamo hoto degomole loui moleho itumulahage ainaho kebiahi ke lougelive. Hoto kateimaleau heholisime bae ata negotievelivebene. ¹⁰ Ige mesohohi ata moleu lohohi hoto kateale loui ata tasalieveho vage talive ata ke namiha abuhohi. Ige au a hoto evioholige ainaho halegelive. Isito nunuvage au tai. ¹¹ A hilokage ataeau vaveve kateale vamale keau vaveve toela vai avuemo uma. Keau hilokage abu vaveve toela vamale keu toelanu. Isito abu negolahai vaveve toela ke vama.

Hotoe gabi

¹² Dana bae Atimasi o mesohohi Tikikasi hanavoge au ae lohoge solekai lohohi o mole Nikobohi keve daemo lohohi. Di isiviabi talive vaganamo o kemo ui. ¹³ Isito negoai malaha abuhohi aluvuta uale kebia tedaevenu. Kotae kosive Sinasi isi Abolohi keu olahai tiho vage tiveveabe kunai ovenela. ¹⁴ Isi nahie evievi ata kebia namigevei abu vaveve dua vai olemeau kunaiholimale kebia tedaevenu uveve dua unaha vagei.

¹⁵ Evievi ata bahata kove umale keau aho abu vahae hoto hanavohi loui avoe, “Ana ue dua vama.” Iale talive a evievi ata kebiaho loui kosea, “La haokuvuihu laheho loui avoe, ‘Lana duave.’” Nohovu. Di isiviale Dilavau la huhuevei la hoesegevei. Di hotou kemo kateai ua.

Bilimoni

Bolou Bilimoniho hisaliale

¹ Bilimoni, no haoka, ana duave. Dau Bolo da. Di Iesu Keliso hoto loui ata haivege abu di mai dibulae mavolu. Iale dalike nahie haoka Timotiti levaleva ko hisaliai aho hanavoma. No hilokage a subuta nohehi lovianu. ² Iale ekalesiau a omo igaetoai guliguliamale kebiaho no vahaeho hoto lou. Isi evievi keate mole Abia isi Dilava lovimo negoamale ata mole ivi Agibasi kebiataho ko lou.

³ No isiviale nahie Mama Dilava isi nahie Kosive Iesu Keliso keau la huhuevei la hoesegevege lana ue dua vave.

Bolou Bilimoni vahaeho vanu.

⁴ Di vani bahata guliguliai a huhuai vahaehoai Dilava imihama. ⁵ Kosealemo di hilokage a a uvu mai Iesuemo mamonu. Isi kemo Dilava ata bahata kebiaho isiviai kebiah tedeavema. ⁶ Di aho guliguliai isiviale nahi Iesu Kelisomo uveve dua maleale kemo lulelelahai hilokage Dilavau nahie hoesegeve dua vama. ⁷ Di haoka, di vahaehoanu. Kosealemo au a uvu mai Dilava ata ovei kebiah tedeavege abu kemo negolalahu. Iale di ke evige keu di mai vahaehotisi di uvu negotinu.

Bolou Onesimasie deiada lounu.

⁸ Dana isivianiege Iesu ivimo a namihage ana di isivi ke vanela. Isito di isiviholinu kateale valiho. ⁹ Isito di di uvu mai aonale kemo di isivi ke vanela. Kosealemo dau di ebiah holinu. Di Iesu hoto loui ata haivelage abu nova di mai dibulae mavolu. ¹⁰⁻¹¹ Iale di isivie hoto ko evinela. A esemu mole Onesimasi kehoike di a imihama. Keu subuta neniai loviai a tedahoholinu. Isito aike keu duave. Kosealemo di dibulae ui mo ke haivuge keu evievi ata holisi Keliso ivimo di mo holinu. Iale auna nova nahie tedeavei.

¹² Iale di nova hanavoge au ae timale auna di uvuta mai tai. ¹³ Di isiviale keluige di dibulae uale kove au a lovo mai daiti ui di tedahoi. ¹⁴ Isito di isiviholinu a isiviholisege di ke valiho. Isito a isivianiege hanavoge au loholive di tedahoi.

¹⁵ Keu a halei lohoaleu vani moagavesite kove ua. Isito a hanavoho isiviholige auna aiti u selevelai. ¹⁶ Keu aike a esemu unaha holioholinu. Isito keu nova Keliso esemu holige nahi avuluvuta uvu igaeage au nahie hoho holinu. Au evievi ata holiale keu nahie nimo baluga.

¹⁷ Iale a huhuige di a haoka holiniege a di mai o hatumale ke nahate mo ke mai o hatunela. ¹⁸ Ige mesoho keu subuta aemo vaveve toela vai a moni vavoloige ke huhu haleito di namihanela. Ige dana bae ke ibina vai aoi. ¹⁹ Iale dailike beni mai di adata hoto ko hisaliai aho loui kosea, "Dana ke ibina vai aoi." Isito di hotoe dua loui a haivuale kemo di bae aemo ibina kaovalivebene.

²⁰ Iale di haoka, di isivi ke vanela. Nahiau Kosive esemu holialemo di isivi ke valive di mai vahaehotinela. ²¹ Di ko hisaliai hilokage ana di a imihale ke vanela. Di louale keu eseve. Isito ana ke evihai vaveve baluga vanela.

Hotoe gabi

²² Di hotoe gabi louge evinela. Di isiviale daho a o mole uvu hoesehavonela. Kosealemo di huhuige Dilavana a guliguli ke evige dana lohoniege aiti ui. ²³ Ige Iesu esemu mole Ebalvasi keu hotove loui ata haivege abu mai dibulae mavoge no avuti ua. Iale keu isiviale di a namihai kosea, "Ana ue dua vama." ²⁴ Isege di esemuiau daluvuta lovilahamale Maka, Alistakasi, Dimasi, Luka kebiata hoto kateale loui di namihalu.

²⁵ Di isiviale nahie Kosive Iesu Kelisou vani bahata la huhuevei la hoesegevegei. Di hotou kemo kateai ua.

Hibulu **Iesu esemu moleu Hibulue hoto loumalebiaho hisalianu.**

Dilavau au mo ebagemage anelu evigevenu.

¹ Subuta mole Dilavau vani moaga au vaveve nimolete moaga au beloveta haivege abu nahie buluve namigevelu. ² Isito aike vanie gabi komo au mo hanavoge moveu dobai lohoale hotove loui nahie namigevenu. Dilavau louge ata ke igaemoike onobenobe bahata ua. Iale Dilavau ke ebagemale kemo auna gabie onobenobe bahata nibievei. ³ Ke atagau Dilava ataga ke nahate balugataho. Keu Dilavati mole nahate unaha. Iale hotove vuvune kemoike onobenobe bahata keau ui tima. Iale keu atae vaveve toela ulihaito otogoe tiale Kosive baluga vuvunete ke ada inuteatave ugulamou.

⁴ Dilavau au mo ke ebagemage keu anelu bahata evigevenu. Isi Dilavau au mo ke ivihage ivive keu anelu kebia ivi evigevenu. ⁵ Kosealemo Dilavau au moho loui avoe, “Au di mo.

Isege dau a Mama.”

Au kateai louito anelu kebiaho hoto kateale louholinu. Isito au mo kemo loui avoe,

“Dana Mamave holige

ena di mo holisi.”

⁶ Kateai au mo igae vatae hanavoliho tota loui avoe,

“Anelu bahataeabuna avu igae hoesehavo.”

⁷ Dilavau Bukae Hotomo avoe,

“Auna au anelu negotievege abuna heluka nahate vai veeee vedodo ke nahate vai hotove mai tai.”

⁸ Anelu vaveve louito au moe vaveve lounu. Au avuho loui avoe,

“A keu Dilava.

Ana vani bahata a telonamo ugulamoi a vaveve inutolotolo kemo a ataeau a adae vuvunemo uale kebia nibigevegei.

⁹ A vaveve duaho isiviaito vaveve toelaho isiviholinu.

A vaveve katealemoike di a vahaeho vai a ebagemage a Kosive holinu.

Isito aluvuta umale kebiaho di kateholinu.”

¹⁰ Dilavau kateai louito tota avuho hoto mole lounu. Isi avoe,

“Au Kosive.

Iale vasohuta onobenobeu uoholisege a adata vata vai otogo vanu.

¹¹ Isito a vaeveale keabuna bahata uoholisege a kena ui tigei.

A vaeveale keabuna ogoe sisi kebia nahate mamilahi.

¹² Ige ana kebia mahoevege abuna uoholige dogavena ui.

Isito a keu koli holilivebene.

A subuta ui lohoale ke nahate ana vani bahata ui tigei.”

¹³ Dilavau kateai au moho louito tota namihai avoe,

“Di ada inute kove ugulamou.

Isege di a aiohavomale ata kebia malevei a veloe heimo otovege Kosiveabe holinela.”

Au kateai au moho louito anelubeho hoto kateale louholinu. ¹⁴ Iale anelu keabuna vadeai.

Keau Dilava isivi vamale munanaea. Iale Dilavau kebia hanavege keabuna ukolikoli maleveve ata kebia tedaevegei.

2

Hoto seleve ke mataha tumuave.

¹ Katealemo nahi hoto seleve eviale ke mataha tumuai. Nahi kemo negolahaliege bae ke halevalivebene. ² Subuta Dilavau au anelu namigevege abu hotove ke loui ata namigeveale hoto keu seleve. Iale hoto ke evisi ehovaholiale keau ke ibina vatehani malelu. ³ Iale nahiabuna katelahai ukolikoli maleveve hoto baluga ke evisi vaholiliege nahiabuna oleve kateai vatehani ke haliohatui. Kosive biageu vasohuta nahie maleveveve hoto ke mai lohonu. Ige hotove eviale keau nahie haivege nahi hilokage keu seleve. ⁴ Keau katelahasege Dilavau kebia vuvunetievege abu kemo vikoe vaveve vaevei vaveve nimoleteta vaevelu. Isi au isivimo Munana Tumumo vuvune vaveve igaegaeai nahiovenu.

Iesu Kelisou ukolikolie humaha alavonu.

⁵ Dilavau vatae doga vale kemoike no hoto ko louma. Vatae doga ke aneluiiau bae nalilivebene. ⁶ Isito Bukae Hotomo ata moleu guliguliai Dilava namihai avoe, “Noeau atae toelaea.

Iale osialemoike a no huhuevei no tedaevema.

⁷⁻⁸ A subuta ata vavevi vuvune ovei tabagevege abu anelu evigeveholisito valaeabemo ui vatae onobenobe ke bahata nalievelu.”

Bukae hotou kateanu. Isito novae vani komo ataeau onobenobe kebia nalieveholima. ⁹ Katealemo Dilavau nahie huhuevei Iesu hanavoge keu vatae lohoale heie ui anelu kebia evigeveholisito valaeabemo ui ata bahatae toelaho hatige elike ataeau ibinae toela ma halevai. Vaveve kemo Dilavau ebagemai au vuvune mai ominu. ¹⁰ Dilavau onobenobe bahata vavevi nibieveale keu vatehani mai ukolikolie umuka Iesu omisi isiviale au kemo ata moaga maleveime au atagamo otovege elike abu kemo hilokage Iesu keike vaveve toelamo malevenu.

¹¹ Iesu keike atae vaveve toela ulihage uvuiabeu dua vanu. Ige vaveveabe toela ulihale keau Iesuluvuta Mama igae. Ige kemoike Iesu kebia matigeveholisito abuhu loui avoe, “Di hohuvuia.” ¹² Bukae Hotomo au kateai lounu. Isi avoe,

“Kosive, dana a vaveve loui di hohuvu namigevevi vudiabemo a ivi ebagemai a hoesehavoi.

¹³ Au kateai louito tota loui avoe,

“Dana di uvu mai Dilavamo mamoi.”

Isi tota loui avoe,

“Di nova Dilavau ata daoveale kebiahi ua.”

¹⁴ Au hoto ke louale keu koseanu. Nahiau vatae ataea. Ige Iesu keu lohoale vatae ata holisi nahie vava nahate vaito kemo hatinu. Au hatiale kemo Setene vuvune ke hamanu. Iale Seteneu bae hatihatie vuvune kemo nahie malevelivebene. ¹⁵ Iesuu nahiho hatioholisege Seteneu nahie malevege nahi kemo hatihati ke vabuhavoi isivive unaha vama. Isito Iesuu lohoale nahiho hatiale kemo nahi bae hatihati ke vabuhavolivebene. ¹⁶ Nahi hilokage keu lohoale anelu tedaevholinu. Isito keu ata holisi Ebalahamu valadamo lohoale au ata tedaevenu. ¹⁷ Keu kateai nahie vava nahate vai vaveve bahatamo nahie nana holinu. Kemoike au nahiho uvuai au lovi kemo negoai nahie toelae ibinahohatisi isiviale Dilava vudimo nahie dubue kosive baluga holisi. Ige elike kemo Dilavau nahie toela bahata ulihai. ¹⁸ Seteneu isiviale Iesu lobohavoge au kemo dobai. Isito au kemo dobaholisito vatehani bahata malei hilokanu. Katealemo nahiabuna Setene lobo kemo vatehani malege auna kemo nahie tedaevei.

3

Iesuu Mosese evihanu.

¹ Di haokuvuia, Dilavau la hohaveale kemo la atave seleve holilu. Iale di isiviale Dilavau Iesu hanavoale ke nahi huhulahai. Iesu keu nahie dubue Kosive baluga holiialemo nahi nahie uvu mai avuemo mavolu. ² Moseseu au lovimo negoai Dilava ata bahata tedaeveale ke nahate Dilavau Iesu ebagemage au au lovi kemo negoanu. ³ Malaha olena oe dua houniege ataeabuna o ke elehai malaha ke eahalei. Ke nahate Mosese keu Dilava ata nalievemente ata. Isege Iesu keu ata bahata kebia biage holisi Mosese vaveve ke evihage iviveu balugatahoanu. ⁴ O keu bae ukavalivebene. Isito o ke houale keu biagete. Ke nahate onobenobe bahataeau vatamo uale kebia biageike Dilava. Kosealemo avulike onobenobe bahata vaevenu. ⁵ Mosese keu Dilava omo baluga holioliholu. Isito keu au lovimo negoai Dilava esemu holisi atave nalieveli Dilavau gabie vaveve hoto loui ata namigevenu. ⁶ Isito Iesu Keliso keu Dilava mo holiialemo au lovimo negoai Dilava omo atave bahata nalieve dua vama. Iale nahiabuna vahaehomo negolahai Iesu lohoveve ke huhulahai uliege atave holisi.

Lainaho Dilava hoto kabebihavolive.

⁷⁻⁸ Katealemoike Dilava Munanae Tumuu Bukae Hotomo loui avoe,

“La novae vani komo Dilava hoto eviliege lainaho ke kabebihavolive.

Subuta la buluveau tomagie ui Dilava kabebihavoi isiviholilu isivive valiho.

Isito isiviale abu isivi unaha vai elehage Dilavau abuhu itumuage o itumuholige.

⁹ Abu katalahasege Dilavau loui avoe, ‘Vagana voti (40) ke uvumo di vaveve degomole vavevege abu ke elehaito kemo luleleholisi isiviale kemo di vuvune kaovai.

¹⁰ Katealemoike di kebiaho itumuai loui kosea, Keau di vaveve elehaito isiviholilu abu uvu mai daemo mavoi di ehovaiho.

¹¹ Di kateai abuhu itumuai hoto isute abuhu loui kosea, La bae dae lohoi daluvuta ulivebene.’”

¹² Di haokuvua, abu subuta vaveve toela vai abu uvu mai ukolikolie Dilavamo mavoholisito halevale ke nahate lainaho vagelive. ¹³ Isi Dilavau novae vani komo ata maleveliho louale kemo lainaho moleho hotoe toela loui mole aiogevelive. Isito moleho hotoe dua loui mole tedaavei negotieeve. Katealemo vaveve toelau laemo lohohi la lobogevege la bae Dilava kabebihavoi la isivi valivebene. ¹⁴ Subuta Dilava hotou nahie lohoge nahi ke evisi ehovalu. Iale nahiabuna kemo negolahai tiliege vanie gabila Iesu Kelisoluvuta igaetolahi ui.

¹⁵ Bukae Hotou kemo loui avoe,

“La novae vani komo Dilava hoto eviliege lainaho hotove kabebihavolive.

La buluveau subuta katelahai Dilava kabebihavoi isiviholinu ehovaliho.

Isito lainaho katelahalive.”

¹⁶ Iale la huhuige ata oleteabuike Dilava hoto evisito kabebihavoi isiviholilu ehovaliho. Ata bahataeau Moseseluvuta Egubito halevai tomagie tiale keabulike vaveve kateale valu. ¹⁷ Isi la huhuige ata oletebiahoike Dilavau vagana voti (40) ke uvumo abuhu itumuanu. Ata nehe keau tomagie tiale vaveve toela vaimo kemo haluviale kebiahoike Dilavau itumuanu. ¹⁸ Isi la huhuige ata oletebiahoike Dilavau hoto isute loui avoe, “La bae dae lohohi daluvuta ulivebene.” Ata neheau hotove kabebihavoi ehovaho isiviholiale kebiahoike au hoto ke lounu. ¹⁹ Katealemo nahi hilokage keau Dilava kabebihavoi hotove eviholiale kemoike abu Dilavau abuhu louale matama keve velehovoholilu.

4

Dilavaluvuta uveve deiada

¹ Dilavau nahitaho loui avoe, “La isivilahaliege dae loholive daluvuta uve.” Onoilage nahi degomoleau hotove eviholisi nahie isivi valiege avuluvuta uoholima. ² Keau subuta Dilava hoto eviale ke nahate nahita hoto ke evilu. Isito keau hoto ke evisi abu uvu mai avuemo mavoholiale kemoike hoto keu kebia tedaaveholinu. ³ Dilavau subuta vata vage uoholige au kemo u unahanu. Iale nahi hotove evisi nahie uvu mai avuemo mavoale nahiabuna tiliege avuluvuta ui. Isito subuta umale ata nehe keau ke nahate vaholilu. Ige Dilavau abuhu itumuai hoto isute loui avoe, “La bae dae loholive daluvuta ulivebene.” ⁴ Dilavau kateai lounu. Ige Bukae Hotou loui avoe, “Dilavau au lovi bahata vai gabiaito bulamo u unahanu.” ⁵ Hoto keu kateanu. Ige tota hoto ehue louale ke nahate Dilavau loui avoe, “La bae dae lohohi daluvuta ulivebene.” ⁶ Subuta Iselala ataeau Dilavau abuhu louale matama keve tihoholilu. Kosealemo keau Dilava hoto evisito abu uvu mai avuemo mavoholilu. Isito ata degomoleau nova hotove evisi vale Dilavau loue abuna avuluvuta ui. ⁷⁻⁸ Subuta Diosuau Iselala ata holoavege abu otogoe vatae Dilavau louale keve avuluvuta u vatege Dilavau novae vani mole kove avuluvuta otogoe uveve hoto Deividio louholinu. Katealemoike Deividu Bukae Hotomo hisaliai avoe,

“La novae vani komo Dilava hoto eviliege lainaho ke kabebihavolive.” ⁹ Katealemo nahi hilokage Dilava ataeabuna avuluvuta otogoe ui. ¹⁰ Iale oleuoleu Dilavaluvuta uliege Dilavau au lovi vage uoholige u unahale ke nahate abuna abu lovi vai gabiai avuluvuta ui. ¹¹ Iale nahi katelahai negobedai Dilavaluvuta ui. Di isiviholiale abu subuta hotove eviholisi ehovoholiale ke nahate nahi valiho.

¹² Dilava hoto ke negou siga vaki mole isi vaki mole iniale ke nahate. Iale kena atae huhuihuhui, atae munana isi atae uvu seleve tai vaveveabe bahata daii havevege vaveve oleteike duave isege oleteike toelanu. ¹³ Katealemo onobeu bae Dilava nimo hogolahalivebene. Isito Dilavau onobenobe bahata vaveveale kemo keabuna umidamo ui. Iale nahiabuna bae Dilava vudimo lavisi nahie vaveve avuhu loui.

Iesu keu nahie dubue Kosive baluga.

¹⁴ Nahi evievi ata holialemo nahi nahie evievi kemo lavie dua vai. Kosealemo Dilava mo Iesu keu nahie dubue kosive baluga holisi tiale ehue ua. ¹⁵ Nahie kosive baluga keu nahi negoholiale ke hilokanu. Keu subuta vatae lohoge Seteneu vaveve bahatamo nahie lobogevefemale ke nahate ke lobohavonu. Seteneu kateige Iesu kemo dobai vavevebe toela vaholinu. ¹⁶ Iale nahi vabu halevaito negolahai Dilavae lohohi vudivemo imihai. Ige auna nahie huhuevei nahio uvuai nahi negoholimale kemo nahie tedaavei.

5

Dubue kosive baluga ke vaveve.

¹ Diue ataeau abu ataemo dubu nalimale kosive baluga igaegae tabagevege keabuna Dilava lovi vai abu ataho guligulilahi toelaave ualihaliho ovo havei mahovegeve. ² Ige ataeau luleholisi vaveve toela vage dubu nalimale kosive baluga keu bae kebiaho itumualivebene. Isito auna kebiaho uvuai kebia hoesegeve. Kosealemo keu avuta

negoholimale ata. ³ Iale kemoike auna au ebia isi au ata bahata kebia toelaho ovo havei mahoge. ⁴ Atabeu bae dubu nalimale kosive baluga lovi ke valiho au ebika ebagemalivebene. Isito Dilava igaena lovi keho ata ebagemai. Au subuta Mosese nana Eloni ebagemale ke nahate.

⁵ Iale ke nahate Iesu Kelisou lovi keho au ebika ebagemaholinu. Keu kateholisito Mamaveu ebagemai avuho loui avoe,
“Au di mo,

Isege dau a Mama.”

⁶ Isi tota namihai avoe,

“Mekisedekiu subuta dubu nalimale kosive
baluga holiiale ke nahate ana vai
dubue kosive baluga holisi
vani bahata ui tigel.”

⁷ Iesuu vatae ui vani degomole ninanamo guliguliai baita Dilava imihanu. Keu kateai au ebika ebagemaholisito Dilava isivi unaha vamale kemo Dilavau guligulive evisi hatihatimo manu. ⁸ Iesu keu Kosive baluga mo. Ige Mamaveu isiviale au hotove evisi vatehani malei elike vatehani kemo hilokage hoto evimale kemo ataeabuna vatehani malegei. ⁹⁻¹⁰ Iesuu au Mamae isivi vai vatehani ke behata malei hilokalemo Dilavau ebagemage au dubu nalimale kosive baluga Mekisedeki ke nahate holinu. Iale oleuoleu Iesu isivi vai ehovale keabuna ukolikoli malei.

Dilava hotomo luleleholiale keau eseese nahate.

¹¹ Di isiviale hoto kemo hoto mole loui la haivei. Isito la solekai luleleholiale kemo dana oleve kateai hoto ke ihu neniai la haivei. ¹² Abege novae vani komo la biaeau Dilava hotomo luleleai mole haivei. Isito la sohu isivialeike ata moleu Dilava hotoe umuka ke loui la haivei. La vaveve keau eseeseau lovi tolote ioholisito amu unaha imale ke nahate. ¹³⁻¹⁴ Amu imale eseeseau vaveve toela vaveve dua hilokaholilu. Isito kosi holiiale keau lovi tolote isi vaveve toela vaveve dua hilokalu. Iale ke nahate ata oleuoleu Dilava hotomo luleleholiale keau eseese nahate. Isito ata oleuoleu Dilava hotomo luleleale keau kosi nahate. Keau Dilava hoto kaovalata kemo hilokage vaveve oleteu duave isege vaveve oleteu toelanu.

6

Eeseese vavevete halevai kosie vavevete vave.

¹ Iale nahi Dilava hotoe umuka kemo lulelelahai hotove degomole kaovai ketamo lulelelahai. Di subuta hotoe umuka loui la haivei loui kosea, “La vaveve toela halevai la uvu mai Dilava omive. ² Isi babatisoage kosive abuna abu ada malei la golomo otovei la hoesegevei.” Isi hatihatimo hoveveveve hoto ke di loui Dilavau atae vaveve abuemo kaovaveve hoto keta di laheho lounu. ³ Iale di isiviale hotoe umuka kemo lulelelahave. Isi halevai Dilava hoto degomoleta kaovai kemo lulelelahave. Dilavau nahiho humaha kateale alavoge nahiabuna kateale vai.

⁴ Isito ata oleuoleu Dilava ehovai hotovemo lulelelahale keau kemo hoideveve vaveve toela vamale keabuna kemo tota oleve kateai abu vaveve toela kemo hoideveve Dilava ehovai. Keau subuta Dilava vavevemo lulelelahai Munanave Tumu malelu. ⁵ Isi kemo hilokage Dilava hoto keu duave. Isi hilokage vatae dogau lohoveve ke vuvunena balugai. ⁶ Iale keau katelahaito Dilava halevai hoideveve kemo abuna oleve kateai abu vaveve toela halevai tota hoideveve Dilava ehovai. Keu anekianu. Kosealemo subuta abu Iesu mai idie domo hamai avuho hotoe toela louge ataeau elehai hehavolu. Iale ke nahate ata keau Dilava halevai hoideveve keau subuta ata kebia vaveve nahate vai Iesu mai tota idie domo hamai aiohavoale ke nahateike abu ke vama. Ige vaveve kemo ataeabuna Iesu hehavoi aiohavoi.

⁷ Hoto kemo di hoto mole louge evive. Atae vaveve keu vatae dua vatae toela ke nahate. Vatae dua kemo ataeabuna lovi hage veniu lohoge lovi keabuna ulie dua vai. Ige ataeabuna lovi ke malei isi. Dilavaike vatae dua kateimale hoesegevema. ⁸ Isito vatae toela kemo onobenobeu bae ulie dua valivebene. Kemo latie toela unahaabuna lalavoi. Ige ataeabuna ke elehai itumulahai lati ke mahoi. Iale nahiabuna Dilava ehovage auna nahie hoesegevei. Isito nahi halevai ehovaholige auna nahie aiogevei.

⁹ Di uvue haokuvuia, di hoto isuteike laheho lounu. Isito di huhuige laeau di louale ke nahate vaholisito Dilava ehovai au la maleveve ke humahala tima. ¹⁰ Iale Dilavau la vamale ke elehai bae la momagevelivebene. Keu vaveve dua vamale Kosive. Iale la vani bahata la uvu mai omisi vaveve dua vai mole tedaevemale kemo au bae la momagevelivebene. ¹¹ Iale di isiviale la igaegaeai vaveve katealemo negolahai tigei.

Ilive elike vanie gabila la ukolikoli maleveve hemei umale ke malei. ¹² Di isiviholialeike la vaveve ke kabebihavoliho. Isito evievi ata degomoleau abu uvu mai Dilava omisi negolahai hemei umale ke nahate vave. Ilive elike Dilavau onole laheho louale ke lata maleve.

Dilavau louale ke auna vai.

¹³ Subuta Dilavau Ebalahamuho loui avoe, “Seleveta dana aho vaveve mole vai.” Kosivebeu Dilava nahate uoholialemoike Dilavau au ivi tumutemo hoto ke lounu. ¹⁴ Au Ebalahamuho loui avoe, “Seleveta dana a hoesehavoqe a valadana balugai.” ¹⁵ Dilavau kateai louge Ebalahamu hoto ke evisi hemei ulage Dilavau louale keu avuemo lohonu. ¹⁶ Ataebuna moleho itumue hoto louge ata molena Kosive ivi loui ata kebia hoto hamage ataeabuna ke evisi loui kosea, “Hotove keu seleve.” Ige abu moleho itumue hoto lounale kena gabiai. ¹⁷ Atae vaveve keu kateanu. Ige Dilavata kateale vai au ivi tumutemo loui isiviale Ebalahamu valada keabuna Dilavau au ivimo louale ke elehai hilokage au louale keu lobo holioholisito seleve unaha. Au bae au louale ke halelivebene. ¹⁸ Dilavau au ono vade valiho au ivi tumutemo hoto louale kemo nahi hilokage hotove keau lobeo hoto holioholilu. Isi nahi hilokage au bae au louale ke halelivebene. Iale nahi vatae vaveve halevai Dilavau nahie maleveveve ke huhulaha kemo negolahai hemei ulive au lohoge nahi ukolikoli malei vahaeholaha. ¹⁹ Nahi ukolikoli maleveveve ke huhulahage nahie uvuna anika nahate vai bae kibikibialivebene. Nahi ke huhulaha negolahage onobeu bae nahi aioevelivebene. Isito nahiaabuna ehue tiveve ke huhulahaliege bae Dilava umale keve ui. ²⁰ Ige Iesu nahiho uli holisi keve tiale ua. Keu dubue kosive baluga holiiale kemo auna Mekisedekiu Salemu o kemo dubu nalimale kosive holiiale ke nahate vai otogoe vani bahata ui nahi tedeavegei.

7

Dubue kosive baluga Mekisedeki

¹ Mekisedeki keu o mole Salemu ke kosive baluga. Ige ehudae umale Dilavau ke ebagemage keu dubu nalimale kosive baluga holinu. Iale Ebalahamuho tuvaliai kosive degomole haveitu hoilaha lohosege Mekisedekiu avui belemai hoesehavonu. ² Ige Ebalahamuho kosive kebia havei kunaiabe maleale kemo taidi malei Mekisedeki ominu. Mekisedeki ke ivie ihuikie inutolotolote kosive. Ige ove Salemu ke ihuikie uvevete. Iale kemo keta uvevete kosive. ³ Bukae Hotomo Mekisedeki ke mamata neinaveta hotou uoholinu. Isi valadave ke hotota uoholinu. Isi Mekisedeki keu uale vani isi hatiale vani keta nahi hilokaholilu. Keu kateale Dilava mo nahate. Keu dubu nalimale kosive baluga holisi vani bahata ui tima.

⁴ Nahi hilokage Mekisedeki keu kosive baluga. Iale kemo nahie umuka Ebalahamu keu tuvaliai kemo kunai malei lohoale taidi malei Mekisedeki ominu. ⁵ Ebalahamu haokaike Livai. Iale Livaimo lohoale keau dubu nalimale ataea. Iale Dilavau Livai ata namigeveve avoe, “Lana Iselala ata kebiamo taidiabe maleve.” Au kateai louge keau abu ata Ebalahamu valada unahamo taidi malema. ⁶ Isito Mekisedeki keu Livai valadamo lohoholinu. Keu kateholisito Ebalahamuemo taidi malenu. Ebalahamu keike Dilavau avuhu hoto loui mamoaale Mekisedekiu avuemo taidi malei hoesehavonu. ⁷ Iale nahi kemo dolodolo halevai. Mekisedekiu Ebalahamu hoesehavoale kemo nahi hilokage Mekisedekiu baluga. ⁸ Livai dubue kosive keau ataemo taidi maleale keau subuta haluvilu. Isito Bukae Hotou loui avoe, “Mekisedekiu Ebalahamuemo taidi maleale keu hatioholisi vani bahata uma.” ⁹ Iale di kemo hoto mole louge evive. Ebalahamuho taidi malei Mekisedeki ominu. Iale ke nahate Ebalahamu haoka Livai keu valadavemo lohoito taidi malei Mekisedeki omioholinu. Isito umukaveu taidi omige keta kemo taidi omiale ke nahate vanu. ¹⁰ Livaiu uoholisige Ebalahamuho taidi malei Mekisedeki ominu. Isito Livai keu Ebalahamu valadamo lohoalemo avuta au umuka kemo taidi malei Mekisedeki omiale ke nahate vanu. Katealemo nahi hilokage Mekisedeki vaveve keu Livai vaveve evihai baluganu.

¹¹ Dilavau subuta au menaka loui Iselala ata haiveito Livai ata kebia tabagevege keu menakave kemo dubu nalimale ata holilu. Au kateaito Livai valadamo ata mole ivi Eloni ke ebagemage keu dubu nalimale kosive ovokina holinu. Ige Eloni isi valadave keau dubue lovi vai ata haivege vavevebeu duavatebe dubu nalimale kosive mole dogau Mekisedeki ke nahateu lohoholinu. Kosive mole dogu keu lohonu. Isito keu Eloni valadamo lohoholinu. ¹² Dubu nalimale kosive dogau lohoale kemo menaka dogata mai lohoge mamiveu uoholinu. ¹³ Dubu nalimale kosive dogau lohoale keike nahie Kosive Iesu Keliso. Keu Eloni valadamo lohoholinu. Iale au lohoale valadave keau dubue lovi ke vaholilu. ¹⁴ Nahi hilokage Iesu keu Diuda valadamo lohonu. Ige Mosesu subuta

dubu nalimale kebia tabageveale kemo Diuda valada ke louholisito Eloni valada ke unaha lounu.

Dubue kosive baluga Mekisedeki nahate.

¹⁵ Iale nahi dolodolo halevaito hilokage dubu nalimale kosive dogau lohoale ke Eloni nahate holioholisito Mekisedeki ke nahate holinu. ¹⁶ Subuta Moseseu menaka mamoi loui avoe, “Eloni valadamo lohoale kebia unahaeabuna dubu nalimale kosive holisi.” Isito Iesu keu menakave kemo dubu nalimale kosive baluga holioholinu. Isito au ukolikoli vuvune mai vani bahata umale kemo dubu nalimale kosive baluga holinu. ¹⁷ Bukae Hotou kemo loui avoe, “Ana vani bahata Mekisedeki vale ke nahate dubue kosive baluga holisi ui tigenela.” ¹⁸ Iale Dilavau menakae mami ke evovoai menakae dogo mamonu. Kosealemo menakae mami keu negoholialemo ataeau bae kemo ukolikoli malelivebene. ¹⁹ Menakae mami kemo atae vaveve keau Dilava nimo duave seleve holioholilu. Isito Dilavau menakae dogo mamoaale kemo nahiabuna nivemo inutolotoloi au lohoveve ke huluhahalive au lohoge avuluvuta igaetolohai.

²⁰ Iale kemo di isiviale hoto mole loui. Dilavau au ivi tumutemo subuta dubu nalimale kosive kebia tabageveholinu. ²¹ Isito Dilavau au ivi tumutemo Iesu ebagemage au dubu nalimale kosive baluga holinu. Bukae Hotomo hoto katealeu ua. Isi avoe,

“Dilavau au ivi tumutemo loui avoe, ‘Ana vani bahata dubu nalimale kosive baluga holisi ui tigenela.’

Iale Dilavau bae au louale ke halelivebene.”

²² Dilavau hoto kateale louale kemo nahi hilokage Iesu menakae dogo keu menakae mami ke evihanu. Iale nahiabuna ke ehovaliege ue dua vai tigei.

²³ Diue dubue kosive keau abu lovimo haluvisage tota degomoleau lovoveabe mai dubue kosive holisi lovi ke vama. Katealemo dubue kosive moagaeau ua. ²⁴ Isito Iesu keu dubue kosive baluga holisi vani bahata uma. Iale atabeu bae lovove mai lovive valivebene. ²⁵ Keu vani bahata umale kosive. Iale ataeau vuvunevemo Dilavae lohoale keabuna seleveta ukolikoli malei. Kosealemo kena vani bahata Dilava vudimo ui abuhu Dilava imihagei.

²⁶ Iesu keu ata tumute. Vavevebe toelau avuemo uoholinu. Ige uvuve keu vatae atae vaveve toela ke nahate vaholinu. Isito uvuve keu duave unaha. Iale Dilavau otogoe ebagemage keu nahie dubue kosive baluga holisi nahie tedaeve dua vama. ²⁷ Keu Diue dubue kosive baluga kebia nahate vaholinu. Diue dubue kosive keabuna vani bahata abu toela ulihaho ovo havei mahogei. Isi abu ata kebia toelataho katelahai ovo havei mahogei. Isito Iesu keu vanibela kateale vaholisito tava igae ata bahatae toelaho hatinu. ²⁸ Subuta Dilavau menaka mole mamonu. Isi kemo ata tabagevege abu dubu nalimale kosive holisi neniai lovi ke vaholilu. Kosealemo keau ata unaha. Iale gabie Dilavau au ivi tumutemo hoto loui au mo ebagemage keu hotove evisi vaveve inutolotolote unaha vai kemo vani bahata uma.

8

Iesu keu nahie dubue kosive baluga.

¹ Nahi ehue louale hoto ke ihuie ko. Seleveta Iesu keu nahie dubue kosive baluga holinu. Iale Dilavau otogoe telonamo ugulamoi ata nibievemale keve Iesuu adave inuteveatae ugulamou. ² Keu otogoe Dilavau umale keve nahie dubue kosive baluga holisi lovive vama. Keu vatae dubue kosive nahate vaholisito Dilavau avuhu loui mamoaale lovi ke vama.

³ Diue ataeau dubue kosive baluga tabagevege abu Dilava hoesehavoliho ovo havei mahoevema. Isito nahie dubue kosive baluga Iesu keu nahie toela ibinahou au ebika mai Dilava omisi hatinu. ⁴ Keu vatae ui hatioholivatebe dubue kosive holioholinu. Kosealemo Diue dubue kosiveau sohu abu menaka ehovai ovo havei mahoma. ⁵ Diue dubue kosive kebia vaveveu otogoe lovi ke munana nahate. Katealemoike Moseseu subuta dubu houho vage Dilavau haivu avoe, “Neniai di tanae onobenobe bahata a haivuale ke nahate hounela.” ⁶ Iale Iesuu otogoe dubue kosive baluga lovi vale keu Diue dubue kosive baluga kebia lovi evihanu. Ige Iesu menaka mamoaale menakave keu menakae mami ke evihanu. Kosealemo Iesu hotoe dua loui mamoaale kemo nahiabuna Dilavaluvuta igaetolohai ue dua vai.

⁷ Subuta menaka keu dua vatege Iesuu menaka mole dogo tota mamoholinu. ⁸ Isito Dilavau subuta atae vaveve elehage vaveveabeu inutolotoloholinu. Ige Dilavau Bukae Hotomo loui avoe,

“Gabie vani molena lohoge dana Diue ata kebiaho menaka mole dogo mamoi.

⁹ Menaka keu bae di subuta buluveabeho menaka mamoaale ke nahate valivebene.

Subuta vani kemo di buluveabe holoevege abu Egubito halevai tilu.

Ige di abuhu menakage abu kemo abu uvu mai mavoi ehovaholilu.

Katealemoike di kebia halevenu.

¹⁰ Isito gabie vani molena lohoge dana Iselala ataho menakae doge koseale mamoi.

Dana uvuiabemo di hoto mamoge abuna ke huhulaha ehovai.

Ige dana Dilavaeabe holige abuna di ata holisi.

¹¹ Vani kemo atabeu bae au vavamo umale isi au haoka kebiaho kosive hilokaveve hoto loui haivelivebene.

Kosealemo vani kemo esebulu isi kosi keabuna bahata di hilokai.

¹² Ige dana abuhu uvuai vaveveabe toela ulihai. Isime bae tota toelaeabe ke huhualivebene.”

¹³ Dilavau menakae dogae hoto louale keu menakae mami ke lovo masege menakae mami keu uoholinu.

9

Menakae mami isi menakae doge

¹ Dilavau menakae mami kemo oleve kateai guligulihavoveve hoto loui au ata namigevege abu dubu houie kemo guligulihavolu. ² Abu dubu houale ke ivi mole abu ivihai avoe, “Uvu Tumute.” Iale ke uvumo ono mole lameba nahate keu ua. Ige abu beleidi malei Dilava hoesehavoho mavomale ke batabatau ua. ³ Iale Uvu Tumute ke iae uvu mole ogou bamuale ke abu ivihai avoe, “Uvu Tumute Seleve.” ⁴ Uvu ke uvue abu golota batabata mole vai kemo senisi hagote mohomale batabata keta ua. Ige abu golota maua vale keta ua. Ke uvumo Dilavau mune abuimo au menaka hisaliale kebiata ua. Ige goloto melegi vai mai avuemo lovi mole mana ke otoveale keta ua. Ige maua ke igae uvumo Eloni bedoiau subuta atiai humuale keta ua. ⁵ Isime maua ke golomo abu golota anelue munana abui vavei malei otovege keau otogoe aneluaiau Dilava atagamo lavimale ke nahate vai ua. Ige kebia atuguiaiu dubue kosive balugau atae vaveve toela ulihaho taho mai maua golomo mamooale ke bamui tatave ua. Kemo hoto degomoleau ua. Isito di isiviholialeike aike ke loui la haivelihohi.

⁶ Uvu abui kebia uvumo abu hau kateale otovelu. Iale vani bahata dubue kosive abuna tiliege dubue Uvu Tumute keve dubue lovi ke vagei. ⁷ Isito dubue kosive baluga ke igaena vagana igae uvumo vanie ni igaemo auna Uvu Tumute Seleve keve tigei. Auna ovoo taho malei ke uvue tai taho ke mai Dilava nimo mamogei. Ige Dilavana ke elehai dubue kosive baluga ke toela isi atave kebia toelata ulihagei. ⁸ Vaveve kemo Munana Tumute nahie haivege nahi hilokage subuta guligulie vaveve keu usege atabeau bae Dilavau umale Uvu Tumute Seleve keve talivebene. Isito dubue kosive baluga ke igaena keve tigei. ⁹ Iale subuta vaveve keu nahie haivege nahi hilokage novae vani komo ovo havei mahoi Dilava hoesehavomale vaveve katealeu bae atae uvu hoesehavoge keu bae Dilava nimo duavealivebene. ¹⁰ Subutae menakate vaveve kemo lovi iveve, vava hoesehavoveve katealeu bae atae uvu hoesehavolivebene. Vaveve katealeu ui lohologe Dilavau menakae doge mamoge subuta vaveve keu uoholinu.

¹¹ Ige Iesu Kelisou lohoale subuta guligulie vaveve ke nahate vaholisito otogoo tiale nahie dubue Kosive baluga holinu. Otogoo vaveve keu vatae vaveve nahate holioholisito duave unaha. ¹² Iesu Kelisou Dilavau umale keve tialeu ovoo taho malei Dilava hoesehavoholinu. Isito Iesu tava igae nahie toelae ibinahohatiale kemo nahiabuna ukolikoli malei. ¹³ Subuta dubue kosiveau ovoo taho malei atae kemo hibihai hatui ovo mole mai mahoge lahasege lave malei atae vava omisi vavaeabe vaveve hoesehavoma. ¹⁴ Isito Iesu vaveve keu vaveve kateale evihanu. Ukolikoli Munanae Tumuu mai negotige au au vaveve duamo au vava mai Dilava omisi nahie toelaho hatinu. Iale nahi bae nahie vavevemo ukolikoli malivebene. Isito tahoveu nahie uvu hoesehavoge duavealemo nahiabuna ukolikoli Dilava ke lovi vai ukolikoli malei.

¹⁵ Iesu au hatihati kemo menakae doge mamonu. Ige kemo Dilavau ata hohaveale keabuna ukolikoli malei au onole abuhu louale keta abuna malei. Kosealemo subuta menaka ke valamo ataeau vaveve toela vama. Isito Iesu hatiale kemo abu bae abu subuta vaveve toela vamale ke ibina malelivebene.

¹⁶ Di kemo hoto mole louge evive. Ata molena nita ui bukamo au isivie hoto hisalianiege hatige abuna isivie vai kunaive malei au louale ata kebia ovei. ¹⁷ Isito ata keu hatioholisege au onole loui hisaliale keu bae velemalivebene. Isito keu hatihute vasege ke iae au onole louale kena bae seleve holisi. ¹⁸ Iale ke nahate abu subuta ovo havege tahoeabeu lotige menakae mami keu seleve holinu. ¹⁹ Subuta vaveve keu koseanu. Moseseu vasohuta Bukae Hotomo menaka bahata loui ata haivenu. Isime ovoo taho malei eta ebuehanu. Isime idi mole ivi hisobi ke hasi egumai mamooe vomo tahote mai

ivive ke vilianu. Isi ke mai taho kemo manemei mai hibihai hatuge Bukae Hotomo isi ata bahata kebiatamo dodanu. ²⁰ Au kateaito ata namigevevi avoe, “Tahou laemo dodale kemo Dilavau au menaka mamoi isivialeike la menakave ke evisi ehovai.” ²¹ Moseseu kateaito tota ke nahate vai taho malei dubumo hibihai hatunu. Isi dubue uvue Dilava hoesehavoliho onobenobe otovemale kebiatamo kateanu. ²² Iale menaka mami kemo nahi hilokage abu taho malei onobenobe ovege keau Dilava nimo dua valu. Isi nahi hilokage tahou lotiale ke unahamo Dilavana vaveve toela ulihai.

Kelisou tava igae toelaho hatinu.

²³ Subuta vaveve kemo Moseseu kateai taho malei dubue onobenobe ovei hoesegevenu. Vaveve keu otogoe vaveve ke munana unaha. Isito novae vani komo Iesu hatiale ke unahamo Dilavau atae vaveve hoesegevema. ²⁴ Iesu Keliso keu ataeau dubue tumu houale keve tiholinu. Isito Dilavau umale otogo keve tinu. Kosealemo vatae dubu keu Dilavau umale otogo ke munana unaha. Iale keu ehue tiale Dilavati ui nahiho Dilava imihama. ²⁵ Diue dubue kosive baluga keu vagana igaegae kela vanie ni igaemo auna ovoe taho malei tiniege dubue Uvu Tumute ke omigei. Isito Iesu keu vani moaga nahiho hatiholinu. ²⁶ Au kateale vavatege vata ko vai ui lohoale ke uvumo vagana moaga vatehani malei hatinu. Keu kateholisito tava igae vatehani malei vanie gabi komo umale kebiaho lohoale atae toelaho hatinu. ²⁷ Nahi hilokage ata bahataebuna haluvisi. Isito ke iae Dilavana bae abuemou vaveveabe kaovei ibinaeabe ovei. ²⁸ Katealemo Dilavau louge Iesu lohoale ata bahatae toelaho tava igae hatinu. Iale au bae tota gabie loholive atae toelaho hati molealivebene. Isito auna lohoniege oleuoleu hemei umale kebia malevei otogoe tai.

10

Ovo havei mahomale ke vuvuneu uoholinu.

¹ Dilavau subuta menaka kemo au vaveve bahata loui ata haiveholinu. Isito au haiveale keu gabie vaveve duau lohoveve ke munana unaha. Vagana moaga kela abuna ovo havei mahoi Dilava hoesehavoge. Abu katelahai isivilahale vaveveabe keau Dilava nimo duave selevelai. Isito subuta menaka kemo vaveve katealeu anakianu. ² Subuta ataeau Dilava hoesehavoge keu vaveveabe toela ulihavatebe vaveve toelae huhuihuhui keu abuemou uoholige abu kemo ovo havei mahomale ke halevalu. ³ Isito abu vagana igaegae ovo havei mahoi abu vaveve toela huhuluhai loui avoe, “Nahie toelau sohu ua.” ⁴ Iale kemo nahi hilokage ataeau abu toelaho ovo havege tahoeabeu lotimale kemo toelaeabeu bae tava igae uoholilivebene.

⁵ Katealemoike Iesu Kelisou vatae loholiho vaimo au Dilavaho loui avoe,

“Ataeau ovo havei mahoi a hoesehavomale keho a isiviholinu.

Isito a vava mole daoale kemo dana vatae tai.

⁶ Di hilokage ataeau abu toelaho ovo havei mune vitai golovemo otovei mahomale keho a isiviholinu.

⁷ Katealemoike di loui kosea, ‘Kosive daliko.

Dana a isivi unaha vai.

Abu Bukae Hotomo di vaveve loui hisialiale ke nahate dana vai.’ ”

⁸ Bukae Hotomo Iesuu kateai lounu. Hoto kemo au vasohuta Dilavaho loui avoe, “Ataeau abu toelaho ovo havei mune vitai golovemo otovei mahomale keho a isiviholinu.” Iesu hoto kemo nahi hilokage Dilavau subuta guligulie vaveve ke halenu. ⁹ Kemoike Iesuu loui avoe, “Kosive, daliko. Dana a isivi unaha vai.” Iale Iesu hoto kemoike Dilavau subuta guligulie vaveve ke halei lovovemo Iesu vaveve ke mamonu. ¹⁰ Ige Iesu Kelisou Dilava isivi vai tava igae hatiale kemo nahie toela ulihage uoholinu.

¹¹ Subuta Diue dubue kosiveau vani bahata ovo havei mahoevevi Dilava hoesehavoma. Isito ovo havei mahoevemale vaveve keu bae atae toela ulihalivebene. ¹² Isito Iesu tava igae hatiale kemo atae toela ulihanu. Keu uoholige Iesuu ehue tige Dilavau ebageage au adave inutevatae ugulamou. ¹³ Keu nova keve ugulamou ua. Auna keve usege Dilavana aiohavomale ata kebia malei velove heimo otovege auna kosiveabe holisi. ¹⁴ Iesu hati igaale kemo atae toela ulihage vaveveabeu bae Dilava nimo toelalivebene. Isito vaveveabena vani bahata Dilava nimo duaveagei.

¹⁵ Ige kemoike Munanae Tumuu subuta Bukae Hotomo hoto mole lounu. ¹⁶ Isi avoe,

“Kosiveu loui avoe, ‘Vani molena lohoge dana menaka dogo abuhou mamoi. Menaka kemo dana uvuiabemo di hoto mamoge abuna ke huhuluhai ehovai.’ ”

¹⁷ Isi tota loui avoe,

“Di bae tota vaveveabe toela ke huhualivebene.”

¹⁸ Kosiveu kateai loui atae toela ulihale kemo ataeau bae tota ovo havei maholivebene.

Iesuemo nahiabuna Dilava vavamo ui.

¹⁹ Iale di haokuvuia, Iesuu hatiale kemo nahi momolelahai Dilavau umale keve lohoi hoesehavoi. ²⁰ Iesu keu nahiho humahae dogaa alavonu. Subuta dubu kemo ogou Dilavau umale oe uvu ke bamuge atabeu keve tioholinu. Isito Iesuu lohoi hatiale kemo au nahiho ukolikoli udaha alavoale kemo nahiabuna Dilavau umale keve tai. ²¹ Iesu keu nahie dubue kosive baluga holisi Dilava ata bahata nalievema. ²² Iale kemo nahi lobo halevaito nahie uvu mai Dilava omisi lohoi vavavemo ui. Kosealemo Iesuu hatige tahoveu nahie uvu hoesehavoale kemo nahi bae nahie vaveve toela huhu moagalivebene. Isi nahi babatisoage nahie uvu dua vale ketamo nahiabuna Dilavaluvuta igaetolahai. ²³ Nahi nahie uvu mai omiale kemo negolahai ata degomole haivei. Kosealemo nahi hilokage Dilavau onole nahiho louale ke auna nahiovei. ²⁴ Nahi katelahai mole negotieveliege nahiabuna kemo moleho isivilahai molemo vaveve dua valiege ue dua vagei. ²⁵ Ata degomoleau kateholisito igaetolahai guligulilhamale ke halevalu. Iale nahi kate halevaito mole beuvevei guligulilahai. Kosealemo Kosive lohoveve vaniu vuguvuguanu. Iale nahi negolahai mole negotieveli igaetolahai guligulilahagei.

²⁶ Nahi hoto seleve evisi lulelelahaito negolahai Iesu halevai vaveve toela valage Dilavana oleve kateai bae nahie toela ulihai. Kosealemo Iesuu nahie toelaho hati moleveve keu anekianu. ²⁷ Nahiabuna katelahaliege Dilavau atae vaveve abuemo kaovai ibinaeabe oveveve ke vabuhavogei. Kosealemo oleuoleu Dilava kabebihavoi aiovahomale kebia Dilavana veneta kebia aioegevei. ²⁸ Subuta ata molena Mosese menaka ke egumai vaveve toela vage ata abui mesoho abuita igaeta keabuna ke elehai deidave louge abuna ke vaveve kaovai avuho uvuholisito hamage au hatai. ²⁹ Subuta vaveve keu kateanu. Ke nahate novae vani komo ata oleuoleu Dilava mo kabebihavoi tahove ke hehavoi loui kosea, “Keu baluga holiolohinu.” Ige Dilavana kebia aioegevei. Kosealemo Iesuu hatige Dilavau tahove kemo ata kebia toela ulihanu. Isi oleuoleu nahie hoesegevemale Munanae Tumu keho hotoe toela luumale kebiataebuna vatehani baluga malei. ³⁰ Nahi hilokage Dilavau Bukae Hotomo loui avoe, “Oleuoleu di aiovahomale kebia ibina dana ovei.” Isi au tota loui avoe, “Dana di atae vaveve abuemo kaovei.” ³¹ Dilava keu vuvunete Kosive holiemo ataeabuna au vaveveabe toelae ibina oveveve kemo vabuhavoi.

³² La subuta Dilava atage hoto evisi male ke huhulahave. La kemo vatehani baluga maleito kemo dobuluviholilu. ³³ Vani kela ataeau atae vudimo la hehavei la aiogevelu. Isi vani mole abu katelahai la haokuvu aiogevesege la ke elehai tiale abuhi igaetolahai vatehani ke malelu. ³⁴ Ige ataeau la haokuvu malevei dibulae hanavege la kebiaho uvulahai tiale kebia tadeavelu. Ige vani mole ataeau lohoale la onobenobe bahata vavolota malege la ke elehai itumuholisito vahaeholalahu. Kosealemo la hilokage la Dilavau ono mole male kena vani bahata ugei. ³⁵ Iale lainaho la onobenobe keta huhulahagelive. Isito negolahalive elike ibina baluga maleve. ³⁶ Lana katelahai kabebilalaholisito Dilava isivi valiege au laheho onole louale ke lana maleve. ³⁷ Dilavau Bukae Hotomo loui avoe, “Lohoveve ata ke vaniu egeholinu.

Iale ata keu lohoveve vanina lohoge au bae vesokalivebene.
Isito auna lohoi.

³⁸ Iale olemeau abu uvu mai daoale keabuna di nimo inutolotoloi abu evievimo ui tigei. Isito oleuoleu daho isiviholisi hoideveale kebia vahaeho di bae valivebene.”

³⁹ Isito nahiau hoideveale ata holiolohilu. Nahiau evievi ataea. Iale Dilavau bae nahie aioegevei nahie halevelivebene. Isito auna nahie malevei.

11

Evievi atae deiada

¹ Evievi vaveve keu koseanu. Evievimo nahi hilokage nahi onoleho isiviale ke nahiabuna malei. Isi evievimo nahi hilokage nahi otogoe vaveve elehaliale kebiau ua. ² Dilava ataeau subuta umale keau katelahai abu evievimo negolahage Dilavau kebia tabagevenu.

³ Evievimoike nahi hilokage Dilavau louge hotove unahamo vatamo isi otogomo umale keau bahata ua. Nahi elegeveale keta Dilavau onobenobe vaveholinu. Isito au lou unahage onobenobe bahata ua.

⁴ Evievimoike Eibolou Dilava hoesehavoliho ovo hamai mahoge vaveveve keu Keini vaveve ke evihanu. Evievimoike au kateai Dilava hoesehavoge Dilavau vaveve ke elehai avuho loui avoe, “Au inutolotolote ata.” Eibolou kateaito hatinu. Isito evievive vaveve keu aike nahi haivema.

⁵ Ige evievimoike Inokau hatioholinu. Isito Dilavau mage ehue tinu. Ige ataeau ke kaovage keu uoholinu. Kosealemo Dilavau mai ehue tinu. Keu ehue tiholisige Dilavau vaveveve elehai vahaehove vanu. ⁶ Evieviholiale ata kebia Dilavau bae vahaehoeabe valivebene. Isito oleuoleu otogoe taliho isivilahaliege abu uvu mai avuemo mavoi loui kosea, “No hilokage Dilavau uale auna ibina noevei.” Iale nahi negolahi ke kaovai isivive vage auna ibinave nahiovei.

⁷ Evievimoike Noau vaveve koseale vanu. Dilavau gabie toelau lohoveve hoto avuho louge au hotove evisi bouti baluga hounu. Iniale kemo au ese holovei abuhi kemo usege eu ata bahata havege abu haluvilu. Noa vaveve kemo nahi hilokage ata kebia vaveveu Dilava nimo toelanu. Isito au Noaho loui avoe, “Evievu aemo ualemo au inutolotolote ata.”

⁸ Ige evievimoike Ebalahamuu Dilava hoto evisi isivive vanu. Dilavau hohavoi avuho loui avoe, “A vata seleve ke halei vata moleve tenela. Ana keve tige dana vata ke mai aoi.” Ige Ebalahamuu hotove evisi hovelahai au hilokaholiale matama keve tinu. ⁹ Au tiale Dilavau avuho vata ebagemale keve ua. Keu keve o houholisito valai unaha houge kemo move Aisikiu abu mo Diekoboti avuluvuta ua. Dilavau Ebalahamuu vata ebagemai louale ke nahate kebiaho lounu. ¹⁰ Ebalahamuu o seleve hou avuemo uoholiale keu koseanu. Dilavau avuho otogoe o seleve louale keike au hemei ui vaveve kateale vanu.

¹¹ Ige Selau au evievimoike ese mamonu. Keu mabata holige koliaveta koli holinu. Isito Selau huhuige Dilavana au louale ke nahate vai. Iale kemoike au ese manu. ¹² Ebalahamuu koli holige ese maveve keu avuemo ninioholinu. Isito Dilavau louge kolive kemo eseve igaue uale kemo ke valadau otogoe didi isi davalae esaga nahate moagamoaga.

¹³ Di louale ata keau evievi ata holisi ulata haluvilu. Keau Dilavau abuhu louale ke bahata maleholilu. Isito haeva mole lavisi elehale ke nahate vai vahaeholalahu. Keau loui avoe, “Noeau vatae ata holiolisito deia nahate vata kove uma.” ¹⁴ Hoto kateale lounale keau hilokage oeabe seleveu vata kove uoholinu. Kateike abu vai isiviale abu vata seleve mai avuemo ui. ¹⁵ Keau abu vata halevale ke huhuholilu. Abu ke huhuvatege tota hoidevei keve tilu. ¹⁶ Keau kateholisito isivi balugaleike otogoe vata keve tai ui. Katealemo Dilavau keve kebiaho o hovevei matiabe vaholisito abuhu loui avoe, “Laeau di esea.”

¹⁷⁻¹⁸ Dilavau subuta Ebalahamuu loui avoe, “A mo Aisiki kemo a valadana balugatahoai.” Iniale vani mole au Ebalahamuu evievi kaovaliho namihai avoe, “A mo Aisiki mai talive hamai di hoesehavonela.” Dilavau kateai avuho louge au hotove evisi au mo igae ke mai hamaliho tinu. ¹⁹ Ebalahamuu hilokage moveu hatige Dilavana etuvage auna hovelahai. Iale Ebalahamuu au mo biho vasege Dilava hotou lohoge au haleale kemo Aisikiu hatihatimo hovelahale ke nahate vanu.

²⁰ Ige evievimoike Aisikiu gabie vaveve Diekobota Isotaho loui hoesegevenu.

²¹ Ige evievimoike Diekobou au mo Dioseba ke mo abui hoesegevenu. Keu kosivehame. Iale keu bedoiamo banai au vavivu kebia hoesegeveliho guluguluaite halevei hatinu.

²² Ige evievimoike Diosebau hatiliho vaimo Iselala ata namigevei avoe, “Di hatisege ke iae Dilavana la malevei la hanavege lana Egubito halevai la vata seleve teve. Isime vani kemo lana di itava mai tiliege keve abavu.”

²³ Ige Mosese mamau abu mahinati Mosese mai bata abuita igaeta uvumo mahogovalu. Kosealemo abu elehage eseabe keu ese dua seleve. Isi abu evievimo hilokage Dilavana gabie ese kemo vaveve nimolete vai. Iale kemo abu vatae kosive ke vabuhavoholisito menakave eguvai ese ke mai mahogovalu.

²⁴ Ige Moseseu kosi holisi isiviholialeike vatae kosive Belo ke vavia holiliho. ²⁵ Isi keu isiviholialeike kosive ke omo ui vaveve toela valiho. Isito au evievimo negoi isivialeike o ke halei talive Dilava atahi ui vatehani malei. ²⁶ Kosealemo keu gabie au ibina maleveve ke huhuai isiviale Keliso ivimo vatehani malei. Keu hilokage gabie uveve keu balugai Egubitoe kunaie dua ke evihanu.

²⁷ Iale evievimoike Moseseu vatae kosive ke itumu vabuhavoholisito Egubito vata ke halei tinu. Moseseu Dilava vaveve dua ke elehale kemoike au vata keve tota hoilahi tiholinu. ²⁸ Isi au evievimo hilokage Dilavau louale esee ovokina keabuna haluvisi. Iale au Basova vaveve ke loui Iselala ata haivege abu ovoo taho malei abu oe udaha omilu. Ige hatihatie anelu keu eseabe ovokina kebia haveholinu.

²⁹ Ige evievimoike Iselala ataeau E Tahote houho vage e keu dikolahage vatau omeige abu vaki moleve tilu. Ige Egubito ataeau isiviale abuta ke nahate vai vaki moleve tai. Isito eu tota lohohi bamuge abu e isi haluvilu.

³⁰ Ige Iselala ataeau abu evievimo negolahi vanie ni bahata seveni (7) ke uvumo Dieliko oe hala ke olibelbehavolge hala baluga keu bokolahai dobanu. ³¹ Ige teibae keate mole

Leiahu keu au evievimo hilokage Iselala ata abui keau Dilava ataea. Ata abui keau Dieliko vaveve kaovamale ataea. Ige Dieliko ataeau kebia elegevei isiviai havei. Isito Leiahu kebia malevei hogovevenu. Iniale vani mole Iselala ataeau lohohiale evievi ata hohohohiale kebia haveito Leiahu hamahohilu.

³² Di isiviale hoto como ata degomole deiada loui. Isito dana kebia deiadata louge hotona egeai. Ata kebia iviabeike koea. Gidioni, Balaka, Samusoni, Diebata, Deividi, Samuela isi beloveta ataea. Kebia deiada bahata di loui gabialivebene. ³³ Keau abui evievimoike vaveve koseale valu. Degomoleau vata degomole ata kebiahi mole havei kemo vataeabe malelu. Degomoleau vaveve inutolotolote vavevale kemoike Dilavau abuhu onole louale ke abu malelu. Degomoleau ovo aihanite laioni ke aimo haluviholisito negolahai ua. ³⁴ Degomoleau abu evievimo negolahage veneu mahoeveholinu. Ige ataeau sigata degomole haveho vage abu kebia aegevelu. Degomoleau negohohilu. Isito Dilavau kebia negotiegeve abu hovevevei tualimo negolahai ata degomole havei kebia nunuvelu. ³⁵ Ige keate degomoleau abu evievimoike negolahage ataeabeau haluvige Dilavau kebia tatuvege keau hovevevelu.

Isege degomoleau dibulae umale keau isivihohialeike abu dibulamo iovege abu halevai taliho. Isito isivialeike vatehani malei haluvilive elike gabie hovevevei ibinae dua malei. ³⁶ Ige ataeau degomole hehavei visugevelu. Isi degomole umudievei malevei dibulae otovelu. ³⁷⁻³⁸ Isi muneta degomole havei soata degomole bohievei sigata degomole biovege abu haluvilu. Evievi ata keau kunaiholisito ovoe vate unaha hohovevei uime olahama. Keau ohohiale kebia nahate vai botoe uma. Degomoleau manue valae uma. Ige degomoleau vatae valae uma. Ige ataeau kebia aiovegei vatehani baluga ovelu. Abu huhuige keau atae toelaea. Isito vaveveabe keu vatae atae vaveve evihanu. ³⁹ Keau abui evievimo negolahale kemo Dilavau vaveveabe elegevei iviabe tabagevenu. Isito Dilavau onole abuhu louale ke bahata abu malehohilu. ⁴⁰ Kosealemo Dilavau Kelisomo nahiho vaveve dua loui mamoaale kemo isivialeike abu nahehi Kelisomo Dilava nimo duaveve selevelai.

12

Iesu keu nahie evievie umuka

¹ Subuta evievi ata keau haluvilu. Isito vaveveabe keu nahie haivege nahi hilokale kemo vaveve isuteu nahie bamuevemale ke nahi aehai. Isi nahi vaveve toela matageve tumuimale keta nahi halevai. Isi nahie evievimo negolahai bibuluvimale kebia nahate vai talive Dilavau nahiho ono mole mamoaale ke malei. ² Iesu keu nahie evievie umuka. Iale nahi negolahai vani bahata vaveve ke kaovai huhulahagei. Keu idi ke do kabebihavoholisito gabie au Mamati ui vahaehoaveve ke huhuaimo isiviale idi ke domo vatehani malei hatai. Ige ataeau hehavoi aiohavomale keu ke huhuhoholisito idie domo hatinu. Iale kemo keu aike Mamaveu telonamo ugulamoale ke ada inuteveatae ugulamoi uma.

³ Iale ataeau aiohavoi avuhu loumale ke huhulahave. Katealemo la bae vatehani malemale ke kabebihavoi halevalivebene. ⁴ Iesuu au vavevemo negoai vaveve toela vahoholisito hatinu. Isito laeau vaveve toelamo negolahaito haluvihohilu. ⁵ Mesoho laeau Dilavau la negotievei la malevei au ese toale ke la momahavolu. Au Bukae Hotomo loui avoe,

“Di esea, Kosiveu vatehani laoveale kemo lainaho kabebihavolive.

La vaveve toela vage au laheho hoto isute louge lainaho ke evisi la Kosive halevalive.

⁶ Kosealemo Kosiveu ata olemeho isiviale kebia auna vatehani ovei.

Isi olemeau eseve hohiale kebia vaveve auna hoesegevelihohi vatehani ovei.”

⁷ Bukae Hotou kateanu. Iale la vatehani maleale kemo negolahave. La vatehani maleale kemo hilokage Dilavau la malevei au ese toai la hoesegevema. Vatae ataeau isiviale eseabeau vaveve dua valiho vage abuna vatehani ovei. ⁸ Iale ke nahate Dilava ese bahataeabuna vatehani malei. Isito mesoho la vatehani malehohiale kemo laeau Dilava ese hohohohilu. Isito mamaesi nahate. ⁹ Nahie vatae mamuvuiahu nahiho louge nahi hotoeabe evisi nahie vaveve hoesegevelu. Isito nahie otogoe Mamau nahiho louale keu hotoeabe ke evihanu. Iale nahi hotove ke evisi nahie vaveve hoesegevei kemo ue dua vai. ¹⁰ Nahie vatae mamuvuiahu vagana moagavesite ke uvumo abu isivimo nahiho loui vatehani nahiovelu. Isito Dilavau katehoholisito nahi hoesegevelihohi vatehani nahiovei isiviale nahi kemo vaveveve nahate vai. ¹¹ Nahiabuna vasohuta vatehani malege kema tumuige nahiabuna kemo vahaehohoholi. Isito nahiabuna kemo dobuluvihoholisito kemo negolahaliege nahie vaveve keabuna duaveage nahiabuna bae kemo ue dua vai.

Vaveve toelamo la ebia nenigeveve.

¹² Iale la vaveve degomoleau toelage la ebika negotievei vaveve dua vave. ¹³ Isi humaha inutolotolote kela tigeve. Ige kemo elike ata degomoleau negoholimale kebia tedaevei abuhi tie dua vageve. ¹⁴ Iale hovedevei ata bahatahi ue dua vave. Isi la vaveve hoesegevege abu Dilava vaveve nahate vai. Vaveve kateale vaholimale keau bae Kosive elehalivebene. ¹⁵ Iale nenilahave. Labelako Dilavau nahie huhuevei hoesegevemale ke halevai hoidevelive. Isi lainaho ono mole toelau la uvumo uale ke halevage au balugai ata degomoleta aiogevlive. ¹⁶ Iale nenilahave. Lana la ebika nenigeveholiliege lana teibae vaveve vageve. O mesoho Isou Dilava huhuholisito vaveve toela vale ke nahate lana vave. Iso keu esee ovokina. Isito au au mamae kunai maleveve ke huhuholisito au lovi iveve ke huhuai kunai bahata malei au hoho omige hohoveu lovi mai omige au inu. ¹⁷ Isito ke iae la hilokage Isou isivialeike tota au mamae kunai ke bahata malei. Ige mamaveu humahave bamunu. Kosealemo Isou subuta kunai ke malei au hoho ominu. Katealemo Isou kunai kebia huhuevei nina baluganu. Isito maleveve keu avuemo anekianu.

Otogoe Dielusalema

¹⁸ Subuta Iselala ataeau tana mole ivi Sainai keve tilu. Keve tiliale tana ke mutie usege Dilavau tana kemo uge veneu kemo lahage goeu ke bamuge loanu. Ige kemo hanunu balugau lohonu. ¹⁹ Ige Iselala ataeau tana keve usege kibi hotoige abu ke evilu. Abu ke evisege Dilava hotou lohoge abu ke evisi isiviholialeike ke iae tota hotove mole eviliho. ²⁰ Kosealemo keau Dilava hoto eviale kemo vabulalahu. Dilavau abuhu loui avoe, "Lainaho tana kove vealuvisi loholive. Ige la ovobetana tana kove lohoge muneta hamage au hatai." ²¹ Tana ke vaveve toela balugage Moseseu loui avoe, "Di ke elehai teteai vabuanu."

²² Iselala ataeau subuta tana keve tiale vaveve kateale elehai vabulalahu. Isito laeau nova Dilavaluvuta igaetoale kemo la bae vabulahalivebene. Isito lana momolelahai Saioni tana keve ukolikolie Dilava ke o Dielusalema keve aneluve moagamoagahi uve. ²³ Ige ata bahata vaveve kaovamale Dilava keu keve ua. Ige ekalesiave ovokinae ivi hisaliale kebiata keve ua. Ige Dilavau au ata hoesegevege vaveveabu nivomo duave seleveale kebia munanata keve ua. ²⁴ Ige Iesuvu nahiho menakae doga mamoaale keta otogoe ua. Ige Iesu tahou lotai nahie toela ulihale ketaike ua. Subuta Dilavau Eibolo tahou lotiale ke ibina vanu. Isito Iesu tahou lotiale keu nahie toela ulihanu.

²⁵ Laeau otogoe matama keve tiveve ataea. Iale kemo la ebika nenigeveve. Lainaho Dilavau laheho louale ke kabebihavolive. Dilavau subuta vatae lohoale tana keve ataho louge abu hotove evisito kabebihavoge au kebia aiogevenu. Iale Dilavau aike otogoe ui nahiho loulmale ke nahiabuna eviholiliege nahiabuna oleve katelahai au nahie aiogevlive ke aehai. ²⁶ Vani kela au louge vata unahau kibikibianu. Isito au aike nahiho hoto mole loui avoe, "Dana gabie tota louge vatana otogoti kibikibilahai." ²⁷ Au louale ke ihu koseanu. Au subuta onobenobe vaveveale keabuna kibikibilahai uoholisi. Isito au umaleve kena vani bahata ugei.

²⁸ Iale Dilavau otogoe matamae dogau kibikibiholiale ke mai nahioveale kemo nahi nenilahai vabuhavoi hoesehavoi guligulie dua vagei. ²⁹ Kosealemo nahie Dilava keu vene nahate. Iale nahiabuna vaveve kateale vaholige auna nahie aiogevlive.

13

Nahie uvevemo Dilava hoesehavoveve

¹ Iale hovedevei ese igae nahate vai vani bahata moleho isivilahai mole tedaevegeve. ² Ata oleu deiai lohoge ke mai o hatuve. Kosealemo subuta ata degomoleau katealemoike aneluvia deiai lohoge abu kebia hilokaevholisito kebia malevei o hatuevelu. ³ Isi ata degomoleau dibulaa uale kebia huhuevei tedaeveve. Kosealemo mesoho lana lata dibulaa uliege isivilahale ataeau la tedaevei. Isi ata degomoleau vatehani maleale kebiata huhuevei tedaeveve. Kosealemo mesoho lana lata vatehani maleliege isivilahale ataeau la tedaevei.

⁴ Di hoto mole louge evive. Mole holoeveve vaveve keu duave. Kemo keatena au kolia huhuasege koliavena avuta au mahina huhuai. Isito oleuoleu au keate halei mole keatehi vaveve toela vai mesoho ata degomolehi teibae vaveve vage Dilavana vaveveabe ibina ke ovei.

⁵ Lainaho la umalemo moni ke huhu balugagelive. Isito laemo ualehame keu avulike ke. Kosealemo Dilavau loui avoe, "Di bae la halevelivebene. Isito dana vani bahata lahehi ui la tedaevegei." ⁶ Iale kemo nahi negolahai loui kosea, "Dilava keu no tedaevemale kosive. Kemo atabeu bae no aiogevlivebene. Iale no bae vabulahalivebene."

⁷ La nalievemale ata kebia momageve halevave. Keau Dilava hoto loui la haivemale ataea. Ige vaveveabe keu duave unaha. Iale abu abu evievimo negolahale ke nahate lata vageve. ⁸ Iesu vaveve keu igae. Subuta, nova isime elemoto ua. ⁹ Iale ata moleu loholive hoto nimole laheho louge lainaho ke evilive. Lana hoto ke evige hoto kena la malevei humahae toelae tai. Dilavau la hoesegevei la uvu negotievege keu duave. Isito lovi ivevemo menaka loui ehovamale keau loholive abu hoto louge lainaho hotoeabe ke ehovalive. Kosealemo la menaka ke ehovage keu bae la tedeavelivebene.

¹⁰ Kosealemo Iesuu hatiale kemo ukolikoli maleveve humahau ua. Ige ata degomoleau Diue vaveve ke ehovai loui avoe, “Noeabuna kemo ukolikoli mai.” Isito vaveve katealemo abu bae ukolikoli maliivebene. ¹¹ Diue dubue kosive baluga keu subuta ovoo taho malei dubue Uvu Tumute Seleve keve toelaeabe ulihaho tinu. Isege dubue kosive degomoleau ovoo ava malei tiliale o halevai hotoe maholu. ¹² Ke nahate abu omo Iesu hamaholisito mai oe iae hamage hatinu. Kosealemo au isviale au tahota ata bahatae vaveve toela ulihai. ¹³ Iale Iesuu keve vatehani maleale ke nahate nahita vai. ¹⁴ Kosealemo vata kove nahie o seleveu uoholinu. Iale nahie o seleveu lohoveve ke nahi hemei uma. Kena lohoge nahiabuna tiliege keve ui. ¹⁵ Iale Iesu vaveve kemo nahi vani bahata Dilava vahaeho vai ivive hoesehavogei. Vaveve katealemo nahiabuna nahie aimo Iesu ivi ebagevai ata haivegei. ¹⁶ Lainaho vaveve dua vaveve momahavogelive. Isito vani bahata mole tedeavegeve. Lana vaveve kateale vai Dilava hoesehavoge auna vahaehoai.

¹⁷ La nalievemale kosive kebia hoto evisi ehoveve. Kosealemo keau la ukolikoli maleveve kemo la nalievema. Dilavana vanie gabila abu oleve kateai la nalievemale kemo hoto loui ibinaeabe ovei. Katealemo hotoeabe evige elike kemo abu vahaehomo abu lovi vai la tedeave dua vagei.

¹⁸ Isi noheho Dilava imihageve. No uvumo no hilokage vavevebe toelau uoholinu. Kemoike no isivialeike vani bahata vaveve dua unaha vagei. ¹⁹ Iale di la namigevei isivialeike la Dilava imihage au solekai di hanavoge di lae lohoi.

Guligulie hoto

²⁰ Dilava keike nahie Kosive Iesu etuvage au hovelahanu. Ige Iesuu hatiale kemoike au mamoe nalievemale kosive ke nahate holinu. Isi kemo menakae doge mamooale kena vani bahata ui tigei. ²¹ Dilava keu uvevete Dilava. Iale di isiviale Dilavau la negotievei la ono vademo vugeholiale ke laovege la kemo isivive vai vaveve dua vagei. Isi di isiviale Dilavau Iesu Kelisomo au isivi nahiemoo vagei. Ige kemo nahi vani bahata Iesu Keliso ke ivi ebagevai hoesehavogei. Hoto seleveike ke.

²² Di haokuvuia, di hoto laheho louale ke evie dua vave. Di levaleva ko hisaliai egeta butuhaholinu. Iale negolahai ke bahata ehovae dua vave. ²³ Isito di hoto molehame louge evive. Abu nahie haoka mole Timoti ke dibulamo iovalu. Iale auna solekai dae lohoge di isivialeike no avuti lae talive la elegevei.

²⁴ Iale no vahaeho hoto ko loui la kosive isi evievi ata bahata kebia namigeveve. Ige Italie evievi ata koeau laheho abu vahaeho hoto hanavolu.

²⁵ Di isiviale Dilavau la bahata huhuevei la hoesegevei. Hotou kemo kateai ua.

Diemisi

Diemisiu Diue ataho hisaliale

¹ Di ivilike Diemisi. Dau Dilava esemu. Isi nahie Kosive Iesu Keliso ke esemu daliko. Diue evievi ataeau vata bahatae umale la kebiahoike di levaleva ko hisaliamā. Lana duave.

Vaveve toela kemo negolahave.

² Di haokuvuia, vaveve isute vadeu laemo lohoge momolelahai vahaeholahave. ³ Kosealemo la hilokage lana vaveve isute kemo dobuluviholisito kemo negolahage la evievi kena negoai ui tigei. ⁴ Iale lainaho vaveve isute ke kabebihavoi aehalive. Isito kemo negolahage la uveve kena dau vai inutolotoloi. ⁵ Iale la oleuoleu luleleholiale lana Dilava imihage auna lulele laovei. Kosealemo nahi Dilava imihage keu bae nahie imili ke kabebihavolivebene. Isito auna nahie isivi ke nahiovei. ⁶ Iale lainaho kemo dolodololahalive. Isito la Dilava imihaho valiege la uvu bahata mai avuemo mavoi imihave. Ata oleuoleu dolodoloi Dilava imihage imiliabe kena davalae vaveve nahate vai. Helukau utuai davalamo mamoge davalau veatai dobale ke nahate huhuihuhuiabeu abuialemo imiliabe keu bae inuta Dilavae talivebene. ⁷ Iale ata oleuoleu kateai dolodolomo Dilava imihage Dilavau bae isiviabe ke valivebene. ⁸ Ata kateale keau uvu abuiale ata ke nahate. Isi keau abu vadeu vamale kemo dolodolo unahama.

Kunaite isi kunaiholimale

⁹ Mesoho la degomoleau kunaiholimale ataea. Iale lainaho ke huhulahagelive. Isito vahaeholahave. Kosealemo Dilavau la tabagevenu. ¹⁰ Isege mesoho la degomoleau kunaitea. Isito lainaho ke huhulahagelive. Kosealemo vani mole la kunai keabuna valavala nahate uoholisi. ¹¹ Valavala kena siaito vaniu hamage auna solekai tutukai dobai. Ige valevele kena solekai uoholisi. Iale ke nahate kunaite keabuna abu lovi vasege vaveve toelana abuemo lohoge abuna solekai kemo dobuluvisi. Katealemo lainaho la kunai uge mesoho uoholige ke huhulahagelive. Isito kemo vahaeholahave.

Vaveve toelamo dobuluvi halevave.

¹² Ata oleu vaveve toelamo dobaholisito au evievimo negoanige auna vahaehoi. Kosealemo au evievimo negoale ke ibina Dilavana au louale ukolikolie hanogo mai omisi. Dilavau loui avoe, “Oleuoleu abu uvu mai daemo mavoliege dana ukolikolie mai kebia ovei.” ¹³ Iale vaveve toelau nahiemo lohoge nahi hoto koseale lou halevai, “Dilavaike vaveve toela ke nahio hanavonu.” Lainaho kateale loulive. Kosealemo vaveve toelau bae Dilava lobohavoi aiahavolivebene. Ige Dilavau bae atabe lobohavoi aiahavolivebene. ¹⁴ Isito atae biaebuna vaveve toelaho isivilahai huhuilage kena kebia malevei aiogevei. ¹⁵ Ige huhuihuhui toela kena kebiamo ulage abuna bae vaveve toela abu huhuimale ke vai. Ke vai tilata gabivela keabuna ibinave malei haluvisi. ¹⁶ Iale di uvue haokuvuia, lainaho kemo dolodololahagelive.

¹⁷ Kosealemo otogomo vaveve toelau lohoholinu. Isito Dilavau vaveve dua unaha nahio hanavoge nahi ke malema. Keu atagae umuka. Avuemo vavie vavevebu uoholinu. Isito auna vani bahata atagae vaveve unaha vagei. ¹⁸ Nahi hotove selevel eviale kemoike Dilavau au isivimo nahi malevei isiviale au ese bahata kebiamo nahi eseve ovokina holivei.

Dilava hoto evisi vaveve

¹⁹ Di uvue haokuvuia, di hoto ko evisi huhulahave. Lainaho solekai moleho itumulahai mole hotoe ibina vai moleho loulive. Isito vasohuta nenilahai hoto ke evie dua vaito bae moleho louve. ²⁰ Dilavau isivialeike nahi vaveve inutolotolote unaha vai. Isito nahi itumulahaliege nahi bae kemo Dilava isivi ke valivebene. ²¹ Iale la huhuihuhui toela huhulahai vaveve toela vamale ke halevave. Lainaho la ebia tabagevelive. Isito Dilavae lohio Dilavau hoto mai la uvumo mamoa ke huhulahai vave. Ige la hoto ke evisi vamalemo Dilavana la malevei.

²² Lainaho hoto ke evi unahalive. Lana katelahaliege la ebika lobogeveve. Isito hoto ke evisi au louale ke vave. ²³ Ata oleu hoto ke evisito vaholiale keu ataeau evalimo abu ni elehage niabemo milou uge abu totoaliho isiviholiale ke nahate. ²⁴ Abu nimo ono vade uale ke elehaito halevai tai solekavesite momahavolu. ²⁵ Isito ata olena Dilava menakae dua ke huhuai ehomage vaveve toelau bae ata ke malivebene. Ata kena vani bahata Dilava menaka ke momahavoholisito ke vage Dilavana vaveve bahata hoesehavo.

²⁶ Mesoho ata moleu huhuai kosea, “Dau ekalesia ata.” Keu kateai louito au ai hoesehavoholige aivemo hotoe toelau lohomaale kemo au ebika lohohavonu. Isi keu ekalesia seleve holioholinu. ²⁷ Isito Dilavau isiviale ekalesia ata selevelau vaveve koseale vai. Kebiau golivu isi gobuvu keau vatehani malemale kemo tetaevei hoesegevegei. Isi vatae vaveve toela aehai abu ebia hoesegevegei.

2

Nahi bahataeau Dilava nimo mole nahate

¹ Di haokuvuia, laeau nahie Kosive Iesu Keliso ke ehovamale ataea. Dilavau ke ebagemage keu kosive baluga holinu. Iale lainaho kunaite ata kebia tabageveito kunaiholimale kebia tatolevelive. ²⁻³ Mesoho la guligulilahasege ata moleu linie dua vai ogoe dua hatuale keu ata moleu ogoe sisi vale keti lohoge lainaho ogoe dua vale ke ebagevai avuho loui kosea, “Au ugulamomale dua kove ugulamo.” Isi ogoe toela vale keho loui kosea, “Au uokeve laminela.” ⁰ mesoho loui kosea, “Di veloe heie vata komo ugulamonela.” Lainaho katelahalive. ⁴ Lana katelahaliege ata mole hoesehavoi toa mole aiohavove. La ata kebia uvu hilokaholisito hoto kateale louale kemo la uvu keu toelanu. ⁵ Di uvue haokuvuia, di hoto ko evive. Dilavau kunaiholimale kebia tabageve isiviale abu abu evievimo negolahi elike olemeau Dilavaho isiviale keau au louale matamave doga keve tai. ⁶ Iale vadealemoike la kunaiholimale kebia aiogevema. La huhuige oleteabuike la aiogeve laemo kotalahama. Kunaiholimale keau kateholima. Isito kunaite keabuike kateale vama. ⁷ Ata keabulike Dilavau la hohavei Iesu ivie dua mai laoveale ke aiohavoma.

⁸ Lana Dilava menaka mole ehovaluege vaveve dua vave. Bukae Hotomo menaka keu loui avoe, “La la ebikaho isiviai hoesegeveale ke nahate la haokuvuho isiviai kebia tetaeveve.” ⁹ Isito lana atae uvu hilokaholisito vaveveabe ke unaha elehai hoesegeve isiviale aiogeveliege lana vaveve toela vai Dilava menaka ke eguvave. ¹⁰ Iale ata oleu Dilava menaka bahata vaito menaka igae egumale keu Dilava nimo menaka bahata bokoale nahate. ¹¹ Dilavau menaka mole mamoi loui avoe, “Lainaho mole keatehi ladevegeve.” Isi tota loui avoe, “Lainaho mole havegeve.” Iale lana mole keatehi ladeveholisito mole haveliege kemo lana Dilava menaka eguvave. ¹² Isito lana menakave ke ehovai la hoto la vaveve hoesegevege vaveve toelau bae la malelivebene. Ige Dilavau au menakamo la vaveve kaovamale kela au bae laemo vaveveve toela elehalivebene. ¹³ Ata oleu ataho uvuholiale keho Dilavau bae uvualivebene. Isito ata oleu ataho uvuamale keu bae Dilavau atae vaveve kaovamale kela vabualivebene.

Evievimo vaveve dua vaveve

¹⁴ Di haokuvuia, mesoho ata moleu loui kosea, “Di di uvu mai Dilavamo mamonu.” Keu kateai louito vaveveve keu inutolotoloholinu. Iale la huhuige evievi ata kateale Dilavana mai. Ba, Dilavau bae ata kateale malivebene. ¹⁵⁻¹⁶ Iale di la haivege evive. Mesoho evievi ata degomoleau ogoholisi vaeta uale kebiaho lana loui kosea, “Dilavana la hoesegeve. Iale talive lovi isi ogoe dua vai uve.” Lana kateai abuhu louito tetaeveholige keu toelanu. ¹⁷ Evievi vaveve keu koseanu. Hoto loui vaveve vage keu duave. Isito hoto unaha loui ata tetaeveholige evievi katealeu toelanu.

¹⁸ Ige mesoho ata molena loui kosea, “Au evievite ata. Isege dau vaveve dua vamale ata.” Isito vaveve duana nahiamo uoholige oleve kateige evievie vaveve kua nahiamo ui. Iale nahiabuna nahie evievi kemo vaveve dua vage keu duave. Katealemo ataeabuna nahie vavevemo hilokage nahiau evievie ata seleve. ¹⁹ La hilokage Dilava ke igaeu ua. Keta duave. Isito lainaho bae munanae toela vaveve ke nahate valive. Kosealemo kebiata hilokai vabulahage Dilava igaeu ua. Isito abu isivive ke vaholima. ²⁰ La keau luleleholilu. Iale dana oleve kateai la haivege lana kemo lulelelahai hilokage ataeau evievi ata holisito vaveveve vaholige keu anekianu. ²¹ Di kemo hoto mole louge evive. Nahie umuka Ebalahamu keu oleve kateai Dilava nimo inutolotoloanu. Kosealemo keu au mo Aisiki hamaliho umuvai mai mune vitale ke golomo mamonu. Ige Dilavau vaveveve ke elehai hilokage keu evievi ata seleve. ²² Lana hilokaholilu. Ebalahamu vaveve isi evievie keu igae. Iale vaveveve keike evievive mai selevelinu. ²³ Iale vaveveve keu Bukae Hoto mole mai selevelinu. Hoto keu loui avoe, “Ebalahamu au uvu mai Dilava ominu. Iale evievive kemoike Dilavau loui avoe, ‘Keu inutolotolote ata.’ Isi avuho loui avoe, ‘Au di haoka.’” ²⁴ Iale lana di laheho louale kemo lulelelahalu. Ata oleuleu evievi ata holisito au evievi kemo lovioholiale keu Dilava nimo inutolotoloholilu. Isito ata oleuleu evievi ata holisi abu evievi kemo loviale keu Dilava nimo inutolotoloalu.

²⁵ Ige subuta teibae keate mole Leibu keu ke nahate vanu. Keu evievi ata holisi vaveve dua vanu. Vaveveveu inutolotoloale keu koseanu. Iselala kosiveu ata hanavege abu

Leiabu vatae lohoge keu kebia malevei au oe hogueveniale bae hanavege abu humaha molela detuluvilu. ²⁶ Di louale keu koseanu. Nahie munana kena uoholige nahiabuna haluvisi. Iale ke nahate nahi evievi ata holisito evievi vaveve vaholige nahie evievi keu anekianu.

3

Nemee vaveve

¹ Di haokuvuia, la moagaeau bae ata haiveveve lovi ke valivebene. Kosealemo la hilokage nahiabuna nenilahai ata haiveveve lovi ke vaholige Dilavana nahie vaveve kaovai nahiho hoto baluga loui. ² Nahi bahata vaveve degomolemo dobuluvima. Isito ata oleuoleu abu hoto loumale kemo hotoe dua unaha loumale keabuna abu vaveve bahata hoesegevegei. ³ Di louale keu koseanu. Nahiabuna hote mai osie aimo umuvai ke butuhage osi kena au isivi halei nahie isivi vai. ⁴ Ige bouti vaveve keta ke nahate. Bouti keu baluga. Iale heluka balugana lohoge nahiabuna talie esehame ke matahai taliage bouti kena nahie isivi keve tai. ⁵ Ige nahie nemee vaveve keta ke nahate. Nahie neme keu esevehame. Isito keta nahiabuna hoto baluga loui nahie ebika tabagevegei. Vene keta huhulahave. Nahiabuna botoe tiliege vene esehame beige kemo matama bahatana lahai. ⁶ Iale nahie neme keu vene ke nahate. Neme kemo vaveve toela moagau ua. Iale kena nahie vava bahata aiohavoi. Kosealemo vaveveve keu veneu hodovavesite keve lohonu. Iale kemoike nahiabuna hotoe toela baluga loui nahie vaveve bahata aiohavoi. ⁷ Di tota hoto mole louge esivive. Ataeabuna botoe ovo, ugu, ute, huena malei loholiege lovi ovei haivege abuna isiviale vagei. ⁸⁻⁹ Isito atabeu bae ke nahate neme ke haivulivebene. Neme kemo nahiabuna vaveve toela baluga lougei. Nahi nahie neme kemo nahie Kosive Dilava ke hoesehavoito hoidevei kemo Dilavau au ebia nahate ata vaeveale kebiaho hotoe toela loui aiogevegei. ¹⁰ Nahi katelahai nahie nememo Dilava hoesehavoito ata aiogevege keu toelanu. Iale di haokuvuia, nahi vaveve kateale va halevai. ¹¹ La hilokage e hana kemo e heteu bae e tumuteti mole tamoevei loholivebene. ¹² Ige anani idi keu bae okali bai mamolivebene. Ige vulutu keu bae anani bai mamolivebene. Ige davala kemo e heteu bae loholivebene. Iale ke nahate nahie neme kela hotoe toela hotoe dua ke nahi lou halevagei. Isito hotoe dua unaha lougei.

Otogoe lulele

¹³ La lulele ata holiliege la ebika tabageve halevaito vaveve dua unaha vage ataeau la vaveve ke elehai hilokai kosea, “Lulelete ataeabulike kea.” ¹⁴ Isito mesoho lana mole maina mai isi moleho itumulahai la ebika unaha huhueveliege lainaho loui kosea, “Noeau lulelete.” Kosealemo la vaveve kemo ataeau hilokage laeau loboe ataea. ¹⁵ Lulele katealeu otogomo dobai lohoholinu. Isito keu vatae lulele unaha. Vaveve katealeu Dilava vaveve holioholinu. Isito keu munana toelae vaveveike. ¹⁶ Ataeau mole maina mai isi moleho itumulahai abu ebika tabageveale kemo abuna mole halevei abu isivi unaha vai vaveve toela baluga vagei. ¹⁷ Isito luleleu otogomo dobai lohoale ke vaveve koseanu. Lulele kemo ataeabuna vaveve dua unaha vai moleho uvulahai moleho isivilahai mole hoesegevei mole tedaevagei. Lulele kemo ataeau bae mole lobogevei mole aiogevelivebene. ¹⁸ Iale oleuoleu uvevete ata holiiale keau uveve dua vai ata degomole hoesegevege ata kebia vavevena inutolotoi.

4

Vatae vaveveho isivi halevave.

¹ La vadeuhoike molehi ugologoloi moleho louma. Kosealemoike huhuihuhue toela moagau la uvumo uale kemoike vavae isivi moagau la malevege la kebiaho isivilahai mole aiogevema. ² La isivialeike la isivi ke malei. Isito la ke maleveve keu laemo anekianu. Kemoike la isiviale ata havei abuemo la isivi ke malei. Kateike la vai molehi ugologoloi moleho louma. La la isivi maleholiale keu koseanu. La la isivi maleveve keho Dilava imihaholima. ³ Mesoho la Dilava imihaito la isivi ke maleholilu. Kosealemo la imihale keu la isivi unaha. La isivialeike la ebikaho la isivi ke malei. ⁴ La vaveve keu teibae vaveve nahate. Keate moleu au kolia halei malaha moleti oimale ke nahate la Dilava halevaito vatae vaveve ke ehovama. Lana katelahaliege oleva kateai Dilavaluvuta haokuvuai. Kateaveve keu anekianu. Kosealemo oleuoleu vatae vaveveho isiviale keau Dilava haokuvu holioholilu. Isito keau Dilava aiohavomale ataea.

⁵ Lainaho Bukae Hoto mole ke huhulahai kosea, “Keu hoto unaha.” Bukae Hoto keu loui avoe, “Dilava Munanae Tumu nahie uvumo umale keu isivioholiale nahi vatae isivi valiho.” Hoto keu kateanu. ⁶ Ige Dilavau au uvu mai nahiovei nahi negotieveale keu baluga. Katealemoike Bukae Hotou loui avoe, “Ata oleuoleu abu ebika tabageveholiale

kebia Dilavana au uvu ovei negotievei. Isito oleuoleu abu ebia tabageveale kebia Dilava bae au uvu ovei kebia negotievelivebene.”⁷ Iale la isivi ke va halevaito Dilava isivi unaha vave. Ige Seteneu lae lohoge lainaho isivive valive. Isito ke vavevemo la ebika bamuge auna la halevei tai.⁸ Lana Dilavae lohoge auna avuta lae tai. Laeau vaveve tola vamale ataea. Iale la vaveve tola ke halevave. Laeau uvu abuiamale ataea. Iale la uvu kebia hoesegevevi uvu igaave.⁹ Lainaho vaveve tola vai avuemo vahaeholahi helahalive. Isito kemo uvulahi ninalahave.¹⁰ Lainaho la isivi vai Dilava nimo la ebika tabagevelive. Isito Dilava isivi vage auna bae la tabagevei.

Lainaho mole vaveve kaovai la ebia tabagevelive.

¹¹ Di haokuvuia, lainaho moleho hotoe tola loui kemo mole aiogevelive. Ata oleuoleu kateai abu haokuvue vaveve kaovai abuhouale keau Dilava menaka tatolevei aiahavolu. Lana katelahi Dilava menaka kemo hoto loui aiogeveliege la keau Dilava menaka ehovaholisito menakave ke aiahavolu.¹² Dilava ke igaeike menaka mai nahiovei nahie vaveve nahie mo kavama. Iale kena au isivimo nahi malevei mesoho nahi aiogevei. Iale la oleve kateike vaima la haokuvu vaveve abue mo kavai aiogevema.

¹³ Di hoto mole laheho louge evive. La degomoleau loui kosea, “Noebuna tiliege vagana igae o moleve ui lovi baluga vai kemo moni baluga malei.”¹⁴ La katelahi louito nivue uveve ke la hilokaholilu. Goeu uito solekai uoholiale ke nahate la uveve kena nova uito nivu uoholisi.¹⁵ La kateale louge keu tolanu. Isito la koseale louge duave. “Dilava isiviege noeabuna uliege vaveve kateale vai, koseale vai.” La hoto kateale louge duave.¹⁶ Isito la hoto kateale louholisito la ebika malei hatuevei kemo hoto louma. La hoto kateale loumale keu tolanu.¹⁷ Iale ata oleuoleu vaveve dua hilokaito vaholiale keau kemo vaveve tola valu.

5

Kunaitebiaho deiada

¹ Kunaite ataea, di hoto louge evive. Vaveve tola baluga laemo lohovevelua ninalahi kekolahave.² Kosealemo la kunai keabuna toelai uoholisi. Ige la ogo keabuna sisilahi uoholisi.³ Ige la golo isi la siliva keabuna taholahi toelai. La aike kunai moaga bevaveve otoveale kebiahi lana igaetoai vanie gabi kela venemo ladevei kemo vatehani baluga maleve.⁴ La esemuaia la bulumo lovilahaito la kebia ibina oveholiale kemo lana abu kekolahamale evilu. Keau ninalahi kekolahage otogoe umale Kosive baluga keu kekoeabe ke evinu.⁵ Vata kove la uveve keu ovo batate ke nahate. La kunai moaga malei hamubisi uveve dua vama. Isito abu ovo batate hamale ke nahate Dilavana bae la aiogevei.⁶ Atae dua keau la aiogeveholisige la heitata kebia havema.

Kosiveu lohoveve ke hemei ui guligulilahave.

⁷ Di haokuvuia, lainaho kabebilahalive. Isito negolahi ulage Kosiveu lohoi. Bulumo loviemale ke vaveve huhulahave. Kena vaeahamo au lovi haito kabebilholisi hemei usege vaganamo veniu lohoge lovine kena baie dua vai.⁸ Iale ke nahate kabebi halevaito negolahi hemei uve. Kosealemo Kosiveu lohoveve vaniu vuguvuguanu.

⁹ Di haokuvuia, lainaho mole vaveve molemo lougelive. Lana vaveve kateale vaholige Dilava bae la vaveve kaovalivebene. La vaveve kaovaveve atau lohoveve vuguvuguanu.¹⁰ Di haokuvuia, belovetaeau subuta Kosive ivimo hoto louale kebia huhueveve. Beloveta keau Dilava hoto loui kemo vatehani maleito kabebilholisi negolahi lovi ke vai timale nahate nahita vai.¹¹ Nahi hilokage keau vaveve kateale vale kemo Dilava hoesegevenu. Ige la Diobu deiada keta evialeike. Diobu keu vatehani maleito kabebilholisi negoige Dilava gabie avuho uvuai ke tedahonu. Nahi hilokage Dilava keu ataho uvuai tedeavemale Kosive.

¹² Di haokuvuia, hoto kebiamo hoto kou baluga. La isiviai hoto vadeu la haokuvuho louliho valiege lainaho Kosive ivi lougelive. Isi lainaho vatae kosive ivi louevei lougelive. Isito la valiho isivialiege loui kosea, “Ito, dana vai.” O la vaholiho valiege loui kosea, “Ba, di bae valivebene.” Katealemo Dilava bae la vaveve kaovalivebene.

¹³ La vigomo atabena vatehani malema. Keho louge au guligulii Dilava imihai. Isi la vigomo atabena vahaehoai ue dua vama. Keho louge au nogoli loui Dilava hoesehavoi.¹⁴ Isi la vigomo atabena vavahanianu. Avuho louge au dubue eloda namigevege abu loholive avuho guligulilahi Dilava ivimo oele mai avuemo ehosivai.¹⁵ Abuna lohoi katelahi abu uvu mai Kosivemo mavoi guligulilahage Kosivena ata ke tedahoge auna momoleai. Isi mesoho ata keu vaveve tola vage avuho guligulilahage Kosivena toelave ke ulihai.¹⁶ Iale lana la vaveve tola ke dai ai moleho loui guligulilahage Kosivena la hoesegevei. Ata inutolotolote kena guliguliage guligulive kena vuvuneai.¹⁷ Subuta beloveta mole ilaidia keu nahi nahate. Iale keu negoai Dilava imihai isiviholialeike veniu

vatae loholiho. Ige Dilavau imilive evisi vagana abuita igaeta isi bata sigisi ke uvumo veni hanavoholinu. ¹⁸ Iniale au tota Dilava imihage Dilavau otogomo veni hanavonu. Ige kemo vatae onobenobeau tota ulie dua valu.

¹⁹⁻²⁰ Di haokuvuia, di hoto mole louge evive. Mesoho la olena hoto seleve halei humaha toelala tiniege vaveve toela vage la molena hoto seleve loui ke haivuge kena tota hoilahai hoto seleve ehomage la hatihati humahamo ke malu. Ige Dilavana vaveveve toela bahata ulihage keu bae hatilivebene.

1 Bitā

Bitau evievi ataho hisialiale

¹ Iesu Keliso abostolo Bitā dalike levaleva ko laheho hanavoma. Abu lahavei la nunuvege la Dielusalema halevai vata igaegae tiale ua. Botasi, Galesia, Kabadosia, Esia, Bitinia vata keve igaegaeai ui lotilu. Iale la kebia bahatahoike di levaleva ko hisialiai hanavoma. ² Dilavau au isivimo la tabagevei au Munanae Tumu laovege la kemo atave tumute holilu. Iale kemo lana Iesu Keliso hoto evisi ehovage tahovena la toela ulihai. Iale di isivialeike Dilavau la huhuevei la hoesegevege lana kemo ue dua vageve.

Otogoe tiveve huhuai vahaeholahave.

³ Di isivialeike nahi nahie Kosive Iesu Keliso ke Mamae ivi hoesehavoi. Dilava keike nahiho uvu balugai uveve doga nahiovenu. Keu Iesu Keliso etuvage au hatihatimo hovelahale kemo nahi ukolikoli ke maleveve huhulahai uma. ⁴ Dilava keike au ataho onobenobe dua toelavesite malei otogoe otovenu. Onobenobe keau bae toelai uho-lilivebene. ⁵ Laeau la evievimo negolahale kemo Dilavana au vuvunemo la nalieveniege vanie gabila auna la malevei onobenobe ke bahata laovei.

⁶ La onobenobe maleveve kemo vahaeholahave. Halege vaveve toelau laemo lohoge vatehani maleve. Isito lainaho ke huhulahalive. Vatehani keu bae laemo ui egealivebene. ⁷ Isito vatehani katealemo Dilavau isivialeike la evievi hilokai. La evievi keu golo nahate. Ataebuna golou muneti igaetoale ke malei mahoge muneu uoholisege golo unahana ui. Iale ke nahate Dilavau isivialeike vatehani kemo la evievi hilokai. Ige la oleuleu vatehani kemo dobuluviholisito negolahai uge Iesu Kelisou lohoale vani kemo Dilavana la hoesegevei la ivi tabagevei. ⁸ Laeau Iesu elehaholisito avuho isivilahai la uvu mai avuemo mavolu. Isi la aike elehaholisito vahaehove vage la vahaeho keu balugataho seleve. ⁹ Kosealemo la hilokage la la uvu mai Iesuemo mavoale kemo Dilavana bae la malevei ukolikoli laovei.

¹⁰ Subuta uale beloveta keau nenilahai ukolikoli ke hoto kaovai isiviai hiloka seleveage Dilavana oleve kateai au ata malevei ukolikoli ovei. ¹¹ Subuta mole Dilava Munanae Tumu beloveta kebia uvumo ui Iesu Kelisou lohoi vatehani maleveve isi au atagamo lohoveve ke haivege abu nenilahai au lohoveve vani ke kaovai isiviai hilokage Dilavana oleve kateai au ata malevei. ¹² Dilavau subuta Keliso vaveve loui beloveta kebia haivege abu hilokage vaveve keu bae vaniabemo loholivebene. Isito nova nahie vani komo Keliso vaveve velemanu. Ige evievi ataeau aike tiale hotoe dua loui la haivege la hoto ke evilu. Ata keau abu vuvunemo la haiveholilu. Isito Dilavau Munanae Tumu otogomo hanavoge ata keau vuvunemo hoto ke loui la haivelu. Hoto keu hoto baluga. Iale anelu kebiata isivialeike hoto ke kaovai kemo lulelehahi.

Iesu nahate ata tumute holive.

¹³ Iale kemo negolahai la uvu hoesegeveve. Lainaho vaveve toela huhuigelive. Isito hovevevei negolahai Iesuu lohoveve ke huhulahai uve. Ilage au loholive la tadeavei la hoesegevei. Iale kemo negolahai uve. ¹⁴ Laeau Dilava esea. Iale Dilava hoto evisi vave. La subuta hotoe dua eviholiale kemoike la luleleholisi vaveve toela vama. Iale lainaho tota hoidevei vaveve toela ke valive. ¹⁵ La hohaveale Kosive keu ata tumute. Iale lata ata tumute holisi vaveve dua unaha vageve. ¹⁶ Kosealemo Bukae Hotomo Dilavau loui avoe, “Dau ata tumute. Iale lata ata tumute holive.”

¹⁷ La guliguliamale kemo la Dilavaho loui kosea, “No Mama.” Iale la hilokage auna la vamale ke bahata kaovai ibina igaegae laovei. Iale la uveve kemo ke vabuhavoi vani bahata hoesehavogeve. ¹⁸ La hilokage Dilavau la toelae ibina vale kemo la la subuta buluve vaveve halevai vaveve dua valu. Dilavau nahie ibina vale keu balugataho. Keu moniu uoholiveve keta nahie ibina vaholinu. ¹⁹ Isito au moe taho keta la ibina vage la la buluve vaveve toela halevai uveve dua valu. Iale Keliso taho keu baluga. Ige Keliso vaveve keu duave unaha. Abu subuta Dilava hoesehavoliho mamoe dua hamai mahoale ke nahate avuemo vavevebe toelau uoholinu. ²⁰ Subuta mole Dilavau vata vaholisito Keliso ke ebagemanu. Isi aike vanie gabi komo keu la toelaho Iesu Keliso hanavoge au vatae lohonu. ²¹ Iesu kemoike la la uvu mai Dilava omilu. Dilava keike hatihatimo etuvage au hovelahanu. Keu hovelahage Dilavau ivive ebagemage au kosive baluga holinu. Iale kemoike la la uvu mai Dilava omisi ke hemei uma.

²² Isi la nova hoto seleve evisi ehovai kemo la uvu hoesegevei la haokuvuho isivilahai tadeavema. Iale lainaho vaveve kateale halevalive. Isito negolahai vaveve kateale

vai la haokuvu tēdāve dua vāgeve. ²³ La uveve dogā malelu. Uveve dogā keu bae gabialivebene. Kosealemo la la neinuemo uveve dogā ke maleholilu. Isito Dilava hoto kemoike la ke malelu. Iale Dilava hoto kena vani bahata ui tigei. ²⁴ Bukae Hotou loui avoe,

“Ata bahata keau kulu nahate.

Ige vaveveabe keu kulue si ke nahate.

Kulu kena giliage keabuna gililāhai keolāhai.

²⁵ Isito Kosive hoto kena vani bahata ui tigei.”

Bukae Hoto keu kateanu. Iale hotoe dua keike ataeau tiale loui la haivelu.

2

Kosive keu ukolikolie mune

¹ Iale kemo lainaho vaveve toela vaevegelive. Lainaho mole lobogevei mole maina mai isi mole vavamo hotoe toela lougelive. ²⁻³ La hilokage Kosiveu la hoesegevei la tēdāvenu. Iale kemo esee gitokie vaveve ke nahate vaveve. Esee gitoki keabuna vani bahata abu neinuemo amu keho isivilahagei. Ke nahate lana Dilava hotoho isivilāhai kemo negolahage auna la evievimo la negotievege lana kemo lavie dua vave.

⁴ Kosive keu vani bahata umale mune tolotē ke nahate. Ataeau vaveveve elehai avuho isiviholilu. Isito Dilavau vaveveve ke elehai ebagemanu. Keu ke ebagemai hilokage keu baluga. Iale Kosive loholive avuluvuta uve. ⁵ La Dilava mune tumu seleve holiale kemo lohoge au la malevei au oē tumu houī. Ige lana Iesu Keliso ivimo atave tumu holieveli dubuve kemo lovilahage la vaveve keabuna Dilava nimo seleve holisi. ⁶ Katealemo Dilavau Bukae Hotomo loui avoe,

“Elehave.

Di Mune mole dua ebagemai Saioni tana kemo o baluga houliho mamonu.

Dana Mune ke mai o hadebiho mamoi to ke golomo o ke houī.

Ige oleuoleu abu uvu mai Mune kemo mavoale kebia Dilavana iviabe tabagevei.”

⁷ Iale la oleuoleu la uvu mai Mune kemo mavoale la keau huhuige Mune keu mune baluga. Isito ata oleuoleu abu uvu mai Mune kemo mavoholiale keau Bukae Hoto mai selevetilu. Bukae Hoto keu loui avoe,

“O houmale ataeau mune moleho isiviholisi mai mihatulu.

Isito Dilavau Mune ke ebagemage keu Dilava o hadebiveve Mune holinu.”

⁸ Ige Bukae Hotou tota loui avoe,

“Ataeabuna mune ke ealovai dobuluvisi.”

Bukae Hoto keu kateanu. Ataeau hoto seleve evisi maholiale kemoike abu Mune ke ealovalu. Dilavau subuta vaveveabe hilokaike vaimē hoto ke lounu.

⁹ Isito Dilavau la tabagevege la ata tumute holieveli atave seleve holilu. Iale laeabuna Kosive hoesehavoi dubuemo loviveve ata holive. Dilavau la hohavei la tabagevege la vavie vaveve halevai Dilava ataga duae lohohu. Keu la tabageveve isivialeike la vaveveve dua loui ata haivei. ¹⁰ Laeau subuta Dilava ata holioholilu. Isito laeau aike atave holilu. Dilavau subuta laheho uvuui la tēdāveholinu. Isito aike au laheho uvuui la tēdāvenu.

Vata kou nahie o seleve holioholinu.

¹¹ Di uvue haokuvuui, di tota laheho louge evive. Vata kou la vata seleve holioholinu. La keau vata mole ataea. Iale lainaho vatae vaveve toela huhulāhai vāgelive. Vaveve toela keabuna laemo uliege vani bahata la uvu aiogevegei. ¹² Mulimulie ata kebia nimo vaveve dua unaha vageve. Ige mesoho keau laemo hotoe toela louge la vaveve dua vāmale kemo hotoeabe keu bae laemo ihualivebene. Iiege Dilavau lohoveve vani kemo abuna la vaveve dua kemo Dilava hoesehavoi.

¹³ Iale nahie Kosiveu isivialeike la vatae kosive kebia hoto evisi ehovei. Katelahaime nahie vata nalimale kosive baluga Sisa ke hotota evisi. ¹⁴ Isi valavemo umale gamani kebia hotota evisi. Kosealemo nahie vata nalimale kosive baluga keike gamani kebia otovei isivialeike keau vaveve toela vāmale kebia ibina oveito vaveve dua vāmale kebia hoesegevei. ¹⁵ Vaveve keu Dilava isivilike. Keu isivialeike la vaveve dua vāmale kemo luleleholimale ataeau la vavamo loboe hoto louge keau bae laemo ihualivebene. ¹⁶ Dilavau la vaveve toelamo la maleveale kemo lainaho loui kosea, “Noeabuna no isivi unaha vagei.” Isi la vaveve toela ke hogoovelive. Isito la maleveale kemo isivive unaha vageve. ¹⁷ Isi ata bahata hoesegeveve. Isi evievi ata bahataho isivilāhai tēdāveve. Isi Dilava vabuhavoi hoesehavoi nahie vata nalimale kosive baluga Sisa keta hoesehavove.

Vatehanimo Keliso vaveve nahate vave.

¹⁸ La degomoleau kosive degomolemo lovilahama. Iale kebia hoesegeveve hotoeabe evisi ehoveve. Kosive kebia degomoleau ata hoesegeveve ataea. Isege degomoleau

ata aiogevemale ataea. Iale lainaho kosive dua kebia unaha hoto evisi isiviabe valive. Isito kosive kebia bahata hotoeabe evisi isiviabe vave. ¹⁹ Lana kosive toela kebiamo heiata vatehani maleale ke huhuholisito Dilava isivi huhulahai vatehani kemo negoige Dilavana la hoesegevei. ²⁰ Isito lana vaveve toela vai kemo vatehani malege Dilavau bae la hoesegevelivebene. Lana vaveve dua vai kemo vatehani malege Dilavana la hoesegevei. ²¹ La kateale valiholike Dilavau la hohavenu. Kosealemo Keliso biageu laheho vatehani maleale kemo Dilavau isivialeike Kelisou vale ke nahate lata vave. ²² Keliso keu vavevebe toela vaholinu. Isi lobo hoto louholinu. ²³ Aataeu hotoe toela avuho louge keu hotoeabe ibina abuhou louholinu. Isi ataeau vatehani omige keu hoto koseale louholinu. “Dana bae la vale ko ibina vai.” Keu kateale louholisito loui avoe, “Dilava keu inutolotote Kosive. Iale auna bae la daemo vale ke ibina vai la aiogevei.” ²⁴ Keliso keu idie domo hatige Dilavau nahie vaveve toela bahata malei avuemo mamoi isiviale nahi vaveve toela halevai vaveve inutolotote vai. Au vatehani maleale kemo nahi ue dua valu. ²⁵ La keau subuta mamoeau tebulahale ke nahate. Ige Iesu keu mamoe nibievemale ata nahate. Iale la hoidevei lohoi ehovage keu la uvu hoesegevei la nibievema.

3

Keateta malahataho hoto

¹ Di hoto mole louge evive. Keatea, la kolivue hoto evisi ehoveve. Mesoho la kolivue degomoleau Dilava hoto eviholimale kebiaho lainaho hoto isute lougelive. ² Isito hotoeabe evisi vaveve dua vai kebia hoesegevege abuna la vaveve ke elehai kemo abuta Dilava hoto evisi ehovai. ³ Keatea, lainaho huhulahai kosea, “Noeabuna no vavae elehilehi kemo no kolivu hoesegevei. Noeabuna kina bisi haue dua no vavamo hatui ogoe dua vai kemo no kolivu hoesegevei.” Lainaho kateale valive. ⁴ Kate halevaito la uvue vaveve kemo la kolivu hoesegeveve. Abuhou itumu halevaito tobekalahai abuhi uve. Kosealemo vavae elehilehi vaveve keu bae ui tigelivebene. Isito uvue vaveve kena vani bahata ui tigei. Ige Dilavana la vaveve ke elehai loui kosea, “Vaveve katealeu duave baluga.” ⁵ Subuta keateau vaveve toela vaholimale keau abu uvu malei Dilava omiale keau vaveve kateale vai abu kolivue hoto evisi ehovema. ⁶ Subuta keate mole Sela keu kateanu. Keu au kolia Ebalahamu hoto evisi avuho loui avoe, “Di kosive.” Lana ke nahate vai vaveve dua unahamo la kolivu hoesegevege la vaveve kena Sela vaveve nahate holisi. Ige la bae kemo mole vabugevelivebene.

⁷ Ige malahaea, lata la keate hoesegevei abuhi ue dua vave. La keau negolahalu. Isito la keate keau negoholilu. Iale kebia hoesegevei abuhi ue dua vave. Kosealemo Dilavau la ukolikoli maleveve louale ke abuta malei. Isito lana kateholisito molehi ugolokolohage Dilavau bae la imili ke evilivebene.

Lainaho vaveve toelae ibina valive.

⁸ Hoto ke gabi di louge la bahata evive. Uvu igaemo molehi igaetolahai uve. Laeau bahata evievi ataea. Iale moleho uvulahai mole tedeaveve. Isi la ebika tatovevei mole hoesegeveve. ⁹ Aataeu vaveve toela laemo vage lainaho ke ibina abuemo valive. Isi mesoho abu laheho hotoe toela louge lainaho hotoeabe toela ke ibina valive. Isito ke ibinahou hotoe dua loui hoesegeveve. Kosealemo Dilavau nahie hohavei isivialeike nahi vaveve dua kateale vai. Iive elike ke ibinahou au nahie hoesegevei. ¹⁰ Bukae Hotou kemo loui avoe,

“Ata oleuoleu isiviai ue dua valiho valiege hotoe toela loui halevai ata lobogeve halevai.

¹¹ Abu vaveve toela ke halevai vaveve dua unaha vai.

Isi uveve dua unaha kaovai kemo negolahai.

¹² Kosealemo Kosiveu vani bahata inutolotote ata kebia nibievei imiliabe ke evima.

Isito auna vaveve toela vamale kebia halevei imiliabe evilivebene.”

¹³ Bukae Hoto keu kateai lounu. Iale la oleuoleu vaveve dua valiho isivi balugage atabue bae la aiogevelivebene. ¹⁴ Isito mesoho la vaveve dua vage ataeau kemo vatehani laovege keta duave. Abu kateige vahaeholahaive. Lainaho kebia vabugevei abu laemo onole vaveve huhulahalive. ¹⁵ Isito nahie Kosive Iesu Keliso ke igae vabuhavoi hoesehavove. Ige elike vani mole ataeau la la uvu mai Iesuemo mavoi hemei umale kemo la belagevege hotoe dua loui neniai namigevei haiveve. ¹⁶ Lainaho isuta kebia namigevelive. Isito saivai abuhou loui hoesegeveve. Laeau Keliso ehovamale ataea. Iale la uvu la vaveve hoesegeveve. Ige elike ataeau laheho heiata hotoe toela louale keau gabie la vaveve dua elehai abu louale ke huhulahai matilahai. ¹⁷ Nahi Dilava isivi vai kemo vatehani malege keu duave. Isito nahi vaveve toela vai kemo vatehani malege keu toelanu. ¹⁸ Keliso keu ata bahata toela ibinahoi ke au tava igae hatinu. Keu inutolotote ata. Isege nahiau atae toelaea. Iale keu au hatihati kemo nahi holoevei lohoge Dilavau nahi malevenu.

Ataeau Keliso hamage hatinu. Isito hovelahai tota au munana malenu. ¹⁹⁻²⁰ Keu vatae lohoholisege munanaveu subuta vani mole Noa uvumo holomage au hotove loui ataeau vaveve toelamo dibulale nahate vale kebia haivenu. Noau bouti baluga housege Dilavau ata kebia hemevei ui isiviale abu hoidevei ehovai. Isito abu hotove eviholige Dilavau e baluga hanavoge boutimo uale ata eiti (8) unahaeau e kemo haluviholilu. ²¹ Vaveve kemo nahi hilokage nahi babatsoamale keu ke nahate. Nahi e uvumo tiale keu hitale ke nahate. Isi emo hoveveale keu Iesu hatai hovelahale ke nahate. Nahi e uvumo tiale keu nahie vava unaha nahi totohohilu. Isito nahiabuna huhue dua vai loui kosea, “Dilavana no toela ulihai.” Nahiabuna huhuihuhui kateale huhulahai emolahage Dilavana nahie toela ulihai nahi malevei. ²² Iesu keu otogoe tiale Dilava ada inuteveatae ugulamonu. Keu keve aike ugulamoi anelu bahata nalievei otogoe umale kosive bahata kebia nalievelama.

4

Dilava isivi unaha vageve.

¹ Iesu keu vatae lohoale vatehani malenu. Iale lata au huhuale ke nahate huhulahai negolahave. Di louale keu koseanu. Oleuoleu abu evievimo vatehani maleale kebiamo vaveve toelau bae negoalivebene. ² Katealemo vatehani maleale laeau lainaho vatae vaveve ke huhulahai vavae isivi keta vagelive. Isito aike hovevevei Dilava isivi unaha vageve. ³ Atae toela keabuna abu isivi unaha vai vaveve toela vagei. Iale la subuta abu vamale ke nahate vama. La huhuihuhui toela huhulahai keate huhuevei e toela isi teibalalahai lovi baluga vai kemo e toela isi loboe dilava hoesegevema. ⁴ La subuta katelalahu. Isito la aike atae toela kebia halevei vaveve toela kateale vaveholima. Ige ata keau la uveve ke elehai kemo vikolahai hotoe toela loui la aiogevema. ⁵ Isito lainaho ke huhulahalive. Kosealemo Dilavau nita umale isi haluvimale kebia vaveve kaovave vaniu vuguvuguanu. Iale vani kemo ata keabuna bae abu vamale ke ihu loui Dilava namihai. ⁶ Dilavana bae vanie gabila haluviale isi nita uale kebia vaveve kaovai. Katealemoike au au hotoe dua ke mai ata bahata haivei isiviale hotove kemo haluviale isi nita uale nahi bahata Dilava uveve nahate vai.

Dilavau au vuvune igaegaai laovenu.

⁷ Vata kou gabiveve vuguvuguanu. Ialelua huhue dua vai la ebika nenigevei guligulillahave. ⁸ Di isivi balugaleike la moleho isivilalahai mole tedaave dua vai. Kosealemo la moleho isiviale kemo la bae vaveve toela vai mole aiogevelivebene. ⁹ Isi di isivialeike evievi ataeau la oe lohoge lainaho kemo hoto loui itumulahalive. Isito kebia malevei o hatueveve. ¹⁰ Kosealemo Dilavau ata hoesegevelive vuvune igaegaai laovenu. Iale vuvuneve kemo ata bahataho vaveve duamo mole tedaave unaha vageve. ¹¹ Di isiviale Dilavau olemebia ata haiveveve vuvune oveale kebiau hotove ke unaha loui ata haivei. Isi Dilavau olemebia ata tedaaveveve vuvune oveale kebiau Dilava vuvune kemo ata tedaave dua vai. Vaveve dua katealemo ataeabuna Iesu Keliso ivimo Dilava ivi ebagevai hoesehavoi. Avuemoike ataga isi vuvune bahata keabuna vani baita ui tigei. Hoto seleveike.

Vatehani malemale hoto

¹² Di uvue haokuvuia, di hoto mole louge evive. La aike vatehani malemale kemo lainaho vikolahai loui kosea, “Osialemoike no vatehani ko malema.” Lainaho kemo dolodolohalive. ¹³ Isito kemo vahaeholahave. Kosealemo Iesu Kelisou vatehani maleale ke nahateike la ke malelu. Iniege Iesu au atagamo tota dobai lohoge la vahaeho kena balugatahoai. ¹⁴ La Iesu Keliso ehovamale kemo ataeau hotoe toela loui la aiogevege vahaeholahave. Abu katelahage la kemo hilokage Dilava Munanae Tumu atagateu laemo ua. ¹⁵ Di isiviholialeike laeau ata havei vavololahai mole vavevemo hoto loui vaveve toela kateale valiho. La kateale vai kemo vatehani malege keu evievi atae vaveve holioholinu. ¹⁶ Isito la evievi ata holiale kemo vatehani malege keu duave. Lainaho vatehani ke maleliho vabulahagelive. Isito la Keliso ivi male kemo vahaeholahai Dilava hoesehavove.

¹⁷ Dilavau atae vaveve kaovaveve vaniu vuguvuguanu. Auna vasohuta nahie vaveve kaovai. Isito ke iae hotove dua eviholimale keabuna osoi. Keabuna ibina toela baluga malei. ¹⁸ Hoto kemo Bukae Hotou loui avoe,

“Dilavau ata inutolotolote maleveveve keu toloanu.

Iale auna oleve kateai vaveve toela vai Dilava hilokaholiale kebia malevei.”

¹⁹ Bukae Hoto keu kateai lounu. Iale la oleuoleu Dilava isivimo vatehani maleale lana la vaveve duamo negolahai onobenobe bahata vaveveale Kosive ke igae huhulahai uve. Lana katelahage au louale kemo au bae la halevelivebene. Isito auna la malevei.

5

Dubue elodae vaveve

¹ Dubue elodaea, di laheho hoto mole louge evive. Dau data dubue eloda daliko. Iesu Kelisou idie domo vatehani maleale ke di elehanu. Iale auna au atagamo lohoge dana avuti igaetoai ui. ² Laeau Dilava ata nalievemale ataea. Dilavau la otoveale lana la ekalesia kebia nalieve tumu vave. Dilavau isivialeike la la uvu mai lovi kemo mavoi nenilahai ke vai. Lainaho moni maleveve ke unaha huhulahai lovi ke valive. Isito la uvu bahata mai lovi kemo mavoi lovilahave. ³ Dilavau la otovege la ata kebia nalievemalemo lainaho la ebika tabagevei loui kosea, “Noeau baluga.” Isito kebia nimo nenilahai lovilahage abu la vaveve ke elehai ke nahate vai. ⁴ Lana katelahalage ekalesia nalievemale Kosive baluga kena lohoniege vani bahata umale hanogoe dua malei laovei.

⁵ Malaha dogaea, di laheho hoto mole louge evive. Lata evievite kosive kebia hoto evisi vave. Lainaho la ebika tabagevelive. Isito mole hoto evisi mole hoesegeveve. Kosealemo Bukae Hotou loui avoe, “Ata oleuoleu abu ebika tabageveholiale kebia Dilavana au uvu ovei negotievei. Isito ata oleuoleu abu ebia tabageveale kebia Dilavau bae au uvu ovei kebia negotievelivebene.” ⁶ Iale lainaho la ebika tabagevelive. Isito Dilava adae vuvune ke valamo ugeve. Lana katelahage gabie vani molemo Dilavana la tabagevei. ⁷ La ono mole huhuige la uvumo isuale ke loui Dilava namihave. Kosealemo keu la nibievemale ata.

⁸ Isito la aiogevemale Setene keu ovo aihanite laioni ke nahate. Keu vani bahata la maleveho ohanoma. Iale kemo la ebika nibie tumu vave. ⁹ Ige Seteneu lae lohoge lainaho hotove malive. Isito la evievimo negolahave. Kosealemo la hilokage vata bahatae evievi ataeau la vatehani maleale ke nahate abuta malema. ¹⁰ La vatehani malemale keu bae gabie egealivebene. Isito ke iae Dilavana la bahata malevei la hoesegevei. Dilavau au uvu laovei la hohavei isivialeike la talive otogoe atagavemo Iesuluvuta igaetolahai ui. Iale vatehani ke iae Dilavana la malevei negotievege lana ue dua vave. ¹¹ Vuvuneve kena vani bahata ui tigei. Hoto seleveike.

Hotoe gabi

¹² Di hoto ko bahata lousege evievi ata mole Sailasiu hisalianu. Ata keu evievite ata. Di hoto ko loui laheho hanavoi isivialeike la negotievei. Dilavau ata hoesegevemale hoto seleveike di loui la haivema. Iale di laheho louale hoto ko evisi la evievimo negolahave.

¹³ Babuloni ekalesiaeau laheho abu vahaeho hoto hanavoi loui avoe, “Lana duave.” Dilavau lata kebiata tabagevege la bahata evievi ata holilu. Ige di mo mole Maka keta au vahaeho hoto laheho hanavonu. ¹⁴ Iale di isiviale mole vahaeho vai mole hoesegeveve. La Iesu Keliso ata holiiale kemo di isiviale uveve dua unaha vai ugeve. Di hotou kemo kateai ua.

2 Bitā

Bitau tota evievi ataho hisialiale

¹ Iesu Keliso lovi vamale abostolo Saimoni Bitā dalike laheho levaleva ko hisialiai hanavoma. Laeau no evievi ke nahate vama. Evievi keu nahiemo baluga. Nahie Dilava Iesu Keliso keu nahi tēdaevemale Kosive. Keu inutolotolote ata. Iale kemoike nahi evievite ata holilū.

² Laeau Dilava isi nahie Kosive Iesu Keliso kebia vavevemo lulelelahalu. Iale di isivialeike Dilavau la huhuevei la hoesegevege kemo negolahai uveve dua vageve.

Dilavau la hohavei la tabagevenu.

³ Nahi Dilava vavevemo lulelelahage Dilavau au vuvunemo nahi negotieveale kemo nahiabuna Dilava uveve nahate vai. Dilavau nahie hohavei isivialeike nahi avuluvuta igaetolahai atagavemo ui atae dua holisi. ⁴ Dilavau au vuvunemo hotoe dua nahiho louale kemo nahiabuna vatae vaveve toela ke aehai vaveve dua vai Dilavaluvuta ui avu nahate vai. ⁵ Dilavau naniho kateale valemō la evievi kemo vasohuta negolahai vaveve dua vave. Isi emo Dilava vavevemo lulelelahavevemo negolahave. ⁶ Isi emo la vavae isive vaholiveve kemo negolahave. Isi emo vaveve toelamo negolahaveve ke kabebihavove. Isi emo Dilava vaveve nahate vave. ⁷ Isi emo la haokuvuho isivilahai mole tēdaeveve kemo negolahave. Isi ata bahataho isivilahai kebia tēdaeveve. ⁸ Lana vaveve katealebiamo negolahaliege lana nahie Kosive Iesu Keliso ke lulelemo balugai lovive ke vae dua vave. ⁹ Isito ata oleuoleu vaveve kebia nahate vaholiale keau ni kedute kebia nahate. Dilavau kebia vaveve toela ulihale ke keau elehalohisi momahavoi vaveve dua kateale vaveholima.

¹⁰ Iale di haokuvuia, lainaho kebia nahate valive. Isito Dilavau la hohavei la tabageveale kemo negolahai vaveve dua vave. La kemo negolahaliege la bae la evievimo dobuluvilivebene. ¹¹ Lana katelahage Dilavana laheho humaha alavoge lana nahie Kosive Iesu Keliso ke matamae dogā keve teve. Iesu keike nahi tēdaevei nahi malevenu. Iale kena vani bahata au matama keve la nalieve dua vagei.

¹² Di aike laheho hoto seleve louale ke la subuta evisi mage keu laemo negoanu. Isito dana vani bahata hoto ke laheho loui la haivegei. ¹³ Di huhuige di la namigevege la ke huhulahai vage duave. Kosealemo di bae lahehi ui egealivebene. ¹⁴ Di hilokage di hativeve vaniū vuguvuguanu. Nahie Kosive Iesu Keliso keu di hativeve ke loui di namihale kemoike di hilokage dana aike hatai. ¹⁵ Iale di isivialeike negoai hoto ko loui la haiveito hatisege ke iae di hoto ke huhulahai vani bahata vageve.

No no nitela Iesu vaveve elehalu.

¹⁶ No heiata no lulelemo tenia loulame nahate vai Iesu deiada ko loui la namigeveholilū. Isito no no nitela vuvuneve vaveve elehaike vaimē la namigevei kosea, “Nahie Kosive Iesu Keliso kena au vuvunemo dobai lohōi.” ¹⁷ No hoto ko heiata louholilū. Isito no tana keve ui elehasege ataga moleu otogomo dobai Iesuemo lohōnu. Ataga keu ataga nimole. Iale ataga kemo hoto moleu loui avōe, “Kou di uvue mo igae. Iale di ko vahaeho vanu.” Dilavau hoto kemo Iesu ivi ebagemage no evilū. ¹⁸ Tana tumuteve no unahaeau Iesuluvuta usege hoto keu otogomo dobai lohōnu.

¹⁹ No ke evisi hilokage subuta belovetaeau louale hoto keu hoto seleve. Iale la nenilahai hoto ke evige duave. Kosealemo hoto keu lameba nahate. Iale novae vani kou vavi nahate. Lana hoto ke evie dua valage gabie vani mole vae alalami didi kena velemage vaviū uoholisege vana alamoī. Ke nahate Iesuu lohoge nahiabuna atagave elehai. ²⁰ Iale di hoto mole louge evive. Hoto kou hoto baluga. Subuta belovetaeau gabie vaveve louale ke atabeu bae au lulelemo hoto ke ihu kaovai hilokalivebene. ²¹ Kosealemo beloveta keau abu lulelemo gabie vaveve ke louholilū. Isito Munanae Tumuu kebia uvumo holomai kebia negotieveike vage abu Dilava hoto ke loulu.

2

Loboe beloveta

¹ Subuta ata kebia vigomo loboe beloveta degomoleau ua. Ige la kebiatamo loboe beloveta degomole abuna lohōi. Keabuna loholiege abuhō hatiale Iesu ke vovohōi. Keau bae Iesu vaveve seleve loulivebene. Isito abuna vaveve ke vavala tai loboe hoto loui la haivei. Katealemo Dilavana kebia bahata havehatuge abuna solekavesite uoholisi. ² Isito ata moagaabuna kebia hoto mai vaveveabe toela vavevei. Vaveveabe kemo

ataeabuna hoto seleve ke hehavoī kemo hotoe toela loui. ³ Loboē beloveta keau moniho isivilahamale ataea. Iale keabuna abu kinamo hoto loui la lobogevei laemo moni malei. Dilavau subuta loui avoē, “Vaveve kateimale vamale kebia ibina dana ovei.” Dilavau hoto ke louale kemo aioegevevevu vuguvuguanu.

⁴ Anelu degomoleau subuta vaveve toela vale kebia ibina Dilavana ovei. Keau vaveve toela vage Dilavau kebia malevei matamae toelae hanavenu. Keu seimita kebia umudievei malevei Seteneu umale matamae loe otovenu. Iale keabuna keve ulage Dilavana bae kebia vaveve kaovai ibinaeabe ovei. ⁵ Subuta Noa vani kemo ataeau vaveve toela valage Dilavau ibinaeabe ovenu. Vani kemo eu lavui vata bahata bamuge Dilava ehovaholimale keau bahata haluvihatulu. Isege Noau hoto inutolotolote loui ata haivemale keu au ese seveni (7) holovevei abuhi bouti uvue ua. ⁶ Subuta Sodoma ataeau Gomola atahi vaveve toela valage Dilavau ibinaeabe ovei vene hanavoge keu dobai oeabe mahoge ata bahataeāu haluvisi gabilahalu. Iale kemo nahiaabuna hilokage Dilava ehovaholimale keabuna ibina kateale malei. ⁷ Vani kemo inutolotolote ata mole Lotau ua. Keu vani bahata ata kebia vaveve toela elehanata kabebiabe vanu. Ige Dilavau ata kebia aioegeveito Lota tedahoge keu vene kemo lahaholinu. ⁸ Vaveve dua vamale ata keu vani bahata kebiahi unata vaveveabe toela elehai hotoeabe toela evinata kabebiabe vanu. ⁹ Subuta vaveve katealemo nahi hilokage Dilavana vaveve toelamo atae dua malevei hoesegevei. Isito vaveve toela vamale kebia auna malevei otoveniege gabie atae vaveve kaovamale vani kela ibinaeabe ovei. ¹⁰ Vani kela ata oleuoleu abu vavae isivi unaha vai Dilava hoto kabebihavoī isivive vaholiale kebia Dilavana vatehani toela ovei.

Keau katelahai abu ebika malei hatuevei anelue toelaeau subuta vatae lohoale kebia vabugeveholisito kebia hehavei vavaeabemo hotoe toela louna. ¹¹ Isito Dilava aneluiāu beloveta kebia evigeveale keau kateholima. Dilava anelu keau vuvunetea. Isito keau bae Dilava nimo anelue toela kebia hehavei abuhō hotoe toela loulivebene. ¹² Loboē beloveta keau hotoe mesia ke nahate. Ataeabuna mavi beige mesiaebuna kemo holoveve ataeabuna kebia malei havei. Iale beloveta keau luleleholisito vaveve kateale vai anelu aioegeveale kemo Dilavana kebia ibina toela ovei aioegevege abuna uoholisi. ¹³ Ata keau vaveve toela vai ata aiogevemale ke ibina Dilavana vai vatehani ovei. Vaveveabe keu koseanu. Keau bae ata matigevelivebene. Keau onoleho isiviai valiege abuna vavi vani kemo abu isivi unaha vai. Keau katelahaito abu vaveve mahogovai lohoi lahehi igaetoai lovi ige la loui kosea, “Kobia vaveve mesoho duave.” Isito kebia vaveve toela balugau ua. ¹⁴ Ata keau vani bahata teiba unaha huhulahama. Keau ke halevaholisito vani bahata ke kaovama. Keabuna katelahai keate degomole uvuiabeu vaveve toelamo tolohiale kebia lobogevege keabuna hotoeabe evisi isiviabe vagei. Keau katelahai abu haokuvue kunaita elegevei huhulahamale kemo ke unaha huhuevema. Keau vaveve kateale vamalemo Dilava itumu baluga ke valamo ua. ¹⁵ Ata keau humaha seleve halevai tebulahalu. Vaveveabe keu Boso mo Baelamu vaveve ke nahate. Baelamu keu Dilava beloveta. Isito keu moni huhu balugai isivialeike vaveve toela vai kemo moni baluga malei. ¹⁶ Iale keu kateilage donikiveu avuho loui avoē, “Ainaho vaveve kateale valive.” Dilavau doniki aimo hoto kateale louge beloveta keu vaveve toela ke halenu.

¹⁷ Loboē beloveta keau eu seliai uoholiale ke nahate. Isi helukau lohoge goeu solekai lotai uoholiale ke nahate. Vaveveabe keau Dilava nimo ihuoholige Dilavau abuhō matama mole lo seleveale ke ebagemanu. ¹⁸ Keau atae vudimo abu vaveve vamale hoto loui abu ebika tabagevema. Ige ata oleuoleu isiviai vaveve toela halevai vaveve dua valiho vage keabuna vavae isivi toela loui uvuiabe isi isiviale abu vaveveabe ke nahate vai. ¹⁹ Keau ata namigevei avoē, “Lana no hoto eviliege la isivi unaha vageve.” Keau katelahaito abuta abu isivi unaha vaholisito vaveve toelae isivi unaha vama. La hilokage ata oleu vaveve onole vamale keu keho mole holinu. Kosealemo vaveve toela keu ke laho seleveanu. ²⁰ Isito mesohāe ata oleuoleu nahie maleveale Kosive Iesu Keliso ke hoto evisi vatae vaveve toela halevei vaveve dua vaito hoidevei abu subuta vamale ke nahate tota vage keu toloanu. Keabuna bae oleve kateai tota Iesu ehovai. ²¹ Keau Keliso vaveve dua hilokaholisito abu isivi unaha vage keu toela seleve holioholinu. Isito keau ke hilokaito hoidevei menaka tumute ke halevai abu ia mai omige keu toela seleveanu. ²² Ata kebia vaveve keu toe vaveve nahate. Tona edoaito tota au edo ke isi. Ige vaveveabe mole keu ovo nahate. Ataeabuna ovo emogevege keabuna tota tiliege aeamamo aeamai.

3

Kosiveu lohoveve vanie gabi

¹ Di uvue haokuvuia, di subuta laheho levaleva mole hanavonu. Iale tota nova moleike di ko hisialiai hanavoma. Di ko hanavoī isivialeike la haivege la subuta eviale ke

huhulahai kemo lulelelahai. ² Di isivialeike Dilava belovetaeau subuta louale hotoeabe ke huhulahave. Isi di isiviale abostoloeau lohoale nahie toelamo nahie maleveale Kosive Iesu ke hoto loui la haiveale hoto keta huhulahave. ³ Di isiviai vasohuta hoto kemo hoto mole loui la haivei. La hilokage vanie gabila loboee ataeabuna lohologie hoto seleve ke hehavoí abu isivi unaha vai vaveve toela unaha vagei. ⁴ Ata keabuna laheho loui kosea, “La Kosiveu loui avoe, ‘Dana tota hoilalahi lohói.’ Iale Kosive keike olete. No ke elehaholilu. Vata kou usege no buluveau haluvisi lohoale keike kou nova noemo lohonu. Vata ko vaveveu ekovehaholisito keu vani bahata ui tima.” Loboee ata keabuna laheho hoto kateale loui. ⁵ Isito keau isiviholilu Dilavau subuta vale ke huhulahai kemo lulelelahaiho. Nahi hilokage Dilavau louge otogou vatati ua. Ige au louge e kemo vatou velemai lohói vata holisi ua. ⁶ Iale kemoike vani mole Dilavau louge eu lavui vata bamuge ata bahata haluvilu. ⁷ Nahi aike elehage otogou vatati ua. Iale gabie Dilavana tota louge hotove unahamo venena vatata otogota bahata mahoevei gabiai. Ige vani kemo Dilavana atae toela kebia vaveve abueu kaovai bahata aiogevei.

⁸ Di uvue haokuvuia, di hoto mole louge lainaho hoto ke momahavolive. Dilava nimo vanie ni igae keu vagana uani taoseni (1,000) ke nahate. Ige uani taoseni (1,000) vagana keau Dilava nimo vanie ni igae nahate. ⁹ Dilavau bae au onole louale ke halelivebene. Atae toela keau huhulahai avoe, “Dilavau bae no vaveve toela kaovalivebene.” Kebia huhuihuhui keu toelanu. Kosealemo Dilavau vesokale keu koseanu. Keu isiviholinu solekai ata aiogeveliho. Isito isivialeike hemei usege ataeau vaveve toela halevai avue lohói. Kemoike au solekai atae vaveve kaovaliho lohoholinu.

¹⁰ Tesu lohoveve keu koseanu. Ataeau ladevesege vavolo atau lohoale vavoloale ke nahate Kosive kena lohói. Ige vani kemo otogona dikolahai vutoge otogo isi otogomo umale keabuna bahata venemo ladevei uoholisi. Ige vata isi vatamo umale kebiatana uoholisi. ¹¹ Onobenobe bahata keabuna uoholisi. Iale lana oleve katelahave. Onobenobe kebia huhueve halevaito Dilava igae huhulahai vaveve nahate vave. ¹² Lana katelahai vani ke hemei uime la vaveve hoesegevege Dilava vani kena solekai lohói. Vani kela otogona lahai uoholisi. Ige vuvuneve kemo otogomo umale keabuna debisalahai uoholisi. ¹³ Isege otogoe dogá isi vatae dogá keabuna lovoeabe mai. Dilavau subuta loui avoe, “Vaveve inutolotolote vamale ata keabuna matamae dogá keve ui.” Iale Dilavau nahiiho louale keike nahi aike ke hemei uma.

¹⁴ Iale di uvue haokuvuia, vani ke hemei uime la vaveve hoesegevei Dilava nimo vaveve dua vave. Lana katelahaliege Dilavaluvuta ue dua vave. ¹⁵ Ko huhulahave. Nahie Kosiveu solekai atae vaveve kaovaholiale keu koseanu. Keu isivialeike ataeau abu vaveve toela halevai avue hoidevege au malevei. Kemoike au solekai lohoholinu. Hoto ke nahateike nahie haoka Bolou hisaliai laheho hanavonu. Keu au lulelemo ke hisaliholinu. Isito Dilavau lulele omilike vage au ke hisaliai laheho hanavonu. ¹⁶ Bolou au levaleva bahatamo hoto kateale hisalianu. Bolo levaleva kebiamo hoto degomoleau hoto tolotea. Nahi bae solekai ke ihu hilokalivebene. Ige ata degomoleau luleleholiale keabuna hoto ke ihu kaovai ihuve ke loulivebene. Isito abu isivie hoto loui ata lobogevei haivegei. Keau Bukae Hoto degomoleatamo katelahama. Iale vaveveabe kemo Dilavana aiogevege abuna uoholisi.

¹⁷ Isito di uvue haokuvuia, di laheho louale hoto ke laeau subuta evisi hilokalu. Iale kemo negolahai la ebika nenigeveve. La katelahage loboee ata keau bae la lobogevei la malelivebene. Isito lana la evievi kemo negolahai uve. ¹⁸ Lana vani bahata katelahai nahie maleveale Kosive Iesu Keliso ke lulelemo negolahage auna la huhuevei la hoesegevei. Iale nahi vani bahata ke hoesehavogei. Hoto seleveike.

1 Dioni

Ukolikolie hoto

¹No levaleva ko hisaliai isiviale ata moleu ukolikolie hoto noheho louale ke hoto laheho loui. Subuta vatau uoholisege ata keu ua. Iale keu lohoale noheho louge no hotove evisi vavave levei no nitela elehalu. ²Ukolikolie ata keu au Mamati uniale ukolikolie hoto mai lohoge no ke elehaike vaimo hotove ko loui la namigevema. ³No ke elehai hotove evilike vaimo hoto ko loui la namigevevi isivialeike nahi bahata Iesu Keliso isi Mamave kebiahi igaetolahai vahaeholahi. ⁴No ko hisaliai hanavoi isivialeike la vahaeho keu balugai.

Dilava keu atagae biage.

⁵Ata keu noheho louale hotoike ko no la namigevege evive. Avoe, “Dilava keu atagae biage. Kemo vavie vavevebehameu uoholinu.” ⁶Iale mesoho nahi loui kosea, “Noeau Dilavaluvuta igaetolahalu.” Nahi kateale louito nahi sohu vavie vavevemo uge nahie hoto nahie vaveve keau lobo unaha. ⁷Isito mesoho nahiau Dilavau atagamo uale ke nahate valiege nahiabuna molehi igaetolahai vahaeholahi. Nahiabuna katelahage Dilava mo Iesu kena au tahota nahie vaveve toela bahata ulihai.

⁸Mesoho nahi loui kosea, “Noemo toelabeu uoholinu.” Nahi katelahaliege nahie ebikaike nahi ke lobogevema. Ige kemo hoto selevelu nahiemu uoholinu. ⁹Isito nahi nahie vaveve ke loui Dilava imihage auna nahie toela ulihai. Kosealemo keu inutolotolote. Iale au vadeu louale kemo auna nahie vaveve toela bahata nahi vama ke ulihage nahie uvu kena dua vai. ¹⁰Isi mesoho nahi loui kosea, “Noeau vaveve toela vaholilu.” Nahi katelahaliege kemo nahi Dilava lobohavoma. Ige hotove keu nahie uvumo uoholinu. Kosealemo keu loui avoe, “Ata bahataeau vaveve toela valu.”

2

Keliso keu nahie tedeavemale ata.

¹Di esea, di laheho ko hisaliai isiviholialeike la vaveve toela valiho. Isito ata oleni vaveve toela vage inutolotolote Iesu Kelisona avuho Dilava namihage au bae ata kemo kotae hoto loulivebene. ²Iesu hatiale kemo Dilavana nahie toela bahata ulihai. Iesu keu nahie toela unahaho hatiholinu. Isito vatae ata bahatae toela ibinahoike au hatinu.

³Iale nahiabuna Dilava menaka ehovaluege seleveta nahiabuna loui kosea, “Noeau Dilava ataea.” ⁴Ige mesoho ata moleu huhuai loui kosea, “Dau Dilava ata.” Isito keu Dilava menaka ehomaholiniege ata kateale keu loboe ata. Ata katealemo hoto selevelu uoholinu. ⁵⁻⁶Isito oleuoleu hotove evisi ehovale keau seleveta avuho isivilahalu. Iale oleuoleu Iesu vaveve nahate valiege abuna hilokage seleveta Dilavau abuhi ua.

Dilava atagamo uveve

⁷Di haokuvua, di hoto ko laheho hisaliale kou dogave holioholinu. Abu subuta ko loui la namigevege la eviale keike di tota ko hisaliana. ⁸Isito di hoto ko laheho hisaliale kou dogave. Iale ataeabuna Iesu vale ke evisi la vale ke elehai hilokage hoto kou selevelu. Iesu lohoge vavie vuvunue uoholisege ataga selevelu velemanu.

⁹Iale oleuoleu loui kosea, “Dau atagae ata.” Isito au haoka aiohavoale keu sohu vavimo ua. ¹⁰Isito oleuoleu au haokaho isiviai tedahoale keu atagamo ua. Katealemo vaveve keu bae au haokae evievi aiohavoge dobalivebene. ¹¹Isito oleuoleu au haoka aiohavoale keu sohu vavimo ua. Vavevevu vavi nahate nive bamuge au vaveve dua hilokaholisito vavimo timale nahate vama.

¹²Di esea, Dilavau Iesu ivimo la toela ulihaike vage di hoto ko laheho hisalianu. ¹³Kosivea, subuta ui lohemale Kosive ke la hilokaike vage di hoto ko laheho hisalianu. Isi malaha dogaea, la negolahai Setene vaveve ke haliohatuike vage di hoto ko laheho hisalianu.

¹⁴Di esea, laeau nahie Mama ke hilokaike vage di hoto ko laheho hisalianu. Kosivea, subuta ui lohemale Kosive ke la hilokaike vage di hoto ko laheho hisalianu. Isi malaha dogaea, la negolahage Dilava hotou la uvumo uge la Setene vaveve ke haliohatuike vage di hoto ko hisalianu.

¹⁵Lainaho vatae onobenobe huhulahai la uvu mai avuemo mavolive. Lana katealahaliege bae Dilavaho isivilahalivebene. ¹⁶Kosealemo onobenobe bahata keau vatae vaveve unaha. Iale ataeabuna vavae isivi vai nie toela vai abu ebika tabagevevi loui kosea, “Noeau ivitea.” Vaveve katealeau nahie Mamaemo lohoholilu. Isito vaveve keau bahata

vatae vaveve unaha. ¹⁷ Vatae onobenobe ataeau abuhō isivilahamale keabuna bahata uoholisi. Isito ata oleteau Dilava isivi vamale keabuna vani bahata ui tigei.

Keliso aiohavomale ata

¹⁸ Di esea, vanie gabiu vuguvuguanu. La subuta evige Keliso aiohavomale ata kena lohoi. Isito novae vani komo Keliso aiohavomale ata kateale moagaeau loholu. Kemoike nahi hilokage vanie gabiu vuguvuguanu. ¹⁹ Ata keau seleveta nahie ata holioholilu. Katealemoike keau nahie halevelu. Mesoho keau nahie ata holivagege keau nahehi ua. Isito keau nahie halevege nahi hilokage keau nahie ata seleve holioholilu.

²⁰ Isito laeau kateholilu. Kosealemo Munana Tumuteu laemo lohoge la bahata kemo hoto seleve evisi ehovalu. ²¹ La hoto seleve hilokai evisi ehovaike vage di laheho levaleva ko hisalianu. La hilokage hoto seleve kemo lobou uoholinu.

²² Isito lobeo atana loui kosea, "Iesu keu Dilava mo holioholinu." Iale ata keu Iesu aiohavomale ata. Keu kateai Iesuta Mamaveta kabebigeve aegevenu. ²³ Ata oleu Iesu kabebihavoi aehale keu Mamavetaike au ke kabebihavoi aehanu. Isito ata oleu Iesu hoto evisi ehomale keu Mamavetaike au ke ehomanu.

²⁴ Iale lainaho la vasohuta eviale ke momahavolive. Isito kemo negolahave. Lana kemo negolahaliege vani bahata Iesuta Mamaveluvutahi igaetolahi ugeve. ²⁵ Iesu biageu subuta ukolikoli nahioveve hoto ke lounu.

²⁶ Di laheho hoto ke hisaliai isiviale la hilokage lobeo ata keau isivilahale la malevege la lobeo evisi. ²⁷ Isito Iesuu au Munanae Tumu laheho hanavoge au la uvumo uale kemo ata keau bae la haivelivebene. Kosealemo Iesu Munanae Tumu keu hoto bahata la haiveale hoto keu lobeo hoto holioholisito hoto seleve. Iale Munana Tumue hoto ke evive. Ilive elike Iesuluvuta igaetolahi uve.

²⁸ Iale di esea, avuluvuta igaetolahi uve. Ilive vani mole au lohoge nahi bae matilahalivebene. Isito nahiabuna vudivemo negolahai lavisi. ²⁹ La hilokage Iesu keu inutolotolote. Iale oleuleu vaveve inutolotolote vamale keau Dilava esea.

3

Dilavau nahi malevei au ese toevenu.

¹ Di hoto ko louge evive. Nahie Mamau nahiho isiviale ke bato huhulahave. Isivive keu balugalemoike au nahi malevei au ese toevenu. Iale kemoike nahi eseve holilu. Ige vatae ataeau Dilava vaveve hilokaholiale kemoike nahie vaveveta abu hilokaholilu. ² Di uvue haokuvuia, nahi aike Dilava ese holilu. Isi nahi sohu nahi gabie uveve ke bahata hilokaholilu. Isito gabie au lohoge nahiabuna bae elehai vaveveve hilokai kemo bae avu nahate vai. ³ Iale oleuleu Iesu lohovege ke hemei umale keau abu uvu hoesegevege vavevebeu Iesu vaveve nahate vai duaveai.

⁴ Isito oleuleu vaveve toela vale keau Dilava hoto eguvalu. Vaveve toela vade vale keu Dilava menaka egumanu. ⁵ La hilokage Iesumo vavevebe toelau uoholinu. Iale kemo au vatae lohoale ataemo vavevebe toela ulihanu. ⁶ Iale oleuleu Iesuluvuta igaetolahi umale keau bae vani bahata vaveve toela valivebene. Isito oleuleu vani bahata vaveve toela vamale keau kemo luleleholisi Iesu hilokaholilu.

⁷ Di esea, ataeau lobeo hoto louge lainaho hotoeabe evilive. Ata oleu vaveve dua vamale ke vavevu inutolotoanu. Vaveve keu Iesu Keliso vavevu inutolotoale ke nahate. ⁸ Isito oleu vani bahata vaveve toela vamale keu Setene ata. Kosealemo Setene subuta mole vasohuta vaveve toela vai lohoale keu nova emo ke vai uma. Au kateilage Dilava mou lohoale Setene vaveve ke aiohavoi isiviale vuvuneve keu uoholisi.

⁹ Iale ata oleu Dilava ata holiale kei bae vaveve toela vagelivebene. Kosealemo keu Dilava ese holige Dilava vavevu avuemo ua. Iale au bae vaveve toela vagelivebene. ¹⁰ Isito nahi oleve kateai Dilava eseta Setene eseta hilokaevei. Ata olena vaveve dua vaholisi au haokaho isiviholisi tedahoholige kemo nahi hilokage keu Setene ese.

Moleho isivilahai mole tedaevive.

¹¹ Abu vasohuta tiale la haivege la eviale hoto keike ko. Nahi moleho isivilahai mole tedaevive. ¹² Subuta Keiniu vale ke nahate nahi va halevai. Keu Setene ata holisime au hoho hamanu. Keu vadealemoike au hoho hamage au hatinu. Kosealemo hohove vaveve keu duave. Isito eu vamale keu toelanu. Kemoike au hovelahai au hoho hamanu.

¹³ Iale di haokuvuia, vatae ataeau katelahai laheho itumuai la aiovegege lainaho ke elehai vikolahalive. ¹⁴ Nahi subuta katelahai mole aiogevema. Isito nahi aike nahie haokuvuho isivilahai tedaevemale kemo nahi hilokage nahi hatihatie humaha ke halevai ukolikolie humahala tima. Isito ata oleu au haokaho isiviholisi tedahoholiale keu sohu hatihatie humahala tima. ¹⁵ Isi ata oleu au haokaho itumuai aiohavomale keu ata hamale ke nahate. Iale la hilokage ata havemale keu bae ukolikoli malivebene. ¹⁶ Nahi moleho

isivilahai mole tedaevemale vaveve ke hilokalu. Iesu Kelisou nahiho isiviai nahiho hatiale kemoike nahi vaveve ke hilokalu. Iale nahita Iesu vaveve ke nahate vai nahie haokuvuho isivilahai tedaevege duave. ¹⁷ Isito mesoho kunaite ata oleu au haoka elehage keu kunaiholige au avuho uvuholisi tedahoho isiviholige keu toelanu. Vaveve katealemo ata kena oleve kateai loui kosea, “Di di uvu mai Dilava ominu.” ¹⁸ Di esea, nahi moleho isivilahamale kemo hoto unaha lou halevai. Isito nahi mole tedaevei kunai mole ovei kemo hilokage seleveta nahiau moleho isivilahalu.

Dilava nimo negolahai lavive.

¹⁹ Vaveve katealemoike nahi hilokage nahie vaveve keu seleve. Iale nahiabuna Dilava nimo vabuholisito negolahai lavisi. ²⁰ Isito mesoho nahi huhuige nahie vaveve Dilava nimo egelegeleholige Dilavaike nahi vamale ke bahata hilokanu. Iale auna nahie uvu hoesegevei negotivei. ²¹ Di haokuvuia, mesoho nahie uvuu kateale huhu moagaholige nahiabuna vabuholisito Dilava nimo negolahai lavisi. ²² Nahiabuna mai vahaehotisi menakave ehovai isivive ke valiege nahi vadeuho imihale ke auna nahiovei. ²³ Menaka kosealeike au nahiho lounu. Au isiviale nahi nahie uvu mai move Iesu Keliso kemo mavoi Iesuu nahi namigeveale ke nahate vai moleho isivilahai mole tedaevei. ²⁴ Oleuoleu Dilava menaka ke evisi vale keau Dilavaluvuta igaetoalu. Ige Dilavau abuhi ua. Dilavau au Munanae Tumu nahioveale kemo nahi hilokage Dilavau nahehi ua.

4

Oleve kateai loboe beloveda hilokaevei.

¹ Di uvue haokuvuia, loboe beloveda moagaeau vata bahatae tilu. Iale abu lae lohohi loui kosea, “Dilava Munanae Tumuu noemo holomaikae vage no hotove louma.” Abu kateai louge lainaho solekai hotoeabe evilive. Isito vasohuta nenilahai vaveveabe ke kaovage keau seleveta Dilava Munanae Tumu malelu. Mena Munanae toela malelu. ² Lana oleve kateai hilokage munana keu Dilava Munanae Tumu. Emena Setene munanae toela. Kosealemo ata oleuoleu negoai loui kosea, “Iesu Kelisou lohoale ata holinu.” Hoto kateale louale keau Dilava Munanae Tumu malelu. ³ Isito ata oleuoleu loui kosea, “Dilava mo Iesu Kelisou lohoale ata seleve holioholisito munana unaha.” Hoto kateale louale kebiau Dilava Munanae Tumu maleholilu. Isito Iesu Keliso aiohavomale kosive kemoike abu vuvune malelu. La subuta evige vaveve toela katealena vatae lohohi. Iale vaveve keike ke lohohu.

⁴ Isito di esea, laeau Dilava ataea. Iale lana loboe beloveda kebia tatoleveve. Kosealemo Dilava Munanae Tumuu la uvumo uale keu vuvuneai ua. Iale vuvuneve kena vatae kosive ke vuvune evihai. ⁵ Ata keau vatae ataea. Iale keau vatae vaveve ehovai vatae hoto louge vatae ataeau hotoeabe ke evisi ehovema. ⁶ Isito nahiau Dilava ataea. Iale oleuoleu Dilava hoto evisi ehovale keabuna nahie hoto ke evisi. Isito oleuoleu Dilava ata holioholiale keau bae nahie hoto evilivebene. Vaveve katealemo nahiabuna hilokage oleteau nahie hoto eviale keau Munanae Tumu malelu. Isito oleteau nahie hoto evioholiale keau loboe ataea.

Isivie vaveve keu Dilavamo lohohu.

⁷ Di uvue haokuvuia, nahi moleho isivilahai mole tedaevei. Kosealemo isivie vaveve keu Dilavamo lohohu. Iale oleuoleu ataho isiviai tedaevemale keau Dilava ese holievei Dilava hilokalu. ⁸ Isito olemeau ataho isiviholimale keau Dilava vaveve ke hilokaholilu. Kosealemo moleho isiviamale ke biageike Dilava. ⁹ Dilavau au uvue mo igae ke hanavoi isiviale nahi kemo ukolikoli malei hilokage au nahiho isiviale keu baluga. ¹⁰ Nahi Dilavaho isiviale keu baluga holioholinu. Isito Dilavau vasohuta nahiho isiviai au mo hanavoge au lohoale hatisi nahie toela ulihale kemo nahi hilokage isivive keu nahiho balugataho.

¹¹ Di uvue haokuvuia, Dilavau kateai nahiho isivi balugage nahi nahita moleho isivilahai mole tedaevei. ¹² Atabeu Dilava elehaholinu. Isito nahiabuna moleho isivilahai mole tedaevege Dilavana nahehi ui. Ige isivive kena nahie uvumo balugai tigei.

¹³ Dilavau au Munanae Tumu nahioveale vaveve kemoike nahi hilokage nahi Dilavaluvuta igaetolahalu. Ige Dilavau nahehi ua. ¹⁴ Iale Dilavau au mo hanavoge no move elehai hotove loui ata haivei kosea, “Iesu keu vatae ata maleveale Kosive.”

¹⁵ Iale oleuoleu negoai loui kosea, “Iesu keu Dilava mo.” Ige Dilavana kebiahi ui. Ige abuna abuta Dilavaluvuta igaetolahai. ¹⁶ Ige nahita Dilavau nahiho isivi balugale ke nahi hilokalu. Moleho isiviamale ke biageike Dilava. Iale oleuoleu isivi vaveve vamale keau Dilavaluvuta igaetolahalu. Ige Dilavata abuhi uma. ¹⁷ Nahi vata komo Iesu vaveve ke nahate vai moleho isivilahai mole tedaeveale vaveve keu balugai tige Dilavae kotae vani

kela nahi bae vabulahalivebene. ¹⁸ Nahi Dilava isivi omisi kemo negolahaliege nahi bae itumuve kemo vabulahalivebene. Isito nahiaabuna vabulahaliege Dilava itumu malei. Kosealemo oleuoleu itumuve ke vabuhavoale keau isivi Dilava omisi kemo negoholilu.

¹⁹ Dilavau vasohuta nahiho isiviai nahie tedaevaele kemoike nahita moleho isivilahai mole tedaevema. ²⁰ Isito mesoho ata moleu loui kosea, “Di isivi Dilava ominu.” Au kateai louito au haokaho itumuai aiohavoale keu lobeo ata. Kosealemo keu au haoka elehale kemo isivi omiveve keu toloige auna oleve kateai Dilavau elehavesite ke isivi omisi. ²¹ Katealemoike Iesuu menaka ko mai nahiovei avoe, “Oleuoleu isiviai Dilava isivi omiliege abu abu haokuvutaho isivilahai kebia tedaevei.”

5

Oleve kateai vatae vaveve ke evihai.

¹ Oleuoleu loui kosea, “Iesu keu ata tedaevemale kosive.” Keau hoto kateai loui abu uvu mai avuemo mavoale ata keau Dilava esea. Isi oleuoleu Dilavahai isiviale keabuna esabe kebiataho isivilahai. ² Nahi Dilavaho isiviai isivive vai menakave ehovale kemoike nahi hilokage nahi Dilava ataho isivilahalu. ³ Nahi Dilavaho isiviamale kemo nahi menakave ehovage menakave keau nahiemoto toloholilu. ⁴ Kosealemo Dilava ese bahata keabuna vatae vaveve evihai. Nahiaabuna oleve kateai vatae vaveve ke evihai. Kosealemo nahiaabuna nahie evievimo negolahaliege ke evihai. ⁵ Oleuoleu abu uvu mai Iesuemo mavoi loui kosea, “Iesu keu Dilava mo.” Hoto kateale louale ke unahaeabuna vatae vaveve ke evihai.

Vaveve abuita igaeta

⁶ Iesu Keliso keike dobai lohoale babatisoai hatige tahoveu lotinu. Keu babatiso unahaho lohoholisito hatitahoike au lohonu. Munanae Tumuu nahie uvumo ui hoto seleve loumale kemo nahi hilokage au Iesu vaveve loui nahie haiveale keu seleve. ⁷ Nahi hilokage Dilava, moe, munanave tumu otogoe umale abuita igaeta keau Iesu vavevemo hoto igae louma. ⁸ Isi vatamo hoto abuita igaeta kobiamo nahi hilokage Iesu keu Dilava mo. Munanae Tumuu nahie uvumo louale, au babatisoage hotou otogomo lohoale isi au hatige hotou otogomo lohoale vaveve abuita igaeta kebiamo vaveve kebiau igae. ⁹ Iale vaveve kebiamo nahi hilokage Dilavau au moe vaveve louale keu seleve. Atea hoto louale ke nahiaabuna evisi. Isito Dilavau hoto loui au moe vaveve louale keu atae hoto ke evihanu. ¹⁰⁻¹¹ Iale oleuoleu abu uvu mai Dilava mo kemo mavoale keu hilokage Dilavau louale hoto keu seleve. Isito oleuoleu Dilava hoto ke maholiale keau Dilava lobohavolu. Kosealemo Dilavau hoto loui au moe vaveve louale kemo au moemo uveve doga nahiovenu. ¹² Iale oleuoleu abu uvu mai movemo mavoale keau uveve doga malelu. Isito oleuoleu abu uvu mai Dilava momo mavoholiale keau bae uveve doga malelivebene.

Dilavau uveve doga laovenu.

¹³ Di hoto ko bahata laheho hisaliai isivialeike la la uvu mai Dilava moemo mavoale kemo la hilokage seleveta Dilavau uveve doga laovenu. ¹⁴ Iale nahi hilokage nahiaabuna dolodoloholisito negolahai isivivemo imihage auna nahie hoto evisi. ¹⁵ Nahi vani bahata guliguliasage au ke evima. Iale kemo nahi hilokage nahi vadehu imihale ke auna nahiovei.

¹⁶ Iale mesoho ata moleu au haoka elehage haokaveu vaveve toela vage au keho Dilava imihai. Ige elike Dilavau tedahoi uveve doga omisi. Isito haokaveu vaveve toela baluga vai keho mole holige ukolikolie vaveve avuemo anekiage aulako avuho guligulialive. ¹⁷ Vaveve toela bahata vamale keau Dilava nimo toelalu. Isito vaveve toela degomoleau bae la malevei hatihati humahae talivebene. Kosealemo nahi Iesu namihage au kebia ulihage nahiaabuna kemo ukolikoli malei.

¹⁸ Nahi hilokage Dilava esea bae negobedai vaveve toela vagelivebene. Kosealemo Dilava mo Iesuu kebia tedaevei nalieveale kemo Seteneu bae kebia malevei aiogevelivebene.

¹⁹ Halege vatae ata bahataeau Setene vuvunemo ua. Isito nahi hilokage nahiau Dilava ataea.

²⁰ Nahi hilokage Dilava mou lohoale lulele nahiovenu. Iale kemo nahi hilokage Dilava igae keu seleve. Ige nahi avuta move Iesu Kelisoluvuta igaetolahalu. Move keu Dilava. Ke igaemo ukolikoliu ua.

²¹ Di esea, di hotoe gabi louge evive. Lobeo dilava kebiamo la ebika nenigevei ue dua vave.

2 Dioni

Dioniu tota hisaliale

¹ Ekalesia nalievemale kosive dalike levaleva ko aho hisalianu. Dilavau a ebagemage a evievi keate holinu. Kemoike di ata a esetaho isivi selevealemoike laheho ko hisaliai hanavoma. Da igae laheho ko hanavoholinu. Isito hoto seleve evisi ehovamale kebiataike laheho abu vahaeho hoto ko hanavoma. ² Kosealemo hoto seleveu nahehi uale keu bae gabialivebene. Isito kena vani bahata nahiemu ugei.

³ Iale di isiviale nahie Mama Dilavau au mo Iesu Kelisoti nahie huhuevei hoesegevei nahihu uvulahai nahi tetaevei uveve dua nahiovei. Ige nahi kemo hoto seleve mai moleho isivilahai mole tetaevei.

Loboe ata kebia vaveve

⁴ Di evige a ese degomoleau hoto seleve ke evisi vama. Nahie Mamau menaka nahioveale ke abu vage di ke evisi vahaehoanu. ⁵ Iale di haoka, di ko hisaliai isiviale nahi bahata moleho isivilahai. Menaka kou hotoe doga holioholinu. Isito abu vasohuta nahi namigevege nahi eviale hoto keike ko. ⁶ Moleho isivilahai mole tetaevemale ke ihuu koseanu. Nahi Dilava isivi vai au louale ke nahate vai. La subuta eviale menakave keu loui avoe, “Vani bahata ui moleho isivilahai mole tetaevegeve.” Iale ke nahate vai negolahave.

⁷ Kosealemo loboe ata moagaeau vata bahatae tilu. Keau ata lobogevei loui avoe, “Iesu Keliso keu ata holioholinu.” Loboe hoto kateale louale ata keau Iesu aiohavomale ataea. ⁸ Katealemo la ebika nenigeveve. Onoilata ata kebia hoto evisi la lolilahamale ke ibina maleholima. Isito lana la ebika nenigeveliege la ibina bahata maleve.

⁹ Iale oleuoleu Iesu Keliso hoto evisito tatavemo abu isivie hoto loulale keau bae Dilavaluvuta igaetolahalivebene. Isito oleuoleu hotove evisi ehovale keabuna Dilavata movetahi igaetolahai. ¹⁰ Iale mesoho ata oleu lae loholive Iesu hoto louholisito loboe hoto louge lainaho ke mai o hatui loui kosea, “Dilavana bae a tetahoi.” ¹¹ Kosealemo olena loboe ata kemo hoto kateale louniege auna ke esemu holisi vaveveve toela ke nahate vai.

Hotoe gabi

¹² Di isiviale laheho hoto degomoleta loui. Isito di isiviholialeike levaleva komo hoto bahata loulaho. Vani mole di lae ohanoi lohoge nahi bae molehi hotohotolahai bae kemo vahaeho balugai.

¹³ A uvue tatae eseau kove umale keau abu vahaeho hoto aho hanavoi loui avoe, “Ana duave.” Di hotou kemo kateai ua.

3 Dioni

Dioniu Gaiasiho hisaliale

¹ Giasi, ekalesia nalievemale kosive dalike ko. Di di uvu bahata mai aemo mamoaale kemo di aho levaleva ko hisalianu.

² Di haoka, di hilokage a uvu keu duave. Iale di Dilava imihai isivialeike a uveve bahata keau duaveai. ³ Evievi ata degomoleau deiai lohoale daho a vaveve loui di namihai avoe, “Keu vani bahata au evievimo negoai hoto seleve ke evisi ehomama.” Ige di ke evisi vahaeho baluganu. ⁴ Di hotobe evisi vahaeho kateale vaholinu. Isito di ese laeau hoto seleve ehovamale kemoike di vahaeho balugatahoanu.

Gaiasiu ekalesia tedeave dua vanu.

⁵ Di uvue haoka, a keu Dilava lovi kemo lovie dua vama. Imale evievi ata a hilokaeveholimale keau ae deiai lohoge a kebia malevei o hatuevema. ⁶ Iale ata keau lohoale a vaveve dua ke loui di namihai ekalesia kobiata namigevelu. Iale di isiviale a tota kebia tedeavege abu tota abu lovi ke vai tai. Ige elike Dilavau ke elehai vahaehoai. ⁷ Kosealemo keau Dilava lovilike abu ke vai olahama. Iale keau isiviholialeike evievi ata holioholiale keau kebia tedeaveho. ⁸ Iale evievi ata nahiau ata katealebia tedeavege duave. Kemoike nahi kebiahi igaetoai Dilava lovi ke vai.

Malaha nimolete abuata

⁹ Di levaleva mole hisaliai a umale ekalesia ata kebiaho hanavonu. Isito Daiotolobiu di hoto ke evioholisi au ebika ebagemai isiviale ekalesia ata kebia nalievei. ¹⁰ Iale dana lohoniege bae au onole vale ke laheho loui. Isi hotoe toela loui noemo loboe hoto louale keta dana bae laheho loui. Keu kateale unaha vaholinu. Isito evievi ataeau avue deiai lohoge au bae kebia malevei o hatuevelivebene. Au kateige ekalesia ata degomoleau isiviale kebia malevei o hatuevei. Isito au kebia bamuevei iovei isiviholiale abu ekalesialiho.

¹¹ Iale di uvue haoka, ainaha vaveve toela kateale vagelive. Isito vaveve dua unaha vagenela. Kosealemo ata oleu vaveve dua vamale keu Dilava ata. Isito ata oleu vaveve toela vamale keu Dilava ata holioholinu.

¹² Isege Demitiasi keu vaveve dua vamale ata. Ige ata bahateau moleho loui avoe, “Keu atae dua.” Kosealemo keau hilokage keu hoto seleve ehomamale ata. Ige nota hilokage keu atae dua. Iale la hilokage no loboholisito hoto seleveike no ke loulu.

Hotoe gabi

¹³ Di isiviale laheho hoto degomoleta loui. Isito di isiviholialeike levaleva komo hoto bahata louliho. ¹⁴ Isito di isiviale solekai lae ohanoi lohoge nahi bae molehi hotohotolahai.

¹⁵ Di isiviale ue dua vanela. A haokuvu bahata kove umale keau aho loui avoe, “Ana duave.” Iale no hoto ko loui keve no haokuvu bahata kebiaho loui kosea, “Lana duave.” Di hotou kemo kateai ua.

Diudi

Diuidu ekalesiaho hisialiale

¹ Dau Diemisi hoho Diudi. Iesu Keliso lovi vamale ata da. Iale Dilavau la hohaveale lahehoike di levaleva ko hisialiamā. Di hilokage nahie Mama Dilava keu laheho isiviage Iesu Kelisou la nalievema.

² Iale di isiviale Dilavau laheho uvuai uveve dua laovei au uvu laoveale kemo ui tigeve.

Loboe ata

³ Di uvue haokuvuia, Dilavau nahi maleveveve hoto ke di vasohuta huhuai isiviale ke hisialiai la haivei. Isito dana ke halei hoto mole loui la haivei. Hoto keu koseanu. Dilavau tava igae hoto seleve mai au ata oveale ke di isiviale la kemo negolahai loboe hoto loulmale kebiamo la ebika nenigevei. ⁴ Kosealemo ata degomoleau Dilava hilokaholiale keau tobekatobekai lohoale isiviale la lobogevei. Abu loui avoe, “Dilavau au isivi mai nahioveale kemo nahiabuna nahie isivi unaha vagei.” Hoto katealemoike abu abu vavae isivi vaime nahie baluga Iesu Keliso ke vovohoma. Subuta mole Bukae Hotou loui avoe, “Dilavana ata katealebia aioegevei.”

⁵ Katealemo di isiviale Bukae Hotomo deiada mole loui la haivei. La ke hilokaito mesoho momahavolu. Subuta mole Kosiveu Iselala ata tedaevege abu bahata Egubito vata ke halevalu. Iilale vani mole degomoleau abu evievimo negoholisito Dilava halevage au kebia havenu. ⁶ Isi hoto mole kota huhulahave. Dilavau vuvune malei anelu ovei ehue otovenu. Iale degomoleau Dilava isivi ke kabebihavoi halevalu. Abu kateale vage ataeau seimita ata umudigeveale ke nahate vai umudivei malei Seteneu umale matamae loe otovenu. Ige abu keve uale Dilava vani balugana lohoge auna vaveveabe kaovei aioegevei. ⁷ Isi o abui Sodoma, Gomola kebia huhueveve. O kebiamo umale isi vavaeabemo o degomolebia keau teibalahama. Malahaeau molehi ladevei vaveve toela molehi vama. Ige keateau molehi ladevei vaveve toela molehi vama. Abu kateale valage Dilavau ibinaeabe ovei veneta mahoevenu. Iale vaveve keu nahie haivege nahi hilokage vaveve toela kateale vamalebia Dilavana veneu hodovavesitimo mahoevege abuna uoholisi.

⁸ Vaveve ke nahate loboe ata nehe keau tababulahi kemo loui avoe, “No tababumo elehale keu Dilava vaveveike.” Kateai abu vavamō vaveve toela vai abu vava aiogevema. Isi Dilava ivi ke behavoi avoe, “Dilava vuvune keu negoholinu.” Isi katelahi otogoe umale kebiaho hotoe toela louma. ⁹ Abu katelahi anelu kosive mole Maikolo keu kateholinu. Keu subuta Mosese vava maliho Seteneti moleho loulu. Ige Maikolou avuho hotoe toela louholisito namihai avoe, “Halege Kosiveu bae a vaveve loui.” Maikolou hoto kateale loui hilokage Dilavana ibinave omisi. ¹⁰ Isito loboe ata neheau abu onobenobe hilokaevoholiale kebia abuna hehavei kebiamo hotoe toela lougei. Isi ovō vaveve nahate vai abu isivi unaha vai abu ebia aioegevei. ¹¹ Iale ata kebia nohovu. Keau Keiniu au hoho aiohavoale ke nahate vama. Isi Baelamuu moni maleho isivi balugai vaveve toela vale ke nahate ata keau vama. Isi Kolau Dilava hoto kabebihavoi au isivi unaha vamale ke nahate tola vama. Keau kateale vamalemo Dilavana aioegevei. ¹² Kebia vaveve keu koseanu. Ekalesia laeau vahaehoe lovi ke vasege ata keau lohoi lahehi igaetolahale keau momolu nahate. Keau lovi malei mole oveholisito abu unaha lovi ke ima. Vaveveabe keu goe nahate. Helukana lohoi goe ke mai tige veniu bae loholivebene. Keau idiau hahuivoholiale ke nahate. Ataeau idi kebia tohoevi malei hatuge abu gillalahale ke nahate. ¹³ Isi keau davalau vealohoi onobenobe momolu malei lohoi esagae keohale ke nahate. Iale ata kebia matie vaveve momolu kebia nahate. Isi keau didiau lotimale kebia nahate. Vaveve katealeau nahie haivege nahi hilokage Dilavau kebiaho matamae lo mamōale keve abuna vani bahata ugei.

¹⁴ Adamu haokae haokaike Inoka. Iale subuta mole Inoka keu loboe ata nehe kebiamo loui avoe, “Evide. Kosivena gabie au anelu moagamoaga holoevei lohoi. ¹⁵ Auna lohoniage vatae ata bahatae vaveve kaovei. Ige Dilava hilokaholiale keau vaveve toela vai hotoe toela loui Dilava ivi aiohavomale kebia vaveve auna kaovei ibinaeabe ovei.” ¹⁶ Loboe ata keau vani bahata molehi ugologoloi molemo hoto bibovama. Isime abu ebia tabagevei abu isivi unaha vama. Isiviale ata degomole sovavigevege abu kebia isivi unaha vagei.

La ebia nenigeveve.

¹⁷ Di uvue haokuvuia, nahie Kosive Iesu Keliso ke esemuiā subuta hoto onole louale ke huhulahave. ¹⁸ Abu la haivei loui avoe, “Vanie gabina lohoge ata degomoleabuna

hovedevei la hehavei atae vaveve toela unaha vagei.”¹⁹ Ata keabuna la tasaligevege lana molehi ugologoloave. Kosealemo Munana Tumuteu abuemo uoholialemoike abu abu vavae isivi unaha varna.²⁰ Iale di uvue haokuvuia, la ebia hoesegevegi la evievi kemo negolahai Munanae Tumu ke vuvunemo noinoiave.²¹ Dilavau au uvu laoveale ke huhulahai la uvu mai avuemo mavove. Isi hemei ulive nahie Kosive Iesu Keliso kena laheho uvuai ukolikoli laovei.

²² Isi ata degomoleau dolodololahamale kebiaho uvulahai haiveve.²³ Isi ata degomoleau vaveve toelae humahala timale kebia malevei lohoi haivege elike Dilavau ukolikoli ovei. Isi ata degomoleau vaveve toela baluga vale kebiaho uvulahai haiveve. Isito vaveveabe toela kebia vabugevegi halioveve.

Hotoe gabi

²⁴ Di hotoe gabi louge evive. Dilava igae negote kena la la vaveve toelamo dobuluviveve kemo la nalievei la vaveve toela ulihai la malevei ehue tige lana atagavemo ui vahae-holahave.²⁵ Dilava keu Dilava igae. Iale Dilava ke igaemoike ataga, ivi baluga, nego, vuvune keau ua. Keau subuta avuemo ui lohoale aike ui tiale abuna vani bahata ugei. Iale keike nahie Kosive Iesu Keliso hanavoge au lohoale vaveve toelamo nahi malevenu. Hoto seleveike.

ABOKALUBO

Iesu vaveve nimoleteau novae vanimo velehovoveve

¹ Buka komo vaveve degomoleau hogodeveale ke Dilavau Iesu Keliso namihage au anelu mole hanavoge au gabie vaveve loui di namihai avoe, “Vaveve keau solekai lohoma. Iale di isiviale a Dilava ata kebia haivei.” ² Dau di ivilike Dioni. Iale di onole elehai eviale ke dana hisialiai la haivege lana Dilava hoto evisi Iesu Kelisou louale keta evive. ³ Olena atae vudimo hoto ko dodaveniege auna vahaehoai. Ige oleuoleu hoto ko evisi vale keabuna vahaeholohai. Kosealemo buka komo onole hisialiale keu aike lohoma.

Dubu seveni (7) kebiaho vahaehoe hoto

⁴ Dioni dailike levaleva ko hisialiai Esia vatae dubu seveni (7) laheho hanavonu. Di isiviale Dilavau la huhuevei la hoesegevege lana kemo ue dua vave. Dilava keu subuta ui aike ua. Isi auna bae lohoi. Munanae tumu seveni (7) keau Dilava telonae vavamo umale keau bahata la hoesegevei abu uvu laovei la tedaevema. ⁵ Ige Iesuta ke nahate vama. Iesu keu Dilava hotomo negoai ata haive dua vama. Isi keu hatihatimo hovelahale ke ovokina. Iale keu vatae kosive bahata evigevnu. Keu nahiho isiviai au uvu nahiovei nahiho hatinu. Isi kemo nahie vaveve toelamo nahi malevenu. ⁶ Keu nahi malevege nahiabuna dubumo lovilahamale ata kebia nahate vai Mamave lovi vai. Iesu Keliso keu ata negote isi vuvunete. Iale auna vani bahata ui ata nalievegei. Katealemo nahi vani bahata ivive hoesehavoge. Hoto seleveike ke.

⁷ Evive. Iesuna goemo dobai lohoge ata bahatae abuna elehai. Isi mai hamale kebiataeabuna elehai. Ige vatamo ata bahataeabuna elehai vabulalahi ninalahai. Iale di louale kona seleve holisi. ⁸ Nahie Kosive keu vuvunete ata. Keu subuta ui aike ui lohoma ata. Iale auna bae lohoi. Keu loui avoe, “Dau onobenobe bahatae umuka. Daemo vaveve bahatau lohoale abuna tota daemo vesuai.

Dioniu Keliso elehale deiada

⁹ Di haokuvuia, Iesu Keliso kemo nahi uvu igaeai ataeau Dilava adae vuvunemo uveve hoto loui ata haivege ataeabuna vatehani nahiovei. Iale nahi ke kabebi halevaito kemo negolohai ui. Di data Dilava hoto loui ata haivei kosea, “Iesu keu Dilava mo.” Ige abu kemo di mai e vigoe vata mole Batamosi keve mavoge di ua. ¹⁰ Iniale Kosive vanimo Munana Tumuteu lohoale di mai vuvunete di hoto mole isute evinu. Hoto keu kibi uvuale ke nahate di iae lohonu. ¹¹ Keu loui avoe, “A onole elehaniege ke hisialiai dubu seveni (7) kobiaho hanavonela. Dubu moleu Evesasi o kemo ua. Ige moleu Simina o kemo ua. Ige moleu Begamosi o kemo ua. Ige moleu Taiatila o kemo ua. Ige moleu Sadisi o kemo ua. Ige moleu Bildevia o kemo ua. Ige moleu Laodesia o kemo ua.”

¹² Katege di hoilalahi isiviai daho loulale ke elehai. Isi hoilalahi elehage hati seveni (7) golota vale keau atagai ua. ¹³ Iale kebia vigomo ata moleu Atae Ese ke nahateu ogoe dua egete hatui golota beleta vale mai au ivuka umuvaleta lamisi ua. ¹⁴ Ige kinaveu taeale goe nahate. Ige niveu atagale vene vedodo ke nahate. ¹⁵ Ige veloveu atagale keu abu auli mai venemo mahoge tahoai levolevoale ke nahate. Ige hotoveu eavu balugau egumai luluale ke nahate. ¹⁶ Ige adave inute keve didi seveniau (7) ua. Ige siga mole vaki mole isi vaki moleau iniale keu aivemo lohonu. Ige niveu atagale vanie vigomo vaniu halui atagale ke nahate. ¹⁷ Keu katege di elehai velovemo dobai ataeu hatiale ke nahate vai ua. Ige au au ada inute mai di tatamo mamoi di namihai avoe, “Vabu hale. Dau vasohuta ui gabie umale ke Kosive. ¹⁸ Dau gibosoune. Di hatisi kemo hovelahanu. Iale di bae tota hatilivebene. Isito dana vani bahata ugei. Dau hatihati isi odavae matama ke vuvune manu. Iale dana isivianiege udaha alavoi mesoho bamui. ¹⁹ Iale vabu haleito a onole elehale ke hisalianela. Isi aike vaveve gabie vaveve kebiata hisalivenela. ²⁰ Isito a aike elehale ihuve keu koseanu. Hati seveni (7) golota vale keau dubu seveni (7). Ige didi seveni (7) di adamo uale keau dubu nalievemente anelu seveni (7).”

2

Evesasi ekalesiaho hoto

¹ Kosiveu hatie vigomo lamiale keu tota Dioni namihai avoe, “Evesasi dubu nalimale keho levaleva hisialiai di hoto koseale lou. Loui kosea, “Ata moleu didi seveni (7) au ada inuteve matagevei hati seveni (7) kebia vigomo ohanomale keu loui avoe, ² “Di la vaveve dua vamale ke hilokanu. Di hilokage la di lovimo kabebiholisito negolohai vama. Isi atae toela kebia halevege keau lahehi uoholilu. Keau isiviale la lobogevui loui kosea,

‘Noeau Iesu abostoloea.’ Ige la vaveveabe ke abuemo kaovai elehage keau loboee ataea. ³Iale di hilokage laeau negolahai di lovi vale kemo vatehani maleito lovi ke halevaholilu. Keu vaveve duaike. ⁴Isito di hoto mole louge evive. Laeau vaveve toela igae vale keu koseanu. La subuta daho isiviale keu baluga. Isito aike keu eseveanu. ⁵La vasohuta vale ke huhulahave. Laeau vaveve kemo dobuluvilu. Iale vaveve toela ke halevai la vasohuta vale ke tota vave. Lana ke vaholige dana lae lohoniege la hati ke ehodovai. Ige la dubu kena uoholisi. ⁶Isito la vaveve mole igae vale keu duave. Laeau Nikolaita atae vaveve toela keho isiviholilu. Ige data keho isiviholinu.

⁷“Iale la oleuteau hoto evimaleau Munanae Tumuu ekalesiaho louale hoto ko evive. Keu loui avoe, ‘Oleuoleu abu evievimo negolahaliege dana louge abuna ukolikolie idi moleu Dilava bulumo lamiale ke bai isi.’”

Simina ekalesiaho hoto

⁸ Kosive keu tota Dioni namihai avoe, “Simina dubu nalimale keho levaleva mole hisaliai kosea, “Kosiveu loui avoe, Dau vasohuta ui gabie umale Kosive. Dau hatihatimo hovelahale ata. ⁹Iale di hilokage la vatehani malema. Isi vatae kunaioholilu. Isito laeau otogoe kunai kemo balugalu. Di hilokage Diue ata degomoleau la namigevei avoe, ‘Dilavau no tabagevale Diue ata seleve noeabulike ko. Isito la keau vaveve toela vamale ata.’ Abu kateai louito keau Diue ata seleve holioholilu. Abu huhulahai kosea, ‘No Dilava ehovama.’ Isito keau Setene vaveve ke ehovama. ¹⁰Iale vatehanu laemo lohoveve kemo lainaho vabulahalive. Di louge evive. Setenena la malevei dibulae otovei isiviale la evievi hilokage la negolahalu. Emena negoholilu. Ige lana vani ada abuita ke uvumo keve ui la evievimo negolahai di huhulahaliege mesoho haluvige dana ukolikolie hanogo malei laovei.

¹¹“Iale la oleuoleu hoto evimaleau Munanae Tumuu ekalesiaho louale hoto ko evive. Oleuoleu abu evievimo negolahamale keau bae veneu hodovavesite kemo vatehani malelivebene.”

Begamosi ekalesiaho hoto

¹² Kosiveu tota Dioni namihai avoe, “Begamosi dubu nalimale keho levaleva mole hisaliai kosea, “Ata moleu siga mole vaki mole isi vaki moleau iniale ke matahale keu hoto koseale lounu. ¹³Au avoe, Di la umale matama ke hilokanu. Keu Seteneu au ebikaho ata malevei nibievemale matama. Isito laeau di huhulahai la evievi kemo negolahalu. Ilage vani mole di evievi ata Atibasi keu di hoto loui ata haivelage Setene atae toela keau ke hamalu. Ige laeau ke elehai la evievi ke halevaholisito kemo negolahalu. Laeau vaveve kateale vale keu duave. ¹⁴Isito la vaveve degomole vale keho di isiviholinu. La degomoleau Baelamu hoto ke evisi au subuta vale ke nahate vama. Subuta mole Baelamu keu ata mole Balaki ke haivuge au tiale Diue ata kebia havei aiogevege abu vaveve toela valu. Vaveve toela vale keu koseanu. Abu lovi malei loboee dilava hoesehavomale ke malei isi mole keatehi ladevelu. ¹⁵Iale la degomoleau abu subuta vamale ke nahate vama. Laeau atae toela degomole ivi Nikolaita kebia hoto evisi ehovalu. ¹⁶Iale la vaveve toela ke halevave. Lana kemo hoideveholige dana solekai lohoniege di aimo siga initeu lohoale keta atae toela kebia havei aiogevei.

¹⁷“Iale la olemeau hoto evimaleau Munanae Tumuu ekalesia ataho louale hoto ko evive. Keu loui avoe, ‘Oleuoleu abu evievimo negolahalage dana otogoe lovi mole ivi mana ke malei ovei. Isi mune taete malei iaegae ovei. Mune kemo ivie doga ua. Atabeu bae ivi ke hilokalivebene. Isito male ke igaena ke hilokai.’”

Taiataila ekalesiaho hoto

¹⁸ Kosiveu tota Dioni namihai avoe, “Taiataila dubu nalimale keho levaleva mole hisaliai kosea, “Ata mole igae nive keu vene vedodo ke nahate. Ige veloveu atagale keu auli mai venemo mahoge tahoai levolevoale ke nahate. Iale ata keu Dilava moike. Hotove keu koseanu. ¹⁹Avoe, Di la onole vamale ke hilokanu. Di hilokage laeau la evievi kemo negolahai moleho isivilahai mole tedeavei vatehani kemo negobedalahama. Di hilokage la subuta vale keu duave. Isito la aike vamale keu la subuta vale ke evihanu. ²⁰Isito la vaveve mole igae vale keho di isiviholinu. Vaveve keu koseanu. Keate mole Diesebele la ke nimo tahoige au au ebika ebagemai loui avoe, ‘Dau Dilava hoto loumale keate.’ Isi kateai di esemu malevei lobogevege abu mole keatehi ladevei loboee dilava hoesehavomale lovi ke ima. ²¹Di hemei ui isiviale keate keu vaveve toela ke halei. Isito keu isiviholisi negobedai ke vama. ²²Iale di louge evive. Dana keate ke mai oleuoleu avuluvuta ladevemale kebia malevei vatehani baluga ovei. Abuna vaveve toela ke halevaholige dana ke vai. ²³Isi keate ke ehovamale kebiata dana havei. Ige elike

ekalesia ata bahataeau hilokage dau atae uvu hilokai huhuihuhuiabe ke hilokamale ata. Iale dana la onole vamale ke ibina igaegaai laovei.

²⁴ “Di hilokage la degomoleau Taiataila keve uale keate ke hoto evisi ehovaholilu. Keate ke ehovamaleau loui avoe, ‘Noeau Setene vaveve ke bahata vai hilokale au bae noe lohoge no kemo dobuluivilivebene.’ Kateai louge laeau lobo hoto ke evioholilu. Iale di bae la aiogeveve hoto laheho loulivebene. ²⁵ Isito hoto ko igae di louge evive. La vaveve dua vamale kemo negolahalage di lohoi. ²⁶ Iale vani kemo oleuoleu abu evievimo negolahai di lovi ke vage dana lohoniage vuvune mai ovege abuna vata bahata nalisi. ²⁷ Di Mamau vuvune mai daoale ke nahate dana vuvune mai ovege abuna vuvunevemo ata nibievei. Vaveve keu koseanu. Ataeau auli mai sosibani debata vale ke hamage au vusavusale ke nahate abuna vai atae toela havege abuna uoholisi. ²⁸ Dana vuvune kateale ovei vae alalamie didi keta ovei.

²⁹ “Iale la oleuoleu hoto evimaleau Munanae Tumuu ekalesiaho louale hoto ke evive.”

3

Sadisi ekalesiaho hoto

¹ Kosive nehe keu tota Dioni namihai loui avoe, “Sadisi dubu nalimale keho levaleva mole hisialiai kosea,” Ata neheu Dilava Munanae Tumuu seveni (7) maleale isi didi seveni (7) matageveale keu loui avoe, Di la onole vamale ke hilokanu. Ataeau huhuige la keau nita uale ke nahate vai vaveve dua vama. Isito di hilokage la uvu keau toelale atau hatiale ke nahate. ² Iale hoveveve laemo vaveve dua degomole uale kemo negolahave. Onoilage keau laemo uoholima. Di hilokage la onole vale keau Dilava nimo inutolotoloholilu. ³ Di esemuiav vasohuta tiale la haivege laeau hoto ke evie dua valu. Iale ke huhulahai la vaveve toela halevai hoivevei tota hoto ke evive. Lana hoiveveholige dana vavoloe ata nahate solekai lae lohoge la bae di lohoveve vani ke hilokalivebene. ⁴ Isito la degomoleau Sadisi keve uale la ogo hoesegevege keau dogalu. Iale la vaveve keau dua valelua lana ogo taete vai daluvuta uve. ⁵ Isege oleuoleu abu evievimo negolahaliege abuna ogo taete kateale vai. Ige di bae ukolikoli buka kemo iviabe hohoalivebene. Isito dana di Mamae vudimo isi aneluve kebia vudimo lamisi namigevei kosea, ‘Koeau di ataeabuikie koea.’

⁶ “Iale la oleuoleu hoto evimaleau Munanae Tumuu ekalesia ataho onole louale ke evive.”

Bilidevia ekalesiaho hoto

⁷ Kosive neheu tota Dioni namihai avoe, “Bilidevia dubu nalimale ata keho levaleva mole hisialiai kosea, “Kosive keu ata tumute isi ata seleve. Subuta mole Deividu vatae kosive holisi au vuvunemo uaha nibieveale ke nahate auna avuta otogoe Kosive baluga holisi au vuvunemo udaha alavoge atabeu bae bamulivebene. Mesoho auna bamuge atabeu bae alavolivebene. ⁸ Kosive keu loui avoe, Di la onole vamale ke hilokanu. Elehave. Di laheho udaha mole alavoale atabeu bae ke bamulivebene. Di hilokage la negou baluga holioholilu. Isito laeau di hoto evisi kemo negolahai di vovohoholilu. ⁹ Evive. Ata degomoleau lobolahi loui avoe, ‘Noeau Dilavau no tabageveale Diue ata seleve noeabulike ko.’ Abu huhulahai kosea, ‘No Dilava ehovama.’ Isito keau Setene vaveve ke ehovama. Iale dana kebia malevev lohoge abuna la veloe heimo kome bokoai la hoesegevei. Katealemo abuna hilokage di laheho isiviai la tedaevema. ¹⁰ Di subuta la namigevei kosea, Vatehani kemo negolahave. Ige la di hoto evisi avuemo negolahai ua. Iale vaveve toela balugau vatamo lohoale ke vanimo dana ata bahatae evievi kaovai hilokai. Isito toela ke uvumo dana la nibievei. ¹¹ Elehave. Di lohoveve keu aike vuguvuguanu. Iale di isiviholiale ataeau la ibina ke vavoloaliho. Iale la vaveve dua kemo negolahalage di loholive ukolikolie hanogo mai laovei. ¹² La oleuoleu la evievimo negolahage dana kebia tabagevege abuna di Mamae dubue hade ke nahate vai lavisi negolahaimie vani bahata ugei. Di Mamau oe doga Dielusalema hanavoge otogomo dobage dana ke ivi abuemo hisialiai di Mamae ivi isi di ivie dogata abuemo hisialiai.

¹³ “Iale la oleuoleu hoto evimaleau Munanae Tumuu ekalesia ataho louale hoto ke evive.”

Laodesia ekalesiaho hoto

¹⁴⁻¹⁵ Kosive neheu tota Dioni namihai avoe, “Laodesia dubu nalimale keho levaleva mole hisialiai kosea, “Kosive keu hotoe umuka. Keu au hotomo negote. Ige hotove keu seleve unaha. Keu onobenobe bahata nalievemale kosive. Iale au loui avoe, Di la onole vamale ke hilokanu. Di hilokage la keau vuvuneholilu. Isi libioholilu. Iale di isiviale la vuvunelahage duave. O mesoho libilahage keta duave. ¹⁶ Iale ke nahate la keau ekalesia vavevemo vuvune seleve holioholilu. Isito la keau ekalesiae vaveve malei vatae vaveveta igaeatoalu. Katealemo dana la iovei la malevev hatui. ¹⁷ Laeau loui kosea,

‘Noeau kunaitea. No onobenobe moaga maleale kemo ue dua vama.’ La kateai louito la nohovu. Vatetumumo umale la keau kunaiholimale ataea. La keau vava unahata umale ataea. Isi la keau ni kedute holilu. La uvu keau katelahaito la ke hilokaholilu. ¹⁸ Iale di la namigevege evive. Loholive daemo goloe dua maleve. Isi elike kemo kunaite seleve holive. Isime ogo taete daemo malei vave. Ige elike la degeta ui matilahamale keu uoholisi. Isime nie mulamula daemo volihai ke mai la ni ulihave. Ige elike la niu dua vage nilahave. ¹⁹ Dau di isivie ata bahata kebiaho isuta loui kosea, Kateale halevave. Ige abuna ke halevaholige dana vaveve isute abuhu hanavoge abuna kateimale halevai. Katealemo huhuihuhuei dua vaima la vaveve toela halevave. ²⁰ Di louge evive. Di udaha vavamo lamisi udaha hamama. Iale olena di hoto evisi udaha alavoge dana ove uvue tiniege avuti lovi ige auna daiti lovi isi. ²¹ Iale oleuoleu abu evievimo negolahage dana vuvune ovege abuna di telona keve di vavamo uguiavoi. Dau di evievimo negoai di Mamae telonamo avuti ugulamonu. Iale ke nahate lata vave.

²² “Iale oleuoleu hoto evimaleau Munanae Tumuu ekalesia ataho louale hoto ke evive.”

4

Dioniu otogoe vaveve degomole elegevenu.

¹ Hoto katealeu uoholisege di otogoe elehasege udaha moleu alavonu. Ige oe neheu subuta daho louge di eviale keu kibi uvuale ke nahate tota di namihai avoe, “Kove lohoge di gabie lohoveve vaveve ke a haivui. ² Au kateai lousege solekavesite Munana Tumuteu di niavoge di otogoe elehasege Kosiveu au telonamo ugulamo i ua. ³ Ke elehilehiu mune dua abuita diasiba isi kanilia kebia hisai nahate. Ige telonave ke vavamo haegiu hatui lotiale mai mole ivi binu. Haegi ke hisaiu mune mole emelaleu tegitegiale ke nahate. ⁴ Kosive keu au telonamo ugulamosege eloda bahata tuenti voa (24) keau evilikahavoi abuta abu telona igaege kemo ugulelevai lotilu. Keau ogo taete vavei hanogo golota vale ke nahate malei abu kina hanubelu. ⁵ Kosive telona kemo hatau nivolekai kibalai luluau. Isege telonave vudi kemo hati seveni (7) keau vedodoai ua. Dilava munanae tumu seveni (7) keabuikie. ⁶ Kosive telonae vudi kemo ono mole davala ke nahateu ua. Isito keu e seleve holioholinu. Keu evali ke nahate tae seleveanu. Isege ovo mole nimolete abuita abuita keau kosive telonae vavamo ua. Kebiau nita uale vavaeabe bahata kemo nie baiu ui lotilu.

⁷ Di kebia elegeveale moleu ovo mole laioni ke nahate. Ige moleu bolomakau ese ke nahate. Ige mole ke niu atae ni nahate. Ige mole keu bubuimale duna ke nahate. ⁸ Nita uale voa (4) kebiamo atugu bahata sigisiau (6) abuemo ua. Ige vavaeabe bahatamo isi uvuiabe ketamo nie baiu ui gabilahalu. Iale keabuna vani vavi bahata nogoli koseale lougei.

“No Kosive ke igaeu ata tumute.

Keu no Dilava vuvunete.

Keu subuta ui aike ui lohomale ata.

Iale auna bae lohoi.”

⁹ Keau katelahai nogoli loui telonamo ugulamoale Kosive ke hoesehavoma. Kosive keu vani bahata uvevete ata. Iale abu ivive ebagevai loui avoe, “Au baluga.” ¹⁰ Abu kateisege eloda tuenti voa (24) keau Kosive ke vudimo kome bokoai hoesehavoma. Kosealemo keu ukolikolie Kosive. Iale keau abu hanogo malei telonave ke vudimo keohama. ¹¹ Isi loui avoe,

“Kosive, au no Dilava.

Au vuvunete ata.

Iale ataeabuna a ivi ebagevai a hoesehavoge keu duave.

Kosealemo a igaeike onobenobe bahata vaevunu.

Iale a isivi unahamoike onobenobe keau bahata ua.”

5

Beiba mole viliale ke alavoveve deiada

¹ Abu kateisege di elehasege telonamo ugulamoale Kosive keu beiba mole egetana viliale ke matahanu. Beiba kemo abu uvuve isi iave kemo hisaliai ke omovai silu bahata seveni (7) malei kemo otovelu. Otovei isiviholialeike atabeu beiba ke alavoi hisali ke dodaveliho. ² Ige di tota elehasege anelu vuvuneteu baita hoai loui avoe, “Ata ole duatena vali silu ke bahata bodievei beiba ke alavoi.” ³ Au kateai louge abu otogomo kaovai vatamo kaovai kumoe kaovalage beiba ke alavoi hisali ke dodaveveve atabeu uoholinu. ⁴ Ige di ke elehai nina baluganu. Kosealemo beiba ke alavoi hisali ke dodaveveve atabeu uoholinu. ⁵ Di kateige eloda moleu daho loui avoe, “Nina haleito ukeve nianela. Ata

mole negote laioni ke nahateu Diudame Deividime valadamo lohoale vaveve bahatamo negoanu. Iale auna bae silu kebia bodievei beiba ke alavoi.”

⁶ Ige di niasege Mamoe Ese moleu Kosive telonae vavamo lamisi ua. Isege ovo mole voa (4) ni moagamoagate isi eloda tuenti voa (24) keau ke evilikahavoi ua. Mamoe ke abu subuta hamale samaguveu ua. Ige Mamoe kemo kaudave seveni (7) isi nive seveni (7). Nive keau koselahalu. Dilavau au munanae tumu seveni (7) kebia hanavege abu vata bahatae tilu. ⁷ Iale Mamoe keu tiale telonamo ugulamoale ke ada inuteve beiba ke manu. ⁸ Keu kateisege oe nehebia voa (4) ni moagamoagate isi eloda tuenti voa (24) keau lohoale Mamoe ke vudimo kome bokoai vata bisi hoesehavolu. Keau bahata igaegaei gita ke nahate matagevei baidisi golota vale keta malelu. Baidisi kebia uvumo oele hagote balugau ua. Oele hagote kebiabulike Dilava ataeau noinoiamale. ⁹ Ige oe nehe keau nogolie doga louale keu koseanu. Avoe,

“Au ata duate.

Iale au beiba ke mai silu bodievei alavoge duave.

Kosealemo a hatiale kemo a atae toelae ibina vai malevei Dilava ominu.

Valada bahata, hoto bahata, vata bahata, ata bahata kebiamo ata kebia malevenu.”

¹⁰ A kebia malevege keau dubumo loviamale kebia nahate vai Dilava lovi vama.

Isime abuna bae vatae ata bahata nalievei.”

¹¹ Ige di tota niavevela anelu moagataho seleve dodavevesite elegevege keau Kosive telona isi oe nehebia ni moagate isime eloda kebia evilikahavolu. ¹² Abu isuta loui avoe, “Mamoe nehe abu hamale keu baluga.

Iale Dilavana vuvune, kunai, lulele, nego malei omisi.

Isege ataeabuna ivive ebagevai hoesehavoi loui kosea,

‘Keu kosive baluga.’”

¹³ Ige di evisege otogoe umale, vatamo umale, kumoe umale isi davalamo umale keau bahata nogoli mole louale keu koseanu. Avoe,

“Telonamo ugulamoale isi Mamoe Ese keau atagai vuvune balugalu.

Iale nahi iviabe ebagevei vani bahata hoesegevegei.”

¹⁴ Abu katelahai lousege oe nehe voa (4) ni moagate keau avoe, “Ito, no isivialeike hoto keu seleve holisi.” Ige eloda keau kome bokoai vata bisi hoesehavolu.

6

Mamoe Eseu silu bodievenu.

¹ Abu kateisege di elehasege Mamoe keu nigu mole (1) ebodihanu. Ige di evisege oe nehebia voa (4) kebiamo moleu loui avoe, “Loho.” Ige hotove keu hatau vutoale ke nahate.

² Kateai louge di elehasege osi mole taeteu lohonu. Osimo kemo ugulamoale keu diba mole matahanu. Iale abu tualie kosive hanogo mai ata ke omige keu vuvunevermo tiale kena ata havei ata malevei lohoi. ³ Ige Mamoe keu silu mole (2) ebodihage di evisege oe nehe ke moleu loui avoe, “Loho.” ⁴ Kateai louge osi mole tahoteu lohonu. Ige abu tualie siga egete mai osi kemo ugulamoale ke omige keu ke mai isivialeike vatae ataeau kemo mole havei tahotisi.

⁵ Ige Mamoe keu silu mole (3) ke ebodihanu. Ige di evisege oe nehe moleu loui avoe, “Loho.” Ige di elehasege osi mole bukateu lohonu. Osimo kemo ugulamoale keu vatae lovie isu maliho sikele matahanu. ⁶ Ige di evisege oe nehebia voa (4) kebiamo hotou lohoale loui avoe, “Atabena vani igaemo lovianiege ibinave kena vadia igae ibina nahate vai. O mesoho ibinave ke igaena gebeu abuita igaeta ke ibina nahate vai. Isito lovi mahomale oele isi uaini keabuna uoholilivebene.”

⁷ Ige Mamoe keu silu mole (4) ebodihage di evisege oe nehebia moleu loui avoe, “Loho.”

⁸ Ige di elehasege osi mole nimoletu lohonu. Osimo kemo vateu atau hatiale ke vate nahate. Iale kemo ugulamoale ke ivilike Hatihati. Abu osimo ugulamoale ke hatihatie vuvune omige au mai vatae lohoge ataeau tualimo haluvisi vaeho haluvisi vavahanimo haluvisege botoe ovoo toelaeau degomole uagevege haluvilu. Vaveve toela kemo vatae ata moagaeau haluviale keau odavae tilu.

⁹ Ige Mamoe keu silu mole (5) ebodihage Dilava hoesehavomale batabata ke valae di elehasege evievi ataeau vatae Dilava hoto loui abu evievimo negolahai ata haivege ataeau haveale kebia munanau ua. ¹⁰ Iale keau baita holahai loui avoe, “No Kosive baluga, au ata tumute. Au hoto seleve loumale ata a. Iale vani oletealela ana bae vatae atae vaveve kaovai aiogevei. Keau no havealelua kebia aiogevenela.” ¹¹ Abu kateai louge Kosiveu ogo taete malei igaegae kebia ovenu. Isi loui avoe, “Usege vani degomole uoholige ataeau lahaveale ke nahate abuna la haokuvu benahate havege uoholisege dana bae kebia aiogevei. Iale tobekai hemei uve.”

¹² Kateai louge uoholige Mamoe keu silu mole (6) ebodihanu. Ke ebodihasege hamu balugau hatuge vaniu loale ogo bukate ke nahate. Ige batau tahoale taho ke nahate. ¹³ Ige didiau otogomo keiolahalu. Ige heluka balugau lohoge idie baie sulukaeau keiohovoale ke nahate keu keiolahalu. ¹⁴ Kateige otogou beiba lokuale ke nahate vai uoholinu. Ige vatae tanaeau tohotohoai abu lovo halevege davalae nimo vata kebiata tohotohoai abu lovo halevalu. ¹⁵ Vaveve katealeu lohoge gamani kosivea, oe kosivea, kunaitea, tualie kosivea, lovilahamale ata, isi heiata loviamale ata keau bahata tanae tilu. Tiliiale degomoleau mune valae hogodevesege degomoleau manue vahae hogodevelu. ¹⁶ Isi tanae mune hohavei loui avoe, “Toholahai lohohoi no vavagevege Kosiveu telonamo ugulamoale keu elike no elegeveholisi. Ige elike Mamoe keu no aiogeve halei. ¹⁷ Itumuiabe vani baluga keu lohoge atabeu bae kemo negoai ulivebene.”

7

Iselala ata bahata 144,000 kebiamo silu otovelu.

¹ Hoto katealeu uoholisege di elehasege anelu abuita abuita keau vatae dei abuita abuita keve lavisi heluka abuita abuita kebia matagevege keau bae davala baluga isi vatae onobenobemo utuai aiogevelivebene. ²⁻³ Ige di tota elehasege vaniu velemamale keve anelu moleu ukolikoli Dilava ke silu mole mai lohonu. Keu isiviale ke mai Dilava esemu kebia valimo otovei. Iale keu anelu abuita abuita kebia baita hohavei loui avoe, “Lainaho davala baluga isi vatae onobenobe aiogevelive. Isege nahi vasohuta Dilava esemu kebia valimo silu otovegeto bae heluka boegevege abu bae tai vata aiogevei.” ⁴ Abu Dilava esemu kebia valimo silu otovege uoholige abu di namihai avoe, “Iselala ata bahata no silu otoveale keau moagaveu koseale uani handele voti voa taoseni (144,000). ⁵⁻⁸ Uani handele voti voa taoseni kebia valada abuike koea.

Diuda valadamo 12,000

Lubeni valadamo 12,000

Gadi valadamo 12,000

Asa valadamo 12,000

Natali valadamo 12,000

Manasa valadamo 12,000

Simioni valadamo 12,000

Livai valadamo 12,000

Isaka valadamo 12,000

Sebulani valadamo 12,000

Dioseba valadamo 12,000

Benidiameni valadamo 12,000.”

Anelu keau kateai loui di namihalu.

Ata moagamoagaeanu ogo taete vaeveale

⁹ Hoto katealeu uoholige di elehasege ata bahata, vata bahata, hoto bahata kemo ata degomoleau lohoale Kosive telonata Mamoeveta heiabemo lavisi ua. Keau ata moagamoaga seleve. Iale ataeau bae kebia dodavelivebene. Keau ogo taete vai idi mole niue vana ke nahate matagevelu. ¹⁰ Abu baita holahai loui avoe, “Nahie Dilavau telonamo ugulamoale keu Mamoe keti nahi malevei ukolikoli nahiovelu.” ¹¹ Anelu bahata keau oe nehebia voa (4) ni moagate isi eloda kebia evilikahavoi telonae heimo abu kome bokoai vata bisi holuiavoi Dilava hoesehavolu. ¹² Isi loui avoe, “No Kosive, hoto selevelike ko.

A ataga, a lulele, a nego, a vuvune keabuna vani bahata ugei.

Iale ataeau vani bahata a hoesehavoi a ivi ebagevai guligulilahage keu duave.

Hoto selevelike ke.”

¹³ Hoto keu uoholige eloda moleu di namihai avoe, “Olete abulike uoke ogo taete valu. Isi keau oleve lohohu.” ¹⁴ Ige di namihai kosea, “Baluga, di hilokaholinu. Isito au hilokanu.” Di kateai louge keu loui avoe, “Keau vatae vatehani baluga kemoike abu lohohu. Keau Mamoe tahota abu ogo totoeveike vage ogoeabe keau taelahalu. ¹⁵ Katealemoike abu vani bahata Dilava telona ke vudimo lavisi dubuve tumumo hoesehavoma. Abu kateisege telonamo ugulamoale ke biageu kebia giginagevema. ¹⁶ Iale abu bae tota vaelahai enulahalivebene. Ige vaniu bae tota tumuai kebia aiogevelivebene. ¹⁷ Kosealemo Mamoe ketana mamoe nalievemale ata ke nahate vai kebia nalievei. Mamoe keu telona kemo umale auna kebia holoevei uli holisi e hana keve tige abuna ukolikoli e seleve isi. Isege Dilavana kebia nimetava bahata ulihage auna uoholisi.” Eloda keu kateai loui di namihanu.

8

Silu seveni (7)

¹ Hoto kateale louge uoholige Mamoe keu silu mole (7) ke ebodihage mesoho teti (30) miniti uvumo otogoe ata keau hotohotoholisito tobekalahai ua. ² Ige di elehasege abu kibi seveni (7) malei anelu seveniau (7) Dilava vudimo lavimale kebia ovelu.

³ Isege anelu moleu sosibani golota vale ke mai tialeu abu golota batabata vale ke vavamo laminu. Batabata keu Kosive telona ke vudimo ua. Iale au keve lamisege abu ono mole hagote baluga mai omisi isiviale au ke mai Dilava ata bahatau guliguliamale keta uvuhatu batabata ke golomo mahoi. ⁴ Kateige anelu keu ke mai batabatamo ehosivai mahoge dioveu veatige Dilavau hagove ke evisi ataeau guliguliamale keta evinu. ⁵ Ataeau guliguliamale kemo anelu keu batabata kemo venee go malei sosibani ke uvumo otovei malei vatae hatunu. Au kateisege hatau kibalage vau luluana. Vau kibalai luluige vatau kibikibianu.

Kibi abuita abuita kebia vaveve

⁶⁻⁷ Kateige anelu seveni (7) keau kibi seveni (7) malei isiviai uvulihio vasege moleu au kibi mai uvuge otogomo vene isi aisi keau tahota dobuluvisi lohohu. Ige vatae ivi moleu lahanu. Isege vaki mole abuita keau ua. Ige lahale kemo idi bahata keau ladevei uoholihu. Ige vata bahatamo kulu bahataeau ladevei uoholihu.

⁸ Ige anelu mole (2) keu au kibi mai uvuge di elehasege ono mole tana baluga lahamale ke nahate abu mai davalamo mihatulu. Ige davalae ivi mole keu tahoanu. Isege vaki mole abuita keau ua. ⁹ Ige tahoale kemo davalu uvue umale keau bahata haluvilu. Ige tahoale kemo bouti bahataeau toelai gabilahalu.

¹⁰ Ige anelu mole (3) keu au kibi mai uvuge didi baluga hatie vedodo ke nahateu otogomo dobai lohoale e hana e seleve kebia aioegevege vatae ivi molemo e keau toelalu. Isege vatae ivi abuita kebia mo e keau toelaholihu. ¹¹ Didi ke ivilikie Imaga. Iale ata moagamoagaeau eu toelale keve e ke isi haluvilu.

¹² Ige anelu mole (4) keu au kibi mai uvuge vani vaki mole (1/3) keu loduanu. Ige bata vaki mole (1/3) keta loduanu. Ige didi degomole (1/3) kebiata atagaholihu. Katealemoike vanimo vaniu neniai haluholinu. Ige vavimo batau diditi ke nahate valu.

¹³ Ige di elehai evisege ugu mole duna ke nahateu ehumo bubuai baita loui avoe, “Iei, nohovu. Anelu abuita igaeta keabuna abu kibi malei uvuge vatae umale kebia nohovu. Kosealemo vaveve toela abuita igaetana bae abuemohoi.”

9

Kibi vai (5)

¹ Keu kateai louge anelu mole (5) keu au kibi mai uvuge di elehasege ata moleu ki mai anelu mole didi nahate otogomo dobale ke ominu. Ki keu kumoe umale kebia ki. ² Iale keu ki keta abu umale udaha alavoge diove keu balugataho kumu mahaloale ke nahate. Iale dioveu matamae toela kemo lohohi ehue veatige vau loanu. ³ Isege venee dio kemo kainaku nimotele keau ehue vuvune malei vatae dobuluvisi lohohu. Iale vuvune keu haehoe aihani ke nahate. ⁴ Iale otogoe ataeau namigeveve avoe, “Lainaho idie vana, latie vana isi lovie vana igelive. Isito oleuoleu abu valimo Dilava silu ke otoveholiale kebia unaha uageveve.” ⁵ Isi loui avoe, “Lainaho uagevege abu haluvilive. Isito uagevege abu bata ada mole ke uvumo vatehani malei.” Vatehani keu haehou ata uagevege abu tumu baluga maleale ke nahate. ⁶ Bata ada mole ke uvumo ataeabuna haluviveve humaha kaovai. Isito abu bae elehalivebene. Abuna haluvilihu isivilahai. Isito haluviveve humahana uoholisi.

⁷ Di kainaku kebia elevegeve keau tuvalie osi kebia nahate. Kebia kinamo ono mole goloe hanogo ke nahateu ua. Isege niabe keau atae ni nahate. ⁸ Ige kinaeabe numu keau egelelahi keate kina ke nahate. Isege aiabe luhu keau ovo laioni ke aie luhu nahate. ⁹ Ige ivukeabe kemo ono mole aulita vale keau ua. Kainaku keau ehumo bibuluvisi tige atuguiabeau umuale keu osiau tuvaliho tai kaliota butugeveve tiale ke umu nahate. ¹⁰ Keau haeho ke nahate. Isito deteabeu ua. Iale abuna abu dete keta ata biovege abuna bata ada mole ke uvumo vatehani malei. ¹¹ Iale kebia nalievemale kosive keu kumoe matama ke biage. Diue hotomo ivive moleike Abadoni. Ige Giliki hotomo ivive moleike Aboloni. Hoto abui ke ihu koseanu. Keu ata aiogevemale. ¹² Kibi vai (5) kemoike vaveve toela katealeu lohohu. Isege kibi mole abuita uale ke vaveve toelate abuna bae lohohi.

Kibi sigisi (6)

¹³ Iale anelu mole (6) keu au kibi mai uvuge di evisege hoto moleu lohohu. Dilava vudimo abu golota batabata vale ke deimoike hoto keu lohohu. ¹⁴ Keu lohoale anelu mole kibi sigisi (6) uvuale ke namihai avoe, “Abu subuta anelu abuita abuita umudieveve

e baluga Iuvaleti keve otoveale kebia vavegevege abu tai.”¹⁵ Anelu abuita abuita kebia umudieveale kebiaho abu vagana, bata, vani isi vanie ni mavoale keu lohoge abu kebia vavegevege abu tilu. Tialeau vatae ata ivi mole abuita halevaito ivi mole ke ata bahata havege keau haluvilu.¹⁶ Ige di elehasege tualie ataeau osimo uguiavoi lotiale bahata tu handele milioni (200,000,000).¹⁷ Ige di lahoahoale ke nahate vai kemo osi kebia elegevegege tualie ata kebia ivukamo ono mole aulita vale keau ua. Kebia hisaliu koseanu. Moleu tahoai muneu balale ke nahate. Isege moleu bukate. Ige moleu mune mole bevate nahate. Isege osi kebia kinaeau ovo laioni ke kina nahate. Ige aiabemo vene ha, diove isi mune bevateu lahai dioale keau velehovoi loholu.¹⁸ Vaveve toela abuita igaeta keau ata moaga havege abu haluvilu. Vene ha, diove isi mune bevateu lahai dioale keau osi kebia aimo lohoale vatae ivi abuita kebiamo ata haveholisito ivi mole kemo havege ata moagamoagaeau haluvilu.¹⁹ Ata haveveve vuvune keu aiabe unahamo uoholiholinu. Isito deteabe ketamo ua. Deteabe keau ute nahate. Iale keau keta ata aiogevelu.

²⁰ Iale vaveve toela keau lohoge ata degomoleau kemo haluviholiale keau isiviholilu Dilava hoesehavoliho. Isito keau sohu munanae toela hoesegeveve abu adata loboe dilava vamale kebiata hoesegevema. Keau golo, siliva, auli, mune isi idi ke malei loboe dilava vaevelu. Isito loboe dilava keau niholisi evioholisi olahaholima.²¹ Katealemo ata keau abu vaveve toela halevaholilu. Isito keau sohu ata havei evelahai mole keatehi ladevei mole kunai vavololahama.

10

Aneluu buka mole ese alavoale ke matahanu.

¹ Ige di tota elehasege anelu mole vuvunete keu otogomo dobai lohoge goeu ogo nahate vavave viliasege kinave kemo haegiu hatunu. Ige nive keu vani nahate. Ige velove keau negolahi vedodoai ua.² Iale keu buka mole ese alavoale ke matahanu. Ige velove inute keu davala danu. Isege velove agite keu vatae danu.³ Anelu keu kateaito baita kekoaleu laioniu ai volovoloale ke nahate. Au kateai ai volovoloaleu uholisege hatao vutoi luluale bahata seveni (7). Keau hotove ke ibinaike abu ke valu.⁴ Abu kateale lousege di isiviale hotoeabe ke hisaliai. Isege otogomo hoto moleu daho loui avoe, “Ainaho hata seveniau louale ke loui hisialialive. Isito ke mahogova.”

⁵ Hoto keu kateai lousege anelu neheu eta vatatamo dale keu au ada inute otogoe ebagemanu.⁶ Isi hotoe tumu Dilava ivimo lounu. Isi avoe, “Dilava keu ukolikolie Kosive. Keu otogo vai vata vai davala vai abuemo onobenobe bahata otovenu. Iale vaniu vuguvuguale nahi bae vesokalivebene.⁷ Isito anelu seveni (7) kena au kibi mai uvusege Dilavau au vaveve hoto deiada loui au belovetae esemu haiveale ke bahataebuna bae seleve holisi.”

⁸ Anelu keu kateai lousege hoto neheu otogomo lohoi di namihale keu tota daho loui avoe, “Talive anelu neheu eta vatatamo dale ke adamo bukae ese alavoale ke manela.”⁹ Au kateai louge di tiale anelu ke namihai kosea, “Bukae ese mai dao.” Ige keu daho loui avoe, “Ko mai ine. Ana ko mai ige auna aimo heaniege vidia he ke nahate vai. Isito auna a unie tiniage auna he toela vai.”¹⁰ Au kateale louge di adavemo bukae ese ke mai nu. Di ke ige keu di aimo heale vidia he ke nahate. Isito di ke keboage keu di unie tiale he toela vanu.¹¹ Ige anelu keu di namihai avoe, “Ulive tota a buka nehe ese iale ke deiada loui vatae kosive, vatae ata bahata namigevege abuna gabie lohoveve ke hilokai.”

11

¹ Keu kateai louito vavue idi egete mai daoi loui avoe “Hovelahai talive Dilava dubu baluga ke vavuai Dilava hoesehavomale batabata keta vavuanela. Isi dubu kemo gulguliamale kebia dodave.² Isito heie dubue ologo ke halenela. Ainaho ke vavualive. Kosealemo atae toela keau heie vata ke mai keve ua. Iale abuna vagana abuita igaeta isi bata sigisi (6) ke uvumo keve ui Dielusalema oe tumu ke aiohavoi.³ Iale vani kela dana di hoto loumale esemu abuita hanavege abuna ogo bukate vai vani koseale uani taoseni tu handele siksti (1,260) ke uvumo Dilava hoto loui ata haivei.”⁴ Vata bahatae biage Dilava ke vudimo laviale esemu abui keabulike olive idi isi hati abui kebia.⁵ Iale atabena isiviai kebia haveho vage venena aiabemo lohoniage ke hamai. Kosealemoike oleuoleu isiviai Dilava esemu abui kebia aiogeveliege keabuna haluvisi.⁶ Keau vuvune maleale kemo abuna Dilava hoto lousege veniu bae otogomo loholivebene. Isi keau vuvune mole maleale kemo abuna louge e hana keabuna taholahai. Isi abuna isivilahaliege vaveve toela onoleonole vatae hanavoge auna vata aiohavoi.

⁷ Ige esemu abui keabuna hoto ke louliege gabilahasege kumoe umale kemo ata mole ovo aihanite nahate kena lohoniage ata abui kebia aiogeveve havege abuna haluvisi.

⁸Keabuna haluvige ataeau bae malevei abavuevelivebene. Isito halevege abuna o baluga ke humahadae ladevei ui. O keveike abu ata abui kebia Kosive mai idimo hamalu. Katealemoike Kosiveu o ke ivihai avoe, “Sodoma o Egubito.” ⁹Ige vatamo ata bahata, hoto bahata, valada bahata kebiamo ataeabuna lohologie vani abuita igaeta ke uvumo vavaeabe elegeveito malevei abavuevelivebene. ¹⁰Vani ke uvumo abuna vahaeholohai havulahai moleho onobenobe hanavoi loui kosea, “Ata abui keau haluviale keu duave.” Abu hoto kateale louale keu koseanu. Ata abui keau vatehani baluga mai vatae ata ovelu. ¹¹Abuna katelahasege vanie ni abuita igaetaeau uoholige vani mole ke vanie lilimo Dilavana ata abui kebia lu ovege keabuna hovevevei. Ige ataeabuna kebia elegevei tetelahai. ¹²Isege hoto molena otogomo lohoniege hoai ata abui kebia namigevei kosea, “Vealuvisi kove lohove.” Kateai louge aiogevemale ataeabuna nibievesege ata abui kebiabuna goemo otogoe tai. ¹³Abuna katelahasege o baluga keve hamu balugana hatuge o ke vaki mole (1/10) kemo o moagana dobuluvige ata moagamoaga seveni taoseni (7,000) keabuna haluviale. Isege ata degomole nita uale keabuna vabulalahai Dilavau otogoe umale ke hoesehavoi loui kosea, “Otogoe Kosive keu baluga.” ¹⁴Kibi sigisi (6) kemoike vaveve toela kateale abuna lohohi. Isege kibi mole igae uale ke vavevetana bae lohohi.

Kibi seveni (7)

¹⁵Ige anelu seveni (7) keu au kibi mai uvuge otogoe ataeau baita loui avoe, “Nahie Kosiveu abu moti abu vuvunemo nova abuna bae vata mai vani bahata vatae ata nibievegei.” ¹⁶Katelalahai louge eloda tuenti voa (24) Dilava vudimo uguiaivoale keau abu kome bokoai vata bisi Dilava hoesehavolu. ¹⁷Isi loui avoe, “No Dilava, au vuvunete.

Au subuta ui aike umale Kosive a.

Iale no vahaeholalahalu.

Kosealemo a vuvune baluga kemo aike vatae ata nalievema.

¹⁸Isege atae tolaeau aho itumu balugalalahalu.

Isito a itumue vanina aike abuemole bae lohohi.

Vani kemo haluviale keabuna hovevevege ana vaveveabe kaova.

Isi vani kemo a beloveta esemu kebia isi ata bahata oleuoleu a vabuhavomale ata baluga mesoho atae ese kebia ibina ana ovenela.

Isi oleuoleu vatae ata aiogevemale kebia ana vani kela aiogevenela.”

¹⁹Eloda keau kateale lougeto otogoe Dilava dubue udahau alavonu. Ige ke uvue maua mole Dilavau au menaka louge abu ke hisaliai mai maua ke uvue mavoale keu ua. Iale udaha keu alavosege hatau nivolekai luluanu. Ige hamu hatuge aisi baluga keau otogomo keiohovolu.

12

Keate mole isi ute tahote

¹Keau gabilahasege ono mole nimoleteu otogomo ua. Ige kemo keate moleu ogo mole vani nahate holovanu. Ige velove hei kemo batau ua. Ige kinavemo didi tueloau (12) uale keau hanogo nahate. ²Iale keate keu ese male ese uiliho vage tumuhamage kekoanu.

³Keu kateisege ono mole nimoleteu otogomo velemanu. Keu ute tahote ke nahate. Isito balugataho. Ige kinave bahata seveni (7). Ige kinaeabe kebiamo kauda teniau (10) uge kinaeabe kebiamo hanogo seveniau (7) ua. ⁴Iale ute ke deteu otogomo didi moaga tohoevenu. Keu otogo vaki abuita haleito vaki mole kemo didi bahata tohoevei vatae hatunu. Kateaito keate ke vudimo lamisi isiviale kemo ulive eseveve uge au uahai isi. ⁵Au kateisege keate ke mou ua. Ige ute keu isiviai uahai. Isito Dilavau solekai mo ke mai otogoe au telonamo mamonu. Iale mo kena au auli bedoiata vatae ata bahata nibievei. ⁶Abu katelahasege keate keu botoe detitisi tiale Dilavau avuhoto matama mole louale keve ua. Keve usege Dilavau vani moaga uani taoseni tu handele siksti (1,260) ke uvumo ke tedahoi nibinu.

⁷Ige ke iae abu otogoe tuvali baluga valu. Ige anelue kosive mole Maikolo keu au anelu dua holoevenu. Isege ute keu avuta au anelu toela holoevenu. Isi molehi mole havelu.

⁸Mole havelage ute keu dobanu. Ige anelue dua keau anelue toela kebia iovei namigevei avoe, “La bae kove ulivebene.” ⁹Isi kateai ute baluga ke mai anelue toela kebia bahata malevei vatae hatulu. Ute baluga keu subuta mole ute. Keu vatae ata bahata lobovevei aiogevema. Iale iviveike Setene. ¹⁰Ige di evisese otogomo hoto moleu baita loui avoe, “Setene keu vavi vani ke bahatamo Dilava vudimo lamisi nahie haokuvu kebiamo hotoe lobo loulage abu otogomo mai vatae mihatulu. Katealemoike Dilava vuvune keu Setene vuvune ke evihanu. Move Keliso keu vuvune malealemo au nova nahie tetaevei nahie malevege nahi adave vuvunemo uveve vani keu lohohi. ¹¹Iale nahie haokuvu keu oleve

kateai Setene evihalu. Kosealemo abu Mamoeu hatiale ke vuvunemo negolahai hotove loui ata haivelu. Keau abu ebia huhueveholisito lovi kemo haluvilu. ¹² Iale otogoe umale laeau Setene mai vatae mihatuale kemo vahaeholahave. Isito vatae ui davala nie umale la nohovu. Seteneu aike lae lohoale itumu baluganu. Kosealemo keu hilokage vaniveu egehoholisito vuguvuguanu.”

¹³ Ige ute keu abu mai vatae mihatuale keu ke hilokaima keate nehe moveu uale ke nunuvai tiale isiviale uahai. ¹⁴⁻¹⁶ Kateige keate keu bubuai tisege ute keu akasege e balugau aivemo lalamoi lohonu. Ute keu isiviale kateige e keu keate ke mai tai. Isito vatau isiviale keate ke tedahoi. Isi akasege ute aimo eu lalamoi lohoale keu lohohoi vahavemo deluai tinu. Ige Dilavau duna balugae atugu abui ke nahate malei keate ke omige keu bubuai tiale botoe ua. Dilavau avuho matama ke louale keve uge ute keu uahaholinu. Ige au keve usege Dilavau vagana abuita igaeta isi bata sigisi (6) ke uvumo tedahoi giginahavonu. ¹⁷ Kateige ute keu keate keho itumu balugaimo halei tiale isiviai keate ke valada degomole uagevei aioegevei. Keate ke valada keau Dilava hoto evisi ehovamale ataea isi Iesu hoto loumale ataea. Ute keu kateaito halei tiale davalae esagamo laminu.

13

Ovo aihanite abuita

¹ Ige di elehasege ovo aihaniteu davala kemo velemai lohonu. Ige kinave bahata seveni (7). Ige kinave kebiama kauda teniau (10) ua. Ige kaudave kebiama hanogo igaieageau ua. Ige kinave kebiama abu Dilava aiohavoale hotoe toela hisalilalahu. ² Ovoe toela di elehale keu bosikati nahate. Isito balugataho. Ige velove keau tagulae velo ke nahate. Isito velove keau balugatahoige aive keu balugale ovo mole laioni ai nahate. Iale ute keu au telonae vuvune au nego mai ovo ke omige keu vuvuneanu. ³ Ige abu ovo ke kina hamai tahotisi huhulalahai avoe, “Kena hatai.” Isito keu hatihoholisito hovelalahanu. Ige vatae ata bahataeau ke elehai tetelalahai ovo ke ehovalu. ⁴ Isi guligulilahai ute ke hoesehavolu. Kosealemo keu au vuvune mai ovo ke ominu. Iale abu ovo keta hoesehavoi loui avoe, “Ovo kou ovo negote. Atabeu bae ko nahate valivebene. Iale hamaveve humahau uoholinu.”

⁵ Abu kateai louge Seteneu vuvune omige ovo keu au ebika ebagemai hotoe toela baluga loui Dilava ivi aiohavonu. Isi vagana abuita igaeta isi bata sigisi (6) ke uvumo au vuvune kemo vatae ata nalievenu. ⁶ Ovo keu Dilava ivi aiohavoi loui avoe, “Dilava keu toelanu. Ige au umale matama keta toelanu. Ige otogoe umale ata kebiata toelalu.” ⁷ Ige Seteneu tota vuvune omige au tiale Dilava ata kebia aioegevei abuemo vaveve toela vai au vuvuneta vatae ata bahata malevei nalievenu. ⁸ Ige vatae ata bahata iviabeau Mamoe bukamo uoholiale keu guligulilahai ovoe toela ke hoesehavolu. Buka keu abu Mamoe hamale bukaike. Iale au subuta otogo vaholisi vata vahoholisito ukolikolie buka kemo au atae ivi hisalianu.

⁹ Iale oleuoleu hoto evimaleau hoto ko evive. ¹⁰ Vani kela abu oleme dibulae otoveho louale kebia abuna malei dibulaevei. Isi oleme abu haluviveveho louale kebia abuna havege abu haluvisi. Isito vaveve katealeu velemage Dilava ataeabuna abu evievimo negolahai lavisi ui.

¹¹ Ige di elehasege ovo aihanite moleu vatamo velemai lohonu. Ige kinave kemo kauda abui mamoe kauda ke nahateau ua. Ige hotove keu ute baluga hoto ke nahate. ¹² Ovo nehe abu hamai tahotiale keu au vuvune bahata mai ovo mole ke omige au kemo negoai vatae ata bahata kebiaho louge abu guligulilahai ovo nehe abu hamai tahotiale ke hoesehavolu. ¹³ Iale vatamo lohoale ovo keu vikoe vaveve baluga vaevunu. Au louge vevunu otogomo dobai vatae lohoge ata bahataeau ke elehalu. ¹⁴ Ovo keu vaveve kateale vai vatae ata bahata lobogevege abu loui avoe, “Vaveve keu seleve.” Ovo neheu davalamo lohoale keu keve lamisi elehasege ovo mole keu vaveve kateale vai ata bahata malevenu. Isi kateai ata namigevege abu ovo nehe ke munana vai ke hoesehavolu. Ovo nehe abu sigata hamai tahotige hovelalahale ke munanaike abu valu. ¹⁵ Iale ovo keu ovo mole hamai tahotiale munana ke mai au lu omige munana keu kibiai hotoanu. Ige ata degomoleau ke hoesehavoholige au kebia havege abu haluvilu. ¹⁶ Iale ovo keu louge ata bahata, ata baluga isi atae ese, kunaite isi kunaiholimale, ibinahoholisito heiatu lovilahamale isi abu isivi unaha vamale keu bahata abu ada inute isi abu vali kemo ovo nehe ke hisali otovelu. ¹⁷ Iale oleuoleu ovo ke hisali abu ebiamu hisaliholiale keu bae onobenobe voilahai makatilalahivebene. Hisali keu ovo ke ivi. Isito keu ivive unaha haleito nambaveta.

¹⁸ Di hoto mole louge kemo nenilahai lulelelahave. Ovo ke namba keu atae ivilike. Namba keu koseanu. Sigisi, sigisi, sigisi (666). Iale oleuoleu lulelelahale keabuna ihuve ke hilokai.

14

Nogolie doga louale ataea

¹ Ige di elehasege Mamoe nehe keu Dielusalemae Saioni tanamo laminu. Ige avuluvuta uale ata keau bahata uani handele voti voa taoseni (144,000) kebia valimo Mamoe ke ivi isi Mamave ivi keau ua. ² Ige di evisege otogomo hoto moleu baita louale keu eavu balugau egumai luluale ke nahate. O mesoho hatau luluale ke nahate. Isi hoto keu duave baa. Ata moagaeau gita hamamale ke nahate. ³ Ige ata nehe (144,000) keau Dilava telonae vudie heimo lavilu. Ige oe nehebia voa (4) ni moagamoagate isi eloda keau keve ua. Isege ata nehe keau nogolie doga loulu. Dilavau ibinaeabe vaevei maleveale uani handele voti voa taoseni (144,000) kebia unahaeabuike nogoli ke hilokai loulu. ⁴ Ata kebiau Dilavata Mamoeta nimo evievi ataho uli holisi duave unaha. Lovie ovokina nahate. Ige Dilavau vatae ata kebiamo kebia ibina vaevei malevenu. Keau keatehi ladeveholisito keau malaha tumuia. Katealemo Mamoe kena oleve keve tige abuna ke ehovai tigei. ⁵ Keau vani bahata lobolahaholisi vaveve toela keta vaholimale kemo Dilava telonae valamo ua.

Anelu abuita igaetae deiada

⁶ Ige di elehasege anelu moleu ehudamo bubuai ukolikolie hotoe dua loui vata bahatamo ata bahata, valada bahata, hoto bahata loumale kebia haiveho tinu. ⁷ Tiale baita loui avoe, “Dilava kotae vaniu aike lohomale kemo auna atae vaveve abuemo loui. Iale Dilava vabuhavoi hoesehavoi loui kosea, ‘Keu baluga.’ Kosealemo keu otogo vai vata vai davala vai e vanu. Iale ke igae hoesehavove.” ⁸ Anelu keu kateale louge anelu moleu ehovai tiale loui avoe, “O baluga Babuloni keu bokolahai dobanu. O keu teibae keate ke nahate. Iale keate keu au e toela mai vatae ata bahata ovei loui avoe, ‘Ko ive.’ E toela keu keate ke teibae vaveve. Iale vaveve katealemoike o keu bokolahai dobanu.”

⁹⁻¹⁰ Anelu keu katelahai louge anelu moleu ehovai tiale baita loui avoe, “Oleuoleu ovo keta munanaveta hoesehavoi abu valimo isi abu adamo ovo ke hisali otoveale keabuna e mole toela isi. E keu Dilava itumu eike. Iale auna e toela ke mai e moleta ebuiehaholisito kabumo ehosivage abuna ke isi. E toela keu koseanu. Dilavana kebia hanavege abuna veneu hodovavesiteve muneau lahai balale keve vatehani malei. Keabuna kateisege Mamoe isi anelu tumute keabuna kebia elegevei. ¹¹ Iale abuna vene kemo vatehani malesege diovena vani bahata veatigei. Katealemo vatae ata oleuoleu ovo keta munanave keta hoesehavoi ovo ke hisali maleale keabuna vavi vane ke bahatamo keve ui vatehani malegei.” Anelu keu hoto kateai lounu. ¹² Katealemo Dilava ata oleuoleu menakave ehovai abu uvu malei Iesuemo mavoale keu kabebiholisito abu evievimo negolahage keu duave.

¹³ Anelu keu hoto kateale loui gabiage di otogomo hoto mole evinu. Keu di namihai avoe, “Ko hisalia. Oleuoleu aike mesoho gabie Kosive lovi vai avuemo haluviale keabuna vahaeholahai.” Hoto kateale lousege Dilava Munana keu loui avoe, “Hoto seleveike. Keau vatae Dilava lovi vae dua vale kemo abuna ehue tiliege lovilahalivebene. Isito abuna abu lovie dua vale ke ibina malei.”

Vatae lovi deleaveve vaniu lohonu.

¹⁴ Keu kateai louge uoholige di elehasege goe mole taeteu velemanu. Ige ono mole ata ke nahateu ke golomo ugulamo uge kinavemo hanogo mole golota vale keu ua. Ige adavemo siga initehateu ua. ¹⁵ Keu kemo usege anelu moleu otogoe dubu kemo lohohi avuhou baita loui avoe, “Vatae loviu baeale deleaveve vaniu lohonu. Iale a siga mai talive delevenela.”

¹⁶ Ige goemo ugulamoale keu au siga mai tiale vatae loviu baeale kebia deleveve malei otovenu.

¹⁷ Ige ke iae di elehasege anelu moleu otogoe dubu kemo dobai lohoale keta siga initehate matahanu. ¹⁸ Keu kateisege anelu moleu otogoe vene ke nalimale keu Dilava hoesehavomale batabata kemo velemai lohoale anelu nehe siga inite matahale keho baita loui avoe, “Vatae hote mole uaini keu vovoanu. Iale a siga mai vatae talive ke heisi bohisi baive eha.” ¹⁹ Au kateai louge anelu keu au siga mai tiale vatae hote ke heisi bohisi baive ke ehai malei uaini voloimale hau mole kemo hatunu. Uaini voloimale keu Dilava itumu baluga ke nahate. ²⁰ Iale kemo abu uaini voloige eveu o baluga ke iae laluvai lotinu. Uaini ke eu lotiale taho nahate. Iale taho keu tabu nahate laluvai tiale egeveu tu handele maelo (200). Ige ovo mole osi keu hou tige taho keu evihai aivela ua.

15

Anelu seveni vatehani seveni (7)

¹ Vaveve katealeu uoholige vikoe vaveve mole baluga keu otogomo uge di ke elehai vikoanu. Anelu seveni (7) keau vatehani seveni (7) malei loholu. Vatehani keau vatehanie gabi. Keau uoholige Dilava itumu kena uoholisi.

² Ige di tota elehasege ono mole davala ke nahateu ua. Keu evali levolevoale ke nahate. Isito kemo veneu lahai tahoale ke nahateu ua. Iale ata degomoleau abu evievimo negolahai ovoe toela isi munanave hoesehavoholiale keau keve ua. Ata keau ovo ke namba sigisi, sigisi, sigisi (666) ke maholisito abu evievimo negolahalu. Iale keau davala nehe levolevoale ke vavamomo lavisito Dilavau gita igaegae oveale ke matagevei keve ua. ³ Iale keau keve ui Dilava esemu Moseseta Mamoe Eseta nogoli louma. Abu nogoli ke louale keu koseanu.

“Dilava, no Kosive baluga, au vuvunete ata.

Iale no a vaveve dua ke elehai vikolahalu.

Au vatae ata bahatae Kosive.

Iale a vaveve keau seleve isi inutolotolote unaha.

⁴ Katealemo ata bahataeabuna a vabuhavoi a ivi ebagevai loui kosea, ‘Au baluga.’

Kosive, a igae tumute.

Iale vatae ata bahatae abuna loholiege a vudimo kome bokoai vata bisi a hoesehavoi.

Kosealemo keau bahata a vaveve inutolotolo ke elegevelu.”

⁵ Keau nogoli ke louge uoholige otogoe dubu ke udahau alavoge di dubu ke uvu mole tumute elehanu. ⁶ Di elehasege uvu keve anelu seveni (7) vatehani seveni (7) maleale keau velehovoi loholu. Keau ogoe dua taete vavevei beleta golota vale ke malei abu ivuka umudilu. ⁷ Ige oe nehe igae ni moagamoagate keu baidisi golota vale seveni (7) malei anelu seveni (7) kebia ovenu. Baidisi kebia uvumo vani bahata umale Dilava ke itumu balugau tobalohonu. ⁸ Iale atagevai isi vuvuneve keau dubu ke uvumo ualeu venee dio ke nahate. Katealemo ataeau bae dubu ke uvue talivebene. Ilage anelu seveni (7) kebia vatehani (7) keau uoholigeto ataeau bae dubu ke uvue tai.

16

Dilava itumu baidisi seveni (7)

¹ Ige ke iae di evisege dubu ke uvue hoto mole baluga keu anelu seveni (7) kebiaho loui avoe, “Baidisi seveni (7) kebia malei talive vatamo tahosivave. Ige Dilava itumuu vatamo dobai tai.”

² Kateai louge anelu mole (1) keu au baidisi mai tiale vatamo ehosivanu. Ige oleuoleu ovoe toela ke hisali malei munanave hoesehavoale kebia vateu kubiai ohelahalu.

³ Ige ke iamo anelu mole (2) keu au baidisi mai tiale davalamo ehosivanu. Ige davala keu tahoale alue taho ke nahate. Kateige davalamo umale keau bahata haluvilu. ⁴ Ige ke iamo anelu mole (3) keu au baidisi mai tiale e hanamo ehosivage e keu tahoanu. ⁵ Ige di evisege anelu mole e bahata nalievemale keu Kosive namihai avoe, “Au ata tumute. Subuta ui aike umale ata. A vatae ataeamo vaveve kateale vale keu vaveve inutolotolote. ⁶ Kosealemo abu subuta a ata a beloveta kebia havege tahoeabeu lotinu. Iale a louge eu tahoale ke abuna isi. Keu abu vale ke ibinaike.” ⁷ Anelu keu kateale louge di evisege Dilava hoesehavomale tababata keve hoto moleu loui avoe, “Dilava, no Kosive baluga, au atae toela kebiaho vaveve kateale vale keu inutolotoloanu. A vaveve keu seleve unaha.”

⁸ Hoto keu uoholige anelu mole (4) keu au baidisi mai tiale vanimo ehosivanu. Kateige vani keu tumu balugage vuvuneve keu atae vava mahoevenu. ⁹ Ige vatae ataeau kemo vatehani baluga maleime Dilava ivi aiohavolu. Dilavau vatehani kateale hanavoi isiviale abu vaveve toela halevai ivive hoesehavoi loui kosea, “Keu baluga.” Isito abu katealeho isiviholilu.

¹⁰ Ige anelu mole (5) keu au baidisi mai tiale ovo neheu davalamo lohoale ke telonamo ehosivanu. Ige ovo ke vatae vau giduai loanu. Ige vatehani maleale ata keau kekolahai habeonalu. ¹¹ Isi kubilahai vatehani maleale kemo abu abu vaveve toela halevaholisito otogoe Dilava ke ivi aiohavolu.

¹² Ige ke iamo anelu mole (6) keu au baidisi mai tiale e mole baluga Iuvaleti kemo ehosivage e keu seliai uoholinu. Katealemo vaniu velemamale keve vatae kosive abuna loholiege e ke houi vaki mole tai. ¹³ Ige di tota elehasege munanae toela abuita igaeta maoka nahate keau loholu. Moleu ute baluga ke akamo velemai lohonu. Ige moleu ovo nehe ke akamo velemai lohonu. Isege moleu loboe beloveta ke aimo lohonu. ¹⁴ Munanae toela abuita igaeta keau vikoe vaveve vamalea. Iale abu tiale isiviai vatae kosive kebia bahata uvuiabe ige abuna mole bevuevei Dilavaluvuta mole havei. Dilava keu vuvunete. Isito abuna vani baluga kemo avuluvuta mole havei.

¹⁵ Iesu louale hoto ko evive. Au loui avoe, “Di lohoveve keu vavoloe ata nahate. La bae hilokalivebene. Isito oleuoleu nita ui abu vaveve hoesehavoale keabuna vahaeholahi. Kosealemo Dilavau au vaveve doge ogege abu abu vaveve hoesegeveale kemo abu bae Dilava nimo matialivebene.”

¹⁶ Ige munanae toela keau vatae kosive holovevi loholu. Keau lohoale Hibulu hotomo matama mole ivi Amagedoni keve ua.

¹⁷ Ige anelu gabi (7) keu au baidisi mai tiale helukamo ehosivanu. Kateige dubue uvue telonamo ugulamoale Kosive keu loui avoe, “Elemua.” ¹⁸ Kateai louge hata nivolekage vau luluana. Ige hamue toelau hatunu. Subuta ataeau vatamo usege katealeu hatuholinu. Keu hamue toela seleve. ¹⁹ Keu kateige o baluga Babuloni keu vakolahai abuita igaetanu. Moleu vaki mole. Ige moleu vaki mole. Ige moleu kateanu. Keu kateisege vata bahatae tauni bahata keau katelahi uoholilu. Vaveve katealeu lohoale keu koseanu. Dilavau Babuloni vaveve toela huhuai au itumue e toela omige au bahata inu. ²⁰ Hamu kateai hatusege davalaie nimo vata bahataeau uoholilu. Ige vatae tana bahata keau bokobokoai uoholilu. ²¹ Ige otogomo aisi baluga mune nahate keau dobuluvisi ata havelu. Aisi keau balugai isuale keau atae isu ke nahate. Vaveve toela baluga katealeu ataemo lohoge abu Dilava ivi aiohavolu.

17

Teibae keate seleve

¹ Ige anelu seveni (7) baidisi maleale ke moleu dae lohoale daho loui avoe, “Lohoge Dilavau teibae keate nehe ibina omiveve vaveve a haivui. Keate keu e moaga kebia vavamo ui teibama. ² Ige vatae kosiveau keate keluvuta teiba balugalahalu. Ige vatae ataeau lohohi keate ke teibae e toela ige kinaeabeu toelage abu avuluvuta teibalalahalu. Iale lohoge nahi talive ke elehai.”

³ Ige Munana Tumuteu di mai negotige anelu keu di mai tiale botoe velemanu. Ige di keve velemanu keate moleu ovo nehe tahote ke inumo ugulamoale ke elehanu. Iale ovo ke kina bahata seveni (7). Ige kinave kebiamo kauda teniau (10) ua. Ige Dilava aiohavoale ivie toela keau ovo ke vava bahata bamulu. ⁴ Keate ke ogou duave baa. Ogove mole keu tahote. Ige moleu bukate. Keate keu golo malei mune dua malei davalaie mune mole taete malei au ebika kaeahavonu. Isi kabu golota vale ke matahanu. Ke uvumo keate ke teibae vaveve isi vaveveve toela degomoleau ua. ⁵ Iale keate ke valimo abu hoto mole hisialiale ke ihu hogolahanu. Hoto keu koseanu. Babuloni o baluga keu teiba bahata kebia kebia neina. Isi vatae vaveve toela bahata kebia kina. ⁶ Ige di elehai hilokage keate keu abu Iesu ata havege haluviale kebia taho ige kinaveu kavanu. Ige di elehai vikoanu. ⁷ Di kateai vikoige anelu keu daho loui avoe, “A osiohoike vikoanu. Evisege di keate ke ihu aho loui. Isi ovo nehe kinave seveni (7) isi kaudave teni (10) au golovemo ugulamoale ke ihu aho loui. ⁸ A ovo elehale keu subuta ua. Isito hatinu. Iale vanivena lohoge auna kumoe hovelahai lohohi. Ige vatae ataeabuna ovo keu hatiale tota hovelahale ke elehai vikolahai. Dilavau vata ko vaholisiti ukolikolie buka kemo atae ivi hisalianu. Iale buka kemo iviabeu uoholiale keabuna ovo ke elehai tetelahi. Isito Dilavana bae ovo ke iomage auna vaneu hodovavesite keve tai.

⁹ “Di hoto mole ko louge a lululeaniege ke hiloka. Ovo ke kina seveni (7) keau tana seveni. Ige ihuve mole keu koseanu. Keau vatae kosive seveni. Iale teibae keate keu tana kebiaala ugumai uma. ¹⁰ Vatae kosive seveni kebiamo ada mole keau haluvilu. Ige moleu aike ui ata nalievema. Isege moleu sohu lohoholinu. Auna lohoniege bae vata kove ui egealivebene. ¹¹ Ige ovo nehe subuta hatai uoholiale keu vatae kosive seveni (7) kebia vigomo avuta kosive mole. Iale auna tota hovelahai vatae kosive eiti (8) holisi. Isito Dilavana bae ovo ke iomage auna vaneu hodovavesite keve tai.

¹² “Ovo ke kauda teni (10) a elehale keau vatae kosive degomole. Vatae kosive teni (10) keau sohu lohohi vuvune maleholilu. Isito abuna bae vuvune malei ovo keluvuta igaetolahi ata nalieveito vaniabeu bae egealivebene. ¹³ Kosive teni (10) kebia huhuihuhui au igae. Iale abuna abu nego abu vuvune ke malei ovo ke omisi. ¹⁴ Katelahaime isivilahai Mamoe keluvuta mole havei. Isito Mamoe kena au hohavei tabagevege abu abu evievimo negolahale kebiahi lohoniege vatae kosive kebia havehatui. Kosealemo Mamoe keu kosivebia kosive baluga. Iale keu vatae kosive bahata kebia evigevenu.”

¹⁵ Anelu keu kateai di namihaito hoto mole daho lounu. Isi avoe, “Teibae keate nehe e baluga kebia vavamo umale e keau vatae ataea. Keau o moleve umale ataea. Isi hoto igaigae loumale ataea. ¹⁶ Ige kauda teni (10) isi ovo a elehale keabuna teibae keate keho itumulahi aiohavoge auna vava unahata ui. Isi abuna misive isito momoluve malei venemo mahoi. ¹⁷ Dilavau au isivie vaveve mai uvuiabemo mamoeale kemo abuna

igaetolahi abu nego abu vuvune malei ovo ke omige auna vaveve katealemo Dilava hoto mai selevetisi. ¹⁸ Vaveve ke ihu kateanu. Ige keate nehe a elehale keu o baluga. Iale keu vatae kosive kebia bahata nibievema.”

18

Babuloniu dobale deiada

¹ Anelu keu kateai loui gabiage di elehasege anelu moleu otogomo dobai lohonu. Keu vuvune balugate. Iale keu dobai lohoge atagaveu vata bahatamo lotai ataganu. ² Anelu keu baita hoai avoe, “O baluga Babuloni keu bokolahai dobanu. Ige munanae toela, uge toela keau o kemo uma. Iale keu matamae tumu. ³ Kosealemo o keu teibae keate nahate. Iale keu au e toela malei ata bahata ovege abu ilu. E toela keu teibae vaveveike. Ige vatae kosive kebiata keate keluvuta teibalahalu. Ige bisinesi vai avuemo moni malemale keau keate ke vaveve toela kebiamo moni baluga malelu.”

⁴ Anelu keu kateai louge di evisege hoto moleu otogomo lohonu. Hoto keu loui avoe, “Di ataea, o ke halevai lohove. Lana keve uliege avuluvuta vaveve toela vage dana o keta lata aiogevei. ⁵ Kosealemo o ke vaveve toela keau moagamoagage Dilavau kebia mamageveholisito kebia elegeveve hilokaevenu. ⁶ Iale keate keu la aiogeveale ke nahate lata aiahavove. Mesoho au laemo vaveve toela va igaeage lata ibinave ke va abuiave. Au vatehani ese laovege vatehani baluga omive. ⁷ Isi au au ebika mai mihatui vaveve toela unaha vamale kemo vatehani baluga omige au ninai. Kosealemo keu huhuai avoe, ‘Da igaeu keate baluga kuini ke nahate. Dau gobu holioholinu. Iale di bae vuvuigelivebene.’ ⁸ Keu kateai loualemo vatehani koseale abuna vani igaemo avuemo lohohi. Vavahani toela, uvu baluga, vae baluga keabuna lohohiege aiahavoi. Ige auna venemo lahai. Vaveve keu koseanu. Dilavau vaveveve avuemo kaovale keu vuvunete kosive baluga.” Hoto katealeu otogomo lohonu.

⁹ Ige vani kela o baluga kena lahasege vatae kosiveau avuluvuta teibalahai vaveveve toela vamale keabuna diove ke elehai avuhu ninalahai. ¹⁰ Isi haeavamole lavisi vaveve isute ke elehai tetelahi loui kosea, “Nohoma, o baluga Babuloni ke nohoma. Keu o negote. Isito vanie ni igae ke uvumo Dilavau ibinave ominu.”

¹¹ Abuna katelahai lousege bisinesi vai avuemo moni malemale ata keabuna abuta o keho uvulahi ninalahai. Kosealemo ataeabuna oleve kateai bae onobenobeabe ke voievei. Ke voieveve humahau uoholinu. ¹² Atabeu bae kunaiabe koseale voievelivebene. Golo, siliva, mune levolevote, davalae mune mole taete, ogoe dua hisalite, idie dua avuemo onobenobe vaevemale isi auli mesoho mune tolote abuemo onobenobe vaevemale kebia voieveve humahau uoholinu. ¹³ Isi kolemi, asilae vate, senisi hagote, e mole uaini, gilisi, valava, bolomakau, mamoe, osi isi osi butuhamale, ata voieveve isi mesoho heiata loviemale kebia voieveve humahau uoholinu. ¹⁴ Katealemo onobenobe vaveve avuemo moni malemale keabuna o keho loui kosea, “A onobenobe dua kebiaho isiviamale keau bahata uoholilu. A kunai mesoho a iviu balugale keau uoholige a bae tota malelivebene.” ¹⁵ Iale keu o kemo bisinesi vai moni baluga malemale keabuna haeavae lavisi hoto kateale loui. Kosealemo keabuna vaveve kemo vatehani malemale ke vabuhavoi. ¹⁶ Abuna keve lavisi ninalahai loui kosea, “O baluga ke nohoma. Kosealemo subuta keu vani bahata ogoe dua tahote bukate hatuma. Isi vani bahata golo malei mune dua malei mune taete malei au ebika kaeahavoma. ¹⁷⁻¹⁸ Isito aike vanie ni igae kemo kunaive keau bahata uoholilu.” Moni baluga malemale keabuna katelahai loui. Isege bouti matahamalea, avuemo tai lohomalea, avuemo lovilahamalea, isi boutimo moni malemale keabuna bahata haeavamole lavisi o ke dio elehai kekolahai loui kosea, “Subuta obe baluga ke nahateu uoholinu. Isito ke igae.”

¹⁹ Abuna katelahai loui gogea malei abu kinamo hatui ninalahai loui kosea, “O baluga ke nohoma. Kosealemo o kemoike nahi moni baluga malelu. Isito aike vanie ni igaemo o baluga keu uoholiale nahiabuna kunaiholisi.” Kunaite keabuna hoto kateale loui. ²⁰ Isito otogoe umalea, Dilava ataea, Iesu hoto loumale ataea isi beloveta ataea la bahata vahaeholahave. Kosealemo o baluga keu la aiogeveale ke ibinahoi ke Dilavau aiahavonu.

²¹ Ige di elehasege anelu mole vuvunete keu mune baluhataho mai davalamo mihatui loui avoe, “Ko nahate Dilavana Babuloni o baluga aiahavoge auna dobai uoholisi. ²² Ige ataeau bae gita hamamale, sale hamamale isi kibi uvumale hoto ke tota evilivebene. Ige malahaeau bae o kemo lovilahi onobenobe vaevelivebene. Isege keateau o kemo bae lovi hudualivebene. Kosealemo o kemo ataeabuna uoholisi. ²³ Ige o kemo lamebabeu bae tota atagalivebene. Isege mohohoeau mahohohi mole holoeveveve vaveve keu bae ulivebene. Kosealemo o kemo bisinesi vai moni baluga malemale keu o bahata kebia evigeveve moni baluga malelu. Isi abu loboe hotomo vatae ata bahata lobogevege ataeau hotoeabe malu.

²⁴ Isi o kemo Dilava beloveta havei evievi ata kebiata havege tahoeabeu lotinu. Isi vatae ata moagataho havelu. Katealemo Dilavana o baluga Babuloni ke aiohavoi.

19

Nahi Dilava hoesehavoi.

¹ Anelu keu kateai lousege ke iae di evisege otogoe ata moagataho keau baita lolahai loui avoe, “Dilava keu nahie Kosive. Ukolikoli, ataga, nego keau avuemo ua. Iale nahi ivive hoesehavoi.” ² Kotave vaveve keu inutolotolo unaha. Iale keu teibae keate kemo kotai aiohavoale keu koseanu. Keate keu au teibae vaveve kemo vatae ata aiogevema. Isi kateai Dilava esemu kebia havege Dilavau ibinave omisi aiohavonu.” ³ Abu kateai louito tota loui avoe, “Nahi Dilava hoesehavoi. Kosealemo o baluga keu lahage diovena vani bahata veatigei.” ⁴ Abu kateai lousege otogoe eloda tuenti voa (24) isi oe nehebia voa (4) ni moagamoagate keau Dilava telonae vudimo kome bokoai vata bisi hoesehavolu. Abu loui avoe, “Hoto seleveike. Iale noeabuna a hoesehavoi.”

Mamoe Eseu au ata maleveveve

⁵ Hoto katealeu uoholige Dilava telona kemo hoto moleu lohonu. Hoto keu loui avoe, “Dilava esemu bahataea, evive. La oleuoleu ivi balugate mesoho ivivesite Dilava vabuhavomale lana bahata Dilava hoesehavove.” ⁶ Hoto keu uoholige di evisege otogoe ata moagataho keau hoto mole loulu. Hotoeabe keau eavu egumai luluale ke nahate. O mesoho hatau vuto balugale ke nahate. Abu baita loui avoe, “Nahie Kosive Dilava keu vuvune balugate. Keu ata bahata nalievemale Kosive. Iale nahi ke hoesehavoi.” ⁷ Isi nahi vahaeholahai ivive ebagevage keu duave. Kosealemo Mamoe keu au mahina melameveve vaniu lohonu. Ige Dilavae ata keau ma kokovale ke nahate valu. Iale ma keu au ebika hoesehavoma. ⁸ Abu ogo mole dua taete mai omige keu ke vanu. Ogoe dua keu Dilava atae vaveve dua ke nahate.”

⁹ Katelahai louge anelu nehe keu daho loui avoe, “Ko hisalianela. Mamoe keu la hohavei avoe, ‘Di mahina melameveve lovi kemo lohove.’ Iale au olerneoleme hohaveale keabuna vahaeholahai.” Anelu keu kateai di namihaito tota loui avoe, “Hoto keu Dilava hoto seleve.” ¹⁰ Au kateai louge di velove heimo kome bokoai vata bisi isiviai hoesehavoi. Isito au daho loui avoe, “Ke va haleito Dilava igae hoesehavonela. Kosealemo nahiau Dilava lovi vamale ataea. Ige a haokuvuiuu Iesuu au hoto louale ke mai ehovale kebiata lovive vama. Iale nahi bahataebuna Dilava igae hoesehavoi. Iesuu au hoto louale ke vuvunemo beloveta ataeabuna hotove ke igae loui ata haivegei.”

Osi taetemo ugulamoale

¹¹ Hoto keu uoholige di elehasege otogou dikolahage osi mole taeteu lohonu. Osi ke golomo ugulamoale kosive ke ivi abu ivihai avoe, “Evievite isi Seleve.” Iale kena atae vaveve kaovei abuhi mole havege vaveveve kena toelaholisito inutolotoloi. ¹² Iale ata ke niu venee vedodo ke nahate. Ige kosive hanogo moagamoagaeau kinavemo ua. Ige avuemo ivi mole igae hisialie ke ataeau ke ihu hilokaholilu. Isito avu igae ke hilokanu. ¹³ Isi au ogo mole hatuale keu tahomo manemeale ke nahate. Iale keu bahata taohanu. Ige ivive mole abu ivihai avoe, “Dilava Hoto.” ¹⁴ Iale ata keu osi kemo lohoge otogoe tuvalie ataeau ehovai avuluvuta loholu. Ata keau ogoe dua taete vaveve igaegaeai osi taetemo ugulelevai loholu. ¹⁵ Isege ata nehe ke aimo siga mole inite keu lohoale auna siga keta vatae atahi tuvaliame kebia bahata malevei. Auna auli bedoia matahai kebia nalieve tumutumuai. Kosealemo Dilava keu vuvunete. Iale abu uaini voloage eveu lotimale ke nahate itumuve balugana ataemo lohoge auna kebia aiogeve. ¹⁶ Iale ata ke ogota velovetamo hisali moleu ua. Hisali keu koseanu. Avoe, “Di vatae kosive kebia bahata evigevenu. Dau kosivebia Kosive baluga.”

¹⁷ Ige di tota elehasege anelu moleu vanie nimo lamisi ua. Keu baita hoai ugu bahata ehumo bubuluvimale kebiaho loui avoe, “Igaetoai loholive Dilavau laheho lovi vale ke ive. ¹⁸ Loholive vatae kosive kebia misi, tuvalie ata isi kebia kosivebia misi, osi isi osimo ugulamomale kebia misi isi ata bahata ivi balugate, ivi esete kebia misi bahata ihatuve. Isi ata degomole abu isivi vai olahamale, degomoleau ibinaholisito lovilahamale kebia bahata ihatuve.” Anelu keu kateale loui hoanu.

¹⁹ Ige di tota elehasege ovo nehe davalamo lohoale keu vatae kosive kebia holoeve tuvalie ata kebiata holoeve lohoale isiviai osi taetemo ugulamoale ke isi tuvalive ata kebiahi mole havei. ²⁰ Abu kateige Kosiveu ovo aihanite isi loboe beloveta kebia malevenu. Loboe beloveta keu subuta ovo ke vudimo vikoe vaveve vaevenu. Isi loboe vaveve kebiama ata moaga lobogevege abu ovo ke hisali malei munanave keta hoesehavolu. Katealemoike Kosiveu louge abu haveholisito nita kebia malevi venemo

hatuevelu. Vene ke matamau tabu nahate. Isito vene keu lahai tahoale muneu balale ke nahate. ²¹ Ige osimo ugulamoale keu siga inite aivemo lohoale keta tuvaliabe ata havege abu haluvilu. Ige ugu bahata ehumo lohoaleau kebia misi ihatuge uniabeau hanilahalu.

20

Vagana uani taoseni (1,000)

¹ Ige di tota elehasege anelu moleu kumoe ki mai seimi mole isute keta matahai otogomo dobai lohonu. ² Ke mai lohoaleu ute mole baluga subuta ui lohomale ke umuvanu. Ke ivilike Setene. Keu isiviale ke umuvage au vagana uani taoseni (1,000) ke uvumo ui. ³ Isi mai kumoe mihatui inohoveho udaha bamui lokanu. Katealemo au bae vatae ata lobogevelivebene. Ilage vagana uani taosenina (1,000) uoholisege auna lulehage auna vani moagavesite ohanoi au isivi vai.

⁴ Ige di telonamo uguivoale kebia elegevenu. Ige Dilavau vuvune malei kebia ovege abu vuvune kemo atae vaveve abuemoe kaovama. Ige di elehage ataeau Iesu esemu havege haluviale kebia munanau ua. Esemu keau Iesu vaveve loui Dilava hotota loui ata haivege abu kebia havelu. Keau ovo nehe toela isi munanave ke guligulihavoholilu. Isi ovo ke hisali abu valimo mesoho abu adamo otoveholilu. Kemoike abu havege haluvilu. Iale abu hovevevei kosive holisi vagana uani taoseni ke uvumo Iesuluvuta igaetoai vatae ata nalievelu. ⁵ Keau vasohuta hovevevelu. Isito degomoleau hoveveveholiale keabuna uliege vagana uani taoseniu (1,000) uoholisege abuna bae hovevevei. ⁶ Ataeau vasohuta hoveveveale keau ata tumutea. Iale Dilavana kebia hoesegevei vuvune ovege abu bae tota haluvilivebene. Abuna dubumo loviemale kebia nahate vai Dilavata Kelisota hoesegevei. Isi vagana uani taoseni (1,000) ke uvumo Iesuluvuta igaetolahaui vuvunevemo ui.

Abu Setene mai venemo mihatulu

⁷ Iniege vagana uani taoseniu (1,000) uoholige abuna bae Setene mai umuvale ke lulehage auna tai. ⁸ Tiniege vatae ata bahata oleve keve umale kebia lobogevei. Kebia ivilike koea. Goga, Magoga. Iale Setenena kebia bahata tuvaliho malevei igaetoage moagaebena davalae esaga ke nahate vai. ⁹ Abuna vata bahatamo tiliege o baluga Dielusalema ke evilikahavoi isiviale Dilava atahi mole havei. Isito o keu Dilava isivie o. Iale auna otogomo vene hanavoge auna dobai lohoniege kebia bahata mahoevei gabiai. ¹⁰ Isege abuna loboe ata nehe Setene mai venemo mihatui. Vene keu tabu nahate. Isito vene keu lahai tahoale muneu balale ke nahate. Vene kemoike abu subuta ovo nehe isi loboe beloveta kebia malevei hatulu. Iale vene kemo Setene, ovo nehe isi loboe beloveta keabuna vavi vani kemo vatehani malegei.

Atae toelae vaveve kaovaveve

¹¹ Ige di elehasege Kosiveu telona baluga taete golomo ugulamoi ua. Iale ke vuvunemo otogou vatati uoholige di tota elegeveholinu. ¹² Di ke elehage uoholisege haluviale keau telonamo ugulamoale ke vudimo lavisi ua. Ke degomoleau ivi balugate. Isege degomoleau ivi balugaholiale. Abu keve lavisi usege abu buka degomole alavolu. Isi ukolikolie buka keta alavolu. Iale buka kebiamo haluviale keau vadeu vamale keau ua. Iale buka kebiamo Kosiveu vaveveabe abuemoe kaovanu. ¹³ Davalata vatatamo haluvisi odavae tiale keabuiki bahata Kosive ke vudimo lavisi ua. Ige Kosive keu abu vadeu vadeu vamae ke abuemoe kaovanu. ¹⁴ Keu uoholige au louge hatihati isi odavae umale kebia vuvuneu uoholinu. Abu kebia malevei venemo hatuevelu. Venemo hatuale keu hatihati abuulike. ¹⁵ Ige ukolikoli buka kemo iviabeau uoholiale kebia abu malevei vene kemo hatulu.

21

Otogoe dogo vatae dogo

¹ Ige di tota elehasege otogoe dogo isi vatae dogo keau ua. Otogo, vata isi davala subuta uale keau uoholige dogaveau lohoi ua. ² Ige Dilavau louge Dielusalema oe dogo keu otogomo dobai lohonu. O keu o tumute. Iale ke gadehavoi hoesehavoale keu ma moleu au kolia melameho ogoe dua vale ke nahate. ³ Ige di evisege Kosive telona kemo hoto moleu lohoale baita loui avoe, "Evide. Dilavau nova au atahi igaetoanu. Auna abuhi uge abuna atave holisi. Isege auna abuhi ui Dilavaeabe holisi. ⁴ Isi auna nimetavaeabe ulihage abu bae tota uvulahaui ninalahalivebene. Isi vatehani malei haluvilivebene. Kosealemo subuta vaveve keau uoholilu."

⁵ Hoto keu kateige telonamo ugulamoale Kosive keu loui avoe, "Di nova onobenobe bahata vaveve dogave holilu." Kateai louito di namihai avoe, "Di hoto keu seleve. Di bae ke halelivebene. Isito dana vani bahata ke vagei. Iale di hoto ko hisalianela. ⁶ Di lovi

bahata vavege vesuanu. Dau onobenobe ke bahatae umuka. Daemo vavege bahataeau lohoale abuna tota daemo vesuai. Iale olemeabuna enulahage dana ukolikolie e hanamo e hai heiata ovege abuna isi. ⁷ Abuna abu evievimo negolahage dana kateale vai. Dana kateale vai Dilavaeabe holisege abuna di ese holisi. ⁸ Isito di lovi vabuhavomalea, evieviholimalea, vaveve tola vamalea, ata havemalea, teibalahamalea, evelahamalea, loboe dilava hoesehavomalea isi lobolahamalea keabuna bahata veneu lahale muneu balale matama keve tihatui. Iale hatihati keu hatihati abuilike ke.

Matamae doga Dielusalema

⁹ Ige subuta anelu nehe seveniau (7) abu baidisi seveni (7) malei vatehani gabi vatamo keohale ke moleu dae lohoale daho loui avoe, Lohoge naiti talive Mamoe neheu au mahina melameveve elehai.” ¹⁰ Kateai louge Munana Tumuteu di mai vuvunetige anelu keu di melamei tiale tana mole balugae velemanu. Keve velemanu o tumute Dielusalema ke mai di haivuge di elehanu. Ige di ke elehasege keu ehue Dilavau umale keve dobai lohonu. ¹¹ Dobai lohosege Dilava atagau avuemo uge o keu ataga baluganu. Atagave keu mune mole levolevote ke nahate. Mune ke ivilikie diasiba. Keu mune taete seleve. ¹² O ke vavamo abu hala mole balugataho hou lotiale mai molehi dalu. Ige veatiale keu egetanatana. Kemo udahave bahata tuelo (12). Iale anelu tueloeau (12) udaha kebia nibievema. Udaha kebiamo abu Iselala valada tuelo (12) kebia ivi igaegae hisalielevelu. ¹³ O ke halau vanie niu velemamale keveatae udaha abuita igaetau ua. Ige vanie niu dobamale keveatae udaha abuita igaetau ua. Ige vaki mole isi vaki mole ketave katelahal. ¹⁴ Abu mune balugataho tuelo (12) malei halatanaho otovei ke golomo hala ke houlu. Iale mune kebiamo abu Mamoe esemu tuelo (12) kebia ivi hisalielevelu.

¹⁵ Ige anelu daho louale keu goloe vavu mai isiviai o ke vavuui. Udahave halave kebiata vavuuei. ¹⁶ Anelu keu o ke vavuige vaki mole isi vaki mole keau mole nahate. Vivitini handele maelo (1,500). Ige veativeati keta kateanu. ¹⁷ Isi anelu keu o ke hala vavuue keu koseanu. Tu handele sikstini (216) viti. Iale vavuue idi keu anelue vavu holioholinu. Isito keu atae vavu. ¹⁸ Abu mune mole levolevote malei o ke hala houlu. Iale mune ke ivilikie diasiba. Isi ke uvumo goloe dua malei avuta o houevelu. O keau levolevoale evali ke nahate. ¹⁹ Hala ke valamo abu mune balugataho tuelo (12) otovei kemo mune ese dua otovei lotilu. Kateige mune ke elehilehiu duave baa. Mune balugataho tuelo (12) kebia iviabuike koea. Moleu diasiba. Ige moleu savaia. Ige moleu sasidoni. Ige moleu emolodi. ²⁰ Ige moleu sadonike. Ige moleu sadiasi. Ige moleu kisolaiti. Ige moleu belolo. Ige moleu tobasi. Ige moleu kisobasi. Ige moleu diasiniti. Ige moleu amitasi. Mune baluga tuelo (12) kebia iviabulike. ²¹ Isi davalae mune mole taete tuelo (12) kebia abu malei udaha tuelo (12) kebia houevelu. Isi goloe dua malei o ke humahada valu. Iale humaha keu levolevoale evali nahate.

²² Isito di o kemo dubu elehaholinu. Kosealemo Dilava keu vuvune Kosive igae. Iale keu Mamoeiti o kemo ualemo oleve kateai dubuu bae ui. Keau o ke dubuabulike ke. ²³ O kemo vaniu bae halulivebene. Ige batata halui atagalivebene. Kosealemo Dilava keu au Mamoe Eseti o ke ataga. ²⁴ Iale vatae ataeabuna o ke atagamolahagei. Ige vatae kosive abuna o keve loholiege abu vatae vuvune maleale ke malei Dilava omisi hoesehavogei. ²⁵ Ige o ke udaha keau bae bamulivebene. Isito vani bahata abuna alavoi ugei. Kosealemo keve vaviu uoholinu. ²⁶ Ige vata bahata kebiamo ataeabuna o keve loholiege abu vatae vuvune maleale ke malei Dilava omisi hoesehavogei. ²⁷ Isito ata oleuoleu vaveve tola vamale keau bae o keve talivebene. Isi ata oleuoleu vaveve tola vai lobolahamale keau bae keve talivebene. Isito Mamoe keu au ukolikolie bukamo iviabe hisalieveale kebia unahaebuna o ke uvue tai.

22

Ukolikolie e dua

¹ Ige anelu keu o kemo ukolikolie e mai di haivunu. E keu tae selevelanu. E keu Dilava isi Mamoevetae telona kemo hanai lohonu. ² Hanai lohoi laluvai humahae vigola tinu. Ige e ke vaki mole ukolikolie idi moleu laminu. Ige vaki mole moleu laminu. Iale vagana igae bata igaegae ke uvumo idi keabuna hahuiavogei. Iale ataeabuna vanaeabe bohisi abu vava ulihage vavaeabeu bae tumulahai vavahanilahalivebene. ³ Iale o keve vaveve toelabeu bae ulivebene. Isito o kemo telona kemo Dilavau Mamoeiti uguavosege Dilava esemuabuna gulgulilahai hoesehavogei. ⁴ Abuna nive elehasege ivivena valiabemo ui. ⁵ O kemo vaviu uoholige ataeau bae lameba hanelivebene. Ige vani keta bae halulivebene. Kosealemo Kosive baluga Dilava kena o kemo atagage ataeabuna kosive holisi vani bahata avuluvuta ui lovive vagei. ⁶ Anelu keu daho loui avoe, “A hoto bahata hisaliale keu seleve unaha. Dilavau bae ke halelivebene. Isito auna vani bahata vagei. Dilavau au Munanae

Tumu mai au beloveta ovmale keike au anelu hanavoi isiviale au esemuve haivege abu ono vadeu aike lohoveve ke hilokai.”

Iesu loholiveu vuguvuguanu.

⁷ Anelu keu kateai louge Iesuu loui avoe, “Di louge evive. Di lohoveve keu vuguvuguanu. Iale oleuoleu gabie vaveve buka komo uale ke eviliege abuna vahaeholahai ue dua vai.”

⁸ Dau di ivilike Dioni. Iale di vaveve kebia bahata elegeve hoto kebiata evinu. Vaveve keau uoholige di kome bokoai vata bisi isiviai anelu nehe vaveve bahata di haivuale ke hoesehavoi. ⁹ Ige au daho loui avoe, “Ke va haleito Dilava igae hoesehavonela. Nahiau Dilava lovi vamale ataea. Ige a haokuvuiiau beloveta ata holiiale isi oleuoleu buka ko hoto evisi ehovamale kebiahi nahiau lovive vamalea. Iale nahi bahataebuna Dilava igae hoesehavoge.” ¹⁰ Au kateai louito tota di namihai avoe, “Ainaho gabie vaveve buka komo uale ko mai mahogovalive. Kosealemo vaveve ko bahata velehovoveve keu vuguvuguanu. ¹¹ Iale vani kela oleuoleu vaveve toela vamale keabuna vaveve toela vagei. Isi oleuoleu uvuiabemo toela uale toela kena abuemo ugei. Isito vani kela oleuoleu vaveve dua vamale keabuna vaveve dua vagei. Isi oleuoleu vaveve tumute vamale keabuna vaveve tumute vagei.”

¹² Anelu keu kateai louge Iesuta loui avoe, “Di hoto ko evive. Di lohoveve keu vuguvuguanu. Iale dana atae ibina malei lohoniege vaveveabe kaovai ibinaeabe igaegae ovi. ¹³ Dau onobenobe bahatae umuka. Dau vasohuta ui gabie umale Kosive. Daemo vaveve bahataeau lohoale abuna tota daemo vesuai.

¹⁴ Oleuoleu abu uvu hoesegevege dua vale keabuna vahaeholahai ue dua vai. Kosealemo Dilavana vuvune ovege abuna ukolikolie idi ke bai isi o ke udahala velehovoi matamae doga keve tai. ¹⁵ Isito atae toela keau bae o ke uvue talivebene. Ata keabuliko koea. Evelahamalea, teibalahamalea, ata havemalea, loboe dilava hoesehavomalea, loboe hoto loumalea, loboe vaveve vamalea. Ata kateale keau bae keve talivebene.”

¹⁶ Au kateai louito tota loui avoe, “Iesu dailiko. Iale di vasohuta di anelu hanavoge au tiale vaveve kebia bahata loui ekalesia la haivenu. Dau Deividi valada kemo lohonu. Dau vae alalami didi dailike ko.” ¹⁷ Ige Munana Tumute isi Mamoe nehe mahina keau loui avoe, “Lohove.” Ige oleuoleu hoto ko eviale kebiabutana loui kosea, “Lohove.” Iale oleuoleu enulahai ukolikolie e keho isivilahaliege loholive heiata e ke hai ive.

Hotoe gabi

¹⁸ Ige Dioni data hoto mole louge evive. La oleu buka komo gabie vaveve uale ke evisi au isivie hoto degomole malei keta igaetoai louge Dilavana au buka komo vatehani louale keta aohavoi. ¹⁹ Ige la oleu gabie vaveve buka komo uale kemo ivi mole etulei mai mihatuge Dilavana louge au bae ukolikoli idie bai nehe ke ilivebene. Isi o nehe tumute keve talivebene.

²⁰ Ige ata neheu hoto ko bahata malei selevetiale keu loui avoe, “Seleveta di lohoveve keu vuguvuguanu.” Au kateale louge di loui kosea, “Duave, di Kosive Iesu, loho.”

²¹ Di isiviale nahie Kosive Iesu Kelisou vani bahata la huhueve la hoesegevegei. Di hotou kemo kateai ua.

Read the New Testament daily

January

date	Scripture
1	Matiu 1.1-2.12
2	Matiu 2.13-3.6
3	Matiu 3.7-4.11
4	Matiu 4.12-25
5	Matiu 5.1-26
6	Matiu 5.27-48
7	Matiu 6.1-24
8	Matiu 6.25-7.14
9	Matiu 7.15-29
10	Matiu 8.1-17
11	Matiu 8.18-34
12	Matiu 9.1-17
13	Matiu 9.18-38
14	Matiu 10.1-23
15	Matiu 10.24-11.6
16	Matiu 11.7-30
17	Matiu 12.1-21
18	Matiu 12.22-45
19	Matiu 12.46-13.23
20	Matiu 13.24-46
21	Matiu 13.47-14.12
22	Matiu 14.13-36
23	Matiu 15.1-28
24	Matiu 15.29-16.12
25	Matiu 16.13-17.9
26	Matiu 17.10-27
27	Matiu 18.1-22
28	Matiu 18.23-19.12
29	Matiu 19.13-30
30	Matiu 20.1-28
31	Matiu 20.29-21.22

February

date	Scripture
1	Matiu 21.23-46
2	Matiu 22.1-33
3	Matiu 22.34-23.12
4	Matiu 23.13-39
5	Matiu 24.1-28
6	Matiu 24.29-51
7	Matiu 25.1-30
8	Matiu 25.31-26.13
9	Matiu 26.14-46
10	Matiu 26.47-68
11	Matiu 26.69-27.14
12	Matiu 27.15-31
13	Matiu 27.32-66
14	Matiu 28.1-20
15	Maka 1.1-28
16	Maka 1.29-2.12
17	Maka 2.13-3.6
18	Maka 3.7-30
19	Maka 3.31-4.25
20	Maka 4.26-5.20
21	Maka 5.21-43
22	Maka 6.1-29
23	Maka 6.30-56
24	Maka 7.1-23
25	Maka 7.24-8.10
26	Maka 8.11-9.1
27	Maka 9.2-29
28	Maka 9.30-10.12

date	Scripture
1	Maka 10.13-31
2	Maka 10.32-52
3	Maka 11.1-26
4	Maka 11.27-12.17
5	Maka 12.18-37
6	Maka 12.38-13.13
7	Maka 13.14-37
8	Maka 14.1-21
9	Maka 14.22-52
10	Maka 14.53-72
11	Maka 15.1-47
12	Maka 16.1-20
13	Luka 1.1-25
14	Luka 1.26-56
15	Luka 1.57-80
16	Luka 2.1-35
17	Luka 2.36-52
18	Luka 3.1-22
19	Luka 3.23-38
20	Luka 4.1-30
21	Luka 4.31-5.11
22	Luka 5.12-28
23	Luka 5.29-6.11
24	Luka 6.12-38
25	Luka 6.39-7.10
26	Luka 7.11-35
27	Luka 7.36-8.3
28	Luka 8.4-21
29	Luka 8.22-39
30	Luka 8.40-9.6
31	Luka 9.7-27

date	Scripture
1	Luka 9.28-50
2	Luka 9.51-10.12
3	Luka 10.13-37
4	Luka 10.38-11.13
5	Luka 11.14-36
6	Luka 11.37-12.7
7	Luka 12.8-34
8	Luka 12.35-59
9	Luka 13.1-21
10	Luka 13.22-14.6
11	Luka 14.7-35
12	Luka 15.1-32
13	Luka 16.1-18
14	Luka 16.19-17.10
15	Luka 17.11-37
16	Luka 18.1-17
17	Luka 18.18-43
18	Luka 19.1-27
19	Luka 19.28-48
20	Luka 20.1-26
21	Luka 20.27-47
22	Luka 21.1-28
23	Luka 21.29-22.13
24	Luka 22.14-34
25	Luka 22.35-53
26	Luka 22.54-23.12
27	Luka 23.13-43
28	Luka 23.44-24.12
29	Luka 24.13-53
30	Dioni 1.1-28

date	Scripture
1	Dioni 1.29-51
2	Dioni 2.1-25
3	Dioni 3.1-21
4	Dioni 3.22-4.3
5	Dioni 4.4-42
6	Dioni 4.43-54
7	Dioni 5.1-23
8	Dioni 5.24-47
9	Dioni 6.1-21
10	Dioni 6.22-40
11	Dioni 6.41-71
12	Dioni 7.1-29
13	Dioni 7.30-52
14	Dioni 7.53-8.20
15	Dioni 8.21-30
16	Dioni 8.31-59
17	Dioni 9.1-41
18	Dioni 10.1-21
19	Dioni 10.22-42
20	Dioni 11.1-53
21	Dioni 11.54-12.19
22	Dioni 12.20-50
23	Dioni 13.1-30
24	Dioni 13.31-14.14
25	Dioni 14.15-31
26	Dioni 15.1-27
27	Dioni 16.1-33
28	Dioni 17.1-26
29	Dioni 18.1-24
30	Dioni 18.25-19.22
31	Dioni 19.23-42

date	Scripture
1	Dioni 20.1-31
2	Dioni 21.1-25
3	Abostolo 1.1-26
4	Abostolo 2.1-47
5	Abostolo 3.1-26
6	Abostolo 4.1-37
7	Abostolo 5.1-42
8	Abostolo 6.1-15
9	Abostolo 7.1-29
10	Abostolo 7.30-50
11	Abostolo 7.51-8.13
12	Abostolo 8.14-40
13	Abostolo 9.1-25
14	Abostolo 9.26-43
15	Abostolo 10.1-33
16	Abostolo 10.34-48
17	Abostolo 11.1-30
18	Abostolo 12.1-23
19	Abostolo 12.24-13.12
20	Abostolo 13.13-41
21	Abostolo 13.42-14.7
22	Abostolo 14.8-28
23	Abostolo 15.1-35
24	Abostolo 15.36-16.15
25	Abostolo 16.16-40
26	Abostolo 17.1-34
27	Abostolo 18.1-21
28	Abostolo 18.22-19.12
29	Abostolo 19.13-41
30	Abostolo 20.1-38

date	Scripture
1	Abostolo 21.1-16
2	Abostolo 21.17-36
3	Abostolo 21.37-22.16
4	Abostolo 22.17-23.10
5	Abostolo 23.11-35
6	Abostolo 24.1-27
7	Abostolo 25.1-27
8	Abostolo 26.1-32
9	Abostolo 27.1-20
10	Abostolo 27.21-44
11	Abostolo 28.1-31
12	Loma 1.1-17
13	Loma 1.18-32
14	Loma 2.1-24
15	Loma 2.25-3.8
16	Loma 3.9-31
17	Loma 4.1-12
18	Loma 4.13-5.5
19	Loma 5.6-21
20	Loma 6.1-23
21	Loma 7.1-14
22	Loma 7.15-8.6
23	Loma 8.7-21
24	Loma 8.22-39
25	Loma 9.1-21
26	Loma 9.22-10.13
27	Loma 10.14-11.12
28	Loma 11.13-36
29	Loma 12.1-21
30	Loma 13.1-14
31	Loma 14.1-23

date	Scripture
1	Loma 15.1-21
2	Loma 15.22-16.7
3	Loma 16.8-27
4	1 Koliniti 1.1-17
5	1 Koliniti 1.18-2.5
6	1 Koliniti 2.6-3.4
7	1 Koliniti 3.5-23
8	1 Koliniti 4.1-21
9	1 Koliniti 5.1-13
10	1 Koliniti 6.1-20
11	1 Koliniti 7.1-24
12	1 Koliniti 7.25-40
13	1 Koliniti 8.1-13
14	1 Koliniti 9.1-18
15	1 Koliniti 9.19-10.13
16	1 Koliniti 10.14-11.1
17	1 Koliniti 11.2-16
18	1 Koliniti 11.17-34
19	1 Koliniti 12.1-26
20	1 Koliniti 12.27-13.13
21	1 Koliniti 14.1-17
22	1 Koliniti 14.18-40
23	1 Koliniti 15.1-28
24	1 Koliniti 15.29-58
25	1 Koliniti 16.1-24
26	2 Koliniti 1.1-11
27	2 Koliniti 1.12-2.11
28	2 Koliniti 2.12-17
29	2 Koliniti 3.1-18
30	2 Koliniti 4.1-12
31	2 Koliniti 4.13-5.10

date	Scripture
1	2 Koliniti 5.11-21
2	2 Koliniti 6.1-13
3	2 Koliniti 6.14-7.7
4	2 Koliniti 7.8-16
5	2 Koliniti 8.1-15
6	2 Koliniti 8.16-24
7	2 Koliniti 9.1-15
8	2 Koliniti 10.1-18
9	2 Koliniti 11.1-15
10	2 Koliniti 11.16-33
11	2 Koliniti 12.1-10
12	2 Koliniti 12.11-21
13	2 Koliniti 13.1-14
14	Galesia 1.1-24
15	Galesia 2.1-16
16	Galesia 2.17-3.9
17	Galesia 3.10-22
18	Galesia 3.23-4.20
19	Galesia 4.21-5.12
20	Galesia 5.13-26
21	Galesia 6.1-18
22	Evesasi 1.1-23
23	Evesasi 2.1-22
24	Evesasi 3.1-21
25	Evesasi 4.1-16
26	Evesasi 4.17-5.2
27	Evesasi 5.3-33
28	Evesasi 6.1-24
29	Bilibai 1.1-26
30	Bilibai 1.27-2.18

date	Scripture
1	Bilibai 2.19-3.6
2	Bilibai 3.7-4.1
3	Bilibai 4.2-23
4	Kolosia 1.1-20
5	Kolosia 1.21-2.7
6	Kolosia 2.8-23
7	Kolosia 3.1-17
8	Kolosia 3.18-4.18
9	1 Tesalonia 1.1-2.9
10	1 Tesalonia 2.10-3.13
11	1 Tesalonia 4.1-5.3
12	1 Tesalonia 5.4-28
13	2 Tesalonia 1.1-12
14	2 Tesalonia 2.1-17
15	2 Tesalonia 3.1-18
16	1 Timoti 1.1-20
17	1 Timoti 2.1-15
18	1 Timoti 3.1-16
19	1 Timoti 4.1-16
20	1 Timoti 5.1-25
21	1 Timoti 6.1-21
22	2 Timoti 1.1-18
23	2 Timoti 2.1-21
24	2 Timoti 2.22-3.17
25	2 Timoti 4.1-22
26	Taitasi 1.1-16
27	Taitasi 2.1-14
28	Taitasi 2.15-3.15
29	Bilimoni 1.1-25
30	Hibulu 1.1-14
31	Hibulu 2.1-18

date	Scripture
1	Hibulu 3.1-19
2	Hibulu 4.1-13
3	Hibulu 4.14–5.14
4	Hibulu 6.1-20
5	Hibulu 7.1-19
6	Hibulu 7.20-28
7	Hibulu 8.1-13
8	Hibulu 9.1-10
9	Hibulu 9.11-28
10	Hibulu 10.1-18
11	Hibulu 10.19-39
12	Hibulu 11.1-16
13	Hibulu 11.17-31
14	Hibulu 11.32–12.13
15	Hibulu 12.14-29
16	Hibulu 13.1-25
17	Diemisi 1.1-18
18	Diemisi 1.19–2.17
19	Diemisi 2.18–3.18
20	Diemisi 4.1-17
21	Diemisi 5.1-20
22	1 Bita 1.1-12
23	1 Bita 1.13–2.10
24	1 Bita 2.11–3.7
25	1 Bita 3.8–4.6
26	1 Bita 4.7–5.14
27	2 Bita 1.1-21
28	2 Bita 2.1-22
29	2 Bita 3.1-18
30	1 Dioni 1.1-10

date	Scripture
1	1 Dioni 2.1-17
2	1 Dioni 2.18-3.2
3	1 Dioni 3.3-24
4	1 Dioni 4.1-21
5	1 Dioni 5.1-21
6	2 Dioni 1.1-13
7	3 Dioni 1.1-14
8	Diudi 1.1-25
9	Abokalubo 1.1-20
10	Abokalubo 2.1-17
11	Abokalubo 2.18-3.6
12	Abokalubo 3.7-22
13	Abokalubo 4.1-11
14	Abokalubo 5.1-14
15	Abokalubo 6.1-17
16	Abokalubo 7.1-17
17	Abokalubo 8.1-13
18	Abokalubo 9.1-21
19	Abokalubo 10.1-11
20	Abokalubo 11.1-19
21	Abokalubo 12.1-18
22	Abokalubo 13.1-18
23	Abokalubo 14.1-20
24	Abokalubo 15.1-8
25	Abokalubo 16.1-21
26	Abokalubo 17.1-18
27	Abokalubo 18.1-24
28	Abokalubo 19.1-21
29	Abokalubo 20.1-15
30	Abokalubo 21.1-27
31	Abokalubo 22.1-21

Hoto degomolebiae ihu

Aliobagasi O mole Ateni keve kanisolo esemuiau eboullahamale matama. Iale ivi kemo kanisolo esemu keau abu ebia malevei loui avoe, “Aliobagasi” (Abostolo 17.22).

abostolo Iesuu esemu tuelo (12) tabagevege abu esemuve seleve holievei hotove mai loumalea. Ige Bolo keta abostolo ata.

Atae Ese Keu Dilava mo Iesu. Isito keu vatae lohoale ui atae vaveve nahate vale kemo au ebia mai Atae Ese toai vaveveabe toelamo malevenu. Isi vani degomole auna hoto louniege au bae au ivi ke loulivebene. Isito auna au ebiamo loui kosea, “Atae Ese” (Daniel 7.13-14; Matiu 11.19).

Babuloni Keu vata mole Babulonia ke o baluga. Subuta Babulonia ataeau Diue atahi tuvalilalahai kebia malevei abu oe tilu. Iniale vani mole Dilavau louge ata degomoleau lohoale Babulonia kebiai tuvaliai negolahai havehatuge o baluga Babuloni keu uoholi seleve ke vanu. Iale Iesu vani kemo o mole toela Loma keho abu loui avoe, “Babuloni” (1 Bitu 5.13; Abokalubo 18.2).

Baelo Baelo keu loboe dilavae ivi. Subuta mole Keinani ataeabuna ke hoesehavogei (Loma 11.14).

Balisia ataea Diue ata kebiamo ata keau Mosese menaka ke ehovai abu ebia malevei Balisia toevei emo abu isivie menaka keta otovei loui isiviale ataeau ehovai. Isito biaeau abu menaka ke ehovaholima (Matiu 23.13-36).

Basova Subuta Diue ataeau Equibitoe usege hatihatie anelu keu Egubitoe omo moe ovokina kebia haveito Iselala ata kebia o evihai tai moe ovokina kebia haveholinu. Katealemoike Diue ataeau vani ke ivihai avoe, “Basova.” Isi vagana igaegae kela huhulalahai iveveve vama (Maka 14.1).

beikini bauda Bukae Hotomo beikini bauda keu uoholinu. Isisto isti (naoe hotomo “yeast”) keu beikini baudati vaveve igae. Kebia abuna valava mai balugatisi (Luka 13.21). Ige isti ke ihu degomole abulike vaveve toela, mesoho vaveve toela vamalebina ata, isi loboe hoto (1 Koliniti 5.6-8; Galesia 5.9).

beloveta ata Diue ata kebiamo ata degomoleau Dilava hoto loui gabie lohoveve keta loui ata haivemalea (Aisaia, Dielimaia isi degomolea). Ige ekalesia kebiamo degomoleta katelahama (Abostolo 15.32; 1 Koliniti 12.28).

Bentikosi Diue vahaeho vani Basova ke iae vanie ni vivti (50) keau uoholisege Diue ataeabuna vani molomo vahaeholahai abu bulue lovi vasohuta bailahamale ke malei lohohi Dilava hoesehavogei. Vani keike abu ivihai avoe, “Bentikosi” (Abostolo 2.1).

Biesabolo Munanae toelae kosive Setene ke ivi mole (Luka 11.15).

Deividi mo Abu Bukamo Iesu ivihai avoe, “Deividi mo”. Iesu keu Deividi mo holioholisito abu Bukamo loui avoe, “Kelisona bae Deividi valadamo lohohi.” Iale kemoike abu ivihai avoe, “Deividi mo” (Matiu 15.22).

Diue ataeau abu vaveve toela ulihamale vani Vani kela Diue dubue kosive baluga kena mamoe hamai tahove mai atae vaveve toela ulihaho Dilava nimo mamogei. Iale ke nahate Iesuu tava igae au tahomo nahie toela ulihanu (Leviticus 16.29-34; Abostolo 27.9; Loma 5.11).

Diue ata-Iselala ata Ata keau ni mole holioholisito ata igaea. Abuna vani degomole loui kosea, “Noeau Diue ataea.” Isi vani degomole loui kosea, “Noeau Iselalaea.” Isito hotoeabe igaieke Hibulu.

dubue udaha nalimale bukate Ata kebiau Dielusalemae Diue dubu baluga ke nalimale bukatea. Keau ke nalisi isiviholilu Diue ata holioholiale keau keve velehovoi taliho. Diue kosiveau kebia hanavege abu Iesu maliho tilu (Dioni 7.32, 45).

Ehikulia Keu kosive mole. Iale keu avuta ata haivei loui avoe, “La ono mole valiege mesoho au la malevei vahaehotiege ke vave.” Kateige ata benahateau loboe hoto ke evisi ehovalu (Abostolo 17.18).

Elodi Bukae Hotomo vatae kosive Elodi abuita abuitaeau ua. Iale Elodi mole Iesuu umale kela keike louge abu moe ese havehatuevelu (Matiu 2.16-19). Isege Elodi mole emo ke mo Antibasi keike louge abu babatisogevemale Dioni ke eno heisi etulelu (Maka 6.14-29). Ige emo Elodi mole Agaliba keike Diemisi hamai Bitu mai dibulae mamonu. Isi au ebia ebagemage Dilavau hamage hatinu (Abostolo 12). Ige emo Agaliba ke mo Agaliba keike Elodi mole. Keike abu amakini Benisiti Bolou au deiada louge evilu (Abostolo 25.13).

Elodi ataea Keabulike gamanie kosive Elodiho isivilalahai ehovama. Isi isiviholiale Loma ataeau kosiveabe holisi nibiveleho. Isito isivilahale Elodi valadamo lohoale keau nibivegei (Maka 3.6; 12.13).

Elodiasi Keu Bilibi melamenu. Isege gabie Bilibi nana Elodiu vavolota au hohoe keate ke melamenu (Maka 6.17-28).

Genesaleti Keu tabu baluga Galili ke ivi mole.

Gilikie hoto/Hibulu hoto Abu hoto abui kebiamo Buka Tumute hisalialu. Vasohuta Hibulu hotomo (Old Testament) hisalialu. Isi gabie Gilikie hotomo (New Testament) keta hisalialu. (Hibulu hoto keu Diue atae hoto. Ige Gilikie hoto keu hoto baluga. Kosealemo ata bahataebuna hoto kemo hoto lougei (Hoto keu Motu ke nahate).

heiata loviemale isi ibinahlo loviemale Vata degomoleve ata degomole abuna tiliege vata degomolehi tuvalialiege kemo ata malevei lohoge ata keabuna abuhu heiata lovilahagei. Isege kunaite ataeabuna tiliege ata voievei malevei lohoge abuna abuhu heiata lovilahagei. Isege ibinahlo loviemale keau abu ebiaho lovilahai o mesoho ata moleho lovilahai kemo ibina malema (1 Koliniti 7.21; Evesasi 6.5).

hoto tumute Ataeabuna hoto vade loui ke mai selevetiho valiege Dilava ivi louge ataeabuna hilokage auna au louale ke vai (naoe hotomo “vow” or “oath”) (Matiu 14.9; Abostolo 18.18).

Keliso Dilavau subuta Diue ata tetaeveveve ata Keliso ke ivi loui namigeveve avoe, “Kena bae gabie la toelamo la malevei.” Kateaito vani mole Iesuu vatae lohoale Keliso ke vaveve mai selevetinu.

kumoe Seteneu, anelue toelaeau, isi munanae toelaeau umale matama (Luka 8.31; Abokalubo 9.1; 20.1).

Levani Keu loboe dilavae ivi mole. Subuta Keinani ataeabuna ke guligulihavogei (Abostolo 7.43).

Livai ata Dilavau subuta Diekobo ese mole Livai ebagemage au dubu nalimale lovi ke vanu. Iale Livai valada kebiamo lohoale kebia unahaeabuna dubu nalisi lovi ke vagei (Luka 10.32; Numbers 3.5-13).

Loma ataea Iesu vani kela Loma ata keau vuvune baluga malei vatae ata bahata nibievelu. Isi Diue ata kebiata nibievelu. Ige Loma Kosive mole Bailoti keike Iesuemo kotanu (Dioni 11.48; Mati 27.2).

masitae i Ke iu esevehame seleve. Isito ive kena ulianiege idi balugataho seleve holisi (Matiu 13.31).

Moloko Keu loboe dilavae ivi mole. Subuta Keinani ataeabuna ke guligulihavogei (Abostolo 7.43).

Nikolaita Keu loboe hoto loui haivemale ata. Begamosi dubu kemo ekalesia degomoleau Nikolaita loboe hoto evisi vaveve toela vai teibae vaveve vama (Abokalubo 2.6, 15).

odava Vaveve toelama haluvimale kebiaeau umale matama (Abokalubo 1.18; 20.13).

olive Keu idi mole. Iale Diue ataeabuna baive ke malei vunahai kemo oele malegei. Abuna oeleve keta lovi ehogei. Isi keta mulamulagei. Isi lamebamo bubuai mahogei (Maka 6.13; Abokalubo 6.6).

Sadukea ataea Keau Dilava hoto maholisito loui avoe, “Haluviale keau bae hovedevelivebene. Ataeau haluvige munanaeabeu uoholinu.” Isi loui avoe, “Anelu keau uoholilu” (Abostolo 23.6-9).

Samalia ataea Keu Diue ata kebia vatae vigomo ua. Samalia ata keabuna Diue ata kebiahi moleho itumulahai mole aegevegei. Abu bae mole tetaeveve hoesegevelivebene. Kosealemo vaveveabe degomole keau mole nahate holioholilu (Luka 10.38; Dioni 4.1-42).

Selotie ata Ata keu ata degomolehi negolahai isiviholiale vata degomole ataeau nalieve nibievelihu. Isito isiviale vataeabe keu au ehuvale negoai uge biaeau nalisi. Ata kateimaleike abu malevei loui avoe, “Selotie ataea” (Luka 6.15; Abostolo 1.13).

silu Keu titia ke nahate. Mesoho a vene o ono molemo idiamiage ataeau bae ke mai heilivebene. Iale ke nahate subuta ataeabuna levaleva mesoho ono mole hanavoho valiege abuna kemo silu mavoito bae ke hanavoi. Ige atabeu bae ke alavoi elehalivebene. Isito ata keho hanavoa ke unahana ke mai alavoi elehai. Silu ke abuna hau degomolemo otovege ataeabuna ke elehai hilokage hau keau biagete (Matiu 27.66; Abokalubo 5.1; 7.2-4).

Sisa Ivi Sisa keu Loma kosive baluga kebia ivita abuna ivigevegei. Keu iviabe holioholisito abuna kosive baluga holiegeve abuna ivigeveve kosea, Sisa (Maka 12.14; Abostolo 24.8).

Sitoika Ata keau Dilava hoto ehovaholisito loui avoe, “Vahaeho isi vatetumu keau baluga holioholilu. Isito u unahai negolahale keu baluga” (Abostolo 17.18).

Taibiliasi Keu tabu baluga Galili ke ivi mole.

takesi malemale ataea Iesuu umale vani kela ata keabuna tiliege ataemo takesi moni malei lobogevei ke tatamo degomoleta abu ebiaho malegei. Katealemoike ataeau malevei loui avoe, “Atae toelaea” (Luka 5.30; 18.9-14).

uaini Uaini keu hote mole. Iale ataeabuna ke bai ehai vunahai eve ke igei. Abuna iveve baluga valiege ke igei (Dioni 2.1-10; 15.1).

uvuve esemu Hoto ko Dionina vani degomole ke lougei. Kosealemo Dioni keu Iesu uvue esemu selevel. Dionina hoto louniege au bae au ivi ke loulivebene. Isito auna Iesu uvue esemu ke au ebiamo lougei (Dioni 13.23; 21.20-24).

vate bohimale Subuta Dilavau Diue ata tabageveale kemo abu abu moe esee vudie vate ke bohima. Keau ke vai loui avoe, “Noeau Dilavau no tabagevege no atave holievelu” (Genesis 17.9-14).